

Holy Bible

Aionian Edition®

बघल्याणी नवां विधान

Mahasu Pahari Baghlayani Bible

AionianBible.org

The world's first Holy Bible untranslation

100% free to copy and print

also known as "The Purple Bible"

Holy Bible Aionian Edition ©

बघल्याणी नवां विधान

Mahasu Pahari Baghlayani Bible

CC Attribution ShareAlike 4.0, 2018-2024

Source text: eBible.org

Source version: 2/21/2024

Source copyright: CC Attribution ShareAlike 4.0

The Love Fellowship, 2021

Formatted by Speedata Publisher 4.19.2 (Pro) on 4/23/2024

100% Free to Copy and Print

TOR Anonymously

<https://AionianBible.org>

Published by Nainoia Inc

<https://Nainoia-Inc.signedon.net>

We pray for a modern public domain translation in every language

Report content and format concerns to Nainoia Inc

Volunteer help is welcome and appreciated!

Celebrate Jesus Christ's victory of grace!

Preface

बघल्याणी at AionianBible.org/Preface

The *Holy Bible Aionian Edition* © is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aiōdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aiōdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Take the time to understand these eleven words. The original translation is unaltered and a note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by-nd/4.0, allowing 100% freedom to copy and print, if respecting source copyrights. Check the Reader's Guide and read online at AionianBible.org, with Android, and TOR network. Why purple? King Jesus' Word is royal... and purple is the color of royalty!

Table of Contents

NEW TESTAMENT

मत्ती	11
मरकुस	29
लूका	41
यूहन्ना	60
प्रेरितों के काम	75
रोमियों	94
1 कुरिन्थियों	103
2 कुरिन्थियों	112
गलातियों	118
इफिसियों	122
फिलिप्पियों	125
कुलुरिसियों	128
1 थिस्सलुनीकियों	130
2 थिस्सलुनीकियों	132
1 तीमुथियुस	134
2 तीमुथियुस	137
तीतुस	139
फिलेमोन	141
इब्रानियों	142
याकूब	149
1 पतरस	152
2 पतरस	155
1 यूहन्ना	157
2 यूहन्ना	160
3 यूहन्ना	161
यहूदा	162
प्रकाशित वाक्य	163

APPENDIX

Reader's Guide

Glossary

Maps

Destiny

Illustrations, Doré

NEW TESTAMENT



तेबे यीशुए बोलेया, “ओ पिता! इना खे माफ कर, कऊँकि यो नि जाणदे कि क्या लगी रे करने?”

और तिने चिट्ठिया पायी की तिना रे टाले बाँडी ते।

लूका 23:34

मत्ती

1 ये यीशु मसीह रे पुर्वजा रे नाओं ए जो राजा दाऊद और अब्राहमो रे वंशो रे थे। 2 अब्राहमो ते इसहाक ऊआ; इसहाको ते याकूब ऊआ, याकूबो ते यहूदा और तेसरे ओर बी बऊत पाई ऊए। 3 यहूदा री लाडी तामारा ते फिरिस और जोरह ऊआ, फिरिसो ते हिसोन जम्मेया और हिसोनो ते एराम ऊआ, 4 एरामो ते अम्मीनादाब ऊआ, अम्मीनादाबो ते नहशोन ऊआ और नहशोनो ते सलमोन ऊआ। 5 सलमोन और तेसरी लाडी राहाबा ते बोअज ऊआ, बोअज और रूता ते ओबेद ऊआ और ओबेदो ते यिशे ऊआ। 6 यिशे ते दाऊद राजा जम्मेया। दाऊदो ते सुलेमान तेसा जवाणसा ते ऊआ, जो पईले ऊरिय्याहो री लाडी थी। 7 सुलेमानो ते रहबाम ऊआ, रहबामो ते अबिय्याह ऊआ, अबिय्याहो ते आसा ऊआ, 8 आसा ते यहोशफात ऊआ, यहोशफातो ते योराम और योरामो ते उज्जियाह ऊआ। 9 उज्जियाहो ते योताम, योतामो ते आहाज और आहाजो ते हिजिकियाह ऊआ। 10 हिजिकियाहो ते मनशिशह, मनशिशहो ते आमोन और आमोनो ते योशिय्याह ऊआ। 11 इस्राएली लोका खे बेबीलोनो खे बन्दी बणाई की लई जाणे ते पईले योशिय्याहो रे पोते यकून्याह और तेसरे पाई ऊए। 12 बन्दी ऊई की बेबीलोनो रे पऊँछाणे ते बाद यकून्याहो ते शालतिएल जम्मेया और शालतिएलो रा पोता जरूबाबिल ऊआ। 13 जरूबाबिलो ते अबीहूद, अबीहूदो ते इल्याकीम और इल्याकीमो ते अजोर ऊआ। 14 अजोरो ते सदोक, सदोको ते अखीम और अखीमो ते इलीहूद ऊआ। 15 इलीहूदो ते इलियाजार, इलियाजारो ते मत्तान और मत्तानो ते याकूब ऊआ। 16 याकूबो ते यूसुफ ऊआ, जो मरियमा रा लाड़ा था। मरियमा रे यीशु पवित्र आत्मा ते जम्मेया, जिना खे मसीह बोलेया जाओआ। 17 अब्राहमो ते दाऊदो तक सारिया चौदा पीढ़िया ऊईया और दाऊदो ते इस्राएलिया खे बाबेलो तक बन्दी बणाई की पऊँछाणे तक चौदा पीढ़िया ऊईया और बेबीलोनो तक बन्दी बणाई की पऊँछाणे ते मसीह तक चौदा पीढ़िया ऊईया। 18 एबे यीशु मसीह रा जन्म ईयां ऊआ, कि जेबे तिना री आम्मा मरियमा री मंगणी यूसुफो साथे ऊई, तेबे तिना रा ब्या ऊणे ते पईले ई मरियम पवित्र आत्मा री तरफा ते गर्भवती ऊईगी। 19 तेबे तेसा रा ऊणे वाला लाड़ा यूसुफ जो तर्मा था, से तेसा खे बदनम नि करना चाओ था, तिने आपणे मनो रे सोचेया कि मां ये चुपचाप छाडी देणी। 20 जेबे से एड़ा सोचणे ई लगी रा था, तेबे प्रभुए रा स्वर्गदूत तेसखे सुपने रे दिशेया और से तेसखे बोलणे लगेया, “ओ दाऊदो रे वंशो रे यूसुफ! तू आपणी ऊणे वाली लाडी मरियमा खे आपणे कअरे ल्याऊणे ते नि डर, कऊँकि जो तेसा रे पेटो रे बच्चा ए, से पवित्र आत्मा रिया तरफा तेआ। 21 तेसा रे एक पाऊ जमणा, तँ तेसरा नाओं यीशु राखणा। कऊँकि तेस आपणे लोक तिना रे पापो ते बचाई देणे।” 22 ये सब कुछ तेबे ऊआ ताकि जो वचन प्रभुए भविष्यबक्ता ते बुलाई राखे, सेयो पूरे ओ 23 “देखो, एक कुआँरी गर्भवती ऊणी और तेसा रे एक पाऊ जमणा और तेसरा नाओं इम्मानुएल ऊणा,” जेतेरा मतलब ए “परमेशर आसा साथे ए।” 24 तेबे यूसुफ सयी की उठेया और जियँ ई तेसखे परमेशरो रे स्वर्गदूते बोलेया था, तियाँ ई से आपणी ऊणे वाली लाडिया खे आपणे कअरे ली आया 25 और जदुओ तक, तेसा रे पाऊ नि जम्मेया, तदुओ तक यूसुफ तेसा गे नि गया और तेबे तेसा रे पाऊ जम्मेया और तिने तेसरा नाओं यीशु राखेया।

2 हेरोदेस राजे रे राज्य रे बखते जेबे यहूदिया प्रदेशो रे बैतलहम नगरो रे यीशुए रा जन्म ऊआ, तेबे देखो, पूर्व देशो ते केई ज्योतपी यरूशलेम नगरो रे आए और पूछणे लगे, 2 “जो यहूदिया रा राजा जम्मी रा, से केई ए? कऊँकि आसे पूर्वो रे तेसरा तारा देखेया जो तेसरे जन्मो रे बारे रे बताओआ और आसे तेसगे माथा टेकणे आयी रे।” 3 ये सुणी की हेरोदेस राजा और तेस साथे पूरा यरूशलेम कबराईगा। 4 तिने लोका रे सब बडे पुरोईत और शास्त्री कट्टे किन्ते और पूछेया, “मसीह रा जन्म केई ऊणा चाईयो?” 5 तिने सबी हेरोदेस राजे खे बोलेया, “यहूदिया प्रदेशो रे बैतलहम नगरो रे; कऊँकि

परमेशरे मीका भविष्यबक्ते रे जरिए एई अया बोलेया रा 6 “ओ बैतलहम, जो यहूदा रे प्रदेशो रे, तूँ कियँ बी यहूदा रे अधिकारिया रे सबी ते छोटा निया; कऊँकि तां बीचा ते एक राज करने वाला निकलना जो मेरी प्रजा इस्राएलो रा रखवाला ऊणा।” 7 तेबे हेरोदेसे ज्योतपी चोरिए जे बुलाए और तिना ते पूछेया कि तारा ठीक केस बखते दिशेया था? 8 तिने ये बोली की सेयो बैतलहमो खे पेजे, “जाओ, और जाई की तेस बच्चे रे बारे रे ठीक-ठीक पता करो। जेबे से मिली जाओगा, तो आईकि मांगे बताओ, ताकि आऊँ बी आईकि तेसगे माथा टेकी सकूँ।” 9 सेयो राजे री गल्ल सुणी की चली गे और देखो, जो तारा तिने पूर्वो रे देखेया था, से तिना ते आगे-आगे चलणे लगेया और जेती बच्चा था, तेती जाई की रूकी गा। 10 तेस तारे खे देखी की सेयो बऊत खुश ऊए। 11 तेबे सेयो तेस कअरो रे पऊँछे और तिने बच्चा तेसरी माए मरियमा साथे देखेया, तेबे तिने सुंओ रे पारे लेटी की यीशुए गे माथा टेकेया और आपणा-आपणा चोला खोलेया और सुईना, लोबान और गन्धरसो री पेंट चढाई। 12 तेबे सुपने रे तिना खे ये आज्ञा मिली कि हेरोदेस राजे गे फेर नि जाणा, तेबे सेयो दुजिया बाटा रिये आपणे देशो खे चली गे। 13 तिना ज्योतपिया रे चली जाणे ते बाद परमेशरो रे एक स्वर्गदूते यूसुफो खे सुपने रे दिशणे ते बाद बोलेया, “उठ, और एस बच्चे और एसरी माया खे लयी की मिस देशो खे नठी जा और जदुओ तक आऊँ ताखे नि बोलूँ, तदुओ तक तेथी रणा, कऊँकि हेरोदेस राजा एस बच्चे खे काणा चाओआ और से एसखे टोलने लगी रा।” 14 तेबे से रातो-रात उठेया और बच्चे और बच्चे री माया खे लई की मिस देशो खे चली गा। 15 जदुओ तक हेरोदेस नि मरेया, तदुओ तक से तेथी रया, ताकि जो वचन प्रभुए होशे भविष्यबक्ता ते बुलाई राखे, सेयो पूरे ओ कि, “मैं आपणा पाऊ मिस देशो ते बुलाया।” 16 जेबे हेरोदेसो खे पता चलेया कि ज्योतपिये आऊँ ठगी ता, तेबे तेसखे बड़ा पारी रोष आया। तेबे तिने ज्योतपिया रे जरिए सई बखत पूछे रे मुताबिक आपणे मांणु बैतलहम और नेडे-तेडे पेजे और जो दो साला रे पाऊ थे और तिना ते छोटे थे, कुलाई ते। 17 तेबे जो वचन यिर्मयाह भविष्यबक्ते बोलेया था, से पूरा ऊआ; 18 “रामाह नगरो रे बडिया-पारी राडिया सुणिया, रोणा और शोग; राहेल आपणे बच्चेया खे रोणे लगी री थी और चुप नि ऊणा चाओ थी, कऊँकि तिना रे बच्चे काईते थे।” 19 हेरोदेसो रे मरने ते बाद, परमेशरो रे स्वर्गदूते मिस देशो रे यूसुफो खे सुपने रे बोलेया 20 “उठ और बच्चे और तेसरी आम्मा खे लई की इस्राएल देशो खे चली जा, कऊँकि जो बच्चे खे काणा चाओ थे, सेयो तो मरी गे।” 21 से उठेया और बच्चे और तेसरी आम्मा खे साथे लई की इस्राएल देशो खे आईगा। 22 पर जेबे तिने सुणेया कि हेरोदेसो री जगा पाँडे एबे तेसरा पाऊ अरखिलाऊस यहूदिया प्रदेशो रे राज्य लगी रा चलाणे, तो से तेती जाणे ते डरिगा। तेबे सुपने रे तेसखे चेतावणी मिली और से गलील देशो खे चली गा। 23 तेबे से नासरत नाओं रे नगरो रे बसी गा, ताकि भविष्यबक्ते रे जरिए बोलेया रा वचन पूरा ओ कि, “तेसखे नासरी बोलेया जाणा।”

3 तिना दिना रे यूहन्ना बपतिस्मा देणे वाला यहूदिया रे सुणसाण जगा रे आयी की ये प्रचार करने लगेया, 2 “मन फेरो; कऊँकि स्वर्गो रा राज्य नेडे आईगा रा।” 3 ये सेई मांणु ए, जेसरी गल्ल यशायाह भविष्यबक्ते किती थी कि, “सुणसाण जगा रे एक आक्का पाणे वाले री आवाज ओई, ‘प्रभुए री बाट तयार करो, और तिना री सड़का सीदिया करो।’” 4 तिने यूहन्ने ऊँटो रे बालो रे टाले पईनी राखे थे और आपणे लको रे चामडे रा पट्ट बानेया रा था और तेसरी रोटी टिडिया और बणो रा सईत था। 5 तेबे यरूशलेमो रे, सारे यहूदिया प्रदेशो रे और सारे यरदन देशो रे ओरले-पोरले मांणु तेसगे आए। 6 तेबे तिने आपणे-आपणे पापो खे मानी की यरदन नदिया रे तेसते बपतिस्मा लया। 7 जेबे तिने देखेया कि बऊत सारे फरीसी और सदूकी मांगे बपतिस्मा लणे लगी रे आऊणे, तेबे तिना खे बोलेया, “ओ सापो जेडे जईरीले लोको! तुसा खे किने जताई ता कि आऊणे वाले परमेशरो रे रोषो ते नतो? 8 इजी री खातर मन फिराओ और अच्छे काम करो। 9 और आपणे-आपणे मनो रे

एडा नि सोचो, 'आसा रा बाओ अब्राहम ए।' कऊँकि आऊँ तुसा खे बोलूँआ कि परमेशर इना पात्थरा ते अब्राहमो खे त्वाद पैदा करी सकोआ। 10 एवे परमेशर तुसा खे सजा देणे वाला ए, तेबेई तो जो-जो डाल खरा फल नि ल्याऊँदे, से बाडे और आगी रे सेटे जाओए। 11 "आऊँ तो पाणिण की तुसा खे मन फेरने रा बपतिस्मा देऊँआ, पर जो मांते बाद आऊणे वाला ए से मांते बी जादा महान ए, आऊँ तेसरे जोडे चकणे जोगा पनिण। तेस तुसा खे पवित्र आत्मा और आगी साथे बपतिस्मा देणा। 12 तेसरा सूप तेसरे आथो रे ए और तेस आपणा खल्याण ठीक टंगो ते साफ करना और कणक तो आपणे पण्डारो रे राखी देणी, पर जो पूऊ ऊणा, से एड़िया आगी रे सेटणा, जो कदी नि बिजणी।" 13 तेस बखते यीशु मसीह गलीलो ते यरदन नदिया रे कनारे यूहन्ने ते बपतिस्मा लणे आयो। 14 पर यूहन्ना तेसखे ये बोली की रोकणे लगेया, "माखे तो तुसा रे आथो ते बपतिस्मा लणे री जरूरत ए और तुसे मांगे आयी रे?" 15 यीशुए तेसखे ये जवाब दित्त्या, "एवे तो एडा ई ऊणे दे; कऊँकि आसा खे ईयाँ ई सारी धार्मिकता पूरी करनी ठीक ए।" तेबे तिने यीशुए री गल्ल मानी 16 और यीशु मसीहे फटाफट बपतिस्मा लया और पाणिण ते पँदि आए, और देखो, तिना खे सर्ग खुली गा; तेबे तिने परमेशरो री पवित्र आत्मा खे जियाँ कबूतर उड़दा ऊआ थाले आओआ तियाँ ई तिने आपू पँदि आऊँदे ऊए देखेया 17 और देखो, स्वर्गो ते ये आवाज आयी, "ये मेरा प्यारा पुत्र ए, आऊँ एसते बऊत खुश ए।"

4 तेबे पवित्र आत्मा यीशुए खे सुणसाण जगा रे लईगा, ताकि शैतानो ते तिना री परीक्षा ओ। 2 सेयो चाली दिन और चाली राती पूखे रये और तेबे तिना खे पूख लगी। 3 तेबे शैताने यीशुए गे आई की बोलेया, "जे तू परमेशरो रा पुत्र ए, तो इना पात्थरा खे बोल कि रोटी बणी जाओ।" 4 यीशुए जवाब दित्त्या, "पवित्र शास्त्रो रे लिखी राखेया, "मांणु रोतिया साथे ई जिऊँदा नि रणा, पर हर एक वचन, जो परमेशरो रे मुँओ ते निकली रे तिना खे मानी की जिऊँदा रओआ।" 5 तेबे शैतान यीशुए खे पवित्र नगर यरूशलेमो खे लईगा और सेयो मन्दरो री चूँडिया पँदि खडे करी ते। 6 तेबे तिना खे बोलणे लगेया, "जे तू परमेशरो रा पुत्र ए, तो आपू खे एथा ते थाले रुड़ाई दे; कऊँकि पवित्र शास्त्रो रे लिखी राखेया कि परमेशरो तेरिया तँदि आपणे स्वर्गदूता खे आज्ञा देणी, "और तिना तू आपणे आथो-आथ चकी लणा, केथी एडा नि ओ कि तेरे पैरो रे पात्थरो साथे बूडो।" 7 यीशुए तेसखे बोलेया, "पवित्र शास्त्रो रे एडा बीए लिखे रा, तूँ प्रभु, आपणे परमेशरो खे नि परख।" 8 तेबे शैतान तिना खे एक ऊच्ये पाह्लो पँदि लईगा और सारी दुनिया रे सारे राज्य और तिजी रे एशो-आराम दखाई की 9 तिना खे बोलेया, "जे तां मांगे माथा टेकणा, तो मां ताखे ये सब कुछ देई देणा।" 10 तेबे यीशुए तेसखे बोलेया, "हईओ शैतान; मेरी नजरा ते दूर ऊई जा, कऊँकि पवित्र शास्त्रो रे एडा लिखी राखेया, 'तूँ प्रभु आपणे परमेशरो गे ई माथा टेक और बस तिना री ई आराधना कर।'" 11 तेबे शैतान यीशुए गे ते चली गा और स्वर्गदूत तिना री सेवा करने लगे। 12 जेबे यीशुए सुणेया कि यूहन्ना पकडवाईता, तेबे सेयो यहूदिया प्रदेशो खे छाडी की गलील प्रदेशो रे नासरत नगरो खे चली गे। 13 और फेर सेयो नासरत नगरो खे छाडी की कफरनहूम नगरो रे रणे लगे, जो जबूलून और नप्ताली इलाके रे समुद्रो रे कनारे था। 14 ताकि जो यशयाह भविष्यबक्ते बोलेया था, से पूरा ओ, 15 "जबूलून नगरो नप्तालिया रे इलाके, समुद्रो री बाटा रिये यरदन नदिया रे पार, दूजी जातिया रा गलील। 16 जो मांणु परमेशरो खे नि जाणदे और न्हरे रे जिऊणे लगी रे थे, तिने बड़ी जोति देखी; और जो मौता ते डरी की जिऊणे लगी रे थे, तिना पँदि जोति चमकी।" 17 तेस बखतो ते यीशुए ये प्रचार करना और ये बोलणा शुरू करी ता कि, "मन फेरों कऊँकि स्वर्गो रा राज्य नेडे आईगा रा।" 18 तेबे तिने गलीलो रे समुद्रो रे कनारे कूमदे ऊए दो पाई, मतलब-शमोन, जेसखे पतरस बी बोलोए और तेसरा पाई अन्द्रियास समुद्रो रे जाल पँदि ऊए देखेया, कऊँकि सेयो मछलिया पकडने वाले थे। 19 तेबे यीशुए तिना खे बोलेया, "मां पीछे आओ और जियाँ तुसे मच्छली पकडना जाणोए तियाँ ई

मां तुसा खे परमेशरो गे मांणु पकडी की ल्याऊणे सिखाणे।" 20 सेयो तेबुई जाल छाडी की यीशुए पीछे चली पडे। 21 तेथा ते आगे जाई की यीशुए और दो पाई मतलब जब्दिए रे पाऊ याकूब और तेसरा पाई यूहन्ना आपणे पिते साथे किस्तिया पँदि जाल ठीक करदे ऊए देखे और तिने सेयो बी बुलाए। 22 सेयो तेबुई आपणी किस्ती और आपणे पिते खे छाडी की यीशुए रे पीछे चली पडे। 23 यीशु गलील प्रदेशो रे बऊत सारी जगा रे कूमदे ए और तिना री प्रार्थना रे कअरो रे उपदेश और राज्य रा सुसमाचार प्रचार करदे ए और लोका री बमारिया और कमजोरिया खे दूर करदे ए। 24 तेबे सारे सीरिया प्रदेशो रे सेयो मशुर ऊईगे और लोक सारे बमारा खे, जो कई प्रकारा रिया बमारिया ते और दु: खो रे जकडी रे थे, जिना रे दुष्टात्मा थिया, मिर्माँ वाले और अदरंगो रे रोगिया खे यीशुए गे ल्याए और तिने सेयो ठीक कित्ते। 25 तेबे गलील प्रदेश, दिकापुलिस इलाका, यरूशलेम नगर, यहूदिया प्रदेश और यरदनो री नदिया ते पारो ते पीड़ा री पीड़ तिना पीछे आईगी।

5 यीशु तेसा पीड़ा खे देखी की पाह्लो पँदि चढ़ी गे, जेबे सेयो उपदेश देणे बैठे, तेबे तिना रे चले तिना गे आए। 2 तेबे यीशु ये उपदेश देणे लगे: 3 "धन्य ए सेयो, जो मनो रे सलीन ए, कऊँकि स्वर्गो रा राज्य तिना रा ईए। 4 धन्य ए सेयो, जो शोग करोए, कऊँकि परमेशरो तिना खे शान्ति देणी। 5 धन्य ए सेयो, जो नम्र ए, कऊँकि सेयो तरतिया रे अवकदार ऊणे। 6 धन्य ए सेयो, जो धार्मिकता री जिन्दगी जिऊणे खे पूखे ए और त्याय ए, कऊँकि सेयो रजाए जाणे। 7 धन्य ए सेयो, जो दयालु ए, कऊँकि परमेशरो तिना पँदि दया करनी। 8 धन्य ए सेयो, जिना रे मन साफ ए, कऊँकि तिना परमेशर देखणा। 9 धन्य ए सेयो, जो मेल-जोल कराओए, कऊँकि तिना खे परमेशरो रे बच्चे बोलेया जाणा, 10 धन्य ए सेयो, जो धार्मिकता री जिन्दगी जिऊणे री तँदि सताए जाओए, कऊँकि स्वर्गो रा राज्य तिना रा ईए। 11 "धन्य ए तुसे, जेबे लोक मेरी बजअ ते तुसा री निन्दा करोए, तुसा खे सताओए और चूट बोली-बोली की तुसा रे खलाफ बुरी-बुरी गल्ला बोलोए। 12 तेबे खुश और मगन ऊणा, कऊँकि तुसा खे स्वर्गो रे बऊत बड़ा ईनाम मिलणा, कऊँकि तिने, जो तुसा ते बऊत पईले भविष्यबक्ता थे, सेयो बी ईयाँ ई सताए थे। 13 "तुसे तरतिया रे रणे वाले लोका खे लूणो जेडे ए। पर जे लूणो रा स्वाद बिगडी जाओ, तेबे कुण जी एडी चीज ए जेते की लूणका ऊई जाओ। तेबे से किजी कामो रा नि रंदा सिवाए एतेरे कि तेसखे बारे सेटी देयो और लोक तिजी खे पैरा निठे केसदे रओ। 14 तुसे दुनिया री जोति ए, जो नगर पाह्लो पँदि बसी रा, से लूकी नि सकदा। 15 लोक दिऊआ वाली की टोकरूप निठे नि राखदे, पर फटिया पँदि राखोए, तेबे तिजी साथे कअरो रे सारे मांणुआ खे प्रयासा ओआ। 16 तियाँ ई तुसा रा प्रयासा बी लोका सामणे चमको, ताकि तुसा रे खरे काम देखी की सेयो तुसा रे पिते री, जो स्वर्गो रे ए, तिना री तारीफ करो। 17 "एडा नि समजो कि आऊँ मूसे रा बिधान या भविष्यबक्ता री कताबा खे रचाणे आयी रा, आऊँ रचाणे नि, पर पूरा करने आयी रा। 18 कऊँकि आऊँ तुसा खे सच लगी रा बोलणे कि जुदुओ तक सर्ग और तरती नि टली जाओगी, तदुओ तक बिधानो ते एक बी मात्रा या एक बी बिन्दु बिना पूरा ऊए नि टलना। 19 तेबेई तो जो कोई इना छोटिया ते छोट्टी आज्ञा बीचा ते केसी एकी खे पनि मानोगा और तेडा ई लोका खे सिखाओगा, से स्वर्गो रे राज्य रे सबी ते छोट्टा ऊणा, पर जो कोई तिना आज्ञा खे मानोगा और तिना खे बी सिखाओगा, सेई स्वर्गो रे राज्य रे बड़ा ऊणा। 20 कऊँकि आऊँ तुसा खे बोलूँआ कि जे तुसे परमेशरो री आज्ञा खे शास्त्री और फरीसिया री आज्ञा ते बड़ी की नि मानो, तो तुसे कदी बी स्वर्गो रे राज्य रे नि जाई सकदे। 21 "तुसे सुणी चुकी रे कि पुराणे बखतो रे मांणुआ खे बोलेया था कि 'अत्या नि करनी', और जो कोई बी अत्या करोगा तेसखे कवैरिया रे सजा मिलणी। 22 पर आऊँ तुसा खे ये बोलूँआ कि जो बी आपणे पाईए पँदि रोष करोगा, तेसखे कवैरिया रे सजा मिलणी और जो कोई आपणे पाईए खे नकम्मा बोलोगा, तेसखे बडिया सभा रे सजा मिलणी और जो कोई दूजे खे 'अरे मूर्ख' बोलोगा से नरको री आगी री सजा जोगा

ऊणा। (Geenna g1067) 23 इजी री खातर जेबे तूँ आपणी पेंट बेदिया पाँदे ल्याओ और तेती तूँ याद करे कि तरे पाईए रे मनो रे तेरिया तई खोट ए, 24 तो आपणी पेंट तेथी बेदिया रे सामणे छाडी दे और पईले जाई की आपणे पाईए साथे मेल-जोल कर, तेबे आयी की आपणी पेंट चढा। 25 जदुओ तक तूँ आपणे दुश्मणे साथे बाटा रेईए, तेस साथे फटाफट मेल-जोल करी लो, केथी एडा नि ओ कि तेरा दुश्मण ताखे हाकिमो रे आथो रे देई देओ और हाकिम ताखे सिपाईया रे आथो रे देई देओ और ताखे जेला रे पाई देओ। 26 आऊँ ताखे सच बोलूँआ कि जदुओ तक तूँ पाई-पाई नि देई देओगा, तदुओ तक तेथा ते छुटणा नि। 27 “तुसे सुणी चुकी रे कि बोलेया था, ‘व्याभिचार नि करना।’ 28 पर आऊँ तुसा खे ये बोलूँआ कि जो कोई बी केसी जवाणसा खे बुरी नजरा ते देखेओ, तो तिने आपणे मनो रेई तेसा साथे व्याभिचार करी ला। 29 जे तेरी दाँणी आख ताखे ठोकरा री बजअ बणो ई, तो तूँ तेसा खे काडी की सेटी दे; कऊँकि ताखे येई ठीक ए कि तरे अंगा बीचा ते एक नाश बी ऊई जाओ, तो सारा शरीर नरको रे नि सेटेया जाओ (Geenna g1067) 30 जे तेरा दाँणा आथ ताखे ठोकरा री बजअ बणोआ, तो तेस बाडी की सेटी दे, कऊँकि ताखे येई ठीक ए कि तरे अंगा बीचा ते एक नाश बी ऊई जाओ तो, सारा शरीर नरको रे नि पड़ना। (एतेरा मतलब ये निर्णय कि आसा आपणी आख काडी की सेटी देणी या आपणा आथ बाडी देणा पर ये कि जो काम तुसा खे परमेशरो रे राज्य रे आगे बड़ने ते रोको ए या जो मांणू तुसा खे गलत करने खे उकसाओ ए तो तुसा से मांणू या चीज छाडी देणी चाईयो।) (Geenna g1067) 31 “ये बी बोलेया रा था, ‘जो कोई आपणी लाडिया खे तलाक देणा चाओ, तो से तेसा खे त्यागपत्र देयो।’ 32 पर आऊँ तुसा खे ये बोलूँआ कि जो कोई आपणी लाडिया खे व्याभिचारो ते अलावा किजी ओरी बजअ ते छाडोगा, तो से तेसा ते व्याभिचार करावओआ और जो कोई तेसा छाडी रिया जवाणसा साथे ब्या करोआ, से बी व्याभिचार करोआ। 33 “फेर तुसे सुणी चुकी रे कि पुराणे जमाने रे लोका खे बोलेया रा था, ‘चूठी कसम नि खाणी, पर प्रभुए री खातर आपणी कसम पूरी करनी।’ 34 पर आऊँ तुसा खे ये बोलूँआ, कि कदी कसम नि खाणी, ना तो स्वर्गो री, कऊँकि से परमेशरो रा सिंहासन ए। 35 ना तरतिया री, कऊँकि से तिना रे पैरो री चौकी ए, ना यरूशलेमो री, कऊँकि से महाराजे रा नगर ए। 36 आपणे सिरों री कसम पनि खाणा, कऊँकि तूँ एक बी बालो खे न तो सफेद करी सकदा, ना ई काला। 37 पर तुसा री गल्ल ‘आ री आ’ और ‘ना री ना’ उणी चाईयो; कऊँकि जो गल्ल इजी ते जादा ओई, से शैतानो री तरफा तेई ओई। 38 “तुसे सुणी चुकी रे कि बिधानो रे बोलेया रा था, ‘आखी रे बदले आख, और दाँदी रे बदले दाँदा’ 39 पर आऊँ तुसा खे ये बोलूँआ कि जो कोई तां साथे बुरा करो तेतेरा बदला नि लणा, पर जो कोई तुसा री दाँणी खाखा रे थपड़ बाओआ, तो तेस कनारो खे दूजी खाख बी करी देओ। 40 जे कोई तां पाँदे दोष लगाई की तांते तेरा कुरता लणा चाओआ, तो तेसखे तोती बी लणे देओ। 41 जे कोई जबरदस्ती ताखे एक मील लई चलोआ, तो तूँ दो मील तेस साथे चल। 42 जो कोई तांते माँगो, तेसखे दे और जो कोई तांते त्वार लणा चाओआ, तो तूँ तेसते मूँ नि फेर। 43 “तुसे सुणी चुकी रे कि बिधानो रे बोलेया रा था, ‘आपणे पड़ोसिये साथे प्यार राखो और आपणे बैरिया साथे बैर।’ 44 पर आऊँ तुसा खे बोलूँआ कि आपणे दुश्मणा साथे प्यार राखो और जो तुसा खे सताओआ, तो तेसखे प्रार्थना करेया करो। 45 ताकि तुसे आपणे स्वर्गो रे पिते रे बच्चे ठईरो, कऊँकि से खरे लोका और बुरे लोका दूई पाँदे आपणा सूख निकयालोआ और तर्मी लोका प्यार पापी लोका दूई पाँदे बरखा करोआ। 46 कऊँकि जे तुसे आपू साथे प्यार राखणे वालेया साथे ई प्यार राखोगे, तो तुसा खे क्या फाईदा ऊणा? क्या कर लणे वाले बी एडा ई नि करदे? 47 “जे तुसे आपणे पाईए खेई नमस्कार करोए, तो कुण जा बड़ा काम करोए? क्या दूजी जातिया रे बी एडा ई नि करदे? 48 इजी री तई तुसे सिद्ध बणो, जेडा तुसा रा स्वर्गिय पिता सिद्ध ए।

6 “सावधान रओ! तुसे लोका खे दखाणे रिया तई तमो रे काम नि करो, नई तो आपणे स्वर्गिय पिते ते कुछ बी फल नि मिल्णा। 2 तेबेई तो जेबे तूँ दान करे, तो सबी गे राग नि लगा, जेडा कपटी, प्रार्थना रे कअरो रे और गलिया रे करोए, ताकि लोक तिना री तारीफ करो। आऊँ तुसा खे सच बोलूँआ कि सेयो आपणा फल पाई चुके। 3 पर जेबे तूँ दान करे, तो जो तेरा दाँणा आथ करोआ, से तेरे खूँजे आथो खे पता नि ऊणा चाईए। 4 ताकि तेरा दान गुप्त रओ और तेबे तेरा पिता जो गुप्तो रे देखेओ, तेस ताखे फल देणा। 5 “जेबे तूँ प्रार्थना करे, तो कपटिया जेडी नि उणी चाईयो, कऊँकि लोका खे दखाणे रिया तई प्रार्थना रे कअरो रे और सड़का रे मोडो रे खडे ऊई की प्रार्थना करना तिना खे अच्छा लगेओ, पर आऊँ तुसा खे सच बोलूँआ कि सेयो आपणा फल पाई चुके। 6 पर जेबे तूँ प्रार्थना करे, तो आपणे कमरे रे जा और दरवाजा बन्द करी की आपणे पिते ते, जो गुप्तो रे ए, प्रार्थना कर। तेबे तेरा पिता, जो गुप्तो रे देखेओ, तेस ताखे फल देणा। 7 जेबे तूँ प्रार्थना करे तो दूजी जातिया जेडी बक-बक नि कर, कऊँकि सेयो समजोए कि तिना रे बऊत बोलणे ते तिना री सुणनी। 8 इजी री खातर तुसे तिना जेडे नि बणो, कऊँकि तुसा रा पिता पईले ई जाणोआ कि तुसा री क्या-क्या जरूरता ए। 9 “तो तुसे ईयाँ प्रार्थना करेया करो; “‘ओ म्हारे पिता, तुसे जो स्वर्गो रे ए, तुसा रा नाओ पवित्र मानेया जाओ। 10 तुसा रा राज्य आओ, जेडी तुसा री इच्छा स्वर्गो रे पूरी ओई, तेडी ई, तरतिया पाँदे बी ओ। 11 आसा रे पूरे दिनो री रोटी आज आसा खे दे। 12 और जिंयाँ आसे आपणे अपराधिया खे माफ कित्तेया, तिंयाँ ई म्हारे अपराध बी माफ करो। 13 आसा खे परीक्षा रे नि ल्याओ, पर शैतानो ते बचाओ, कऊँकि राज्य, पराक्रम और महिमा तुसा री ए। आमीन।’ 14 “तेबेई तो जे तुसे लोका रे अपराध माफ करोगे, तो तुसा रे स्वर्गिय पिते बी तुसा रे अपराध माफ करने। 15 जे तुसे लोका रे अपराध माफ करो, तुसा रे पिते बी तुसा रे अपराध माफ करने। 16 “जेबे तुसे बअरत करोए, तो कपटिया जेडी तुसा रे मुओ पाँदे उदासी नि रओ, कऊँकि सेयो आपणा मूँ एतेरी तई बणाई राखोए, ताकि लोक तिना खे बअरततारी जाणो; आऊँ तुसा खे सच बोलूँआ कि सेयो आपणा फल पाई चुके। 17 पर जेबे तूँ बअरत करे, तो आपणे सिरों रे तेल मल और मूँ तोओ। 18 ताकि लोक नि, पर तेरा पिता, जो गुप्तो रे ए, से ताखे बअरततारी जाणो, एडिया दशा रे तेरा पिता, जो गुप्तो रे ए, से देखेओ और तेस ताखे फल देणा। 19 “आपणी तई तरतिया पाँदे धन कट्टा नि करो, जेती कीडा और केअट लगी जाओई और जेती चोरा खे पता लगी जाओआ और चोरी करोए। 20 पर आपू खे खरा काम करी की स्वर्गो रे धन कट्टा करो, जेती ना कीडा लगे, ना खराब ओ, ना तेती चोरो खे पता लगेओ और ना ई चोरी करदे। 21 कऊँकि जेती तेरा धन ए, तेती तेरा मन बी लगेया रा रणा। 22 “शरीरो रा दिऊआ तो आखी ए, तेबे जे तेरी आखी साफ ए, तो तेरे सारे शरीरो रे बी प्रयासा ऊणा। 23 पर जे तेरी आखी बुरिया ए, तो तेरे सारे शरीरो रे बी न्हारा ई ऊणा, इजी बजअ ते से प्रयासा, जो ताँदे ए, जे न्हारा ओ, तो से न्हारा कित्ता बड़ा ऊणा! 24 “कोई बी मांणू एकी बखतो रे दो मालका री सेवा नि करी सकदा, कऊँकि तेस एकी साथे प्यार और दूजे साथे बैर राखणा या एकी साथे मिले रा रणा और दूजा तेस तुच्छ जाणना। तुसे परमेशर और धन दूई री सेवा नि करी सकदे। 25 तेबेई तो आऊँ तुसा खे बोलूँआ कि आपणी जिन्दगिया रे बारे रे ये चिन्ता नि करो कि आसे क्या खाऊँगे और क्या पिऊँगे? ना आपणे शरीरो रे बारे रे कि क्या पईनुँगे? क्या जिन्दगी रोटिया ते और शरीर टालेया ते बढ़ी की निए? 26 सर्गो रे पछिया खे देखो, सेयो ना बाँदे, ना बाडदे और ना ई पणडारो रे कट्टा करदे, तेबे बी आसा रा स्वर्गिय पिता तिना खे खुलाओआ। क्या तुसे तिना ते जादा किमती निए? 27 तुसा बीचा ते एका कुण ए, जो चिन्ता करी की आपणिया जिन्दगिया री एक कअडी बी बढाई सकोआ? 28 “तुसे टालेया री चिन्ता कऊँ करोए? बाँके जंगली फूला पाँदे त्यान करो कि सेयो कियॉ बडोए? सेयो ना तो मईणत करदे ना आपू खे टाले बणाओए। 29 पर आऊँ तुसा खे बोलूँआ कि राजा सुलेमान आपणे सारे एशो-आरामो रे रओ था और बऊत बाँके टाले पईनो था, पर तेबे बी तेसरे टाले तिना जंगली फूला

ते जादा बांके नि थे। 30 तेबेई तो जेबे परमेश्वर मैदानो रे काओ खे, जो आज आए और काल आगी बीचे फूकी देणा, तो जो तिदे बी एडें बांके फूल खिलाओआ, तो ओ कम विश्वास करने वालेयो! तुसा खे तेस इना ते बढी की बांके टाले कऊँ नि पनयाणे? 31 “तेबेई तो तुसे चिन्ता करी की ये नि बोलणा, ‘आसे क्या खाऊँगे?’ और ‘क्या पिऊँगे?’ और ‘क्या पढ़ूँगे?’ 32 दूजी जातिया रे लोक इना सबी चीजा री चिन्ता करोईया, पर तुसे इना चीजा री चिन्ता नि करो। कऊँकि तुसा रा स्वर्गिय पिता जाणोआ कि तुसा खे इना सबी चीजा री जरूरत ए। 33 इजी री खातर, जे पडले तुसे परमेश्वरो रे राज्य री टोल करो और धार्मिकता री जिन्दगी जिओ, तो यो सब चीजा तुसा खे मिली जाणिया। 34 इजी खे कालकी चिन्ता नि करो, कऊँकि काल का जो दिन उणा, तेस आपणी चिन्ता आपू करी लणी, आजो खे तो आजका दुः ख ई बरत ए।

7 “दोष मत लगाओ, ताकि तुसा पाँदे बी दोष नि लगाया जाओ। 2 कऊँकि जियाँ तुसे दोष लगाओए, तियाँ ई परमेश्वरो तुसा पाँदे बी दोष लगाणा और जेड़ा बर्ताव तुसे लोका साथे करोए परमेश्वरो बी तेड़ा ई बर्ताव तुसा साथे करना। 3 “तू कऊँ आपणे पाईए री छोटी-छोटी गलतिया टोलेया ताँदे आपणिया बड़ी-बड़ी गलतिया नजर कऊँ नि आऊँदिया? 4 जेबे ताँदे आपू दे बड़ी-बड़ी गलतिया ए, तो तू आपणे पाईए खे कियाँ बोली सकेया, ‘तू गलत ए?’ 5 ओ कपटी! पडले आपणी बड़ी-बड़ी गलतिया देख, तेबेई तो तू आपणे पाईए री गलतिया ठीक-टंगो रे देखी की निकयाली सकेया। 6 “पवित्र चीज कुत्तेया खे नि देओ और आपणे मोती सूँअरो रे आगे नि सेटो, एडा नि ओ कि सेयो तिनो खे आपणे पैरा निठे केसी देयो और ताखे खाणे पडो। 7 “तुसा री बी जरूरत ए से परमेश्वरो रे माँगो और परमेश्वरो ते पाणे री उम्मीद बी राखो। 8 कऊँकि जो कोई माँगोआ तेसखे मिलोआ। जो टोलोआ, से पाओआ। जो खटखटाओआ तेसखे खोलेया जाओआ। 9 तुसा बीचा ते कुण एडा माणू ए कि तेसरा पाऊ तेसते रोटी माँगोआ और से तेसखे पात्थर देओ? 10 या मछली माँगो और तेसखे साप देओ? 11 तो तेबे तुसे बुरे उई की आपणे बच्चेया खे खरी चीजा देणा जाणोए, तो तुसा रे स्वर्गिय पिते आपणे मांगणे वालेया खे अच्छी चीजा कऊँ नि देणिया? 12 इजी बजअ ते जो कुछ तुसे चाओए कि माणू तुसा साथे करो, तुसे बी तिनो साथे तेड़ा ई करो, कऊँकि मूसे रा बिधान और भविष्यबक्तेया री येई शिक्षा ए। 13 “स्वर्गो रे परमेश्वरो तक पऊँछणे री बाट बरत कठण ए। पर एते बाटा रिये तुसा चलणा ईए। एक और चौडी बाट ए जिदे जादातर लोक चलणा पसंद करोए, से बाट नरको खे जाओई और लोक तिदे मरी जाणे। (questioned) 14 कऊँकि संगड़ा ए से फाटक और कठण ए से बाट, जो अनन्त जिन्दगिया खे पऊँछाओई और सेयो थोड़े ईए, जिना खे से मिलोई। 15 “चूठे भविष्यबक्तेया ते सावधान रओ, जो पेडा रे पेघो रे तुसा गे आओए, पर पीतरों ते सेयो फाड़ने वाले भेड़िए ओए। 16 तिनो रे बुरे कामो ते तुसा सेयो पछयाणी लणे, क्या जाडो रे अँगूर और कांडिया ते दाऊगले तोड़े जाओए? 17 तियाँ ई हर एक अच्छा डाल अच्छा फल ल्याओआ और नकम्मा डाल बुरा फल। 18 अच्छा डाल बुरा फल नि ल्याई सकदा और ना नकम्मा डाल अच्छा फल ल्याई सकदा। 19 जियाँ जो-जो डाल अच्छा फल नि ल्याऊँदे, सेयो बाडे जाओए और आगी बीचे सेटे जाओए। तियाँ ई चूठे भविष्यबक्ता बी नरको री आगी रे सेटे जाणे। (questioned) 20 ईयाँ तिनो रे कामो ते तुसा सेयो पछयाणी लणे। 21 “जो माखे, ‘ओ प्रभु, ओ प्रभु’ बोलोआ, तिनो बीचा ते हर एक स्वर्गो रे राज्य रे नि जाणा, पर सेई, जो-जो मेरे स्वर्गिय पिते री इच्छा पाँदे चलोआ। 22 न्याय रे तेस दिने बरत माणूआ माखे बोलणा, ‘ओ प्रभु, ओ प्रभु, क्या आसे तेरे नाओं ते भविष्यबाणी नि किन्ती, और तेरे नाओं ते दुष्टात्मा नि निकयालिया, और तेरे नाओं ते बरत सामर्थ्य रे काम नि किन्ते?’ 23 तेबे मां तिनो खे खुली की बोली देणा, ‘आऊँ तो तुसा खे कदी नि जाणदा। ओ कुकर्म करने वालेयो, मांगा गे ते चली जाओ।’ 24 “इजी री खातर जो कोई मरिया गल्ला सुणी की तिनो खे

मानोआ, से तेस अक्लमंद माणूए जेड़ा उणा, जिने आपणा कअर चटानी पँदे बणाया। 25 तेबे बरखा उईया, बाढ़ा आईया और तूफान चले, और तेस कअरो रे टकराए, पर से कअर नि टलेया, कऊँकि तिजी री निऊँ चटानी पँदे थी बणाई री। 26 पर जो कोई मेरी इना गल्ला तो सुणोआ, पर मानदा नि, से तेस मूख माणूए जेड़ा उणा, जिने आपणा कअर बालूए पाँदे बणाया। 27 जेबे बरखा उईया, बाढ़ा आईया, तूफान चले और तेस कअरो साथे टकराए और से कअर तेबुई टलीगा और सत्यानाश उईगा।” 28 जेबे यीशु इना गल्ला करी चुके, तो एडा ऊआ कि जो तेती पीड़ थी, से हैरान उईगी। 29 कऊँकि सेयो तिनो शास्त्रिया जेड़े नि, पर अक्को साथे उपदेश देयो थे।

8 जेबे यीशु तेस पाहड़ो ते उतरे, तो एक बरत बड़ी पीड़ तिनो पीछे आईगी। 2 तेबे देखो, एक कोदिए तिनो गे आयी की तिनो गे माथा टेकेया और बोलेया, “ओ प्रभु, जे तुसे चाओ तो माखे ठीक करी सकोए।” 3 यीशुए आपणा आथ आगे कितेया और से छूँयाँ और तेसखे बोलेया, “आऊँ चाऊँआ कि तू ठीक उई जाए।” से तेबुई आपणे कोदो ते ठीक उईगा। 4 यीशुए तेसखे बोलेया, “देख, केसी गे नि बताणा, पर जाई की आपू खे पुरोईतो गे दखा और जो कुछ मूसे नबीए चढ़ावा ठराई राखेया, तेस चढ़ा, ताकि तिनो खे गवाई ओ कि तू ठीक उईगा।” 5 जेबे यीशु कफरनहूम नगरो रे आए, तो एकी सूबेदार तिनो गे आयी की तिनो ते बिनती किन्ती, 6 “ओ प्रभु! मेरा दास कअरे अदरंगो ते दुः खी पड़ी रा।” 7 यीशुए तेसखे बोलेया, “आऊँ आयी की तेसखे ठीक कऊँगा।” 8 सूबेदार जवाब दितेया, “ओ प्रभु! आऊँ एते जोगा निए कि तुसे मेरे कअरे आयी सको, पर जे तुसे आपणे मुँओ तेई बोली देओ, तो से मेरा दास ठीक उई जाणा। 9 कऊँकि आऊँ बी पराधीन माणू ए और सिपाई मेरे आथो रे ए। जेबे एकी खे बोलीँआ, ‘जा,’ तो से जाओआ और दूजे खे बोलीँ, ‘आओ,’ तो से आओआ। आपणे दासा खे बोलीँ, ‘ये कर,’ तो से करोए।” 10 ये सुणी की यीशु हैरान उईगे और जो तिनो पीछे आऊणे लगी रे थे, तिनो तिनो खे बोलेया, “आऊँ तुसा खे सच लगी रा बोलणे कि मैं इस्राएलो रे बी एडा विश्वास नि देखेया। 11 आऊँ तुसा खे बोलीँआ कि बरत सारे दूजिया जातिया रे लोक पूर्वो और पछमो ते आयी की अब्राहम, इसहाक और याकूबो साथे स्वर्गो रे राज्य रे रोटी खाणे बैठणे। 12 पर बरत सारे इस्राएली जिना खे स्वर्गो रा राज्य त्थार कितेया राए, बारे न्हरे रे पाई देणा, तेती रोणा और दाँदा रा किरइना ई उणा।” 13 तेबे यीशुए सूबेदारो खे बोलेया, “कअरे जा, जेड़ा तेरा विश्वास ए, तेड़ा ई ताखे ओ।” और तेबुई तेसरा दास ठीक उईगा। 14 जेबे यीशु पतरसो रे कअरे आए, तो तिनो पतरसो री सासु बुखारो साथे पड़ी री देखी। 15 तिनो तेसा रा आथ छूँयाँ और तेसा रा बुखार उतरी गा। तेबे से उठी की तिनो री सेवा करने लगी। 16 जेबे साँज उई, तेबे सेयो बरत लोका खे यीशुए गे ल्याए, जिना रे दुष्टात्मा थिया और तिनो दुष्टात्मा आपणे वचनो साथे निकयालिया और सब बमार ठीक किते। 17 ताकि जो वचन यशायाह भविष्यबक्ते बोलेया था से पूरा ओ “तिने आपू ई म्हारिया कमजोरिया लयी लिया ओ म्हारिया बमारिया चकी तिया।” 18 यीशुए जेबे आपणे चऊँ कनारे लोका री एक बड़ी पीड़ देखी, तो तिनो आपणे चलेया खे गलीली समुद्रो ते पार जाणे री आज्ञा दित्ती। 19 तेबे एक शास्त्रिए तिनो गे लयी आयी की बोलेया, “ओ गुरु! जेती केथी तुसे जाओगे, मां तुसा पीछे-पीछे चली पड़ना।” 20 यीशुए तेसखे बोलेया, “गीदइया रे डवार और सर्गो रे पंछिया रे बसरे ओए, पर मां माणू रे पुत्रो खे सिर राखणे खे बी आपणा कअर निए।” 21 एक और चले तिनो खे बोलेया, “ओ प्रभु! पडले माखे जाणे दे कि आऊँ आपणे पिते खे दबाई आऊँआ। तेबे तां पीछे चली पड़ुंगा।” 22 यीशुए तेसखे बोलेया, “तू मां पीछे आईजा, और जो आत्मिक रूपो रे मरे रे ए तिनो खे आपणे मुडदे दबाणे दे।” 23 जेबे यीशु किस्तिया रे चढे, तो तिनो रे चले तिनो पीछे आईगी। 24 तेबे देखो, समुद्रो रे बरत बड़ा तूफान आया जेते की किस्ती पाणिए साथे टखी गी और यीशु सये रे थे। 25 तेबे चलेया नेडे आयी की यीशु जगाए और तिनो खे बोलेया, “ओ प्रभु! आसा खे बचा, आसे डूबणे वाले ए।” 26 यीशुए आपणे चलेया

खे बोलेया, “ओ कम विश्वास करने वालेयो! कऊँ डरोए?” तेबे यीशु उठे और तूफान और पाणिए खे बकणे लगे और तेबे सब शान्त ऊईगा। 27 तेबे लोक हैरान ऊई की बोलणे लगे, “ये केड़ा माणूए? तूफान और पाणी बी एसरी आज्ञा खे मानोए।” 28 जेबे सेयो पार गदरनिया रे देशो रे पऊँछे, तेबे दो माणू जिना रे दुष्टात्मा थिया कन्ना ते निकलदे ऊए तिना खे मिले। सेयो इतणे प्रचण्ड थे कि कोई बी तेसा बाटा रिये जाई नि सको था। 29 तेबे तिने चींगी की बोलेया, “ओ परमेशरो रे पुत्र! आसा रा तां साथे क्या काम? क्या तूँ बखतो ते पड़ले ई आसा खे एती दु; ख देणे आयी रा?” 30 तिना ते थोड़ी जी दूर सूअरो रा एक चूण्ड चरने लगी रा था। 31 दुष्टात्मे तिना ते ये बोली की बिनती कित्ती, “जे तूँ आसा खे निकयालने ई लगी रा तो सूअरा रे चूण्डो रे पेजी दे।” 32 तिने तिना खे बोलेया, “जाओ!” सेयो निकली की सूअरा रे बैठी गिया और सारा चूण्ड काअडी ते छवाल लयी की डूबी गा और मरी गा। 33 तिना खे चराणे वाले नठे और नगरो रे गए और जिना रे दुष्टात्मा थिया तिना रा सारा आल सुणाया। 34 तेबे सारे नगरो रे लोक यीशुए खे मिलणे आए, और तिना खे देखी की बिनती कित्ती कि म्हारे बन्ने ते निकली जाओ।

9 तेबे यीशु क्रिस्तिया रे चढ़ी की पार गए, और आपणे नगरो खे आए। 2 तेबे यीशुए देखेया, कई लोक एक अदरंगो रे रोगिए खे माँजे पाँदे चकी की तिना गे ल्याए, यीशुए तेसरा विश्वास देखेया और तेस अदरंगो रे रोगिए खे बोलेया, “ओ पाऊआ! याओ राख; तेरे पाप माफ ऊईगी।” 3 तेबे कई शास्त्रिए सोचेया, “ये तो परमेशरो री निन्दा करने लगी रा।” 4 यीशुए तिना रे मनो री गल्ल जाणी की तिना खे बोलेया, “तुसे आपणे मनो रे बुरा बिचार कऊँ करने लगी रे? 5 ये बोलणा बऊत आसान ए कि, ‘तेरे पाप माफ ऊईगी’, पर ये बोलणा बऊत कठण ए कि, ‘आपणा मांजा चकी की चल फिर।’ 6 पर इजी री खातर कि तुसे जाणी लओ कि मां माणू रे पुत्रो खे तरतिया पाँदे पाप माफ करने रा बी अक्क ए।” यीशुए तेस अदरंगो रे रोगिए खे बोलेया, “उठ, आपणा मांजा चक और आपणे कअरो खे चली जा।” 7 से उठी की आपणे कअरो खे चली गा। 8 लोक ये देखी की डरी गे और परमेशरो री महिमा लगे करने, जिने माणूआ खे एड़ा अक्क देई राखेया। 9 तेथा ते आगे चली की यीशुए मत्ती नाओ रा एक माणू करो री चौकिया पाँदे बैठेया रा देखेया और तिने तेसखे बोलेया, “मां पीछे आओ।” से उठेया और तिना पीछे चली पड़ेया। 10 जेबे यीशु कअरे रोटी खाणे बैठेया, तेबे बऊत जणे कर लणे वाले और पापी आयी की यीशु और तिना रे चेलेया साथे रोटी खाणे बैठे। 11 ये देखी कि फरीसिये तिना रे चेलेया खे बोलेया, “तुसा रा गुरु इना कर लणे वाले और पापिया साथे रोटी खाणे कऊँ बैठी रा।” 12 यीशुए ये सुणी की तिना खे बोलेया, “बैद बमारा खे चाईयो, पलेया-चंगेया खे नि। 13 तो तुसे जाओ और इजी रा मतलब जाणी लओ कि, ‘आऊँ बलिदान नि, पर दया चाऊँआ।’ कऊँकि आऊँ तर्मिया खे नि, पर पापिया खे बुलाणे आयी रा।” 14 तेबे बपतिस्मा देणे वाले यूहन्ने रे चेलेया तिना गे आयी की बोलेया, “क्या बजअ ए कि आसे और फरीसी इतणे बअरत करूँए और तेरे चले बअरत नि करदे?” 15 यीशुए तिना खे बोलेया, “क्या बराती, जदुओ तक लाड़ा तिना साथे ए, तदुओ तक थिना मनाई सको ए? पर सेयो दिन आऊणे, जेबे लाड़ा बरातिया ते लग करेया जाणा, तेस बखते तिना बअरत करणा। 16 नये टाले री टाली, पुराणे टालेया रे कोई नि लंगादा, कऊँकि टाली पुराणे टालेया खे ओर बी कट्टा करी देओ ई, मतलब-नया टाला पुराणे साथे ओर बी जादा फटी जाओआ। 17 नया अँगूरा रा रस पुराणे खल्लडुआ रे कोई नि परदा। कऊँकि एड़ा करने ते खल्लडु फटी जाओए और अँगूरा रा रस बारे निकली जाओआ और खल्लडु नाश ऊई जाओ। पर जे नया अँगूरा रा रस नये खल्लडुआ रे परो तो दोनो बचे रे रओए।” 18 जेबे यीशु इना गल्ला तिना खे बोलणे ई लगी रे थे, तेबे एक अधिकारी तिना गे आया और तिना गे माथा टेकेया और बोलेया, “मेरी बेटी एबु-एबु मरी गी, पर जे तुसे चलो और आपणा आथ राखो तो से जिऊँदी ऊई जाणी।” 19 यीशु उठे और आपणे चेलेया लयी की तेस पीछे चली गे। 20 तेबे एक जवाणस आयी, तेसा खे

बारा साला ते खून बड़णे री बमारी थी, से पीछे ते आयी और तेसे यीशुए रे टालेया रा कनारा छूँया। 21 कऊँकि से आपणे मनो रे बोलो थी, “जे आऊँ तिना रे टाले ई छुँई लऊँगी, तो ठीक ऊई जाणी।” 22 यीशुए तेसा खे मुड़ी की बोलेया, “बटिये! याओ राख, तेरे विश्वासे तूँ बचाईती।” तेबे से जवाणस तेबुई ठीक ऊईगी। 23 जेबे यीशु तेस अधिकारिए रे कअरे पऊँछे, तेबे तिने बांसली बजाणे वाले और पीड़ आल्ला-गोल्ला करदे ऊए देखी। 24 तेबे यीशुए बोलेया, “आटी जाओ, मुन्नी मरी नि रई, पर सऊणे लगी री।” ये सुणी की सेयो तिना रा मजाक लगे ऊड़ाणे। 25 पर जेबे पीड़ तेथा निकयाली ती, तेबे तिने पीतरे जाई की तेसा मुन्निया रा आथ पकड़ेया और से ठीक ऊईगी। 26 तेबे ये गल्ल पूरे देशो रे फैली गी। 27 जेबे यीशु तेथा ते आगे गए, तेबे दो अन्दे तिना पीछे ये बोली की आक्का लगे पाणे, “ओ दाऊदो री ल्वाद! आसा पाँदे दया कर।” 28 जेबे सेयो कअरे पऊँछे, तेबे सेयो दो अन्दे तिना गे आए, तेबे यीशुए तिना खे बोलेया, “क्या तुसा खे विश्वास ए कि आऊँ तुसा खे ठीक करी सकूँआ?” तिने बोलेया, “आ प्रभु।” 29 तेबे यीशुए तिना रिया आखिया छुँई की तिना खे बोलेया, “तुसा रे विश्वासे रे मुताबिक तुसा साथे ओ।” 30 और सेयो तेबुई देखणे लगे। यीशुए तिना खे सावधान करदे ऊए बोलेया, “देखो! कोई बी एसा गल्ला खे नि जाणो।” 31 पर तिने बारे निकली की तिना रा यश सारे देशो रे फैलाई ता। 32 जेबे सेयो बारे लगी रे थे जाणे, तेबे लोक एक गूँगे खे जेसरे दुष्टात्मा थी, यीशुए गे ल्याए। 33 जेबे यीशुए दुष्टात्मा निकयाली ती, तेबे गूँगा बोलणे लगेया और लोके हैरान ऊई की बोलेया, “इसाएलो रे एड़ा कदी नि देखेया।” 34 पर फरीसिये बोलेया, “ये तो दुष्टात्मा रे सरदारो री मतादा ते दुष्टात्मा खे निकयालोआ।” 35 यीशु और तिना रे चले गलील प्रदेशो रे कई नगर और कई गांव रे कूमदे गए और तिना रे प्रार्थना रे कअरो रे उपदेश देँदे गए और परमेशरो रे राज्य रा सुसमाचार प्रचार करदे गए और हर बमारी और कमजोरी दूर करदे गए। 36 जेबे तिने पीड़ देखी तो तिना खे लोका पाँदे तरस आया, कऊँकि सेयो तिना पेडा जेडे, जिना रा कोई रखवाला नि ऊँदा, बैचन और पटके ऊए रे थे। 37 तेबे यीशुए आपणे चेलेया खे बोलेया, “पाक्के रे डोरू तो बऊत ए, पर मजूरदार कम ए। 38 इजी री खातर डोरूआ रे मालको ते प्रार्थना करो कि सेयो आपणे डोरूआ बडाणे खे मजूरदार पेजो।”

10 तेबे यीशुए आपणे बारा चले बुलाए और तिना खे दुष्टात्मा पाँदे अक्क दितेया कि हर बमारिया खे निकयाली और हर कमजोरिया खे दूर करो। 2 इना बारा प्रेरिता रे नाओ यो ए-पईला शमीन, जेसखे पतरस बी बोलोए, और तेसरा पाई अन्द्रियास, जब्दियो रा पाऊ याकूब और तेसरा पाई यूहन्ना। 3 फिलिप्पुस, बरतुल्वे थोमा, कर लणे वाला मत्ती, हलफईसो रा पाऊ याकूब और तदे। 4 शमीन कनानी, यहूदा इस्करीयोती, जिने सेयो पकड़वाए बी थे। 5 यो बारा जणे यीशुए ये आज्ञा देई की पेजे कि ओरी जातिया बीचे नि जाणा, “ना ई सामरिया रे केसी बी देशो रे जाणा। 6 पर इसाएलो रे कराने री राची रिया पेडा गे ई जाणा 7 और चलदे-चलदे ये प्रचार करो कि स्वर्गो रा राज्य नेडे आईगा रा। 8 बमारा खे ठीक करो, मरये रे खे जिऊँदा करो, कोढ़िया खे शुद्ध करो, दुष्टात्मा खे निकयालो, तुसे मुफ्त पाई राखेया और मुफ्त ई देओ। 9 आपणी गाठडिया रे ना सुईना, ना रूपा और ना तांबा राखणा। 10 बाटा खे ना चोला, ना दो कुरते, ना जोडे और ना ई सोठा लओ, कऊँकि मजूरदारो खे तेसरी रोटी तो मिलणी ई चाईयो। 11 “तुसे जेते बी गांव या नगरो रे जाओ तो पता लगाओ कि कुण खरा ए? और जदुओ तक तेथा ते नि निकलो, तेसगे ई रओ। 12 जेबे तुसे तेसरे कअरे जाओ तो तेसखे आशीष देणी। 13 जे तेस कअरो रे माणू खरे ओगे तो तुसा रा कल्याण तिना गे पऊँछणा, पर सेयो खरे नि ओगे तो तुसा रा कल्याण तुसा गे वापस आयी जाणा। 14 जो कोई तुसा खे मानोणा नि और तुसा री गल्ला नि सुणो, तो तेस कअरो या नगरो ते निकलदे ऊए आपणे पैरा री तूड तेथी चाड़ी देयो। 15 आऊँ तुसा खे सच बोलूँआ कि जेबे न्याय रा दिन आऊणा, तेबे तेस नगरो री दशा ते, सदोम और गमोरा रे देशो री दशा जादा

सईणे जोगी ऊणी।” 16 और यीशुए बोलेया, “देखो, आऊँ तुसा खे पेडा जेड़े तिना लोका बीचे पेजुँआ जो भेड़िए जेड़े खतरनाक ए, तो तुसे सापो जेड़े अक्लमंद और कबूतरो जेड़े शरीफ रओ बणे रे। 17 पर लोका ते चौकसर रओ, कऊँकि तिना तुसे पंचायती रे देई देणे और आपणी प्रार्थना रे कअरो रे तुसा खे कोड़े बाणे। 18 तुसे मेरी तंदई हाकिमो और राजेया रे सामणे तिना पाँदे और दूजी जातिया पाँदे गवा ऊणे खे पऊँछाए जाणे। 19 जेबे सेयो तुसा खे पकड़वाओगे, तेबे ये चिन्ता नि करनी कि आसा कियॉँ और क्या करना, कऊँकि जो बी तुसा बोलणा ओगा, से तुसा खे तेस बखते ई बताई देणा। 20 कऊँकि बोलणे वाले तुसे नि, पर तुसा रे पिते रा पवित्र आत्मा तुसा रे बोलीआ। 21 “पाईया आपणे पाई और पितेया आपणे पाऊ कुलवाणे खे पकड़वाणे और बच्चे आपणे माया-बाओ रे खलाफ उठणे और तिना सेयो कुलाई देणे। 22 मेरे नाओ री बजअ ते सबी लोका तुसा ते बैर राखणा, पर जो आखरी तक सब राखोगा, तेसरा ई उद्धार ऊणा। 23 जेबे सेयो तुसा खे एकी जगा रे सताओगे, तो तुसे दूजी जगा खे नठी जाणा। आऊँ तुसा खे सच लगी रा बोलणे कि तुसे इस्राएलो रे सारे देशो रे कूमी नि चुकणे कि तदुओ खे माणू रा पुत्र आयी जाणा। 24 “चेला आपणे गुरूओ ते बड़ा नि ऊँदा; ना दास आपणे मालको ते। 25 चेले रा गुरूओ रे और दासो रा मालको रे बराबर ऊण ई बऊत ए; जेबे तिने कअरो रे मालको खे शतान बोलेया, तो तेसरे कअरो वालेया खे क्या कुछ नि बोलणा? 26 “इजी री खातर माणूआ ते नि डरो, कऊँकि कुछ बी टकेया रा निए, जो खोलेया नि जाणा और ना कुछ छिपेया राए, जो जाणी नि सकदे। 27 जो आऊँ तुसा खे न्हरे रे बोलेँआ, तिजी खे तुसे लोका बीचे दिनो रे बखते सबी रे सामणे खुली की बोलेया करो और जो आपणे कानो रे खसफस करोए, तेस छतो पाँदो ते बोलेया करो। 28 जो शरीरो खे काई सकोए, पर आत्मा खे काई नि सकदे, तिना ते नि डरो, पर परमेशरो तेई डरो, जो आत्मा और शरीर दूँई खे नरको रे नाश करी सकोआ। (Geenna 91067) 29 एकी पैसे साथे दो चिड़िया बिकोईया? तेबे बी तुसा रे पिते री इच्छा ते बिना तिना बीचा ते एक बी जमीन रे नि पड़ी सकदी। 30 तुसा रे सिरों रे बाल बी सारे गिणे रे ए। 31 इजी री खातर डरो नि; तुसे मुखती चिड़िया ते बी बढ़ी की ए। 32 “जो कोई माणूआ सामणे माखे मानी लओगा, से मां बी आपणे स्वर्गिय पिते सामणे मानी लणा। 33 पर जो कोई माणूआ सामणे माखे नि मानोगा, तो मां बी से स्वर्गिय पिते सामणे नि मानणा। 34 “ये नि समजो कि आऊँ तरतिया पाँदे मेल-जोल करने आयी रा, आऊँ मेल-जोल करने नि, पर तलवार चलवाणे आयी रा। 35 आऊँ तो आयी इजी खे रया कि ‘माणूए खे तेसरे पिते ते और बेटिया खे तेसा री माया ते और बऊआ खे तेसा री सासुआ ते लग करँ। 36 माणूए रे बैरी तेसरे कअरो रेई लोक ऊणे।’ 37 “जो माया-बावा खे मांते जादा प्यार करोआ, से मेरे लायक निए और जो माठे-बेटिया खे मांते जादा प्यार करोआ, से बी मेरे लायक निए। 38 जे तुसे मेरे चले बगना चाओए, पर मेरिया तंदई मरने खे त्यार निए, तो तुसे मेरे लायक निए। 39 जो आपणे प्राण बचाओआ, तेस से खोणा और जो मेरी बजअ ते आपणे प्राण खोओआ, तेस अनन्त जिन्दगी पाणी। 40 “जो तुसा खे मानोआ, से माखे मानोआ और जो माखे मानोआ, से मेरे पेजणे वाले खे मानोआ। 41 जो भविष्यबक्ते खे भविष्यबक्ता जाणी की ग्रहण करोआ, तेस भविष्यबक्ते जेड़ा ईनाम पाणा और जो तर्मियों खे तर्मी जाणी की ग्रहण करो, तेस तर्मियों जेड़ा ईनाम पाणा। 42 जो कोई इना छोटिया बीचा ते एकी खे बी मेरा चेला जाणी की बस एक ठण्डे पाणिए रा कटोरा पलयाओगा, आऊँ तुसा खे सच लगी रा बोलणे, तेस कियॉँ बी आपणा प्रतिफल नि खोणा।”

11 जेबे यीशु आपणे बारा चेलेया खे आज्ञा देई चुके, तेबे सेयो तिना रे नगरो रे उपदेश और प्रचार करने खे तेथा ते चली गे। 2 यूहन्ने जेला रे मसीह रे कामो रा प्रचार सुणी की आपणे चले तिना ते ये पूछणे पेजे, 3 “क्या आऊणे वाले मसीह जेते रा वादा परमेशरे करी राखेया से तुसे ईए, या आसे केसी दूजे री बाट देखूँ?” 4 यीशुए जवाब दित्तेया, “जो कुछ तुसे

सुणोए और देखोए, से सब जाई की यूहन्ने खे बताओ 5 कि अन्दे देखोए, लंगड़े चलोए, कोढ़ी शुद्ध ऊई जाओए, टऊणे सुणोए, मुड़दे जिऊँदे ऊई जाओए और कंगाला खे सुसमाचार सुणाया जाओआ। 6 धन्य ए सेयो, जो मेरी बजअ ते आपणा विश्वास नि छाडदे।” 7 जेबे यूहन्ना रे चले तेथा ते चली गे, तेबे यीशु यूहन्ने रे बारे रे लोका खे बताणे लगे, “तुसे जंगलो रे क्या देखणे गए थे? क्या अवा साथे ईलदे ऊए काओ जेड़े नगलो खे? 8 तेबे तुसे क्या देखणे गए थे? क्या तेस माणूए खे, जिने नरम टाले थे पईने रे? देखो, जो नरम टाले पईनोए, सेयो राजभवनो रे रओए। 9 तेबे तुसे कऊँ गए थे? क्या केसी भविष्यबक्ते खे देखणे? आ, आऊँ तुसा खे बोलेँआ कि तुसे तो भविष्यबक्ते ते बी बड़े खे देखणे गए थे। 10 ये सेईए, जेसरे बारे रे पवित्र शास्त्रो रे लिखी राखेया कि “‘देख, आऊँ आपणे दूतो खे तांते आगे-आगे पेजुँआ, जेस तांते आगे जाई की तेरी बाट त्यार करनी।’ 11 “आऊँ तुसा खे सच लगी रा बोलणे कि जो जवाणसा ते जम्मी रे, तिना बीचा ते यूहन्ना बपतिस्मा देणे वाले ते, कोई बी बड़ा नि ऊआ, पर जो स्वर्गो रे राज्य रे छोटे ते छोटा ए से तेसते बड़ा ए। 12 यूहन्ना बपतिस्मा देणे वाले रे दिना ते लयी की एबुए तक स्वर्गो रे राज्य रे बलपूर्वक प्रवेश ऊँदा रया, पर तागतबर तेसखे जबरदस्ती छुड़ाई लओए। 13 यूहन्ना बपतिस्मा देणे वाले तक सारे भविष्यबक्ता और विधान भविष्यबाणी करदे एए। 14 जे चाओ, तो मानो कि एलिय्याह जो आऊणे वाला था, से येईए। 15 जो समजी सकोआ से तिजी खे त्यानो साथे सुणो और मानी बी लओ। 16 “आऊँ आजकाल के लोका री उपमा किजी साथे करँ? सेयो तिना बच्चेया जेड़े ए, जो बजारो रे बैठी की एकी-दूजे खे आक्का पाई की बोलोए 17 कि आसे तुसा खे बांसली बजाई, पर तुसे नि नाचे; आसे शोग कित्तेया, पर तुसे छाती नि बजाई। 18 कऊँकि यूहन्ना ना खांदा आया और ना पींदा आया और सेयो बोलोए, ‘तेसरे दुहात्मा ए।’ 19 पर आऊँ माणू रा पुत्र खांदा-पींदा ऊआ आया और सेयो बोलोए कि देखो, पेटू और पियक्कड़ माणू, कर लणे वालेया रा और पापिया रा दोस्त ए, पर ज्ञान आपणे कामो की सच्चा ठराई राखेया।” 20 तेबे यीशु तिना रे लोका नगरा खे लवामे देणे लगेया, जिना बीचे तिने बऊत सामर्था रे काम कित्ते थे, कऊँकि तिने आपणा मन नि था फेरयेया रा। 21 “हाय खुराजीन! हाय बैतसैदा! जो सामर्था रे काम तुसा रे कित्ते, जे सेयो सूर और सैदा रे नगरा रे ऊँदे, तो टाटा रे शोको रे टाल्ले पईनी की और आपू दे स्वा मली की और दु-खी ऊई की सेयो कदका मन फिराई देँदे। 22 पर आऊँ तुसा खे बोलेँआ कि जेबे न्याय रा दिन ऊणा, तेबे तुसा री दशा ते, सूर और सैदा नगरो री दशा जादा सईणे जोगी ऊणी। 23 ओ कफरनहूम! क्या तू स्वर्गो तक ऊच्चा करेया जाणा? तू तो नरको तक थाले करेया जाणा। जो सामर्था रे काम तांदे ऊए, जे सेयो काम, सदोम नगरो रे ऊँदे, तो से आजो तक बणेया रा रणा था। (Hadēs 986) 24 पर आऊँ तुसा खे बोलेँआ कि जेबे न्याय रा दिन आऊणा तेबे, तेरी दशा ते सदोमो रे नगरो री दशा जादा सईणे जोगी ऊणी।” 25 तेस ई बखते यीशुए बोलेया, “ओ पिता! स्वर्ग और तरतिया रे प्रभु! आऊँ तुसा रा धन्यवाद करँआ कि तुसे यो गल्ला ज्ञानी और समजदारा ते लकोई रिया राखिया और बालका गे बताईया। ओ पिता! कऊँकि तुसा खे येई खरा लगेया।” 26 आ, ओ पिता! कऊँकि तुसा खे येई खरा लगेया। 27 “मेरे पिते मांगे सब कुछ संबाली राखेया। कोई पुत्रो खे नि जाणदा, बस पिता जाणोआ। कोई पिते खे नि जाणदा, बस पुत्र जाणोआ और से, जेस पाँदे पुत्र तिजी खे प्रगट करना चाओ। 28 ओ सब मईगण करने वालेयो! और बोजे की दबे रे लोको, मांगे आओ, मां तुसा खे आराम देणा। 29 “मेरे चले बणो और मेरी गल्ल मानेया करो कऊँकि आऊँ नम्र और मनो ते दीन ए, और तेबे तुसा आपणे मनो रे आराम पाणा। 30 कऊँकि मेरा काम आसान ए और बोज अलका ए।”

12 तेस बखते यीशु आरामो रे दिने डोरूआ रिये जाणे लगी रे थी। जेबे तिना रे चलेया के पूछ लगी, तेबे सेयो सिल्ले तोड़ी-तोड़ी की खाणे लगे। 2 तेबे फरीसिये तिना खे देखी की यीशुए खे बोलेया, “देख, तेरे चले से

काम लगी रे करने, जो आरामो रे दिने करना ठीक नि ए।” 3 यीशुए तिना खे बोलेया, “क्या तुसे पढ़ी नि राखेया कि जेबे दाऊद और तेसरे साथिया खे पूछ लगी, तो तिने क्या कित्तेया? 4 सेयो किर्याँ परमेशरो रे भवनो रे गये और तिने पेंटा रिया रोटिया खाईया, जबकि बिधानो रे मुताबिक तिना, ना तो से और ना तेसरे साथी खाई सको थे, पर पुरोईत ई खाई सको थे। 5 क्या तुसे बिधानो रे नि पढ़ेया कि पुरोईत आरामो रे दिने रे मन्दरो रे नियम तोड़ने रे बी निर्दोष ठईरो थे? 6 पर आऊँ तुसा खे बोलेँ कि ऐती से ए, जो मन्दरो ते बी बड़ा ए। 7 जे तुसे एतेरा मतलब जाणदे कि, ‘आऊँ कृपा ते खुश ए,’ बलिदानो ते नि, तो तुसे निर्दोषो खे दोषी नि ठरदें। 8 आऊँ माणूँ रा पुत्र आरामो रे दिने रा बी प्रभु ए।” 9 तेथा ते चली की सेयो तिना रे प्रार्थना रे कअरो रे आए। 10 तेती एक माणूँ था, जेसरा आथ सूकेया रा था। तिने यीशुए पाँदे दोष लगाणे रिया तई तिना ते पूछेया, “क्या आरामो रे दिने चंगा करना ठीक ए?” 11 यीशुए तिना खे बोलेया, “तुसा बीचा ते एड़ा कूणे, जेसगे एक ई पेड ओ और से आरामो रे दिने गट्टे रे पड़ी जाओ और से तेसा खे नि निकयालो? 12 पला, माणूँ री कीमत तो पेडा ते कितणी बड़ी की ए। इजी री खातर बिधानो रे मुताबिक आरामो रे दिने पला करना ठीक ए।” 13 तेबे यीशुए तेस माणूँ खे बोलेया, “आपणा आथ आगे कर” तिने आगे कित्तेया, तेबे तेसरा आथ दूजे आथो जेड़ा ठीक ऊईगा। 14 तेबे फरीसिये बारे जाई की यीशुए रे खलाफ योजना बणाई कि तिना खे किर्याँ बर्बाद करिए। 15 ये जाणी की यीशुए तेथा ते चली गे और बऊत जणे तिना पीछे आईगे और यीशुए सबी खे चंगाई दिती। 16 तेबे यीशुए सेयो सावधान कित्ते कि मेरे बारे रे केसी गे नि बताणा, “आऊँ परमेशरो रा पुत्र ए।” 17 ताकि जो वचन यशायाह भविष्यबक्ते बोलेया था, से पूरा ओ; 18 “देखो, ये मेरा सेवक ए, जो मैं चूणी राखेया। मेरा प्यारा, जेसते मेरा मन खुश ए, मां आपणा पवित्र आत्मा तेसरे पाणा; और तेस अन्या जातिया खे न्याय रा सुसमाचार देणा। 19 तेस ना चगाड़ा करना, ना चिल्लाणा, और ना ई केसी बजारो रे तेसरी आवाज सुणनी। 20 जो लोक बेसहारा ए, तेस तिना साथे नरमाईया ते पेश आऊणा। तेस सेयो मरने नि देणे और तिना रा न्याय करना, जदुओ तक तिना खे निर्दोष नि ठराई देओ। 21 जो दुजिया जातिया ऊणिया तिना खे तेसरे नाओँ पाँदे उम्मीद रणी।” 22 तेबे लोक एक माणूँ खे तिना गे ल्याए, जो अन्दा और गूँगा था, तिने से ठीक कित्तेया और से देखणे और बोलणे लगेया। 23 ये देखी की लोक हेरान ऊई की बोलणे लगे, “क्या ये दाऊदो री लवाद ए?” 24 पर फरीसिये ये सुणी की बोलेया, “ये तो दुष्टात्मा रे सरदार शैतानो री मतादा ते दुष्टात्मा खे निकयालोआ।” 25 यीशुए तिना रे मनो री गल्ल जाणी ली और तिना खे बोलेया, “जेस बी राज्य रे फूट ओई, से ऊजड़ी जाओआ, और कोई बी नगर या कराना, जिदे फूट ओई, से कदी नि बसी सकदा। 26 और जे शैतान ई शैतानो खे लगेया निकयालने, तो से तो आपणा ई बिरोदी ऊईगा। तेबे तेसरा राज्य किर्याँ बणेया रा रणा? 27 जे आऊँ शैतानो री मतादा ते दुष्टात्मा खे निकयालूँआ, तो तुसा रे वंश केसरी मतादा ते निकयालोए? बस, तेबे सेयो ई तुसा रा न्याय करोगे। 28 पर जे आऊँ परमेशरो री पवित्र आत्मा री मतादा ते दुष्टात्मा खे निकयालूँआ, तो परमेशरो रा राज्य तुसा गे आईगा रा। 29 “या किर्याँ कोई माणूँ केसी तागतबरो रे कअरे कूसी की तेसरा माल लूटी सकोआ, जदुओ तक से तेसखे बानी नि लओगे? तेबेई से तेसरा माल लूटी सकोआ। 30 “जो मां साथे नि ए, से मेरे खलाफ ए और जो मां साथे कट्टा नि करदा, से बखेरोआ। 31 इजी री खातर आऊँ तुसा खे बोलेँआ कि माणूँ ए रे सारे पाप और निन्दा माफ ऊई जाणे, पर पवित्र आत्मा री निन्दा माफ नि ऊणी। 32 जो कोई मां माणूँ रे पुत्रो रे खलाफ कोई बी गल्ल बोलागा, तेसरा ये अपराध माफ ऊई जाणा। पर जो कोई पवित्र आत्मा रे खलाफ कुछ बी बोलागा, तेसरा अपराध ना तो एते लोको रे और ना ई परलोको रे माफ ऊणा। (aiōn g165) 33 “जे डालो खे अच्छा बोलो, तो तिजी रे फलो खे बी अच्छा बोलो। या डालो खे नकम्मा बोलो, तो तिजी रे फलो खे बी नकम्मा ई बोलो; कऊँकि डाल आपणे फलो साथे ई पछयाणा जाओआ। 34 ओ सापो जेड़े जईरीले

लोको! तुसे बुरे ऊई की किर्याँ खरिया गल्ला बोली सकोए? कऊँकि जो तुसा रे मनो रे ओआ, सेई तुसा री जबानी पाँदे आओआ। 35 खरा माणूँ आपणे खरे मनो रे पण्डारो ते खरिया गल्ला निकयालोआ और बुरा माणूँ आपणे बुरे मनो रे पण्डारो ते बुरिया गल्ला निकयालोआ। 36 आऊँ तुसा खे बोलेँआ कि जो-जो नकम्मिया गल्ला माणूँआ बोलणिया, जेबे न्याय रा दिन आऊणा, तेबे तिना खे हर गल्ला रा लेखा देणा पडना। 37 कऊँकि तूँ आपणिया गल्ला तेई, दोषी और निर्दोष ऊणा।” 38 ये सुणी की कुछ शास्त्रिए और कुछ फरीसिये तिना खे बोलेया, “ओ गुरु! आसे तुसा ते एक चिह्न देखणा चाऊँए।” 39 यीशुए तिना खे जवाब दित्तेया, “एते जुगो रे बुरे और व्याभिवारी लोक चिह्न टोलोए; पर, योना भविष्यबक्ते रे चिह्नो खे छाडी की कोई और चिह्न तिना खे नि देणा। 40 योना, तीन रात-दिन पाणिए रे बड़ी मच्छलिया रे पेटो रे रया, तिर्याँ ई आऊँ माणूँ रा पुत्र, तीन रात-दिन तरतिया ते पीतरे रणा। 41 नीनवे रे लोक न्याय रे दिने दे, एस बखतो रे लोका साथे उठणे, और तिना सेयो ई दोषी ठरणे, कऊँकि तिने योने रा प्रचार सुणी की मन फेरिया, पर देखो, एती तो से ए, जो योना ते बड़ा ए। 42 दखखणो री राणी, न्याय रे दिने रे, एस बखतो रे लोका साथे उठणी और सेयो दोषी ठरणे, कऊँकि से सुलेमानो रा ज्ञान सुणने खे तरतिया रे दूजे कनारे पाँदा ते आथी थी और देखो, एती तो से ए, जो सुलेमानो ते बी बड़ा ए। 43 “जेबे दुष्टात्मा माणूँए ते निकली जाओई, तेबे से सूकी जगा आराम करने खे टोलो ई, पर तेसा खे मिलदी नि। 44 तेबे से आपणे आपू रे बोलोई, ‘मां आपणे तेस माणूँए रेई, जेथा ते से आयी थी, तेथी वापस चली जाणा।’ जेबे से वापस आओई, तेबे तेसा खे से माणूँ कअरो जेड़ा, कल्ला, साफ-सुधरा और सजाया रा मिलोआ। 45 तेबे से दुष्टात्मा आपू साथे सात ओर दुष्टात्मा खे ल्याओई और सेयो तेस माणूँए रे बैठी जाओईया और तेथी वास करोईया और तेस माणूँए री दशा पईलकी दशा ते बी खराब ऊई जाओई। एस जुगो रे बुरे लोका री दशा बी एड़ी ई ऊणी।” 46 जेबे यीशु पीड़ा साथे इना गल्ला करने ई लगी रे थे, तेबे तिना री आम्मा और पाई बारे खड़ी रे थे और तिना साथे कुछ गल्ल करना चाओ थे। 47 तेबे किने तिना खे बोलेया, “देखो, तुसा री आम्मा और पाई और बईण बारे खड़ी रे और तुसा साथे गल्ल करना चाओए।” 48 ये सुणी की तिने बोलणे वाले खे जवाब दित्तेया, “कुण मेरी आम्मा ए? और कुण मेरा पाई ए?” 49 तेबे तिने आपणे चेलिया री तरफा खे आथ कित्तेया और बोलेया, “देखो, मेरी आम्मा और मेरे पाई तो यो ए। 50 कऊँकि जो कोई मेरे स्वर्गिये पिते री इच्छा पाँदे चलोआ, सेई मेरा पाई, बईण और आम्मा ए।”

13 तेस दिने यीशु कअरो ते निकली की समुद्रो रे कनारे बैठीगे। 2 तेबे तिना गे बऊत बड़ी पीड़ कट्टी ऊईगी। तेबे सेयो किस्तिया पाँदे चढ़ी गे और सारी पीड़ कनारे पाँदे खड़ी री रई। 3 तेबे यीशुए तिना खे बऊत गल्ला उदारणा रे बोलिया, “एक बार बाणे वाला, बेजा बाणे निकलेया। 4 बाँदे ऊए कुछ बिऊ बाटा रे कनारे छूटी गे और पंछी आए और तिने बीज चूगी ले। 5 कुछ बिऊ सापड़ी वाली जगा रे छूटी गे, जेती तिना खे जादा माट्टी नि मिली और जादा गईरी माट्टी ना मिलणे री बजअ ते सेयो चट-चट जम्मी गे। 6 पर सूरज निकलदे ई सेयो फूकी गे और जड़ ना पकड़ने री बजअ ते सेयो सूकी गे। 7 कुछ बिऊ जाड़ो रे छूटे, तेबे जाड़ बड़ा ऊईगा और तिने सेयो दबाई ते। 8 पर कुछ बिऊ अच्छी जमीना पाँदे छूटे और फल ल्याए, कोई सौ गुणा, कोई साठ गुणा और कोई तीड़ गुणा। 9 जो समजी सकोआ से तिजी खे त्यानो साथे सुणो और मानी बी लओ।” 10 चेलिया नेड़े आयी की तिना खे बोलेया, “तुसे उदारणा रे लोका साथे गल्ला कऊँ करोए?” 11 यीशुए तिना खे जवाब दित्तेया, “तुसा खे तो स्वर्गो रे राज्य रे पेटो री समज दिती रिये, पर तिना खे नि ए। 12 कऊँकि जेसगे आपू तेसखे ओर बी देणा, तेबे तेसगे बऊत ऊई जाणा। पर जेसगे कुछ पनि ए, तेसगे जो कुछ बी आए से बी लई लया जाणा। 13 आऊँ तिना साथे उदारणा रे इजी री खातर गल्ला कऊँआ, कऊँकि सेयो, देखदे ऊए पनि देखदे, सुणदे ऊए पनि सुणदे और

ना समजदे। 14 तिना रे बारे रे यशायाह भविष्यबक्ते री ये भविष्यबाणी पूरी ओई, “तुसा कानो ते तो सुणाना, पर समजणा नि और आखी ते तो देखणा, पर दिशणा नि। 15 कऊँकि इना लोका रा मन मोटा ऊईगा रा और सेयो कानो ते ऊच्चा सुणोए, तिने आपणी आखी बन्द करी ती रिया। केशी एड़ा नि ओ कि सेयो, आखी ते देखणे लगे, कानो ते सुणने लगे, मनो ते समजणे लगे, और फिरी जाओ और आऊँ तिना खे ठीक करी देऊँ।” 16 “पर धन्य ए तुसा री आखी जो देखोईया और तुसा रे कान, जो सुणोए। 17 कऊँकि आऊँ तुसा खे सच बोलूँआ कि बऊत सारे भविष्यबक्ते और तर्मी लोके चाया कि जो गल्ला तुसे देखोए, तिना देखो, पर देखी नि सके, और जो गल्ला तुसे सुणोए, सुणो, पर सुणी नि सके। 18 “एबे तुसे बाणे वाले रे उदारणो रा मतलब सुणो। 19 जो कोई परमेशरो रा वचन सुणी की नि समजदा, तेसरे मनो रे जो कुछ बाई राखेया था, तेसखे से दुष्ट आयी की छुड़ाई की लई जाओआ। ये सेईए जो बाटा रे कनारे बाई राखेया था। 20 जो सापड़ी पाँदली जमीना पाँदे बाई राखेया था, ये से ए, जो वचन सुणी की फटाफट खुशिया साथे मानी लओआ। 21 पर आपू रे जड़ ना राखणे री बजअ ते से, थोड़े ई दिने खे ए और जेबे वचनो री बजअ ते क्लेश या बुरा ओआ, तो चट ई ठोकर खाई लओआ। 22 जो जाडो रे बाया, से ये ए, जो वचनो खे तो सुणोआ, पर दुनिया री चिन्ता, धनो रा तोखा, वचनो खे दबाई देओआ और से फल नि ल्याऊँदा। (aiōn g165) 23 जो अच्छी जमीना रे बाया, से ये जो वचनो खे सुणी की समजोआ और फल ल्याओआ, कोई सौ गुणा, कोई साठ गुणा और कोई तीड़ गुणा।” 24 यीशुए तिना खे एक और उदारण दित्तेया, “स्वर्गो रा राज्य, तेस जिम्मीदारो जेड़ा ए, जिने आपणे डोरूआ रे अच्छा बीज बाया। 25 पर जेबे लोक सऊणे लगी रे थे, तेबे तेसरा दुश्मन आया और कणका बीचे जंगली बीज बाई की चली गा। 26 जेबे लूंग आयी और सिल्ले लगे, तेबे जंगली दाणेया री डाली बी दिशणे लगे। 27 तेबे कअरो रे दासे आयी की तेसखे बोलया, ‘ओ मालक! क्या तुसे आपणे डोरूआ रे टंगो रा बीज नि था बाए रा? तेबे जंगली दाणे रिया डालिया तेते बीचे केथा ते आईया?’ 28 तिने तिना खे बोलेया, ‘ये तो केशी दुश्मणो रा काम ए।’ तेबे जो दास थे, तिने तेसखे बोलेया, ‘क्या तेरी इच्छा ए कि आसे जाई की तिना खे कट्टा करी देऊँ?’ 29 तिने बोलेया, ‘ना, एड़ा नि ओ कि जंगली दाणेया री डालिया खे कट्टे करदे-करदे, कणका खे बी पटी देयो। 30 बाडणे रे बखतो तक तिना ढूँई खे साथे-साथे बड़ने देयो और जेबे बाडणे रा बखत आऊणा तेबे मां बाडणे वाले खे बोलणा कि जंगली दाणे कट्टे करी की फूकणे खे, तिना रे बिडे बानी देयो, और कणका खे मरे पण्डारो रे कट्टा करी देयो।” 31 यीशुए तिना खे एक और उदारण दित्तेया, “स्वर्गो रा राज्य अऊरिया रे एक दाणे जेड़ा ए, जो एकी मांणूए लया और आपणे डोरूआ रे बीजी ता। 32 से सबी बीजो ते तो छोटो ए, पर जेबे से बढोआ, तेबे सबी सागो-पातो ते बड़ा ओआ और एड़ा डाल ऊई जाओआ कि सर्गो रे पंछी आयी की तेतेरी डालिया रे आपणा बसेरा करोए।” 33 तिने एक और उदारण सुणाय्या, “स्वर्गो रा राज्य, सजेडे जेड़ा ए, जो एकी जवाणसे लया और बीड़ किलो ते जादा आटे रे गूँदी ता और ऊँदे-ऊँदे सारा आटा सजेड़ा ऊईगा।” 34 ये सब गल्ला यीशुए लोका खे उदारणा रे बोलिया और बिना उदारणो ते सेयो तिना खे कुछ नि बोलो थे। 35 ताकि जो वचन भविष्यबक्ते बोलेया था, से पूरा ओ कि “मां उदारण बोलणे खे आपणा मूँ खोलणा; मां सेयो गल्ला बोलणिया, जो दुनिया री शुरूआता ते गुप्त ए।” 36 तेबे यीशु पीड़ा खे छाडी की कअरे आए, तेबे तिना रे चेलेया तिना गे आयी की बोलेया, “डोरूआ रे जंगली दाणे रा उदारण आसा खे समजवाई देओ।” 37 यीशुए तिना खे जवाब दित्तेया, “अच्छे बीज बाणे वाला मांणू रा पुत्र ए। 38 डोरू दुनिया रे लोक ए, अच्छा बीज राज्य रे से लोक ए जिना पाँदे परमेशर राज करने ते खुश ए और जंगली बीज, दुष्टो री से ल्वाद ए जो शैतानो री आज्ञा मानी की काम करोए। 39 जिने दुश्मणे सेयो बीजे, से शैतान ए; बडाई दुनिया रा अंत ए और बाडणे वाले स्वर्गदूत ए। (aiōn g165) 40 तेबे जियाँ जंगली दाणे कट्टे करोए और फूकी देओए, तेड़ा ई दुनिया रे अंतो रे

ऊणा। (aiōn g165) 41 मांणू रे पुजो आपणे स्वर्गदूत पेजणे, तिना तेसरे राज्य रे, सब, जो ठोकरा री बजअ ओ ए और पाप करने वाले, कट्टे करने 42 और सेयो आगी रे कुण्डो रे सेटी देणे, जेती रोणा और दौंद किरडना ई ऊणा। 43 तेस बखते तर्मी आपणे पिते रे राज्य रे सूरजो जेडे चमकणे, जो समजी सकोआ से तिजी खे त्यानो साथे सुणो और मानी बी लओ। 44 “स्वर्गो रा राज्य डोरूआ रे लूके रे खजाने जेड़ा ए, जो केशी मांणूए खे मिलेया और तिने लकोईता, तेबे तिने खुश ई की आपणा सब कुछ बेची ता और से डोरू खरीदी ला। 45 “स्वर्गो रा राज्य एक बवारिए जेड़ा ए, जो खरे मोतिए री टोला रे था। 46 जेबे तेसखे एक किमती मोती मिली गा, तेबे तिने जाई की आपणा सब कुछ बेची ता और से मोती खरीदी ला। 47 “फेर, स्वर्गो रा राज्य तेस बड़े जालो जेड़ा ए, जो समदूरो रे पाया और हर प्रकारा रिया मछलिया तिदे आयी गिया 48 और जेबे जालू फरी गा, तेबे मछली पकड़ने वाले तिजी खे कनारे पाँदे खिंजी की ली आए और जो अच्छी-अच्छी मछलिया थिया सेयो पांडे रे राखी तिया और जो नकम्मिया थिया सेयो सेटी तिया। 49 दुनिया रे अंतो रे एड़ा ई ऊणा, तेबे स्वर्गदूता आयी की दुष्ट तर्मिया ते लग करने, (aiōn g165) 50 और सेयो आगी रे कुण्डो रे सेटी देणे। तेती रोणा और दौंद किरडना ई ऊणा। 51 “क्या तुसे यो सब गल्ला समजिया?” तिने यीशुए खे बोलेया, “आ।” 52 तेबे यीशुए तिया खे बोलेया, “हर एक शास्त्री, जो स्वर्गो रे राज्य रा चेला बणी रा, तेस करे लू मांणूए जेड़ा ए, जो आपणे पण्डारो ते नईया और पुराणिया चीजा निकयालोआ।” 53 जेबे यीशु इना सारे उदारणा बोली चुके, तेबे सेयो तेथा ते चली गे। 54 तेबे आपणे नगरो रे आयी की तिना रे प्रार्थना रे कअरो रे तिना खे एड़ा उपदेश लगे देणे कि सेयो हेरान ऊई की तिना खे बोलणे लगे, “इना खे इतणा ज्ञान और सामर्थो रे काम केथा ते मिले? 55 क्या ये मिस्त्रियो रा पाऊ निए? क्या इना री आम्मा रा नाओ मरियम निए और पाईयो रा नाओ याकूब, यूसुफ, शमोन और यहूदा निए? 56 क्या इना रिया सारिया बईणा आसा बीचे नि रदिया? तेबे इना खे ये सब कुछ केथा ते मिलेया?” 57 यीशुए तिना री बजअ ते ठोकर खाई पर तिने तिना खे बोलेया, “भविष्यबक्ते रा आपणे देश और आपणे कअरो खे छाडी की ओरथी केशी बी नरदार नि ऊँदा।” 58 तेबे यीशुए तिना रे अविश्वासो री बजअ ते जादा सामर्थो रे काम नि कित्ते।

14 तेस बखते चौथाई देशो रे राजे हेरोदेसे यीशुए री चर्चा सुणी, 2 और तेबे तिने आपणे दासा खे बोलेया, “ये यूहन्ना बपतिस्मा देणे वाला ए और मरे रेया बीचा ते जिऊँदा ऊईगा रा, तेबेई तो एसते सामर्थो रे काम ओए।” 3 कऊँकि हेरोदेसे, आपणे पाई फिलिपुसो री लाडी हेरोदियासारा री बजअ ते, यूहन्ना पकडी की बानेया और जेला रे पाईता था। 4 कऊँकि यूहन्ने तेसखे बोलेया था, “एसा खे राखणा बिधानो रे मुताबिक ताखे ठीक निए।” 5 इजी री बजअ ते से यूहन्ने खे काणा चाओ था, पर लोका ते डरो था, कऊँकि लोक तेसखे भविष्यबक्ता मानो थे। 6 पर जेबे हेरोदेसो रा जन्मदिन आया, तेबे हेरोदियासारा री बेटिये त्योआरो रे नाची की हेरोदेस खुश करी ता। 7 तेबे तिने कसम खाई की वचन दित्तेया, “जो कुछ तू मांगेगी, मां ताखे देणा।” 8 से आपणी आम्मा री सकेली री थी और तेसे बोलेया, “यूहन्ने बपतिस्मे रा सिर थालिया रे एथी माखे मंगवाई दे।” 9 राजा दुः खी ऊईगा, पर आपणी कसमारा री और आपू साथे बैठणे वालेया री बजअ ते, तिने आज्ञा दित्ती कि देई दो। 10 तेबे तिने जेला रे आपणे मांणूआ खे पेजी की यूहन्ने रा सिर बडवाईता 11 और तेसरा सिर थालिया रे ल्याया और मुन्निया खे दित्तेया और से तिजी खे आपणी आम्मा गे लईगी। 12 तेबे यूहन्ने रे चले आए और तेसरी लोथ लई की दबाई ती और यीशुए खे एतेरा समाचार सुणाय्या। 13 जेबे यीशुए ये सब सुणोया, तेबे सेयो किस्तिया रे बैठी की सुणसाण जगा रे लग जे चली गे और जेबे लोके ये सुणेया तेबे सेयो नगरो-नगरो रिये हांडी की तिना पीछे आईगी। 14 यीशुए निकली की एक बडी पीड़ देखी और तिना पाँदे तिना खे तरस आया और तिने तिना रे बमार ठीक कित्ते। 15 जेबे साँज ऊई, तेबे तिना रे चले तिना गे आए और बोलणे लगे,

“एती तो सुणसाण जगा ए और देर लगी री ऊणे, तुसे लोका खे बिदा करो, ताकि सेयो जाई की बस्तिया रे आपू खे रोटी खरीदी सकी।” 16 यीशुए तिना खे बोलेया, “तिना रा जाणा जरूरी निए, तुसेई इना खे खाणे खे देयो।” 17 तिने बोलेया, “एती तो आसा गे पाँज रोटिया और दो मछलिया छाडी की कुछ निए।” 18 यीशुए बोलेया, “तिना खे मांगे ली आओ।” 19 तेबे तिने लोका खे काओ पाँदे बैठणे खे बोलेया, तेबे तिने सेयो पाँज रोटिया और दो मछलिया लईया और स्वर्गो खे देखेया और धन्यवाद कित्तेया और रोटिया तोड़ी-तोड़ी की चेलेया खे दित्तिया और चेलेया लोका खे। 20 जेबे सब खाई की रजी गे, तेबे चेलेया जो टुकड़े थे बचे रे तिना रिया बारा टोकरिया परिया और चकिया। 21 खाणे वाले जवाणसा और बच्चेया खे छाडी की तकरीबन पाँज हजार मर्द थे। 22 तेबे यीशुए तेबुई आपणे चले किस्तिया रे चढ़ाणे खे मजबूर कित्ते कि जदुओ तक आऊँ लोका खे बिदा करूँआ, तुसे तिजी ते पईले पार चली जाओ। 23 तेबे यीशु लोका खे बिदा करी की प्रार्थना करने खे लग पाह्दो पाँदे चली गे और साँजा तक तेती कल्ले थे। 24 तेस बखते किस्ती समुद्रो रे लईरा साथे छनके खाणे लगी, कऊँकि सामणी अवा थी। 25 तेबे यीशु राथियो रे चौथे पइरो रे समुद्रो रे चली की तिना गे आए। 26 चले तिना खे समुद्रो रे चलदे ऊए देखी की कबराइगे और बोलणे लगे, “ए तो पूत ए,” और सेयो डरी गे और चिंगणे लगे। 27 यीशुए तेबुई तिना साथे गल्ला कित्तिया और बोलेया, “इम्मत राखो, आऊँ ए, डरो नि।” 28 पतरसे तिना खे बोलेया, “ओ प्रभु! जे तुसे ईए, तो माखे आपू गे चली की आऊणे री आज्ञा देयो।” 29 यीशुए बोलेया, “आईजा।” तेबे पतरस किस्तिया ते पाणिए बीचे उतरेया और यीशुए गे जाणे खे पाणिए बीचे चलणे लगेया। 30 पर से पाणिए खे देखी की जो समुद्रो रे अवा साथे लईरा उठणे लगी री थिया देखी की डरीगा और जेबे डूबणे लगेया, तेबे चींगी की बोलणे लगेया, “ओ प्रभु, माखे बचा।” 31 यीशुए फटाफट आपणा आथ आगे कित्तेया और से बचाईता और तेसखे बोलेया, “ओ कम विश्वास करने वाले, तँ शक कऊँ कित्तेया?” 32 जेबे सेयो किस्तिया रे चढ़ी गे, तेबे अवा रुकी गी। 33 ये देखी की जो किस्तिया रे थे तिने तिना गे माथा टेकी की बोलेया, “सच्ची तुसे परमेशरो रे पुत्र ए।” 34 सेयो पार उतरी की गन्नेसरत देशो रे पऊँछे। 35 तेथो रे लोके सेयो पछयाणी ले और ओरे-पोरे सबी गे बोलेया और सब लोक बमारा खे तिना गे ल्याए 36 और यीशुए ते प्रार्थना करने लगे कि आसा खे बस आपणे टाले रा पल्ला ई छूणे दे, और जितणेया बी सेयो छूँए, सब ठीक ऊईगी।

15 तेबे यरूशलेमो रे बऊत शास्त्री और फरीसी यीशुए गे आए और बोलणे लगे, 2 “तुसा रे चले बुजुर्गा री रवाजा खे कऊँ नि मानदे और बिना आथ तोए रोटी खाओए?” 3 यीशुए तिना खे जवाब दित्तेया, “तुसे बी आपणिया रवाजा रे खलाफ कऊँ परमेशरो रिया आज्ञा खे तोड़ोए? 4 कऊँकि परमेशरे बोलेया था, ‘आपणे माया-बाओ रा आदर करो,’ और ‘जो कोई आपणे माया-बावा खे बुरा बोलोगा से काया जाओ।’ 5 पर तुसे बोलोए कि जे कोई आपणे माया-बावा खे बोली, ‘जो कुछ ताखे मांते फाईदा ऊई सकी था, से परमेशरो खे पेंट चढ़ाईता।’ 6 तो से आपणे पिते रा आदर नि करो, तुसे आपणी रवाजा री बजअ ते परमेशरो रा वचन टाली ता। 7 ओ कपटियो! यशयाहे तुसा रे बारे ये भविष्यवाणी ठीक कित्ती: 8 “‘यो लोक मुंओ ते तो मेरा आदर करोए, पर मनो ते मांते दूर रओए 9 और यो बेकार ई मेरी भक्ति करोए, कऊँकि मांणूए रिया रवाजा खे तर्मो रा उपदेश मानोए।’” 10 तेबे यीशुए लोका खे आपू गे बुलाई की बोलेया, “सुणो, और समजो। 11 जो मुंओ रे जाओआ से मांणूए खे अशुद्ध नि करदा, पर जो मुंओ रिये निकलोआ से मांणूए खे अशुद्ध करोआ।” 12 तेबे चेलेया आयी की तिना खे बोलेया, “क्या तुसे जाणोए कि फरीसिये ये वचन सुणी की ठोकर खाई?” 13 यीशुए जवाब दित्तेया, “हर डाली जो मेरे स्वर्गिये पिते निए लगाई री, से पटी देणी। 14 तिना खे जाणे देयो, सेयो अन्दी बात दखाणे वाले ए और अन्दा जे अन्दे खेई बात बताओगा तो दोनो गड्डे रे पड़ी जाणे।”

15 ये सुणी की पतरसे तिना खे बोलेया, “एस उदारणो आसा खे समजयाई दो।” 16 यीशुए बोलेया, “क्या तुसे बी एबुए तक नि समजो रे? 17 क्या तुसे नि जाणदे कि जो कुछ मुंओ रिये जाओआ, से पेटो रे पड़ोआ और सडुयानी साथे बारे निकलोआ। 18 पर जो कुछ मुंओ रिये निकलोआ, से मनो ते निकलोआ और सेई मांणूए खे अशुद्ध बणाओआ। 19 कऊँकि बुरे बिचार, अत्या, परस्त्रीगमन, व्याभिचार, चोरी, चूठी गवाई और निन्दा मनो तेई निकलोई। 20 येईए जो मांणूए खे अशुद्ध करोए, पर बिना आथ तोए रोटी खाणा मांणूए खे अशुद्ध नि करदा।” 21 यीशु तेथा ते निकली की सूर और सैदा रे नगरो खे चली गे। 22 तेबे तेस देशो ते एक कनानी जवाणस निकली, और से चींगी की बोलणे लगी, “ओ प्रभु दाऊदो री ल्वाद! मां पाँदे दया कर, मेरी मुन्निया खे दुष्टात्मा बऊत तंग लगी री करने।” 23 पर तिने तेसा खे कोई बी जवाब नि दित्तेया, तेबे तिना रे चेलेया बोलेया, “एसा खे एथा ते पेजी दे, कऊँकि ये तो आसा पीछे आल्ला पाँदी ऊई आऊणे लगी री।” 24 तिने बोलेया, “इसाएलो रे कराने रिया राची रिया पेडा खे छाडी की आऊँ केसी गे निए पेजेया रा।” 25 पर से आयी और तिना गे माथा टेकी की बोलणे लगी, “ओ प्रभु! मेरी मताद करो।” 26 प्रभुए तेसा खे बोलेया, “बच्चेया री रोटी कुत्तेया रे आगे देणे ते कोई फाईदा निए।” 27 जवाणसे बोलेया, “सच ए प्रभु, पर कुत्ते बी तेस चुरा-चुरा खाओए, जो तिना रे मालका री मेजा ते छुटोआ।” 28 ये सुणी की यीशुए तेसा खे बोलेया, “ओ जवाणसे! तेरा विश्वास बड़ा ए, जेडा तूँ चाए ई तेडा ई ओ” और तेसा री मुन्नी तेबुई ठीक ऊईगी। 29 यीशु तेथा ते गलीलो रे समुद्रो रे आए और पाह्दो पाँदे चढ़ी की बैठीगे। 30 तेबे पीड़ा री पीड़ यीशुए गे आयी और अन्दे, लंगड़े, गूँगे, टूण्डे और ओर बी कई जणोया खे यीशुए गे ल्याए और सेयो तिना रे पैरा पाँदे राखी ते और तिने सेयो ठीक कित्ते। 31 तेबे, जेबे लोके देखेया कि गूँगे बोलणे लगे, अन्दे देखणे लगे, टूण्डे ठीक ऊईगे, लंगड़े चलणे लगी गे तो तिने हैरान ऊई की इसाएलो रे परमेशरो री तारीफ कित्ती। 32 यीशुए आपणे चले बुलाए और तिना खे बोलेया, “माखे एसा पीड़ा पाँदे तरस आओए, कऊँकि ये तीन दिना ते मां साथे ए और इना गे कुछ बी खाणे खे निए। आऊँ तिना खे पूखे नि पेजणा चांदा, केथी एडा नि ओ कि यो बाटा रे थकी जाओ।” 33 चेलेया तिना खे बोलेया, “आसा खे जंगलो रे इतणिया सारिया रोटिया केथा ते मिलणिया कि आसे इतणी बड़ी पीड़ा खे रजाई सकिओ?” 34 यीशुए तिना ते पूछेया, “तुसा गे कित्ती रोटिया ए?” तिने बोलेया, “सात, और कुछ छोटिया मछलिया ए।” 35 तेबे तिने लोका खे जमीना पाँदे बैठणे री आज्ञा दित्ती। 36 और तिने सेयो सात रोटिया और मछलिया लईया और धन्यवाद करी की तोड़िया और आपणे चेलेया खे दित्तिया और चेलेया लोका खे। 37 तेबे सब तिना खाई की रज्जी गे और चेलेया बचे रे टुकड़ेया ते परे रे सात टोकरे चके। 38 खाणे वाले, जवाणसा और बच्चेया खे छाडी की चार हजार मर्द थे 39 तेबे सेयो पीड़ा खे बिदा करी की किस्तिया पाँदे चढ़ी गे और मगदन देशो रे बन्ने रे आए।

16 तेबे फरीसिये और सदूकिये नेडे आयी की यीशुए खे परखणे खे बोलेया, “आसा खे स्वर्गो रा कोई चिहू दखाओ।” 2 तिने तिना खे जवाब दित्तेया, “साँजा खे तुसे बोलोए, ‘मौसम साफ रणा, कऊँकि सर्ग लाल ए,’ 3 और प्यागा खे बोलोए, ‘आज तूफान आऊणा, कऊँकि सर्ग लाल और तूँदला ए।’ तुसे सर्गो खे देखी की पेट बताई सकोए, पर बखतो रे चिहू रा पेट नि बताई सकदे? 4 एस जुगो रे बुरे और व्याभिचारी लोक चिहू टोलोए; पर योने रे चिहू खे छाडी की कोई और चिहू तिना खे नि देणा।” यीशु इना खे छाडी की चली जाणा। 5 चले समुद्रो ते पार पऊँछी गे, पर सेयो रोटी लणा पूली गे थे। 6 यीशुए तिना खे बोलेया, “देखो, फरीसी और सदूकिये रे सजेडे ते चौकस रणा।” 7 सेयो आपू बीचे सोचणे लगे, “आसे तो रोटी ल्याई नि राखी, तेबेई तो यो आसा खे एडा बोलणे लगी रे।” 8 ये जाणी की यीशुए तिना खे बोलेया, “ओ कम विश्वास करने वालेयो! तुसे आपू बीचे कऊँ लमी रे सोचणे कि आसा गे रोटी निए? 9 क्या तुसे एबुए

तक नि समजें? क्या तुसा खे सेयो पॉज हजारिया पॉज रोटिया याद नि ए, और ना ये कि तुसे कितणिया टोकरिया चकिया थिया? 10 ना तिना चार हजारिया सात रोटिया; और ना ये कि तुसे कितणे टोकरे चके थे? 11 तुसे कऊँ नि समजदे कि मैं तुसा खे रोटिया रे बारे रे नि बोलेया? पर ये की तुसे फरीसी और सदूकिये रे सजेडे ते चौकस रप्यो। 12 तेबे तिना खे समज आया कि प्रभु ए तिना खे रोटिया रे सजेडे ते नि पर फरीसी और सदूकियो रिया शिक्षा ते चौकस रणे खे बोलेया था। 13 यीशु कैसरिया और फिलिपिया रे देशे रे आयी की आपणे चलेया खे पूछणे लगे, “लोक माखे माणूँ रे पुत्रो खे क्या बोलीए?” 14 तिने बोलेया, “कोई तो यूहन्ना बपतिस्मा देणे वाला, कोई एलियाह, कोई यिर्मयाह और कोई बोलीए कि ये तो भविष्यबक्तेया बीचा ते कोई एक ए।” 15 तेबे तिने तिना खे बोलेया, “तुसे माखे क्या बोलीए?” 16 शमौन पतरसे जवाब दितेया, “तुसे जिऊँदे परमेशरो रे पुत्र मसीह ए।” 17 यीशु ए तेसखे जवाब दितेया, “ओ शमौन, योने रा पाऊ! तूँ धन्य ए; कऊँकि मांस और खूने नि, पर मेरा पिता जो स्वर्गो रे ए, तिने ये गल्ल तांते बुलाई राखी 18 और आऊँ बी ताखे बोलीँआ कि तूँ पतरस ए और मैं एस पात्शरो पँदि आपणी मण्डली बनाणी और नरको रे फाटक ए पँदि प्रबल नि ऊणो।” (Hades 986) 19 मां ताखे स्वर्गो रे राज्य रिया कुँजियाँ देणियाँ और तां जो कुछ तरतिया पँदि बाणया, से स्वर्गो रे बानेया जाणा और जो कुछ तां तरतिया रे खोलणा, से स्वर्गो रे खुलणा। 20 तेबे तिने चलेया खे सावधान करी की बोलेया कि केसी गे नि बोलणा कि आऊँ मसीह ए। 21 तेस बखतो ते यीशु आपणे चलेया खे बताणे लगे, “जरूरी ए कि आऊँ यरूशलेमो खे जाऊँ और बुजुर्गा ते, बड़े पुरोईता ते और शास्त्रिया ते दुः ख उठाऊँ और कुलाया जाऊँ और तीजे दिने जिऊँदा ऊई जाऊँ।” 22 ये सुणी की पतरस तिना खे लग जे लईगा और थिड़कणे लगेया, “ओ प्रभु! परमेशर नि करो तुसा साथे कदी एड़ा ओ।” 23 यीशु मुड़ी की पतरसो खे बोलेया, “ओ शैतान! मेरी नजरा ते दूर ऊई जा, तूँ माखे ठोकरा रा कारण ए, कऊँकि तूँ परमेशरो री गल्ला पँदि नि, पर माणूँ रिया गल्ला पँदि मन लगाएया।” 24 तेबे यीशु आपणे चलेया खे बोलेया, “जे कोई मां पीछे आऊणा चाओआ तो आपणे आपू खे ना करी दो और आपणा क्रूस आपू चको और मां पीछे आयी जाओ। 25 कऊँकि जो कोई आपणा प्राण बचाणा चाओगा, तेस से खोणा और जो कोई आपणा प्राण मेरी बजअ ते खोओणा, तेस से पाणा। 26 जे माणूँए खे सारी दुनिया मिली जाओ और आपणे प्राण नि रबो, तो क्या फाईदा ऊणा? या माणूँए आपणे प्राणो रे बदले क्या देणा। 27 मां माणूँ रे पुत्रो आपणे स्वर्गदूता साथे आपणे पिते रिया महिमा रे आऊणा, और तेस बखते मां हर एकी खे तेसरे कामो रे मुताबिक फल देणा। 28 आऊँ तुसा खे सच लगी रा बोलणे कि जो एती खड़ी रे, तिना बीचा ते कुछ एड़े ए, जो तदुओ तक नि मरने, जदुओ तक माणूँ रे पुत्रो खे तेसरे राज्य रे आऊँदा ऊआ नि देखी लओगे।”

17 छे दिनो ते बाद यीशुए, पतरस, याकूब और तेसरा पाई यूहन्ना साथे लये और तिना खे लग जे केथी पाहडो पँदि लईगे। 2 तेबे तिना सामणे यीशुए री शकल बदली गी और तिना रा मूँसूरजो जेड़ा चमकीगा, तिना रे टालेया रे जोतिया जेड़ा प्रयासा ऊईगा। 3 तेबे तिना खे मूसा और एलियाह, यीशुए साथे गल्ला करदे ऊए दिखे। 4 ये देखी की पतरसे यीशुए खे बोलेया, “ओ प्रभु! आसा रा एती रणा ठीक ए! जे तेरी इच्छा ए तो आऊँ एती तीन तम्बू बणाई देऊँ, एक तुसा खे, एक मूसे खे और एक एलियाह खे।” 5 से ये बोलणे ई लगी रा था कि एक प्रयासे वाला बादल तिना पँदि छाईगा और तेस बादलो ते परमेशरो री ये आवाज आई, “ये मेरा प्यारा पुत्र ए, आऊँ एसते बऊत खुश ए; एसरी सुणो।” 6 चले ये सुणी की मुओ रे पारे रूडी गे और बऊत जादा डरी गे। 7 यीशुए नेडे आयी की सेयो छूँए और तिना खे बोलेया, “उठी जाओ, डरो नि।” 8 तेबे तिने आपणी आखी ऊबे चकिया और यीशुए खे छाडी की और कोई नि देखेया। 9 जेबे सेयो पाहडो ते उतरने लगी रे थे, तेबे यीशुए तिना खे ये आज्ञा दिती, “जदुओ तक आऊँ माणूँ रा

पुत्र मरे रेया बीचा ते जिऊँदा नि ऊई जाओ, तदुओ तक जो कुछ तुसे देखेया, से केसी गे नि बताणा।” 10 तेबे तिना रे चलेया तिना ते पूछेया, “तेबे शास्त्री कऊँ बोलीए कि एलियाह रा पईले आऊणा जरूरी ए?” 11 यीशुए जवाब दितेया, “एलियाह तो जरूर आऊणा और तेस सब कुछ सुदारना। 12 पर आऊँ तुसा खे बोलीँआ कि एलियाह तो आयी चुकेया रा और लोके से नि पछयाणेया; पर जो चाया, से तेस साथे कितेया, तियाँ ई माणूँ रे पुत्रो बी तिना रे आथो ते दुः ख उठाणा।” 13 तेबे चलेया खे समज आया कि तिने आसा गे यूहन्ना बपतिस्मा देणे वाले रे बारे रे बोलेया। 14 जेबे यीशु पीड़ा रे नेडे आए, तेबे एक माणूँ तिना गे आया और कुटणे टेकी की बोलणे लगेया, 15 “ओ प्रभु! मेरे पाऊए पँदि दया कर, कऊँकि तेसखे मिर्गो ए और तेसखे बऊत दुः ख ओआ, से बार-बार पाणिण रे और बार-बार आगी रे पडी जाओआ। 16 आऊँ तेसखे तुसा रे चलेया गे ल्याया था, पर तिना रे बोले से ठीक नि ऊआ।” 17 यीशुए जवाब दितेया, “ओ अविश्वास करने वालेयो और टीठ लोको! मां कदुओ तक तुसा साथे रणा? कदुओ तक तुसा खे सईन करूँ? तेसखे ओरे ल्याओ मांगे।” 18 तेबे यीशु दुष्टात्मा खे बके और तेबे दुष्टात्मा बारे निकली गी और से पाऊ तेसी बखते ठीक ऊईगा। 19 तेबे चलेया कल्ले जे आयी की यीशुए ते पूछेया, “आपणे एसा खे कऊँ नि निकयाली सके?” 20 तिने तिना खे बोलेया, “आपणे कम विश्वासो री कमिया री बजअ ते; कऊँकि आऊँ तुसा खे सच लगी रा बोलणे कि जे तुसा रा विश्वास एक अऊरिया रे दाणे बराबर बी ऊँदा, तो तुसे एस पाहडो खे बोलोगे, ‘एथा ते पोरु खे सरकी जा’, तो से चली जाणा और कोई बी गल्ल तुसा खे कठण नि ऊणो। 21 पर ये जाति बिना प्रार्थना और बअरतो ते नि निकलदी।” 22 जेबे सेयो गलीलो रे थे, तेबे यीशुए तिना खे बोलेया, आऊँ माणूँ रा पुत्र, माणूँआ रे आथो रे पकड़वाऊणा। 23 तिना आऊँ काई देणा और आऊँ तीजे दिने जिऊँदा ऊई जाणा। ये सुणी की सेयो बऊत दुः खी ऊईगे। 24 जेबे सेयो कफरनहूम पऊँछे तेबे मन्दरो रा कर लणे वालेया, पतरसो गे आयी की पूछेया, “क्या तुसा रा गुरु मन्दरो रा कर नि देँदा?” 25 तिने बोलेया, “आ, देओआ।” जेबे सेयो कअरे आये तेबे यीशुए तेसरे पूछणे ते पईले ई तेसखे बोलेया, “ओ शमौन! तूँ क्या समजेया? तरतिया रे राजे कर केस ते लओए? आपणे बच्चेया ते या पराया ते?” 26 पतरसे तिना खे बोलेया, “पराया ते।” यीशुए तेसखे बोलेया, “तेबे पाऊ तो बची गे। 27 पर तेबे बी आसे तिना खे ठोकर नि देणा चाँदि। तूँ समदुरे रे कनारे जा और बंसी पाणिण रे पा, जो मछली पईले निकल्लो, तेसा खे लओ और तेसा रा मूँ खोली की ताखे एक सिक्का मिलणा। तेस लओ और आपणे और मेरे बदले तिना खे देई दे।”

18 तेस बखते चले यीशुए गे आयी की पूछणे लगे, “स्वर्गो रे राज्य रे बड़ा कुण ए?” 2 यीशुए एक बालक आपू गे बुलाया और तिना बीचे खड़ा कितेया 3 और बोलेया, “आऊँ तुसा खे सच लगी रा बोलणे कि जदुओ तक तुसे नि फिरो और बच्चे जेडे नि बणो, तुसे स्वर्गो रे राज्य रे नि जाई सकदे। 4 जो कोई एस बच्चे जेड़ा आपू खे छोटा करोगा, से स्वर्गो रे राज्य रे बड़ा ऊणा 5 और जो कोई मेरे नाओँ ते एड़े बालको खे मानोआ, से माखे मानोआ। 6 “पर जो कोई इना छोटेया बीचा ते, जो मां पँदि विश्वास राखोए, एकी खे बी ठोकर देओगा, तो तेसखे पला ऊँदा कि तेसरे गल्ले रे चाक्किया रा एक बड़ा पूड लटकाई देओ और तेसखे समदुरे रे सेटी देओ। 7 ठोकरा री बजअ ते एसा दुनिया पँदि हाय! ठोकरा रा लागणा जरूरी ए; पर हाय तेस माणूँए खे जेसरे पापो री बजअ ते ठोकर लगेई। 8 “जे तेरा आथ या पैर ताखे ठोकर देओआ, तो तेस बाडी की सेटी दे, कऊँकि तेरे दो आथ और दो पैर ऊँदे ऊए बी जे तूँ अनन्त आगी रे सेटेया जाओआ, तो ताखे बड़िया ए कि तूँ टुण्डा या लंगड़ा ऊई की जिन्दगी बिताए। (aiōnios g166) 9 जे तेरी आख ताखे पापो री बजअ बणो ई, तो तेसा निकयाली की सेटी दे। काणा ऊई कि जिन्दगिया रे जाणा ताखे ये पला ए कि दो आखी रँदे ऊए तूँ नरको रिया आगी रे सेटेया जाओ। (Geenna g1067) 10 “देखो, तुसे इना छोटेया

बीचा ते केसी खे बी तुच्छ नि जाणना। कळूंकि आऊँ तुसा खे सच लगी रा बोलणे कि स्वर्गों रे तिना रे स्वर्गदूत मेरे स्वर्गिय पिते रे सामणे बिनती करने रे मकसदो ते सदा तिना सामणे आजीर रओए। 11 कळूंकि आऊँ माणूँ रा पुत्र रावेया रे खे बचाणे आयी रा। 12 “तुसे क्या सोचोए? जे मानी लो केसी माणूँए गे सौ पेडा ए और तिना बीचा ते एक पेड राची जाओ, तो क्या से तिना नडिनूए पेडा खे छाडी की और पाहडो पाँदे जाई की तेसा राची रिया पेडा खे टोलने नि जाणा? 13 और जेबे तेसखे से पेड मिली जाओ तो आऊँ तुसा खे सच लगी रा बोलणे कि से तिना नडिनूए पेडा खे, जो राची नि रईया थिया, ईतणा खुश नि ऊणा, जितणा तेसा राची री एक पेडा खे। 14 एड़ी ई इच्छा, तुसा रे स्वर्गिय पिते री निए कि इना छोटया बीचा ते एक बी नाश ओ। 15 “जे तेरा कोई विश्वासी पाई तरे खलाफ अपराध करो, तो तेसखे कल्ले जे लई जाई की समजेया, जे से तेरी सुणोगा तो तँ आपणा विश्वासी पाई पायी ला। 16 जे से तेरी नि सुणोगा, तो तँ आपू साथे, एकी-दूई जणे खे ओरी खे बी लई जा, ताकि ‘मूसे रा बिधानो रे मुताबिक हर एक गल्ला री गवाई, दो या तीन जणेया रे मुँओ ते पक्की किती जाओ।’ 17 जे से तिना री पनि मानो, तो तँ मण्डलिया खे बोल, पर जे से मण्डलिया री पनि सुणोगा, तो तँ तेसखे दूजी जातिया रा और कर लणे वाला जेडा समज। 18 “आऊँ तुसा खे सच लगी रा बोलणे कि जो कुछ तुसा तरतिया रे बानणा, से स्वर्गों रे बानेया जाणा और जो कुछ तुसा तरतिया रे खोलणा, से स्वर्गों रे खोलेंया जाणा। 19 फेर आऊँ तुसा खे बोलूँआ कि जो कोई तरतिया रे दो जणे एक मन ऊई की तिजी खे माँगे, तो से मेरे स्वर्गिय पिते री तरफा ते, जो स्वर्गों रे ए, से तिना खे ऊई जाणा। 20 कळूंकि जेती दो या तीन जणे मेरे नाओं ते कट्टे ओए, तेती आऊँ तिना बीचे ओऊँआ।” 21 तेबे पतरसे नेडे आयी की यीशुए खे बोलेया, “ओ प्रभु! जे मेरा विश्वासी पाई अपराध ई करदा रओ, तो आऊँ कितणी बार तेसखे माफ करई? क्या सात बार तक?” 22 यीशुए तेसखे बोलेया, “आऊँ तुसा खे ये नि बोलदा कि सात बार, बल्कि सात बार रे सत्तर गुणे तक माफ करो। 23 “तेबेई तो स्वर्गों रा राज्य तेस राजे जेडा ए, जिने आपणे दासा ते लेखा लणा चाया। 24 जेबे से लेखा लणे लगेया, तेबे एक माणूँ तेस सामणे ल्याया जो दस हजार सूईने रे सिक्के रा कर्जदार था। 25 जबकि तेसगे कर्ज चुकाणे खे कुछ पनि था। तेबे तेसरे मालके बोलेया, एसखे, एसरी लाडी, एसरे बच्चे और जो कुछ एसरे कअरो रे ए, से सब बेची देयो और तेबे एसरा कर्ज चुकदा ऊई जाणा। 26 तेबे से दास, आपणे मालको रे पैरा पाँदे पडी गा और माथा टेकणे लगेया, और बोलणे लगेया, ‘सब्र राख, मां सब वापस करी देणा।’ 27 तेबे तेस दासो रे मालको खे तेस पाँदे तरस आईगा और तिने तेसरा सारा त्वार माफ करी ता। 28 “पर जेबे से दास बारे निकलेया तेबे तेस साथले दासा बीचा ते तेसखे एक जणा मिलेया, जो, तेसरे सौ चाँदिए रे सिक्के रा कर्जदार था; तिने से पकडी की तेसरा गला कोटया और बोलेया, ‘जो तांगे मेरा त्वार ए तेस वापस करा।’ 29 तेबे तेस साथला दास तेसरे पैरा पाँदे पडी की बोलणे लगेया, ‘सब्र राख, मां तेरा कर्ज चुकाई देणा।’ 30 पर से नि मानेया और तिने से जेला रे पाईता कि जदुओ तक इने मेरा कर्ज नि दितेया, तदुओ तक ये एथी रणा। 31 तेसरा साथी ये देखी की बऊत दुः खी ऊईगा और तिने सारा आल जाई की आपणे मालको गे बताया। 32 “तेबे तेसरे मालके से बुलाया और तेसखे बोलेया, ओ दुष्ट दास! जेबे तँ मांते प्रार्थना किती थी, तेबे मैं तो तेरा सारा कर्ज माफ करी ता था। 33 जेबे मैं तां पाँदे दया किती, तो ताखे एस पाँदे दया नि करनी चाईयो थी? 34 तेबे मालको खे रोष आईगा और तिने से सजा देणे वालेया गे देईता और बोलेया कि जदुओ तक ये कर्ज नि देई दैदा, तदुओ तक एसखे आपू गे ई राखो। 35 तेबेई तो जो कोई तुसा बीचा ते आपणे विश्वासी पाईए रे पाप माफ नि करदा, तो मेरा पिता जो स्वर्गों रे ए, तिना बी तुसा साथे एडा ई करना।”

19 जेबे यीशु इना गल्ला बोली चुके, तेबे सेयो गलील प्रदेशो ते चली गे और यरदन नदिया ते पार यहूदिया प्रदेशो रे आए। 2 तेबे एक बडी

पीड़ तिना पीछे आईगी और तिने सेयो तेती ठीक कित्ते। 3 तेबे फरीसी तिना खे परखणे खे तिना गे आए और बोलणे लगे, “क्या हर एक बजअ ते आपणी लाडी छाडणी खरी गल्ल ए?” 4 यीशुए जवाब दितेया, “क्या तुसे नि पडी राखेया, जिने सेयो बणाई राखे तिने शुरूओ तेई मर्द और जवाणस बणाई की बोलेया, 5 ‘इजी बजअ ते माणूँ आपणे माया-बावा ते लग ऊई की आपणिया लाडिया साथे रणा और सेयो दोनो एक तन ऊणे’ 6 तो एबे सेयो, दो नि पर एक तन ए। इजी री खातर, जो परमेशरे जोडी राखेया, तिना खे माणूँ लग नि करो।” 7 तिने यीशुए खे बोलेया, “तेबे मूसे कळूँ ठराई राखेया कि त्यागपत्र देई की तेसा खे छाडी देओ?” 8 तिने तिना खे बोलेया, “मूसे तुसा रे मनो रे जिदी स्वभाव री बजअ ते तुसा खे आपणी लाडी छाडणे री आज्ञा दित्ती; पर शुरूओ रे एडा नि था। 9 पर आऊँ तुसा खे सच बोलूँआ कि जो कोई व्याभिचार छाडी की ओर केसी बजअ ते आपणी लाडिया खे त्यागपत्र देई की, केसी दुजिया साथे ब्या करोआ, से व्याभिचार करोआ। जो कोई तेसा छाडी रिया जवाणसा साथे ब्या करोआ, से बी व्याभिचार करोआ।” 10 चलेया तिना खे बोलेया, “जे मर्दो रा जवाणसा साथे एडा सम्बन्ध ए, तो क्या ब्या करना खरा निए?” 11 तिने तिना खे बोलेया, “सारे ये वचन मानी नि सकद, बस सेयो ई जिना खे परमेशरे एतेरा दान देई राखेया। 12 कळूंकि कुछ नपुंसक एडे ए, जो माया रे पेटी देई एडे जम्मी रे; और कुछ नपुंसक एडे ए, जो माणूँए नपुंसक बणाए और कुछ नपुंसक एडे ए, जिने स्वर्गों रे राज्य खे आपू खेई नपुंसक बणाई राखेया। जो कोई इजी खे समजी सकोआ, ओ समजी लओ।” 13 तेबे लोक बच्चेया खे तिना गे ल्याए, ताकि सेयो तिना पाँदे आपणा आथ राखो और प्रार्थना करो; पर चले तिना खे बकणे लगे। 14 यीशुए तिना खे बोलेया, “बच्चेया खे मांगे आऊणे देयो और तिना खे ना नि करो, कळूंकि स्वर्गों रा राज्य एडेया रा ईए।” 15 तेबे सेयो तिना पाँदे आथ राखी की तेशा ते चली गे। 16 तेबे एक माणूँए तिना गे आयी की बोलेया, “ओ गुरु! आऊँ एडा कुण जा खरा काम करई कि अनन्त जीवन पाऊँ?” (aiōnios g166) 17 यीशुए तेसखे बोलेया, “तँ मांते पलाईया रे बारे रे कळूँ लगी रा पूछणे? खरा तो एक ईए, पर जे तँ जिन्दगिया रे जाणा चाओ तो, आज्ञा खे मानेया करा।” 18 तिने यीशुए ते पूछेया, “कुण जी आज्ञा ए?” तिने बोलेया, “अत्या, व्याभिचार, चोरी नि करना और ना चूटी गवाई देणा, 19 आपणे माया-बावा रा आदर करना और आपणे पडोसिये साथे आपू जेडा प्यार करना।” 20 तिने जवाने तिना खे बोलेया, “इना सबी गल्ला खे तो आऊँ मानूँआ, एबे मांदे किजी गल्ला री कमी ए?” 21 यीशुए तेसखे बोलेया, “जे तँ सिद्ध बणना चाया, तो जा, आपणा सारा माल बेची की कंगाला खे देई दे; तेबे ताखे स्वर्गों रे खजाना मिलणा और आयी की, मां पीछे आईजा।” 22 पर इना गल्ला सुणी की से उदास ऊईगा और तेशा ते चली गा, कळूंकि से बऊत साऊकार था। 23 तेबे यीशुए आपणे चलेया खे बोलेया, “आऊँ तुसा खे सच लगी रा बोलणे कि अमीरा रा स्वर्गों रे राज्य रे जाणा मुशिकल ए। 24 आऊँ तुसा खे फेर बोलूँआ कि परमेशरो रे राज्य रे अमीरा रा जाणा, ऊँतो रा सूईया रे नाके ते निकलना सान ए।” 25 ये सुणी की चलेया हैरान ऊई की बोलेया, “तेबे केसरा उद्धार ऊई सकोआ?” 26 यीशुए तिना री तरफा खे देखेया और बोलेया, “माणूँआ ते तो ये ऊई नि सकदा, पर परमेशरो ते सब कुछ ऊई सकोआ।” 27 तेबे पतरसे बोलेया, “देखो, आसे तो सब कुछ छाडी की तुसा पीछे आईगे रे, तो आसा खे क्या मिलणा?” 28 यीशुए तिना खे बोलेया, “आऊँ तुसा खे सच लगी रा बोलणे कि जेबे नई सृष्टि ऊणी और आऊँ माणूँ रा पुत्र महिमा रे सिंहासनो रे बैठणा, तो तुसे बी, जो मां पीछे आयी रे, बारा सिंहासनो पाँदे बैठणे और इझ्राएली रे बारा गोत्रा रा न्याय करणा 29 और जिने बी आपणे कअर, पाई, बईण, बाओ, माए, लाडी, बाल-बच्चे और डोरू मां पीछे छाडी राखे, तेसखे सौ गुणा मिलणा और से अनन्त जीवनो रा अक्कदार ऊणा। (aiōnios g166) 30 पर एबे बऊत सारे लोक जो आपणे आपू खे एते दुनिया रे बडे समजोए, सेयो परमेशरो री नजरा रे छोटै ऊई जाणे, और जिना खे संसार एबु छोटो समजोआ, सेयो परमेशरो री नजरा रे बडे समजे जाणे।”

20 यीशुए फेर बोलेया, “स्वर्गां रा राज्य केसी कअरो रे मालको जेड़ा ए, जो प्यागा निकलेया, ताकि आपणे अँगूरा रे बगीचे रे मजूरदार लगाओ। 2 तेबे तिने मजूरदारा री त्याड़ी एक चाँदिए रे सिक्के रे बराबर देणी किक्ती और सेयो आपणे अँगूरा रे बगीचे रे पेजे। 3 तेबे तिने पईले पईरे बजारो रे जाई की कुछ और मजूरदार बेकार खडे रे देखे। 4 तिने तिना खे बोलेया, ‘तुसे बी अँगूरा रे बगीचे रे जाओ और जो कुछ ठीक ऊणा, से तुसा खे देऊंगा।’ तेबे सेयो बी काम करने खे चली गे। 5 तेबे तिने दूजे और तीजे पईरो रे नेड़े निकली की एड़ा ई कितेया। 6 तेबे एक कंटा दिन रये और तिने फेर दूजे खडे देखे और तिना खे बोलेया, ‘तुसे पूरे दिन एती बेकार कऊँ खडे रे रये?’ तिने तेसखे बोलेया, ‘कऊँकि आसे किने त्याड़िया पंदि निए लगाए रे।’ 7 तिने तिना खे बी बोलेया, ‘तुसे बी अँगूरा रे बगीचे रे काम करने जाओ।’ 8 “साँजा अँगूरा रे बगीचे रे मालके आपणे पण्डारिये खे बोलेया, ‘मजूरदारा खे बुलाई की पिछलेया ते लई की आगलेया तक सबी खे मजदूरी देई दे।’ 9 जेबे सेयो आए तेबे जो एक कंटे री त्याड़िया पंदि थे आए रे, तिना खे एक दिनो री त्याड़ी एक चाँदिए रे सिक्के रे बराबर मिली। 10 जो पईले थे आए रे तिने सोचेया कि आसा खे तो जादा मिलणा, पर तिना खे बी एकी दिनो री त्याड़ी एक चाँदिए रे सिक्के रे बराबर मिली। 11 जेबे त्याड़ी मिलीगी, तेबे सेयो मनो रे मालको खे कुड़कुड़ाणे लगे और बोलणे लगे 12 ‘कि जो आसा ते बादो ते आए थे तिने तो एक ई कंटा काम कितेया था और तिना खे बी आसा बराबर ई दितेया और जिने पूरा दिन काम कितेया, पाअर चकेया और तूप सईन किक्ती?’ 13 तिने तिना बीचा ते एकी जणे खे जवाब दितेया, ‘ओ दोस्त! मैं तां साथे कोई अन्याय निए कितेया रा, क्या तैं ई माखे एक दिनो री त्याड़िया खे नि बोलेया था? 14 जो तेरी त्याड़ी बणो ई, तेस चक और चली जा; मेरी ये इच्छा ए कि जितणा ताखे देऊँ, तिथणा ई पिछले खे बी देऊँ। 15 क्या ये ठीक निए कि आऊँ आपणे मालो साथे जो चाऊँ से कऊँ। क्या तूँ मेरे खरे ऊँदे ऊए बी माखे बुरी नजरा ते देखेया?’ 16 पर एबे बऊत सारे लोक जो आपणे आपू खे एते दुनिया रे बड़े समजोए, सेयो परमेशरो री नजरा रे छोटे ऊई जाणे, और जिना खे संसार एबु छोटा समजोआ, सेयो परमेशरो री नजरा रे बड़े समजे जाणे।” 17 यीशु यरूशलेम नगरो खे जांदे ऊए आपणे बारा चेलेया खे लग जे लईगे और बाटा रे तिना खे बोलणे लगे, 18 “देखो, आसे यरूशलेम नगरो खे चली रे और आऊँ माणूँ रा पुत्र, बड़े पुरोईत और शास्त्रिया ते पकड़वाऊणा और तिना आऊँ काणे जोगा ठरणा। 19 तिना आऊँ दुजिया जातिया रे आथो रे देई देणा, ताकि सेयो मेरा मजाक ऊड़ाओ, कोड़े बाओ और क्रूसो पंदि चढ़ाओ। पर आऊँ तीजे दिने जिऊँदा ऊई जाणा।” 20 तेबे जबिए रे पाऊआ री आम्मा आपणे पाऊआ साथे आयी और यीशुए गे माथा टेकेया और तिना ते कुछ मांगणे लगी। 21 यीशुए तेसा खे बोलेया, “तूँ क्या चाए ई?” तेसे बोलेया, “आऊँ चाऊँई कि तूँ वादा कर कि मेरे ये दोनो पाऊ, तेरे राज्य रे, एक दाँणे और एक खूँजे कनारे बैठो।” 22 यीशुए जवाब दितेया, “तुसे नि जाणदे कि क्या लगी रे मांगणे? जो दुःख आऊँ सईन करने वाला ए, क्या से दुःख तुसे सईन करी सकोए?” तिने बोलेया, “आसे सईन करी सकूँए।” 23 यीशुए तिना खे बोलेया, “तुसे मेरा दुःख तो सईन करी सकोए, पर आपणे दाँणे और खूँजे बठयालना मेरा काम निए, पर जो मेरे पिंते री तरफा ते त्यार ए किक्ते रे, तिना राए।” 24 ये सुणी की बाकि दस चेलेया खे तिना दूई पाईया पंदि रोष आया। 25 यीशुए सेयो आपू गे बुलाए और बोलेया, “तुसे जाणोए कि दूजी जातिया रे हाकिम तिना पंदि राज करोए और जो बड़े ए, सेयो तिना पंदि अक्क जमाओए। 26 पर तुसा बीचे एदा नि ऊणा; पर जो कोई तुसा बीचा ते बड़ा ऊणा चाओआ, से तुसा रा दास बणो 27 और जो तुसा बीचा ते प्रदान ऊणा चाओआ, से तुसा रा दास बणो। 28 जेड़ा की माणूँ रा पुत्र, से इजी खे नि आयी रा कि तेसरी देख-बाल करो, पर इजी खे आयी रा कि से देख-बाल करो और बऊत जणेया खे छुड़ाणे री खातर आपणे प्राण देई देओ।” 29 जेबे सेयो यरीहो नगरो ते निकलने लगी रे थे, तेबे एक बड़ी पीड़ तिना पीछे आईगी। 30 तेबे दो अन्दे, जो सड़का रे कनारे बैठे रे थे, तिने जेबे ये सुणेया

कि यीशु जाणे लगी रे, तो सेयो आक्का पायी की बोलणे लगे, “ओ प्रभु! दाऊदो री ल्वाद, आसा पंदि दया कर।” 31 लोक तिना खे बकणे लगे कि चुप रओ, पर सेयो ओर बी चींगी की बोलणे लगे, “ओ प्रभु! दाऊदो री ल्वाद, आसा पंदि दया कर।” 32 तेबे यीशुए खडे ऊई की सेयो बुलाए और बोलेया, “तुसे क्या चाओए कि आऊँ तुसा खे कऊँ?” 33 तिने बोलेया, “ओ प्रभु! ये कि म्हारिया आखी खुली जाओ” 34 यीशुए खे तिना पंदि तरस आया और तिने तिना रिया आखिया हूँईया और सेयो तेबुई देखणे लगे और सेयो तिना पीछे चलणे लगे।

21 जेबे सेयो यरूशलेम नगरो रे नेड़े पऊँछी की जैतून पाहड़ो पंदि बैतफगे गांव रे नेड़े आए, तेबे यीशुए आपणे दो चले ये बोली की पेजे 2 “आपणे सामणे रे गांव रे जाओ, तेती पऊँछदे ई तुसा खे एक गहदी बानी री मिलणी और तेसा साथे एक बच्चा तुसा खे मिलणा, तिना खे खोली की मांगे ली आओ। 3 जे तुसा खे कोई कुछ बोलोगा, तेबे तिना खे बोलणा कि प्रभुए खे इना ते कुछ मतलब ए, तेबे तिना तेबुई से पेजी देणे।” 4 ये तेबे ऊआ ताकि जो वचन भविष्यबक्ते बोलेया था, से पूरा ओ; 5 “सिय्योनो री बेटिया खे बोली, ‘देख, तेरा राजा तांगे आओआ, से नम्र ए और गहदे पंदि बैठे रा, बल्कि लादूओ रे बच्चे पंदि।” 6 चेलेया जाई की जिंयाँ यीशुए बोलेया था तियाँ ई कितेया। 7 गह्दिद्या और बच्चे खे ल्याई की तिना पंदि आपणे टाले पाए और यीशु तिना पंदि बैठेगी। 8 तेबे बऊत जणेया आपणी-आपणी चादरी बाटा रे बछाइतिया और कईए खजूरो रिया डालिया बाडी-बाडी की तिना रे स्वागतो खे की बछाइतिया। 9 जो पीड़ आगे-आगे और पीछे-पीछे चली री थी, से आक्का पाई-पाई की बोलणे लगी री थी, “दाऊदो री ल्वाद खे होशान्ना; धन्य ए से, जो प्रभुए रे नाओँ ते आओआ, स्वर्गां रे होशान्ना।” 10 जेबे सेयो यरूशलेमो नगरो रे पऊँछे, तो सारे नगरो रे अलचल ऊईगी और लोक बोलणे लगे, “ये कुण ए?” 11 लोके बोलेया, “ये गलीलो रे नासरतो रा भविष्यबक्ता यीशु ए।” 12 यीशुए परमेशरो रे मन्दरो रे जाई की सेयो सब जणे निकयाली ते, जो लेण-देण लगी रे थे करने और सर्राफो रे पीढ़े और कबूतरा खे बेचणे वालिया चौकिया मूँदिया करी तिया। 13 और तिना खे बोलेया, “लिखी राखेया, ‘मेरे कअरो खे प्रार्थना रा मन्दर बोलोए,’ पर तुसे से डाकूआ रा डवार बणाई ता रा।” 14 तेबे अन्दे और लंगड़े, मन्दरो रे तिना गे आए और तिने सेयो ठीक करी ते। 15 पर जेबे, बड़े पुरोईत और शास्त्रिए, ये अचम्बे वाले काम, जो तिने किक्ते थे और लोका खे मन्दरो रे “दाऊदो री ल्वाद खे होशान्ना,” बोलदे उप देखेया, तो सेयो बऊत रोषे ऊईगे 16 और बोलणे लगे, “क्या तूँ सुणने लगी रा कि लोक क्या लगी रे बोलणे?” यीशुए तिना खे बोलेया, “आ; क्या तैं ये कदी नि पढ़ेया कि, ‘बालक और दूद पीणे वाले बच्चेया रे मुँओ ते तैं अपार स्तुति कराई?” 17 तेबे सेयो तिना खे छाडी की नगरो ते बारे बैतनिय्याहो खे गए, और राथियो खे तेथी रए। 18 प्यागा जेबे सेयो नगरो खे आऊणे लगी रे थे, तो तिना खे पूख लगी। 19 तेबे तिने सड़का रे कनारे दाऊगले रा एक डाल देखी की तेसगे चली गे, पर तिदे पंथेया खे छाडी की ओर कुछ नि था, तेबे तिने बोलेया, “आजो ते तांदे कोई फल नि लगणा!” और दाऊगले रा डाल तेबुई सूकी गा। (aiōn g165) 20 ये देखी की चले हैरान ऊईगे और पूछणे लगे, “ये दाऊगले रा डाल एबु ई किंयाँ सूकी गा?” 21 यीशुए तिना खे जवाब दितेया, “आऊँ तुसा खे सच लगी रा बोलणे कि जे तुसे विश्वास राखो और शक नि करो तो, तुसा इतणा ई नि करना, जो एस दाऊगले रे डालो साथे ऊआ; पर जे एस पाहड़ो खे बी बोलोगे, कि ‘पट्टी जा, और समद्रो रे पट्टी जा,’ तो ऊई जाणा। 22 और जो कुछ तुसे प्रार्थना रे विश्वासो साथे मांगोगे, तो से सब तुसा खे मिली जाणा।” 23 जेबे सेयो मन्दरो रे उपदेश लगी रे थे करने, तेबे बड़े पुरोईत और लोका रे बुजुर्ग तिना गे आए और पूछणे लगे, “तूँ इना कामा केसरे अक्को ते करेया? और ताखे ये अक्क किने देई राखेया?” 24 यीशुए तिना खे जवाब दितेया, “आऊँ बी तुसा ते एक गल्ल पुछूँआ, जे तुसे बताओगे, तो मां बी बताई देणा कि आऊँ इना कामा केस अक्को ते

कहँआ। 25 यूहन्ने रा बपतिस्मा केथा ते था? स्वर्गो रिया तरफा ते या माणूए रिया तरफा ते?" सेयो आपू बीचे बिचार करने लगे, "जे आसे बोलीं कि 'स्वर्गो री तरफा ते', तो एस पूछणा, 'तेबे तुसे तेसरा विश्वास कऊँ नि कित्तेया?' 26 और जे बोलीं, 'माणूए री तरफा ते', तो आसा खे लोका रा डर ए, कऊँकि ये सब तेसखे भविष्यबक्ता जाणो थे।" 27 तो, तेबे तिने यीशुए खे जवाब दित्तेया, "आसे नि जाणदे।" तेबे तिने बी तिना खे बोलेया, "तेबे आऊँ बी तुसा खे कुछ नि बतादा कि इना कामा केसरे अक्को ते कहँआ। 28 "एस उदारणो रे बारे रे तुसे क्या समजोए? केसी माणूए रे दो पाऊ थे; तिने पईले पाऊए गे जाई की बोलेया, 'ओ पाऊ, आज अँगूरा रे बगीचे रे जा और काम कर।' 29 तिने बोलेया, 'मां नि जाणा,' पर से बादो ते मनो रे पछताई की चली गा। 30 तेबे पिते दूजे गे जाई की बी एड़ा ई बोलेया, तिने जवाब दित्तेया, 'अच्छा जी जाऊँआ,' पर गया नि। 31 इना दूई बीचा ते किने पिते री इच्छा पूरी कित्ती?" तिने बोलेया "पईले।" यीशुए तिना खे बोलेया, "आऊँ तुसा खे सच लगी रा बोलणे कि कर लणे वाले और वेश्या, तुसा ते पइले परमेशरो रे राज्य रे जाओए। 32 कऊँकि बपतिस्मा देणे वाला यूहन्ना तर्मा री बात बतादे ऊए तुसा गे आया और तुसे तेसरा विश्वास नि कित्तेया, पर कर लणे वाले और वेश्या तेसरा विश्वास कित्तेया और तुसे ये देखी की बादो ते पने पछताए कि तेसरा विश्वास करी लंदे। 33 "एक ओर उदारण सुणो कि एक करेल मालक था। जिने अँगूरा रा बगीचा लगाया और तिजी रे चऊँ कनारे बाड लगाया और अँगूरा रे रसो खे पात्थरो दे एक गड्डा खणेया, जुगाली बणाई और ठेकेदारा खे तिजी रा ठेका देई की परदेशो खे चली गा। 34 जेबे फलो रा बखत नेडे आया तेबे तिने आपणे दास तिजी रा फल लणे तिना ठेकेदारा गे पेजे। 35 पर ठेकेदार तेसरे दास पकड़ी की कोई कूटे, कोई काई ते और केसी खे पात्थर बाए। 36 तेबे तिने पईले ते जादा दास पेजे, पर तिने तिना साथे बी तेड़ा ई कित्तेया। 37 आखरी रे तिने आपणे पाऊए तिना गे ये सोची की पेजेया कि तिना मेरे पाऊए रा आदर करना। 38 पर ठेकेदार पाऊए खे देखी की आपू बीचे ये बोलेया, 'ये तो बारस ए, आओ एसखे काई देऊँए और एसरी जायदात लयी लऊँए।' 39 तेबे तिने से पकड़ेया और अँगूरा रे बगीचे ते बारे निकयाली की काई ता। 40 बादो ते जेबे अँगूरा रे बगीचे रा मालक आऊणा, तो तेस तिना ठेकेदारा साथे क्या करना?" 41 तिने यीशुए खे जवाब दित्तेया, "तेस बुरे लोक बुरी तरअ ते नाश करने और अँगूरा रे बगीचे रा ठेका केसी ओरी ठेकेदारा गे देई देणा। जिना बखतो पँदे तेसखे फल देई देया करना।" 42 यीशुए तिना खे बोलेया, "क्या तुसे पवित्र शास्त्रो रे ये कदी नि पढ़ेया, "जो पात्थर राजमिस्त्रए नकम्मा ठराया, सेई कूणे रे सिरे रा पात्थर ऊईगा। ये प्रभुए रिया तरफा ते ऊआ, पर आसा री नजरा रे नऊखा ईए?" 43 "तेबेई तो आऊँ तुसा खे बोलींआ कि परमेशरो रा राज्य तुसा ते लई लणा और एडिया जातिया गे देई देणा, जो फल ल्याओ। 44 जो एस पात्थरो पँदे पड़ना, से चूर-चूर ऊई जाणा और जेस पँदे ये पड़ना, तेस से पीसी देणा।" 45 बडे पुरोईत और फरीसी तिना रे उदारण सुणी की समजी गे कि सेयो आसा रे बारे रे लगी रे बोलणे। 46 तेबे तिने सेयो पकड़ने चाए, पर लोका ते डरी गे, कऊँकि सेयो तिना खे भविष्यबक्ता मानो थे।

22 तेबे फेर यीशु तिना साथे उदारणा रे बोलणे लगे, 2 "स्वर्गो रा राज्य तेस राजे जेड़ा ए, जिने आपणे पाऊए रा ब्या कित्तेया। 3 तेबे तिने आपणे दास पेजे कि जाओ, निऊँदा दित्ते रे लोका खे ब्याओ री पाटिया रे बुलाओ, पर तिने आऊणा नि चाया। 4 तेबे तिने आपणे दास ये बोली की पेजे, निऊँदा दित्ते रे लोका खे बोलो, देखो, आऊँ पाट्री त्यार करी चुकेया रा। मेरे बलद और पाले रे डागर सब बाडी ते रे; और सब कुछ त्यार ए, ब्याओ री पाटिया रे आओ। 5 पर तिने कोई परवा नि कित्ती और कोई आपणे डोरूआ खे और कोई आपणे कामो खे चली गा। 6 और जो बचे, तिने सेयो दास पकड़े और तिना रा मजाक ऊड़ाया और काई ते। 7 जेबे राजे ये सुणेया तेबे तिना खे रोष आईगा और तिने आपणी सेना पेजी और जो अत्यारे थे, तिना

रा सत्यानाश करी ता और तिना रे नगर फूकी ते। 8 तेबे तिने आपणे दासा खे बोलेया, ब्याओ री रोटी तो प्यार ए, पर खाणे वाले नि आए। 9 एबे एड़ा करो कि चौको रे जाओ और जितणे लोक तुसा खे मिलोगे, तिना खे रोटी खाणे ली आओ। 10 तेबे तिने दासे सड़का दे जाई की क्या खरे बुरे जो बी मिले सबी खे कट्टे करी की ली आया और ब्याओ रा कअर माणूआ साथे फरी गा। 11 "जेबे राजा मईमाना खे देखणे पीतरे गया, तेबे तिने देखेया कि एक माणूए ब्याओ रे टाले नि थे पड़ने रे जो राजे ब्याओ खे तेसखे पईणणे खे दित्ते थे। 12 तिने तेसते पूछेया, ओ दोस्त, तूँ एती ब्याओ रे टाले पड़नी की कऊँ नि आयी रा, जो ताखे मैं पईणणे खे दित्ते थे? और से माणू चुप ऊईगा। 13 तेबे राजे, दासा खे बोलेया कि एसर आथ-पैर बानो और एसखे बारे न्हरे रे राखी देओ, तेती रोणा और दौद किरड़ना ई ऊणा। 14 कऊँकि बुलाए रे तो बऊत ए, पर चुणे रे थोड़े ईए।" 15 तेबे फरीसी गए और आपू बीचे सोच-बिचार लगे करने कि एसखे किंयॉ फसाइए? 16 तेबे यहूदी अगुवे यीशु गल्ला रे फसाणे री तँई कई फरीसी चले और हेरोदेस राजे रा समर्थन करने वाले यहूदी तिना गे पेजे। और तिने आयी की तिना खे बोलेया, "ओ गुरु! आसे जाणूए कि तुसे सचचे और परमेशरो री बात सच्चाईया साथे सिखाओए, और केसी री परवा नि करदे, कऊँकि तुसे माणूए रा मैं देखी की गल्ल नि करदे। 17 तो तुसे आसा खे बताओ कि तुसे क्या समजोए? केसरो खे कर देणा खरा ए, या नई।" 18 यीशुए खे तिना री दुष्टता पता थी और तिने बोलेया, "ओ कपटियो; माखे कऊँ परखोए? 19 करो रा सिक्का मांगे दखाओ।" तेबे सेयो तिना गे एक चाँदिए रा सिक्का ली आए। 20 तिने तिना ते पूछेया, "ये मूर्ति और ये नाओ केसरा ए?" 21 तिने बोलेया, "कैसरो रा।" तेबे तिने बोलेया, "जो कैसरो राए से कैसरो खे और जो परमेशरो राए से परमेशरो खे देओ।" 22 ये सुणी की सेयो हैरान ऊईगे और तिना खे छाडी की चली गे। 23 तेसी दिने सदूकी, जो बोली थे कि जो मरी जाओए तिना रा दुबारा जन्म नि ऊँदा, यीशुए गे आए और पूछणे लगे, 24 "ओ गुरु, मूसे बोलेया था कि जे कोई बिना ल्वादा ते मरी जाओ, तो तेसरा पाई तेसरी लाडिया साथे ब्या करी लओ और आपणे पाईए खे वंश पैदा करो। 25 एबे आसा रे सात पाई थे, पईला पाई ब्या करी की बिना ल्वादा तेई मरी गा और ल्वादा ना ऊणे री बजअ ते आपणी लाडिया खे आपणे पाईए खे छाडी गा। 26 तियाँ ई दूजे और तीजे बी एड़ा ई कित्तेया और साता साथे एड़ा ई ऊआ। 27 सबी ते बादो ते, से जवाणस बी मरी गी। 28 जेबे से जिऊँदी ऊणी तो केसरी लाडी ऊणी? कऊँकि से तो सबी री लाडी रई चुकी थी।" 29 यीशुए तिना खे जवाब दित्तेया, "तुसे पवित्र शास्त्र और परमेशरो री सामर्थ नि जाणदे, तेबेई तो तुसा ते पूल ऊई री। 30 कऊँकि जेबे जिऊँदे ऊणे, तेबे ब्या-शादिया नि ऊणिया, पर सेयो स्वर्गो रे परमेशरो रे स्वर्गदूतो जेडे ऊणे। 31 पर क्या तुसे, मेरे रे जिऊँदे ऊणे रे बारे रे ये वचन नि पढ़ेया, जो परमेशरे तुसा खे बोलेया, 32 आऊँ अब्राहमो रा परमेशर, इसहाको रा परमेशर और याकूबो रा परमेशर आ? सेयो मेरे रेया रे नि, पर जिऊँदेया रे परमेशर ए।" 33 ये सुणी की लोक तिना रे उपदेशो ते हैरान ऊईगे। 34 जेबे फरीसिये सुणेया कि तिने सदूकिये रे मूँ बन्द करी ते, तो सेयो कट्टे ऊईगे। 35 तेबे तिना बीचा ते एक धर्मशास्त्रीए परखणे खे तिना ते पूछेया, 36 "ओ गुरु! बिधानो रे कुण जी गल्ल बडी ए?" 37 यीशुए तेसखे बोलेया, "तूँ परमेशर आपणे प्रभुए साथे, आपणे पुरे मन, आपणे पुरे प्राण और आपणी पूरी अक्ला साथे प्यार राख। 38 बडी और मुख्य आज्ञा तो येईए। 39 और एसा ई जेडी ये दूजी बी ए, 'तूँ आपणे पड़ोसिये साथे आपू जेड़ा प्यार राख।' 40 येई दो आज्ञा सारा बिधान और भविष्यबक्तेया रा आधार ए।" 41 जेबे फरीसी कट्टे थे, तेबे यीशुए तिना ते पूछेया, 42 "मसीह रे बारे रे तुसे क्या समजोए? से केसरी ल्वादा ए?" फरीसिये बोलेया, "दाऊदो री।" 43 तेबे तिने फेर पूछेया, "तेबे दाऊद आत्मा रे परी की तेसखे प्रभु कऊँ बोलोआ? 44 प्रभुए, मेरे प्रभुए खे बोलेया, 'मेरे दाँणे बैठ, जदुओ तक आऊँ तेरे बैरिया खे तेरे पैरा निठे नि ल्याई देऊँ।' 45 तो, जेबे दाऊद तेसखे प्रभु बोलोआ, तो

से तेसरा पुत्र कियॉ ऊआ?" 46 इजी रा जवाब कोई नि देई सकेया। पर तिजी ते बादो ते केसी खे बी तिना ते कुछ पूछणे री इम्मत नि ऊई।

23 तेबे यीशुए पीड़ा खे और आपणे चेलैया खे बोलेया, 2 "शास्त्री और फरीसी, मुसे रे बिधानो खे अक्को साथे बताओ थे। 3 तो, सेयो तुसा खे जो कुछ बोली, से करना और मानणा, पर तिना जेडे काम नि करना, कऊँकि सेयो ओरी खे सिखाओ तो आए, पर आपू तिना कामा खे करदे नि। 4 सेयो लोका खे एड़े-एड़े कड़े नियम मानणे खे मजबूर करो थे जिना खे मानणा तिना खे बऊत कठण ए। पर आपू तिना नियमा खे मानणे री बी कोशिश तक नि करदे। 5 सेयो आपणे सारे काम लोका खे दखाणे री तँई करोए, सेयो आपणे जन्त्र चौड़े करोए और आपणे टालेया रे पल्ले बड़ाओ ए। 6 पाट्रिया रे खास-खास जगा और प्रार्थना रे कअरो रे खास-खास जगा 7 और बजारो रे नमस्ते और माणूआ ते गुरू बुलाणा तिना खे अच्छा लंगोआ। 8 पर तुसे आपणे आपू खे गुरू नि बुलवाणा; कऊँकि तुसा रा एक ई गुरूए और तुसे सब आपू बीचे पाई ए। 9 तरतिया रे केसी खे आपणा पिता नि बोलणा, कऊँकि तुसा रा एक ई पिता ए, परमेशर जो स्वर्गो रे ए। 10 और मालक पनि बुलाणा, कऊँकि तुसा रा एक ई मालक ए, मतलब-मसीह। 11 जो तुसा बीचा ते बड़ा ओ, से तुसा रा दास बणो। 12 जो कोई आपू खे बड़ा बणाओगा, से छोटा ऊणा; और जो कोई आपू खे छोटा बणाओगा से बड़ा ऊणा। 13 "ओ कपटी शास्त्री और फरीसियो तुसा पाँदे हाय! तुसे माणूआ खे स्वर्गो रे राज्य रा द्वार बंद करोए। तुसे ना तो आपू ई तेती जाँदे और ना ई तिदे जाणे वालेया खे जाणे देंदे। 14 ओ कपटी शास्त्री और फरीसियो तुसा खे हाय! तुसे बिदुआ रे कअर खाई जाओए और दखाणे री तँई बऊत देर तक प्रार्थना करदे रओए, तेबेई तो तुसा खे जादा सजा मिलणी। 15 "ओ कपटी शास्त्री और फरीसियो तुसा खे हाय! तुसे एकी जणे खे आपणे मतो रे ल्याऊणे री तँई सारे जल और थलो रे फिरोए और जेबे से तुसा रे मतो रे आयी जाओआ, तो तेसखे आपू ते दुगणा नरको री सजा जोगा बणाई देओए। (Geenna g1067) 16 "ओ अन्दे अगुओ तुसा खे हाय! जो बोलोए कि जे कोई मन्दरो री कसम खाओ तो कुछ नि, पर जो मन्दरो रे सूईने री कसम खाओगा तो तिना खे तेसा कसमा खे पूरा करना जरूरी ए। 17 ओ मूर्खो और अन्दो कुण बड़ा ए, सूईना या से मन्दर, जेते साथे सूईना पवित्र ओआ? 18 फेर बोलोए कि जे कोई बेदिया री कसम खाओ तो कुछ निए, पर से पेंट जो तिजी पाँदे ए, तेतेरी कसम खाओगा, तो तिना खे तेसा कसमा खे पूरा करना जरूरी ए। 19 ओ अन्दो! कुण बड़ा ए, पेंट या बेदी; जेते साथे पेंट पवित्र ओई? 20 तेबेई तो, जो बेदिया री कसम खाओआ, से तेतेरी और जो बी तेते पाँदे ए, तेतेरी बी कसम खाओआ। 21 जो मन्दरो री कसम खाओआ, से तेतेरी और तिदे रणे वालेया री बी कसम खाओआ। 22 जो स्वर्गो री कसम खाओआ, से परमेशरो रे सिंहासनेो री और तिदे बैठणे वालेया री बी कसम खाओआ। 23 "ओ कपटी शास्त्री और फरीसियो तुसा खे हाय! तुसे पदीने, सफ और जीरे रा दसुआ पाअग देओए, पर तुसे बिधानो रिया गूढ़ गल्ला मतलब न्याय, कृपा और विश्वास छाडी ते रे, तुसा खे चाईयो था कि इना खे बी करदे रंदे और तिना खे पनि छाडदे। 24 ओ अन्दे अगुओ! तुसे छोटिया-छोटिया गल्ला रे नियम तो ईयां मानी लओए जियाँ माच्छरो खे पाणिए ते कनारे ताली देओए! पर परमेशरो री खास आज्ञा खे टालना, तुसा खे ऊँटो खे निगली जाणे रे बराबर ए। 25 "ओ कपटी शास्त्रियो और फरीसियो तुसा खे हाय! तुसे तिना कटोरे और थालिया जेडे ए, जिना खे पाँदा-पाँदा ते तो मांजी लओए, पर पितरे तिना रे गन्दगी परी री रओई। 26 हे अन्दे फरीसी, पईले कटोरे और थालिया खे पीतरा ते मांजी लओ ताकि से बारा ते बी साफ ओ। 27 "ओ कपटी शास्त्रियो और फरीसियो तुसा खे हाय! तुसे चूना फिरी री कन्ना जेडे ए, जो पाँदा ते तो सुन्दर दिशोई पर, पर पीतरा ते मरेया रिया आड्डिया और सारिया गन्दे कामो साथे फरी रिये। 28 तियाँ ई तुसे बी, सामणे तो आपणे-आपू खे लोका खे तर्मी दखाओ ए, पर पीतरा ते कपट और पापो साथे फरे रे ए। 29 "ओ

कपटी शास्त्रियो और फरीसियो तुसा खे हाय! तुसे भविष्यबक्तेया रिया कन्ना सजाओए और तर्मिया रे समारक बणाओए। 30 और बोलोए, "जे आसे आपणे बाप-दादिया रे बखतो रे ऊँदे, तो भविष्यबक्तेया रिया अत्या रे तिना रा साथ नि देंदे।" 31 इजी ते तो तुसे आपू ई आपणे खलाफ गवाई देओए कि तुसे भविष्यबक्तेया खे काणे वालेया रे ल्वाद ए। 32 तो तुसे आपणे बाप-दादिया रे जो बुरे काम तिने करी राखे तिजी खे पूरा करने वाले ओ। 33 ओ जईरीले सापो जेडे लोको, और जईरीले सापो री ल्वाद! तुसे ये कियॉ सोचा ला तुसे नरको रे दण्डो ते बची जाणे? (Geenna g1067) 34 तेबेई तो देखो, आऊँ तुसा गे भविष्यबक्ता खे, अक्लमंदा खे और शास्त्रिया खे पेजुँआ और तुसा तिना बीचा ते कुछ लोक काणे और कुछ लोक कूसो पाँदे चढ़ाई देणे और कईया खे आपणे प्रार्थना रे कअरो रे कोडे बाणे और सेयो एकी नगरो ते दूजे नगरो खे नठाणे। 35 जिदे तर्मी हाबिलो ते लई की बिरिक्याहो रा पाऊ जकरयाहो तक, जो तुसे मन्दरो रे और बेदिया बीचे काए थे, जितणे तर्मिया रा खून तरतिया रे बयी रा, तेतेरी सजा तुसा सबी खे मिलणी। 36 आऊँ तुसा खे सच बोळूँआ कि इना सबी अत्या री सजा एस बखतो रे सबी लोका खे मिलणी। 37 "ओ यरूशलेमो रे लोको, ओ यरूशलेमो रे लोको! तूँ जो भविष्यबक्तेया खे काओआ और जो तांगे पेजी राखे, तिना खे पात्थर बाएआ, किणगी बार मैं चाया कि जियाँ मुर्गो आपणे बच्चेया खे आपणे पंखो निठे कट्टा करी की समालोई, तियाँ ई आऊँ बी चाऊँआ कि तेरे बालका खे कट्टा करी की समालूँ। पर तुसे नि चाया। 38 देखो, तुसा रा कअर तुसा खे उजाड़ी की छाडीता। 39 कऊँकि आऊँ तुसा खे बोळूँआ कि एबुए ते जदुओ तक तुसे नि बोलोगे, "धन्य ए सेयो, जो प्रभुए रे नाओं ते आओए" तदुओ तक तुसा आऊँ फेर कदी नि देखणा।"

24 जेबे यीशु मन्दरो ते निकली की जाणे लगी रे थे, तेबे तिना रे चले मन्दरो री रचना दखाणे खे तिना गे आए। 2 यीशुए तिना खे बोलेया, "तुसे जो ये सब कुछ लगी रे ना देखणे, आऊँ तुसा खे सच लगी रा बोलणे कि एती जो पात्थरो पाँदे पात्थर लगी रे, सब टाले जाणे।" 3 जेबे यीशु जैतूनी पाहडो पाँदे बैठे रे थे, तेबे चेलैया लग जे आयी की तिना खे बोलेया, "आसा गे बताओ कि यो गल्ला कदी ऊणिया? तुसा रे आऊणे रा और दुनिया रे आखरी रा क्या चिह्न ऊणा?" (aiōn g165) 4 यीशुए तिना खे जवाब दितेया, "चौकस रओ कि कोई तुसा खे बईकाओ नि। 5 कऊँकि बऊत जणे एड़े ऊणे जो, मेरे नाओं ते आऊणे और बोलणा, 'आऊँ मसीह ए', और तिना बऊत जणे भरमाणे। 6 तुसा लड़ाई और लड़ाईया रे बारे रे सुणो, पर कबराणा नि कऊँकि इना रा ऊणा जरूरी ए, पर तेस बखते अंत नि ऊणा। 7 कऊँकि जातिया पाँदे जातिया और राज्य पाँदे राज्य अमला करना और जगा-जगा अकाल पड़ना और ईल्लण ऊणे। 8 इना सबी गल्ला ते, पीड़ा री शुरूआत ऊणी। 9 तेबे सेयो लोक जो तुसा रे खलाफ ए क्लेश देणे खे तुसे पकड़वाणे और तुसे काणे और मां पाँदे विश्वास करने री बजअ ते सबी जातिया रे लोका तुसा ते बैर राखणा। 10 तेबे बऊत जणेया विश्वास करना छाडी देणा और एकी-दूजे पकड़वाणे और एकी-दूजे ते बैर राखणा। 11 बऊत सारे चूटे भविष्यबक्ता जाणणे और तिना बऊत लोक भरमाणे। 12 पापो रे बड़ने ते बऊत जणेया एकी दूजे सधरे प्यार नि राखणा। 13 पर जो आखरी तक सब राखोगा, तेसरा ई उद्धार ऊणा। 14 और राज्य रा ये सुसमाचार सारी दुनिया रे प्रचार ऊणा, ताकि सब देशो रे लोका खे सुसमाचारो खे मानणे रा मौका मिलो, तेबे दुनिया रा अन्त आयी जाणा। 15 "पढ़ने वाला समजी लओ, जेबे तुसे, तेसा उजाड़ने वाली घृणित चीज जेतेरे बारे रे दानिय्यल भविष्यबक्ते बोलेया था, जेती ठीक निए तेती मतलब मन्दरो रे खडी री देखो। 16 तेबे जो यहूदिया रे ओ, सेयो पाहडो खे नठी जाओ। 17 जो कोई छतो पाँदे ओ, सेयो आपणे कअरे कुछ बी लणे खे थाले नि आओ और ना ई पीतरे जाओ 18 "और जो कोई डीरूआ रे ओ, सेयो आपणे टाले लणे पीछे नि आटो। 19 तिना दिना रे जो गर्भवती ऊणी और जो दूद प्लयाणे वाली ऊणी तिना खे हाय! हाय! 20 प्रार्थना करेया करो कि तुसा

खे ठण्डी रे और आरामो रे दिने नठणा नि पड़ो। 21 कऊँकि तेस बखते एड़ा पारी क्लेश ऊणा, जेड़ा दुनिया री शुरूओ ते लई की एणुए तक कदी नि ऊआ और ना ऊणा। 22 जे सेयो दिन कटाए रे नि ऊँदे, तो कोई प्राणी नि बचना था; पर चुणे ऊए री बजअ ते सेयो दिन कटाए जाणे। 23 तेस बखते जे कोई तुसा खे बोलो कि देखो, मसीह एती ए, या तेती ए, तो विश्वास नि करना। 24 “कऊँकि चूठे मसीह और चूठे भविष्यबक्ता खडे ऊणे और तिना बडे-बडे चिह्न और अचम्बे रे काम दखाणे, जे ऊई सको तो जो परमेशरो रे चूणे रे ए, तिना खे बी भरमाई देओ। 25 देखो, मैं पड़ले तेई तुसा खे ये सब कुछ बोली ता रा। 26 तेबे जे सेयो तुसा खे बोलो, देखो, से जंगलो रे ए, तो चली नि जाणा, या देखो, से छतो पॉदे ए, तो विश्वास नि करना। 27 “कऊँकि जियॉ बिजली पूर्वा ते निकली की पछमो तक चमकोई, तियॉ ई मां माणू रे पुत्रो रा आऊणा बी ऊणा। 28 जेती लोथ ऊणी, तेथी इल्ला कट्टिया ऊणिया। 29 “तिना दिना रे, तेस क्लेशो ते बाद सूरजो रा चमकदा प्रयासा न्हैरा पड़ी जाणा और चांदे प्रयासा नि देणा। और सर्गो ते तारे छुटणे शुरू ऊणे और सर्गो रिया शक्तिया इलाईया जाणिया। 30 तेबे माणू रे पुत्रो रा चिह्न सर्गो रे दिशणा। तेबे तरतिया रे सबी कुला रे लोका छातिया पीटणियां और माणू रा पुत्र बडी सामर्थ और महिमा साथे सर्गो रे बादला पॉदे आऊँदे ऊए देखणा। 31 तेस तुरहिया रे बडी आवाजा साथे, आचरो स्वर्गदूत पेशणे और तिना सर्गो रे एकी कनारे ते लई की दूजे कनारे तक, चारो दिशा रे तेसरे चूणे रे कट्टे करने। 32 “दाऊगले रे डालो ते ये उदारण सीखो, जेबे तेतेरी डाली नरम ऊई जाओई और पत्ते निकलने लगेए, तो तुसे जाणी लओए कि तऊँदी नेडे ए। 33 ईयां ई जेबे तुसे इना गल्ला खे ऊँदे ऊए देखो, तो समजी जाणा कि एबे आँऊ नेडे ईए, बल्कि द्वारो पॉदे ईए खडेया रा। 34 आऊँ तुसा खे सच लगी रा बोलणे कि जदुओ तक यो सब गल्ला पूरिया नि ऊई जाओगिया, तदुओ तक एसा पीडिया रे लोका री मौत नि ऊणी। 35 सर्मां और तरती टलीं जाओगी, पर मेरा वचन कदी नि टलना।” 36 “तेस दिनो रे बारे रे और तेसा कअडिया रे बारे रे कोई नि जाणदा, न स्वर्गदूत, ना पुत्र, पर बस पिता। 37 जेडे नूहो रे दिन थे, तियॉ ई मां माणू रे पुत्रो रा आऊणा बी ऊणा। 38 कऊँकि जियॉ जल-प्रलय ते पड़ले, जदुओ तक नूह जाहजो रे नि चढेया, तदुओ तक लोक खाओ-पीओ थे और तिना रे ब्या-शादिया ओ थे 39 और जदुओ तक जल-प्रलय तिना सबी खे हडाई की नि लईगा, तदुओ तक तिना खे कुछ बी पता नि चलेया; तियॉ ई मां माणू रे पुत्रो रा बी आऊणा ऊणा। 40 तेस बखते दो जणे डोरूआ रे ऊणे, एक लयी लण और दूजा छाडी देणा। 41 दो जवाणसा चाक्की पीशणे लगी री ऊणिया, एक लयी लण और दूजी छाडी देणी। 42 तेबेई तो, जागदे रओ, कऊँकि तुसे नि जाणदे कि तुसा रा प्रभु केस दिने आयी जाणा। 43 पर ये जाणी लओ कि जे कअरो रा मालक जाणदा कि चोर कदी जे आऊणा तो, से जागदा रंदा और आपणे कअरे चोरी नि ऊणे देंदा। 44 इजी री खातर तुसे बी त्यार रओ, कऊँकि जेसा कअडिया रे बारे रे तुसे सोचदे पनि, तेसी कअडिया रे आँऊ माणू रा पुत्र आयी जाणा। 45 “एक विश्वासो जोगा और अक्लमंद दास एड़ा ए: जेसखे कअरो रा मालक दूजे दासा पॉदे निगरानी और बखतो पॉदे रोटी देणे खे जिम्मेवारी देओआ। तिजी ते बाद से परदेशो खे चली जाओआ। 46 धन्य ए से दास, जेसखे तेसरा मालक आयी की एड़ा ई करदा ऊआ पाओ। 47 आऊँ तुसा खे सच लगी रा बोलणे कि तेस से आपणी सारी सम्पतिया पॉदे अक्कदार ठराणा। 48 पर जे से दुष्ट दास सोचणे लगे कि मेरे मालको खे आऊणे रे देर ए 49 और आपणे साथलेया दासा खे कुटणे लगी जाओ और पीणे वालेया साथे खाओ-पीओ, 50 तो तेस दासो रा मालक एडे दिने आऊणा, जेबे से तेसखे न्यालाड ई ना ओ और एडिया कअडिया रे, जेतेखे से नि जाणदा ओ। 51 तेबे तेस तेसखे बऊत दण्ड देणा और तेसरा इस्सा कपटिया साथे ठराणा; तेती रोणा और दाँद किरइना ऊणा।”

25 तेबे यीशुए आपणे चलेया खे फेर बोलेया, “जेबे आँऊ माणू रा पुत्र आऊणा, तेबे स्वर्गो रा राज्य लाडिया री तिना दस कुआँरिया सेहेलिया

जेड़ा ऊणा, जो आपणिया मशाला लयी की तेसा रे लाडे साथे मिलणे खे निकलिया। 2 तिना बीचा ते पॉज मूर्ख और पॉज समजदार थिया। 3 जो मूर्ख थिया तिने आपणिया मशाला तो लईया, पर आपू साथे फालतू तेल नि लया। 4 पर समजदारे आपणिया मशाला साथे आपणिया कूपिया रे तेल बी परी ला। 5 जेबे लाडे खे आऊणे रे देर ऊईगी, तेबे तिना खे नींजा रे टमके लगणे लगे और सेयो सयी गिया। 6 “आदिया राती आल्ला-गोल्ला लगेया ऊणे कि देखो, लाड़ा आऊणे लगी रा, तेस साथे मिलणे चलो। 7 तेबे सेयो सब कुआँरिया उठिया और आपणी-आपणी मशाला ठीक करने लगिया। 8 तेबे जो मूर्ख थिया सेयो समजदारा खे लगिया बोलणे, ‘आपणे तेलो बीचा ते आसा खे बी थोड़ा जा तेल देई दो, कऊँकि आसा री मशाला बिजणे लगी रिया।’ 9 पर समजदारे बोलेया, ‘ये आसा और तुसा खे पूरा नि ऊणा। खरा तो ये कि तुसे जाओ और बेचणे वालेया ते खरीदी की ली आओ।’ 10 जदुओ खे सेयो खरीदणे गईया, तदुओ खे लाड़ा आईगा और जो त्यार थिया, सेयो तेस साथे ब्याओ रे कअरे चली गिया और द्वार बंद करी ता। 11 तिजी ते बाद सेयो दुजिया कुआँरिया बी आयी की लाडे खे बोलणे लगिया, ‘ओ मालक, ओ मालक, आसा खे बी दरवाजा खोलो।’ 12 तिने जवाब दितेया, ‘आऊँ तुसा खे सच लगी रा बोलणे कि आऊँ तुसा खे नि जाणदा।’ 13 इजी री खातर जागदे रओ, कऊँकि तुसे ना तो मेरे आऊणे रे तेस दिनो खे जाणोए और ना तेसा कअडिया खे। 14 “स्वर्गो रा राज्य तेस मांणूए जेड़ा बी ए, जिने परदेशो खे जांदे ऊए आपणी सारी सम्पति, आपणे दासा खे बुलाई की तिना गे सम्बाली ती। 15 तिने एकी खे पॉज तोडे, (एक तोड़ा मतलब पन्द्रहा साला री त्याड़ी) दूजे खे दो और तीजे खे एक, मतलब हर एकी खे तेसरी काबलियता रे मुताबिक दितेया और तेबे परदेशो खे चली गा। 16 तेबे, जेसखे पॉज तोडे मिले थे, से गया और तिने जाई की तिजी साथे लेण-देण कितेया और पॉज तोडे ओर कमाए। 17 ईयां ई जेसखे दो तोडे मिले थे तिने बी दो तोडे ओर कमाए। 18 पर जेसखे एक तोड़ा मिलेया था, तिने जाई की माट्टी खणी और आपणे मालको रे पैसे लकोई ते। 19 “बऊत दिना बाद तिना दासा रा मालक आया और तिना ते लेखा लगेया लणे। 20 जेसखे पॉज तोडे मिले थे, तिने पॉज तोडे ओर ल्याई की बोलेया, ‘ओ मालक, तुसे माखे पॉज तोडे दिते थे और मैं इजी ते पॉज तोडे ओर कमाए।’ 21 तेसरे मालके तेसखे बोलेया, ‘धन्य ए तूँ, खरे और विश्वास जोगे दास, तूँ थोड़े रेई विश्वासो जोगा रया, मां तूँ बऊत चीजा रा अक्कदार बनाणा, आओ मां साथे खुशिया रे शामिल ओ।’ 22 “तेबे जेसखे दो तोडे मिले थे, तिने बी आयी की बोलेया, ‘ओ मालक! तुसे माखे दो तोडे दिते थे, देखो, मैं दो तोडे ओर कमाए।’ 23 तेसरे मालके तेसखे बोलेया, ‘धन्य ए तूँ, खरे और विश्वास जोगे दास, तूँ थोड़े रेई विश्वासो जोगा रया, मां तूँ बऊत चीजा रा अक्कदार बनाणा, आओ मां साथे खुशिया रे शामिल ओ।’ 24 “तेबे जेसखे एक तोडे मिलेया था, तिने आयी की बोलेया, ‘ओ मालक! आऊँ तुसा खे जाणूआ कि तुसे कठोर मांणू ए। तुसे जेती बांदि नि तेती, बाडोए और जेती फरकांदा नि, तेती कट्टा करोए।’ 25 तो आऊँ डरीगा और जाई की तुसा रा तोड़ा माट्टिया रे लकोईता, देखो, ‘जो तुसा राए, से ये ए।’ 26 तेसरे मालके तेसखे जवाब दितेया, ‘ओ दुष्ट और आलसी दास, जेबे तूँ जाणेया था कि जेती मैं नि बायी रखेया, से बाडी देऊँआ और जेती फरकांदा नि, तेथा ते कट्टा करूँआ। 27 तो ताखे चाईयो था कि तूँ मेरे पैसे साऊकारो गे देई देंदा, तेबे आऊँ आयी की आपणा पैसा ब्याजो समेत लई लंदा। 28 इजी खे ये तोड़ा एसते लई लो और जेसगे दस तोडे रे, तेसखे देई देओ’ 29 कऊँकि जेस केसी गे आए, तेसखे ओर देणा और तेसगे ओर ऊई जाणा, पर जेसगे कुछ निए, तेसते से बी, जो तेसगे आए, लई लणा। 30 एए नकम्मे दासो खे बारे न्हैरे रे सेटी देओ, जेती रोणा और दाँद किरइना ई ऊणा। 31 “जेबे आँऊ माणू रा पुत्र आपणी महिमा रे आऊणा, तेबे सब स्वर्गदूत मां साथे आऊणे, तेबे मां आपणी महिमा रे सिंहासनो रे बैठणा। 32 तेबे सब जातिया तेस सामणे कट्टिया करी देणियां और जियॉ गद्दी बाकरिया खे पेडा ते लग करी देओआ, तियॉ ई तेस सेयो एकी-दूजे ते लग करी देणियां। 33 तेस पेडा मतलब तर्मी लोक आपणे दाणे

कनारे खड़े करने और बाकरिया मतलब पापी लोक खूँजे कनारे। 34 तेबे मां राजे आपणी दौंणे कनारे वालेया खे बोलणा, 'ओ मेरे पिते रे धन्य लोको; आओ, तेस राज्य रे अक्कदार ऊई जाओ, जो दुनिया रे सृष्टिया ते तुसा खे त्यार ए कित्ते रा। 35 कऊँकि जेबे आऊँ पूखा था और तुसे माखे खाणे खे दित्तेया, जेबे आऊँ त्याया था, तुसे माखे पाणी पलयाया, जेबे आऊँ परदेशी था, तुसे आऊँ आपणे कअरे ठराया। 36 जेबे आऊँ नांगा था, तुसे माखे टाले दित्ते, जेबे आऊँ बमार था और तुसे मेरी सम्बाल लई, जेबे आऊँ जेला रे था और तुसे माखे मिलणे आए।' 37 "तेबे तर्मिया तेसते पूछणा, 'आसे कदी तू पूखा देखेया और ताखे खुलाया? या त्याया देखेया और पाणी पलयाया? 38 आसे कदी तू परदेशी देखेया और आपणे कअरे ठराया? या नांगा देखेया और टाले पणयाए? 39 आसे कदी तू जेला रे या बमार देखेया और ताखे मिलणे आए?' 40 तेबे राजे तिना खे जवाब देणा, 'आऊँ तुसा खे सच लगी रा बोलणे कि तुसे इना मेरे छोटिया ते छोटिया, केसी एकी पाईए साथे बी कित्तेया, से मां ई साथे कित्तेया।' 41 "तेबे तेस खूँजे कनारे वालेया खे बोलणा, 'ओ सापित लोको! मां सामणे ते एसा अनन्त आगी रे चली जाओ, जो परमेशरे शैतानो खे और तेसरे दूतो खे त्यार ए कित्ती री। (aiōnios g166) 42 कऊँकि आऊँ पूखा था, पर तुसे माखे रोटी नि दित्ती और आऊँ त्याया था, पर तुसे माखे पाणी नि पलयाया? 43 आऊँ परदेशी था, पर तुसे माखे आपणे कअरे जगा नि दित्ती, आऊँ नांगा था, पर तुसे माखे टाले नि दित्ते। आऊँ जेला रे और बमार था, पर तुसे माखे मिलणे नि आए।' 44 "तेबे तिना जवाब देणा, 'ओ प्रभु! आसे कदी तू पूखा, त्याया, परदेशी, नांगा, बमार और जेला रे देखेया और तेरी सेवा नि कित्ती?' 45 तेबे मां तिना खे जवाब देणा, 'आऊँ तुसा खे सच लगी रा बोलणे कि जो तुसे इना छोटिया ते छोटें बीचा ते केसी एकी साथे पनि कित्तेया, से मां साथे पनि कित्तेया' 46 और तिना खे अनन्त सजा मिलणी, पर तर्मी, अनन्त जीवनों खे जाणे।" (aiōnios g166)

26 जेबे यीशु इना सबी गल्ला बोली चुके, तेबे आपणे चेलैया खे बोलणे लगे, 2 "तुसे जाणोए कि दो दिन बाद फसह रा त्योआर ए और माणूं रा पुत्र क्रूसो पाँदे चढ़ाणे रिया तई पकड़वाया जाणा।" 3 तेबे बड़े पुरोईत और लोका रे बुजुर्ग, कैफा नाओं रे प्रदान पुरोईतो रे आँगणो रे कट्टे ऊए 4 और आपू बीचे बिचार करने लगे कि यीशुए खे तोखे रे पकड़ी की काई देऊँए। 5 पर सेयो बोलो थे, "त्योआरो रे बखते नि, केथी एड़ा नि ओ कि लोका बीचे हुड़दंग मची जाओ।" 6 जेबे यीशु बैतनिय्याह गांव रे शमौन कोदिए रे कअरे थे 7 तेबे एक जवाणस संगमरमरो रे पांडे री सुराइया रे मईगा इत्र लयी की तिना गे आयी और जेबे सेयो रोटी खाणे बैठे रे थे, तेबे तेसे तिना रे सिरो पंटे उलटाईता। 8 ये देखी की तिना रे चले जलने लगे और बोलणे लगे, "एते इत्रो रा सत्यानाश कऊँ कित्तेया? 9 एस इत्रो खे खरे दामो रे बेची की कंगाला खे बांडी सको थे।" 10 ये जाणी की यीशुए तिना खे बोलेया, "एसा जवाणसा खे तंग कऊँ लगी रे करने? एसे मां साथे पलाई करी राखी। 11 कंगाल तो तुसा साथे सदा रओए, पर आऊँ तुसा साथे सदा नि रणा। 12 तेसे मेरे शरीरो रे जो ये इत्र उलटाया, से मेरे दबाणे खे करी राखेया। 13 आऊँ तुसा खे सच लगी रा बोलणे कि सारी दुनिया रे जेती केथी बी ये सुसमाचार प्रचार उणा, तेती एस कामो री चर्चा तेसा री यादा रे उणी।" 14 तेबे यहूदा इस्करियातो जो बारा चेलैया बीचा ते एक था, तिने बड़े पुरोईतो गे जाई की बोलेया, 15 "जे आऊँ तिना खे तुसा रे आथो रे पकड़वाई देऊँ तो माखे क्या देणा?" तिने तेसखे तीई चाँदिए रे सिक्के तोली की देई ते। 16 तेबे से तेसी बखतो ते यीशुए खे पकड़वाणे रा मोका टोलने लगेया। 17 तेबे बिना सजेड़े री रोटिया रे त्योआरो रे पईलके दिने चले आयी की यीशुए ते पूछणे लगे, "तुसे केयी चाओए कि आसे तुसा खे फसह रे त्योआरो री रोटी खाणे री त्यारी करिए?" 18 यीशुए बोलेया, "नगरो रे अमुक नाओं रे माणूए गे जाओ और तेसखे बोली कि गुरु बोलोआ कि मेरा बखत नेड़े ए, मां आपणे चेलैया साथे तेरे कअरे ये फसह रा त्योआर मनाणा।" 19 तेबे चेलैया यीशुए री आज्ञा मानी और फसह रे त्योआरो री

रोटी त्यार कित्ती। 20 जेबे सॉज ऊई तेबे सेयो आपणे बारा चेलैया साथे रोटी खाणे बैठे। 21 जेबे सेयो खाणे लगी रे थे तेबे तिने बोलेया, "आऊँ तुसा खे सच लगी रा बोलणे कि तुसा बीचा ते एकी जणे आऊँ पकड़वाणा।" 22 ये सुणी की सेयो बऊत दु; खी ऊईगे और सब तिना ते पूछणे लगे, "ओ गुरु! क्या से आऊँ ए?" 23 तिने जवाब दित्तेया, "जिने मां साथे थालिया रे आथ पाई राखेया, तेस आऊँ पकड़वाणा। 24 आऊँ माणूं रा पुत्र पक्का ई मारेया जाणा जेड़ा मेरे बारे रे पवित्र शास्त्रो रे लिखी राखेया, पर तेस माणूए खे हाय, जेस आऊँ पकड़वाणा। तेस माणूए खे खरा था कि से जमदा ई नि।" 25 तेबे तिना खे पकड़वाणे वाले यहूदे बोलेया, "ओ गुरु! क्या से आऊँ ए?" तिने तेसखे बोलेया, "तू आपू ई बोली चुकेया।" 26 जेबे सेयो खाणे लगी रे थे, तेबे यीशुए रोटी लयी और आशीष मांगी की तोड़ी और चेलैया खे दित्ती और बोलेया, "लओ खाओ; ये मेरा शरीर ए।" 27 तेबे तिने कटोरा लयी की धन्यवाद कित्तेया और तिना खे देई की बोलेया, "तुसे सब एते बीचा ते पियो। 28 कऊँकि ये वाचा रा मेरा से खून ए, जो बऊत जणेया रे पापो री माफिया खे बाह्या जाओआ। 29 आऊँ तुसा खे सच बोलूँआ कि मां अँगूरा रा रस तेस दिनो तक फेर कदी नि पीणा, जदुओ तक तुसा साथे आपणे पिते रे राज्य रे नया नि पीऊँ।" 30 तेबे सेयो पअजन गायी की जैतूनो रे पाहड़ो पंदि गाए। 31 तेबे यीशुए तिना खे बोलेया, "तुसा सबी आजी राती मेरे बारे रे ठोकर खाणी; कऊँकि लिखी राखेया, 'मां गादी काणे और चूड़ा रिया पेड़ा ओरे-पोरे ऊई जाणिया।' 32 पर मरे रेया बीचा ते जिऊँदे ऊणे ते बाद, मां तुसा ते पईले गलीलो खे जाणा।" 33 ये सुणी की पतरसे तिना खे बोलेया, "चाए सब तुसा रे बारे रे ठोकर खाओ तो खाओ, पर मां कदी नि खाणी।" 34 यीशुए तेसखे बोलेया, "आऊँ ताखे सच लगी रा बोलणे कि आज राती मुर्ग री बांग देणे ते पइले, तू तीन बार माखे जाणने ते मुकरी जाणा।" 35 पतरसे तिना खे बोलेया, "जे माखे तुसा साथे मरना बी पड़ोणा, तो बी मां कदी ना नि करनी" और सबी चले बी एड़ा ई बोलेया। 36 तेबे यीशु आपणे चेलैया साथे गतसमनी नाओं री जगा रे आए और आपणे चेलैया खे बोलणे लगे, "एथी बैठे रे रणा, जदुओ तक आऊँ तेती जाई की प्रार्थना करूँ।" 37 सेयो पतरस और जब्दिए रे दोनो पाऊए खे साथे लईगे और उदास और बेचेन ऊणे लगे। 38 तेबे यीशुए तिना खे बोलेया, "मेरा जिऊ बऊत उदास ए, एथो तक कि मेरे प्राण निकलने लगी रे; तुसे एथी रूको और मां साथे जागदे रओ।" 39 तेबे सेयो थोड़ी जी आगे चली की मुँओ रे पारे रुडी गे और ये प्रार्थना करने लगे, "ओ मेरे पिता! ऊई सको तो ये दु:ख मांगा गे ते टली जाओ, पर तेबे बी जेड़ा आऊँ चाऊँआ, तेड़ा नि, पर जेड़ा तुसे चाओए तेड़ा गो।" 40 तेबे जेबे सेयो वापस आए तो चले सऊणे लगी रे थे, तेबे तिने पतरसो खे बोलेया, "क्या तुसे मां साथे एक कअडी पनि जागी सके? 41 जागदे रओ और प्रार्थना करदे रओ कि केथी तुसे परीक्षा रे नि पडी जाओ; आत्मा तो त्यार ए, पर शरीर कमजोर ए।" 42 फेर तिने दूजी बार जाई की प्रार्थना कित्ती, "ओ मेरे पिता! जे ये मेरे पीणे ते बिना नि आटी सकदा, तो तुसा री इच्छा पूरी ओ।" 43 तेबे फेर जेबे सेयो आए तो तिने आपणे चले सए रे पाए, कऊँकि तिना री आखी रे नीज थी। 44 तिना खे छाडी की सेयो फेर चली गे और तिना ई शब्दा ते तिने तीन बार प्रार्थना कित्ती। 45 तेबे यीशुए चेलैया गे आयी की बोलेया, "एबे सऊँदे रओ और आराम करो। देखो, से कअडी आईगी री कि आऊँ माणूं रा पुत्र पापिया रे आथे पकड़वाणे वाला ए। 46 उठो, चलो, देखो, माखे पकड़वाणे वाला नेड़े आईगा रा।" 47 यीशु ये बोलणे ई लगी रे थे तदुओ कि यहूदा, जो बारा चेलैया बीचा ते एक था, आया और तेस साथे बड़े पुरोईत और लोका रे बुजुर्गो री तरफा ते एक बड़ी पीड़, तलवार और डण्डे लयी की आयी। 48 तिना खे पकड़वाणे वाले तिना खे बताई ता था कि, "जेसखे आऊँ नमस्ते करूँ और गले लगूँ, सेई उणा और तुसे से पकड़ी की लई जाणा।" 49 तेबे तिने फटाफट यीशुए गे आयी की बोलेया, "ओ गुरु!" और तेसखे नमस्ते कित्ती और गले लगेया। 50 यीशुए तेसखे बोलेया, "ओ दोस्त! जेते कामो खे तू आयी रा तेस कर।" तेबे तिने नेड़े आयी की यीशु पकड़ी ले। 51 तेबे यीशुए रे चेलैया बीचा ते

एकी जण आथ आगे करी की आपणी तलवार खिंजी ली और प्रदान पुरोईतो रे एकी दासो पंदि चलाई और तेसरा कान ऊड़ाई ता। 52 तेवे यीशुए तेसखे बोलेया, “आपणी तलवार म्यानो रे राखी दे, कऊँकि जो तलवार चलाओए, तिना रा तलवारी साथे नाश ऊणा। 53 क्या तूँ नि जाणदा कि आऊँ आपणे पिते ते बिनती करी सकूँआ और सेयो आपणे स्वर्गदूतो रिया बारा पलटणा ते बी जादा एबु मांगे पेजी सकोए? 54 पर पवित्र शास्त्रो रिया गल्ला कि ईयाँ ई ऊणा जरूरी ए, कियाँ पुरिया ऊणिया।” 55 तेस बखते यीशुए पीड़ा खे बोलेया, “क्या तुसे माखे डाकू समजोए कि तलवारी और डण्डे लयी की माखे पकड़ने आयी रे? आऊँ रोज मन्दरो रे बैठी की उपदेश देऊँ था, तेवे तुसे कऊँ नि पकड़ैया? 56 पर ये सब तेवे ऊआ ताकि भविष्यबक्ते रे वचन पूरे ओ” और सब चले तिना खे छाडी की नठीगे। 57 तेवे यीशुए खे पकड़ने वाले तिना खे कैफा नाओं रे प्रदान पुरोईतो गे लईगे। जेती शास्त्री और बुजुर्ग कट्टे थे ऊए रे। 58 पतरस दूरो तेई तिना ते पीछे-पीछे प्रदान पुरोईतो रे आँगणो तक गया और पीतरे जाई की अन्त देखणे खे प्यादेया साथे बैठी गा। 59 बडे पुरोईत और सारी बडी सभा यीशुए खे काणे रिया तई चूठी गवाई सोचणे लगे रे थे। 60 पर बरऊत चूठे गवा आप, पर तेवे पनि मिली। 61 बादो ते दो जणेया आयी की बोलेया, “इने बोली राखेया कि आऊँ परमेशरो रे मन्दरो रे टाली सकूँआ और तीजे दिने दूजा बणाई सकूँआ।” 62 तेबे प्रदान पुरोईते खडे ऊई की बोलेया, “क्या तूँ कोई जवाब नि देणा चांदा? यो लोक तेरे बारे रे क्या गवाई लगी रे देणे?” 63 पर यीशु चुप ए। तेबे प्रदान पुरोईते तिना खे बोलेया, “आऊँ ताखे जिऊँदे परमेशरो की कसम देऊँआ कि जे तूँ परमेशरो रा पुत्र मसीह ए तो आसा गे बोली दे।” 64 यीशुए तेसखे बोलेया, “तँ आपू ई बोली ता; बल्कि आऊँ तुसा खे ये बी बोळूँआ कि आजो ते तुसा आँऊ माणू रा पुत्र, सर्वशक्तिमानो रे दाँणे कनारे और सर्गो रे बादल पंदि आऊँडे ऊए देखणा।” 65 तेबे प्रदान पुरोईते आपणे टाले फाडे और बोलेया, “इने परमेशरो री निन्दा करी राखी, एबे आसा खे गवाओ री क्या जरूरत ए। देखो, तुसे एबु ये निन्दा सुणी राखी। 66 तुसे क्या सोचोए?” तिने जवाब दित्तेया, “ये तो काणे जोगा ए।” 67 तेबे तिने यीशुए रे मुँओ पंदि थूकेया और तिना खे मुक्के बाए और किने तो थपड बाए और बोलेया, 68 “ओ मसीह, आसा खे भविष्यबाणी करी की बोल कि तांदे किने बाई?” 69 पतरस बारे आँगणो रे बेटे रा था, तेबे एक दासी तेसगे आयी और बोलेया, “तूँ बी तो यीशु गलीलीए साथे थे।” 70 तेबे से सबी सामणे मुकरी गा और तिने बोलेया, “आऊँ नि जाणदा कि तूँ क्या लगी री बोलणे।” 71 जेबे से बारे देऊँलिया गे चली गा, तेबे दूजी दासिये बी तेसखे देखी की जो तेती थे तिना खे बोलेया, “ये बी तो यीशु नासरियो साथे था।” 72 पतरस फेर कसम खाई की बोलेया, “आऊँ एस माणूए खे नि जाणदा।” 73 थोडी देर बाद लोके जो तेती खडी रे थे, तिने पतरसो गे आयी की तेसखे बोलेया, “सच्ची तूँ बी तिना बीचा ते एक ए, कऊँकि तेरी पाषा तेरा पेट बताओई।” 74 तेबे से आपू खे कोसणे लगेया और कसम खाणे लगेया, “आऊँ एस माणूए खे नि जाणदा” और तेबुई मुर्गे बांग दित्ती। 75 तेबे पतरसो खे यीशुए री गल्ल याद आयी कि, “मुर्गे री तीन बार बांग देणे ते पड़ले तां मेरे बारे रे जाणने ते ना करनी,” तेबे से बारे जाई की फुटी-फुटी की रोणे लगेया।

27 जेबे प्याग ऊई तेबे सबी बडे पुरोईत और लोका रे बुजुर्गो यीशुए खे काणे री योजना बणाई। 2 तेबे सेयो यीशुए खे बानी की लईगे और पिलातुस हाकिमो रे आथो रे देई ते। 3 जेबे यीशुए खे तोखे ते पकड़वाणे वाले यहूदे देखेया कि सेयो दोषी ठराई ते, तेबे से बरऊत पछताया और तिना चाँदिए रे तीई सिक्केया लयी की बडे पुरोईता गे और बुजुर्गो गे फेर ली आया 4 और बोलणे लगेया, “मँ बेकसुर माणूए री मौत करवाणे खे पकड़वाई की पाप करी राखेया।” तेबे तिने बोलेया, “आसा खे क्या ए? तूँ ई जाण।” 5 तेबे यहूदा तिना सिक्केया खे मन्दरो रे सेटी की चली गा और जाई की आपू खे गलुफा लगाईता। 6 तेबे बडे पुरोईते तिना सिक्केया खे लयी की बोलेया, “इना खे पण्डारो रे राखणा ठीक निए, कऊँकि ये खून कराणे खे दित्ती री

कीमत ए।” 7 तेबे तिने योजना बणाई की तिना सिक्केया ते परदेशिया खे दबाणे रिया तई कुम्हारो रा डोरू मोले लयी ला। 8 तेबेई तो आजो तक तेस डोरूआ खे खूनो रा डोरू बोलोए। 9 तेबे जो वचन यिर्मयाह भविष्यबक्ते बोलेया था, से पूरा ऊआ, “तिने सेयो तीई सिक्के, मतलब जो मोल था राखेया रा (जो इस्राएलो री ल्वादा बीचा ते कितणेया जणे ठराया था) लयी ला 10 और जियाँ माखे प्रभुए आज्ञा दित्ती थी, तियाँ ई से कुम्हारो रे डोरूआ रे मोलो रे देईता।” 11 जेबे यीशु हाकिमो सामणे खडे थे, तेबे हाकिमे पूछेया, “क्या तूँ यहूदिये रा राजा ए?” यीशुए तेसखे बोलेया, “तूँ आपू ई लगी रा बोलणे।” 12 जेबे बडे पुरोईत और बुजुर्गो तिना पंदि दोष लगी रे थे लगाणे, तेबे तिने कोई जवाब नि दित्तेया। 13 तेबे पिलातुसे तिना खे बोलेया, “क्या तूँ सुणने नि लगी रा कि यो तेरे खलाफ कितणिया गवाईया लगी रे देणे।” 14 पर यीशुए तेसरी एक बी गल्ला रा जवाब नि दित्तेया, ये देखी की हाकिमो खे बरऊत हैरानी ऊई। 15 हाकिमो रा ये रवाज था कि तेस त्योआरो खे लोका री तई जेसखे सेयो चाओ थे, एकी बन्दुओ खे छाडी देयो था। 16 तेस बखते तिना गे बरअब्बा नाओं रा एक मानेया रा बन्दुआ था। 17 तेबे, जेबे सेयो कट्टे ऊए, तेबे पिलातुसे तिना खे बोलेया, “तुसे केसखे चाओए कि आऊँ तुसा री तई छाडी देऊँ? बरअब्बे खे या यीशुए खे, जेसखे मसीह बी बोलोए।” 18 कऊँकि पिलातुसे जाणो था कि तिने से जलनी रे पकड़वाया। 19 जेबे से न्याय आसणो री गदिया पंदि था बेटे रा, तेबे तेसरी लाडिए तेसखे सन्देशा पेजेया कि, “तूँ तेस तर्मी माणूए रे बारे रे दखलंदाजी नि कर; कऊँकि आज माखे सुपने रे तेसरी बजअ त बरऊत दुः ख ऊआ।” 20 बडे पुरोईत और बुजुर्गो लोक ऊकसाए कि तुसे बरअब्बे खे माँगो और यीशुए खे नाश कराओ। 21 हाकिमे तिना ते पूछेया, “तुसे इना दूई बीचा ते केसखे चाओए कि आऊँ तुसा खे छाडी देऊँ?” तिने बोलेया, “बरअब्बे खे।” 22 पिलातुसे तिना ते पूछेया, “तेबे यीशुए खे, जेसखे मसीह बोलोए, तेस साथे क्या कहे?” सबी तेसखे बोलेया, “एसखे क्रूसो पंदि चढ़ाओ।” 23 हाकिमे पूछेया, “कऊँ, तिने क्या बुरा करी राखेया?” पर सेयो ओर बी चींगी-चींगी की बोलणे लगे, “एसखे क्रूसो पंदि चढ़ाओ।” 24 जेबे पिलातुसे देखेया कि कोई बात नि लगी री बणने, बल्कि बिगडने ई लगी री, तेबे तिने पाणी लई की पीड़ा सामणे आपणे आथ तोए और बोलेया, “आऊँ एस तर्मियों रे खूनो ते निर्दोष ए; तुसेई जाणो।” 25 सबी जवाब दित्तेया, “एसरे खूनो री अत्या आसा खे और आसा री ल्वादा खे लागो!” 26 तेबे तिने बरअब्बा तिना खे छाडीता और यीशु कोडे लगवाई की तिना खे देई ते कि क्रूसो पंदि चढ़ाई देयो। 27 तेबे हाकिमो रे सिपाई यीशुए खे किले दे लईगे और सारी पलटणा तिना रे चऊँ कनारे कट्टी करी ती, 28 और तिना रे टाले खोली की तिना खे लाल रंगो रा चौगा पणयाई ता 29 और कांडेया रा मुकट बूणी की तिना रे सिरों पंदि राखेया और तिना रे दाँणे आथो रे एक नगलो रा डण्डा देईता और तिना रे आगे कुटणे टेकी की तिना रा मजाक ऊड़ाणे लगे और बोलणे लगे, “ओ यहूदिया रे राजा नमस्कार!” 30 और तिना पंदि थूकेया और सेई नगलो रा डण्डा लयी की तिना रे सिरों पंदि बाणे लगे। 31 जेबे सेयो तिना रा मजाक ऊड़ाई चुके, तेबे तिने तिना पंदि ते से चौगा उतारेया और तिना खे तिना रेई टाल्ले पणयाईते और क्रूसो पंदि चढ़ाणे खे लयी चले। 32 बारे जाई की तिना खे शमौन नाओं रा एक कुरेनी माणू, जो दूजे गांव ते आऊणे लगी रा था, तेसी बखते से तिसिये निकलेया। तेबे सिपाईए से ईयाँ ई पकडी ता कि यीशु रा क्रूस चकी की लई चल। 33 तेसा जगा रे जो गुलगुता, मतलब-जेथो खे खोपड़िया री जगा बी बोलोए, तेती पकूँछी की 34 तिने यीशुए खे पित्त मलाए रा अँगूरा रा रस पीणे खे दित्तेया, पर तिने चाखी की पीणा नि चाया। 35 तेबे तिने यीशु क्रूसो पंदि चढ़ाई ते और चिट्टिया पाई की तिना रे टाले बांडी ते 36 और तेती बेंडी की तिना रा पईरा देणे लगे। 37 तेबे तिना रा दोष पत्र तिना रे सिरों पंदि लगाया, “ये यहूदिया रा राजा यीशु ए।” 38 तेबे तिना साथे दो डाकू, एक दाँणे कनारे और दूजा खूँजे कनारे क्रूसो पंदि चढ़ाए। 39 आऊणे जाणे वाले सिर इलाई-इलाई की तिना री निन्दा करदे रओ थे 40 और ये बोलदे रओ थे, “ओ मन्दरो खे टालने वाले और तीन दिना रे

बनाणे वाले, आपू खे तो बचा! जे तूँ परमेशरो रा पुत्र ए, तो कूसो पाँदो ते उतरी की थाले आओ।” 41 तियाँ ई बड़े पुरोईत, शास्त्री और बुजुर्ग मजाक ऊड़ाई की बोले थे, 42 “इने ओर बचाए, पर आपू खे नि बचाई सकदा। ये तो ‘इसाएलो रा राजा’ ए जे एबे कूसो ते ऊतरी की आओ, तो आसे विश्वास करिए। 43 इने तो परमेशरो पाँद विश्वास राखी राखेया, जे से एसखे चाओआ, तो एबे एसखे छुड़ाई लो, कऊँकि इने बोलेया था, कि आऊँ परमेशरो रा पुत्र ए” 44 तियाँ ई सेयो डाकू बी, जो यीशुए साथे कूसो पाँद चढ़ाई राखे थे, निन्दा करदे रओ थे। 45 त्याड़िया ते लयी की तीजे पड़ीरो तक सारे देशो रे न्हेरा ई रया। 46 तीजे पड़ीरो रे नेडे यीशुए जोरे की आक्का पाई की बोलेया, “एली, एली, लमा शबत्तनी?” मतलब “ओ मेरे परमेशर, ओ मेरे परमेशर! तैं आऊँ कऊँ छाडीता?” 47 जो तेती थे खड़े रे, तिना बीचा ते बऊत जणेया ये सुणी की बोलेया, “ये एलियाह खे लगी रा आक्का पाणे।” 48 तिना बीचा ते एक फटाफट दौड़ेया और स्पंज लयी की सिरके बीचे डबोया और नगलो रे डण्डे रे राखी की तिना खे चुसाया। 49 तेबे ओरी बोलेया, “देखी लऊँए कि एलियाह एसखे बचाणे आओआ कि नई।” 50 तेबे यीशु फेर जोरे की चींग और प्राण छाडी ते। 51 तेबे मन्दरो रा पड़दा पाँदो ते लई की थालो तक फटीगा और तिजी रे दो टुकड़े ऊईगे। ये ए देखाओआ कि एबे कोई बी माणू परमेशरो री हजुरिया रे जाई सकोआ। तरती ईलणे लगी और जानी तिडकी गिया 52 और कन्ना खुली गिया और मेरे रे पवित्र लोका रिया बऊत लोथा उठी गिया। 53 और तिना रे जिऊँदे ऊणे ते बाद सेयो कन्ना ते निकली की पवित्र नगरो खे गए और बऊत लोका खे दिखे। 54 तेबे सूबेदार और जो तेस साथे पड़ीरा देणे लगी रे थे, ईल्लण और जो कुछ तेती ऊआ, देखी की बऊत डरी गे और बोलणे लगे, “सच्ची, ये तो परमेशरो रा ई पुत्र था।” 55 तेती बऊत जवाणसा, जो गलील प्रदेशो ते यीशुए साथे तिना री सेवा करदिया ऊईया आईया थिया, ये दूरो ते लगी री थिया देखणे। 56 तिना बीचे मरियम मगदलिनी और याकूब और योसेसो री आम्मा मरियम और जब्दिए रे पाऊए री आम्मा थी। 57 जेबे साँज ऊई तेबे यूसुफ नाओं रा अरिमतियाह रा एक अमीर माणू, जो आपू बी यीशुए रा चेला था, आया। 58 तिने पिलातुसो गे जाई की यीशुए री लोथ मांगी। तेबे पिलातुसे देणे री आज्ञा देईती। 59 यूसुफे लोथ लई और सफेद चादरी रे लपेटी ती 60 और से आपणी नईया कन्ना रे राखी, जो तिने चट्टानी रे थी खणवाई री और कन्ना रे द्वारो पाँद एक बड़ा पात्थर खसकेयी की चली गा। 61 मरियम मगदलिनी और दूजी मरियम तेती कन्ना सामणे बैठी रिया थिया। 62 दूजे दिने, जो आरामो रा दिन था, बड़े पुरोईत और फरीसिये कट्टे ऊई की पिलातुसो खे बोलेया, 63 “ओ महाराज! आसा खे याद ए कि तिने भरमाणे वाले, जेबे से जिऊँदा था तिने बोलेया था कि, मां मरने ते बाद तीजे दिने जिऊँदा ऊई जाणा। 64 तो आज्ञा दे कि तीन दिना तक कन्ना री रखवाली ओ, एडा नि ओ कि तेसरे चेले आयी की तेसखे चोरी की लयी जाओ और लोका खे बोलो कि, से मेरे रे बीचा ते जिऊँदा ऊईगा; तेबे पिछला तोखा, पईले ते बी बुरा ऊणा।” 65 पिलातुसे तिना खे बोलेया, “तुसा गे पड़ीरदार आए। तिना खे लयी जाओ और आपणी समजा रे मुताबिक रखवाली करो।” 66 तेबे सेयो पड़ीरदार खे साथे लयी गे और पात्थरो पाँद मोहर लगाई की कन्ना री रखवाली करने लगे।

28 आरामो रे दिनो ते बाद, अप्तरे रे पईले दिने, तड़के-तड़के मरियम मगदलिनी और दूजी मरियम, कन्ना देखणे आईया। 2 तेबे देखो, बऊत बड़ा ईल्लण ऊआ, कऊँकि प्रभुए रा एक स्वर्गदूत स्वर्गो ते उतरेया और तिने नेडे आयी की कन्ना रा पात्थर कनारे खसकेयी ता और तेते पाँद बैठी गा। 3 तेसरा रूप बिजलिया जेडा और टाले पाले जेडे चमकीले थे। 4 तेस देखी की पड़ीरदार थरथराईगे और बेओश ऊईगे। 5 स्वर्गदूते तिना जवाणसा खे बोलेया, “डरो नि; कऊँकि माखे पता ए कि तुसे यीशुए खे, जो कूसो पाँद चढ़ाया था, तेसखे टोलने लगी रिया। 6 से एती निए, पर आपणे वचनो रे मुताबिक जिऊँदा ऊईगा रा आओ, एसा जमा खे देखो, जेती प्रभु थे राखे रे

7 और फटाफट जाई की तिना रे चेलेया खे बोलो कि सेयो मेरे रे बीचा ते जिऊँदे ऊईगे रे और सेयो तुसा ते पईले गलील प्रदेशो रे पऊँछी जाणे, तेती तुसा खे तिना रा दर्शन ऊणा, मैं तुसा खे बोली ता।” 8 सेयो जवाणसा डर और खुशिया साथे कन्ना ते फटाफट वापस ऊई की चेलेया खे ये समाचार देणे दौड़ी गिया। 9 तेबे यीशु तिना खे मिले और बोलेया, “नमस्ते!” सेयो नेडे आईया और तिना रे पैर पकडी की तिना गे माथा टेकेया। 10 तेबे प्रभु यीशुए तिना खे बोलेया, “डरो नि; मेरे चेलेया खे जाई की बोलो कि गलीलो खे चली जाओ। तेती तिना आऊँ देखणा।” 11 जेबे सेयो जवाणसा चेलेया खे ये समाचार देणे जाणे ई लगी रिया थिया, तदुओ तक पड़ीरदार बीचा ते कई जणेया नगरो रे आयी की सारा आल बड़े पुरोईता गे सुणाया। 12 तेबे बड़े पुरोईते और बुजुर्ग साथे कट्टे ऊई की सम्मति किन्ती और पड़ीरदार खे बऊत चाँदी देई की बोलेया, 13 “तुसे सबी लोका गे ये बोलणा कि जेबे राती आसे सऊणे लगी रे थे, तेबे तेसरे चेले आए और तेसखे चोरी की लईगे 14 और जे ये बात हाकिमो तक पऊँछी गी तो आसे तेसखे समजयाई लऊँगे और तुसा खे मुश्कला ते बचाई लऊँगे।” 15 तेबे तिने पैसे लए और जेडा बोलेया था, तेडा ई किन्तेया। ये गल्ल आजो तक बी यहूदिया बीचे प्रचलित ए। 16 तेबे ग्यारा चेले गलील प्रदेशो रे तेस पाहड्डो पाँद गए, जो यीशुए तिना खे बताई राखेया था। 17 तेबे तिने यीशुए रे दर्शन किन्ते और तिना गे माथा टेकेया, पर तिना बीचा ते केसी-केसी खे शक ऊआ कि से जिऊँदा ऊईगा रा 18 यीशुए तिना रे नेडे आयी की बोलेया, “स्वर्ग और तरतिया रा सारा अक्क मांगे देई राखेया। 19 तो, तुसे जाओ और सब जातिया रे लोका खे चेला बणाओ, और तिना खे पिता, पुत्र और पवित्र आत्मा रे नाओं ते बपतिस्मा देओ 20 और तिना खे सब गल्ला, जो मैं तुसा खे आज्ञा देई राखिया, मानणा सिखाओ; और देखो, आऊँ दुनिया रे आखरी तक सदा तुसा साथे ए।” (aiōn g165)

मरकुस

1 यीशु मसीह जो परमेश्वरों का पुत्र है, तेसरे बारे में सुसमाचारों की शुरुआत।
 2 जेड़ा यशायाह भविष्यवाणी की कताबा में लिखी राखेया, परमेश्वर आपणे पुत्रो खे बोलेया। “देख, आऊँ आपणे दूतो खे तांते पईले पेजुँआ, तेस लोका रे मन ताखे त्यार करने।” 3 “सुणसाण जगा रे एक आक्का पाणे वाले री आवाज सुणने लगी री, ‘प्रभुए री खातर लोका रे मनो खे त्यार करो, और तिनारे मनो खे सीदा करो।’” 4 यूहन्ना आया, जो सुणसाण जगा रे बपतिस्मा देओ था और पापो री माफिया मन फेरने रे बपतिस्मा रे प्रचार करो था। 5 तेबे बऊत सारे यहूदिया प्रदेशो रे लोक और यरूशलेम नगरो रे बी बऊत सारे रणे वाले लोक निकली की तेसगे गये और आपणे पापो खे मानी की यरदन नदियारे तेसते बपतिस्मा लया। 6 यूहन्ना ऊँटो रे बालो रे टाले पईनो था और आपणे लको रे चामड़े रा पट्टु बानी राखो था और टिड्डिया और बणो रा सईत खाया करो था। 7 से ये प्रचार करो था, “जो मांते बाद आऊणे वाला ए, से मांते बी जादा महान ए, आऊँ तो एते जोगा पनिए कि चुकी की तेसरे जोड़े रे फिथे खोलूँ। 8 मैं तो तुसा खे पाणिए साथे बपतिस्मा दितेया, पर तेस तुसा खे पवित्र आत्मा साथे बपतिस्मा देणा।” 9 तेस बखते यीशुए, गलील प्रदेशो रे नासरत नगरो ते आई की यरदन नदियारे यूहन्ने ते बपतिस्मा लया। 10 जेबे यीशु पाणिए बीचा ते निकली की पाँदे आए, तेबे तिने तेबु सर्ग खुलदा ऊआ और जियाँ कबूतर उड़दा ऊआ थाले आओआ तियाँ ई तिने पवित्र आत्मा आपू पाँदे आऊँदे ऊए देखेया। 11 तेबे स्वर्गो ते ये आवाज आई, “तूँ मेरा प्यारा पुत्र ए और आऊँ तांते खुश ए।” 12 तेबे पवित्र आत्मा तेबुई यीशुए खे सुणसाण जगा रे लईगा। 13 सुणसाण जगा रे चाली दिन तक शैतान तिनारी परीक्षा करदा रया और सेयो जंगली जानवरों साथे रण और स्वर्गदूत तिनारी री सेवा करदे रये। 14 यूहन्ने रे पकड़वाए जाणे ते बाद, यीशुए गलील प्रदेशो रे आई की परमेश्वरों रे राज्य रा सुसमाचार प्रचार कित्तेया। 15 तिने बोलेया, “बखत पूरा ऊईगा रा और परमेश्वरों रा राज्य नेड़े आईगा रा, मन फेरो और सुसमाचारो पाँदे विश्वास करो।” 16 गलीलो रे समुद्रो रे कनारे-कनारे जांदे ऊए यीशुए शमोन और तेसरा पाई अन्द्रियास समुद्रो रे जाल पाँदे ऊए देखेया, कऊँकि सेयो मछलिया पकड़ने वाले थे। 17 तेबे यीशुए तिनारे खे बोलेया, “मां पीछे आओ और जियाँ तुसे मच्छली पकड़ना जाणोए तियाँ ई मां तुसा खे परमेश्वरों गे माणू पकड़ी की ल्याऊणे सिखाणे।” 18 सेयो तेबुई जाल छाडी की यीशुए पीछे चली पड़े। 19 तेबे थोड़ी जी आगे जाई की यीशुए, जबिरे रे पाऊ याकूब और तेसरा पाई यूहन्ना किस्तिया पाँदे जाल ठीक करदे ऊए देखे। 20 तिने तेबुई सेयो बुलाए और सेयो आपणे पिते जबिरे खे मजदूरा साथे, किस्तिया पाँदे छाडी की यीशुए रे पीछे चली पड़े। 21 तेबे यीशु और तिनारे चले कफरनहूम नगरो रे आए और यीशु आरामो रे दिने प्रार्थना रे कअरो रे गए और उपदेश देणे लगे। 22 लोक तिनारे उपदेशो ते हैरान ऊईगे, कऊँकि सेयो तिनारे शास्त्रिया जेड़े नि, पर अधिकारो साथे उपदेश देओ थे। 23 तेबे तेस बखते तिनारे प्रार्थना रे कअरो रे एक एड़ा माणू था, जेसरे दुष्टात्मा थी। 24 तिने चींगी की बोलेया, “ओ यीशु नासरी! आसा खे तांते क्या काम ए? क्या तूँ आसा खे नाश करने आई रा? आऊँ ताखे जाणूँआ कि तूँ कूण ए? तूँ परमेश्वरों रा पवित्र पुत्र ए।” 25 यीशु तेसखे बक्के और बोलेया, “चुप रओ और एसते निकली जा।” 26 तेबे दुष्टात्मा तेसखे मकरेडी की और जौरे की चींगी ऊई, तेसते निकली गी। 27 ये देखी की सब लोक हैरान ऊईगे और आपू बीचे बईस करने लगे, “ये केड़ी गल्ल ए? ये तो कोई नया ई उपदेश ए। ये तो अधिकारो साथे दुष्टात्मा खे बी आज्ञा देओआ और सेयो एसरी आज्ञा खे मानोईया।” 28 तेबे यीशुए रा नाओ गलीलो रे सारे प्रदेशो रे फैली गा। 29 तेबे यीशु तेबुई प्रार्थना रे कअरो ते निकली की याकूब और यूहन्ने साथे, शमोन और अन्द्रियासो रे कअरे आए। 30 शमोनो री सासुआ खे बऊत बुखार था से माँजे पाँदे सुती री थी और तेबे तिने फटाफट तेसारे बारे रे

यीशुए खे बोलेया। 31 तेबे यीशुए नेड़े जाई की तेसारे रा आथ पकड़ी की से ऊबे ठवाली और तेसारे रा बुखार उतरी गा और तेबे से तिनारे री सेवा करने लगी। 32 साँजेके बखते जेबे सूरज डूबी गा तेबे लोक बऊत सारे बमारा खे और जिना रे दुष्टात्मा थिया, तिनारे खे लई की यीशुए गे आए। 33 तेबे नगरो रे बऊत सारे लोक द्वारो पाँदे कट्टा ऊईगे। 34 तेबे यीशुए, जो कईया प्रकारा रिया बमारिया ते दुः खी थे, सब ठीक कित्ते, कई दुष्टात्मा निकयालिया और दुष्टात्मा खे बोलणे नि देओ थे, कऊँकि सेयो तिनारे खे जाणो थिया कि सेयो परमेश्वरों रे पुत्र ए। 35 तेबे यीशु तड़के ई उठी गे और सुनसाण जगा खे चली गे और तेती प्रार्थना करने लगे। 36 तेबे शमोन और तेसरे साथी तिनारे टोलदे ऊए गए। 37 जेबे सेयो मिली गे, तेबे तिनारे खे बोलेया, “बऊत सारे लोक तुसा खे टोलने लगी रे।” 38 तेबे यीशुए तिनारे खे बोलेया, “चलो, आसे केथी नेड़े-तेड़े बस्तिया रे चलूँए, ताकि आऊँ तेती बी प्रचार करी सकूँ, कऊँकि आऊँ आई इजी खे रया।” 39 तेबे सेयो गलील प्रदेशो रे बऊत सारी जगा रे और तिनारे प्रार्थना रे कअरो रे जाई-जाई की प्रचार करदे और दुष्टात्मा खे निकयालदे रओ थे। 40 तेबे एक कोदिए यीशुए गे आई की बिनती कित्ती और तिनारे सामणे कूटणे टेकी की तिनारे खे बोलेया, “जे तुसे चाओ, तो माखे ठीक करी सकीए।” 41 तेबे यीशुए तेस पाँदे तरस खाई की आपणा आथ आगे कित्तेया और तेसखे छुँई की बोलेया, “आऊँ चाऊँआ कि तूँ ठीक ऊई जाए।” 42 तेबे तेबुई तेसरा कोद निकली गा और से ठीक ऊईगा। 43 तेबे यीशुए सावधान करी की से तेथारे ते फटाफट पेजी ता। 44 और तेसखे बोलेया, “देख, केसी गे नि बताणा, पर जाई की आपू खे पुरोईतो गे दखा और आपणे ठीक ऊणे रे बारे रे जो कुछ मूसे नबीए चढ़ावा ठराई राखेया, तेस चढ़ा, ताकि लोका बीचे तेरी गवाई ओ कि तूँ ठीक ऊईगा।” 45 और से बारे जाई की एसा गल्ला रा बऊत प्रचार करने लगेया और एसा गल्ला खे एथो तक फैलाणे लगेया कि यीशु फेर नगरो रे खुल्लमखुल्ले नि जाई सके, पर सेयो सुणसाण जगा रे रए, पर तेती बी लोक चऊँ कनारे ते तिनारे गे आऊँदे रये।

2 कुछ दिना ते बाद यीशु फेर कफरनहूम नगरो खे आए और सुणने बीचे आया कि सेयो कअरे ए। 2 तेबे इतणे लोक कट्टे ऊईगे कि द्वारो पाँदे बी खड़ने खे जगा नि रई और यीशु तिनारे खे वचन सुणाणे लगी रे थे। 3 तेबे लोक एक अदरंगो रे रोगिए खे चार माणूआ ते चकाई की तिनारे गे ली आए। 4 पर जेबे सेयो पीड़ा रिया बजअ ते यीशुए गे नि पऊँछी सके, तेबे तिने से छत जेते निठे यीशु थे, खोली ता और जेबे सेयो तेस पटी चुके, तेबे से मांजा जेते पाँदे अदरंगो रा रोगी पड़ी रा था, यीशुए रे सामणे त्वारेया। 5 यीशुए तिनारे विश्वास देखी की तेस अदरंगो रे रोगिए खे बोलेया, “ओ पाऊआ, तेरे पाप माफ ऊईगे।” 6 तेबे कुछ शास्त्री जो तेती बैठी रे थे, आपणे-आपणे मनो रे सोचणे लगे, 7 “ये माणू कऊँ एड़ा बोलीओ? ये तो परमेश्वरों री निन्दा करने लगी रा। परमेश्वरों खे छाडी की ओर कूण पाप माफ करी सकीओ?” 8 यीशुए तेबुई आपणी आत्मा रे जाणी ला कि सेयो आपणे मनो रे एड़ा लगी रे सोचणे तेबे तिने तिनारे खे बोलेया, “तुसे आपणे-आपणे मनो रे एड़ा बिचार कऊँ करने लगी रे? 9 ये बोलणा बऊत आसान ए कि तेरे पाप माफ ऊईगे पर ये बोलणा बऊत कठण ए कि आपणा मांजा चुकी की चल फिर। 10 इजी री खातर तुसे जाणी लओ कि मां माणू रे पुत्रो खे तरतिया पाँदे पाप माफ करने रा बी अवक ए।” यीशुए तेस अदरंगो रे रोगिए खे बोलेया, 11 “आऊँ ताखे बोळूँआ कि उठ! आपणा मांजा चुकी की आपणे कअरो खे चली जा” 12 से उठेया और तेबु आपणा मांजा चुकी की सबी रे सामणे ते निकली की चली गा। तेबे सब हैरान ऊईगे और परमेश्वरों री तारीफ करी की बोलणे लगे, “आसे एड़ा कदी पनि देखेया।” 13 यीशु तेथारे ते निकली कि समुद्रो रे कनारे चली गे और सारी पीड़ तिनारे गे आईगी, तेबे सेयो तिनारे खे उपदेश देणे लगे। 14 तेबे जांदे ऊए तिने हलफइसो रा पाऊ लेवी चुंगी लणे री चौकिया पाँदे बैठे रा देखेया और तेसखे बोलेया, “मां पीछे आओ” और से उठी की तिनारे पीछे चली पड़ेया। 15 जेबे यीशु लेवीए रे कअरे रोटी खाणे

बैठया, तेबे बऊत चुंगी लणे वाले और पापी, यीशु और तेसरे चेलैया साथे रोटी खाणे बैठे, और सेयो बऊत थे जो तिना पीछे आईगे थे। 16 शास्त्रिए और फरीसिये ये देखी खे की ये तो पापिया और चुंगी लणे वालेया साथे रोटी खाणे लगी रा, तेसरे चेलैया खे बोलेया, “ये तो चुंगी लणे वाले और पापिया साथे कऊँ खाओ पीओआ?” 17 यीशुए ये सुणी की तिना खे बोलेया, “जो पले चंगे ए, तिना खे बैदो री जरूरत नि ऊँदी, पर बमारा खे ओई। आऊँ एडेया लोका खे बुलाणे नि आई रा जो सोचोए कि आऊँ तर्मी ए, पर आऊँ पापिया खे बुलाणे और तिना रा उद्धार करने आई रा।” 18 बपतिस्मा देणे वाले यूहन्ने रे चले और फरीसी बअरत करोए। तेबे कुछ लोक यीशुए गे आये और पूछेया, “यूहन्ने रे चले और फरीसी बअरत राखोए, पर तेरे चले कऊँ बअरत नि करदे?” 19 यीशुए तिना खे बोलेया, “जदुओ तक लाड़ा बरातिया साथे रओआ, क्या सेयो बअरत करी सकोए? ना, जदुओ तक लाड़ा तिना साथे ए, तदुओ तक सेयो बअरत नि करी सकदे। 20 पर, सेयो दिन आऊणे, जेबे लाड़ा बरातिया ते लग करेया जाणा, तेस बखते तिना बअरत करना। 21 “नये कपडे री टाली, पुराणे टालेया रे कोई नि लगांदा, कऊँकि टाली पुराणे टालेया खे ओर बी कट्टा करी देओ ई, मतलब-नया टाला पुराणे साथे ओर बी जादा फटी जाओआ। 22 नया अँगूरा रा रस पुराणे खल्लडुआ रे कोई नि पदा, नई तो अँगूरा रा रस फैली जाणा और तेस खल्लडुआ रे कोई नि पदा, नये खल्लडुआ रे परेया जाओआ।” 23 एडा ऊआ कि यीशु और तिना रे चले आरामो रे दिने डोरूआ रिये जाणे लगी रे थे और तिना रे चले जांदि ऊए सिल्ले तोड़ने लगे। 24 तेबे फरीसिये ये देखी की यीशुए खे बोलेया, “तेरे चले आरामो रे दिने एडा काम कऊँ लगी रे करने? क्या इना खे एडा करना बिधानो रे मुताबिक खरा ए?” 25 यीशुए तिना खे बोलेया, “क्या तुसे पढ़ी नि राखेया कि जेबे दाऊदो खे जरूरत पड़ी और जेबे तेसखे और तेसरे साथिया खे पूख लगी, तेबे तिने क्या कित्तेया था? 26 तिने कियँ अबियातार प्रदान पुरोईतो रे बखते परमेशरो रे भवनो रे जाई की पेंटा रिया रोटिया खाईया, बिधानो रे मुताबिक पुरोईतो खे छाडी की ओर केसी खे बी खाणा ठीक निए और आपणे साथिया खे बी दित्तिया।” 27 यीशुए तिना खे बोलेया, “आरामो रा दिन माणूआ खे बणाई राखेया, माणू आरामो खे निए बणाए रे। 28 तेबेई तो आऊँ माणू रा पुत्र आरामो रे दिनो रा बी प्रभु ए।”

3 यीशु प्रार्थना रे कअरो रे फेर गए, तेबे तेती एक माणू था, जेसरा आथ सूकेया रा था। 2 तेबे कुछ फरीसी यीशुए पाँदे दोष लगाणे खे और तिना खे काणे रे चक्रो रे थे कि देखूँ कि आरामो रे दिने तेसखे ये ठीक करोआ की नयी। 3 तिने सूके रे आथो वाले माणूए खे बोलेया, “बीचे जे खड़ा ऊई जा।” 4 तेबे यीशुए फरीसिया खे बोलेया, “आरामो रे दिने बिधानो रे मुताबिक खरा करना ठीक ए या बुरा करना, प्राण बचाणा या मारना।” पर सेयो चुप रए। 5 तेबे यीशुए तिना रे मनो रे जिद्दी सबाओ ते उदास ऊई की तिना खे रोषो रे चऊँ कनारो खे देखेया और तेस माणूए खे बोलेया, “आपणा आथ आगे कर” तिने आगे कित्तेया और तेसरा आथ ठीक ऊईगा। 6 तेबे फरीसी बारे गए और हेरोदेसो खे समर्थन देणे वाले यहूदिया साथे मिली की तिना रे खलाफ योजना बणाई कि तिना खे कियँ नाश करिए? 7 यीशु आपणे चेलैया साथे समुद्रो रे कनारे चली गे और गलील प्रदेश ते एक बड़ी पीड़ तिना पीछे आईगी। 8 तेबे तिना रे अचम्बे रे काम सुणी की यरूशलेम नगरो, यहूदिया प्रदेश, इद्रुमिया प्रदेश और यरदन नदिया रे पारो ते सूर और सैदा नगरो रे नेडे ते एक बड़ी पीड़ तिना गे आई। 9 तेबे यीशुए आपणे चेलैया खे बोलेया, “पीड़ मुखती ए, एडा नि ओ केथी आऊँ दबी जाऊँ, तो तुसे माखे एक किस्ती तयार करी दो।” 10 कऊँकि तिने बऊत ठीक कित्ते थे, तेबे जितणे लोका खे बमारिया थिया, सेयो तिना खे छुणे री खातर तिना पाँदे टूटी पडो थे। 11 दुष्टात्मा बी, जेबे यीशुए खे देखो थिया, तो सेयो तिना रे सामणे रूडी जाओ थिया; और चींगी की बोलो थिया, “तू परमेशरो रा पुत्र ए।” 12 यीशुए दुष्टात्मा बऊत सावधान कित्तिया कि केसी गे मेरे बारे रे नि

बताणा, “आऊँ परमेशरो रा पुत्र ए।” 13 इजी ते बाद यीशु पाहडो पाँदे चली गे, और जिना खे से चाओ थे, सेयो आपू गे बुलाए और सेयो तिना गे चली गे। 14 तेबे यीशुए बारा मर्दा खे प्रेरितार री पदवी दित्ती ताकि सेयो तिना साथे-साथे रओ और तिना खे प्रचार करने खे पेजो। 15 और तिना खे दुष्टात्मा खे निकयालने रा अक्क ओ। 16 और सेयो यो ए, शमौन जेसरा नाओ यीशुए पतरस राखेया। 17 जब्दिए रे पाऊ याकूब और तेसरा पाई यूहन्ना, जिना रा नाओ तिने बूनरगिस, मतलब, गर्जणो रे पाऊ राखेया। 18 और अन्द्रियास, फिलिप्पुस, बरतुल्मे, मत्ती, थोमा, हलफईसो रा पाऊ याकूब, तदै और दूजा शमौन कनानी, देशभक्त तेते समूह रा सदस्य था जो रोमी सरकारा रे खलाफ थे। 19 और यहूदा इस्करियोती, जिने यीशु बादो ते तोखे ते पकड़वाए बी थे। 20 तेबे यीशु और तिना रे चले कअरे आए और तिना गे फेर इतणी पीड़ कट्टी ऊईगी कि सेयो रोटी पनि खाई सके। 21 जेबे तिना रे टबरो वालेया ये सुणेया, तो सेयो तिना खे पकड़ने खे निकले, कऊँकि तिना रा मानणा था कि एसरा दमाक ठकाणे निए। 22 जो शास्त्री यरूशलेम नगरो ते आए थे सेयो बोलो थे, “एसरे शैतान ए,” और “ये दुष्टात्मा रे सरदारो री मतादा साथे दुष्टात्मा खे निकयालोआ।” 23 तेबे यीशु तिना खे नेडे बुलाई की तिना ते उदारणो रे बोलणे लगे, “शैतान आपणे आपू खे ओर आपणी दुष्टात्मा खे कियँ निकयाली सकोआ? 24 और जे केसी राज्य रे फूट पड़ी जाओ तो, से राज्य कियँ खड़ा रई सकोआ? 25 और केसी रे कअरे फूट पड़ी जाओ तो, से कअर कियँ बणेया रा रई सकोआ? 26 और जे शैतान आपणेया रा ई बैरी बणी जाओगा, तो, से कियँ बणेया रा रई सकोआ? तेसरा तो अन्त ई ऊई जाणा। 27 “पर कोई माणू केसी तागतबरो रे कअरे कूसी की, तेसरा माल कियँ लूटी सकोआ? जदुओ तक से तेसखे बानी नि लओगा और तिजी ते बाद ई से तेसरा माल लूटी सकोआ। 28 “आऊँ तुसा खे सच लगी रा बोलणे कि माणूए रे सारे पाप और निन्दा जो से करोआ, माफ ऊई जाणे। 29 पर जो पवित्र आत्मा री निन्दा करोआ, तेसखे कदी बी माफी नि मिलणी, और से अनन्त पापो रा अपराधी ऊई जाओ आ।” (aiōn g165, aiōnios g166) 30 यीशुए ये तेबे बोलेया कऊँकि सेयो ईयाँ बोलो थे, “एसरे दुष्टात्मा ए।” 31 तेबे यीशुए री आम्मा और तेसरे पाई आए और तेबे तिने बारे खड़ी की तिना खे सन्देशा पेजेया। 32 यीशुए रे नेडे पीड़ थी बैठी री, तेबे तिने यीशुए खे बोलेया, “देख, तुसरा री आम्मा और पाई और बईण तुसा ते मिलणा चाओए।” 33 यीशुए तिना खे बोलेया, “मेरी आम्मा और पाई कूणो?” 34 तेबे तिने, जो तिना रे नेडे थे बैठे रे, तिना खे देखेया और बोलेया, “देखो, मेरी आम्मा और पाई यो ईए। 35 कऊँकि जो परमेशरो री इच्छा पाँदे चलोआ, सेई मेरे पाई, बईण और आम्मा ए।”

4 यीशु फेर समुद्रो रे कनारे उपदेश देणे लगे, तेबे लोका री इतणी बड़ी पीड़ तेती कट्टी ऊईगी कि सेयो समुद्रो रे एक किस्तरिया रे बैठीगे और लोक कनारे पाँदे खडे रे रये। 2 तेबे से उदारणो रे तिना खे बऊत गल्ला सिखाणे लगे और उपदेशो रे तिना खे बोलणे लगेया, 3 “सुणो! देखो, एक बेजा बाणे वाला, बेजा बाणे निकलेया। 4 तेबे कुछ बिऊ बाँदे बखते बाटा रे छूटी गे और सेयो पछिए चुगी ले। 5 कुछ बिऊ सापडी पाँदे छूटी गे और तेती जादा माट्टी ना ऊणे री बजअ ते सेयो चट-चट जम्मी गे 6 और जेबे सूरज निकलेया तो तूपा रे फूकी गे और जड़ ना पकड़ने री बजअ ते सूकी गे। 7 तेबे कुछ बिऊ जाडो रे छूटी गे और जाड बड़ी गा और सेयो दबी गे और तिना रे कोई फल नि लगेया। 8 पर कुछ बिऊ अच्छी जमीना पाँदे छूटे और सेयो जम्मी गे और बड़े ऊई की फल ल्याए, कोई तीड़ गुणा, कोई साठ गुणा और कोई सौ गुणा।” 9 तेबे तिने बोलेया, “जो समजी सकोआ से तिजी खे त्यानो साथे सुणो और मानी बी लओ।” 10 जेबे यीशु आपणे बारा चेलैया और कुछ साथिया साथे कल्ले थे तेबे तिने यीशुए ते इना उदारणा रे बारे रे पूछेया। 11 यीशुए तिना खे बोलेया, “तुसा खे तो परमेशरो रे राज्य रे पेतो री समज दित्ती रिये, पर बाकि लोका खे उदारणा रेई सारिया गल्ला बोलणिणा पडोईया। 12

कड़कि “सेयो देखोए, पर तिना खे सुजदा नि, सेयो सुणदे ऊए तो सुणोए, पर समजदे नि, एडा नि ओ केथी तिना रा मन फिरी जाओ और तिना रे पाप माफ ऊई जाओ।” 13 तेबे यीशुए तिना खे बोलेया, “अगर तुसे एस उदारणो खे नि समजदे? तो तुसा ओर क्या उदारण समजणे 14 बाणे वाला परमेशरो रा वचन लगी रा बाणे। 15 जो बिऊ बाटा रे छूटे थे, सेयो ये लोक ए जिने परमेशरो रा वचन सुणोया, पर शैतान तिना खे फटाफट जो तिने सुणी राखेया था, चोरी की लई जाओआ। 16 तियाँ ई जो सापडी पाँदली जमीना पाँदे बाए जाओए, सेयो ये लोक ए जो परमेशरो रा वचन सुणी की खुशी-खुशी मानी लओए। 17 पर सेयो लोक तिना छोटी जी डालिया जेड़े जो जड़ ना राखणे री बजअ ते सेयो थोड़े ई दिना खे ओईया; जेबे वचनो री बजअ ते तिना पाँदे क्लेश या उपद्रव ओए, तो सेयो चट ई ठोकर खाई लओए 18 और जो जाड़ो रे बाए थे, सेयो ये लोक ए, जिने परमेशरो रा वचन सुणोया, 19 पर दुनिया री चिन्ता, पैसे रा तोखा और कई चीजा रा लोब तिना रे बसी की वचनो खे दबाई देओआ और से निष्फल रई जाओआ। (aiōn g165) 20 जो अच्छी जमीना रे बाए थे, सेयो यो लोक ए, जो परमेशरो रा वचन सुणी की मानी लओए और आत्मिक फल ल्याओ ए, कोई तीड़ गुणा, कोई साठ गुणा और कोई सौ गुणा।” 21 तेबे यीशुए तिना खे बोलेया, “व्या दिऊए खे इजी री खतर ल्याओ कि टोकरूप या माँजे निरे राखो? क्या इजी री खतर नि कि फटिया पाँदे राखो? 22 कऊँकि कोई बी चीज छिपी नि सकदी; पर सामणे आओई ना कुछ गुप्त ए, पर सामणे आई जाओआ। 23 जो समजी सकोआ से तिजी खे त्यानो साथे सुणो और मानी बी लओ।” 24 तेबे यीशुए तिना खे बोलेया, “चौकस रओ कि क्या लगी रे सुणने? जेते नापे की तुसे नापोए, तिजी नापो साथे तुसा खे बी नापेया जाणा और तुसा खे जादा देणा। 25 जो मेरा वचन सुणोआ तेसखे ओर बी अक्ल दिती जाणी, पर जो मेरा वचन नि सुणदा, तेसते से बी जो तेसगे आए लई लणा।” 26 तेबे यीशुए बोलेया, “परमेशरो रा राज्य एडा ए, जियाँ कोई माणू डोरूआ रे बीज सेतोआ 27 और ये जिम्मीदार राती सओआ, दिने जागोआ और सेयो बिऊ एड़े जम्मोए और बड़ोए कि तेसखे पता ई नि लगदा। 28 तरती आपू फल ल्याओ ई पईले लुंग तेबे सिल्ले और तेबे सिल्लेया रे त्यार दाँणा। 29 पर जेबे दाँणा पाक्की जाओआ, तेबे ये जिम्मीदार फटाफट दराटी लगाओआ, कऊँकि बाडणे रा बखत ऊई जाओआ।” 30 तेबे यीशुए बोलेया, “आसे परमेशरो रे राज्य री तुलना किजी साथे करिए और केस उदारणो साथे परमेशरो रे राज्य रे बारे रे बताईए? 31 परमेशरो रा राज्य अऊरिया रे दाणे जेडा ए कि जेबे जमीना रे बाओए, तेबे सबी दाणेया ते छोटा ओआ। 32 पर जेबे से जम्मोआ, तेबे सबी सागो-पातो ते बडा ऊई जाओआ और तिजी रिया इतणिया बडिया डालिया निकलोईया कि सर्गो रे पंछी तिजी री छायाँ रे बसेरा करी सकोए।” 33 यीशु एड़े बऊत उदारण देई की तिना रे समजणे रे मुताबिक तिना खे परमेशरो रा वचन सुणाओ थे 34 और सब कुछ उदारणो साथे बोले थे, पर सेयो कल्ले जे आपणे चलेया खे बुलाओ थे और हर उदारणा रा मतलब समजयाओ थे। 35 तेसी दिने जेबे साँज ऊई, तेबे यीशुए चलेया खे बोलेया, “आओ, आसे समुद्रो ते पार चल्लौ।” 36 तेबे चले पीडा खे छाडी की तेते किस्तिया रे गए, जेते किस्तिया रे यीशु पईले तेई बैठे रे थे और सेयो यीशुए खे लई की पार चली गे और तिना साथे ओर बी किस्तिया थिया। 37 तेबे बऊत बडा पारी तूफान आया और लईरा एडिया आईया कि किस्ती पाणिए साथे फरने वाली थी। 38 यीशु पीछे गदिया पाँदे सरुणे लगी रे थे, तेबे चलेया यीशुए खे जगाई की बोलेया, “ओ गुरु! क्या तुसा खे फिकर निए कि आसे डूबणे वाले ए?” 39 तेबे यीशु उठी की तूफानो खे बके और पाणिए खे बोलेया, “शान्त रओ और रूकी जा!” और तूफान रूकी गा, तेबे बाणै शान्ति ऊईगी। 40 तेबे यीशुए चलेया खे बोलेया, “तुसे कऊँ डरोए? क्या तुसा खे एबुए तक विश्वास निए?” 41 तेबे चले बऊत डरी गे और आपू बीचे बोलणे लगे, “ये कूणे, जो न केवल दुष्टात्मा बल्कि तूफान और पाणी बी एसरी आज्ञा खे मानोए?”

5 तेबे यीशु और तिना रे चले गलीली समुद्रो ते पार गिरासेनियो रे प्रदेशो रे पऊँछी गे। 2 जेबे यीशु किस्तिया ते उतरे, तेबे तेबुई एक माणू, जेसरे दुष्टात्मा थी, कब्रा ते निकली की तिना खे मिलेया। 3 से कब्रिस्तानो रे रओ था और बऊत ई हुडुंग मचाणे वाला था। तेसखे कोई बी एबुए तक साँगलो रे बानी की नि राखी सको था। 4 कऊँकि से कई बार बेडिये की ओर साँगलो साथे बानेया, पर तिने साँगल तोडी ते और बेडिया रे टुकड़े-टुकड़े करी ते, तेसखे कोई बी वशो रे नि करी सको था। 5 से रात-दिन कब्रिस्तानो रे और पाहडो रे चींगदा रओ था और आपू खे पात्थरो साथे काईल करदा रओ था। 6 से यीशुए खे देखी की दूरो तेई दौडी गा और तिने तिना गे माथा टेकेया। 7 तेबे तिने ऊच्ची आवाजा रे चींगी की बोलेया, “ओ यीशु परमप्रदान परमेशरो रे पुत्र! माखे तांते क्या काम? आऊँ ताखे परमेशरो री कसम देऊँआ कि माखे दुःखी न कर।” 8 कऊँकि तिने तेसखे बोलेया था, “ओ दुष्टात्मा, एस माणूए ते निकली जा।” 9 यीशुए तेसते पूछेया, “तेरा नाओं क्या ए?” दुष्टात्मे बोलेया, “सेना कऊँकि आसे बऊत सारे ए।” 10 तेबे तिने तिना ते बऊत बिनती किती, “आसा खे एसा जगा ते बारे नि पेज।” 11 तेती पाहडो पाँदे सूंअरो रा एक चूण्ड चरने लगी रा था। 12 तेबे दुष्टात्मा यीशुए ते बिनती किती, “आसा खे इना सूंअरा बीचे पेजे। ते, ताकि आसे इना रे पीतरे चली जाऊँ।” 13 तेबे यीशुए तिना खे आज्ञा दिती, “ओ दुष्टात्मा निकली और सूंअरा रे चूण्डा रे समाई गी। जो दो हजारा रा था। तेबे से काअडी पाँदो ते छवाल खाई की समुद्रो रे पडी गा और डूबी की मरी गा। 14 तेबे तिना खे चराणे वालेया दौडी की गांव और शईरो रे खबर दिती और जो ऊआ था लोक तेस देखणे आए। 15 यीशुए गे आई की सेयो, जेसरे दुष्टात्मा थी, मतलब-जेसरे सेना समाई री थी, से बिल्कुल ओशा रे और टाले पईनी की बैठे रा देखेया, और डरी गे। 16 एस आदसे खे देखणे वालेया, तेसरा, जेसरे दुष्टात्मा थी और सूंअरा रा पूरा आल तिना खे सुणाया। 17 तेबे सेयो यीशुए ते बिनती करने लगे, “म्हारे बन्ने ते चली जाओ।” 18 जेबे यीशु किस्तिया रे चढ़ने लगे और जेसरे दुष्टात्मा थी, तिने बोलेया, “माखे बी आपू साथे आऊणे दे। 19 पर यीशुए तेसखे ना करी ती और तेसखे बोलेया कि आपणे कअरो खे वापस चली जा और लोका खे बता कि ताँ पाँदे प्रभुए केडी दया किती और तेरी तई कितणे बड़े काम किने।” 20 तेबे से दिकापुलिस प्रदेशो खे गया और इना गल्ला रा प्रचार करने लगेया, “यीशुए मेरिया तई कितणे बड़े काम किने।” ये सुणी की सब लोक हैरान उई गे। 21 जेबे यीशु किस्तिया रे वारले कनारे आए और समुद्रो रे कनारे पऊँछी गे तेबे एक बडी पारी पीड तिना गे कट्टी ऊईगी। 22 तेबे याईर नाओं रे प्रार्थना रे कअरो रे सरदारा बीचा ते एक तेती आया और यीशुए खे देखी की तिना रे पैरो पाँदे पडी गा। 23 तेबे तिने बिनती किती और बोलेया, “मेरी छोटी बेटी मरने वाली ए, तुसे मेरे कअरे आई की तेसा पाँदे आथ राखो, ताकि से ठीक ऊई जाओ और जिऊँदी रओ।” 24 तेबे यीशु तेस साथे चली गे, और एक बडी पारी पीड बी तिना साथे आईगी, एथो तक की लोक तिना पाँदे रूडी जाओ थे। 25 तेबे एक जवाणस जो तेसा पीडा रे थी, जेसा खे बारा साला ते खून बड़णे री बमारी थी 26 और से आपू खे ठीक ऊणे री तई कई बेदा गे माई और आपणा सब कुछ खर्च करी ता, पर से ओर बी बमार ऊईगी और कुछ फाईदा नि ऊआ। 27 यीशुए रे बारे रे सुणी की से पीडा ते पीछे ते आई और तिना रे टाले छूँए। 28 कऊँकि से बोले थी, “जे आऊँ तिना रे टाले ई छूँई लऊँगी, तो ठीक ऊई जाणी।” 29 और तेबुई तेसा रा खून बड़णा बंद ऊईगा और तेसे आपणे शरीरो ते जाणी ला कि मेरी बमारी ठीक ऊईगी। 30 यीशुए तेबुई आपू रे जाणी ला, “मांते सामर्थ निकली री।” तेबे तिने पीडा रे पीछे मुडी की पूछेया, “मेरे टाले किने छूँए?” 31 तिना रे चलेया तिना खे बोलेया, “तुसा खे पता तो आए कि इतणी पीड तुसा पाँदे पडी री और तुसे बोलोए, ‘आऊँ किने छूँया?’” 32 तेबे यीशु ये देखणे री तई, “आऊँ किने छूँया?” सेयो चऊँ कनारे देखणे लगे। 33 तेबे से जवाणस ये जाणी गी कि मां साथे केडी पलाई ऊई री, से डरदी और थरथरांदी ऊई आई और यीशुए रे पैरा पाँदे पडी गी और तेसे सारा आल सच-सच तिना खे सुणाया। 34 यीशुए तेसा खे बोलेया,

“बेटिये, तेरे विश्वास से तू ठीक कित्ती। बेफिकर ऊई की जा और आपणी एसा बमारिया ते बची री रओ।” 35 यीशु ये बोलणे ई लगी रे थे कि प्रार्थना रे कअरो रे सरदारो रे कअरो ते कुछ लोक आए और बोलेया, “तेरी मुन्नी मरी गी। एवे गुरूओ खे कष्ट कऊँ लगी रा देणे?” 36 जो गल्ल सेयो करने लगी रे थे, से यीशुए अणसुणी करी की प्रार्थना रे कअरो रे सरदारो खे बोलेया, “डर नि; बस विश्वास राख।” 37 तेबे यीशुए पतरस, याकूब और तेसरा पाई यूहन्ने खे छाडी की कोई बी आपू साथे आऊणे नि दित्तेया। 38 तेबे प्रार्थना रे कअरो रे सरदारो रे कअरे पऊँछी की तिने लोक रोदे ऊए और राड़िया देदे ऊए देखे। 39 तेबे यीशुए पीतरे जाई की तिना खे बोलेया, “तुसे रोणे और राड़िया कऊँ लगी रे देणे? तेरी मुन्नी मरी नि रई, पर सऊणे लगी री।” 40 सेयो ये गल्ल सुणी की यीशुए रा मजाक लगे ऊड़ाणे, पर तिने सब जणे बारे निकयाली की मुन्निया रे माए-बाओ और आपणे तीनी चेलेया साथे पितरे गया, जेती मुन्नी थी पड़ी री। 41 तेबे तिने मुन्निया रा आथ पकड़ी की तेसा खे बोलेया, “तलीता कूमी!” मतलब “ओ मुन्निए आऊँ ताखे बोलूँआ कि उठ।” 42 तेबे मुन्नी उठी और फटाफट चलणे-फिरने लगी। से बारा साला री थी। ये देखी की सारे लोक बऊत हैरान रई गे। 43 तेबे तिने तिना खे सावधान करी की बोलेया, “ये गल्ल केसी गे नि बोलणी और एसा मुन्निया खे कुछ खाणे खे देओ।”

6 यीशु कफरनहूमो ते निकली की आपणे नगर नासरतो खे आए और तिना रे चले बी तिना साथे आए। 2 आरामो रे दिने सेयो प्रार्थना रे कअरो रे उपदेश देणे लगे, उपदेश सुणी की लोक हैरान ऊईगे और बोलणे लगे, “यो गल्ला एसखे कियँ ए पता? और ये कुण जा ज्ञान ए, जो एसखे देई राखेया? और एसरे आथो साथे यो सामर्थे रे काम कियँ ओए?” 3 आसे जाणुए कि ये लकड़िया रा मिस्त्री ए, जो मरियमो रा पाऊ ए और याकूब, योसेस, यहूदा और शमोनो रा पाई ए और क्या एसरिया बईणी आसा बीचे ई नि रंदिया?” इजी बजअ ते तिने तेसखे अपनाणे ते न कित्ती। 4 यीशुए तिना खे बोलेया, “भविष्यबक्ता रा आपणे इलाके रे, आपणे टब्बर और आपणे कअरो खे छाडी की ओरथी सारी जगा आदर ओआ।” 5 तेबे सेयो नासरत नगरो रे बऊत सामर्थे रे काम नि करी सके, बस तिने कुछ बमारा पाँदे आथ राखी की सेयो ठीक कित्ते। 6 तेबे सेयो, तिना रा अविश्वास देखी की हैरान ऊईगे, और तेबे सेयो गांव रे चऊँ कनारे कूमदे ऊए उपदेश देणे लगे। 7 तेबे यीशुए बारा चले बुलाई की दो-दो करी की पेजे और तिना खे दुष्टात्मा खे निकयालने रा अक्क दित्तेया। 8 तेबे यीशुए तिना खे आज्ञा दित्ती, “बाटा खे आपू साथे डण्डा छाडी की ओर कुछ नि लणा; ना रोटी, ना चोली और ना बटुए रे पैसे। 9 पर जोड़े पईनो, और आपू साथे दो जोड़ी टाल्ले नि राखो।” 10 तेबे तिने तिना खे बोलेया, “जेबे तुसे केसी नगरो रे जाओ और कोई तुसा खे आपणे कअरे बुलाओ, तो जदुओ तक तुसे तेस इलाके ते चली नि जाओ, तदुओ तक तेस ई कअरो रे रओ। 11 जेते जगा रे लोक तुसा खे नि मानो और तुसा री नि सुणो, तो तेथा ते चलदे बणो और आपणे पैरा री तूड तेथी चाड़ी देओ, ताकि तिना रे खलाफ सबूत ओ।” 12 तेबे चेलेया जाई की प्रचार कित्तेया, “मन फिराओ।” 13 तिने बऊत दुष्टात्मा निकयालिया और बऊत बमार तेल मली की ठीक कित्ते। 14 तेबे हेरोदेस राजे यीशुए रे बारे रे सुणेया, कऊँकि तिना रा नाओं बऊत फैली गा था। तेबे कुछ लोक ईयां बोली थे, “यूहन्ना बपतिस्मा देणे वाला मरे रेया बीचा ते जिऊँदा उई गा रा, तेबेई तो तेसते यो सामर्थे रे काम ओए।” 15 तेबे कुछ जणे बोलेया, “ये तो एलिय्याह ए”, कुछ जणे बोलेया, “भविष्यबक्तेया बीचा ते कोई एक ए।” 16 हेरोदेसे राजे ये सुणी की बोलेया, “जेस यूहन्ने रा सिर मं बडवाया था, ये सेई जिऊँदा ऊईगा रा।” 17 कऊँकि हेरोदेसे आपणे पाई फिलिप्पुसो री लाडी हेरोदियासा री बजअ ते, जेसा साथे तिने व्या कित्तेया था, लोका खे पेजी की यूहन्ना पकड़वाया और जेला रे पाईता था। 18 कऊँकि यूहन्ने हेरोदेसो खे बोलेया था, “आपणे पाईए री लाडी राखणा ताखे खरी गल्ल निए।” 19 तेबेई तो हेरोदियास यूहन्ने साथे दुश्मणी राखो थी और ये चाओ

थी कि एसखे कुलवाई देऊँ, पर एडा नि ऊई सकेया। 20 कऊँकि हेरोदेस यूहन्ने खे तर्मी और पवित्र माणू मानो था और तेसते डरो था और तेसखे बचाए रे राखो था और तेसरी सुणी की बऊत कबराओ था, पर बऊत खुश ओ था। 21 तेबे ठीक मोके पाँदे, जेबे हेरोदेसो रा जन्मदिन था, तेबे तिने आपणे प्रदाना खे, सेनापतिया और गलीलो रे बडे लोका खे पाटी राखी। 22 तेबे हेरोदियासा री मुन्नी पीतरे आई और नाचणे लगी, तेसा रा नाच देखी की हेरोदेस और तेस साथे बैठणे वाले खुश ऊईगे। तेबे हेरोदेस राजे तेसा खे बोलेया, “माँग, जो ताखे चाईयो, मां ताखे देणा।” 23 और तिने कसम खाई, “आदे राज्य तक, जो तूँ मांगेगी, मां ताखे देणा।” 24 तेसे बारे जाई की आपणी आम्मा ते पूछेया, “आऊँ क्या मांगू?” माए बोलेया, “यूहन्ना बपतिस्मा देणे वालेया रा सिर चाईयो।” 25 तेबे मुन्नी फटाफट राजे गे पितरे आई और तेसते बिनती करी की बोलेया, “आऊँ चाऊँई कि तूँ एबु यूहन्ना बपतिस्मा देणे वाले रा सिर एक थालिया रे माखे मंगवाई दे।” 26 तेबे हेरोदेस राजा बऊत उदास ऊईगा, पर आपणी कसमा री बजअ ते और आपू साथे बैठे रे लोका री बजअ ते, से तेसा री गल्ल टाली नि सकेया। 27 तेबे राजे तेबुई एक जलाद पेजेया और तेसखे आज्ञा दित्ती कि तेसरा सिर बाडी की ल्याओ। 28 तेबे तिने जेला रे जाओ की तेसरा सिर बाडेया और एक थालिया रे पाई की ल्याया और हेरोदियासा री मुन्निया खे दित्तेया, और मुन्निए आपणी आम्मा खे दित्तेया। 29 ये बुरी खबर सुणी की यूहन्ना रे चले आए और तेसरी लोथ चकी की कबरा रे राखी। 30 जेबे बारा प्रेरित जो यीशुए दुष्टात्माओं खे निकालने रा अक्क देई की दो-दो करी की पेजे थे वापस आए तो जो कुछ तिने कित्तेया और जो सिखाई राखेया था, सब तिना गे बताया। 31 यीशुए चेलेया खे बोलेया, “तुसे आपू बी केथी जंगलो रे जाई की आराम करी लो।” तिने ये इजी खे बोलेया था, कऊँकि बऊत लोक आओ थे और तिना खे रोटी खाणे खे बी बखत नि मिलो था। 32 तेबे यीशु और तिना रे चले किस्तिया रे चढ़ी की, सुणसाण जगा रे चली गे। 33 तेबे बऊत जणेया यीशु और तिना रे चले जाँदे ऊए देखी ले और तेबे सब नगरो रे लोक कट्टे ऊई की पैदल ई दौड़ी गे और तिना ते पड़ले तेती पऊँछी गे। 34 तेबे तिने किस्तिया ते उतरी की एक बड़ी पीड़ देखी और तिना खे तेसा पीड़ा पाँदे तरस आया, कऊँकि सेयो तिना पेडा जेडे थे, जिना रा कोई रखवाला नि ऊँदा। तेबे यीशु तिना खे बऊत गल्ला सिखाणे लगे। 35 जेबे साँज ऊणे वाली थी, तेबे तिना रे चले तिना खे बोलणे लगे, “ये सुणसाण जगा ए और दिन बऊत चढ़ी गा रा। 36 एबे इना खे बिदा करी देयो, ताकि यो गांव, और बस्तिया रे जाई की आपू खे खाणे खे कुछ खरीदी सको।” 37 यीशुए तिना खे बोलेया, “तुसेई इना खे खाणे खे देयो।” चेलेया बोलेया, “क्या आसे इना खे दो सौ चाँदिए रे सिक्केया रे मोलो रे बराबर (मतलब दो सौ दिनो री मजदूरिया रे बराबर ए) रोटिया खरीदी लईये और इना खे खुलाईए?” 38 यीशुए तिना खे बोलेया, “जाओ और देखो तुसा गे कितगिया रोटिया ए?” तिने पता करी की बोलेया, “पाँज रोटिया और दो मछलिया ए।” 39 तेबे यीशुए चेलेया खे आज्ञा दित्ती कि सबी खे अरे काओ पाँदे बाँईठी रे बठयाली देओ। 40 सेयो सौ-सौ और पंजा-पंजा, बाँईठी रे बैठीगे। 41 तेबे यीशुए सेयो दो मछलिया और पाँज रोटिया लईया और स्वर्गो खे देखी की धन्यवाद कित्तेया और रोटिया तोड़ी-तोड़ी की आपणे चेलेया खे दित्तिया कि लोका खे बांडी देओ और सेयो मछलिया बी बाँडिया। 42 तेबे सब खाई की रजी गे। 43 और तेबे तिने बचे रे टुकड़ेया रिया बारा टोकरिया परी की चकिया और कुछ मछलिया बी थिया। 44 तिने रोटिया खाईया, तिना बीचे जादातर पाँज हजार तो मर्द थे। 45 तेबे यीशुए तेबुई आपणे चले किस्तिया रे चढ़ाए, ताकि सेयो तिना ते पईले, पार बैतसैदा नगरो खे चली जाओ, जदुओ तक की सेयो लोका खे बिदा करोए। 46 तेबे से पीड़ा खे बिदा करी की पाहडो पाँदे प्रार्थना करने खे गए। 47 जेबे साँज ऊई, तेबे चेलेया री किस्ती समुद्रो रे थी और यीशु कल्ले जमीना पाँदे थे। 48 यीशुए देखेया कि तिना रे चले बड़ी मुश्कला साथे चप्पू चलाँदे-चलाँदे ऊए कबराणे लगी रे, कऊँकि अवा तिना रे खलाफ थी, तेबे सेयो राथियो रे चौथे पडरो रे नेडे, समुद्रो रे पाणिणिए पाँदे चली की तिना गे

आए और सेयो तिना ते आगे निकलना चाओ थे। 49 पर जियाँ ई चलेया यीशुए खे समुद्रे रे पाणिण पँदि चलदे ऊए देखी की सोचेया कि ये तो पूत ए और सब डरो रे मारे चीणणे लो। 50 कऊँकि सब तिना खे देखी की कबराईं गे थे, पर यीशुए फटाफट तिना साथे गल्ल किक्ती और बोलेया, “याओ राखो। आऊँ ए। डरो नि।” 51 तेबे सेयो तिना साथे किस्तिया रे आए और अवा रूकी गी, तिना रे चले ये देखी की हैरान ऊईगे। 52 कऊँकि सेयो एथो तक तिना रोटिया रे बारे रे नि समजे थे। और तिना रे मन कठोर ऊईगे थे। 53 तेबे यीशु और तिना रे चले गलीली समुद्रे ते उतरी की गन्नेसरत नगरो री जगा रे पऊँछे और किस्ती कनारे पँदि लगाईती। 54 जेबे सेयो किस्तिया ते उतरे, तेबे लोक तिना खे पछयाणने लगे 55 और ओरे-पोरे सारे-देशो रे दौड़े और बमारा खे माँजे पँदि लटयाली की, जेती-जेती सुणेया कि यीशु तेती ए, 56 सेयो तेथी-तेथी पऊँछी गे। और जेती केथी सेयो, गांव, नगर और बस्तिया रे जाओ थे, तेबे लोक बमारा खे बजारो रे छाडी की तिना ते बिनती करो थे कि बमारा खे बस आपणे टाले रा पल्ला ई छूणे दे। और जितणे तिना खे छूँओ थे, सेयो ठीक ऊई जाओ थे।

7 तेबे फरीसी और कई शास्त्री यीशुए गे कट्टे ऊए, जो यरूशलेम नगरो ते आए थे। 2 तेबे तिने तिना रे चले बिना आथ तोए रोटी खांदे ऊए देखे। 3 कऊँकि फरीसी और सब यहूदी बुजुर्ग रिया रवाजा पँदि चलो थे और जदुओ तक तिना री रवाजा रे मुताबिक ठीक टंगो रे आथ नि तोई लओ थे, तदुओ तक नि खाओ थे। 4 और बजारो ते आई की जदुओ तक नाई नि लओ थे, तदुओ तक नि खाओ थे और बऊत एड़िया गल्ला ए, जो सेयो मानोए-जेड़े-कटोरे, लोटे और तांबेया रे पांडे मांजणे। 5 तेबेई तो तिने फरीसिये और शास्त्रिए यीशुए ते पूछेया, “तेरे चले बुजुर्ग रिया गल्ला कऊँ नि मानदे और बिना आथ तोए रोटी खाओए?” 6 यीशुए तिना खे बोलेया, “यशयाह भविष्यबक्ते तुसा कपटिया रे बारे रे ठीक भविष्यवाणी ए किक्ती री; जेड़ा लिखी राखेया, “यो लोक मुओ ते तो मेरा आदर करोए, पर मनो ते मांते दूर ओए। 7 यो बिना मतलबो ते मेरी भक्ति करोए, कऊँकि मांणूए री आज्ञा खे यो तमो रा उपदेश करी की सिखाओए।” 8 कऊँकि तुसे परमेशरो री आज्ञा खे टाली की मांणूए री रवाजा खे मानोए।” 9 तेबे यीशुए तिना खे बोलेया, “तुसे मांणूए रे जरिए बणाई री रीति-रिवाजा खे मानणे री तई परमेशरो री आज्ञा खे कितणी चलाकिया साथे टाली देओए। 10 कऊँकि मुसे नबीए बिधानो रे बोली राखेया, ‘आपणे माया-बावा रा आदर कर’ और ‘जो कोई तिना खे बुरा बोलागा से जरूर काया जाणा।’ 11 पर तुसे बोलाओ कि जे कोई आपणे माया-बावा खे बोले, ‘जो कुछ तुसा खे मांते फाईदा ऊई सकोआ, से कुरबान ए, सब कुछ परमेशरो खे।’ क्या एड़ा बोलणा ठीक ए? 12 तो तेबे तुसे तेसखे आपणे माया-बावा री कुछ बी सेवा करने नि देंदे। 13 ईयां ई तुसे आपणी रवाजा ते, जो तुसे बणाई राखिया, परमेशरो रा वचन टाली देओए और एड़े-एड़े ई बऊत बुरे काम करोए।” 14 तेबे यीशुए लोका खे आपू गे बुलाई की बोलेया, “तुसे सब मेरी सुणो और समजो। 15 एड़ी कोई बी चीज नि ए जो मांणूआ खे बाअरा ते अशुद्ध करोई, पर जो गल्ला मांणूए रे पीतरो ते निकलोई, से मांणूआ खे अशुद्ध करोई। 16 जो समजी सकोआ से तीजी ते त्वानो साथे सुणो और मानी बी लओ।” 17 जेबे यीशु पीड़ा गे ते कअरो खे गए, तेबे तिना रे चलेया तिना ते एस उदारणो रे बारे रे पूछेया। 18 तिने तिना खे बोलेया, “क्या तुसे बी एड़े ई नासमज ए? क्या तुसे नि जाणदे कि जो रोटी मांणू खाओआ, से तिजी ते अशुद्ध नि ऊई सकदा? 19 कऊँकि से तेसरे मनो रे नि, पर पेटो रे जाओई, और सड़यानी साथे निकलोई।” ये बोली की तिने सारी खाणे रिया चीजा शुद्ध ठईराई राखिया। 20 तेबे तिने बोलेया, “जो बुरिया गल्ला मांणूआ रे मुँओ ते निकलोईया, सेई तेसखे अशुद्ध बणाओईया। 21 कऊँकि मांणूए रे मनो रे बुरे-बुरे बिचार, व्याभिचार, चोरी, अत्या, 22 परस्त्रीगमन, लोब, दुष्टता, छल, लुचपण, बुरी नजर, निन्दा, कमण्ड और मुखता निकलोई। 23 यो सब बुरिया गल्ला पीतरो तेई निकलोईया और मांणूए खे बुरा बणाओईया।” 24 तेबे यीशु और तिना रे चले गलील प्रदेशो ते

उठी की सूर और सैदा रे नगरो खे आए और एक कअरो रे गए और सेयो चाओ थे कि कोई बी तिना रे बारे रे नि जाणो, पर सेयो लुकी नि सके। 25 तेबे एक जवाणस थी, जेसा री छोटी मुन्निया रे दुष्टात्मा आत्मा थी, तेसे यीशुए रे बारे रे सुणेया और तेबे से तिना गे आई और तिना रे पैरो पँदि पड़ी गी। 26 ये यूनानी और सूरुफिनीकी जातिया री थी, तेसे यीशुए ते बिनती किक्ती, “मेरी मुन्निया ते दुष्टात्मा निकयाली दे।” 27 तिने तेसा खे बोलेया, “पईले बच्चेया खे रजणे दे, कऊँकि बच्चेया री रोटी कुत्तेया रे आगे राखणा खरी गल्ल नि ए।” 28 तेसे जवाणसे बोलेया, “सच ए प्रभु, पर तेबे बी तो छोटे कुत्ते बी बच्चेया री रोटिया ते बचे रे टुकड़ेया रा चूरा खाई लओए।” 29 यीशुए तेसा खे बोलेया, “जे एड़ी गल्ल ए, तेबे तो तू चली जा; दुष्टात्मा तेरी मुन्निया ते निकली गी री।” 30 तेबे से आपणे कअरे आई और तेसे देखेया कि तेसा री मुन्नी माँजे पँदि ए और दुष्टात्मा निकली गी री। 31 तेबे यीशु सूर और सैदा रे नगरो ते निकली की सिदोन और दिकापुलिसो रे प्रदेशो रे ऊँदे ऊए गलीलो रे समुद्रे रे नेड़े पऊँछे। 32 तेबे लोके एक मांणू तिना गे ल्याया जो टौणा और तूतला था, तेबे तिने यीशुए ते बिनती करी की बोलेया, “आपणा आथ एस पँदि राखी देयो।” 33 तेबे यीशु तेसखे पीड़ा ते लग जे लईगे और आपणिया गुठिया तेसरे कनारे रे पाईया और थूक लगाई की तेसरी जीब छुँई। 34 तेबे तिने स्वगों खे लांबा साआ परी की देखेया और बोलेया, “ईप्कतह!” मतलब “खुली जा!” 35 तेबे से तेबुई सुणने लगेया और तेसरी जीब खुली गी और से साफ-साफ बोलणे लगेया। 36 तेबे तेबे तेसखे सावधान करी की बोलेया, “केसी गे नि बोलणा।” पर जितणा तिने से सावधान कितेया, तिथणा ई से ओर बी प्रचार करने लगेया। 37 तेबे सेयो लोक बऊत हैरान ऊई की बोलणे लगे, “तिने जो कुछ कितेया, अच्छा कितेया, सेयो टौणेया खे सुणने री और गूँया खे बोलणे री शक्ति देओ ए।”

8 तिना दिना रे जेबे बड़ी पीड़ कट्टी ऊई और तिना गे कुछ खाणे खे नि था, तेबे तिने आपणे चलेया खे आपू गे बुलाई की बोलेया, 2 “माखे एसा पीड़ा पँदि तरस आओआ, कऊँकि ये तीन दिना ते बराबर मां साथे ए और इना गे कुछ बी एबे खाणे खे नि ए। 3 जे आऊँ इना खे पूखा कअरो खे पेजुंगा, तो यो बाटा रेई थकी जाणे, कऊँकि इना बीचा ते कोई-कोई बड़ी दूरो ते आई रे।” 4 तिना रे चलेया तिना खे बोलेया, “एती सुणसाण जगा रे इतणिया सारिया रोटिया केथा ते ल्याईए, ताकि यो रज्जी जाओ?” 5 यीशुए तिना ते पूछेया, “तुसा गे कितणी रोटिया ए?” तिने बोलेया, “साता।” 6 तेबे यीशुए तिना खे बोलेया, “जमीना पँदि बैठी जाओ।” तिने सेयो सात रोटिया लईया और परमेशरो रा धन्यवाद करी की तोड़िया और आपणे चलेया खे देंदे गए कि इना लोका खे देओ, और सेयो लोका खे देंदे गए। 7 तिना गे थोड़ी जीया छोटिया मछलिया बी थिया और यीशुए सेयो बी धन्यवाद करी की लोका खे देणे खे बोलेया। 8 तेबे सेयो खाई की रज्जी गे और जो टुकड़े बची रे थे तिना रे सात बड़े टोकरू परी की चके। 9 खाणे वाले तकरीबन चार हजार लोक थे; तेबे तिने सेयो बिदा करी ते। 10 तेबे यीशु आपणेया चलेया साथे किस्तिया पँदि चढ़ी की दलमनूता नाओं रे नगरो खे चली गे। 11 तेबे फरीसी यीशुए साथे बईस करने लगे और तिना खे परखणे खे बोलेया, “कोई स्वर्गिय चिह्न बता।” 12 तिने लांबा साआ परी की बोलेया, “एते जमाने रे लोक चिह्न कऊँ टोलोए? आऊँ तुसा खे सच बोलाँआ कि एस बखतो रे लोका खे कोई बी चिह्न नि देणा।” 13 तेबे सेयो तिना खे छाडी की किस्तिया रे बैठे और पार चली गे 14 चले रोटिया लणा पूली गे थे और किस्तिया रे तिना गे बस एक ई रोटी थी। 15 तेबे यीशुए सेयो सावधान किते कि देखो, “फरीसिये रे सजेड़े और हेरोदेसो रे सजेड़े ते चौकस राययो” 16 चले आपू बीचे सोच-बिचार करी की बोलणे लगे, “से इजी खे बोलीआ कऊँकि आसा गे तो रोटी आए ई नि।” 17 ये जाणी की यीशुए तिना खे बोलेया, “तुसे आपू बीचे ये बिचार कऊँ लगी रे करने कि आसा गे रोटी नि ए? क्या एबुए तक नि जाणदे और समजदे नि? क्या तुसा रे अक्ल नि ए? 18 क्या आखी ऊँदे ऊए

पनि देखदे और कान ऊँदे ऊए पनि सुणदे? क्या तुसा खे याद निए? 19 कि जेबे मैं पाँज हजारा लोका खे पाँज रोटिया तोड़िया थिया और तुसे टुकड़े रिया कितणिया टोकरिया चकिया थिया?" तिने तिना खे बोलेया, "बारा टोकरिया।" 20 यीशुए फेर पूछेया, "जेबे चार हजारा लोका खे सात रोटिया थिया, तो तेबे तुसे टुकड़े रिया कितणिया टोकरिया चकिया थिया?" चलेया बोलेया, "सात टोकरिया।" 21 यीशुए तिना खे बोलेया, "क्या तुसे एबुए तक नि समजदे?" 22 तेबे सेयो बैतसैदा नगरो खे आए और लोक एक अन्दे खे यीशुए गे ल्याए और बिनती किती कि तुसे एसखे छुँई देओ। 23 तेबे यीशु तेस अन्दे खे आथ पकड़ी की गांव ते बारे लईगे और तेसरी आखी पॉदि थूकी की आथ राखे और तेसते पूछेया, "क्या तू देखी सकैया?" 24 तिने आखी चकी की बोलेया, "आऊँ माणूआ खे देखी सकूँआ, सेयो माखे चलदे ऊए डाला जेडे दिशोए।" 25 तेबे यीशुए तेसरी आखी पॉदि फेर आथ राखे और तेबे तिने अन्दे त्यानो साथे देखेया और से ठीक ऊईगा और सब कुछ साफ-साफ देखणे लगेया। 26 यीशुए से कअरो खे पेजेया और तेसखे बोलेया, "एस गांव रे पीतरे पैर पनि राखणा।" 27 यीशु और तिना रे चले कैसरिया फिलिपिया नगरो रे नेडे-तेडे गांव खे चली गे; तेबे यीशुए बाटा रे तिना ते पूछेया, "लोक माखे क्या बोलीए?" 28 चलेया जबाब दितेया, "यूहन्ना बपतिस्मा देणे वाला; पर कोई-कोई एलियाह और कोई-कोई भविष्यबक्ता बीचा ते एक बी बोलीए।" 29 यीशुए तिना ते पूछेया, "पर तुसे माखे क्या बोलीए?" पतरसे तिना खे बोलेया, "तुसे मसीह ए, परमेशरो रे पेजे रे।" 30 तेबे यीशुए तिना खे सावधान करी की बोलेया, ये केसी गे नि बताणा, "आऊँ ई मसीह ए।" 31 तेबे यीशु तिना खे बताणे लगे कि, "मां माणू रे पुत्रो खे जरूरी ए कि आऊँ बऊत दु; ख उठाऊँ और बुजुर्ग, बडे पुरोईत और शास्त्री माखे तुच्छ जाणी की काई देओ और आऊँ तीजे दिने जिऊँदा ऊई जाऊँ।" 32 यीशुए तिना खे साफ-साफ बताई ता। ये सुणी की पतरस तिना खे लग जे लईगा और थिड़कणे लगेया। 33 पर यीशु मुडे और आपणेया चलेया खे देखी की पतरसो खे थिड़कणे लगे, "ओ शैतान! मेरी नजरा ते दूर ऊई जा; कऊँकि तू परमेशरो रिया गल्ला रे नि, पर माणूए रिया गल्ला पॉदि आपणा मन लगाएया।" 34 यीशुए पीड़ा समेत आपणे चले आपू गे बुलाए और तिना खे बोलेया, "जो कोई मां पीछे आऊणा चाओआ, से आपणा सब कुछ छाडी की और आपणे दु:खो और कष्टा रा क्रूस चकी की आपणी इच्छा ते मां पीछे आई जाओ।" 35 कऊँकि जो कोई आपणा प्राण बचाणा चाओगा, तेस से खोए, पर जो कोई मेरिया और सुसमाचारो रिया तई आपणे प्राण देओगा, तेस सच्ची ई आपणे प्राण बचाणे। 36 जे माणूए खे सारी दुनिया मिली जाओ, और आपणे ई प्राण नि रओ, तो तेसखे क्या फाईदा? 37 और माणूए आपणे प्राणो रे बदले ओर क्या देई सकोआ? 38 जो कोई एसा व्याभिचारिया और पापी जातिया बीचे, मांते और मेरिया गल्ला ते शर्माओगा, तो तेबे मां माणू रा पुत्रो बी, जेबे पवित्र स्वर्गदूता साथे आपणे पिते री महिमा साथे आऊणा, तो मां बी तेसते शर्माणा।"

9 यीशुए तिना खे बोलेया, "आऊँ तुसा खे सच लगी रा बोलणे कि जो एती खडी रे तिना बीचा ते कई एडे ए, कि जदुओ तक परमेशरो रे राज्य खे सामर्था साथे आऊँदा ऊआ नि देखी लओगे, तदुओ तक नि मरने।" 2 छे दिनो ते बाद यीशुए पतरस, याकूब और यूहन्ना आपू साथे लए और लग जे ऊच्चे जे पाह्लो पॉदि चली गे और तेती तिना सामणे यीशुए री शकल बदली गी। 3 तेबे तिना रे टाले ईतणे चमकणे लगे कि बडे पारी साफ ऊईगे और तरतिया रे कोई बी तोबी इतणा साफ नि करी सकदा। 4 तेबे चलेया खे पुराणे बखतो रे दो भविष्यवक्ता मूसा और एलियाह दिशे और सेयो यीशुए साथे गल्ला करो थे। 5 ये देखी की पतरसे यीशुए खे बोलेया, "ओ गुरु! आसा रा एती रणा ठीक ए और आसे एडा करूँए कि तीन तम्बू बणाऊँए; एक तुसा खे, एक मूसे खे और एक एलियाहो खे।" 6 कऊँकि सेयो बऊत डरी गे थे और पतरस नि जाणो था कि क्या जवाब देऊँ। 7 तेबे एक बादल तिना पॉदि छाईगा और तेस बादलो ते परमेशरो री ये आवाज आई, "ये मेरा

प्यारा पुत्र ए, एसरी सुणो।" 8 तेबे सेयो फटाफट चऊँ कनारे देखणे लगे और यीशुए खे छाडी की तिने ओर कोई नि देखेया। 9 पाह्लो ते उतरदे ऊए यीशुए तिना खे आज्ञा दित्ती कि, "जदुओ तक आऊँ माणू रा पुत्र, मरे रेया बीचा ते जिऊँदा नि ऊई जाऊँ, तदुओ तक जो कुछ तुसे देखी राखेया, से केसी गे नि बताणा।" 10 चलेया ये गल्ल आपू तक ई राखी और आपू बीचे बात-चीत करने लगे, "मरे रेया बीचा ते जिऊँदा ऊणे रा क्या मतलब ए?" 11 तेबे तिने यीशुए ते पूछेया, "शास्त्री कऊँ बोलीए कि मसीह रे आऊणे ते पईले एलियाहो रा आऊणा जरूरी ए?" 12 यीशुए तिना खे जवाब दितेया, "एलियाह रा तो सच्ची पईले आऊणा और लोका रे मनो खे मेरिया तई त्यार करना जरूरी ए। पर पवित्र शास्त्रो रे माणू रे पुत्रो रे बारे रे बी एडा कऊँ लिखी राखेया कि तेसखे बऊत दु: ख ऊणे और से तुच्छ समजेया जाणा? 13 पर आऊँ तुसा खे सच बोलूँआ कि एलियाह तो आई चुकेया रा और जो तेसरे बारे रे लिखी राखेया था, तिने जो कुछ चाया तेस साथे कित्तेया।" 14 और जेबे यीशु आपणे तीनो चलेया साथे ओरी चलेया नेडे आए तो तेबे तिने देखेया कि तिना रे चऊँ कनारे पीड़ लगी री और शास्त्री तिना साथे बईस करने लगी रे थे। 15 तेबे यीशुए खे देखी की सब हैरान ऊईगे और तिना गे दौडी की तिना खे नमस्कार कित्तेया। 16 यीशुए तिना ते पूछेया, "तुसे इना साथे क्या बईस लगी रे करने?" 17 पीड़ा बीचा ते एकी जणे बोलेया, "ओ गुरु! आऊँ आपणे पाऊए खे तुसा गे ल्याई राखेया, जेसे दुष्टात्मे ये गूँगा करी राखेया। 18 जेती-केथी से तेसखे पकड़ोई, तेथी पटकी देओई और एसरे मुँओ ते जगुड निकलने लगी जाओआ और से दौद किरइदा रओआ और सूकदा रओआ। मैं तुसा रे चलेया खे बोलेया, 'तुसे एसा खे निकयाली देओ, पर सेयो निकयाली नि सके।'" 19 ये सुणी की यीशुए तिना खे जवाब दितेया, "ओ अविश्वासी लोको! मां कदुओ तक तुसा साथे रणा? और कदुओ तक तुसा खे सईन करूँ? बच्चे खे मांगे ल्याओ।" 20 तेबे सेयो बच्चे खे यीशुए गे ल्याए; और जेबे दुष्टात्मे यीशुए खे देखेया, तो तेबे दुष्टात्मे बच्चा फटाफट मकरेडी ता और बच्चा जमीना पॉदि पडी गा, और से मुँओ ते जगुड निकयाल्दे ऊए कजणे लगेया। 21 यीशुए तेसरे बाओ ते पूछेया, "एसरी ये आलत कदुओ ते ए?" 22 तिने बोलेया, "बचपनो ते। दुष्टात्मा एसरा नाश करने री तई, कदी ये आगी रे और कदी पाणिए रे रुड़ाया। पर जे तुसे कुछ करी सकोए तो आसा पॉदि तरस खाई की एसखे ठीक करी देयो।" 23 यीशुए तेसखे बोलेया, "जे तुसे करी सकोए तो, ये क्या गल्ल ऊई? विश्वास करने वालेया खे सब कुछ ऊई सकोआ।" 24 तेस पाऊए रे बाओ फटाफट गिडगिड़ाई की बोलेया, "ओ प्रभु! आऊँ विश्वास करूँआ। मेरे विश्वासो खे और बड़ाई देओ।" 25 जेबे यीशुए देखेया कि लोक दौडी की पीड़ लगी रे लगाणे, तो सेयो दुष्टात्मा खे बके कि ओ "गूँगा और टौणा करने वाली दुष्टात्मा, आऊँ ताखे आज्ञा देऊँआ कि एस बच्चे ते निकली जा; और एसरे कदी दुबारा नि आऊणा।" 26 तेबे से चींगी की और तेसखे मकरेडी की निकली गी और पाऊ मरे रे जेडा ऊईगा। एथो तक बऊत लोक बोलणे लगे, "ये तो मरी गा रा।" 27 पर यीशुए तेसरा आथ पकड़ी की से उवालेया और से खडा ऊईगा। 28 जेबे यीशु कअरे आए, तेबे तिना रे चलेया तिना ते लग जे जाई की पूछेया, "आसे तेसा खे कऊँ नि निकयाली सके?" 29 यीशुए तिना खे बोलेया, "ये एडी दुष्टात्मा ए जो बअरतो साथे प्रार्थना करने ते अलावा कोई और उपाय ते नि निकली सकदी।" 30 तेबे यीशु और तिना रे चले तेथा ते चली की गलील प्रदेशो ते ऊई की जाणे लगी रे थे और सेयो नि चाओ थे कि कोई जाणो। 31 तेबे यीशु आपणे चलेया खे उपदेश देणा चाओ था और बोलणे लगे, "आऊँ माणू रा पुत्र, माणूआ रे आथो रे पकड़वाऊणा और तिना आऊँ काई देणा और आऊँ मरने ते तीजे दिने जिऊँदा ऊई जाणा।" 32 पर ये गल्ल तिना री समजा रे नि आई और सेयो तिना ते पूछणे ते डरो थे। 33 तेबे यीशु आपणे चलेया साथे कफरनहूम नगरो खे आए और कअरे आई की यीशुए तिना ते पूछेया, "बाटा रे तुसे कुण जी गल्ला रे बईस लगी रे थे करने?" 34 सेयो चुप एए, कऊँकि बाटा रे तिने बईस किती थी, "आसा बीचा ते बडा कूण ए?" 35 तेबे यीशुए आपणे बारा

चेले बुलाए और बोलेया, “जे कोई बड़ा ऊणा चाओआ तो, सबी ते छोटा और सबी रा सेवक बणो।” 36 तेबे तिने एक बालक आपणी गोदा रे लया और तिना बीचे खड़ा कितेया और तिना खे बोलेया, 37 “जो मेरे नाओं ते एड़े केसी एकी बालको खे बी मानोआ, से माखे मानोआ, और जो माखे मानोआ, से माखे नि, पर मेरे पेजणे वाले खे मानोआ।” 38 तेबे यूहन्ने नाओं रे चले यीशुए खे बोलेया, “ओ गुरु! आसे एक माणू तुसा रे नाओं ते दुष्टात्मा खे निकयालदा ऊआ देखेया और आसे तेसखे एड़ा करने ते ना किती। कऊँकि से तेरा चेला नि था।” 39 यीशुए बोलेया, “तेसखे ना नि करो, कऊँकि एड़ा कोई नि ए जो मेरे नाओं ते सामर्था रे काम नि करो और फटाफट माखे बुरा बोली सको। 40 कऊँकि जो म्हारे खलाफ नि ए, से आसा साथे ए। 41 जो कोई तुसा खे एक कटोरा पाणिए रा इजी री खातर पलयाओ कि तुसे मसीहे रे ए, तो आऊँ तुसा खे सच लगी रा बोलणे कि तेस आपणा प्रतिफल कियॉ पनि खोणा।” 42 यीशुए बोलेया, “पर जो इना छोटेया बीचा ते, जो मां पाँदे विश्वास राखोए, केसी खे बी पापो रे पाओ तिना खे बऊत खतरनाक सजा मिलणा। तेसखे ये पला ऊँदा कि तेसरे गले रे एक बड़ा चाकिकया रा पूड लटकाई देओ और तेसखे समुद्रे रे सेटी देओ। 43 जे तेरा आथ ताखे पापो री बजअ बणोआ तो, तेस बाडी दे और लुण्डा ऊई की जिन्दगी जियो। ताखे येई ठीक ए कि दो आथ रेंदे ऊए ताखे नरको री आगी रे सेटी देओ जो कदी बिजणी नि। (Geenna g1067) 44 जेती कीड़ा शरीरो खे सदा खांदा रओआ और मरदा नि और आग बी सदा बलदी रओई। 45 जे तेरा पैर पापो री बजअ बणोआ, तो तेस बाडी दे। लंगड़ा ऊई की तेरा जिऊणा इजी ते खरा ए कि दो पैर रेंदे ऊए ताखे नरको रे सेटी देओ। (Geenna g1067) 46 जेती कीड़ा शरीरो खे सदा खांदा रओआ और मरदा नि और आग बी सदा बलदी रओई। 47 जे तेरी आख ताखे पापो री बजअ बणोई, तो तेसा निकयाली दे। काणा ऊई कि परमेशरो रे राज्य रे जाणा ताखे ये पला ए कि दो आखी रेंदे ऊए तूँ नरको रे सेटेया जाओ। (Geenna g1067) 48 जेती कीड़ा शरीरो खे सदा खांदा रओआ और मरदा नि और आग बी सदा बलदी रओई। 49 कऊँकि हर एक माणू आगी साथे ईयाँ परखेया जाणा, जियाँ खाणे दे लूणो रा स्वाद चाखेया जाओआ। 50 लूण अच्चा ए, पर जे लूणो रा स्वाद बिगड़ी जाओ तो से किजी साथे लूणका करना? आपू रे लूणो जेड़ा मित्रता रा स्वभाव राखो और आपू बीचे मिली-जुली की रओ।”

10 तेबे यीशु और तिना रे चले कफरनहम नगरो ते उठी की यहूदिया प्रदेशो रे बन्ने रे और यरदनो नदिया ते पार आए। पीड़ फेर तिना गे कट्टी ऊईगी और यीशु तिना खे आपणे तरीके ते उपदेश देणे लगे। 2 तेबे फरीसिये तिना खे परखणे री तँई तिना ते पूछेया, “क्या माणूए खे आपणी लाडिया खे छाडणा खरी गल्ल ए?” 3 यीशुए तिना खे जवाब दितेया, “मूसे बिधानो रे मुताबिक तुसा खे क्या आज्ञा देई राखी?” 4 फरीसिये बोलेया, “मूसे त्यागपत्र लिखणे री और छाडणे री आज्ञा देई राखी।” 5 यीशुए बोलेया, “तुसा रे मनो रे जिद्दी सबाओ री बजअ ते तिने तुसा खे ये आज्ञा लिखी राखी। 6 पर सृष्टिया री शुरूआता तेई परमेशरे मर्द और जवाणस करी की सेयो बणाई राखे। 7 इजी बजअ ते माणू आपणे माया-बावा ते लग ऊई की आपणी लाडिया साथे रणा 8 और सेयो दोनो एक तन ऊणे। एबे सेयो दो नि, पर एक तन ए। 9 इजी री खातर जो परमेशरे जोडी राखे, तो लाडा-लाडी आपू बीचे एकी-दूजे खे नि छाडो।” 10 कअरे जाई की चेलेया एतेरे बारे रे फेर यीशुए ते पूछेया। 11 यीशुए तिना खे बोलेया, “जो कोई आपणी लाडिया खे छाडी की केसी ओरी साथे ब्या करोआ, तो से तेसा पईलकिया रे खलाफ व्याभिचार करोआ। 12 जे लाडी आपणे लाड़े खे छाडी की दूजा ब्या करो, तो से व्याभिचार करोई।” 13 तेबे लोक बच्चेया खे यीशुए गे ल्याऊणे लगे, ताकि सेयो तिना पाँदे आथ राखी की आशीर्वाद देओ, पर चेले तिना खे बकणे लगे। 14 यीशुए ये देखी की तिना खे रोषो रे बोलेया, “बालका खे मांगे आऊणे देओ और तिना खे ना नि करो, कऊँकि परमेशरो रा राज्य एड़े रा ईए। 15 आऊँ तुसा खे सच लगी रा बोलणे कि जो

कोई परमेशरो रा राज्य बालको जेड़ा समजी की मानदा नि, से कदी तिदे नि जाणा।” 16 तेबे यीशुए बच्चे गोदा रे लए और तिना रे सियो पाँदे आथ राखी की तिना खे आशीष दित्ती। 17 जेबे यीशु तेथा ते निकली की बाटा रे चली रे थे, तेबे एक माणू तिना गे दौड़दा ऊआ आया और तिना रे पैरो पाँदे पड़ी की तिना ते पूछेया, “ओ उत्तम गुरु! अनन्त जीवो रा अधिकारी ऊणे खे आऊँ क्या करूँ?” (aiōnios g166) 18 यीशुए तेसखे बोलेया, “तूँ माखे उत्तम कऊँ बोलेया? कोई उत्तम नि ए, बस एक-मतलब, परमेशर ई उत्तम ए। 19 तूँ आज्ञा खे तो जाणेया, ‘अत्या, व्याभिचार, चोरी नि करना, चूठी गवाई नि देणी, छल नि करना, आपणे माया-बावा रा आदर करना।’” 20 तिने माणूए बोलेया, “ओ गुरु! इना सबी आज्ञा खे तो आऊँ बचपनो ते मानूँआ।” 21 यीशुए तेसखे प्यारो ते देखेया और तेसखे बोलेया, “तांदा एक गल्ला री कमी ए, जा, जो कुछ तांगे आए, से बेची की कंगाला खे देई दे और ताखे स्वर्गो रे सच्चा धन मिलणा, और मां पीछे आईजा।” 22 ये सुणी की से उदास ऊईगा और से दुः खी उई की कअरो खे चली गा, कऊँकि से बऊत अमीर था। 23 यीशुए चऊँ कनारे देखी की आपणे चेलेया खे बोलेया, “अमीर लोका खे परमेशरो रे राज्य रे जाणा बऊत कठण ए।” 24 चेले तिना री गल्ला ते हैरान ऊईगी, ये देखी की यीशुए तिना खे फेर बताया, “ओ बालको! जो धनो पाँदे विश्वास राखोए, तिना खे परमेशरो रे राज्य रे जाणा बऊत कठण ए। 25 परमेशरो रे राज्य रे अमीरा रा जाणा ईयाँ बऊत कठण ए, जियाँ की ऊँटो रा सूईया रे छेदो रिये निकलना कठण ए।” 26 चेले बऊत हैरान ऊईगी और आपू बीचे बोलणे लगे, “तेबे केसरा उद्धार ऊई सकोआ?” 27 यीशुए तिना खे देखी की बोलेया, “माणूआ ते तो ये ऊई नि सकदा, पर परमेशरो ते सब कुछ उई सकोआ। कऊँकि परमेशरो खे सब कुछ सम्भव ए” 28 पतरस तिना खे बोलणे लगेया, “देखो, आसे तो सब कुछ छाडी की तुसा पीछे आईगे रे।” 29 यीशुए तिना खे बोलेया, “आऊँ तुसा खे सच लगी रा बोलणे कि हर कोई जिने माखे और सुसमाचारी री तँई कअर, पाई, बईण, माए-बाओ, बाल-बच्चे या डोरू छाडे ओ, 30 और तेस एबे एस बखते सौ गुणा फल पाणा। कअर, पाई, बईण माए, बाल-बच्चे और डोरू सताव साथे पाणे और परलोको रे अनन्त जीवन पाणा। (aiōn g165, aiōnios g166) 31 पर एबे बऊत सारे लोक जो आपणे आपू खे एते दुनिया रे बड़े समजोए, सेयो परमेशरो री नजरा रे छोटे ऊई जाणे, और जिना खे संसार एबु छोटा समजोआ, सेयो परमेशरो री नजरा रे बड़े समजे जाणे।” 32 सेयो यरूशलेम नगरो खे जाँदे ऊए बाटा रे थे और यीशु तिना ते आगे चली रे थे और चेले हैरान ऊईगी और जो लोक पीछे चली रे थे सेयो डरने लगे। तेबे यीशु तिना बारा चेलेया खे लई की तिना खे सेयो गल्ला बताणे लगे, जो तिना पाँदे आऊणे वालिया थिया। 33 यीशुए बोलेया, “देखो, आसे यरूशलेम नगरो खे जाणे लगी रे और आँऊ माणू रा पुत्र बड़े पुरोईत और शास्त्रिया रे आथो रे देई देणा और तिना आँऊ काणे जोगा ठराणा और दुजिया जातिया रे आथो रे देई देणा। 34 तिना मेरा मजाक उड़ाणा, मां पाँदे थूकणा, माखे कोड़े बाणे, आँऊ काणा और आँऊ तीजे दिने जिऊँदा ऊई जाणा।” 35 तेबे जब्दिए रे पाऊए, याकूब और यूहन्ने तिना गे आई की बोलेया, “ओ गुरु! आसे चाऊँ ए कि जो कुछ आसे तुसा ते माणू, तेड़ा ई तुसे आसा खे करो।” 36 यीशुए तिना खे बोलेया, “तुसे क्या चाओए कि आऊँ तुसा खे करूँ?” 37 तिने बोलेया, “आसे चाऊँए कि जेबे तुसे आपणी महिमामय राज्य रे आओ तो आसे दोनो एक तुसा रे दाँणे और एक खूँजे कनारे बैठिए।” 38 यीशुए तिना खे बोलेया, “तुसे नि जाणदे कि क्या लगी रे मांगणे? जो दुःख आँऊ सईन करने वाला ए, क्या से दुःख तुसे सईन करी सकोए? और जो मौता रा बपतिस्मा आऊँ लणे वाला ए, क्या तुसे लई सकोए?” 39 तिने बोलेया, “आसे करी सकूँए।” यीशुए तिना खे बोलेया, “जो दुःख आँऊ सईन करने वाला ए, से तुसे सईन करी सकोए; और जो मौता बपतिस्मा आऊँ लणे वाला ए, से तुसा लणा। 40 पर जो त्पार किते रे ए, तिना खे छाडी की ओर कोई आपणे दाँणे और खूँजे बठयालना मेरा काम नि ए।” 41 ये सुणी की बाकि दस चेले, याकूब और यूहन्ने पाँदे रोष करने लगे। 42 यीशुए सेयो

आपू मे बुलाए और तिना खे बोलेया, “तुसे जाणोए कि जो दुजिया जातिया रे हाकिम समजे जाओए, सेयो तिना पाँदे जबरदस्ती राज करोए और जो तिना बीचे बड़े ए, तिना पाँदे अक्क जताओए। 43 पर तुसा बीचे एड़ा नि ऊणा चाईयो, बल्कि जो कोई तुसा बीचा ते बड़ा ऊणा चाओआ, से तुसा रा दास बणो। 44 और जो कोई तुसा रा प्रदान बणना चाओआ, से सबी रा दास बणो। 45 कऊँकि आऊँ माणूँ रा पुत्र इजी खे नि आया कि मेरी सेवा करो, बल्कि इजी खे आया कि से आपू सेवा करो और बऊत जणोया छुड़ाणे खे आपणा प्राण देई देओ।” 46 यीशु और तिना रे चले यरीहो नगरो रे आए। और जेबे सेयो और तिना रे चले बाटा रे थे, तेबे एक बड़ी पीड़ तिना पीछे-पीछे जाणे लगी री थी, तेबे तिमार्इयो रा पाऊ बरतिमार्इ एक अन्दा भिखारी सड़का रे कनारे बैठेया रा था। 47 जेबे तिने ये सुणेया कि यीशु नासरी ये, तेबे से जोरे-जोरे की आक्का पाणे लगेया कि, “ओ दाऊदो री ल्वाद, यीशु! मां पाँदे दया कर।” 48 कई जणे तेसखे बकणे लगे कि चुप रओ, पर से ओर बी आक्का पाणे लगेया कि, “ओ दाऊदो री ल्वाद! मां पाँदे दया कर।” 49 तेबे यीशु रूकी की बोलेया, “तेसखे बुलाओ।” तेबे लोके से अन्दा बुलाई की तेसखे बोलेया, “थाओ राख, उठ, यीशु ताखे बुलाणे लगी रे।” 50 से आपणी चादर सेटी की फटाफट उठी गा और यीशुए रे आईगा। 51 तेबे यीशुए तेसखे बोलेया, “तूँ क्या चाएया कि आऊँ ताखे क्या करूँ?” अन्दे बोलेया, “ओ गुरु! ये कि आऊँ देखणे लगी जाऊँ।” 52 यीशुए तेसखे बोलेया, “चली जा, तेरे विश्वास तूँ ठीक करी ता” और से तेबुई देखणे लगेया और बाटा रे से तिना पीछे चलणे लगेया।

11 जेबे यीशु और तिना रे चले यरूशलेम नगरो रे नेड़े जैतून पाहड़ो पाँदे, बैतफगे और बैतनिय्याहो गांव रे नेड़े आए, तो तेबे यीशुए आपणे चलेया बीचा ते दो जणे ये बोली की पेजे, 2 “सामणे रे गांव रे जाओ, और तेती पऊँछी की तुसा खे एक गह्दिया रा बच्चा, जेस पाँदे कदी कोई नि बैठी रा, बाने रा तुसा खे मिलणा, तेस खोली की ल्याओ। 3 जे तुसा खे कोई पूछो गा ‘एड़ा कऊँ लमी रे करने?’ तो बोलणा, ‘भरे प्रभुए खे एसते कुछ काम ए,’ और तिना फटाफट से एती पेजी देणा।” 4 चलेया से गह्दिया रा बच्चा बाअरे गलिया रे दरवाजे रे नेड़े बाने रा देखेया और सेयो तेसखे खोलणे लगे। 5 तेबे जो तेती खड़ी रे थे, तिना बीचा ते कोई-कोई बोलणे लगे, “ये क्या लगी रे करने? गह्दिया रे बच्चे खे कऊँ लगी रे खोलणे?” 6 चलेया, जियँ यीशुए था बोले रा, तियँ ई तिना खे बोलणे लगे, तेबे तिने सेयो जाणे दित्ते। 7 चलेया से गह्दिया रा बच्चा यीशुए गे ल्याया और तेस पाँदे आपणे टाले पाए और यीशु तेस पाँदे बैठीगे। 8 तेबे बऊत जणोया आपणी-आपणी चादरी बाटा रे बछाइतिया और कईए डोरूआ ते खचूरो रिया डालिया बाडी-बाडी की तिना रे स्वागतो खे बछाइतिया। 9 तेबे जो यीशुए रे आगे और पीछे चली रे थे, सेयो जोरे-जोरे की बोलणे लगी रे थे, “होशान्ना, धन्य ए से, जो प्रभुए रे नाओं ते आओआ। 10 आसा रे पिता दाऊदो रा राज्य जो आऊणे लगी रा; से धन्य ए; स्वर्गो रे होशान्ना।” 11 तेबे यीशु यरूशलेमो नगरो रे पऊँछी की मन्दरो रे आए और चऊँ कनारे सब कुछ देखी की आपणे बारा चलेया साथे बैतनिय्याहो गांव खे गए, कऊँकि साँज ऊईगी थी। 12 दूजे तिने जेबे सेयो बैतनिय्याहो गांव ते निकले, तेबे यीशुए खे पूछ लगी। 13 तेबे तिने दूरो ते एक दाऊगले रा अरा डाल देखेया और तेस डालो रे नेड़े आए कि क्या पता ईदे कुछ लगी रा ओगा, पर पत्तेया खे छाडी की ओर कुछ नि मिलेया, कऊँकि फल लगणे रा बखत नि था। 14 तेबे यीशुए तेस डालो खे बोलेया, “आजो ते बाद तेरा फल केसी नि खाणा” और तिना रे चले सुणने लगी रे थे। (aiōn g165) 15 तेबे यीशु यरूशलेमो नगरो खे आए और मन्दरो रे गए, तेबे जो तेती लेण-देण लगी रे थे करने, सेयो तिना खे बारे निकयालने लगे और सरफि रिया पेटिया और कबूतरा खे बेचणे वालिया चौकिया मूँदिया करी तिया 16 और मन्दरो रिये कोई बी सामान लई की आऊणे-जाणे नि दित्तेया। 17 तेबे उपदेश देई की तिना खे बोलेया, “एड़ा लिखी राखेया, मेरा मन्दर, सब जातिया खे प्रार्थना रा कअर ऊणा। पर तुसे ये डाकूआ री गुफा

बणाई ती री।” 18 ये सुणी की बड़े पुरोईत और शास्त्री यीशुए खे बबाँद करने रा मोका टोलने लगे, कऊँकि सेयो तिना ते डरो थे और लोक बी तिना रे उपदेशो ते हैरान थे। 19 साँज ऊँदे ई यीशु और तिना रे चले नगरो ते बाअरे चली गे। 20 तेबे प्यागा सेयो तिसिये गए और चलेया से दाऊगले रा डाल जड़ा ते सूकेया रा देखेया। 21 पतरसो खे से गल्ल याद आई और तिने यीशुए खे बोलेया, “ओ गुरु! देख, ये दाऊगले रा डाल, जेसखे तुसे साप दित्तेया था, सूकी गा रा।” 22 यीशुए जवाब दित्तेया, “परमेशरो पाँदे विश्वास राखो। 23 आऊँ तुसा खे सच बोलूँआ कि जे कोई एस पाहड़ो खे बोले, ‘तूँ पट्टी जा और समुद्री रे पड़ी जा,’ और आपणे मनो रे शक नि करो, बल्कि विश्वास राखो कि जो बोलूँआ, से ऊई जाणा, तो तेसखे से ऊई जाणा। 24 तेबेई तो आऊँ तुसा खे बोलूँआ कि जो कुछ तुसे प्रार्थना करी की मांगोगे, तो विश्वास राखो कि तुसा खे मिली गा और तुसा खे ऊई जाणा। 25 जेबे कदी तुसे खड़े ऊई की प्रार्थना करोए और तुसा रे मनो रे केसी रे खलाफ कोई गल्ल ओ, तो तेसखे माफ करी देओ। तुसा रा स्वर्गिय पिता बी तुसा रे पाप माफ करोआ। 26 और जे तुसे माफ नि करोगे, तो तुसा रे स्वर्गिय पिते बी तुसा रे अपराध माफ नि करने।” 27 तेबे यीशु और तिना रे चले फेर यरूशलेमो नगरो खे आए और जेबे यीशु मन्दरो रे कूमणे लगी रे थे, तेबे बड़े पुरोईत, शास्त्री और बुबुर्ग तिना गे आई की पूछणे लगे, 28 “तूँ इना कामा केस अक्को ते करेया? और ताखे ये अक्क किन्ने देई राखेया कि तूँ इना कामा खे करे?” 29 यीशुए तिना खे बोलेया, “आऊँ बी तुसा ते एक गल्ल पुछूँआ, माखे जवाब देओ, तो मां बी तुसा खे बताणा कि इना कामा केस अक्को ते करूँआ? 30 यूहन्ने रा बपतिस्मा क्या स्वर्गो ते था या माणूए री तरफा ते था? माखे जवाब देओ।” 31 तेबे सेयो आपू बीचे बात-चीत करने लगे, “जे आसे बोलूँ कि ‘स्वर्गो री तरफा ते था,’ तो एस बोलणा, ‘तेबे तुसे तेस पाँदे विश्वास कऊँ नि कित्तेया?’ 32 और जे आसे बोलूँगे, ‘माणूए री तरफा ते ए,’ तो लोका रा डर ए, कि लोक गुस्सा ऊई जाणे; कऊँकि सब जाणोए कि यूहन्ना भविष्यबक्ता था।” 33 तो तेबे तिने यीशुए खे जवाब दित्तेया, “आसे नि जाणदे।” यीशुए बी तिना खे बोलेया, “मां पनि बताणा कि ये काम केसरे अक्को ते करूँआ।”

12 यीशु उदारणा रे तिना साथे गल्ला करने लगे, “एकी माणूए अँगूरा रा बगीचा लगाया और तिजी रे चऊँ कनारे बाड़ लगाया और अँगूरा रे रसो खे पात्थरो दे एक गड्डा खणेया, जुगाली बणाई और ठेकेदारा खे तिजी रा ठेका देई की परदेशो खे चली गा। 2 जेबे फल लगणे रा बखत ऊआ तेबे तिने आपणा एक दास ठेकेदारा गे पेजेया कि तिना ते अँगूरा रे बगीचे रे फलो रा इस्सा ल्याओ। 3 पर ठेकेदारे से पकड़ी की कूटेया और खाली आथे पेजी ता। 4 तेबे तिने एक ओर दास पेजेया और तिने तेसरा सिर फोड़ी ता और तेसरी बेज्जती कित्ती। 5 तेबे तिने एक ओर पेजेया और तिने से काई ता; तेबे तिने ओर कई जणे पेजे; तिना बीचा ते तिने कई जणे कूटे और कई जणे काई ते। 6 एके एक ई रई गा था, जो तेसरा प्यारा पाऊ था, तिने आखरी रे से बी ये सोची की पेजेया, ‘तिना मेरे पाऊए रा तो आदर करना।’ 7 पर तिने ठेकेदारे आपू बीचे बोलेया, ‘येई तो बारस ए; आओ एसखे ताई देऊँए, तेबे जायदात म्हारी ऊई जाणी।’ 8 तेबे तिने से पकड़ी की काई ता और अँगूरा रे बगीचे ते बारे सेटी ता।” 9 यीशुए पूछेया, “तो तेबे अँगूरा रे बगीचे रे मालके क्या करना? तेस आई की तिना ठेकेदारा रा नाश करी देणा और अँगूरा रा बगीचा ओरी गे देई देणा। 10 क्या तुसे पवित्र शास्त्रो रे ये वचन नि पढ़ेया, “जेस पात्थरो खे राजमिस्त्रए नकम्मा बोलेया था, सेई कूणे रा सिरा ऊईगा’ 11 ‘ये प्रभुए री तरफा ते ऊआ, और आसा री नजरा रे नऊखा ए?’” 12 तेबे तिने से पकड़ना चाया, कऊँकि सेयो समजी गे थे, “तिने ये उदारण आसा रे बारे रे बोलेया।” पर सेयो लोका ते डरी गे और तिना खे छाडी की चली गे। 13 तेबे यहूदी अगुवे यीशु गल्ला रे फसाणे री तई कई फरीसी और हेरोदेस राजे रा समर्थन करने वाले यहूदी तिना गे पेजे। 14 और तिने आई की तिना खे बोलेया, “ओ गुरु! आसे जाणूँए कि तुसे सच्चे ए और

केसी री परवा नि करदे, कऊँकि तुसे मांणूआ रा मूँ देखी की गल्ल नि करदे, पर परमेशरो री बात सच्चाईया साथे बताओए। तो क्या कैसरो खे कर देणा खरी गल्ल या नि? 15 आसे देऊँ या नई देऊँ?” यीशुए तिना रा कपट जाणी की बोलेया, “माखे कऊँ परखोए? एक चाँदिए रा सिक्का मांगे ल्याओ ताकि आऊँ देखूँ।” 16 सेयो ली आए और तिने तिना खे बोलेया, “ये मूर्ति और नाओं केसरा ए?” तिने बोलेया, “रोमो रे राजा कैसरो रा।” 17 यीशुए तिना खे बोलेया, “जो कैसरो राए, से कैसरो खे और जो परमेशरो राए, से परमेशरो खे देयो।” तेबे सेयो तिना पॉंदि हैरानी करने लगे। 18 तेबे सदकिये बी जो एड़ा बोलो थे कि मरेया रा जिऊँदा ऊई नि सकदा, तिने यीशुए गे आई की पूछेया, 19 “ओ गुरु, मूसे आसा खे लिखी राखेया कि जे केसी मांणूए रा पाई बिना ल्वादा ते मरी जाओ और तेसरी लाड़ी रई जाओ, तो तेसरा पाई तेसा बिदुआ साथे ब्या करी लओ और आपणे पाईए खे ल्वादा पैदा करो। 20 एक बार सात पाई थे; पईला पाई ब्या करी की बिना ल्वादा ते मरी गा। 21 तेबे दूजे पाईए तेसा बिदुआ साथे ब्या करी ला और से बी बिना ल्वादा ते मरी गा; और तियाँ ई तीजे बी कित्तेया। 22 साता पाईया ते ल्वादा नि ऊई। सबी ते बाद से जवाणस बी मरी गी। 23 तो तेबे, जेबे सेयो जिऊँदे ऊणे, तो से तिना बीचा ते केसरी लाड़ी ऊणी? कऊँकि से साता जणेया री लाड़ी ऊई चुकी थी।” 24 यीशुए तिना खे बोलेया, “तुसे केथी एते पूला रे तो निए कि ना तुसे पवित्र शास्त्रो खेई जाणदे और ना ई परमेशरो री सामर्था खे? 25 कऊँकि जेबे सेयो मरेया रे बीचा ते जिऊँदे ऊणे, तो तिना बीचे शादी-ब्या नि ऊणे, पर स्वर्गदूतो जेडे ऊणे। 26 मरे रे बीचा ते जिऊँदे ऊणे रे बारे रे क्या तुसे मूसे री कताबा रे बलदे ऊए जाड़ो री काणियां रे नि पढ़ेया कि परमेशरे तेसखे बोलेया, ‘आऊँ अब्राहमो रा परमेशर, इसहाको रा परमेशर और याकूबो रा परमेशर ए?’ 27 परमेशर मरेया रा नि, पर जिऊँदेया रा परमेशर ए। तो तुसे बऊत बड़ी पूला रे पड़ी रे।” 28 तेबे शास्त्रिया बीचा ते एकी जणे आई की सेयो बईस करदे ऊए सुणे और ये जाणी की कि यीशुए तिना खे खरा जवाब दित्तेया, तेबे तिने यीशुए ते पूछेया, “सबी ते खास आज्ञा कूण जिए।” 29 यीशुए तेसखे जवाब दित्तेया, “सबी आज्ञा बीचा ते ये आज्ञा बड़ी ए कि, ‘ओ इस्राएल सुण, प्रभु आसा रा परमेशर एक ई प्रभु ए 30 और तूँ प्रभु आपणे परमेशरो साथे आपणे पुरे मनो ते, पुरे प्राणो ते, पुरे दमाको ते और आपणी पुरिया तागता ते प्यार राख।’ 31 और दूजी ये कि, ‘तूँ आपणे पड़ोसिये साथे आपू जेड़ा प्यार राख’ इजी ते बड़ी और कोई आज्ञा निए।” 32 शास्त्रिए तिना खे बोलेया, “ओ गुरु! बऊत खरा।” तुसे सच बोलेया, “परमेशर एक ईए और परमेशरो खे छाडी की ओर कोई बड़ा निए 33 और तेस साथे पुरे मन, पुरे दमाक और पुरिया तागता साथे प्यार राख और आपणे पड़ोसिये साथे आपू जेड़ा प्यार राख। सारे अवन और बलिदानो ते बड़ी की ए।” 34 जेबे यीशुए देखेया कि तिने समजदारिया साथे जवाब दित्तेया, तो तेसखे बोलेया, “तूँ परमेशरो रे राज्य ते दूर निए।” तेबे केसी खे बी तिना ते कुछ पूछणे री इम्मत नि ऊई। 35 तेबे यीशुए मन्दरो रे ये उपदेश देँडे ऊए बोलेया, “शास्त्री कऊँ बोलेए, कि मसीह दाऊदो रा पाऊ ए? 36 दाऊदे आपू ई पवित्र आत्मा रे परी की बोलेया था कि: “प्रभुए मेरे प्रभुए खे बोलेया: “मेरे दाँणे कनारे बैठ जडुओ तक आऊँ तेरे बैरिया खे तेरे पैरो निठे नि करी देऊँ।” 37 दाऊद तो आपू ई तेसखे प्रभु बोलोआ, तो आऊँ तेसरा पुत्र कियों ऊआ?” और जो पीड़ा रे लोक थे सेयो तिना री गल्ल खुश ऊई की सुणो थे। 38 यीशुए तिना खे आपणे उपदेशो रे बोलेया, “शास्त्रिया ते चौकस रओ, जो लाम्बे टाले पईनी की कूमदे रओए और बजारो रे नमस्कार, 39 और प्रार्थना रे कअरो रे खास-खास जगा और पाट्रिया रे खास जगा चाओए। 40 सेयो बिदुआ रे कअरो रे खास-खास जगा और दखाणे खे मुखती देर तक प्रार्थना करोए, इना खे जादा सजा मिलणी।” 41 यीशु मन्दरो रे दान-पात्रो रे सामणे बैठी की देखणे लगी रे थे कि लोक मन्दरो रे दान-पात्रो रे कियों पैसे पाओए और जादा अमीर लोके बऊत पाया। 42 तेबे एक कंगाल बिदुआ आई और तेसे दो दमडिया पाईया, जो एक तेअले रे बराबर थिया। 43 तेबे यीशुए आपणे चेलेया खे बुलाई की बोलेया, “आऊँ

तुसा खे सच लगी रा बोलणे कि जिने मन्दरो रे दान-पात्रो रे पाया, तिना बीचा ते एसे कंगाल बिदुए सबी ते जादा पाई राखेया। 44 कऊँकि सबी आपणे बऊत सारे खजाने बीचा ते थोड़ा जा पाया, पर एसे आपणी कमिया बीचा ते जो कुछ एसा गे था-मतलब-आपणी सारी कमाई पाई ती।”

13 जेबे यीशु मन्दरो ते निकलने लगी रे थे, तेबे तिना रे चेलेया बीचा ते एकी जणे तिना खे बोलेया, “ओ गुरु! देखो, कितणे बड़े-बड़े पात्थर ए और कितणे अच्छे-अच्छे भवन ए।” 2 यीशुए तेसखे बोलेया, “क्या तूँ ये बड़े-बड़े भवन लगी रा देखखे? इडे जो पात्थरो पॉंदि पात्थर लमी रे, सब टाले जाणे।” 3 जेबे यीशु जैतूनो रे पाहडो पॉंदि, मन्दरो रे सामणे थे बैठे रे, तेबे पतरस, याकूब, यूहने और अन्द्रियासे तिना ते लग जे जाई की पूछेया, 4 “आसा गे बताओ कि यो गल्ला कदी ऊणिया? और जेस बखते यो गल्ला पुरिया ऊणे वालिया ऊणिया, तेस बखते क्या चिह्न ऊणे?” 5 यीशुए तिना खे बोलेया, “चौकस रओ कि कोई तुसा खे बईकाओ नि। 6 बऊत एडे ऊणे, जो मेरे नाओं ते आऊणे और बोलणा, ‘आऊँ ई मसीह ए,’ और बऊत जणे बईकाणे। 7 जेबे तुसे लड़ाई और लड़ाईया रे बारे रे सुणो, तो कबराणा नि; कऊँकि इना रा ऊणा जरूरी ए, पर तेस बखते अंत नि ऊणा। 8 कऊँकि जातिया पॉंदि जातिया और राज्य पॉंदि राज्य अमला करना और बऊत जगा दे ईल्लण ऊणे, अकाल पड़ने। ये तो पीड़ा री शुरूआत ई ऊणी। 9 “पर तुसे आपणे बारे रे चौकस रओ, कऊँकि लोका तुसे पंचायती रे देई देणे और प्रार्थना रे कअरो रे कूटणे और मेरी बजअ ते हाकिमो और राजेया रे सामणे खडे करने, पर ये तुसा खे सुसमाचार सुनाणे रा मोका ऊणा। 10 पर जरूरी ए कि अंत आऊणे ते पईले सुसमाचार सबी जातिया रे प्रचार ओ। 11 जेबे सेयो तुसा खे लयी जाई की अधिकांश रे आथो रे देई देओगे, तो पईले तेई चिन्ता नि करनी, ‘आसा क्या बोलणा।’ पर जो कुछ तुसा गे तेस बखते बताणा, सेई बोलणा, कऊँकि बोलणे वाले तुसे नि ऊणे, बल्कि पवित्र आत्मा ऊणा। 12 पाईए आपणा पाई और पिते आपणे बच्चे काणे खे देई देणे, बाल-बच्चे आपणे माया-बावा रे खलाफ ऊणे और तिना सेयो कुलवाणे। 13 तुसे मां पॉंदि विश्वास कित्तेया इजी बजअ ते सबी लोका तुसा ते बैर राखणा, पर जो आखरी तक सब राखेगा, तेसरा ई उद्धार ऊणा। 14 “पढ़ने वाला समजी लओ। जेबे तुसे तेसा उजाड़ने वाली घृणित चीज जेतरे बारे दानियल भविष्यबक्ते बोलेया था, जेती ठीक निए तेती मतलब मन्दरो रे खडी री देखो, तेबे जो लोक यहूदिया प्रदेशो रे ओ, सेयो पाहडो खे नठी जाओ। 15 जो कोई छतो पॉंदि ओ, सेयो आपणे कअरे कुछ बी लणे खे थाले नि आओ और ना ई पीतरे जाओ 16 और जो कोई डोरूआ रे ओ, सेयो आपणे टाले लणे पीछे नि आओ। 17 तिना दिना रे जो गर्भवती ऊणी और जो दूद पलयाणे वाली ऊणी तिना खे हाय! हाय! 18 प्रार्थना करेया करो कि ये सब कुछ ठणडी रे दिना रे नि ओ। 19 कऊँकि तेस बखते एडे क्लेश ऊणे, जो सृष्टिया री शुरूआता दे, जो परमेशरे बणाई थी, आजो तक ना ऊआ और ना कदी फेर ऊणा। 20 और जे प्रभु तिना दिना खे नि कटादे, तो कोई प्राणी नि बचणा था; पर तिना परमेशरो रे चुणेया री बजअ ते, सेयो मुश्किल दिन कटाईते। 21 तेस बखते जे कोई तुसा खे बोलो, ‘देखो, मसीह एती ये’ या ‘देखो, मसीह तेती ये’ तो विश्वास नि करना। 22 कऊँकि चूठे मसीह और चूठे भविष्यबक्ता खडे ऊणे और तिना बड़े-बड़े चिह्न और अचम्बे रे काम दखाणे, जे ऊई सको तो जो परमेशरो रे चूणे रे ए, तिना खे बी भरमाई देओ। 23 पर तुसे चौकस रओ। देखो, मैं तुसा खे सारी गल्ला मुसीबत आऊणे ते पईले ई बताई ती रिया। 24 “तिना दिना रे, तेस क्लेशो ते बाद सूरजो रा चमकदा प्रयासा न्हैरा पड़ी जाणा और चांदे प्रयासा नि देणा। 25 और सर्गो ते तारे छुटणे शुरू ऊणे और सर्गो रिया शक्तिया इलाईया जाणिया। 26 तेबे लोका आऊँ माणू रा पुत्र बड़ी सामर्थ और महिमा साथे बादला रे आऊँदे ऊए देखणा। 27 तेस बखते मां आपणे स्वर्गदूत पेजणे और तरतिया रे एकी कनारे ते लई की सर्गो रे दूजे कनारे तक, चऊँ दिशा ते आपणे चूणे रे लोक कडे करेने। 28 “दाऊगले रे डालो ते एस उदारणो खे सीखो, जेबे तिजी री

डाली नरम ऊई जाओई और पत्ते निकलने लगी जाओए, तो तुसा खे पता लगी जाओआ कि तऊँदी आऊणे वाली ए। 29 ईयां ई जेबे तुसे इना गल्ला खे ऊँदे ऊए देखो, तो समजी जाणा कि एबे आँऊ नेडे ईए, बल्कि द्वारो पाँदे ईए खडेया रा। 30 आऊँ तुसा खे सच लगी रा बोलणे कि जदुओ तक यो सब गल्ला पुरिया नि ऊई जाओगिया, तदुओ तक एसा पीढिया रे लोका री मौत नि ऊणी। 31 सर्ग और तरती टली जाओगी, पर मेरा वचन कदी नि टलना। 32 “यो गल्ला कदी ऊणिया तेस दिनो रे बारे रे या तेसा कअडिया रे बारे रे कोई नि जाणदा, न स्वर्गदूत और ना पुत्र, पर बस पिता जाणोआ। 33 देखो, जागदे और प्रार्थना करदे रओ; कऊँकि तुसे नि जाणदे कि से बखत कदी जे आई जाणा। 34 ये तेस माणूए री जी दशा ए, जो परदेशो खे जाँदे ऊए आपणा कअर छाडी जाओ और आपणे दासा खे अक्क देई दो और हर एकी खे तेसरा काम बताई देओ और चौकीदार खे जाणणे री आज्ञा देओ। 35 “जागदे रओ, कऊँकि तुसे नि जाणदे कि कअरो रा मालक कदी जे आई जाणा, साँजा या आदी राथियो रे या मुर्गे री बांग देणे रे बखते या प्यागा। 36 एडा नि ओ कि से केथी अचाणक ई आई जाओ और तुसा खे सऊँदा ऊआ देखो। 37 से जो आऊँ तुसा खे बोलूँआ, सेई सबी खे बोलूँआ कि जागदे रओ!”

14 दो दिन बाद फसह रा त्योआर और बिना सजेडे री रोटिया रा त्योआर ऊणे वाला था। बडे पुरोईत और शास्त्री एडी गल्ला री टोला रे थे कि कियॉं यीशुए खे तोखे रे मरवाईए। 2 पर बोलो थे, “त्योआरो रे दिने नि, केथी एडा नि ओ कि लोका बीचे हुडदंग मची जाओ।” 3 जेबे यीशु बैतनिय्याह गांव रे शमौन जेसखे पईले कोह था तेसरे कअरे रोटी खाणे बैठे रे थे, तेबे एक जवाणस संगमरमरो रे पांडे (सुराई) रे जटामासिया रा मईगा और साफ इत्र लई की आई और पांडा तोड़ी की इत्र तिना रे सिरों रे लटी ता। 4 तेबे कोई-कोई गुस्सा करी की बोलणे लगे, “एस इत्रो रा सत्यानाश कऊँ कित्तेया? 5 कऊँकि ये इत्र तो तीन सौ चाँदिए रे सिक्केया रे मोलो ते जादा पैसेया रा बेची की कंगाला खे बाँडी सको थे।” सेयो तेसा खे थिडकणे लगे। 6 यीशुए बोलेया, “एसा खे छाडी देओ। एसा खे कऊँ सताणे लगी रे? एसे तो मां साथे पलाई ए किती री। 7 कंगाल तो तुसा साथे सदा रओए और तुसे जेबे चाओ, तेबे तिना साथे पलाई करी सकोए। पर आऊँ तुसा साथे सदा नि रणा। 8 जो कुछ ये करी सको थी, एसे कित्तेया, एसे मेरे दबाणे री त्यारिया ते पईले ई मेरे शरीरो रे इत्र मलीता। 9 आऊँ तुसा खे सच बोलूँआ कि सारी दुनिया रे जेती, केथी सुसमाचार प्रचार ऊणा, तेती एसा रे एस कामो री चर्चा, एसा री यादा रे ऊणी।” 10 तेबे यहूदा इस्करियोती, जो बारा चलेया बीचा ते एक था, बडे पुरोईतो गे गया, ताकि यीशु तिना रे आथे पकड़वाया जाओ। 11 सेयो ये सुणी की खुश ऊईगे और तेसखे पैसे देणा मंजूर कित्तेया। तेबे से मोका टोलने लगेया कि यीशुए खे कियॉं पकड़वाऊँ। 12 बिना सजेडे री रोटिया रे त्योआरो रे पईले दिने, जिदे सेयो फसह रे मिन्दूओ रा बलिदान करो थे, तिना रे चले तिना ते पूछेया, “तुसे केथी चाओए कि आसे तुसा खे फसह रे त्योआरो री रोटी खाणे री त्यारी कऊँ?” 13 यीशु आपणे चलेया बीचा ते दो जणे ये बोली की पेजे, “नगरो रे जाओ और तेती तुसा खे एक माणू मिलणा, जिने एके पाणिए रा कअडा ऊणा चकेया रा, तेस पीछे चली जाणा 14 और से जेते कअरो रे जाओगा, तेस कअरो रे मालको खे बोलणा, ‘गुरू बोलोआ, ‘मेरा बैठका रा कमरा, जेती आऊँ आपणे चलेया साथे फसह रे त्योआरो री रोटी खाऊँ, से केथी ए?’” 15 तेस तुसा खे एक सजी-सजाई री और त्यार किती री बडी बाऊडो दखाणी। तेती आसा खे फसह खाणे री त्यारी करो।” 16 तेबे चले निकली की नगरो खे आए और जेडा यीशुए तिना खे बोलेया था, तेडा ई पाया और फसह रे त्योआरो री रोटी त्यार किती। 17 जेबे साँज ऊई, तेबे यीशु बारा चलेया साथे तेती आए। 18 और जेबे सेयो रोटी खाणे लगी रे थे, तेबे यीशुए बोलेया, “आऊँ तुसा खे सच लगी रा बोलणे कि तुसा बीचा ते एक ए, जो मां साथे रोटी लगी रा खाणे, तेस आऊँ पकड़वाणा।” 19 चले उदास ऊईगे और

तिना बीचा ते एक-एक तिना खे पूछणे लगेया, “क्या से आऊँ ए?” 20 यीशुए तिना खे बोलेया, “से बारा बीचा ते एक ए, जो मां साथे थालिया रे आथ पाओआ। 21 आँऊ माणू रा पुत्र पक्का ई मरिया जाणा जेडा मेरे बारे रे पवित्र शास्त्रो रे लिखी राखेया, पर तेस माणूए खे हाय, जेस आऊँ पकड़वाणा। तेस माणूए खे खरा था कि से जमदा ई नि।” 22 जेबे सेयो खाणे ई लगी रे थे, तेबे यीशुए रोटी लयी और आशीष मांगी की तोड़ी और चलेया खे दिती और बोलेया, “लओ और खाओ, ये मेरा शरीर ए।” 23 तेबे तिने कटोरा लयी की धन्यवाद कित्तेया और तिना खे दितेया और तिने सबी तिजी ते पिया। 24 यीशुए तिना खे बोलेया, “ये मेरा से खून ए, जो परमेशर और तिना रे लोका बीचे नई वाचा ए, और बऊत जणेया रे पापो री माफिया खे बाह्या जाओआ। 25 आऊँ तुसा खे सच बोलूँआ कि मां अँगूरा रा रस तेस दिनो तक फेर कदी नि पीणा, जदुओ तक परमेशरो रे राज्य रे नया नि पीऊँगा।” 26 तेबे सेयो पअजन गायी की बारे जैतुनो रे पाहडो पाँदे गए। 27 तेबे यीशुए तिना खे बोलेया, “तुसे सब माखे छाडी की चली जाणे, कऊँकि लिखी राखेया, ‘मां रखवाला काई देणा और पेडा ओरे-पोरे ऊई जाणिया।’ 28 पर मां मुडदेया बीचा ते जिऊँदा ऊणे ते बाद, तुसा ते पईले गलीलो खे जाओ।” 29 पतरसे तिना खे बोलेया, “जे तुसा खे छाडी की सब जणे चली बी जाओ, तेबे बी मां तुसा खे छाडी की कदी नि जाणा।” 30 यीशुए तेसखे बोलेया, “आऊँ ताखे सच लगी रा बोलणे कि आज ई राती रे मुर्गे री दो बार बांग देणे ते पईले तू तीन बार माखे जाणने ते मुकरना।” 31 पर पतरसे ओर बी जोर देई की बोलेया, “जे माखे तुसा साथे मरना बी पडो, तो तेबे बी मां तुसा खे ना नि करनी।” ईयां ई ओरी सबी बी बोलेया। 32 तेबे सेयो गतसमनी नाओं री जगा रे आए और यीशुए आपणे चलेया खे बोलेया, “जदुओ तक आऊँ प्रार्थना कऊँआ, तदुओ तक तुसे एथी बैठे रे रओ।” 33 यीशु पतरस, यूहन्ना और याकूबो खे आपू साथे लईगे और बऊत ई बेचन और परेशान ऊणे लगे। 34 तेबे यीशुए तिना खे बोलेया, “मेरा जिऊ बऊत उदास ए, एथो तक कि आऊँ मरने पाँदे ए। तुसे एथी रूको और जागदे रओ।” 35 यीशु थोडे जे आगे गए और जमीना पाँदे पडी की प्रार्थना करने लगे कि, “जे ऊई सको तो ये दुःखो री कअडी मां पाँदो ते टली जाओ।” 36 और बोलेया, “ओ अब्बा! ओ पिता! तुसा ते सब कुछ ऊई सकोआ, एस दुःखो खे मांगा गे ते टाई दे, पर तेबे बी जेडा आऊँ चाऊँआ, तेडा नि, पर जो तुसे चाओए सेई ओ।” 37 तेबे यीशु आए और चले सये रे देखी की पतरसो खे बोलेया, “ओ शमौन तू सऊणे लगी रा? क्या तू एक कअडी पनि जागी सकेया? 38 जागदे और प्रार्थना करदे रओ, ताकि प्रीक्षा रे नि पडो; आत्मा तो त्यार ए, पर शरीर कमजोर ए।” 39 यीशु फेर चली गे और सेई प्रार्थना किती। 40 तेबे दूजी बार आई की सेयो सये रे देखे, कऊँकि तिना री आखी रे नीज थी और सेयो नि जाणो थे कि यीशुए खे क्या जवाब देईए। 41 तेबे यीशुए तीजी बार आई की बोलेया, “एबे सऊँदे रओ और आराम करदे रओ, बस से कअडी आईगी री। देखो, आँऊ माणू रा पुत्र पापिया रे आथे पकड़वाई जाऊणा। 42 उठो चलो। देखो, माखे पकड़वाणे वाला नेडे आईगा रा।” 43 सेयो ये बोलणे ई लगी रे थे कि यहूदा, जो बारा चलेया बीचा ते एक था, से आया। और तेस साथे बडे पुरोईत, शास्त्री, और बुजुर्गो री तरफा ते एक बडी पीड, तलवार और डण्डे लयी की फटाफट आईगी। 44 तिना खे पकड़वाणे वाले तिना खे बताई ता था, “जेसखे आऊँ नमस्ते कऊँ और गले लगूँ, सेई ऊणा और तुसे से पकड़ी की लई जाणा।” 45 तेबे यहूदा यीशुए गे आया और बोलेया, “ओ गुरू!” और तेसखे नमस्ते किती और गले लगेया। 46 तेबे तिने सेयो आथ पाई की पकड़ी ले। 47 तिना बीचा ते जो नेडे खडी रे थे, एकी जणे तलवार खिजी की प्रदान पुरोईतो रे दासो पाँदे चलाई और तेसरा कान ऊड़ाई ता। 48 यीशुए तिना खे बोलेया, “क्या तुसे आऊँ डाकु समजी राखेया, जो माखे पकड़ने री तंई डण्डे और तलवारी लई की आई रे? 49 आऊँ तो हर दिन तुसा साथे मन्दरो रे उपदेश देऊँ था और तेबे तो तुसे आऊँ नि पकड़ेया। पर ये सब कुछ तेबे ऊआ, ताकि पवित्र शास्त्रो रे मेरे बारे जो गल्ल भविष्यवक्ते लिखी राखी थी, से पूरी ओ।” 50 तेबे

तिना रे सारे चले तिना खे छाडी की नठीगे। 51 तेबे एक जवान आपणे नांगे शरीरो रे चादर टखी की तिना पीछे-पीछे चली गा और लोके से चेला समजी की पकड़ी ता। 52 पर से चादर छाडी की नांगा ई नठी गा। 53 तेबे सेयो यीशुए खे बड़े पुरोईतो रे कअरे लईगे और सब प्रदान पुरोईत, शास्त्री और बुजुर्ग तेसगे कट्टे ऊईगे। 54 पतरस दूरो तेई तिना पीछे-पीछे प्रदान पुरोईतो रे आँगणो रे पीतरो तक गया और चौकीदारा साथे बैठी की आग सेखणे लगेया। 55 बड़े पुरोईत और सारी बड़ी सभा यीशुए खे काणे री तँई, तिना रे खलाफ गवाई लगी रे थे टोलने, पर मिली नि। 56 कऊँके बऊत जणे तिना रे खलाफ चूठी गवाई लगी रे थे देणे, पर तिना री गवाई एक जेडी नि थी। 57 तेबे बऊत जणेया तिना रे खलाफ ये चूठी गवाई दिती कि 58 “आसे ये, ए बोलदे ऊए सुणी राखेया, “मां ये आथो साथे बणाया रा मन्दर टाली देणा और तीजे दिने दूजा बणाई देणा, जो आथो साथे नि बणे रा ऊणा।” 59 एते पाँदे बी सबी री गवाई एक जेडी नि निकली। 60 तेबे प्रदान पुरोईते, बीचे खडे ऊई की, यीशुए ते पूछेया, “क्या तूँ कोई जवाब नि देणा चांदा? यो लोक तेरे बारे रे क्या गवाई लगी रे देणे?” 61 पर यीशु चुप राए और कुछ बी जवाब नि दित्तेया। प्रदान पुरोईते तिना ते फेर पूछेया, “क्या तूँ परमधन्य परमेशरो रा पुत्र मसीह ए?” 62 यीशुए बोलेया, “आ, आऊँ आए; और तुसा आऊँ माणूँ रा पुत्र सर्वशक्तिमानो रे दाँणे कनारे बैदे रा और सांगो रे बादलो पाँदे आऊँदा ऊआ देखणा।” 63 तेबे प्रदान पुरोईते आपणे टाले फाड़ी की बोलेया, “एबे आसा खे गवाओ रा क्या काम ए? 64 तुसे ये निन्दा सुणी, तुसा री क्या राय ए?” तिने सबी बोलेया, “ये तो काणे जोगा ए।” 65 तेबे कोई तिना पाँदे थूकोने लगे, कोई मूँ टखणे लगे, कोई मुक्के बाणे लगे और तिना ते बोलणे लगे, “भविष्यबाणी कर।” और सिपाई तिना खे पकड़ी की थपड़ बाणे लगे। 66 जेबे पतरस आँगणो रे था, तेबे प्रदान पुरोईतो री दासिया बीचा ते एक तेती आई 67 और जेबे पतरस आग सेखणे लगी रा था, तेबे से तेसखे टकटक करी की देखणे लगी और बोलणे लगी, “तूँ बी तो तेस यीशु नासरियो साथे था।” 68 से मुकरी गा, और बोलणे लगेया, “आऊँ तो नि जाणदा और मेरी समजा रे नि आऊँदा कि तूँ क्या लगी री बोलणे।” तेबे से बारे देऊलिया गे गया और मुर्ग बांग दिती। 69 तेबे से दासी फेर तेसखे देखी की, जो तेती नेडे खड़ी रे थे, तिना गे बोलणे लगी, “ये तो तिना बीचा ते एक ए।” 70 पर से फेर मुकरी गा और थोड़ी देर बाद जो तेती खड़ी रे थे, तिने फेर पतरसो खे बोलेया, “पक्का तूँ तिना बीचा ते एक ए, तूँ बी तो गलीली ए, कऊँके तेरी बोलिया ते तूँ गलीली लगेओ।” 71 तेबे से आपू खे कोसणे लगेया और कसम खाणे लगेया, “जेस माणूए रे बारे रे तुसे बोलणे लगी रे, आऊँ तेसखे बिल्कुल पनि जाणदा।” 72 तेबे तेबुई मुर्ग दूजी बार फेर बांग दिती। तेबे पतरसो खे से गल्ल, जो यीशुए तेसखे बोली थी, याद आई कि, “मुर्गो री दो बार बांग देणे ते पईले तूँ तीन बार माखे जाणने ते मुकरना।” तेबे से एसा गल्ला सोची की जोरे-जोरे की रोणे लगेया।

15 प्यागा ऊँदे ई फटाफट बड़े पुरोईत, बुजुर्ग, शास्त्री और सारी बड़ी सभा सलाह किती कि एस साथे क्या करिए। तेबे यीशु बानी ते और तिना खे लईगे और पिलातुस हाकिमो रे आथो रे देई ते। 2 तेबे पिलातुसे तिना ते पूछेया, “क्या तूँ यहूदिया रा राजा ए?” यीशुए तेसखे बोलेया, “तूँ आपू ई लगी रा बोलणे।” 3 बड़े पुरोईत तिना पाँदे बऊत दोष लगाणे लगी रे थे। 4 पिलातुसे तिना ते फेर पूछेया, “क्या तांगे कोई जवाब ए देणे खे? देख, यो तां पाँदे कितणे दोष लगी रे लगाणे।” 5 यीशुए फेर बी कुछ जवाब नि दित्तेया। ये देखी की पिलातुस हैरान ऊईगा। 6 पिलातुस हर साल फसह रे त्योआरो रे एकी कैदियो खे, जेसखे सेयो बोलो थे, तिना खे छाडी देओ था। 7 तेस बखते बरअब्बा नाओँ रा एक माणू तिना हुडदंग करने वालेया साथे जेला रे था, जिने दंगेया रे अत्या किती थी। 8 तेबे पीड ऊबे जाई की तेसते बिनती करने लगी, “जेड़ा तुसे आसा खे करदे आए, तेड़ा ई करो।” 9 पिलातुसे तिना खे बोलेया, “क्या तुसे ये चाओए कि आऊँ तुसा खे यहूदिये रे राजे खे छाडी देऊँ?” 10 पिलातुस जाणो था कि बड़े पुरोईते यीशुए ते

जलन राखेओ, तेबेई तिने से पकड़वाया। 11 पर बड़े पुरोईते लोक ऊकसाए, “बरअब्बे खे आसा खे छाडी देओ।” 12 ये सुणी की पिलातुसे तिना ते फेर पूछेया, “जेसखे तुसे यहूदिया रा राजा बोलोए, तेस साथे क्या करूँ?” 13 सेयो ओर बी चिंगणे लगे, “एसखे क्रूसो पाँदे चढ़ाओ।” 14 पिलातुसे तिना खे बोलेया, “कऊँ?, इने क्या बुरा करी राखेया?” पर सेयो और बी चिंगणे लगे, “एसखे क्रूसो पाँदे चढ़ाओ।” 15 तेबे पिलातुसे पीड़ा खे खुश करने री ईच्छा ते बरअब्बा तिना खे छाडीता, और यीशुए खे कोड़े लगवाई की तिना गे सम्बाली ता कि क्रूसो पाँदे चढ़ाया जाओ। 16 तेबे रोमी सिपाई यीशुए खे पीतरे आँगणो दे लईगे, जेतेखे प्रीटोरियम राज्यपालो रा मुख्यालय बी बोलोए, और सारी सिपाईया री पलटण बुलाई। 17 तेबे तिने यीशुए खे बैंगणी टाले पणयाए और कांडेया रा मुकट बूणी की तिना रे सियो पाँदे राखी ता। 18 और तिना खे ये बोली की तिना रा मजाक उड़ाणे लगे, “हे यहूदिया रे राजा, नमस्कार।” 19 सेयो तिना रे सियो पाँदे नगलो रे डण्डे की बाओ थे, तिना पाँदे थूको थे और कूटणे टेकी की माथा टेको थे। 20 जेबे सेयो तिना रा मजाक उड़ाई चूके, तेबे तिना पाँदो ते बैंगणी टाले खुलाई ते और तिना रेई टाले पणयाईते और यीशुए खे क्रूसो पाँदे चढ़ाणे खे बारे ली आए। 21 जेबे सेयो यीशुए खे क्रूसो पाँदे चढ़ाणे खे लयी चली रे थे। तेबे सिकन्दर और रूपुसो रा पिता, शमीन नाओँ रा एक कुरेनी माणू, जो दूजे गेने ते आऊणे लगी रा था, तेसी बखते से तिसिये निकलेया। तेबे सिपाईए से ईयाँ ई पकड़ी ता कि यीशु रा क्रूस चकी की लई चल। 22 तेबे सेयो यीशुए खे गुलगुता नाओँ री जगा रे पकड़ी की लईगे, जेतेखे खोपडिया री जगा बी बोलोए। 23 तेबे सेयो तिना खे मुर्न नाओँ री जडी बूटी मलाई की अँगूरा रा रस पीणे खे देणे लगे, पर तिने नि पिया। 24 तेबे तिने यीशु क्रूसो पाँदे चढ़ाए और तेबे तिना रे टाले रिया चिट्टिया पाईया कि केसी खे क्या मिलणा, और सेयो बांडी ते। 25 तेबे प्यागा रे नो बजे रा बखत था, जेबे तिने सेयो क्रूसो पाँदे चढ़ाई ते। 26 और तिना रा दोष-पत्र लिखी की क्रूसो पाँदे तिना पाँदे लगाई ता कि “यहूदिया रा राजा।” 27 तेबे तिने दो डाकु, एक तिना रे दाँणे कनारे और एक खूँजे कनारे, क्रूसो पाँदे चढ़ाए। 28 तेबे धर्मशास्त्रो रा से वचन कि, “से अपराधिया साथे गिणेया जाणा” पूरा ऊआ। 29 बाटा रे जाणे वाले सिर इलाई-इलाई की ये बोली की तिना री निन्दा करो थे, “वाह! मन्दरो खे टालने वाले और तीन दिना रे बनावे वाले, 30 क्रूसो पाँदा ते उतरी की आपणे आपू खे बचा।” 31 ईयाँ बड़े पुरोईत बी, शास्त्रिया साथे, आपू बीचे मजाक करो थे, “इने ओर तो बचाए, पर आपू खे नि बचाई सकेया। 32 इसाएला रा राजा मसीह, एबे क्रूसो ते ऊतरी की तो आओ, ताकि आसे बी देखी की विश्वास करिए।” जो तिना साथे क्रूसो पाँदे चढ़ाए राखे थे, सेयो बी तिना री निन्दा करो थे। 33 और जेबे त्याड़ी ऊई, तेबे सारे देशो रे न्हारा ऊईगा और तीजे पईरो तक रया। 34 तीजे पडरो रे यीशुए जोरे की बोलेया, “इलोई, इलोई लमा शबकनी?” जेतेरा मतलब ए, “ओ मेरे परमेशर, ओ मेरे परमेशर! तुसे आऊँ कऊँ छाडीता?” 35 जो नेडे थे खड़े रे, तिना बीचा ते कुछ जणेया ये सुणी की बोलेया, “देखो, ये एलिय्याहो खे आक्का पाणे लगी रा।” 36 तेबे एकी जणे दोड़ी की स्पंज सिरके रे डबोया और नगलो रे डण्डे पाँदे राखेया और तिना खे चुसाया, और बोलेया, “चलो थोड़ा रूकी कि देखूँ कि एलिय्याह एसखे उतारने आओआ कि नि।” 37 तेबे यीशुए जोरे की चींगी की प्राण छाडी ते। 38 तेबे मन्दरो रा पड़दा पाँदो ते लई की थालो तक फटीगा और तिजी रे दो टुकडे ऊईगे। ए ये दखाओ कि एबे कोई बी माणू परमेशरो री हजुरिया रे जाई सकोआ। 39 जो सूबेदार तेती था खड़े रा, जेबे तिने यीशु ईयाँ चींगी की प्राण छाडे ऊए देणे, तो तेबे तिने बोलेया, “सच्ची ये तो परमेशरो रा पुत्र था।” 40 कुछ जवाणसा दूरो ते देखणे लगी री थिया, तिना बीचा ते मरियम मगदलिनी और छोटे याकूब और योसेसो री आम्मा मरियम और सलोमी थिया। 41 जेबे यीशु गलील प्रदेशो रे थे, तेबे सेयो तिना पीछे-पीछे जाओ थिया और तिना री सेवा करो थिया, ओर बी कई जवाणसा थिया, जो तिना साथे यरूशलेम नगरो रे आईया थिया। 42 जेबे साँज ऊई, तेबे, कऊँके से त्यारिया रा दिन था, जो आरामो रे एक दिन पईले ओआ,

43 तेबे अरिमतियाह रा रणे वाला यूसुफ आया, जो बड़ी सभा रा खास जाणेया-मानेया रा सदस्य था और आपू बी परमेशरो रे राज्य री बाट न्यालो था। से याओ करी की पिलातुसो गे गया और यीशुए री लोथ मांगी। 44 पिलातुस हैरान ऊईगा कि से ईतणे चट मरी गा; तेबे तिने सूबेदार बुलाया और तेसते पूछेया, “क्या यीशु सच्ची मरी गा?” 45 जेबे तिने सूबेदारो ते सारा आल जाणी ला, तेबे पिलातुसे लोथ यूसुफो खे दलाई ती। 46 तेबे तिने एक मलमलो री चादर खरीदी और लोथ ऊतारी की चादरी रे लपेटी और कब्रा रे राखी, जो चट्टानी रे थी खणी री। तेबे कब्रा रे द्वारो पाँदे एक पात्थर खसकेईता। 47 तेबे मरियम मगदलिनी और योसेसो री आम्मा मरियम देखणे लगी री थिया कि तिने यीशुए री लोथ केयी राखी रिये।

16 जेबे आरामो रा दिन बीती गा, तेबे मरियम मगदलिनी और याकूबो री आम्मा मरियम और सलोमिए, अच्छी बासी वालिया चीजा मोले लईया, ताकि आई की तिना पाँदे मलिए। 2 और अप्तरे रे पईले दिने, जेबे प्याग ऊई और सूरज निकलेया ई था, तेबे सेयो कब्रा गे आईया। 3 और आपू बीचे बोलणे लगीया, “आसा खे कब्रा रे द्वारो पाँदे ते पात्थर केस टाणा?” 4 जेबे तिने आखी चकिया तो देखेया कि पात्थर तो कनारे टाये राए। कऊँकि से बऊत बड़ा था। 5 तेबे कब्रा रे पीतरे जाई की तिने एक जवान सफेद टाले पड़ने रा और दाणे कनारे बैठे रा देखेया और सेयो बऊत हैरान ऊई गया। 6 तिने तिना खे बोलेया, “डरो नि। तुसे जेस यीशु नासरिये खे, जो कूसो पाँदे लटकाया था, टोलने लगी रिया। से जिऊँदा ऊईगा रा, से एती निए देखी लो; ये सेई जगा ए जेती से राखी राखेया था। 7 पर तुसे जाओ और तिना रे चलेया खे और पतरसो खे बोलो, ‘सेयो तुसा ते पईले गलील प्रदेशो रे पऊँछी जाणे, जेड़ा तिने तुसा खे बोलेया था, तुसा से तेथी देखणा।’” 8 तेबे सेयो कब्रा गे ते नठी गिया, कऊँकि सेयो कबराई गिया थिया और तिना रे थुरनी छूटी गी थी, तिने डरो रे मारे केसी गे कुछ नि बोलेया। 9 (note: The most reliable and earliest manuscripts do not include Mark 16:9-20.) अप्तरे रे पईले दिने प्यागा ई, जेबे यीशु मरे रेया बीचा ते जिऊँदे ऊए तेबे सबी ते पईले मरियम मगदलिनिया खे दिशे। पईले जेसा ते तिने सात दुष्टात्मा निकयालिया थिया। 10 तेसे जाई की तिना रे चलेया गे, जो बऊत दुःखी थे और रोणे लगी रे थे, तिना गे समाचार सुणाया। 11 पर तिने मरियम मगदलीनिया री गल्ला पाँदे विश्वास नि कित्तेया कि यीशु जिऊँदे ऊईगे रे और तेसे सेयो देखे। 12 तिजी ते बाद यीशु दूजे रूपो रे तिना बीचा ते दूई जणेया खे दिशे, जेबे सेयो गांव खे जाणे लगी रे थे। 13 तिने बी जाई की ओरी खे समाचार दित्तेया, पर तिने तिना पाँदे बी विश्वास नि कित्तेया। 14 बादो ते यीशु तिना ग्यारा चलेया खे बी दिशी गे, जेबे सेयो रोटी लगी रे थे खाणे और तिना रे अविश्वासो और काठे मनो खे लवामा दित्तेया, कऊँकि जिने सेयो जिऊँदे ऊणे ते बाद देखे थे, तिने तिना रा विश्वास नि कित्तेया। 15 यीशुए तिना खे बोलेया, “तुसे सारी दुनिया रे जाई की सारी सृष्टिया रे लोका खे सुसमाचार प्रचार करो। 16 जेस विश्वास करना और बपतिस्मा लणा, तेसरा ई उद्धार ऊणा, पर जेस विश्वास नि करना से दोषी ठईराया जाणा। 17 और विश्वास करने वालेया रे ये चिह्न ऊणे कि तिना मेरे नाओ ते दुष्टात्मा निकयालनिया; नई-नई पाषा बोलणिया; 18 साप चकी देणे और जे सेयो नाश करने वाली चीज बी पी लओगे, तो तेबे बी तिना खे कुछ नि ऊणा, तिना बमारा पाँदे आथ राखणा और सेयो ठीक ऊई जाणे।” 19 तिना साथे गल्ला करने ते बाद प्रभु यीशु स्वर्गो खे चकी ते और सेयो परमेशरो रे दाँणे कनारे बैठे। 20 तेबे चलेया हर जगा प्रचार कित्तेया, प्रभु तिना साथे काम करदे राए, और तिना चिह्ना साथे, जो साथे-साथे ऊणे लगी रे थे, और ये सामणे ल्याऊँदे राए कि परमेशरो रा ये सन्देश सच्चा ए। आमीन्।

लूका

1 बऊत जणेया सेयो गल्ला, जो आसा बीचे ओईया, इतियास लिखणे रे आसा री मताद किती, 2 जेड़ा कि पईले ई तिने जो इना गल्ला खे देखणे वाले और वचनो खे मानणे वाले सेवक थे, आसा गे पऊँछाईया। 3 तेबेई तो, ओ श्रीमान् थियुफिलुस! माखे बी ये ठीक लगेया कि तिना सबी गल्ला रा सारा आल शुरूओ तेई ठीक-ठीक पता लगाई की तिना ताखे एक-एक करी की लिखूँ। 4 ताकि तूँ ये जाणी लो कि यो गल्ला, जिना री तें शिक्षा पाई राखी, केडिया अटल ए। 5 यहूदिया प्रदेशो रे राजा हेरोदेसो रे बखते अबिय्याहो रे दलो रे जकरयाह नाओं रा एक पुरोईत था और तेसरी लाडिया रा नाओं इलीशिबा था। ये दोनो लाड़ा-लाडी हारूणो रे कुलो रे थे। 6 सेयो दोनो परमेशरो सामणे तर्मा थे और परमेशरो री सारी आज्ञा और बिधिया पाँदे निर्दोष चलो थे। 7 तिना रे कोई ल्वाद नि थी, कऊँकि इलीशिबा बांझ थी और सेयो दोनो स्याणे ऊईगे थे। 8 एक दिन जेबे जकरयाह आपणे दलो री बारिया पाँदे परमेशरो सामणे पुरोईतो रा काम करो था। 9 तेबे पुरोईता री रवाजा रे मुताबिक, तेसरे नाओं री चिट्ठी निकली, कि परमेशरो रे मन्दरो रे जाई की तूप बाल। 10 और तूप बालने रे बखते, लोका री सारी मण्डली बारे मन्दरो रे आँगणो रे प्रार्थना करने लगी री थी। 11 तेबे जकरयाहो खे प्रभुए रा स्वर्गदूत तूपो री वेदिया रे दाँणे कनारे खडेया रा दिशेया। 12 जकरयाह तेसखे देखी की कबराईगा और बऊत डरीगा। 13 पर स्वर्गदूते तेसखे बोलेया, “ओ जकरयाह! डर नि, कऊँकि परमेशरे तेरी प्रार्थना सुणी ली री और जो तेरी लाडी इलीशिबा ए, तेसा रे ताखे एक पाऊ जमणा और तें तेसरा नाओं यूहन्ना राखणा। 14 ताखे आनन्द और खुशी ऊणी और बऊत सारे लोक तेसरे जमणे ते खुश उणे। 15 कऊँकि से परमेशरो सामणे महान् ऊणा, तेस अँगूरा रा रस और शराब कदी नि पीणा और से आपणी माया रे गर्भो तेई पवित्र आत्मा ते परेया रा ऊणा। 16 तेस इस्राएलो बीचा ते कई जणे, तिना रे प्रभु परमेशरो री तरफा खे फेरने। 17 से एलिव्याह री आत्मा और सामर्था रे ऊई की तेसरे आगे-आगे चलणा ताकि पितरा रा मन बाल-बच्चेया री तरफा खे फेरो। आज्ञा नि मानणे वालेया खे तर्मिया री समजा रे ल्याओ और प्रभुए खे एक लायक प्रजा तयार करो।” 18 जकरयाह स्वर्गदूतो ते पूछेया, “ये आऊँ कियॉ जाणूँ कि एड़ा ई मां साथे ऊणा? कऊँकि आऊँ और मेरी लाडी तो स्याणे ऊईगे रे।” 19 स्वर्गदूते तेसखे बोलेया, “आऊँ जिब्राईल ए, जो परमेशरो सामणे खड़ा रओआ। आऊँ तां साथे गल्ला करने और ये सुसमाचार सुनाणे रिया तंई पेजी राखेया 20 और देख जदुओ तक यो गल्ला पुरिया नि ऊई जाओगिया, तदुओ तक तूँ चुप रणा और बोली नि सकदा। कऊँकि तें मेरिया गल्ला पाँदे कि सेयो आपणे बखते पूरिया ऊणिया, विश्वास नि कितेया।” 21 लोक जकरयाहो खे न्यालदे रए और हैरान ऊईगे कि तेसखे मन्दरो रे इतणी देर कियॉ ऊईगी? 22 जेबे से बारे आया, तेबे से तिना साथे गलाई नि सकेया, तेबे तिना खे पता लगी गा कि तिने मन्दरो रे कोई दर्शन पाई राखेया, से तिना साथे साअरे रे गल्ला करदा रया और गूँगा ऊईगा। 23 जेबे मन्दरो रे तेसरे पुरोईतो रे कामो री सेवा करने रे दिन पूरे ऊईगे, तेबे से यरूशलेमो नगरो खे छाडी की आपणे कअरो खे चली गा। 24 तेबे तेसरी लाडी इलीशिबा गर्भवती ऊईगी और पाँज मीन्ने तक आपू खे कअरे ये बोली की लकोए रे राखेया, 25 “माणूए जो मेरी बेजजती करी राखी, तिजी खे दूर करने खे, परमेशरे मां पाँदे कृपा करने खे एड़ा करी राखेया।” 26 इलीशिबा रे गर्भवस्था रे छटुए मीन्ने परमेशरो री तरफा ते जिब्राईल स्वर्गदूत गलील प्रदेशो रे नासरत नाओं नगरो रे, 27 एक कुआँरिया गे पेजेया। तेसारी मंगणी यूसुफ नाओं रे दाऊदो रे कराने रे एक माठे साथे ऊई थी। तेसा कुआँरिया रा नाओं मरियम था। 28 स्वर्गदूते तेसा गे पीतरे आयी की बोलेया, “खुशी और जय तेरी ओ, जेस पाँदे परमेशरो री कृपा ऊई री, प्रभु तां साथे ए।” 29 से तेस वचनो ते बऊत कबराई गी और सोचणे लगी कि ये केडी गल्ल ए? 30 स्वर्गदूते तेसा खे बोलेया, “ओ मरियम! डर

नि कऊँकि परमेशरो री कृपा तां पाँदे ऊई री। 31 देख, तूँ गर्भवती ऊणी, तेरे एक पाऊ जमणा और तें तेसरा नाओं यीशु राखणा। 32 से महान् ऊणा, और परमप्रदानो रा पुत्र ऊणा और प्रभु परमेशरे तेसरे पुरखा दाऊदो रा सिंहासन तेसखे देणा। 33 और तेस याकूबो रे कराने रे सदा राज्य करना और तेसरे राज्य रा अंत कदी नि ऊणा।” (aiōn g165) 34 मरियमे स्वर्गदूतो खे बोलेया, “ये कियॉ ऊणा? आऊँ तो मर्दो खे जाणदी ई नि, कऊँकि आऊँ तो एबु कुँवारी ए।” 35 स्वर्गदूते तेसा खे जवाब दितेया, “पवित्र आत्मा तां पाँदे उतरना और परमप्रदानो री सामर्थं तां पाँदे छाँयॉ करनी, तेबेई तो से, जो जमणे वाला ए, तेसखे पवित्र और परमेशरो रा पुत्र बोलेया जाणा। 36 देख, तेरे टब्बरो री इलीशिबा रे बी स्याणदे बखते पाऊ ऊणे वाला ए। ये तेसा रा, जेसा खे बांझ बोलोए, छटा मीन्ना चली रा। 37 कऊँकि परमेशर सब कुछ करी सकोआ।” 38 मरियमे बोलेया, “देख, आऊँ परमेशरो री दासी ए, मां साथे तेरे वचनो रे मुताबिक ओ।” तेबे स्वर्गदूत तेसा गे ते चली गा। 39 तिना दिना रे मरियम उठी की फटाफट पाहडी इलाके रे यहूदा प्रदेशो रे एक नगरो खे गई 40 और तेसे जकरयाहो रे कअरे जाई की इलीशिबा खे नमस्ते किती। 41 जियॉ ई इलीशिबे मरियमा री नमस्ते सुणी, तियॉ ई बच्चा तेसा रे पेटो रे उटकैया और इलीशिबा पवित्र आत्मा ते फरी गी। 42 तेबे तेसे मरियमा खे जोरे की बोलेया, “तूँ सबी जवाणसा बीचे धन्य ए और जेस बच्चे खे तां जन्म देणा से बी धन्य ए। 43 ये कृपा मां पाँदे केथा ऊई कि मेरे प्रभुए री आम्मा मांगे आयी? 44 जियॉ ई मैं तेरी नमस्ते सुणी, तियॉ ई बच्चा मेरे पेटो रे खुश ऊई की उटकणे लगेया। 45 धन्य ए से, जिने विश्वास कितेया कि जो गल्ला प्रभुए री तरफा ते तेसा गे बोलिया, सेयो पुरिया ऊणिया।” 46 तेबे मरियमे बोलेया, “मेरा प्राण प्रभुए री बढ़ाई करोआ। 47 और मेरी आत्मा मेरा उद्धार करने वाले परमेशरो ते खुश ए। 48 कऊँकि तिने आपणी दासिया कनारो खे देखेया, तेबेई तो, देखो, आजो ते सारे जुगा-जुगा रे लोका माखे धन्य बोलणा। 49 कऊँकि तिने शक्तिमाने मेरे बड़े-बड़े काम करी राखे और तेसरा नाओं पवित्र ए। 50 तेस परमेशरो री दया, जो तेसते डरोए, पीढिया री पीढिया तक बणी री रओई। 51 तिने आपणे आथो रे जरिए सामर्था रे काम दिखाए और जो आपू खे बड़ा समजोए, सेयो रूलाई ते। 52 तिने राजेया रा राज खत्म करी ता और शरीफ ऊच्चे किते। 53 तिने पूखे अच्छी चीजा ते रजाए और अमीर खाली आणे निकयाली ते। 54 तिने आपणा सेवक इस्राएल सम्भाली ता। ताकि आपणी तेसा दया रे वादे खे याद कइँ, 55 जो अब्राहम और तेसरे कुलो पाँदे सदा रणी, जेड़ा तिने म्हारे बाओ-दादेया खे बोलेया था।” (aiōn g165) 56 मरियम तकरीबन तीन मीन्ने तक तेती रई और तेबे कअरो खे चली गी। 57 तेबे इलीशिबा रे बच्चा पैदा करने रा बखत पूरा ऊईगा और तेसा रे एक पाऊ जम्मेया। 58 तेसा रे पड़ोसी और टब्बरो वालेया जेबे ये सुणेया कि प्रभुए तेसा पाँदे बडी पारी दया करी राखी, सेयो तेसा साथे बऊत खुश ऊए। 59 तेबे एड़ा ऊआ कि सेयो आठुए दिने बालको रा खतना करने आए और तेसरा नाओं, तेसरे बाओ रे नाओं पाँदे जकरयाह राखणे लगे। 60 तेबे बच्चे री आम्मे बोलेया, “ना; एसरा नाओं यूहन्ना राखणा।” 61 तेबे तिने बोलेया, “तेरे टब्बरो रे एड़ा नाओं केसी रा निए।” 62 तेबे तिने तेसरे बाओ ते साअरे रे पूछेया, “तूँ एसरा क्या नाओं राखणा चाएया?” 63 तेबे तिने लिखणे री पट्टी मुंगाई की लिखी ता, “एसरा नाओं यूहन्ना ए” और सब हैरान ऊईगे। 64 तेबे तेसरा मूँ और जीब तेबुई खुली गी। तेबे से बोलणे जोगा ऊईगा और परमेशरो रा धन्यवाद करने लगेया। 65 तेसरे ओरे-पोरे रे वराले लोक डरी गे और तिना सबी गल्ला री चर्चा यहूदिया प्रदेशो रे सारे पाहडी इलाके रे फैली गी। 66 सब सुणने वाले आपणे-आपणे मनो रे बिचार करने लगे, “ये बालक केड़ा ऊणा?” कऊँकि परमेशरो रा आथ तेस साथे ए। 67 तेबे तेसरा पिता जकरयाह पवित्र आत्मा ते परी गा और भविष्यवाणी करने लगेया, 68 “प्रभु इस्राएलो रा परमेशर धन्य ए, जो तिने आपणे लोका कनारो खे देखेया और तिना खे छुटकारा दितेया 69 और आपणे सेवक दाऊदो रे कराने रे आसा खे उद्धारकर्ता पेजी राखेया। 70 जेड़ा तिने आपणे पवित्र भविष्यबक्तेया ते

बुलवाया था, जो दुनिया रे शुरूओ ते ऊँदे ऊए आयी रे (aiōn g165) 71 मतलब-आसा रे दुश्मणा ते और बैरिया रे आथो ते म्हारा उद्धार करी राखेया। 72 ताकि आसा रे बाप-दादिया पाँदे कृपा करी की आपणी पवित्र वाचा याद राखो 73 और से कसम जो तिने आसा रे पिते अब्राहमो साथे खाई थी 74 कि तेस आसा खे ये देणा, ताकि आसे आपणे दुश्मणा रे आथो ते बची की 75 परमेशरो सामणे पवित्रता, और धार्मिकता साथे सारी जिन्दगी नचके रई की तेसरी सेवा करदे रईए। 76 ओ बालक! ताखे परमप्रदान परमेशरो रा भविष्यबक्ता बोलेया जाणा, कऊँकि तूँ प्रभुए री बाट त्यार करने खे तिना रे आगे-आगे चलणा। 77 ताकि तिना रे लोका खे उद्धारो रा ज्ञान देई सके, जो तिना रे पापो री माफिया ते मिलोआ। 78 ये आसा रे परमेशरो री तेसा बड़िया दया ते उणा; जेसरी बजअ ते, स्वर्गो ते आसा पाँदे प्यागा रा प्रयासा उणा। 79 ताकि न्हँरे रे और मरने वालेया खे जिन्दगी देई सको, और आसा रे पैरा खे शान्तिया री बाटा रे सिदे चलाई सको।” 80 तेबे से बालक यूहन्ना बड़दा और आत्मा रे तागतबर ऊँदा गया और इस्राएलो रे सामणे आऊणे रे दिना तक, जंगलो रे रया।

2 तिना दिना रे रोमी महाराजा अगस्तुस कैसरो री तरफा ते आज्ञा निकली की सारे रोमी साम्राज्य रे लोका री गणना कित्ती जाओ। 2 ये पईली गणना तेस बखते ऊई, जेबे क्विरिनियुस सीरिया प्रदेशो रा राज्यपाल था। 3 तेबे सब लोक नाओँ लिखाणे खे आपणे-आपणे नगरो खे गए। 4 तेबे यूसुफ बी इजी री खातर कि से दाऊदो रे कराने और कुलो रा था, गलीलो रे नासरत नगरो ते, यहूदिया दे, दाऊदो रे नगर बैतलहमो खे गया। 5 ताकि आपणी मंगेतर मरियमा साथे, जो गभवती ए, नाओँ लिखाऊँ। 6 जेबे सेयो बैतलहम पऊँछे तेबे मरियमा रे बच्चा जमणे रिया पीड़ा लगी गिया। 7 तेसा रे पईला बच्चा पाऊ ऊआ, तेसे से टालेया साथे लपेटी की डांगरा री खुरलिया रे राखेया, कऊँकि तिना खे संरायी रे रणे खे जगा नि मिली। 8 तेस देशो रे बऊत गादी थे, जो राती मैदानो रे रई की आपणे चूणडो रा पईरा देयो थे। 9 तेबे परमेशरो रा एक स्वर्गदूत तिना रे सामणे आयी की खड़ा ऊईगा और परमेशरो रा तेज तिना रे चऊँ कनारे चमकणे लगेया और सेयो बऊत डरी गे। 10 तेबे स्वर्गदूत तिना खे बोलेया, “डरो नि, कऊँकि देखो आऊँ तुसा खे बऊत खुशिया रा सुसमाचार सुनाणे आयी रा, जो सारे लोका खे उणा। 11 कि आज दाऊदो रे नगर बैतलहमो रे तुसा खे एक उद्धारकर्ता जम्मी रा और येई मसीह प्रभु ए। 12 और इजी रा पता तुसा खे ईयाँ लगणा, तुसा खे एक बालक टालेया रे लपेटेया रा और डांगरा री खुरलिया रे पड़ेया रा मिलणा।” 13 तेबे एकदम तेस स्वर्गदूतो साथे, स्वर्गदूता रा एक दल, परमेशरो री स्तुति करदे ऊए और ये बोलेदे ऊए दिशेया, 14 “स्वर्गो रे परमेशरो री महिमा और तरतिया रे, तिना मांणूआ खे जिना ते आऊँ खुश ए, शान्ति ओ।” 15 जेबे स्वर्गदूत तिना गे ते स्वर्गो खे चली गे, तेबे गादी आपू बीचे बोलणे लगे, “आओ आसे बैतलहमो खे चलूँए और जो गल्ल प्रभुए आसा गे बताई राखी, तेसा देखूँए।” 16 तेबे तिने तेबुई जाई की मरियम और यूसुफ और डांगरा री खुरलिया रे से बालक लेटेया रा देखेया। 17 इना खे देखी की से गल्ल जो एस बालको रे बारे रे तिने बोली थी, सामणे आयी। 18 सबी सुणने वालेया, तिना गल्ला ते जो गाहिये तिना गे बताईया थिया, हैरान ऊईगे। 19 पर मरियम इना सबी गल्ला खे आपणे मनो रे सोचदी रई। 20 तेबे गादी परमेशरो री स्तुति और गुणगाण करदे ऊए वापस चली गे, कऊँकि जो कुछ तिने देखी राखेया था, से ठीक तेड़ा ई था जेड़ा स्वर्गदूते तिना खे बोली राखेया था। 21 जेबे आठ दिन पूरे ऊईगे और खतने रा बखत आया, तेबे तेसरा नाओँ यीशु राखेया, जो स्वर्गदूते तेसरे मरियमा रे पेटो रे आऊणे ते पईले बताया था। 22 जेबे मूसे रा बिधानो रे मुताबिक मरियम और यूसुफो रे शुद्ध ऊणे रे दिन पूरे ऊए, तेबे सेयो यरूशलेम मन्दरो खे गए। सेयो बालक यीशुए खे बी आपू साथे यरूशलेमो रे मन्दरो रे ल्याए कि तेसखे प्रभुए रे सामणे अर्पण करी 23 जेड़ा प्रभुए रा बिधानो रे लिखी राखेया, “हर एक जेठा बालक प्रभुए खे पवित्र उणा।” 24 मरियम और यूसुफो रे शुद्ध ऊणे खे

प्रभुए रा बिधानो रे वचनो रे मुताबिक कृगीया रा एक जोड़ा या कबूतरो रे दो बच्चे ल्याई की बलिदान करी। 25 तेस बखते यरूशलेमो रे शमोन नाओँ रा एक मांणू था, से तर्मी और भक्त था और इस्राएलो री शान्ति और मसीह रे आऊणे री बाट न्यालो था और पवित्र आत्मा तेस पाँदे था। 26 पवित्र आत्मा ते तेसखे चेतावणी मिली थी कि जदुओ तक तूँ प्रभुए रे मसीह खे नि देखी लएगा, तदुओ तक मरना नि। 27 तेबे से आत्मा रा सिखाया, मन्दरो रे आया, जेबे माए-बाओ बालक यीशुए खे पीतरे ल्याए, ताकि तेसखे बिधानो री रवाजा रे मुताबिक कहुँए 28 तेबे तिने से बालक आपणी गोदा रे लया और परमेशरो रा धन्यवाद करी की बोलेया, 29 “ओ स्वामी! एबे तूँ आपणे दासो खे आपणे वचनो रे मुताबिक बेफिकर ऊई की एते दुनिया ते बिदा कर। 30 कऊँकि मेरी आखी तेरा उद्धार देखी ला रा। 31 जो तुसे सबी लोका रे सामणे त्यार करी राखेया। 32 ताकि से दूजी जातिया खे सच्चाईया खे सामणे ल्याऊणे खे एक जोति देओ और तेरे आपणे इस्राएलो रे लोका री महिमा ओ।” 33 यीशुए रे माए-बाओ, तिना गल्ला ते, जो शमोन तेसरे बारे रे बोली थी, हैरान ऊईगे। 34 तेबे शमोन तेसखे आशीष देई की तेसरी आम्मा मरियमा खे बोलेया, “देख ये तो इस्राएलो रे बऊत जणेया रे रूडने, उठणे खे और एक एड़ा चिह्न ऊणे खे ठईराई राखेया, जेसरे खलाफ बऊत गल्ला उणेया। 35 एथो तक तेरा प्राण बी तलवारी रे वारो साथे पार छोटी जाऊणा। इजी ते बऊत मनो रे बिचार प्रगत ऊणे।” 36 आशरो रे गोत्रो बीचा ते हन्नाह नाओँ री फनुएलो री बेटी एक भविष्यबक्तणी थी। से बऊत स्याणी थी और ब्या ऊणे ते बाद आपणे लाड़े साथे बस सात साल तक ई रई। 37 से चुरासी साला ते बिदुआ थी और जादातर मन्दरो रे रओ थी, से बअरत और प्रार्थना करी की रात-दिन भक्ति करदी रओ थी। 38 तेबे से तेस बखते तेती आयी की परमेशरो रा धन्यवाद करने लगी और तिना सबी खे जो यरूशलेमो रे लोका खे छुटकारे री बाट न्यालो थे, तेसरे बारे रे गल्ल करने लगी 39 जेबे यूसुफ और मरियम प्रभुए रा बिधानो रे मुताबिक सब कुछ नपदेई चूके, तेबे गलीलो रे आपणे नगर नासरतो खे चली गे। 40 तेबे बालक बड़दा, और तागतबर और अक्ला ते परिपूर्ण ऊँदा गया और परमेशरो री कृपा तेस साथे थी। 41 यीशुए रे माए-बाओ हर साल फसह रे त्योआरो खे यरूशलेमो खे जाओ थे। 42 जेबे से बारा साला रा ऊआ, तेबे सेयो त्योआरो रे रवाजा रे मुताबिक, यरूशलेमो खे गये। 43 जेबे सेयो तिना दिना खे पूरा करी की आऊणे लगे, तेबे से बालक यीशु, यरूशलेमो रेई रई गा और ये गल्ल तेसरे माए-बाओ खे नि थी पता। 44 तिने सोचेया कि से ओरी यात्रिया साथे उणा, एक दिन बीती गा और तेबे सेयो तेसखे आपणे टब्बरो और जाण-पछयाण वालेया गे टोलने लगे। 45 पर जेबे मिलेया नि, तेबे टोलदे-टोलदे यरूशलेमो रे पऊँछी गे। 46 और तेबे तीन दिन बाद तिना खे से मन्दरो रे आँगणो रे, उपदेशका साथे बैठे रे, तिना री सुणदे और तिना ते प्रश्न करदा ऊआ मिलेया। 47 जितणे जणे तेसरी सुणने लगी रे थे, सेयो सब तेसरी समज और जवाबो ते हैरान थे। 48 तेबे सेयो तेसखे देखी की हैरान ऊईगे और तेसरी आम्मे तेसखे बोलेया, “ओ पाऊ! तँ आसा साथे एड़ा कऊँ कित्तेया? देख, तेरे पिता जी और आऊँ ताखे रोषो रे टोलने लगी रे थे।” 49 यीशुए तिना खे बोलेया, “तुसे माखे कऊँ लगी रे टोलने? क्या जाणो नि थे कि मेरा मेरे परमेशरो रे भवनो रे उणा जरूरी ए?” 50 पर जो गल्ल तिने तिना खे बोली, से तिना खे समज नि आयी। 51 तेबे से तिना साथे चली गा और नासरतो खे आया और तिना रे कुलो रे रया, तेसरी आम्मे यो सारिया गल्ला आपणे मनो रेई राखेया। 52 यीशु बुद्धि और डील-डौल, परमेशर और मांणूए री कृपा रे बड़दे गये।

3 तिबिरियुस महाराजा कैसरो रे राज्य रे पन्दूए साले जेबे पुन्तियुस पिलातुस यहूदिया प्रदेशो रा राज्यपाल था, और गलीलो रे हेरोदेस, इतूरिया और त्रखोनितिसो रे तेसरा पाई फिलिप्पुस और अबिलेनो रे लिसानियास रे राजा थे। 2 जेबे हन्ना और कैफा प्रदान पुरोईत थे, तेस बखते परमेशरो रा वचन सुनसाण जगा रे जकरयाहो रे पाऊ यूहन्ने गे पऊँछेया। 3 तेबे से यरदान

नदिया रे नेड़े-तेड़े रे सारे देशो रे आयी की, पापो री माफिया खे, मन फेरने रे और बपतिस्मा लणे रा प्रचार करने लगेया। 4 जेड़ा यशायाह भविष्यबक्ते रे बोले रे वचनो री कताबा रे लिखे राए कि, “सुणसाण जगा रे एक आक्का पाणे री आवाज ओई कि, प्रभुए री बाट त्पार करो, तिना री सड़का सीदिया करो। 5 हर एक काअटी परी जाणी, हर एक पाह्टु और टीला थाले करेया जाणा और जो टेडा ए, से सीदा और जो थाले पाँदे ए, से चौड़ी (सवीं) बाट बणनी 6 और सबी लोका परमेशरो रा उद्धार देखणा।” 7 जो पीड़ा री पीड़ तेसते बपतिस्मा लणे आओ थी, तिना खे से बोले था, “ओ सापो जेड़े जईरीले लोको! तुसा खे किने जताई ता कि आऊणे वाले परमेशरो रे रोषो ते नठो? 8 इजी री खातर मन फिराओ और अच्छे काम करो; और आपणे-आपणे मनो रे एड़ा नि सोचो, ‘आसा रा बाओ अब्राहम ए!’ कऊँकि आऊँ तुसा खे बोलूँआ कि परमेशर इना पात्थरा ते अब्राहमो खे ल्वाद पैदा करी सकोआ। 9 एबे परमेशर तुसा खे सजा देणे वाला ए, तेबेई तो जो-जो डाल खरा फल नि ल्याऊँदे, से बाडे और आगी रे सेटे जाओए।” 10 तेबे लोके तेसते पूछेया, “परमेशरो री सजा ते बचणे खे आसे क्या करूँ?” 11 यूहन्ने बोलेया, “जेसगे दो कुरते ए, से तेसखे बांडी देओ, जेसगे आए नि और जेसगे रोटी ओ, से बी एड़ा ई करो।” 12 तेबे कर लणे वाले बी बपतिस्मा लणे आए और तेसते पूछेया, “ओ गुरु! आसे क्या करूँ?” 13 तिने बोलेया, “जो तुसा खे रोमी सरकरे रराई राखेया, तिजी ते जादा नि लणा।” 14 तेबे सिपाईए बी तेसते पूछेया, “आसे क्या करूँ?” तिने बोलेया, “केसी खे नाजाईज तंग नि करना, ना चूठा दोष लगाणा और आपणी मजदूरिया पाँदे सन्तुष्टी राखणी।” 15 जेबे सबी लोके मसीह रे आऊणे री उम्मीद लगाई राखी थी और आपणे-आपणे मनो रे यूहन्ने रे बारे रे बिचार करने लगी रे थे कि केथी येई तो मसीह तो निए? 16 तेबे यूहन्ने तिना सबी खे जबाब दित्तेया, “आऊँ तो तुसा खे पाणिण साथे बपतिस्मा देऊँआ, पर जो आऊणे वाला ए, से मांते बी जादा महान ए। आऊँ तो एते जोगा पनिण कि तेसरे जोड़े रे फिथे खोली सकूँ। तेस तुसा खे पवित्र आत्मा और आगी साथे बपतिस्मा देणा। 17 तेसरा सूप तेसरे आथो रे ए और तेस आपणा खल्याण ठीक टंगो ते साफ करना और कणक तो आपणे पण्डारो रे राखी देणी पर जो पूऊ ऊणा से एड़िया आगी रे सेटणा जो कदी नि बिजणी।” 18 तेबे से बऊत शिखा देई-देई की लोका खे सुसमाचार सुणांदा रये। 19 पर जेबे तिने गलील प्रदेशो रे चौथाई देशो रे राजा हेरोदेसो खे, तेसरे पाई फिलिप्पुसो री लाडी हेरोदियासारे बारे रे और सब कुकर्मा रे बारे रे जो तिने कित्ते थे, फटकार दित्ती। 20 हेरोदेसे तिना ते बड़ी की कुकर्मा बी कित्तेया कि यूहन्ना जेला रे पाईता। 21 जेबे सबी लोके बपतिस्मा लया और यीशु बी बपतिस्मा लयी की प्रार्थना करने लगी रे थे, तेबे सर्ग खुली गा। 22 तेबे पवित्र आत्मा शारीरिक रूपो रे जिंयाँ कबूतर उड़दा ऊआ थाले आओआ तिंयाँ तिने आपू पाँदे उतरदे ऊए देखेया और स्वर्गो ते ये आवाज आयी, “तूँ मेरा प्यारा पुत्र ए और आऊँ तांते खुश ए।” 23 जेबे यीशु आपू उपदेश देणे लगे, तेबे सेयो तकरीबन तीई साला रे थे (और जेड़ा समजेया जाओआ) यीशु यूसुफो रे पाऊ थे और यूसुफ एलीयो रा पाऊ था 24 और एली, मत्तातो रा पाऊ था, मत्तात लेवियो रा पाऊ था, लेवी मलकियो रा पाऊ था, मलकी यन्ना रा पाऊ था और यन्ना यूसुफो रा पाऊ था। 25 यूसुफ मत्तियाहो रा पाऊ था, मत्तियाह आमोसो रा पाऊ था, आमोस नहूमो रा पाऊ था, नहूम असल्याहो रा पाऊ था, असल्याह नोगह रा पाऊ था। 26 नोगह मातो रा पाऊ था, मात मत्तियाहो रा पाऊ था, मत्तियाह शिमियो रा पाऊ था, शिमी योसेखो रा पाऊ था और योसेख योदाह रा पाऊ था। 27 योदाह यूहन्ने रा पाऊ था, यूहन्ना रेसा रा पाऊ था, रेसा जरूब्बाबिलो रा पाऊ था, जरूब्बाबिल शालतियेलो रा पाऊ था और शालतियेल नेरियो रा पाऊ था। 28 नेरी मलकियो रा पाऊ था, मलकी अदियो रा पाऊ था, अदी कोसामो रा पाऊ था, कोसाम इलमोदामो रा पाऊ था और से एरो रा पाऊ था। 29 एर येशुओ रा पाऊ था, येशु इलाजारो रा पाऊ था, इलाजार योरिमो रा पाऊ था, योरिम मत्तातो रा पाऊ था, मत्तात लेवियो रा पाऊ था। 30 लेवी शमोनो रा पाऊ था, शमोन यहूदाह रा पाऊ था,

यहूदाह यूसुफो रा पाऊ था, यूसुफ योनानो रा पाऊ था, योनान इलयाकीमो रा पाऊ था। 31 और इलयाकीम मलेआहो रा पाऊ था, मलेआह मिन्नाहो रा पाऊ था, मिन्नाह मत्तातो रा पाऊ था, मत्ताता नातानो रा पाऊ था, नातान दाऊदो रा पाऊ था। 32 दाऊद यिश्ने रा पाऊ था, यिश्ने ओबेदो रा पाऊ था, ओबेद बोअजो रा पाऊ था, बोअज सलमोनो रा पाऊ था, सलमोन नहशोनो रा पाऊ था। 33 नहशोन अम्मीनादाबो रा पाऊ था, अम्मीनादाब अरनीयो रा पाऊ था, अरनी हिस्सोनो रा पाऊ था, हिस्सोन फिरिसो रा पाऊ था, फिरिस यहूदाहो रा पाऊ था। 34 यहूदाह याकूबो रा पाऊ था, याकूब इसहाको रा पाऊ था, इसहाक अब्राहमो रा पाऊ था, अब्राहम तिरहो रा पाऊ था, तिरह नाहोरो रा पाऊ था। 35 नाहोरो रा सरूमो रा पाऊ था, सरूम रऊओ रा पाऊ था, रऊ फिलिगो रा पाऊ था, फिलिग एबिरो रा पाऊ था, एबिर शिलहो रा पाऊ था। 36 शिलह केनानो रा पाऊ था, केनान अरफक्षदो रा पाऊ था, अरफक्षद शेमो रा पाऊ था, शेम नूहो रा पाऊ था, नूह लिमिको रा पाऊ था। 37 लिमिक मथूशिलहो रा पाऊ था, मथूशिलह हनोको रा पाऊ था, हनोक यिरिदो रा पाऊ था, यिरिद महललेलो रा पाऊ था, महललेल केनानो रा पाऊ था। 38 केनान इनोशो रा पाऊ था, इनोश शेतो रा पाऊ था, शेत आदमो रा पाऊ था और से परमेशरो रा पाऊ था।

4 तेबे यीशु पवित्र आत्मा ते परी की यरदनो नदिया ते वापस आये और चाली दिन तक आत्मा रे सिखाणे खे सुणसाण जगा रे फिरदे रये; 2 और शैतान चाली दिना तक तिना री परीक्षा करदा रया। तिना दिना रे तिने कुछ नि खया और जेबे सेयो दिन पूरे ऊईगे तेबे तिना खे पूख लगी। 3 तेबे शैताने यीशुए खे बोलेया, “जे तूँ परमेशरो रा पुत्र ए, तो एस पात्थरो खे बोल कि रोटी बणी जाओ।” 4 यीशुए तेसखे जवाब दित्तेया, “लिखी राखेया कि मांणू रोटीया साथे ई जिऊँदा नि रंगा।” 5 तेबे शैतान तिना खे लईगा और तिना खे एकदम दुनिया रे सारे राज्य दखाए। 6 और शैताने तिना खे बोलेया, “मां यो सब अक्क और इना रे एशो-आराम ताखे देई देणे, कऊँकि ये सब कुछ मांगे सम्बाली राखेया और जेसखे चाऊँआ, तेसखे देई देऊँआ।” 7 तेबे तिने यीशुए खे फेर बोलेया, “जे तां मांगे माथा टेकणा, तो ये सब कुछ तेरा ऊई जाणा।” 8 यीशुए तेसखे जवाब दित्तेया, “लिखी राखेया कि तूँ बस प्रभु आपणे परमेशरो गे ई माथा टेक और बस तिना री ई आराधना कर।” 9 तेबे शैताने यीशु यरूशलेमो रे लयी जाई की मन्दरो री चूँडिया पाँदे खडे करी ते। तेबे तिना खे बोलणे लगेया, “जे तूँ परमेशरो रा पुत्र ए, तो आपू खे एथा ते थाले रुड़ाई दे। 10 कऊँकि पवित्र शास्त्रो रे लिखी राखेया कि परमेशरो तेरिया तँई आपणे स्वर्गदूता खे आज्ञा देणी कि सेयो तुसा खे बचाओ। 11 और तिना तूँ आपणे आथो-आथ चकी लणा, केथी एड़ा नि ओ कि तेरे पैरो रे पात्थरो साथे बूडो।” 12 यीशुए तेसखे जवाब दित्तेया, “पवित्र शास्त्रो रे ये बीए लिखेया राए, ‘तूँ प्रभु आपणे परमेशरो खे नि परख।’” 13 जेबे शैतान तिना री सारिया परीक्षा करी चुकेया, तेबे कुछ बखतो खे यीशुए खे छाडी की चली गा। 14 तेबे यीशु पवित्र आत्मा री सामर्थ्य ते परी की गलीलो खे चली गे और तिना री चर्चा ओरे-पोरे सारे देशो रे फैली गी। 15 तेबे सेयो तिना रे प्रार्थना रे कअरो रे उपदेश देँ रये और सब सेनि री तारीफ करदे रये। 16 तेबे सेयो नासरतो गांव खे वापस आए, जेती सेयो पाले थे और आपणी रवाजा रे मुताबिक आरामो रे दिने प्रार्थना रे कअरो रे जाई की पढ़ने खे खडे ऊए। 17 यशायाह भविष्यबक्ते री कताब तिना खे दित्ती और तिने कताब खोली की से जगा निकयाली जेती ये लिखी राखेया था, 18 “प्रभुए रा पवित्र आत्मा मां पाँदे ए, कऊँकि तिने मेरा अभिषेक कंगाला खे सुसमाचार सुनाणे खे करी राखेया और आऊँ इजी खे पेजी राखेया ताकि दुष्टात्मा रे वशो रे पड़े रे लोका खे छुटकारे रा और अन्देया खे देखणे रा सुसमाचार प्रचार करूँ और केसेया रे खे छुटाऊँ। 19 और प्रभुए खे खुश रणे रे सालो रा प्रचार करूँ।” 20 तेबे तिने कताब बंद करी की सेवको रे आथो रे देईती और बैठीगे और प्रार्थना रे कअरो रे सब लोक तिना खे देखदे ई रये। 21 तेबे सेयो तिना खे बोलणे लगे, “आज ई ये लेख तुसा सामणे पूरा ऊई रा।” 22 सबी तिना री

तारीफ किन्ती और जो कृपा री गल्ल तिना रे मुंओ ते निकलो थी, तिना ते हैरान ऊईगे और बोलणे लगे, “क्या ये यूसफो रा पाऊ निए?” 23 तिने तेसखे बोलेया, “तुसा ये कहावत मां पाँदे जरूर बोलणी, ‘ओ बैद आपू खे ठीक कर! जो कुछ आसे सुणी राखेया कि कफरनहूमो रे करी राखेया, से एती आपणे देशो रे बी कर।” 24 यीशुए बोलेया, “आऊँ तुसा खे सच लगी रा बोलणे कि कोई बी भविष्यबक्ता आपणे देशो रे मान-सम्मान नि पाँदा। 25 आऊँ तुसा खे सच लगी रा बोलणे कि जेबे एलिय्याह नबीए रे दिना रे साडे तीन साल तक सर्ग बंद रया, एथो तक कि सारे देशो रे अकाल पड़ी गा था और इस्राएलो रे बऊत सारी बिदुआ थिया। 26 पर एलिय्याह तिना बीचा ते केसी गे नि पेजेया, बस सिदोनो रे सारफत गांव रे एक बिदुआ ते अलावा। 27 और एलीशा भविष्यबक्ता रे बखते इस्राएलो रे बऊत सारे कोढ़ी थे, पर सीरिया देशो रे नामानो खे छाडी की तिना बीचा ते कोई बी ठीक नि कित्तेया।” 28 इना सारिया गल्ला खे सुणी की जो प्रार्थना रे कअरो रे थे तिना सबी खे रोष आईगा। 29 तेबे तिने सबी उठी की सेयो बारे निकयाली ते और जेते पाहड़ो पाँदे तिना रा नगर था, तेतेरी चूँडिया पाँदे लयी चले, ताकि तेथा ते तिना खे थाले सेटी की मारी देओ। 30 पर यीशु तिना बीचा ते निकली की चली गे। 31 तेबे सेयो गलीलो रे कफरनहूम नगरो खे गये और आरामो रे दिने लोका खे उपदेश देणे लगी रे थे। 32 सेयो तिना रे उपदेशो ते हैरान ऊईगे, कऊँकि तिना रा वचन अक्को साथे था। 33 प्रार्थना रे कअरो रे एक माणू था, जेसरे दुष्टात्मा थी। 34 से जोरे की चींगणे लगेया कि, “ओ यीशु नासरी! आसा खे तांते क्या काम ए? क्या तूँ आसा खे नाश करने आयी रा? आऊँ ताखे जाणूआ कि तूँ कुण ए? तूँ परमेशरो रा पवित्र पुत्र ए।” 35 यीशु तेसखे बक्के और बोलेया, “चुप रओ; और एसते निकली जा; तेबे दुष्टात्मा तेसखे बीचे पटकी की बिना नुकशाण पऊँछाए तेसते निकली गी।” 36 ये देखी की सब हैरान ऊईगे और सेयो आपू बीचे बोलणे लगे, “ये केड़ा वचन ए? और ये अक्क और सामर्था साथे दुष्टात्मा खे आज्ञा देओआ और सेयो निकली जाओईया।” 37 तेबे चऊँ कनारे तिना रा बोल-बाला फैली गा। 38 यीशु प्रार्थना रे कअरो ते उठी की शमोनो रे कअरो खे गये और शमोनो री सासुआ खे बुखार था और तिने तेसा री खातर, यीशुए ते प्रार्थना कित्ती। 39 सेयो तेसा रे नेडे जाई की बुखारो खे बके और तेसा रा बुखार ऊतरी गा और से फटाफट उठी की तिना री सेवा करने लगी। 40 सूरज डूबणे ते पईले जेती-जेती लोक कईया प्रकारा रिया बमारिया रे पड़ी रे थे, सेयो सब तिना खे तेसगे ली आए और तिने एकी-एकी पाँदे आथ राखी की सेयो ठीक कित्ते। 41 तेबे दुष्टात्मा चींगडी ऊई और ये बोलदी उई, “तूँ परमेशरो रा पुत्र ए,” बऊत जणेया ते निकली गी पर सेयो तिना खे बको थे और बोलणे नि देओ थे, कऊँकि सेयो तिना खे जाणो थिया कि ये मसीह ए। 42 जेबे दिन ऊआ तेबे सेयो निकली की सुनसाण जगा खे चली गे और पीड़ा री पीड़ तिना खे टोलदी उई तिना गे आयी और तिना खे रोकणे लगी कि आसा गे ते नि जाओ। 43 पर तिने तिना खे बोलेया, “माखे ओरी नगरा रे बी परमेशरो रे राज्य रा सुसमाचार सुनाणा जरूरी ए, कऊँकि आऊँ इजी खई पेजी राखेया।” 44 तेबे यीशु यहूदिया प्रदेशो रे प्रार्थना रे कअरो रे प्रचार करदे रये।

5 जेबे पीड़ यीशुए पाँदे पड़ो थी और परमेशरो रे वचन सुणो थी और सेयो गन्नेसरतो री झीला रे कनारे थे खडे रे, तेबे एड़ा ऊआ 2 कि तिने झीला रे कनारे दो किस्तिया खड़ी रिया देखिया और मच्छुआरे तिना पाँदो ते ऊतरी की आपणे जालू लगी रे थे तोणे। 3 तिना किस्तिया बीचा ते एक किस्ती जो शमोनो री थी, चढ़ी की यीशुए तेसखे बोलेया, “थोड़ी जी कनारे जे लई चल।” तेबे सेयो किस्तिया पाँदे बैठी की लोका खे उपदेश देणे लगे। 4 जेबे सेयो लोका साथे गल्ला करी चुके, तेबे तिने शमोनो खे बोलेया, “डूगे पाणिए रे लयी चल और मछलिया पकड़ने खे आपणे जालू पाओ।” 5 शमोनो बोलेया, “स्वामी! आसे सारी रात मईगत किन्ती पर कुछ नि पकड़ेया, पर तेबे बी तरे बोलणे ते जालू पाई देऊँआ।” 6 जेबे पतरस और तिना रे साथिए

जालू पाईता तेबे बऊत सारिया मछलिया किरिया और तिना रे जालू फटणे लगे। 7 तेबे तिने आपणे साथिया खे, जो दूकी किस्तिया रे थे, तिना खे साअरा कित्तेया, “आयी की म्हारी मताद करो।” तिने आयी की आपणिया दोनो किस्तिया मच्छलिया ते इतणिया परी तिया कि सेयो डूबणे लगीया। 8 ये देखी की शमोन पतरस यीशुए रे पैरा पाँदे पड़ी गा और बोलणे लगेया, “ओ प्रभु! मांगा गे ते चली जा, कऊँकि आऊँ पापी माणू ए।” 9 कऊँकि इतणिया सारिया मछलिया पकड़ी की देखी की से और तेसरे साथी हैरान ऊईगे। 10 तियाँ ई जब्दी और तेसरे पाऊ याकूब और यूहन्ने खे बी, जो शमोनो साथे थे, सेयो बी हैरान ऊईगे, तेबे यीशुए शमोनो खे बोलेया, “डर नि, आजो ते तां माणू परमेशरो री तरफा खे फेरने।” 11 तेबे सेयो किस्तिया खे कनारे पाँदे ली आए और सब कुछ छाडी की यीशुए पीछे चली पड़े। 12 जेबे सेयो नगरो रे थे, तेबे तिना खे तेती एक कोढ़ी मिलेया और से प्रभुए खे देखी की तिना रे पैरो पाँदे पड़ी गा और बिनती किन्ती, “ओ प्रभु! जे तुसे चाओ तो माखे ठीक करी सकोए।” 13 यीशुए आपणा आथ आगे कित्तेया और से छूँयाँ और तेसखे बोलेया, “आऊँ चाऊँआ कि तूँ ठीक ऊई जाए।” और तेबुई तेसरा काढ़ चली गा। 14 तेबे यीशुए से सावधान कित्तेया, “केसी गे नि बताणा, पर जो कौ की आपू खे पुरोईतो गे देरिया, तेस चढ़ा ताकि तिना खे गवाई ओ कि तूँ ठीक ऊईगा।” 15 पर यीशुए रे इना कामा री चर्चा ओर बी फैली गी और पीड़ा री पीड़ तिना खे सुणने खे और आपणी बमारिया खे ठीक कराने खे कट्टी ऊईगी। 16 यीशु सुनसाण जगा रे जाई की कल्ले जे प्रार्थना करेया करो थे। 17 तेबे एक दिन एड़ा ऊआ कि सेयो उपदेश देणे लगी रे थे तेबे फरीसी और धर्मशास्त्री तेती थे बैठे रे, जो गलील और यहूदिया प्रदेशो रे हर एक गांव ते और यरूशलेम नगरो ते थे आए रे और ठीक करने खे प्रभुए री सामर्थ तिना साथे थी। 18 तेबे कई लोक एक माणूए खे, जो अदरंगो रा रोगी था, माँजे पाँदे ल्याए और सेयो तेसखे पीतरे लयी जाणे खे और यीशुए सामणे राखणे रा तरीका टोलने लगी रे थे। 19 जेबे पीड़ा री बजअ ते सेयो तेसखे पीतरे नि लयी जाई सके, तेबे तिने छतो पाँदे चढ़ी की और खेप्रे टाई की, से माँजे समेत बीचे यीशुए रे सामणे त्वारेया। 20 यीशुए तिना रा विश्वास देखी की तेस अदरंगो रे रोगिए खे बोलेया, “ओ माणू! तरे पाप माफ ऊईगी।” 21 तेबे शास्त्री और फरीसी बईस करने लगे, “ये कूणे, जो परमेशरो री निन्दा करने लगी रा? परमेशरो खे छाडी की ओर कुण पाप माफ करी सकोआ?” 22 यीशुए तिना रे मनो री गल्ल जाणी की तिना खे बोलेया, “तुसे आपणे मनो रे क्या सोचणे लगी रे? 23 ये बोलणा बऊत आसान ए कि तरे पाप माफ ऊईगे पर ये बोलणा बऊत कठण ए कि आपणा मांजा चकी की चल फिर। 24 पर इजी री खातर कि तुसे जाणी लओ कि माणू रे पुत्रो खे तरतिया पाँदे पाप माफ करने रा बी अक्क ए।” यीशुए तेस अदरंगो रे रोगिए खे बोलेया, “आऊँ ताखे बोलूँआ कि उठ और आपणा मांजा चकी की आपणे कअरो खे चली जा।” 25 से तेबु आपणा मांजा चकी की तिना सामणे उठेया और परमेशरो री तारीफ करदा ऊआ आपणे कअरो खे चली गा। 26 तेबे सब हैरान ऊईगे और परमेशरो री तारीफ करने लगे और बऊत डरी की बोलणे लगे कि आज आसे नऊखिया गल्ला देखिया। 27 तेबे इजी ते बाद यीशु बारे चली गे और लेवी नाओं रा एक कर लणे वाला करो री चौकिया पाँदे बैठे रा देखेया और तिने तेसखे बोलेया, “मां पीछे आओ और मेरे चले बणो।” 28 तेबे से सब कुछ छाडी की तिना पीछे चली पड़ेया। 29 तेबे लेविए तिना खे आपणे कअरे एक बड़ा भोज राखेया और कर लणे वालेया री और ओरी लोका री जो तिना साथे रोटी खाणे बैठी रे थे तिना री एक बड़ी पीड़ थी। 30 तेबे फरीसी और शास्त्री, तिना रे चलेया ते कुड़कुड़ाणे लगे और बोलणे लगे, “तुसे कर लणे वालेया साथे और पापिया साथे कऊँ खाओ-पियोए?” 31 यीशुए तिना खे जवाब दितेया, “बैद पलेया-चंगेया खे नि, पर, बमारा खे जरूरी ए। 32 आऊँ तर्मिया खे नि, पर पापिया रा मन फिराणे खे बुलाणे आयी रा।” 33 तेबे तिने तिना खे बोलेया, “बपतिस्मा देणे वाले यूहन्ने रे चले तो सदा बअरत और प्रार्थना

करदे रओए और तियाँ ई फरीसी बी, पर तेरे चले तो खाओ पियो ए।” 34 यीशुए तिना खे बोलेया, “क्या बराती, जदुओ तक लाड़ा तिना साथे ए, तदुओ तक तिना ते बअरत करवाई सकी ए? 35 पर सेयो दिन आऊणे, जेबे लाड़ा बरातिया ते लग करेया जाणा, तेस बखते तिना बअरत करना।” 36 यीशुए तिना खे एक उदारण बोलेया, “कोई बी माणू नए टाले ते फाडी की पुराणे टाले रे टाली नि लगांदा, नई तो नया फटी जाणा और तेस पुराणे साथे मेल पनि खाणा। 37 नया अँगूरा रा रस पुराणे खल्लडुआ रे कोई नि परदा, नई तो नया अँगूरा रा रस खल्लडुआ खे फाडी की बरि निकली जाणा और खल्लडुआ रा बी नाश ऊई जाणा। 38 पर जो नया अँगूरा रा रस ओआ, से नये खल्लडुआ रे परना चाईयो। 39 कोई बी माणू पुराणा अँगूरा रा रस पी की नया नि चांदा, कऊँकि से बोलोआ कि पुराणा ई अछा ए।”

6 तेबे आरामो रे दिने यीशु डोरूआ रिये जाणे लगी रे थे और तिना रे चले सिल्ले तोड़ी-तोड़ी की और मली-मली की खाणे लगी रे थे। 2 तेबे फरीसिया बीचा ते कई जणे बोलणे लगे, “तुसे से काम कऊँ करोए, जो आरामो रे दिने करना ठीक निए?” 3 यीशुए तिना खे जवाब दित्तेया, “क्या तुसे ये नि पढ़ी राखेया कि जेबे दाऊद और तेसरे साथी पूखे थे, तो, तेबे तिने क्या कित्तेया। 4 से कऊँ परमेशरो रे भवनो दे गया? और पेंटा रिया रोटिया खाईया, जबकि बिधानो रे मुताबिक सेयो खाणिया पुरोईता खे छाडी की ओरी खे ठीक नि थिया और तिने आपणे चेलेया खे बी दित्तिया।” 5 तेबे तिने तिना खे बोलेया, “आऊँ माणू रा पुत्र आरामो रे दिनो रा बी प्रभु ए।” 6 तेबे एड़ा ऊआ कि केसी ओरी आरामो रे दिने सेयो प्रार्थना रे कअरो रे उपदेश देणे लगी रे थे, तेबे तेती एक माणू आया, जेसरा आथ सूकेया रा था। 7 शास्त्री और फरीसी यीशुए पाँदे दोष लगाणे री ताका रे थे कि देखूँ कि आरामो रे दिने तेसखे ये ठीक करोआ की नयी। 8 पर यीशु तिना रे बिचार जाणो थे, तेबे तिने सूके रे आथो रे माणूए खे बोलेया, “उठ और बीचे खडे ऊई जा।” से उठेया और खड़ा ऊईगा। 9 यीशुए तिना खे बोलेया, “आऊँ तुसा ते पुछूँआ कि बिधानो रे मुताबिक आरामो रे दिने क्या ठीक ए, पला करना या बुरा करना, प्राणो खे बचाणा या नाश करना?” 10 तेबे तिने चऊँ कनारें तिना सबी खे देखी की तेस सूके रे आथो वाले माणूए खे बोलेया, “आपणा आथ आगे कर।” तिने आगे कित्तेया और तेसरा आथ ठीक ऊईगा। 11 पर शास्त्री और फरीसी आपणे आपू ते बारे ऊईगे और आपू बीचे बईस करने लगे कि आसे यीशुए साथे क्या करिए? 12 तेबे तिना दिना रे यीशु पाह्दो पाँदे प्रार्थना करने खे निकले और सारी रात परमेशरो ते प्रार्थना करदे रये। 13 जेबे दिन ऊआ तेबे तिने आपणे खास चले बुलाई की तिना बीचा ते बारा चूणी ले और तिना खे प्रेरित करी की बोलेया। 14 और सेयो यो ए, शमौन जेसरा नाओं तिने पतरस राखेया, तेसरा पाई अन्द्रियास, याकूब, यूहन्ना, फिलिप्पुस, बरतुलमै 15 मत्ती, थोमा, हलफईसो रा पाऊ याकूब, शमौन जेसखे जेलोतेस बी बोलोए 16 याकूबो रा पाऊ यहूदा और यहूदा इस्करियोती, जो तिना खे पकड़वाणे वाला बी था। 17 तेबे सेयो तिना साथे उतरी की चौड़ी जगा रे खडे ऊईगे और तिना रे चेलेया री बड़ी पीड़, और सारे यहूदिया प्रदेश, यरूशलेम नगर, सूर और सैदा नगरो रे समुद्रो रे कनारें रे बऊत लोक, 18 जो तिना री सुपाने और आपणी बमारिया ते ठीक ऊणे खे तिना गे आए थे, तेती थे। और दुष्टात्मा रे सताए रे लोक बी ठीक ऊई जाओ थे। 19 तेबे सब यीशुए खे छूणा चाओ थे, कऊँकि तिना ते सामर्थ निकली की सबी खे चंगा करी देयो थी। 20 तेबे यीशुए आपणेया चेलेया खे देखी कि बोलेया, “धन्य ए तुसे, जो सलीन ए, कऊँकि परमेशरो रा राज्य तिना रा ईए। 21 धन्य ए तुसे, जो एबु पूखे ए, कऊँकि रजाए जाणे, धन्य ए तुसे, जो एबु रोए, कऊँकि आसणे। 22 धन्य ए तुसे, जेबे माणू रे पुत्रो री बजअ ते लोका तुसा ते बैर राखणा और तुसे निकयाली देणे, तुसा री निन्दा करनी और तुसा रा नाओं बुरा जाणी की कटी देणा। 23 “तेस दिने खुश ऊई की उटकणा, कऊँकि देखी तुसा खे स्वर्गो रे बऊत बड़ा ईनाम मिलणा, तिना रे बाप-दादे, भविष्यबक्तेया साथे बी एड़ा ई करो थे। 24 “पर हाय! तुसा खे, जो पैसे वाले

ए, कऊँकि तुसे आपणे सारे सुख पईले ई पाई चुके रे। 25 पर हाय तुसा खे जो एबु रज्जे रे ए, कऊँकि पूखे ऊणे, हाय तुसा खे, जो एबु आसोए, कऊँकि शोग करना और रोणे। 26 हाय तुसा खे, जेबे सब तुसा खे खरा बोलोए, कऊँकि तिना रे बाप-दादे बी चूठे भविष्यबक्तेया साथे एड़ा ई करो थे। 27 “पर आऊँ तुसा सुपाने वालेया खे बोलूँआ कि आपणे दुश्मणा साथे प्यार राखो, जो तुसा साथे बैर राखोए, तिना रा पला करो। 28 जो तुसा खे स्राप देओ, तिना खे आशीष देओ, जो तुसा रा मजाक करो, तिना खे प्रार्थना करो। 29 जो तुसा री खाखा रे थप्यड़ बाओआ, तो तेस कनारो खे दूजी खाख बी करी देओ और जो तेरा दोहर (तोली) छुड़ाई लओआ, तेसखे कुरता लणे ते पनि रोक। 30 जो कोई तांते माँगे, तेसखे दे और जो तेरी चीज छुड़ाई लओआ, तेसते माँगे नि 31 और जेड़ा तुसे चाओए कि लोक तुसा साथे करो, तुसे बी तिना साथे तेड़ा ई करो। 32 “जे तुसे आपू साथे प्यार राखणे वालेया साथे प्यार राखो, तो तुसा री क्या तारीफ? कऊँकि पापी बी आपू साथे प्यार राखणेया वालेया साथे प्यार राखोए। 33 जे तुसे आपू साथे खरा करने वालेया साथे ई खरा करोए, तो तुसा री क्या तारीफ? कऊँकि पापी बी एड़ा ई करोए। 34 जे तुसे तिना खे त्वार देओ, जिना ते फेर लणे री उम्मीद राखोए, तो तुसा री क्या तारीफ? कऊँकि पापी बी पाणिया खे त्वार देओए, ताकि तिथणा ई फेर पाओ। 35 बल्कि आपणे दुश्मणा साथे प्यार राखो और तिना रा पला करो, और फेर पाणे री उम्मीद नि राखी की त्वार देओ। तेबे तुसा खे बड़ा फल मिलणा और तुसे परमप्रदान परमेशरो रे बच्चे ठईरने। कऊँकि से तिना पाँदे जो धन्यवाद नि करदे और बुरेया पाँदे बी कृपा करोआ। 36 जेड़ा तुसा रा पिता परमेशर दयालु ए, तेड़े ई तुसे बी दयालु बणो। 37 “दोष मत लगाओ, तो तुसा पाँदे बी दोष नि लगाया जाणा, दोषी नि ठराओ, तो तुसे बी दोषी नि ठराए जाणे, माफ करो, तो तुसा खे बी माफ कित्तेया जाणा। 38 देया करो, तेबे तुसा खे बी दित्तेया जाणा, लोका पूरा नाप दबाई-दबाई की और इलाई-इलाई की और ऊबरदे ऊए तुसा री गोदा रे पाणा, कऊँकि जेस नापो साथे तुसे नापोए, तेसी साथे तुसा खे बी नापेया जाणा।” 39 तेबे यीशुए तिना खे एक उदारण बोलेया, “क्या अन्दा, अन्देया खे बाट दशी सकोआ? क्या दोनो गड्डे रे नि पड़ने। 40 चेला आपणे गुरूओ ते बड़ा नि ऊँदा, पर जो कोई सिद्ध ऊणा, से आपणे गुरूओ जेड़ा ऊणा। 41 तूँ कऊँ आपणे पाईए री छोट्टी-छोट्टी गलतिया टोलेया, ताँदे आपणिया बड़ी-बड़ी गलतिया नजर कऊँ नि आऊँदिया? 42 जेबे ताँदे आपू रे बड़ी-बड़ी गलतिया ए, तो तूँ आपणे पाईए खे कियौँ बोली सकेया कि ओ पाई! तूँ गलत ए? ओ कपटी! पईले आपणी बड़ी-बड़ी गलतिया देख, तेबेई तो तूँ आपणे पाईए री गलतिया ठीक टंगो रे देखी की निकयाली सकेया। 43 “कोई बी अछा डाल निए, जो नकम्मा फल ल्याओ और ना तो नकम्मा डाल ए, जो अछा फल ल्याओ। 44 हर एक डाल आपणे फलो साथे पछयाणा जाओआ, कऊँकि लोक जाड़ो ते दाऊगले नि तोड़दे और ना काँडेया ते अँगूरा। 45 खरा माणू आपणे खरे मनो रे पण्डारो ते खरिया गल्ला निकयालोआ और बुरा माणू आपणे बुरे मनो रे पण्डारो ते बुरिया गल्ला निकयालोआ, कऊँकि जो, जेसरे मनो रे परे रा ओआ, तेड़ा ई मुँओ ते निकलोआ। 46 “जेबे तुसे मेरा कईणा नि मानदे, तो, तेबे कऊँ माखे ओ प्रभु, ओ प्रभु बोलोए। 47 जो कोई माँगे आओआ और मेरिया गल्ला सुणी की तिना खे मानोआ, आऊँ तुसा खे बताऊँआ कि से केस जेड़ा ए। 48 से तेस माणूए जेड़ा ए, जिने कअर बणादे बखते, तरतिया रे डूगी निऊँ खणी की पात्थरा री निऊँ पाई और जेबे बाढ़ आयी तो ताअर तेस कअरो रे लगी, पर से इलाई नि सकी, कऊँकि से पक्का था। 49 पर जो सुणी की नि मानदा, से तेस माणूए जेड़ा ए, जिने माट्टिया पाँदे बिना निऊँआ रा कअर बणाया और जेबे तेस कअरो पाँदे ताअर लगी, तो से कअर तेबुई टलीगा और सत्यानाश ऊईगा।”

7 जेबे यीशु लोका खे इना सबी गल्ला बताई चुके, तेबे सेयो कफरनहूम नगरो रे आए। 2 तेबे केसी सूबेदारो रा दास, जो तेसखे बऊत प्यार था, बमारिया ते मरने वाला था। 3 तिने यीशुए रे बारे रे सुणी की कई यहूदिया रे

बुजुर्ग तिना गे ये बिनती करने पेजे कि आयी की मेरे दासो खे बचा। 4 सेयो यीशुए गे आयी की तिना ते बड़ी बिनती करी की बोलणे लगे, “से एते जोगा आए कि तुसे तेसखे ठीक करी सको। 5 कऊँकि से म्हारी जातिया खे प्यार करोआ और तिने ई आसा रा प्रार्थना रा कअर बणाई राखेया।” 6 यीशु तिना साथे चलणे लगे, जेबे सेयो कअरो रे नेडे पऊँछणे वाले थे, तेबे तिने सूबेदारे तिना खे आपणे कई दोस्ता रे जरिए सन्देशा पेजेया, “ओ प्रभु कष्ट नि कर कऊँकि आऊँ एते जोगा नि ए कि तुसे मेरे कअरे आयी सको। 7 इजी बजअ ते आऊँ आपू खे एते जोगा पनि समजदा कि तुसा गे आऊँ, पर तुसे आपणे मुंओ तेई बोली देओ, तो से मेरा दास ठीक ऊई जाणा। 8 आऊँ बी पराधीन माणू ए और सिपाई मेरे आथो रे ए। जेबे एकी खे बोलूँआ, ‘जा,’ तो से जाओआ और दूजे खे बोलूँ, ‘आओ,’ तो से आओआ। आपणे दासा खे बोलूँ, ‘ये कर,’ तो से करोआ।” 9 ये सुणी की यीशु हैरान ऊईगे, तेबे तिने मूँ फेरी की तेसा पीड़ा खे जो तिना पीछे आऊणे लगी री थी बोलेया, “आऊँ तुसा खे सच लगी रा बोलणे कि मैं इस्राएलो रे बी एड़ा विश्वास नि देखेया।” 10 तेबे जो दोस्त सूबेदारे पेजी राखे थे तिने कअरे जाई की से दास ठीक देखेया। 11 थोड़े दिन बाद सेयो नाईन नाओं रे एक नगरो रे गये और तिना रे चले और बऊत बड़ी पीड़ तिना साथे चली री थी। 12 जेबे सेयो नगरो रे फाटको गे पऊँछे, तेबे लोक एक मुइदे खे बारे निणे लगी रे थे। जो जवान मरी रा था से आपणी बिदुआ माया रा इकलौता पाऊ था। नगरो रे बऊत सारे लोक तेसा साथे थे। 13 तेसा बिदुआ माया खे देखी की यीशुए खे तरस आया और तेसा खे बोलेया, “रोओ नि।” 14 तेबे तिने नेडे जाई की सीढ़ छुँई और सीढ़ चकणे वाले रूकी गे, तेबे तिने बोलेया, “ओ जवान आऊँ ताखे बोलूँए कि उठ।” 15 तेबे से मुइदा उठी गा और बोलणे लगेया, तेबे यीशुए से तेसरी माया गे सम्बाली ता। 16 तेबे सब डरी गे और सेयो परमेशरो री तारीफ करदे ऊए बोलणे लगे, “आसा बीचे एक बऊत बड़ा भविष्यबक्ता आईगा रा और परमेशरे आसा लोका पाँदे कृपा दृष्टि करी राखी।” 17 और तिना रे बारे रे ये गल्ल सारे रे यहूदिया प्रदेशो और नेडे-तेडे सारे देशो रे फैली गी। 18 यूहन्ने खे तेसरे चलेया इना सबी गल्ला रा समाचार सुणाया। 19 तेबे यूहन्ने आपणे चलेया बीचा ते दो जणे बुलाई की यीशुए गे ये पूछणे पेजे, “क्या आऊणे वाले तुसे ईए या आसे केसी ओरी री बात देखिये?” 20 तिने यीशुए गे आयी की बोलेया, “यूहन्ने बपतिस्मे देणे वाले आसे ये पूछणे पेजी राखे कि क्या आऊणे वाला तूँ ई ये या आसे केसी ओरी री बात देखिये?” 21 तेसी बखते तिने बऊत जणे बमार और पीड़ा ते ठीक कित्ते और दुष्टात्मा ते छुड़ाए और बऊत जणेया अन्देया खे आखी दित्तिया। 22 यीशुए तिना खे बोलेया, “जो कुछ तुसे देखेया और सुणेया, जाई की यूहन्ने खे बताओ कि अन्दे देखोए, लंगड़े चलोए, कोढ़ी शुद्ध ऊई जाओए, टरुणे सुणोए और मुइदे जिऊँदे ऊई जाओए और कंगाला खे सुसमाचार सुणाया जाओआ। 23 धन्य ए सेयो, जो मेरी बजअ ते आपणा विश्वास नि छाडदे।” 24 जेबे यूहन्ने रे पेजे रे चले चली गे, तेबे यीशु यूहन्ने रे बारे रे लोका खे बोलणे लगे, “तुसे जंगलो रे क्या देखणे गये थे? क्या अवा साथे ईलदे ऊए काओ जेडे नगलो खे? 25 तो तुसे तेबे क्या देखणे गये थे? क्या नरम टाले पईने रे माणूए खे? देखो जो भड़किले टाले पईनोए और सुख-विलासो रे रओए, सेयो राजभवनो रे रओए। 26 तो तेबे क्या देखणे गए थे? क्या केसी भविष्यबक्ते खे? आ, आऊँ तुसा खे बोलूँआ कि भविष्यबक्ते ते बी बडे खे। 27 से येई, जेसरे बारे रे लिखी राखेया कि, “देख, आऊँ आपणे दूतो खे तांते आगे-आगे पेजुँआ, जेस तांते आगे जाई की बात ठीक करनी। 28 “आऊँ तुसा खे बोलूँआ कि जो जवाणसा ते जम्मी रे तिना बीचा ते यूहन्ने ते बड़ा कोई नि ए पर जो परमेशरो रे राज्य रे छोटे ते बी छोटा ए, से तेसते बी बड़ा ए।” 29 तेबे सबी आम माणूए सुणी की और कर लणे वालेया बी यूहन्ने रा बपतिस्मा लयी की परमेशरो खे सच्चा मानी ला। 30 पर फरीसिये और धर्मशास्त्री तेसते बपतिस्मा ना लयी की परमेशरो री इच्छा आपणे बारे रे टाली ती। 31 यीशुए फेर बोलेया, “आऊँ आजकाल के लोका री उपमा किजी साथे करूँ? 32 सेयो तिना बच्चेया जेडे ए, जो बजारो रे बैठी की एकी-दूजे खे आक्का पाई

की बोलोए, ‘आसे तुसा खे बांसली बजाई, पर तुसे नि नाचे; आसे शोग कित्तेया, पर तुसे छाती नि बजाई।’ 33 कऊँकि यूहन्ना बपतिस्मा देणे वाला न तो रोटी खांदा आया और ना अँगूरा रा रस पींदा आया और तुसे बोलोए कि तेसरे दुष्टात्मा ए? 34 पर आऊँ माणू रा पुत्र खांदा-पींदा ऊआ आया और तुसे बोलोए कि, ‘देखो, पेटू और पियक्कड़ माणू कर लणे वालेया रा और पापिया रा दोस्त ए।’ 35 पर ज्ञान आपणी ल्वादा ते सच्चा ठराई राखेया।” 36 तेबे किने फरीसिये तिना ते बिनती कित्ती कि मां साथे रोटी खाओ; तेबे सेयो तेसरे कअरे जाई की रोटी खाणे लगे। 37 तेस नगरो री एक पापी जवाणस ये जाणी की कि यीशुए एक फरीसियो रे कअरे रोटी खाणे बैठी रा, संगमरमरो रे पाँडे (सुराई) रे इत्र ल्याई 38 और तेबे तिना रे पैरा गे पीछे खड़ी ऊई की रोणे लगी और आपणे आसूआ साथे तिना रे पैर तोए और आपणे सिरों रे बालो साथे साफ कित्ते और तिना रे पैर बार-बार चूमनी की तिना पाँदे इत्र मलेया। 39 ये देखी की से फरीसी, जिने यीशु बुलाए थे, आपणे मनो रे सोचणे लगेया, “जे ये भविष्यबक्ता ऊँदा तो जाणी लंदा कि ये जो जवाणस एसखे छूणे लगी री, ये कूणे और केड़ी जवाणस ए? कऊँकि से तो पापी ए?” 40 ये जाणी की यीशुए बोलेया, “ओ शमीन मां ताखे कुछ बोलणा।” शमीने बोलेया, “ओ गुरु बोलो।” 41 तेबे यीशुए बोलेया, “केसी साऊकारो रे दो देणदार थे, एक पाँस लो चाँदिए रे सिक्के और दूजा पंजा चाँदिए रे सिक्केया रा देणदार था। 42 जेबे तिना गे वापस करने खे कुछ नि था, तो तेबे तिने दूई जणेया रा कर्ज माफ करी ता, तो बता तिना बीचा ते केस तेसखे जादा प्यार करना।” 43 शमीने जवाब दित्तेया, “मेरी समजा ते तेस, जेसरा तिने जादा कर्ज माफ कित्तेया।” यीशुए तेसखे बोलेया, “तैं ठीक उतर देई राखेया।” 44 तेबे तेसा जवाणसा कनारे फिरी की तिने शमीनो खे बोलेया, “क्या तूँ एसा जवाणसा खे देखणे लगी रा? आऊँ तेरे कअरे आया, पर तैं माखे पैर तोणे खे पाणी नि दित्तेया पर एसे मेरे पैर आपणे आसूआ साथे तोए और आपणे बाला साथे साफ कित्ते। 45 तैं मेरे गले लगी की मेरा स्वागत नि कित्तेया, पर जदुओ ते आऊँ आयी रा, तदुओ ते एसे मेरे पैर चूमणे नि छाडी राखे। 46 तैं मेरे सिरों रे तेल नि मलेया, पर एसे मेरे पैरो रे इत्र मलेया। 47 तेबेई तो आऊँ ताखे बोलूँआ कि एसा रे जो बी पाप थे, सेयो माफ ऊईगे कऊँकि एसे बऊत प्यार कित्तेया, पर जेसरा थोड़ा माफ ऊआ, से थोड़ा ई प्यार करोआ।” 48 तेबे यीशुए तेसा जवाणसा खे बोलेया, “तेरे पाप माफ ऊईगे।” 49 तेबे जो लोक तिना साथे रोटी खाणे बैठी रे थे, सेयो आपणे-आपणे मनो रे सोचणे लगे, “ये कूणे जो पाप बी माफ करी देओआ? जेते खे सिर्फ परमेशर ई माफ करी सकोआ।” 50 पर तिने तेसा जवाणसा खे बोलेया, “तेरे विश्वास तूँ बचाई ली, बेफिकर ऊई की चली जा।”

8 इजी ते बाद सेयो नगर-नगर और गांव-गांव रे प्रचार करदे ऊए और परमेशरो रे राज्य रा सुसमाचार सुणांदि ऊए, फिरने लगे, और सेयो बारा चले तिना साथे थे, 2 और कुछ जवाणसा बी जो दुष्टात्मा ते और बमारिया ते छुड़ाई राखिया थिया, और तिना बीचा ते यो ए-मरियम मगदलिनी, जेसा ते सांत दुष्टात्मा निकाली राखिया थिया 3 और हेरोदेस राजे रे पण्डारी खोजे री लाडी योअन्ना और सुसन्नाह और मुखती सारिया जवाणसा, जो आपणे पैसे साथे यीशु और तिना रे चलेया री मताद करो थिया। 4 जेबे बड़ी पीड़ कट्टी ऊई और जगा-जगा रे लोक तिना गे आओ थे, तेबे तिने उदारणो रे बोलेया, 5 “एक बेजा बाणे वाला बेजा बाणे निकलेया और बाँदे बखते कुछ दाँणे बाटा रे छूटे और सर्गो रे पंछिए सेयो चूगी ले। 6 कुछ सापड़ी पाँदे छूटे और जम्मे पर सिनक ना मिलणे री बजअ ते सूकी गे। 7 कुछ बिऊ जाडो बीचे छूटे और जाडे साथे-साथे बढ़ी की सेयो दबाई ते। 8 कुछ अच्छी जमीना पाँदे छूटे और जम्मी की सौ गुणा फल ल्याए।” ये बोली की तिने जोरे की बोलेया, “जो समजी सकोआ से तिजी खे त्यानो साथे सुणो और मानी बी लओ।” 9 तिना रे चलेया तिना ते पूछेया, “ये उदारण क्या ए?” 10 यीशुए बोलेया, “तुसा खे परमेशरो रे राज्य रे पेतो री समज दित्ती रिये, पर ओरी खे उदारणो रे सुणाया जाओआ, तेबेई, “सेयो देखदे ऊए पनि देखदे, और सुणदे

ऊए पनि समजदे। 11 “उदारणो रा मतलब तो ए: दौणो परमेशरो रा वचन ए। 12 बाटा रे कनारले सेयो दौणो ए, जिने सुणयो पर शैतान तिना रे मनो चकी की लई जाओआ केथी एडा नि ओ कि सेयो विश्वास करी की उद्धार पाओ। 13 सापड़ी पाँदले सेयो ए कि जेबे सुणोए, तेबे खुश ओए, पर जड़ ना पकड़ने री बजअ ते थोड़ी देर तक विश्वास करोए और परीक्षा रे बखते पटकी जाओए। 14 जो जाड़ो रे छूटे सेयो ये कि जो सुणो तो आए, पर चिन्ता, पैसा, जिन्दगिया रे सुख-बिलासा रे फसी जाओए और तिना रा फल नि पाकदा। 15 पर अच्छी जमीना रे सेयो ए, जो वचन सुणी की खरे और खरे मनो ते सम्बाली कि राखोए और सब्रा साथे फल लयाओए। 16 “कोई बी दिऊए खे पांडे साथे नि टकदा और ना माँजे निठे राखदा, पर फटिया पाँदे राखोआ, ताकि पीतरे आऊणे वालेया खे प्रयासा ओ। 17 जो कुछ बी छिपेया राए, से सामणे आऊणा और जो कुछ गुप्त ए, से जाणेया जाणा और सामणे बी आऊणा। 18 इजी री खतर चौकस रओ कि तुसे कियों सुणोए? कऊँकि जेसगे आया, तेसखे देणा और जेसगे आए नि, तेसते से बी लयी लणा, जेतेखे से आपणा समजोआ।” 19 यीशु री आम्मा और पाई तिना गे आए, पर पीड़ा री बजअ ते तिना खे मिली नि सके। 20 तेबे तिना खे बोलेया, “तुसा री आम्मा और पाई और बईण बरि खड़ी रे और तुसा खे मिलणा चाओए।” 21 यीशुए तिना खे जवाबो रे बोलेया, “तिना खे बोलो कि मेरी आम्मा और पाई तो यो ई ये, जो परमेशरो रा वचन सुणोए और मानोए।” 22 तेबे एक दिन यीशु और तिना रे चले किस्तिया रे चढ़े और तिने तिना खे बोलेया, “आओ, गलीली समुद्रो ते पार चलौए।” तेबे तिने किस्ती खोली ती। 23 पर जेबे किस्ती चली री थी, तेबे यीशु सयी गे और समुद्रो रे तूफान आया और किस्तिया रे पाणी फरने लगेया और सेयो मुसीबता रे थे। 24 तेबे चेलेया नेडे आयी की यीशु जगाए और बोलेया, “ओ स्वामी! स्वामी! आसे डूबणे वाले ए।” तेबे यीशु उठी की तूफानो खे, पाणिए खे और लईरा खे बकणे लगे और सेयो रूकी गे और चैन ऊईगा। 25 तेबे यीशुए चेलेया खे बोलेया, “तुसा रा विश्वास केयी था?” पर सेयो डरी गे और हेरान ऊई की आपू बीचे बोलणे लगे, “ये कूणे, जो तूफान और पाणिए खे आज्ञा देओआ और सेयो एसरी आज्ञा खे मानोए?” 26 तेबे सेयो गिरासेनियो रे देशो रे पऊँखे जो गलीलो ते पार, सामणे ए। 27 जेबे यीशु कनारे पाँदे उतरे, तेबे तिना खे तेस नगरो रा एक माणू मिलेया, जेसरे दुशात्मा थी और कई दिना ते ना टाले पईनी था और ना कअरे जाओ था, पर कब्रा रे अओ था। 28 से यीशुए खे देखी की चींगेया और तिना सामणे रूडी की जोरे की बोलणे लगेया, “ओ परमप्रदान परमेशरो रे पुत्र यीशु! माखे तांते क्या काम? मेरी तांते बिनती ये कि माखे कष्ट नि दे।” 29 कऊँकि यीशु तेस माणूए रे जो अशुद्ध आत्मा थी तेसा खे निकलने री आज्ञा लगी रे थे देणे, कऊँकि से बार-बार तेसखे कष्ट देओ थी। लोक तेसखे साँगलो और बेडिये की बानी की राखो थे, पर से तिना खे थोड़ी की बणो खे नठी जाओ था और दुशात्मा तेसरे बैठी गी थी। 30 यीशुए तेसते पूछेया कि तेरा नाओं क्या ए? तिने बोलेया सेना। कऊँकि मुखती सारिया दुशात्मा तेसरे बैठी गी थिया। 31 और तिने यीशुए ते प्रार्थना किती कि माखे डूगे गड्डे रे सेटणे री आज्ञा नि दे। (Abyssos 012) 32 तेती पाहड़ो पाँदे सूंअरो रा एक चूण्ड चरने लगी रा था, तो तेबे तिने तिना ते बिनती किती, “आसा खे एते चूण्डो रे बैठणे दे।” तो तिने सेयो जाणे दित्तिया। 33 तेबे दुशात्मा तेस माणूए ते निकली की सूंअरो रे चली गिया और से चूण्ड काअड़ी पाँदे ते छवाल लयी की समुद्रो रे डूबी की मरी गा। 34 गवाले जो ऊआ था तेस देखी की नठीगे। और नगरो और गांव रे जाई की सारा आल सुणया। 35 तेबे लोक जो ऊआ था, तेस देखणे खे आए, तेबे तिने से माणू, जेसरे दुशात्मा थिया, से यीशुए रे पैरा पाँदे पड़े रा और टाले पईनी की ओशा रे बैठे रा देखेया और डरी गे। 36 देखणे वालेया तिना गे बताया कि से दुशात्मा रा सताया रा माणू कियों ठीक ऊआ। 37 तेबे गिरासेनियो रे ओरले-पोरले लोके यीशुए ते बिनती किती कि एथा ते चली जा, कऊँकि सेयो बऊत डरी गे थे, तेबे सेयो किस्तिया रे बैठी की वापस ऊईगे। 38 जेस माणूए ते दुशात्मा निकली गी थी, से तिना ते बिनती करने

लगेया कि माखे आपू साथे आऊणे दे, पर यीशुए तेसखे बिदा करदे ऊए बोलेया, 39 “आपणे कअरो खे चली जा और लोका गे बता कि परमेशरो तेरिया तई कितणे बड़े काम करी राखे।” तेबे से सारे नगरो रे जाई की प्रचार करने लगेया कि यीशुए मेरिया तई कितणे बड़े काम करी राखे। 40 जेबे यीशु वापस ऊणे लगी रे थे, तेबे लोक तिना साथे खुशिया साथे मिले, कऊँकि सेयो सब जणे तिना खे न्यालो थे। 41 तेबे यार्डर नाओं रा एक माणू, जो प्रार्थना रे कअरो रा अधिकारी था, यीशुए गे आया और तिना रे पैरो पाँदे पड़ी की प्रार्थना करने लगेया कि मेरे कअरे चलो। 42 कऊँकि तेसरी बारा साला री इकलौती बेटी मरने वाली थी; जेबे सेयो जाणे लगी रे थे, तेबे लोक तिना पाँदे रूडी जाओ थे। 43 तेबे एक जवाणस जेसा खे बारा साला ते खून बइणे री बमारी थी और से आपणी सारी सम्पत्ति बैदा खे देई चुकी थी पर तेबे बी से केसी रे आथो की ठीक नि ऊई। 44 तेबे तेसे पीछे ते आयी की यीशुए रे टाले छुँए और तेरुई तेसा रा खून बईणा बन्द ऊईगा। 45 तेबे यीशुए बोलेया, “आऊँ किने छुँया?” जेबे सब मुकरी गे, तेबे पतरसे और तेसरे साथिये बोलेया, “ओ स्वामी! तुसे तो पीड़े जिक्की ते और ये तो तुसा पाँदे ई पड़ी गी।” 46 पर यीशुए बोलेया, “आऊँ किने तो छुँई राखेया।” कऊँकि माखे पता लगी गा रा कि मांजे सामर्थ निकली री। 47 जेबे जवाणसे देखेया कि आऊँ छिपी नि सकदी, तेबे से बऊत डरदे-डरदे आयी और तिना रे पैरा पाँदे पड़ी की तेसे सबी लोका सामणे बताया कि मैं किजी री बजअ ते तुसे छुँए और कियों फटाफट ठीक ऊईगी। 48 यीशुए तेसा खे बोलेया, “बेटिये! तेरे विश्वासे तू बचाईती, बेफिकर ऊई की चली जा।” 49 सेयो ये बोलणे ई लगी रे थे कि किने प्रार्थना रे कअरो रे सरदारो रे कअरो ते आयी की बोलेया, “तेरी बेटी तो मरी गी और गुरूओ खे कष्ट नि दे।” 50 यीशुए ये सुणी की बोलेया, “डर नि; बस विश्वास राख तो से बची जाणी।” 51 सरदारो रे कअरे जाई की यीशुए पतरस, यूहन्ना याकूब और तेसा बेटिया रे माए-बाओ खे छाडी की ओर कोई बी पीतरे नि आऊणे दित्ते। 52 सब तेसा खे रोणे-पीटणे लगी रे थे, पर यीशुए बोलेया, “रोओ नि; कऊँकि ये मरी नि रई, पर सयी री।” 53 सेयो ये जाणी की कि ये तो मरी गी री, तिना रा मजाक ऊड़ाणे लगे। 54 पर यीशुए तेसा रा आथ पकड़ेया और बोलेया, “ओ बेटिये उठ!” 55 तेबे तेसा रे प्राण आईगे और तेबे से फटाफट उठी गी। तेबे यीशुए तिना खे आज्ञा दित्ती कि एसा खे कुछ खाणे खे देयो। 56 तेसा रे माए-बाओ हेरान ऊईगे, पर यीशुए तिना खे सावधान करी की बोलेया, “एती जो कुछ ऊआ, से केसी गे नि बताणा।”

9 तेबे यीशुए बारा चेलेया खे बुलाई की तिना खे सारिया दुशात्मा पाँदे और बमारिया खे दूर करने री सामर्थ और अक्क दित्तेया 2 और तिना खे परमेशरो रे राज्य रा प्रचार करने और बमारा खे ठीक करने पेजे। 3 तेबे यीशुए तिना खे बोलेया, “बाटा खे कुछ नि लणा, ना डण्डा, ना चोली, ना रोटी, ना पैसे और ना दो कुरते। 4 जेस केसी रे बी कअरे तुसे जाओ, तेथी रओ और तेथा तेई बिदा ओ। 5 जो कोई तुसा खे मानोगा नि, तेस नगरो ते निकलदे ऊए आपणे पैरा री तूड तेथी चाडी देओ, ताकि तिना पाँदे गवाई ओ।” 6 तेबे सेयो निकली की गांव-गांव रे सुसमाचार सुणादे ऊए और हर केथी लोका खे ठीक करदे ऊए कुमदे-फिरदे रये। 7 तेबे देशो रे चौथाइया रा राजा हेरोदेस ये सब सुणी की कबराईगा, कऊँकि बऊत जणे बोलेया, “यूहन्ना बपतिस्मा देणे वाला मरे यासा बीचा ते जिऊँदा ऊईगा रा।” 8 कई जणेया ये कि एलिय्याह दिशेया। कईए बोलेया कि पुराणे भविष्यबक्तेया बीचा ते कोई जिऊँदा ऊईगा रा। 9 हेरोदेसे बोलेया, “यूहन्ने रा तो मैं सिर बडायो, एबे ये कूणे, जेसरे बारे रे एडिया गल्ला सुणूँआ?” तेबे तिने से देखणा चाया। 10 तेबे प्रेरिते वापस आयी की जो कुछ तिने कित्तेया था, तिना गे बताई ता, तेबे सेयो तिना खे लग करी की बैतसैदा नाओं रे एक नगरो खे लयी गा। 11 ये जाणी की पीड़ तेस पीछे चली पड़ी और से खुशिया ते तिना साथे मिलेया और तिना साथे परमेशरो रे राज्य री गल्ला करने लगेया और जो ठीक ऊणा चाओ थे सेयो ठीक कित्ते। 12 जेबे साँज ऊणे

वाली थी, तेबे बारा चलेया तिना गे आयी की बोलेया, “पीड़ा खे बिदा करो, ताकि चऊँ कनारें रे गांव और बस्तिया रे जाई की रओ और रोतिया रा उपाय करो, कऊँकि आसे एती सुणसाण जगा रे ए।” 13 यीशुए तिना खे बोलेया, “तुसेई तिना खे खाणे खे देयो।” चलेया बोलेया, “आसा गे तो पाँज रोतिया और दो मछलिया खे छाडी की ओर कुछ निए, पर आ, जे आसे जाई की इना सबी लोका खे रोटी खरीदी लईए, तो ऊई सकोआ।” सेयो लोक पाँज हजार मर्दा रे तकरीबन थे। 14 तेबे यीशुए चलेया खे बोलेया, “तिना खे पंजा-पंजा करी की बाँटी रे बठयाली देओ।” 15 तिने तेड़ा ई कितेया और सब बठयाली ते। 16 तेबे यीशुए सेयो पाँज रोतिया और दो मछलिया लईया और स्वर्गो रे कनारें देखी की धन्यवाद कितेया और रोतिया तोड़ी-तोड़ी की चलेया खे देंदे गये कि लोका खे देओ। 17 तेबे सब खाई की रज्जी गे और बचे रे टुकड़ेया रिया बारा टोकरिया परी की चकिया। 18 जेबे यीशु कल्ले जे प्रार्थना करने लगी रे थे और चले तिना साथे थे, तेबे तिने चलेया ते पूछेया, “लोक माखे क्या बोलेए?” 19 तिने जवाब दितेया, “यूहन्ना बपतिस्मा देणे वाला, और कोई-कोई एलिय्याह और कोई-कोई ये बोलेए कि पुराणे भविष्यबक्तेया बीचा ते कोई जिऊँदा ऊईगा रा।” 20 यीशुए तिना ते पूछेया, “पर तुसे माखे क्या बोलेए?” पतरसे जवाब दितेया, “परमेशरो रा मसीह।” 21 तेबे यीशुए तिना खे सावधान करी की बोलेया, “ये केसी गे नि बोलणा।” 22 तेबे तिने बोलेया, “मां माणू रे पुत्रो खे जरूरी ए कि आऊँक बऊत दुःख उठाऊँ, बुजुर्ग, बड़े पुरोईत और शास्त्री माखे तुच्छ जाणी की काई देओ और आऊँ तीजे दिने जिऊँदा ऊई जाऊँ।” 23 तिने सबी खे बोलेया, “जे कोई मां पीछे आऊणा चाओ, तो आपणे आपू खे ना करी की और हर रोज आपणा क्रूस चकी की मां पीछे आयी जाया करो। 24 कऊँकि जो कोई आपणा प्राण बचाणा चाओगा, तेस से खोणा, पर जो कोई मां पीछे आपणे प्राण खोओगा, तेस ई से बचाणा। 25 जे माणूए खे सारी दुनिया मिली जाओ और आपणे प्राण नि रओ या तिजी रा नुकशाण ओ, तो तेसखे क्या फाईदा ऊणा। 26 जो कोई मांते और मेरी गल्ला ते शर्माओगा, माणू रा पुत्र बी, जेबे आपणी, आपणे पिते री और पवित्र स्वर्गदूता री महिमा साथे आऊणा, तो से बी तेसते शर्माणा। 27 आऊँ तुसा खे सच लगी रा बोलणे कि जो एती खडी रे, तिना बीचा ते कई एड़े ए कि जदुओ तक परमेशरो रा राज्य ना देखी लओगे, तदुओ तक नि मरने।” 28 इना गल्ला ते कोई आठ दिन नाद यीशु, पतरसे, याकूब और यूहन्ने खे लयी की प्रार्थना करने खे पाहड़ो पँदि गये। 29 जेबे सेयो प्रार्थना करने ई लगी रे थे, तो तिना रे मुंओ री शकल बदली गी और तिना रे टाले सफेद ऊई की चमकणे लगे। 30 तेबे देखो, मूसा और एलिय्याह, यो दोनो मर्द यीशुए साथे गल्ला करने लगी रे थे। 31 यो महिमा साथे दिखे और यीशुए रे मरने री चर्चा करने लगी रे थे, जो यरूशलेमो रे ऊणे वाला था। 32 पतरसे और तेसरे साथी नीजा रे थे और जेबे ठीक टंगो रे ओश आयी, तेबे यीशुए री महिमा और तिना दूँई मर्दा खे, जो तिना साथे खडी रे थे, देखेया। 33 जेबे सेयो यीशुए गे ते जाणे लगे, तेबे पतरसे यीशुए खे बोलेया, “ओ मालक! आसा रा एती रणा ठीक ए, तो आसे तीन तम्बू बणाऊँए, एक तुसा खे, एक मूसे खे और एक एलिय्याह खे।” तेसखे पता नि था कि से क्या बोलणे लगी रा। 34 से ये बोलणे ई लगी रा था कि एक बादल तिना पँदि छाईगा और जेबे सेयो तेस बादलो ते किरने लगे, तो डरी गे। 35 तेबे तेस बादलो ते परमेशरो री ये आवाज आई, “ये मेरा पुत्र और मेरा चूणेया राए, एसरी सुणो।” 36 ये आवाज ऊँदे ई यीशु तिना खे कल्ले मिले और सेयो चुप रये और तिना री कोई गल्ल तिना दिना रे किने नि बोली। 37 और दूजे दिने जेबे यीशु पाहड़ो ते उतरें, तेबे एक बऊत बड़ी पीड़ तिना खे आयी की मिली। 38 देखो, पीड़ा बीचा ते माणूए चींगी की बोलेया, “ओ गुरु! आऊँ तुसा ते बिनती कऊँआ कि मेरे पाऊए पँदि कृपा करो, कऊँकि से मेरा एकलौता ए। 39 देख, एक दुष्टात्मा तेसखे पकड़ोई, ये एकदम चींगणे लगी जाओआ और से एसखे एड़ा मरोड़ोई कि एसरे मुंओ ते जगुड़ निकलने लगी जाओआ और एसखे माण्डी की, मुश्कला साथे छाड़ोई। 40 मैं तुसा रे चलेया ते बिनती किती कि दुष्टात्मा खे

निकयाली देओ, पर सेयो नि निकयाली सके।” 41 यीशुए जवाब दितेया, “ओ अविश्वास करने वालेयो और टीठ लोको! मां कदुओ तक तुसा साथे रणा? कदुओ तक तुसा खे सईन करूँ? तेसखे ओरे ल्याओ मांगो।” 42 से आऊणे ई लगी रा था कि दुष्टात्मे से पटकी की मकरेड़ेया, पर यीशु दुष्टात्मा खे बके और पाऊए खे ठीक करी की तेसरे पिते गे सम्बाली ता। 43 तेबे सारे लोक परमेशरो री महान् सामर्थ्य ते हैरान ऊईगे। पर जेबे सब लोक तिना सबी कामा ते जो से करो था, अचम्बा करने लगी रे थे, तो तिने आपणे चलेया खे बोलेया, 44 “चौकस रओ और यो गल्ला तुसे याद राखो, कऊँकि आऊँ माणू रा पुत्र माणूआ रे आथो रे पकड़वाऊणे वाला ए।” 45 पर सेयो एसा गल्ला खे नि समजो थे और ये तिना ते छिपी री रई, ताकि तिना खे तिजी रे बारे रे पता नि लगेओ और सेयो एसा गल्ला रे बारे रे पूछणे ते तिना ते डरो थे। 46 तेबे तिना बीचे ये बईस ऊणे लगी कि आसा बीचा ते बड़ा कुण ए? 47 पर यीशुए खे तिना रे मनो री गल्ल पता लगी गी, तेबे तिने एक बालक लयी की आपू गे खड़ा कितेया। 48 तेबे तिना खे बोलेया, “जो कोई मेरे नाओं ते एस बालको खे मानोआ, से माखे मानोआ, जो माखे मानोआ, से मेरे पेजणे वाले खे मानोआ, कऊँकि जो कोई तुसा बीचा ते छोटे ते छोटा ए, सेई बड़ा ए।” 49 तेबे यूहन्ने बोलेया, “ओ मालक! आसे एक माणू तुसा रे नाओं ते दुष्टात्मा खे निकयालदा ऊआ देखेया और आसे तेसखे एड़ा करने ते ना किती। कऊँकि से तेरा चेला नि था।” 50 यीशुए तिना खे बोलेया, “तेसखे ना नि करो, कऊँकि जो तुसा रे बिरोदो रे निए, से तुसा साथे ए।” 51 जेबे तिना रे ऊबे चकणे रे दिन पूरे ऊणे वाले थे, तेबे तिने यरूशलेमो खे जाणे रे बारे रे पक्का बिचार करी ला। 52 तेबे तिने आपू ते आगे दूत पेजे। सेयो सामरिया रे गांव रे गये, ताकि तिना खे जगा त्यार करो। 53 पर तिने लोक सेयो उतरने नि दिते, कऊँकि सेयो यरूशलेमो खे जाणे लगी रे थे। 54 ये देखी की तिना रे चले याकूब और यूहन्ने बोलेया, “ओ प्रभु! क्या तुसे चाओए कि आसे आज्ञा देऊँ कि सर्गो ते आग पडी की तिना खे स्वा करी देओ।” 55 पर यीशु मुडी की तिना खे बकणे लगे और बोलेया, “तुसे नि जाणदे कि तुसे केडी आत्मा रे ए? 56 कऊँकि माणू रा पुत्र लोका रे प्राणा खे नाश करने नि, बल्कि बचाणे खे आयी रा।” तेबे सेयो केसी ओरी रे नगरो खे चली गे। 57 जेबे सेयो बाटा रिये चलणे लगी रे थे, तेबे किने तिना खे बोलेया, “जेती-जेती तुसे जाओगे, मां तुसा पीछे चली पड़ना।” 58 यीशुए तेसखे बोलेया, “गीदबारे रे डवार और सर्गो रे पछिया रे बसेरे ओए, पर मां माणू रे पुत्रो खे सिर राखणे बी आपणा कअर निए।” 59 यीशुए दूजे खे बोलेया, “मां पीछे आयी जा।” तिने बोलेया, “ओ प्रभु, पईले माखे जाणे दे, कि आऊँ आपणे पिते खे दबाई आऊँआ। तेबे तां पीछे चली पड़ुंगा।” 60 यीशुए तेसखे बोलेया, “जो आत्मिक रूपो रे मरे रे ए तिना खे आपणे मुडदे दबाणे दे, पर तूँ जाई की परमेशरो रे राज्य रा सुसमाचार सुणा।” 61 एकी ओरी बी बोलेया, “ओ प्रभु! मां तुसा पीछे आयी जाणा, पर पईले माखे जाणे दे, ताकि आऊँ आपणे कअरो वालेया ते बिदा लऊँ।” 62 यीशुए तेसखे बोलेया, “जो कोई आपणा आथ अलो पँदि राखी की पीछे देखोआ, से परमेशरो रे राज्य जोगा निए।”

10 इना गल्ला ते बाद प्रभुए सत्तर और चले ओर नियुक्त किते और जेती-जेती नगर और जगा रे सेयो आपू जाणे वाले थे, तेती तिने सेयो दो-दो करी की आपू ते आगे पेजे 2 और यीशुए तिना खे बोलेया, “पाक्के रे डोरू तो बऊत ए, पर मजूरदार कम ए इजी री खातर डोरूआ रे मालको ते प्रार्थना करो कि सेयो आपणे डोरूआ बडाणे खे मजूरदार पेजो। 3 जाओ; देखो, आऊँ तुसा खे पेडा जेडे तिना लोका बीचे पेजुआ जो भेड़िए जेडे खतरनाक ए। 4 तेबेई तो ना बटुआ, ना चोली, ना जोडे लणे और ना ई बाटा रे केसी खे नमस्ते करनी। 5 जेस केसी रे कअरो रे जाओ पईले बोलो, ‘एस कअरो रा कल्याण ओ।’ 6 जे तेती कोई कल्याणो जोगा ओगा, तो तुसा रा कल्याण तेसखे लगणा, नई तो तुसा गे वापस आयी जाणा 7 और तेसी कअरो रे रओ और जो कुछ तुसा खे खाणे-पीणे खे मिलो, खाओ-

पीओ, कऊँकि मजूरदारो खे तिना री मजदूरी मिलणी चाईयो; और कअरे-कअरे जाई की नि कूमणा 8 “और जेते नगरो रे जाओ और तेथो रे लोक तुसा खे मानो, तो जो सेयो तुसा रे सामणे राखो, सेई खाओ। 9 तेथो रे बमारा खे ठीक करो और तिना खे बोलो कि परमेशरो रा राज्य तुसा रे नेडे आयी पऊँछी रा। 10 पर जेस नगरो रे जाओ और तेथो रे लोक तुसा खे नि मानो, तो तिना रे बजारो रे जाई की बोलो 11 ‘तुसा रे नगरो री तूड बी जो म्हारे पैरो रे लगी री, आसे तुसा सामणे चाडी देऊँए, तेबे बी ये जाणी लो कि परमेशरो रा राज्य तुसा रे नेडे आयी पऊँछी रा।’ 12 आऊँ तुसा खे बोळूँआ कि तेस दिने, तेस नगरो री दशा ते, सदोम नगरो री दशा जादा सईणे जोगी ऊणी। 13 “हाय खुराजीन! हाय बैतसैदा! जो सामर्था रे काम तुसा रे कित्ते, जे सेयो सूर और सैदा रे नगरा ऊँदे, तो टाट टखी की और स्वाई बीचे बैठी की सेयो कदका मन फिराई देंदें। 14 पर न्याय रे दिना रे तुसा री दशा ते, सूर और सैदा री दशा जादा सईणे जोगी ऊणी। 15 ओ कफरनहूम! क्या तूँ स्वर्गो तक ऊच्चा करेया जाणा? तूँ तो नरको तक थाले करेया जाणा। (Hades g86) 16 जो तुसा री सुणोआ, से मेरी सुणोआ और जो तुसा खे तुच्छ जाणोआ, से माखे तुच्छ जाणोआ और जो माखे तुच्छ जाणोआ, से मेरे पेजणे वाले खे तुच्छ जाणोआ।” 17 सेयो सत्तर चले खुश ऊई की आधी की फेर बोलणे लगे, “ओ प्रभु! तुसा रे नाओं ते दुष्टात्मा बी आसा रे वशो रे ए।” 18 यीशुए तिना खे बोलेया, “आऊँ शैतानो खे बिजलिया जेड़ा, स्वर्गो ते उतरदा ऊआ देखणे लगी रा था। 19 देखो; मैं तुसा खे सापो और बिच्छुआ खे केसणे रा और तुसा रे दुश्मण शैतानो री सारी सामर्था पाँदे अक्क देई राखेया और केसी बी चीजा ते तुसा खे नुकशाण नि ऊणा। 20 तेबे बी इजी ते खुश नि ओ कि दुष्टात्मा तुसा रे वशो रे, पर इजी ते खुश ओ कि तुसा रे नाओं स्वर्गो रे लिखे रे।” 21 तेसी बखते यीशु पवित्र आत्मा रे खुश ऊई की बोलणे लगे, “ओ पिता! स्वर्ग और तरतिया रे प्रभु! आऊँ तुसा रा धन्यवाद करूँआ कि तुसे यो गल्ला ज्ञानी और समजदारा ते लकोई रिया राखिया और बालका गे बताईया। आ, ओ पिता! कऊँकि तुसा खे येई खरा लगेया। 22 मेरे पिते मांगे सब कुछ सम्बाली ता रा, और कोई नि जाणदा कि पुत्र कूणे? बस पिता और पिता कूणे? ये बी कोई नि जाणदा। बस पुत्र और जेस पाँदे पुत्र प्रगत करना चाओ।” 23 तेबे तिने चलेया री तरफा खे फिरी की बोलेया, “धन्य ए सेयो आखी, जो इना गल्ला खे जो तुसे देखोए, सेयो बी देखोईया। 24 कऊँकि आऊँ तुसा खे बोळूँआ कि बऊत सारे भविष्यबक्ते और राजे चाया कि जो गल्ला तुसे देखोए, देखो, पर देखी नि केसे और जो गल्ला तुसे सुणोए, सुणो, पर सुणी नि सके।” 25 एक दिन जेबे यीशु लोका खे उपदेश देणे लगी रे थे तेबे एक धर्मशास्त्री उठेया और ये बोली की तिना री परीक्षा करने लगेया, “ओ गुरु! अनन्त जीवनों रा बारस ऊणे खे आऊँ क्या करूँ?” (aiōnios g166) 26 यीशुए तेसखे बोलेया, “मूसे रा बिधानो रे क्या लिखी राखेया? तूँ तिजी रा बखान किंयों करेया?” 27 तिने जवाब दित्तेया, “तूँ प्रभु आपणे परमेशरो साथे आपणे पूरे मन, पूरे प्राण, पूरी शक्ति और पूरिया अक्ला साथे प्यार राख और आपणे पडोसिये खे आपू जेड़ा प्यार राख।” 28 यीशुए तेसखे बोलेया, “तैं ठीक बोलेया, येई कर, तो तां अनन्त जिन्दगी पाणी।” 29 पर तिने आपणे आपू खे तर्मी ऊणे री तंई पूछेया, “तो मेरा पडोसी कूणे?” 30 यीशुए बोलेया, “एक माणू यरूशलेमो ते यरीहो नगरो खे जाणे लगी रा था, तेबे डाकूए से पकड़ेया और तेसरे टाले खुलाई ते और तेसखे कुटी की और अदमुआ करी की चली गे। 31 तेबे एड़ा ऊआ कि तेसा ई बाटा ते एक यहूदी पुरोईत जाणे लगी रा था, पर तेसखे देखी की बिना मताद कित्ते ग्लयान करी की चली गा। 32 ईयाँ ई एक लेवी जो मन्दरो रे काम करोआ तिसिये आया, से बी तेसखे देखी की बिना मताद कित्ते ग्लयान करी की चली गा। 33 पर सामरी प्रदेशो रा एक यात्री तिसिये आया। जेबे तेसरी नजर तेस कार्डल माणूए पाँदे पडी, तेबे तेसखे देखी की तेस सामरिये खे तेस पाँदे तरस आईगा। 34 तेबे तिने तेसगे आयी की, जेती बूडी री थी, तेती तेल और दवाई लगाई की और पट्टिया बानिया और आपणी सवारिया पाँदे चढाई की संरायी खे लयी गा और तेसरी सेवा कित्ती। 35 दूजे दिने

आयी की तिने दो चाँदिए रे सिक्के निकयाली की संरायी रे मालको खे दिते और बोलेया, ‘एसरी सेवा कर्नी और जो कुछ तेरा और लगणा से जेबे आऊँ वापस आऊणा, तेबे ताखे देई देऊँगा।’ 36 एबे बताओ कि जो डाकूआ रे गेड़े रे आईगा था, इना तिऊँ बीचा ते तेसरा पडोसी कूणे?” 37 तिने बोलेया से, “जिने तेस पाँदे दया कित्ती।” यीशुए तेसखे बोलेया, “जा तूँ बी एड़ा ई करा।” 38 यीशु और तिना रे चले सफर करदे ऊए एक गांव रे पऊँछे, जेती मार्था नाओं री एक जवाणसे सेयो आपणे कअरे बुलाए। 39 मरियम नाओं री तेसा री एक बईण थी, से यीशुए रे पैरा गे बैठी की तिना रा उपदेश सुणने लगी री थी। 40 पर मार्था कअरो रा काम करी-करी की थकी गी और तिना गे आयी की बोलणे लगी, “ओ प्रभु! क्या तुसा खे पता निए कि मेरी बईणे आऊँ कअरो रा काम करने खे कल्ली छाडी ती री? तो एसा खे बोलो कि मेरी मताद करा।” 41 यीशुए तेसा खे बोलेया, “मार्था ओ मार्था! तूँ बऊत गल्ला री चिन्ता करेई और कबराई। 42 पर एक गल्ल जरूर ए और से उत्तम इस्सा मरियमे चूणी ला रा, जो तेसा ते छुड़ाया नि जाणा।”

11 तेबे यीशु एकी जगा रे प्रार्थना लगी रे थे करने और जेबे सेयो प्रार्थना करी चुके, तेबे तिना रे चलेया बीचा ते एकी जणे तिना खे बोलेया, “ओ प्रभु! जिंयों यूहन्ने आपणे चलेया खे प्रार्थना करना सिखाया, तिंयों ई तुसे बी आसा खे सिखाई देओ।” 2 यीशुए तिना खे बोलेया, “जेबे तुसे प्रार्थना करो, तो बोलो; “ओ पिता तुसा रा नाओं पवित्र मानेया जाओ, तुसा रा राज्य आओ। 3 आसा रे पूरे दिनो री रोटी, हर दिन आसा खे देया करो। 4 म्हारे पाप माफ करो, कऊँकि आसे बी आपणे हर एक अपराधिया खे माफ करूँए और आसा खे परीक्षा रे एक दोस्त ओ।” 5 यीशुए तिना खे बोलेया, “तुसा बीचा ते कूणे कि तेसरा एक दोस्त ओ और तुसे आदी राती जाई की तेसखे बोलो कि ओ दोस्ता माखे तीन रोतिया दे। 6 कऊँकि एक यात्री मांगे आयी रा और तेसखे देणे खे मांगे कुछ निए 7 और से पीतरो ते जवाब देओ कि माखे तंग नि कर, एबे तो द्वार बंद ऊईगे रे और मेरे बालक मांगे बछाऊणे रे ए, तेबेई तो आऊँ ताखे उठी की देई नि सकदा। 8 आऊँ तुसा खे बोळूँआ कि जे तेसरा दोस्त ऊई की बी, तेसखे उठी की ना करो, तेबे बी तेसखे शर्म छाडी की मांगणे री बजअ ते, जितणी तेसखे जरूरत ए, तिथणा उठी की देणा। 9 आऊँ तुसा खे बोळूँआ कि तुसा री जो बी जरूरत ए से परमेशरो ते मांगे और परमेशरो ते पाणे री उम्मीद बी राखो। 10 कऊँकि जो कोई माँगोआ, तेसखे मिलोआ, और जो टोलोआ, से पाओआ और जो खटखटाओआ, तेसखे खोलेया जाओआ। 11 तुसा बीचा ते कुण एड़ा पिता ए कि तेसरा पाऊ तेसते रोटी माँगो और से तेसखे पात्थर देओगा या मछली माँगो और से मछलिया रे बदले साप देओ। 12 या अण्डा माँगो और तेसखे बिच्छु देओ? 13 तो तेबे तुसे बुरे ऊई की आपणे बच्चेया खे खरी चीजा देणा जाणोए, तो तुसा रे स्वर्गिय पिते आपणे मांगणे वालेया खे पवित्र आत्मा कऊँ नि देणी?” 14 तेबे तिने एक गूँगी दुष्टात्मा निकयाली, जेबे दुष्टात्मा निकली गी, तेबे गूँगा बोलणे लगेया और लोक हैरान ऊईगे। 15 पर तिना बीचा ते कई जणे बोलेया, “ये तो दुष्टात्मा रे सरदार शैतानो री मतादा ते दुष्टात्मा खे निकयालोआ।” 16 तेबे कईए तिना खे परखणे खे सर्गो रा एक चिहू मांगेया। 17 पर यीशुए तिना रे मनो री गल्ल जाणी की तिना खे बोलेया, “जेस-जेस राज्य रे फूट ओई, से राज्य ऊजडी जाओआ। और जेस कअरो रे फूट ओई, से नाश ऊई जाओआ। 18 और जे शैतान आपणा ई बिरोदी ऊई जाओगा, तो तेसरा राज्य किंयों बणे रा रई सकोआ? कऊँकि तुसे मेरे बारे रे तो बोलोए कि शैतानो री मतादा ते दुष्टात्मा खे निकयालोआ। 19 जे आऊँ शैतानो री मतादा ते दुष्टात्मा खे निकयालूँआ, तो तुसा री ल्वादा केसरी मतादा ते निकयालोए? इजी री खतर तिना ई तुसा रा न्याय चुकाणा। 20 पर जे आऊँ परमेशरो री सामर्था ते दुष्टात्मा खे निकयालूँआ, तो परमेशरो रा राज्य तुसा रे नेडे आयी पऊँछी रा 21 जेबे तागतबर माणू अथियार बानी की आपणे कअरो री रखवाली करोआ, तो तेबे तेसरे कअरो री सारी सम्पति बची री रओई। 22 पर जेबे कोई तेसते बी बलवान, तेस पाँदे चढाई करी की

तेसा जीती लओओ, तेबे तेसरे सेयो अथियार जिना पाँदे तेसखे विश्वास था, छुड़ाई लओए और तेसरी सम्पति लूटी की बांडी देओआ। 23 जो मां साथे निए, से मेरे खलाफ ए और जो मां साथे कट्टा नि करदा, से बखेरोआ। 24 “जेबे दुष्टात्मा माण्णूए ते निकली जाओई, तेबे से राम करने खे सूकी जगा टोले ई और जेबे मिलदी नि, तेबे बोलेई कि मां आपणे तेस कअरो रेई, जेथा आऊँ निकली थी, वापस चली जाणा। 25 और तेबे तेसा खे आयी की से, साफ-सुथरा और सजाया रा मिलोआ। 26 तेबे से आपू साथे सात ओर दुष्टात्मा खे ल्याओई और सेयो तेथी बैठी जाओईया और तेस माण्णूए री दशा पईलकी दशा ते बी खराब ऊई जाओई।” 27 जेबे यीशु इना गल्ला करने ई लगी रे थे, तेबे पीड़ा बीचा ते एक जवाणसे जोरे की बोलेया, “धन्य से माए जेसे ताखे जन्म देई राखेया और सेयो स्तन, जो तें चूसी राखे।” 28 यीशुए बोलेया, “आ; पर धन्य ए सेयो, जो परमेशरो रा वचन सुणोए और मानोए।” 29 जेबे बडी पीड़ कट्टी ऊईगी, तेबे यीशुए बोलणे लगे, “एस जुगो रे लोक बुरे ए, सेयो चिहू टोलेओ, पर योना रे चिहू खे छाडी की तिना खे ओर कोई चिहू नि देणा। 30 जेड़ा योना नीनवे रे लोका खे चिहू ऊआ, तियाँ ई माण्णू रा पुत्र बी एस जुगो रे लोका खे ऊणा। 31 दख्खणो री राणी न्याय रे दिनो रे एस बखतो रे लोका साथे उठणी और सेयो दोषी ठरणे, कऊँकि से सुलेमानो रा ज्ञान सुणने खे तरतिया रे दूजे कनारे पाँदा ते आयी थी और देखो एती तो से ए, जो सुलेमानो ते बी बड़ा ए। 32 नीनवे रे लोक न्याय रे दिनो दे, एस बखतो रे लोका साथे खडे ऊई की, सेयो दोषी ठरणे, कऊँकि तिने योना रा प्रचार सुणी की मन फेरया और देखो एती से ए, जो नीनवे ते बी बड़ा ए। 33 “कोई बी माण्णू दिऊए खे टोकरूए निठे या पैमाने ते थाले नि राखदा, पर फटिया पाँदे राखोआ, ताकि पीतरे आऊणे वालेया खे प्रयासा ओ। 34 तेरे शरीरो रा दिऊआ, तेरी आखी ए, तेबेई तो जेबे तेरी आखी साफ ए, तो तेरे सारे शरीरो रे बी प्रयासा ऊणा; पर जे से बुरी ए, तो तेरे शरीरो रे बी न्हैरा ए। 35 इजी री खातर चौकस रणा कि जो सफाई ताँदे आए, से मईली नि ऊई जाओ। 36 तेबेई तो जे तेरा सारा शरीर साफ ए और तीजी रा कोई बी इस्सा मईला निए, तो तेबे सारी जगा रे एड़ा प्रयासा ऊणा, जेड़ा तेस बखते ओआ, जेबे दिऊआ आपणी चमका ते ताखे प्रयासा देओआ।” 37 जेबे यीशु इना गल्ला करने लगी रे थे, तेबे एक फरीसियो तिना ते बिनती किती कि मेरे कअरे रोटी खाओ और तेबे सेयो पीतरे जाई की रोटी खाणे बैठे। 38 फरीसी ये देखी की हैरान ऊईगा कि ये रोटी खाणे ते पईले नायि। 39 यीशुए तेसखे बोलेया, “ओ फरीसियो! तुसे तिना कटोरे और थालिया जेड़े ए, जिना खे पाँदा-पाँदा ते तो मांजी लओए, पर पितरे तिना रे गंदगी परी री रओई। 40 ओ मूर्खो! जिने बारला इस्सा बणाई राखेया, क्या तिने पितरला इस्सा नि बणाया? 41 पर आ; पितरलिया चीजा खे दान करी देओ, तो देखो, सब कुछ तुसा खे शुद्ध ऊई जाणा। 42 “पर ओ फरीसियो! तुसा पाँदे हाय! तुसे पदीने, सुदाब और सब पांती-पांती रे साग पातो रा दसुआ पाअग देओए, पर न्याय और परमेशरो रे प्यारो खे टाली देओए, तुसा खे चाईयो था कि इना खे बी करदे रंदे और तिना खे पनि छाडदे। 43 ओ फरीसियो तुसा पाँदे हाय! तुसे प्रार्थना रे कअरो रे खास-खास आसण और बजारो रे नमस्ते चाओए। 44 तुसा खे हाय! कऊँकि तुसे तिना छिपी री कब्रा जेड़े ए, जिना पाँदे लोक चलोए, पर जाणदे नि।” 45 तेबे एक धर्मशास्त्री तिना खे जवाब दितेया, “ओ गुरु! इना गल्ला करने ते तुसे म्हारी निन्दा लगी रे करने।” 46 यीशुए बोलेया, “ओ धर्मशास्त्री! तुसा पाँदे हाय! तुसे लोका खे एड़े-एड़े कड़े नियम मानणे खे मजबूर करो थे जिना खे मानणा तिना बऊत कठण ए। पर आपू तिना नियमा खे मानणे री बी कोशिश तक नि करदे। 47 हाय तुसा खे! तुसे तिना भविष्यबक्तेया रिया कब्रा बाणोए, जो तुसा रे बाप-दादिया काये थे। 48 तो तुसे गवा ए और आपणे बाप-दादिया रे कामो ते सईमत ए। कऊँकि तिने सेयो काये और तुसे तिना खे कब्रा बणाओए। 49 तेबेई तो परमेशरो री बुद्धि ए बी बोलेया कि मां तिना गे भविष्यबक्ता और प्रेरित पेजणे और तिना, तिना बीचा ते कितणे जणे काणे और कितणे जणे सताणे। 50 ताकि जितणे बी भविष्यबक्ते रा खून दुनिया री शुरूआता ते बाहरी राखेया, सबी रा

लेखा एस जुगो रे लोका ते लया जाओ। 51 “हाबिलो री अत्या ते लयी की जकरयाहो री अत्या तक, जो बेदिया ते लयी की मन्दरो रे बीचा तक काया, आऊँ तुसा खे सच बोलूँआ कि तीजी रा लेखा एस बखतो रे लोका ते लया जाणा। 52 हाय तुसा धर्मशास्त्री खे! कऊँकि तुसे ज्ञानो री कुँजी लयी तो लयी, तुसे ना तो आपू ई तेती जाँदे और ना ई तिदे जाणे वालेया खे जाणे देंदे।” 53 जेबे यीशु तेथा ते निकले, तेबे शास्त्री और फरीसी बऊत पीछे पडी गे और तिना खे छेड़ने लगे कि सेयो मुखती सारिया गल्ला बताओ। 54 और तिना री ताका रे लगे रये कि तिना रे मुँओ री केसी गल्ला खे पकड़िए।

12 तदुओ की जेबे हजारा री पीड़ लगी गी, एथो तक कि एकी-दूजे पाँदे पडने लगी रे थे। तेबे यीशु सबी ते पईले आपणे चलेया खे बोलणे लगे, “फरीसियो रे कपटी सजेड़े ते चौकस रणा। 2 कुछ बी टकेया रा निए, जो खोलेया नि जाणा और ना कुछ छिपेया राए, जो जाणी नि सकदे। 3 तेबेई तो, जो कुछ तुसे न्हैरे रे बोली राखेया, से सामणे सुणेया जाणा और जो तुसे कोठरिया रे आपणे कानो रे खसफस करी की बोली राखेया, से छतो पाँदो ते बोलेया करो। 4 “आऊँ तुसा खे, जो मेरे दोस्त ए, बोलूँआ कि जो शरीरो खे काओए, पर तीजी ते पीछे ओर कुछ नि करी सकदे, तिना ते नि डरो। 5 आऊँ तुसा खे बताऊँआ कि केस ते डरना चाईयो, घात करने ते बाद, जेसखे नरको रे सेटणे रा अक्क ए, तेसते ई डरो; बल्कि आऊँ तुसा खे बोलूँआ कि तेसते ई डरो। (Geenna 91067) 6 दो पैसे रिया पाँज चिड़िया बिकोईया? तेबे बी परमेशर तिना बीचा ते एकी खे पनि पुलदा। 7 बल्कि तुसा रे सिरों रे बाल बी सारे गिणे रे ए, तो डरो नि, तुसे बऊत चिड़िया ते बढी की ए। 8 “आऊँ तुसा खे बोलूँआ कि जो कोई माण्णूआ सामणे माखे मानी लओगा, मां से बी मां माण्णू रे पुत्रो परमेशरो रे स्वर्गदूता सामणे मानी लओगा। 9 पर जो माण्णूआ सामणे माखे ना करो, तेसखे परमेशरो रे स्वर्गदूता सामणे ना ऊणी। 10 जो कोई माण्णू रे पुत्रो रे खलाफ कोई गल्ल बोलोगा, तेसरा से अपराध माफ ऊई जाणा, पर जो कोई पवित्र आत्मा री निन्दा करोगा, तेसरा से अपराध माफ नि ऊणा 11 जेबे लोक तुसा खे प्रार्थना रे कअरो रे, हाकिम और अधिकारिए सामणे लयी जाओगे, तो चिन्ता नि करना कि आसे कियाँ और क्या जवाब देईए। 12 कऊँकि पवित्र आत्मा तुसा गे तेसी बखते बताई देणा कि क्या बोलणा चाईयो।” 13 तेबे पीड़ा बीचा ते एकी जणे यीशुए खे बोलेया, “ओ गुरु! मेरे पाईयो खे बोली कि पिते री सम्पति माखे बांडी दे।” 14 यीशुए तेसखे बोलेया, “ओ माण्णू! आऊँ किने तुसा रा न्यायी और बांडणे वाला बणाई राखेया?” 15 तेबे तिने तिना खे बोलेया, “चौकस रओ; और हर प्रकारा रे लोबो ते आपू खे बचाई की राखो, कऊँकि केसी री बी जिन्दगी, तेसरी सम्पतिया ते बडी नि ऊँदी।” 16 यीशुए तिना खे एक उदारण बोलेया, “एक धनवानो री जमीन रे मुखती फसल ऊई। 17 तेबे से आपणे मनो रे सोचणे लगेया कि आऊँ क्या करूँ? कऊँकि मांगे तो जगा निए, जेती आपणी फसल बगैरा राखूँ। 18 तेबे तिने सोचेया कि मां आपणे पण्डार तोड़ी की ओर बड़े पण्डार बनाणे और तेती मां आपणी सारी फसल और सम्पति राखणी 19 और तिजी ते बाद आपणे प्राणो खे बोलणा कि ओ प्राण! ताखे कई साला तक मुखती सम्पति राखी ती री; चैन कर, खा-पी सुखो साथे रओ। 20 पर परमेशरे तेसखे बोलेया, ‘ओ मूर्ख! आज की राती ई तेरी मौत ऊई जाणी, तेबे जो कुछ तें कट्टा करी राखेया, से केसरा ऊणा?’ 21 एड़ा ई से माण्णू बीए, जो आपू खे पैसा कट्टा करी राखेया, पर परमेशरो री नजरा रे अमीर निए।” 22 तेबे यीशुए आपणे चलेया खे बोलेया, “तेबेई तो आऊँ तुसा खे बोलूँआ कि आपणी जिन्दगिया रे बारे रे ये चिन्ता नि करो कि आसे क्या खाऊँगे, ना आपणे शरीरो रे बारे रे कि क्या पईनुँगे। 23 कऊँकि रोटिया ते जिन्दगी और टालेया ते शरीर केथी जादा किमती ए। 24 कावा पाँदे त्यान देओ, सेयो ना बाँदे, ना बाडदे, ना तिना रे पण्डार ए और ना पेडू ऊँदा, तेबे बी परमेशर तिना खे पालोआ, तुसा री किमत पंछिया ते केथी बढी की ए। 25 तुसा बीचा ते एड़ा कुण ए, जो चिन्ता करी की आपणिया जिन्दगिया री एक कअडी बी बढाई सकोआ? 26 तेबेई तो जे तुसे सबी ते छोटा काम पनि करी

सकदे, तो ओरी बड़ी गल्ला खे चिन्ता करी क्या फाईदा? 27 बांके जंगली फूला पॉदि त्यान करो कि सेयो किंयों बड़ोए, सेयो ना तो मईणत करदे, ना आपू खे टाले बणाओए, तेबे बी आऊँ तुसा खे बोलूँआ कि राजा सुलेमान बी आपणे सारे एशो-आरामो रे बी, तिना बीचा ते केसी एकी जेडे बी टाले नि पईने रा था। 28 तेबेई तो जेबे परमेशर मैदानो रे काओ खे, जो आज आए, और काल आगी बीचे फूकी देणा, तो जो तिदे बी एडे बांके फूल खिलाओआ, तो ओ कम विश्वास करने वालेयो! तुसा खे तेस इना ते बड़ी की बांके टाले कऊँ नि पनयाणे? 29 और तुसे एसा गल्ला री टोला रे नि रओ कि आसे क्या खाऊँगे, क्या पिऊँगे और ना शक करो। 30 कऊँकि दुनिया री जातिया इना सबी चीजा री टोला रे रओईया और तुसा रा पिता जाणोआ कि तुसा खे इना सबी चीजा री जरूरत ए। 31 पर परमेशरो रे राज्य री टोला रे रओ, तो यो सब चीजा बी तुसा खे मिली जाणिया। 32 “ओ छोटे चूण्ड, डर नि; कऊँकि तुसा रे पिता परमेशरो खे ये अच्छा लगेया कि तुसा खे राज्य देऊँ। 33 आपणी सम्पति बेची की दान करी देओ और आपू खे एडे बटुए बणाओ, जो पुराणे नि ऊँदे, मतलब-स्वार्गो रे एडा धन कट्टा करो, जो कट्टा नि और तीजी रे नेडे चोर नि जांदा और कीडा नि खांदा। 34 कऊँकि जेती तुसा रा धन ए, तेती तुसा रा मन बी लगेया रा रणा। 35 “तुसा परमेशरो रा काम करने खे सदा त्यार रओ और मसीह रे आऊणे रे बखते और तेसखे ग्रहण करने खे एडे त्यार रओ जेडे दिऊए बलदे दिऊए रओ। 36 मेरे वापस आऊणे खे तिना दासा जेडे त्यार रओ, जो आपणे स्वामिए खे न्यालदे रओए कि से ब्याओ ते कदी जे आऊणा कि जेबे से आओ और द्वार खटखटाओ तो तेसखे फटाफट खोलेया जाओ। 37 धन्य ए सेयो दास, जिना खे स्वामी आयी की जागदे ऊए देखोए, आऊँ तुसा खे सच बोलूँआ कि स्वामिए एडे टाले पईनेणे जेडे दास पईनोए और तेस दासा खे बठयाली की से रोटी खाणे खे देणी जो तिने ब्याओ ते प्रिया ल्याई राखेया। 38 जे सेयो तिना खे राती रे दूजे या तीजे पईरे आयी की जागदा ऊआ पाओ, तो सेयो दास धन्य ए। 39 पर तुसे जाणी लओ कि जे कअरो रा मालक जाणदा कि चोर कदी जे आऊणा, तो जागदा रंदा और आपणे कअरे चोरी नि उणे देंदा। 40 तेबेई तुसे बी त्यार रओ, कऊँकि जेसा कअडिया रे बारे रे तुसे सोचदे पनि, तेसी कअडिया आऊँ माणू रा पुत्र आयी जाणा।” 41 तेबे पतरसे बोलेया, “ओ प्रभु! क्या तुसे ये उदारण आसा खेई बोलणे लगी रे या सबी खे।” 42 यीशुए बोलेया, “एक विश्वासो जोगा और अक्लमंद पणडरी एडा ए: जेसखे कअरो रा मालक दूजे दासा पॉदि निगनारी और बखतो पॉदि रोटी देणे खे जिम्मेवारी देओआ। तिजी ते बाद से परदेशो खे चली जाओआ। 43 धन्य ए से दास, जेसखे तेसरा मालक आयी की एडा ई करदा ऊआ पाओ। 44 आऊँ तुसा खे सच लगी रा बोलणे कि तेस से आपणी सारी सम्पतिया पॉदि अक्कदार ठराणा। 45 पर जे से दास सोचणे लगे कि मेरा मालक आऊणे रे देर करने लगी रा और दास-दासिया खे कटणे-फानणे और खाणे-पीणे और पियक्कड़ उणे लगे 46 तो तेस दासो रा मालक एडे दिने आऊणा, जेबे से तेसखे न्यालदा ई ना ओ और एडिया कअडिया दे, जेतेखे से नि जाणदा ओ। तेबे तेस तेसखे बऊत दण्ड देणा और तेसरा इस्सा कपटिया साथे ठराणा। 47 से दास, जो आपणे मालको री इच्छा जाणोआ पर त्यार नि रया और ना तेसरी इच्छा रे मुताबिक चलेया, तो तेस बऊत मार खाणी। 48 पर जो ना जाणी की मार खाणे जोगा काम करोगा, तेस थोड़ी मार खाणी, तेबेई तो जेसखे बऊत देई राखेया, तेसते बऊत मांगेया जाणा और जेसगे बऊत सम्बाली राखेया, तेसते बऊत लया जाणा। 49 “आऊँ तरतिया पॉदि आग लगाणे आयी रा और ये चाऊँआ कि एबु ई सुलगी जांदी। 50 मां तो एक दु:खदाई बपतिस्मा लणा ए और जदुओ तक से नि ऊई लो, तदुओ तक आऊँ केडिया दशा रे रणा? 51 क्या तुसे एडा समजोए कि आऊँ तरतिया पॉदि मेल-जोल करने आयी रा? आऊँ बोलूँआ कि ना, बल्कि लग करने आयी रा। 52 कऊँकि आजो ते एकी कअरे पाँज जणे बिरोदी रणे। तीना, दूई ते और दूई तीना ते। 53 पिते पाऊए ते और पाऊए, पिते ते, माया बेटिया ते और बेटिया माया ते, सासुआ बऊआ ते और बऊआ सासुआ ते बिरोद राखणा।” 54

यीशुए पीडा खे बी बोलेया, “जेबे बादलो खे पछमा ते उडदे ऊए देखोए, तेबे फटाफट बोलोए कि बर्खा ऊणी और एडा ई ओआ। 55 और जेबे अवा दक्खणो खे चलदी ऊई देखोए, तो बोलोए कि लू चलणी और एडा ई ओआ। 56 ओ कपटियो! तुसे तरती और सर्गो रे रूप-रंगो रे भेद करी सकोए, पर एस जुगो रे बारे रे कऊँ भेद करना नि जाणदे? 57 “तुसे आपू ई न्याय कऊँ नि करी लंदे कि अच्छा क्या ए? 58 जेबे तूँ आपणे दुश्मणो साथे हाकिमो गे जाणे लगी रा, तो बाटा रेई तेसते छुटणे री कोशिश करी लो, एडा नि ओ कि से ताखे न्यायियो गे खिंजी की ल्याओ और न्यायी ताखे सिपाईया गे देयो और सिपाई ताखे जेला रे पाई देओ। 59 आऊँ तुसा खे बोलूँआ कि जदुओ तक तुसे दमड़ी-दमड़ी (पाई-पाई) नि देई देओगे, तदुओ तक तथा ते छुटणा नि।”

13 तेस बखते कुछ लोक आए और यीशुए खे बोलेया कि पिलातुसे गलील प्रदेशो रे कुछ लोका री अत्या करी ती, जेबे सेयो मन्दरो रे बलिदान करने चढ़ाणे लगी रे थे। 2 ये सुणी की यीशुए तिना खे जवाब दितेया, “क्या तुसे समजोए कि यो गलीली लोक ओर सबी गलीलिया ते जादा पापी थे कि तिना पॉदि एडी बिपदा पडी? 3 आऊँ तुसा खे बोलूँआ कि ना; पर जे तुसे मन नि फेरोगे तुसे बी सब ईयाँ ई नाश उणे। 4 या तुसे समजोए कि सेयो ठारा जणे जिना पॉदि शीलोहो रा गुम्मत पड़ेया था और सेयो दबी की मरी गे थे, क्या यरूशलेम और सबी रणे वालेया ते जादा पापी थे? 5 आऊँ तुसा खे बोलूँआ कि ना, पर जे तुसे मन नि फेरोगे, तो तुसे बी ईयाँ ई नाश उणे।” 6 तेबे यीशुए ये उदारण सुणाया, “केसी रे अंगूरा रे बगीचे रे दाऊगले रा एक डाल लगी रा था, से तिदे फल टोलने आया, पर मिलेया नि। 7 तेबे तिने बगीचे रे रखवाले खे बोलेया, ‘देख आऊँ तीन साला ते इंदे फल टोलने आऊँआ, पर मिलदा नि, एसखे बाडी दे, ताकि ये खरी जमीना खे पनि रोको।’ 8 तिने तेसखे बोलेया कि ओ स्वामी! एसखे एस सालो रे ओर रणी दे कि आऊँ एतरे चऊँ कनारे खणी की खाद सेटूँ। 9 तो जे आगो खे फल लगेया तो ठीक, नई तो बाडी देयो।” 10 आरामो रे दिने यीशु प्रार्थना रे कअरो रे उपदेश देणे लगी रे थे। 11 तेबे एक जवाणस आयी, जेसा रे ठारा साला ते, कमजोर करने वाली दुष्टात्मा थी और से कुबड़ी ऊईगी थी और किंयों बी सीदी नि ऊई सको थी। 12 यीशुए से देखी की बुलाई और तेसा खे बोलेया, “ओ जवाणसे! तूँ आपणी कमजोरिया ते छूटी गी।” 13 तेबे तिने तेसा पॉदि आथ राखे और से फटाफट सीदी ऊईगी और परमेशरो री तारीफ करने लगी। 14 कऊँकि यीशुए से आरामो रे दिने ठीक किती थी, प्रार्थना रे कअरो रा सरदार जली की लोका खे बोलणे लगेया, “अप्रत्ते रे छे दिन ए जिदे काम करना चाईयो, तो तिना दिना रे आयी की ठीक ओ, आरामो रे दिने नि।” 15 ये सुणी की यीशुए जवाब दितेया, “ओ कपटियो! क्या आरामो रे दिने तुसा बीचा ते हर एक आपणे बलदा और गहदेया खे गवाईणी ते खोली की पाणी पलयाणे नि लयी जांदा? 16 तो क्या ठीक नि था कि ये जवाणस जो अब्रहामो रे वंशो ते ए जो शैताने ठारा साला ते बानी राखी थी, आरामो रे दिने एसा खे बन्दनो ते छुडाया जाओ।” 17 जेबे यीशुए यो गल्ला बोलिया, तेबे तिना रे सब बिरोदी शर्मिदा ऊईगी और सारी पीड तिना हेरान करने वालेया रे कामा ते, जो सेयो करो थे, खुश ऊई। 18 तेबे यीशुए बोलेया, “परमेशरो रा राज्य केस जेडा ए? और आऊँ तिजी री तुलना किजी साथे कऊँ? 19 से अऊरिया रे एक दाणे जेडा ए, जो किने मांणुए लयी की आपणे डोरूआ रे बाया और से बडा ऊई की डाल बणीगा और सर्गो रे पंछिया तेते पॉदि आपणा बसेरा कितेया।” 20 तिने फेर बोलेया, “आऊँ परमेशरो रे राज्य री उपमा किजी साथे कऊँ? 21 से सजेडे जेडा ए, जो एकी जवाणसे लया और बीई किलो ते जादा आटे रे गूँदी ता और ऊँदे-ऊँदे सारा आटा सजेडा ऊईगा।” 22 यीशुए नगर-नगर और गांव-गांव रे आपणे चलेया साथे उपदेश देदे ऊए यरूशलेमो खे जाणे लगी रे थे। 23 तेबे किने तिना ते पूछेया, “ओ प्रभु, क्या उद्धार पाणे वाले थोडे ईए?” यीशुए तिना खे बोलेया, 24 “स्वर्गो रे परमेशरो तक पऊँछणे री बाट बऊत कठण ए पर एते बाटा

रिये तुसा चलणा ईए, कऊँकि आऊँ तुसा खे बोलूँआ कि बऊत जणोया चाणा कि पीतरे जाईए, पर जाई नि सकणे। 25 जेबे परमेशर, कअरो रा मालक उठी की द्वार बंद करी चुकेया ओगा और तुसे बारे खड़ी की द्वार खटखटाई की बोलणे लगे, 'ओ प्रभु! आसा खे खोली देओ,' और से जवाब देओ, 'आऊँ तुसा खे नि जाणदा, तुसे केथो रे ए?' 26 तेबे तुसा बोलणे लगणा कि आसे तां सामणे खया-पिया और तँ आसा रे बजारो रे उपदेश कित्तेया। 27 पर तेस बोलणा, आऊँ तुसा खे बोलूँआ, 'आऊँ नि जाणदा कि तुसे केथो रे ए? ओ कुकर्म करने वालेयो, तुसे सब मांते दूर रओ।' 28 तेती रोणा और दौंदा रा किरडना ई ऊणा; जेबे तुसा अब्राहम, इसहाक, याकूब और सब भविष्यबक्ता परमेशरो रे राज्य रे बैठे रे देखणे और आपणे आपू खे बारे निकयाले रा देखणा। 29 पूर्व और पछम, उतर और दक्खणो रे लोका आयी की परमेशरो रे राज्य रे, साथे रोटी खाणी 30 पर एबे बऊत सारे लोक जो आपणे आपू खे एते दुनिया रे बडे समजोए, सेयो परमेशरो री नजरा रे छोटे ऊई जाणे, और जिना खे संसार एबु छोटा समजोआ, सेयो परमेशरो री नजरा रे बडे समजे जाणे।" 31 तेसी कअड़िया रे बऊत फरीसिये तिना खे आयी की बोलेया, "एथा ते निकली जा, कऊँकि हेरोदेस तुसा खे काणा चाओआ।" 32 यीशुए तिना खे बोलेया, "जाई की तेसा लोमड़िया खे बोली देओ कि देख, माखे आज और काल दुष्टामा खे निकयालने और बमारा खे ठीक करदे ऊए तीन दिन लगी जाणे। 33 तेबे बी मारा आज, काल और परसु चलणा जरूरी ए, कऊँकि एडा ऊई नि सकदा कि कोई भविष्यबक्ता यरूशलेमो ते बारे मारेया जाओ। 34 "ओ यरूशलेमो रे लोको, ओ यरूशलेमो रे लोको! तूँ जो भविष्यबक्तेया खे काओआ और जो तांगे पेजी राखे, तिना खे पात्थर बाएआ, कितणी बार मैं चाया कि जिंयाँ मुर्गी आपणे बच्चेया खे आपणे पंखो निठे कट्टा करी की समालोई, तिंयाँ ई आऊँ बी चाऊँआ कि तेरे बालका खे कट्टा करी की समालूँ। पर तुसे नि चाया। 35 देखो, तुसा रा कअर तुसा खे उजाड़ी की छाडीता। कऊँकि आऊँ तुसा खे बोलूँआ कि एबुए ते जदुओ तक तुसे नि बोलोगे, 'धन्य ए सेयो, जो प्रभुए रे नाओं ते आओए' तदुओ तक तुसा आऊँ फेर कदी नि देखणा।"

14 तेबे यीशु आरामो रे दिने फरीसिया रे अधिकारिया बीचा ते केसी एकी रे कअरे रोटी खाणे गये और सेयो तिना रे कोई गलती टोलने री ताका रे थे, ताकि तिना पँदे कोई दोष लगाई सकी। 2 तेती एक मांण था जेसरे आथो रे और पेरा रे सोजा था 3 तेबे यीशुए धर्मशास्त्री खे और फरीसिया खे बोलेया, "क्या आरामो रे दिने अच्छा करना बिधानो रे मुताबिक ठीक ए कि गलत?" 4 पर सेयो चुप-चाप रये। तेबे यीशुए से आथ लगाई की ठीक कित्तेया और जाणे दित्तेया 5 और तिना खे बोलेया, "तुसा बीचा ते एडा कुणे कि जेसरा पाऊ या बलद कुँए रे पड़ी जाओ और तेस आरामो रे दिने ई तेसखे बारे नि निकयालो?" 6 सेयो इना गल्ला रा कोई बी जवाब नि देई सके। 7 जेबे यीशुए देखेया कि निऊँदे वाले लोक खास-खास जगा चूणी लओए, तेबे तिने एक उदारण सुणाई की तिना खे बोलेया, 8 "जेबे कोई ताखे ब्याओ खे बुलाओ, तो खास जगा रे नि बैठणा, केथी एडा नि ओ कि तिने तांते बी केसी बडे खे निऊँदा देई राखेया ओ। 9 और जिने ताखे और तेसखे, दूँई खे निऊँदा देई राखेया, आयी की ताखे बोलो कि एसखे जगा छड और तेबे ताखे सबी ते शर्मिंदा ऊई की सबी ते थालली जगा रे बैठणा पड़ो। 10 पर जेबे ताखे बुलाओ, तेबे सबी ते थालली जगा रे जाई की बैठ, ताकि तेबे जिने नूँ बुलाई राखेया, से आओ और ताखे बोलो कि ओ दोस्त! आगे जे बैठ। तेबे तां साथे बैठणे वालेया सामणे तेरी तारीफ ऊणी 11 कऊँकि जो कोई आपू खे बड़ा बणाओगा, से छोटा कित्तेया जाणा और जो आपू खे छोटा बणाओगा, से बड़ा कित्तेया जाणा।" 12 तेबे यीशुए आपणे निऊँदा देणे वालेया खे बोलेया, "जेबे तूँ दिनो री या साँजा री रोटी खाए तो तेबे तँ, आपणे दोस्त, पाई, टबरो वाले और अमीर दोस्त नि बुलाणे, केथी एडा नि ओ कि सेयो ताखे बी निऊँदा देओ और तेरा बदला चुकाई देओ। 13 पर जेबे तूँ रोटी खाए, तेबे कंगाला खे, टुण्डेया खे, लंगडेया खे और अन्देया

खे बुला। 14 तेबे तूँ धन्य ऊणा, कऊँकि तिना गे ताखे बदला देणे खे कुछ निए, पर ताखे तर्मिया लोका रे मुक़देया बीचा ते जिऊँदे ऊणे पँदे इजी रा ईनाम मिलणा।" 15 तिना साथे रोटी खाणे वालेया बीचा ते एकी जणे इना गल्ला खे सुणी की बोलेया, "धन्य ए सेयो, जिना परमेशरो रे राज्य रे रोटी खाणी।" 16 यीशुए तेसखे बोलेया, "एकी मांणूए बऊत बडिया पाट्रिया कित्तिआ और बऊत जणे बुलाए। 17 जेबे रोटी त्यार ऊईगी, तेबे तिने आपणे दासो रे जरिए निऊँदा दित्ते रे लोका खे बोलेया, 'आयी जाओ और रोटी त्यार ए।' 18 पर सेयो सब जणे माफी मांणे लगे, एकी जणे बोलेया, 'मैं तो डोरू मोले लयी राखे और माखे सेयो देखणे जरूरी ए, आऊँ तांते बिनती करूँआ कि माखे माफ करी दे।' 19 दूजे बोलेया, 'मैं पाँज जोड़े बलदा रे खरीदी राखे और आऊँ तिना खे परखणे खे चली रा, मेरी तांते बिनती ए कि माखे माफ करी दे।' 20 एकी ओरी बोलेया, 'मैं ब्या करी राखेया आऊँ नि आयी सकदा।' 21 तिने दासे सारी गल्ल मालको गे सुणाई, तेबे तिने रोषो रे आयी की आपणे दासो खे बोलेया, 'नगरो दे, बजारो और गलिया रे जाई की कंगाल, लंगडे, टूण्डे और अन्देया खे एती ली आओ।' 22 दासे फेर बोलेया, 'जिंयाँ तुसे बोलेया था, तिंयाँ ई कित्तेया, पर फेर बी जगा ए।' 23 स्वामिए दासो खे बोलेया, 'सड़का ते और बाटा ते लोका खे जबरदस्ती ली आओ, ताकि मेरा कअर फरी जाओ। 24 कऊँकि आऊँ तुसा खे बोलूँआ कि तिना, जिना खे निऊँदा देई राखेया था, तिना निऊँदा दित्ते रे लोका बीचा ते एकी जणे पनि मेरे कअरे पाट्टी चाखणी।" 25 तेबे यीशुए पीछे एक बड़ी पारी पीड़ जाणे लगी री थी, तेबे तिने तिना खे पीछे मुड़ी की बोलेया, 26 "जे कोई मांणे आओ और आपणे माए-बाओ, लाड़ी, बाल-बच्चे, पाई, बईण, बलिक आपणे प्राणो ते बी बड़ी की मांते प्यार नि करो, तो से मेरा चेला नि ऊई सकदा। 27 जे तुसे मेरे चले बणना चाओए, पर मेरिया तँई मरने खे त्यार निए और मां पीछे नि आओ, तो तुसे मेरे चले नि ऊई सकदे। 28 तुसा बीचा ते कूणे, जो गढ़ बनाणा चाओआ और पईले बैठी की खर्च नि जोड़ी कि पूरा बनाणे लायक आए कि नई। 29 केथी एडा नि ओ कि जेबे निऊँ पाई की त्यार नि करी सकी और सब देखणे वाले ये बोली की तेसरा मजाक ऊड़ाणे लगे 30 कि ये मांणू बनाणे तो लगेया, पर त्यार नि करी सकेया। 31 या कुण एडा राजा ए, जो दूजे राजे साथे लड़ने जाओआ और पईले बैठी की बिचार नि करी लो कि जो बीई हजार लई की मां पँदे चढाई करने आऊणे लगी रा क्या आऊँ दस हजार लई की तेसरा सामणा करी सकीआ कि नई। 32 नई तो तेसते दूर रई की तेस आपणा दूत पेजी की मिलाप करना चाणा। 33 ईयाँ ई तुसा बीचा ते जो कोई आपणा सब कुछ नि छाडी देओगा, से मेरा चेला नि ऊई सकदा। 34 "लूण तो अच्छा ए, पर जे लूणो रा स्वाद बिगड़ी जाओ, तो से किजी चीजा साथे स्वाद कित्तेया जाणा? 35 से ना तो जमीना खे और ना खादा खे कामे आओआ, तेसखे तो लोक बारे सेटी देओए। जो समजी सकीआ से तिजी खे त्थानो साथे सुणो और मानी बी लओ।"

15 बऊत सारे चूंगी लणे वाले और पापी यीशुए गे आया करो थे, ताकि तिना री सुणो 2 तेबे फरीसी और शास्त्री कुङकुड़ाई की बोलणे लगे, "ये तो पापिया साथे मिलोआ और तिना साथे खाओ-पीओआ।" 3 तेबे यीशुए तिना खे ये उदारण बोलेया, 4 "जे तुसा बीचा ते केसी एकी गे सौ पेडा ए। तिना बीचा ते एक पेड राची जाओ, तो नड़िनुआ खे जंगलो रे छाडी की तेसा एकी खे जो राची री, जदुओ तक से मिली नि जाओ, तदुओ तक से तेसा खे टोलदा रणा 5 और जेबे मिली जाओई, तेबे से तेसा खे बड़ी खुशिया साथे कांदा पँदे चकी लओआ 6 और आपणे कअरे जाईकी आपणे दोस्ता और पड़ोसिया खे कट्टे करी की बोलोआ कि मां साथे खुशी मनाओ, कऊँकि मेरी राची री पेड मिलीगी री। 7 आऊँ तुसा खे बोलूँआ ईयाँ ई एक मन फिराणे वाले पापिया रे बारे रे स्वर्ग रे बी एड़ी ई खुशी ऊणी, जितणा नड़िनुए एडे तर्मिया रे बारे रे नि ऊणी, जिना खे मन फिराणे री जरूरत निए। 8 "था कुण एड़ी जवाणस ऊणी, जेसा गे दस सिक्के ओ और तिना बीचा ते एक राची जाओ और से दिऊआ बाली की सारे कअरो रे सुण-प्यार करी की,

जुदुओ तक मिली नि जाओ, तदुओ तक मन लगाई की टोलदी नि रओ? 9 और जेबे मिली जाओआ, तेबे से आपणी सेलिया और पड़ोसणिया खे कट्टी करी की बोलोई कि मां साथे खुशी मनाओ, कऊँकि मेरा राचे रा सिक्का माखे मिली गा रा। 10 आऊँ तुसा खे बोलूँआ कि ईयाँ ई एक मन फिराणे वाले पापिया रे बारे रे परमेशरो रे स्वर्गदूता सामणे खुशी ओई।” 11 तेबे यीशुए एक और उदारण बोलेया, “एक माणूए रे दो पाऊ थे। 12 तिना बीचा ते छोटै पाऊए आपणे पिते खे बोलेया, ‘ओ पिता सम्पतिया बीचा ते जो मेरा इस्सा आए, तेस माखे एबु देई दे।’ तिने तिना खे आपणी सम्पति बांडी ती। 13 तेबे जादा दिन नि थें ऊए रे कि छोटा पाऊ आपणा सब कुछ कट्टा करी की दूर देशो खे चली गा और तेती कुकर्मो रे आपणी सम्पति ऊड़ाई ती। 14 जेबे से सब कुछ खर्च करी चुकेया, तेबे तेते देशो रे बड़ा अकाल पड़ी गा और से कंगाल ऊईगा और तेसगे खाणे खे कुछ बी नि रया। 15 तेबे से तेस देशो रे रणे वालेया बीचा ते एकी रे कअरे काम करने गया। तिने से आपणे डोरूआ रे सुंअर चराणे पेजेया 16 और से इतणा पूखा था और चाओ था कि तिना फलिया ते जो सुंअर खाओ ए, तिना साथे आपणा पेट पूरूँ और तेसखे कोई कुछ नि देओ था। 17 जेबे से आपणी ओशरा रे आया, तेबे बोलणे लगेया, ‘मेरे पिते रे मजूरदारा खे रोटी ते जादी रोटी मिलो थी और आऊँ एती पूखा मरने लगी रा। 18 मां एबे उठी की आपणे पिते गे जाणा और तेसखे बोलणा कि मैं परमेशरो रे खलाफ और तेरी नजरा रे पाप करी राखेया। 19 एबे एते जोगा नि रया कि तेरा पाऊ ओऊँ, माखे आपू गे एक मजूरदार जेड़ा राखी दे।’ 20 “तेबे से तेस देशो खे छाडी की आपणे पिते गे चली गा। से एबु दूर ई था कि तेसरे पिते तेसखे देखी की तरस खाया और दौड़ी की आपणे पाऊए खे गले लगाया और बऊत चूमेया। 21 पाऊए तेसखे बोलेया, ‘पिता जी! मैं परमेशरो रे खलाफ और तेरी नजरा रे पाप करी राखेया और एबे एते जोगा नि रया कि तेरा पाऊ ओऊँ।’ 22 पर पिते आपणे दासा खे बोलेया, ‘फटाफट अच्छे ते अच्छे टाले एसखे पणयाओ और एसरे आथो रे छाप और पैरो रे जूतिया पणयाओ 23 और सबी ते बढ़िया ते बढ़िया खाणा बणाओ, ताकि आसे खाऊँ और खुशी मनाऊँ। 24 कऊँकि मेरा ये पाऊ मरी गा था और फेर जिऊँदा ऊईगा रा, राची गा था, पर एबे मिली गा रा।’ सेयो खुशी मनाणे लगे। 25 “पर तेसरा बड़ा पाऊ डोरूआ रे था और जेबे से आऊँदा ऊआ कअरो रे नेडे पऊँछेया, तेबे तिने गाणे बजाणे रा और नाचणे रा आल्ला सुणयो। 26 तेबे तिने एकी दासो ते पूछेया, ‘ये क्या लगी रा ऊणे?’ 27 दासे बोलेया, ‘तेरा पाई वापस आयी रा और तरे पिते सबी ते बढ़िया ते बढ़िया खाणा बणावाई राखेया, कऊँकि से ठीक-ठाक मिलेया।’ 28 ये सुणी की तेसखे रोष आईगा और पीतरे नि जाणा चाया, पर तेसरा पिता बारे आयी की तेसखे मनाणे लगेया। 29 तिने पिते खे बोलेया, ‘देख, आऊँ इतणे साला ते तेरी सेवा करने लगी रा और कदी बी तेरी आज्ञा नि टाली और तेबे बी तें माखे कदी बी बढ़िया खाणा नि दितेया, ताकि आऊँ आपणे दोस्ता साथे मजे करूँ? 30 पर जेबे तेरा ये पाऊ आया, जिने तेरी सम्पति वेश्या रे ऊड़ाई ती और आया तो तें एसरी खुशिया रे बड़ी पाटी कित्ती।’ 31 पिते तेसखे बोलेया, ‘ओ मेरे पाऊ, तूँ सदा मां साथे ईए और जो कुछ मेरा ए, से सब तेरा ईए। 32 पर एबे खुश और मग्न ऊणा चाईयो, कऊँकि ये तेरा पाई मरी गा था और फेर जिऊँदा ऊईगा और राची गा था, पर फेर मिली गा।”

16 तेबे यीशुए आपणे चेलेया खे बी ये उदारण बोलेया, “केसी अमीरो रा एक पण्डारी था और लोके तेस सामणे तेस पॉइ ये दोष लगाया कि ये तेरा सारा पैसा उड़ाई देओआ। 2 तेबे तिने अमीर माणूए से बुलाया और बोलेया, ‘ये क्या ए, जो आऊँ तरे बारे रे सुणने लगी रा? आपणे पण्डारो रा लेखा दे, कऊँकि तूँ आगे ते पण्डारी नि रई सकदा।’ 3 तेबे पण्डारी सोचणे लगेया कि एबे आऊँ क्या करूँ? कऊँकि मेरा मालक तो एबे पण्डारो री जगा मांते छुड़ाणे लगी रा। माटी तो मांते खणदी नि और पीख मांगणे ते तो माखे शर्म आओई। 4 माखे समज आयी की क्या करना; ताकि जेबे पण्डारियो रे कामो ते छुड़ाया जाऊँ तो लोक आपणे कअरे बुलाई लो। 5 तेबे तिने आपणे

मालको रे देणदारा बीचा ते एक-एक बुलाए और पड़ले ते पूछेया कि तां मेरे मालको रा कितणा कर्ज देणा? 6 तिने बोलेया, ‘सौ मण जैतूनो तेल।’ तेबे तिने तेसखे बोलेया, ‘जा और आपणे खाते रे पंजा लिखी दे।’ 7 तेबे तिने दूजे ते पूछेया कि तां मेरे मालको रा कितणा कर्ज देणा? तिने बोलेया सौ मण कणक; तिने तेसखे बोलेया, ‘जा और आपणे खाते रे की अस्सी लिखी दे।’ 8 “मालके से पापी पण्डारी सराया कि तिने चंत ऊई की काम कित्तेया, कऊँकि एसा दुनिया रे लोक, आपणे बखतो रे लोका रे रीति-रवाजा रे जोतिया रे लोका ते जादा ऊशियार ए। (aiōn g165) 9 आऊँ तुसा खे बोलूँआ कि पापो रे पैसे ते आपू खे दोस्त बणाई लो, ताकि जेबे से जाओ, तेबे सेयो तुसा खे अनन्त निवासो रे लयी लो। (aiōnios g166) 10 जो थोड़े ते थोड़े रे सच्चा ए, से बऊत रे बी सच्चा ए और जो थोड़े ते थोड़े रे पापी ए, से बऊत रे बी पापी ए। 11 तेबे, जे तुसे पापो रे धनो रे सच्चे नि ऊए, तो सच्चा धन तुसा गे केस सम्बालना? 12 और जे तुसे पराये धनो रे सच्चे नि ठईरे, तो तेबे जो तुसा राए, से तुसा खे केस देणा? 13 “कोई बी दास दो मालका री सेवा नि करी सकदा; कऊँकि तेस एकी साथे बैर और दूजे साथे प्यार राखणा, या एकी साथे मिले रा रणा और दूजा तेस तुच्छ जाणना। तुसे परमेशर और धन ढूँई री सेवा नि करी सकदे।” 14 फरीसी जो लालची थे, ये सुणी की तिना रा मजाक करने लगे। 15 यीशुए तिना खे बोलेया, “तुसे तो माणूआ सामणे आपू खे तर्मी ठराओए, पर परमेशर तुसा रे मनो खे जाणोआ, कऊँकि जो चीज माणूआ री नजरा रे महान ए, से परमेशरो सामणे घृणित ए। 16 “यूहन्ना बपतिस्मा देणे वाले तक मूसे रा बिधान और भविष्यबक्ता रा संदेश तुसा री अगुवाई करदे रये। पर एबे परमेशरो रे राज्य रा सुसमाचार सुणाया जाणे लगी रा और हर कोई तिदे बऊत मईणत करी की जाओआ। 17 सर्ग और तरतिया रा टली जाणा, बिधानो रे एक बिन्दुओ रे खोणे बराबर ए। 18 “जो कोई आपणी लाडिया खे छाडी की केसी ओरी साथे ब्या करोआ, से व्याभिचार करोआ और जो कोई एड़ी छाडी रिया जवाणसा साथे ब्या करोआ, से बी व्याभिचार करोआ। 19 “एक अमीर माणू था जो बैंगणी टाले और मलमलो रे टाले पईनो था और हर रोज सुख-बिलासो रे और मौज-मस्तिया साथे रओ था। 20 लाजर नाओं रा एक गरीब माणू था, जेसरे सारे शरीरो रे जख्म थे, तेसखे तेस अमीर माणूए री देऊलिया पॉइ छाडी देओ थो। 21 और से चाओ था कि अमीरो री मेजा री जूठा ते आपणा पेट पूरूँ, एथो तक कि कुत्ते बी तेसरे जख्मा खे चाटी देओ जू। 22 तेबे एड़ा ऊआ कि से कंगाल मरी गा और स्वर्गदूते से लयी की अब्राहमो री गोदा रे पऊँछाई ता और से अमीर बी मरी गा और दबाई ता। 23 तेबे तिने नरको री पीड़ा ते ऊबो खे देखेया और दूरो ते अब्राहमो री गोदा रे लाजर देखेया। (Hades g86) 24 तेबे तिने आक्का पायी की बोलेया, ‘ओ पिता अब्राहम! मां पॉइ दया करी की लाजरो खे पेजी दे, ताकि से आपणी गुठिया रा सिरा पाणिए साथे सेड़ी की मेरी जीबा खे ठण्डी करो, कऊँकि आऊँ एते आगी रे तड़फणे लगी रा।’ 25 पर अब्राहमे बोलेया, ‘ओ पाऊ! याद कर कि तूँ आपणी जिन्दगिया रे अच्छी चीजा लयी चुकेया रा और तियाँ ई बुरिया चीजा खे लाजर बी, पर एबे से एती शान्ति पाणे लगी रा और तूँ तेती पीड़ा ते तड़फणे लगी रा। 26 इना सबी गल्ला खे छाडी की आसा बीचे और तां बीचे पारी गड्डा ए ठराए रा, ताकि कोई एथा ते तांगे पार नि जाई सको और ना पारा ते कोई एती आसा गे आयी सको।’ 27 तिने बोलेया, ‘ओ पिता! तेबे आऊँ तांते बिनती करूँआ कि तूँ लाजरो खे मेरे पिते रे कअरे पेज। 28 कऊँकि मेरे पाँज पाई ए, ये तिना सामणे इना गल्ला री गवाई देओ, एड़ा नि ओ कि सेयो बी मरी की एते पीड़ा री जगा रे आओ।’ 29 अब्राहमे तेसखे बोलेया, ‘तिना गे तो चेतावणी देणे खे मूसे रा बिधान और भविष्यबक्ते री कताबा ए, सेयो तिना री सुणो।’ 30 तिने बोलेया, ‘ना, ओ पिता अब्राहम! पर जे कोई एथा ते मरे रे बीचा ते तिना गे जाओगा, तो तिना मन फिराणा।’ 31 तिने तेसखे बोलेया, ‘जेबे सेयो मूसे और भविष्यबक्ते री नि सुणदे, तो जे मरे रे बीचा ते कोई बी जिऊँदा उठोगा, तेबे बी तेसरी नि मानणी।”

17 तेबे यीशुए आपणे चलेया खे बोलेया, “एड़ा ऊई नि सकदा कि ठोकरा नि लगो, पर हाय! तेस मांगूए खे, जेसरी बजअ ते सेयो आओईया। 2 जो इना छोटेया बीचा ते केसी एकी खे बी ठोकर देओगा, तेसखे तो ये पला ऊँदा कि तेसरे गले रे चाक्क्या रा एक पूड लटकाई देओ और समुद्रो रे सेटी देओ। 3 चौकस रओ, जे तेरा विश्वासी पाई अपराध करो, तो तेसखे समजेया और जे से पछताओ, तो तेसखे माफ कर। 4 जे एकी दिनो रे से तेरे खलाफ सात बार अपराध करो और सातो बार तांगे फेर आयी की बोलो कि आऊँ पछताऊँआ, तो तेसखे माफ कर।” 5 तेबे प्रेरिते यीशुए खे बोलेया, “आसा रा विश्वास बढ़ा।” 6 यीशुए बोलेया, “जे तुसा खे अऊरिया रे दाणे रे बराबर बी विश्वास ऊँदा, तो एस करयूँओ रे डालो खे बोलदे कि जड़ा ते पट्टी की समुद्रो रे लगी जा, तो से तुसा री मानी लंदा। 7 “तुसा बीचा ते एड़ा कूणे कि जेसरा दास अल बाओ या पेडा खे चराओआ और जेबे से डोरूआ ते आओ, तेबे तेसखे बोलो, “फटाफट आओ और रोटी खाणे बैठी जा?” 8 और ये नि बोलो कि माखे रोटी बणा, और जदुओ तक आऊँ खाऊँ, तदुओ तक लक बानी की मेरी सेवा कर, तिजी ते बाद तँ बी खाई-पी लणा। 9 क्या तेस, तेस दासो रा एहसान मानणा कि तिने सेयो ई काम कित्ते, जेसरी तिने आज्ञा दिती थी। 10 इँया ई तुसे बी, जेबे तिना सबी कामा खे करी चुकोगे, जिना खे करनरी ना आज्ञा तुसा खे देई राखी थी, तो बोलो, “आसे नक्कमे दास ए; कऊँकि जो आसा कारना चाईयो था, बस सेई करी राखेया।” 11 और तेबे एड़ा ऊआ कि यीशु और तिना रे चले यरूशलेमो खे जांदे ऊए सामरिया और गलीलो प्रदेशो रिये जाणे लगी रे थे। 12 तेबे केसी गांव रे जांदे ऊए तिना खे दस कोढ़ी मिले। 13 तेबे तिने दूर खड़ी की जोरे की आक्का पाई की बोलेया, “ओ यीशु! ओ स्वामी! आसा पाँदे दया कर।” 14 यीशुए तिना खे देखी की बोलेया, “यरूशलेमो रे मन्दरो रे जाओ और आपू खे पुरोईतो गे बताओ।” सेयो जांदे-जांदे ई ठीक ऊईगी। 15 तेबे तिना बीचा ते एक ये देखी की कि आऊँ ठीक ऊईगा, जोरे-जोरे साथे परमेशरो री तारीफ करदा ऊआ वापस यीशुए गे आया 16 और यीशुए रे पैरा पाँदे मुँओ रे पारे पडी की तिना रा धन्यवाद करने लगेया और से सामरी था। 17 तेबे यीशुए बोलेया, “क्या दस के दस मांगू ठीक नि ऊए, तेबे सेयो नौ मांगू केयी ए? 18 क्या एस परदेशिया खे छाडी की ओर कोई नि निकलेया, जो परमेशरो री तारीफ करो?” 19 तेबे यीशुए तेसखे बोलेया, “उठी की चली जा, तेरे विश्वासे तूँ बचाईता।” 20 जेबे फरीसिये यीशुए ते पूछेया कि परमेशरो रा राज्य कदी आऊणा? तेबे तिने जवाब दितेया, “परमेशरो रा राज्य प्रगत रूपो रे नि आऊँदा 21 और लोका एड़ा नि बोलणा कि देखो, एती ए या तेती ए, कऊँकि परमेशरो रा राज्य तुसा बीचे ए।” 22 तेबे तिने चलेया खे बोलेया, “सेयो दिन आऊणे, जेबे तुसा माणू रे पुत्रो रे दिना बीचा ते एकी दिनो खे देखणा चाणा और देखी नि सकणा। 23 लोका तुसा खे बोलणा, ‘देखो, मसीह एती ए!’ या ‘देखो, मसीह तेती ए!’ पर तुसे चली नि जाणा और ना ई तिना पीछे जाणा। 24 कऊँकि जियाँ बिजली समो री एकी तरफा ते निकली की समो री दूजी तरफा खे चमकोई, तियाँ ई आऊँ माणू रा पुत्र बी आपणे दिनो रे प्रगत ऊणा। 25 पर पईले जरूरी ए कि तेसखे दुः ख ओ और एस जुगो रे लोक तेसखे तुच्छ ठराओ। 26 जेड़ा नूहो रे दिनो रे ऊआ था, तेड़ा ई मां माणू रे पुत्रो रे दिनो रे बी ऊणा। 27 जेस दिनो तक नूह जाहजो रे नि चढेया, तेस दिनो तक लोक खाओ-पियो थे और तिना रे ब्या-शादिया ओ थिया, तेबे जल-प्रलय आयी की सेयो सब नाश कित्ते। 28 तियाँ ई जेड़ा लूतो रे दिना रे ऊआ था कि लोक खाओ-पियो और लेण-देण करो थे, डालू लगाओ थे और कअर बणाओ थे। 29 पर जेस दिने लूत सदेमो ते निकलेया, तेस दिने आग और गन्धक समो ते बरसी और तेने नगरो रे सब लोक नाश करी ते। 30 “मां माणू रे पुत्रो रे प्रगत ऊणे रे दिनो रे बी एड़ा ई ऊणा। 31 तेस दिने जो छतो पाँदे ओ और तेसरा समान कअरे ओ, से तेस लणे खे नि उतरो और तियाँ ई जो डोरूआ रे ओ, सेयो पीछे नि आटो। 32 लूतो री लाडिया खे याद राखो कि जो तेसा साथे उआ! 33 जो कोई आपणा प्राण बचाओआ, तेस से खोणा और जो कोई तेसखे खोओआ, तेस अनन्त

जिन्दगी पाणी। 34 आऊँ तुसा खे बोलूँआ, कि तेस राती दो लोक आपणे माँजे पाँदे ऊणे, एक लयी लणा और दूजा छाडी देणा। 35 दो जवाणसा साथे-साथे चाक्की पिशणे लगी रिया ऊणिया, एक लयी लणी और दूजी छाडी देणी। 36 दो जणे डोरूआ रे ऊणे, एक लयी लणा और दूजा छाडी देणा।” 37 ये सुणी की चलेया यीशुए ते पूछेया, “ओ प्रभु! ये केयी ऊणा?” तिने तिना खे बोलेया, “जेती लोथ ऊणी, तेथी इल्ला कटिया ऊणिया।”

18 तेबे यीशुए इजी रे बारे रे कि हर रोज प्रार्थना करना और याओ नि छाडणा चाईयो, ये उदारण आपणे चलेया खे बोलेया, 2 “केसी नगरो रे एक न्यायी रओ था, जो ना परमेशरो ते डरो था और ना ई केसी मांगूए री परवा करो था 3 और तेसी नगरो रे एक बिदुआ बी रओ थी, जो तेसगे आयी-आयी की बोलदी रओ थी कि मेरा न्याय करी की माखे दुश्मणा ते बचा। 4 से थोड़े बखतो तक नि मानेया पर आखरी रे तिने सोचेया कि हालाँकि आऊँ ना परमेशरो ते डरदा और ना ई मांगूआ री परवा करदा, 5 तेबे बी ये बिदुआ माखे सतांदी रओई, इजी री खातर मां तेसा रा न्याय चुकाई देणा, एड़ा नि ओ कि कअडिया रे कअडिया आयी की आखरी रे मेरे नाको रे दम करी देओ।” 6 यीशुए बोलेया, “त्यानो साथे सोचो, ये पापी न्यायी क्या बोलोआ? 7 तो क्या परमेशरे आपणे चूणे ऊए रा न्याय नि करना, जो रात-दिन तेसरी दुहाई देंदे रओए और क्या तेस तिना रे बारे रे देर करनी? 8 आऊँ तुसा खे बोलूँआ कि तेस फटाफट तिना रा न्याय करना, तेबे बी आऊँ माणू रा पुत्र जेबे आऊणा, तो क्या मां तरतिया पाँदे विश्वास पाणा?” 9 तेबे तिना खे, जो आपू पाँदे विश्वास राखो थे कि आसे तर्मा ए और ओरी खे तुच्छ जाणो थे, ये उदारण बोलेया, 10 “दो माणू प्रार्थना करने खे मन्दरो रे गये, एक फरीसी था और दूजा कर लणे वाला था। 11 फरीसी खड़ा ऊई की ईयाँ प्रार्थना करने लगेया, ‘ओ परमेशर आऊँ तेरा धन्यवाद कऊँआ कि आऊँ ओरी मांगूए जेड़ा अन्दर करने वाला, अन्यायी और व्याभिचारी नि ए और ना एस कर लणे वाले जेड़ा ए। 12 आऊँ अफ़ते रे दो बार बअरत कऊँआ और आऊँ आपणी सारी कमाईया रा दसुआ अंश बी तुसा खे देऊँआ।’ 13 पर कर लणे वाले दूर खड़े ऊई की स्वर्गो रे कनारो खे आखी पनि चकणिया चाईया, बल्कि आपणी छाती बजाई-बजाई की बोलेया, ‘ओ परमेशर! मां पापिए पाँदे दया कर।’ 14 आऊँ तुसा खे बोलूँआ कि से दूजा नि पर येई माणू तर्मा ठराई की आपणे कअरो खे गया, कऊँकि जो कोई आपू खे बड़ा बणाओगा, से छोटा करेया जाणा और जो आपू खे छोटा बणाओगा, से बड़ा करेया जाणा।” 15 तेबे लोक आपणे बच्चेया खे बी तिना गे ल्याऊणे लगे, ताकि सेयो तिना पाँदे आपणा आथ राखो, पर चले तिना खे देखी की बकणे लगे। 16 यीशुए बच्चेया खे आपू गे बुलाई की बोलया, “बालका खे मांगे आऊणे देओ और तिना खे ना नि करो, कऊँकि परमेशरो रा राज्य एड़े रा ई ये। 17 आऊँ तुसा खे सच बोलूँआ कि जो कोई परमेशरो रे राज्य खे बालको जेड़ा नि मानोणा, से कदी बी तेती नि जाणा।” 18 तेबे एकी अधिकारिए यीशुए ते पूछेया, “ओ उत्तम गुह! अनन्त जीवन पाणे खे आऊँ क्या करुँ?” (aiōnios 166) 19 यीशुए तेसखे बोलेया, “तूँ माखे उत्तम कऊँ लगी रा बोलणे? कोई बी उत्तम नि ए, बस एक, मतलब-परमेशर। 20 तूँ आज्ञा खे तो जाणेया कि व्याभिचार नि करना, अत्या नि करना, चोरी नि करना, चूठी गवाई नि देणी, आपणे माए-बाओ रा आदर करना।” 21 तिने बोलेया, “इना गल्ला खे तो आऊँ बचपनो ते मानदा आयी रा।” 22 ये सुणी की यीशुए बोलेया, “ताँदे एबु बी एक गल्ला री कमी ए, आपणा सब कुछ बेची की कंगाला खे बांडी दे और ताखे स्वर्गो रे धन मिलणा और आयी की मां पीछे आईजा।” 23 से ये सुणी की से बऊत उदास ऊईगा, कऊँकि से बऊत अमीर था। 24 यीशुए तेस देखी की बोलेया, “अमीरा रा परमेशरो रे राज्य रे जाणा कितणा कठण ए। 25 परमेशरो रे राज्य रे अमीरा रा जाणा, ऊँटो रा सूईया रे नाके ते निकलने रे बराबर ए।” 26 तेबे सुणने वालेया बोलेया, “तेबे केसरा उद्धार ऊई सकोआ?” 27 यीशुए बोलेया, “जो मांगूआ ते नि उई सकदा, से परमेशरो ते उई सकोआ।” 28 पतरसे बोलेया, “देख, आसे तो

कअर-बार छाडी की तुसा पीछे आईगे रे।” 29 यीशुए बोलेया, “आऊँ तुसा खे सच बोलूँआ जो कोई, परमेशरो रे राज्य खे आपणे कअर, लाड़ी, पाई, बईण, माए-बाओ या बाल-बच्चे छाडी देओगा 30 तेस एस बखते कई गुणा फल पाणा और आऊणे वाले जुगो रे अनन्त जीवना।” (aiōn g165, aiōnios g166) 31 तेबे तिने बारा चेलैया खे साथे लयी की तिना खे बोलेया, “देखो, आसे यरूशलेम नगरो खे जाणे लगी रे और जितणी गल्ला मां माणू रे पुत्रो रे बारे रे भविष्यबक्के लिखी राखिया, सेयो सब पुरिया ऊणिया। 32 कऊँकि आऊँ दुजिया जातिया रे आथो रे देई देणा, और तिना मेरा मजाक उड़ाणा, और मां पाँदे थूकणा 33 और माखे कोड़े बाणे और काणा और आऊँ तीजे दिने जिऊँदा ऊई जाणा।” 34 पर चेलैया इना गल्ला बीचा ते कोई बी गल्ल नि समजी और ये गल्ल तिना ते छिपी री रई और जो बोली राखेया था, से तिना री समजा रे नि आया। 35 जेबे सेयो यरीहो नगरो रे नेड़े पऊँछे, तेबे एक अन्दा सड़का रे कनारे बैठे रा पीख लगी रा था मांगणे। 36 तेबे से पीड़ा रे हांडणे री छेड़ सुणी की पूछणे लगेया, “ये क्या लगी रा ऊणे?” 37 तिने तेसखे बोलेया, “यीशु नासरी लगी रे जाणे।” 38 तेबे तिने आक्का पायी की बोलेया, “ओ दाऊदो री ल्वाद यीशु! मां पाँदे दया कर।” 39 जो आगे-आगे लगी रे थे चलणे, सेयो तेसखे बकणे लगे कि चुप रओ, पर से ओर बी चींगणे लगेया, “ओ दाऊदो री ल्वाद मां पाँदे दया कर!” 40 तेबे यीशुए खड़े ऊई की आज्ञा दित्ती, “एसखे मांगे ल्याओ।” और जेबे से नेड़े आया, तेबे तिने तेसते पूछेया, 41 “तूँ क्या चाएया कि आऊँ ताखे क्या करूँ?” अन्दे बोलेया, “ओ प्रभु ये कि आऊँ देखणे लगी जाऊँ।” 42 यीशुए बोलेया, “देखणे लग, तेरे विश्वासे तूँ ठीक करी ता।” 43 और से तेबुई देखणे लगेया और परमेशरो री तारीफ करदा ऊआ तिना पीछे चलणे लगेया और सबी लोके ये देखी की परमेशरो री स्तुति कित्ती।

19 यीशु यरीहो नगरो ते जाणे लगी रे थे। 2 तेती जक्कई नाओं रा एक माणू कर लणे वालेया रा सरदार था और अमीर था। 3 से यीशुए खे देखणा चाओ था कि से कुण जा ए? पर पीड़ा री बजअ ते देखी नि सको था, कऊँकि से बाऊणा था। 4 तेबे से तिना खे देखणे खे आगे दौडी की गूलरो रे डालो पाँदे चढ़ी गा, कऊँकि सेयो तिसिये ई जाणे वाले थे। 5 जेबे यीशु तेसा जगा रे पऊँछे, तेबे तिने पाँदे देखी की बोलेया, “ओ जक्कई फटाफट थाले उतरी जा! कऊँकि आज मेरा तेरे कअरे रणा जरूरी ए।” 6 से फटाफट गूलरो रे डालो ते थाले उतरी की तिना खे खुशिया साथे आपणे कअरो खे लयी गा। 7 ये देखी की सब लोक कुड़कुड़ाई की बोलणे लगे, “ये तो एक पापी माणूए रे कअरे जाणे लगी रा।” 8 जक्कईये खड़े ऊई की यीशुए के बोलेया, “ओ प्रभु यीशु! देखो, आऊँ आपणी आदी जायदात कंगाला खे देऊँआ और जे केसी रा कुछ बी अन्याय करी की लयी राखेया, तो तेसखे चार गुणा वापस करी देऊँआ।” 9 तेबे यीशुए बोलेया, “आज एते कअरो रे लोका बीचे उद्धार आयी रा, कऊँकि ये बी अब्राहमो रे वंशो राए। 10 कऊँकि आऊँ माणू रा पुत्र राचे रेया खे टोलने और तिना खे बचाणे आयी रा।” 11 जेबे सेयो इना गल्ला सुणने लगी रे थे, तेबे यीशुए एक उदारण बोलेया, कऊँकि सेयो यरूशलेमो रे नेड़े थे, और सेयो समजो थे कि परमेशरो रा राज्य एबु प्रगत ऊणे वाला ए। 12 तेबे यीशुए बोलेया, “एक अमीर माणू दूर देशो खे चली गा, ताकि राजपद पाई की फेर आओ। 13 तिने आपणे दासा बीचा ते दस दासा खे बुलाई की तिना खे दस सूईने रे सिक्के दित्ते और तिना खे बोलेया कि मेरे वापस आऊणे तक लेण-देण करी लएओ। 14 पर तेसरे नगरो रे रणे वाले तेसते बैर राखो थे और तेस पीछे दूआ खे पेजी की सन्देशा पेजेया कि आसे नि चाँदे कि ये आसा पाँदे राज्य करो। 15 “जेबे से राजपद पाई की वापस आया, तेबे तिने सेयो दास बुलाए जिना खे तिने सूईने रे सिक्के दित्ते थे, ताकि पता लगाई सको कि तिने लेण-देणो ते क्या-क्या कमाया। 16 तेबे एकी बोलेया, ओ मालक! तेरे सूईने रे सिक्के साथे दस ओर सिक्के कमाई राखे। 17 तिने तेसखे बोलेया कि ओ उत्तम दास तूँ धन्य ए कऊँकि तूँ थोड़े रेई विश्वासो जोगा निकलेया, एबे दस नगरो रा अक्क

राख। 18 दूजे बी आयी की बोलेया, ओ मालक! तेरे सूईने रे सिक्के साथे पाँज ओर सिक्के कमाई राखे। 19 तिने तेसखे बोलेया कि तूँ बी पाँज नगरो रा हाकिम ऊई जा। 20 तीजे जणे आयी की बोलेया, ओ मालक! देख, तेरे सूईने रे सिक्के ये ए, जो मैं परने रे बानी की थे राखे रे। 21 कऊँकि आऊँ तांते डरूँ था, कऊँकि तुसे कठोर माणू ए, जो तैं नि राखेया, से चकी लयेआ और जो तैं नि बाया, तेस बाडी देआ। 22 तिने तेसखे बोलेया, ओ दुष्ट दास! आऊँ तेरे ई मुंओ ते ताखे दोषी ठईराऊँआ, तूँ माखे जाणे था कि कठोर माणू ए, जो मैं नि राखेया, तेस चकी लऊँआ और जो मैं नि बायी राखेया, से बाडी देऊँआ। 23 तो तेबे तैं मेरे पेसे साऊकारो गे कऊँ नि राखे, ताकि आऊँ आयी की ब्याजो समेत लई लंदा। 24 और जो लोक नेड़े थे खड़े रे, तिने तिना खे बोलेया कि से सिक्का एसते लई लो और जेसगे दस सूईने रे सिक्के ए, तेसखे देई देओ। 25 तिने तेसखे बोलेया कि ओ स्वामी!, एसगे दस सिक्के तो आए। 26 आऊँ तुसा खे बोलूँआ कि जेसगे आए, तेसखे देणा, और जेसगे आया नि, तेसते से बी जो तेसगे आया, लयी लणा। 27 पर मेरे तिना बैरिया खे, जो नई चाओ थे कि आऊँ तिना पाँदे राज्य करूँ, तिना खे एती मां सामणे ल्याई की काओ।” 28 ये बोली की यीशु यरूशलेमो री तरफा खे आपणे चेलैया ते आगे-आगे चले। 29 जेबे सेयो जैतून नाओं रे पाहड़ो पाँदे बैतफगे गांव और बैतनिग्याहो गांव रे नेड़े पऊँछे, तेबे तिने आपणे चेलैया बीचा ते दो जणे ये बोली की पेजे, 30 “सामणे रे गांव रे जाओ और तेती पऊँछी की एक गहिदया रा बच्चा, जेस पाँदे कदी कोई नि बैठी रा, बाने रा तुसा खे मिलणा, तेस खोली की ल्याओ 31 और जे तुसा खे कोई पूछो कि कऊँ लगी रे खोलणे? तो बताई देणा कि प्रभुए खे एसते कुछ मतलब ए।” 32 जो पेजे थे तिने जाई की तेड़ा ई पाया, जो तिना गे बताई राखेया था। 33 जेबे सेयो गहदे रे बच्चे खे खोलणे लगी रे थे, तेबे तेसरे मालके तिना ते पूछेया, “एस बच्चे खे कऊँ लगी रे खोलणे?” 34 तिने बोलेया, “प्रभुए खे एसते मतलब ए।” 35 सेयो तेसखे यीशुए गे लयी गे और आपणे टाले तेस बच्चे पाँदे पाई की यीशु तेस पाँदे बैठीगे। 36 जेबे सेयो जाणे लगी रे थे, तेबे बऊत जणेया आपणी-आपणी चादरी बाटा रे बछाइतिया। 37 नेड़े आयी की जेबे सेयो जैतून पाहड़ो री टलाना रे पऊँछे, तेबे चेलैया री सारी मण्डली, तिना सबी सामथां रे कामो री बजअ ते, जो तिने देखे थे, खुश ऊई की जोरे-जोरे साथे परमेशरो री स्तुति करने लगी कि, 38 “धन्य ए से राजा, जो प्रभुए रे नाओं ते आओआ, स्वर्गो रे शान्ति और सर्गो रे महिमा ओ।” 39 तेबे पीड़ा बीचा ते कई फरीसी यीशुए खे बोलणे लगे, “ओ गुरु! आपणे चेलैया खे बक।” 40 तिने जवाब दितेया, “आऊँ तुसा खे बोलूँआ कि जे जो लोक चुप ऊईगे, तो पात्थर चींगणे लगी जाणे।” 41 जेबे यीशु नेड़े पऊँछे, तो नगरो खे देखी की तेस पाँदे रोणे लगे 42 और बोलेया, “पला ऊँदा कि तूँ एस दिनो रे शान्तिया री गल्ला जाणदा। पर एबे बऊत देर ऊईगी री और एबे शान्ति तेरी नजरा ते छीपी गी री। 43 कऊँकि सेयो दिन तां पाँदे आऊणे, जेबे तेरे बैरिया मोर्चा बानी की तूँ केरी लणा और चऊँ कनारे ते तूँ दबाई देणा 44 और तूँ और तेरे बालक, जो तां साथे ए, माट्रिया रे मलाई देणे और एती जो पात्थरो पाँदे पात्थर लगी रे, सब टाले जाणे। कऊँकि तैं से मोका, जेबे तां पाँदे कृपा-दृष्टि कित्ती थी, पछयाणा नि।” 45 तेबे यीशु मन्दरो रे जाई की बेचणे वालेया खे बारे निकयालने लगे 46 और तिना खे बोलेया, “लिखी राखेया कि मेरा मन्दर प्रार्थना रा कअर ए, पर तुसे से डाकूआ री गुफा बणाई ती।” 47 सेयो हर रोज मन्दरो रे उपदेश करो थे और बड़े पुरोईत और शास्त्री और लोका रे खास तिना खे नाश करने रा मोका टोलने लगी रे थे। 48 पर कोई उपाय नि निकयाली सके कि ये कियॉ करिए, कऊँकि सब लोक बड़े ट्यानो साथे यीशुए री सुणो थे।

20 एक दिन एड़ा ऊआ कि जेबे यीशु मन्दरो रे लोका खे उपदेश और सुसमाचार सुनाणे लगी रे थे, तेबे बड़े पुरोईत, शास्त्री और बुजुर्ग नेड़े आयी की खड़े ऊईगे 2 और बोलणे लगे, “आसा गे बता कि तूँ इना कामा केसरे अक्को ते करेया और से कूणे, जिने ताखे ये अक्क देई राखेया?”

3 यीशुए तिना खे जवाब दित्तेया, “आऊँ बी तुसा ते एक गल्ल पुछूँआ। माखे बी बताओ 4 यूहन्ने रा बपतिस्मा स्वर्गो री तरफा ते था या माँगपूर री तरफा ते?” 5 तेबे सेयो आपू बीचे बोलणे लगे, “जे आसे बोलूँगे कि स्वर्गो री तरफा ते था, तेबे एस बोलणा कि तेबे तुसे तेस पाँद विश्वास कऊँ नि कित्तेया? 6 और जे आसे बोलूँगे कि माँगपूर री तरफा ते ए, तो सबी लोका आसा खे पात्थर बाणे, कऊँकि तिना खे पक्का पता ए कि यूहन्ना भविष्यबक्ता था।” 7 तेबे तिने जवाब दित्तेया, “आसे नि जाणदे कि से केसरी तरफा ते था।” 8 यीशुए तिना खे बोलेया, “तेबे आऊँ पनि बतांदा कि आऊँ इना कामा केसरे अक्को ते कर्हूँआ।” 9 तेबे सेयो लोका खे ये उदारण बोलणे लगे, “एकी माँगपूर अँगूरा रा बगीचा लगाया और ठेकेदारा खे तिजी रा ठेका देई की बऊत दिना खे परदेशो खे चली गा। 10 जेबे बखत आया तेबे तिने ठेकेदारा गे एक दास पेजेया कि से अँगूरा रे बगीचे रा कुछ इस्सा तेसखे देओ, पर ठेकेदारे से कुटी की खाली आथ पेजी ता। 11 तेबे तिने एक ओर दास पेजेया, पर तिने से बी कुटी की और तेसरी बेज्जती करी की खाली आथ पेजी ता। 12 तेबे तिने तीजा पेजेया, तेबे तिने से बी कायल करी की निकयाली ता। 13 तेबे तिने मालके सोचेया कि एबे आऊँ क्या कर्हूँ? आऊँ आपणे प्यारे पाऊए खे तिना गे पेजुँआ, क्या पता सेयो तेसरा आदर करो। 14 जेबे ठेकेदारे से देखेया तो आपू बीचे बिचार करने लगे कि ये तो बारिस ए आओ एसखे काई देऊँए, ताकि जायदात म्हारी ऊई जाओ। 15 तेबे तिने से अँगूरा रे बगीचे ते बारे निकयाली की काई ता। तेबे अँगूरा रा बगीचे रे मालके तिना साथे क्या करना? 16 तेस आईकि तिना ठेकेदारा रा नाश करी देणा और अँगूरा रा बगीचा ओरी गे सम्बाली देणा।” ये सुणी की तिने बोलेया, “परमेशर करो कि एडा नि ओ।” 17 यीशुए तिना री तरफा खे देखी की बोलेया, “तेबे ये क्या लिखी राखेया, “जो पात्थर राजमिस्त्रिए तुच्छ ठराई राखेया था, सेई कूणे रा सिरा ऊईगा। 18 “जो कोई तेस पात्थरो पाँद पड़ना, से चूर-चूर ऊई जाणा और जेस पाँद ये पड़ना, तेस से पीसी देणा।” 19 तेसी बखत शस्त्रीए और बड़े पुरोईते सेयो पकड़ना चाए, कऊँकि सेयो समजी गे थे कि इने ये उदारण आसा पाँद ई बोलेया, पर सेयो लोका ते डरी गे। 20 तेबे सेयो तिना री ताका रे रये और आपणे, पेतिये पेजे कि तमो रा पेष बदली की तेसरी कोई ना कोई गल्ल पकड़नी, ताकि तेसखे हाकिमो रे आथो रे और अक्को रे देई देऊँ। 21 तिने यीशुए ते पूछेया, “ओ गुरु! आसा खे पता ए कि तुसे ठीक बोलोए और सिखाओए और केसी रा पक्षपात नि करदे, पर परमेशरो री बात सच्चाईया साथे बताओए। 22 तो क्या कैसरो खे कर देणा खरी गल्ल या नि?” 23 यीशुए तिना री चलाकी जाणी की तिना खे बोलेया, 24 “एक चाँदिए रा सिक्का मांगे बताओ। इदे केसरी मूर्ति और नाओं ए?” तिने बोलेया, “कैसरो रा।” 25 यीशुए तिना खे बोलेया, “जो कैसरो राए, से कैसरो खे देओ और जो परमेशरो राए, से परमेशरो खे देओ।” 26 सेयो लोका सामणे एसा गल्ला रे तिना खे पकड़ी नि सके, बल्कि तिना रा जवाब सुणी की हैरान ऊईगे और चुप रये। 27 तेबे सटूकी, जो बोलो थे कि मरेया रा जिऊँदा ऊणा आए ई नि, तिना बीचा ते कई जणेया आयी की यीशुए ते पूछेया, 28 “ओ गुरु! मूसे आसा खे ये लिखी राखेया कि जे केसी रा पाई आपणी लाडिया रे रंदे ऊए बिना ल्वादा ते मरी जाओ, तो तेसरा पाई तेसरी लाडिया साथे ब्या करी लो और आपणे पाईए खे कुल पैदा करो। 29 सात पाई थे पईला पाई ब्या करी की बिना ल्वादा तेई मरी गा। 30 तेबे दूजे और तीजे बी तेसा जवाणसा साथे ब्या करी ला। 31 ईयाँ सातो पाई बिना ल्वादा ते मरी गे। 32 सबी ते बाद से जवाणस बी मरी गी। 33 तेबे जिऊँदी ऊणे पाँद से तिना बीचा ते केसरी लाडी ऊणी? कऊँकि से सात जणेया री लाडी ऊई चुकी थी।” 34 यीशुए तिना खे बोलेया, “एस जुगो रे लोका बीचे तो ब्या-शादिया ओईया। (aiōn g165) 35 पर जो लोक एते जोगे ऊणे कि तेस जुगो खे और मरे रे बीचा ते जिऊँदे ऊणे ओ, तेबे तिना बीचे ब्या-शादिया नि ऊणिया। (aiōn g165) 36 सेयो फेर मरने पनि, कऊँकि सेयो स्वर्गदूता जेडे ऊणे, और जिऊँदे ऊणे री ल्वादा ऊणे ते, परमेशरो री बी ल्वादा ऊणे। 37 पर ये गल्ल कि मरे रे बी फेर जिऊँदे ओए, मूसे जाडो री कथा रे प्रगत

करी राखी कि से प्रभुए खे अब्राहम, इसहाक और याकूबो रा परमेशर करी की बोलोआ। 38 परमेशर मुडदेया रा नि, बल्कि जिऊँदेया रा परमेशर ए, कऊँकि तेसरे नेडे सब जिऊँदे ए।” 39 तेबे ये सुणी की शास्त्रिया बीचा ते कई जणे बोलेया, “ओ गुरु! तुसे अच्छा बोलेया।” 40 तेबे तिना खे फेर तिना ते कुछ ओर पूछणे री इम्मत नि ऊई। 41 तेबे यीशुए तिना ते पूछेया, “मसीहे खे दाऊदो री ल्वादा कऊँ बोलोए? 42 दाऊद आपू ई भजनसंहिता री कताबा रे बोलोआ, “प्रभुए मेरे प्रभुए खे बोलेया, 43 मेरे दाँणे बैठ, जदुओ तक आऊँ तेरे बैरिया खे तेरे पैरा निठे नि करी देऊँ। 44 “दाऊद तो तेसखे प्रभु बोलोआ, तो तेबे से तेसरी ल्वादा कियॉँ ऊआ?” 45 जेबे सब लोक सुणने लगी रे थे तेबे यीशुए आपणे चलेया खे बोलेया, 46 “शास्त्रिया ते चौकस रओ, जो लाम्बे टाले पईनी की कूमदे रओए और बजारो रे नमस्कार, और प्रार्थना रे कअरो रे खास-खास जगा और पाट्टिया रे खास जगा चाओए। 47 सेयो बिदुआ रे कअरो खे खाई जाओए और दखाणे खे मुखती देर तक प्रार्थना करोए, इना खे जादा सजा मिलणी।”

21 तेबे यीशुए आखी चकी की अमीर लोक आपणा-आपणा दान पणडारो रे पाँद ऊए देखे। 2 तिने एक कंगाल बिदुआ खे बी तिदे दो दमडिया पाँद ऊई देखी। 3 तेबे तिने बोलेया, “आऊँ तुसा खे सच बोलूँआ कि एसे कंगाल बिदुए सबी ते जादा पाई राखेया। 4 कऊँकि तिने सबी आपणिया सारिया सम्पतिया बीचा ते थोड़ा जा पाया, पर एसे आपणी कमाईया ते सारी आऊँदणी पाई ती।” 5 जेबे कई जणे मन्दरो रे बारे रे बोलणे लगी रे थे कि यो कितणे सुन्दर पात्थर और पेंटा रिया चीजा साथे सजाई राखेया, तेबे तिने बोलेया, 6 “सेयो दिन आऊणे, जेबे, जो तुसे लगी रे देखणे, तिना बीचा ते एती जो पात्थरो पाँद पात्थर लगी रे, सब टाले जाणे।” 7 तिने यीशुए ते पूछेया, “ओ गुरु! ये सब कदी ऊणा? और जेबे यो सब गल्ला पुरिया ऊणे वालिया ऊणिया, तेबे, तेस बखतो रा क्या चिह्न ऊणा?” 8 यीशुए बोलेया, “चौकस रओ कि कोई तुसा खे बर्दाकाओ नि जाओ, कऊँकि बऊत जणे मेरे नाओं ते आऊणे और बोलणा कि आऊँ सेईए और ये बी कि बखत नेडे आईगा रा, तुसे तिना पीछे नि चली जाणा। 9 जेबे तुसे लड़ाई और हुडदंगा रे बारे रे सुणो, तेबे कबराणा नि, कऊँकि इना रा पईले ऊणा जरूरी ए, पर तेस बखते तेबुई अंत नि ऊणा।” 10 तेबे तिने तिना खे बोलेया, “जातिया पाँद जातिया और राज्य पाँद राज्य अमला करना 11 और बऊत ईल्लण ऊणे और जगा-जगा अकाल और बमारिया पड़नियाँ और सर्गो रे डराऊणिया गल्ला और बड़े-बड़े विह्व प्रगत ऊणे। 12 पर इना सबी गल्ला ते पईले तिना तुसे मेरे नाओं ते पकड़ने और सताणे, प्रार्थना रे कअरो रे देई देणे, जेला रे पाणे और राजेया और हाकिमो सामणे लयी जाणे। 13 पर तुसा खे ये गवाई देणे रा मोका ऊई जाणा। 14 इजी री खातर आपणे-आपणे मनो रे ठाणी लो कि आसे पईले तेई जवाब देणे री चिन्ता नि कर्हूँगे। 15 कऊँकि मां तुसा खे एडा बोल और बुद्धि देणी कि तुसा रे सब बिरोदी तुसा रा सामणा या खण्डन नि करी सकदे। 16 तुसा रे माए-बाओ, पाई-बईण, टबरो रे और दोस्ता बी तुसे पकड़वाणे, एथो तक कि तुसा बीचा ते कई जणे काई देणे। 17 मेरे नाओं री वजह ते सबी लोका तुसा ते बैर राखणा। 18 पर तुसा रे सिरा रा एक बी बाल बांगा नि ऊणा। 19 आपणे सन्नो ते तुसा आपणे प्राण बचाणे। 20 “जेबे तुसे यरूशलेमो खे सेना ते घिरे रा देखो, तो जाणी लणा कि तीजी रा नाश नेडे ए। 21 तेबे जो यहूदिया प्रदेशो रे ओ, तिने पाह्लो खे नठी जाणा और जो यरूशलेमो नगरो रे पीतरे ओ, सेयो बारे निकली जाएओ और जो गांव रे ओ। सेयो तिदे नि जाओ। 22 कऊँकि यो बदला लणे रे एडे दिन ऊणे, जिना रे लिखी रिया सारिया गल्ला पुरिया ऊई जाणिया। 23 तिना दिना रे जो गभवती और दूद पलयाणे वाली ऊणी, तिना खे हाय! हाय! कऊँकि देशो रे बड़ा क्लेश और लोका पाँद बड़ा प्रकोप ऊणा। 24 सेयो तलवारा रे ग्रा ऊई जाणे और बऊत सारे देशो रे लोका बीचे बन्दुए ऊई की पऊँछाए जाणे और जदुओ तक दुजिया जातिया रा बखत पूरा नि ऊई जाणा, तदुओ तक यरूशलेम दुजिया जातिया साथे केसेया जाणा। 25 “सूरज, चाँद और तारेया

रे चिह्न दिखणे और तरतिया पॉदि देशो-देशो रे जातिया रे लोका खे संकट ऊणा, कऊँकि सेयो समुद्रो रे गिडने और लईरा री छेड़ा ते कबराई जाणे 26 और डरो रे मारे और दुनिया रे आऊणे वाली घटना री बात देखदे-देखदे लोका रे जानी पॉदि जान नि रणी, कऊँकि सर्गो रिया शक्तिया इलाईया जाणिया। 27 तेबे तिना माणू रा पुत्र सामर्थ और बड़ी महिमा साथे बादलो पॉदि आऊँदा ऊआ देखणा। 28 जेबे यो गल्ला ऊणे लणो, तेबे सीदे ऊई की आपणा सिर ऊबे चकणा, कऊँकि तुसा रा छुटकारा नेड़े ऊणा।” 29 यीशुए तिना खे एक उदारण बी बोलेया, “दाऊगले रे डालो खे और सबी डाला खे बी देखो। 30 जियाँ ई तिना रे परलंगू निकलोए, तेबे तुसे देखी की आपू ई जाणी लओए कि तऊँदी नेड़े। 31 ईयाँ ई जेबे तुसे इना गल्ला खे ऊँदे ऊआ देखो, तेबे जाणी लो कि परमेशरो रा राज्य नेड़े। 32 आऊँ तुसा खे सच लगी रा बोलणे कि जदुओ तक यो सब गल्ला पूरिया नि ऊई जाओगिया, तदुओ तक एसा पीडिया रे लोका री मौत नि ऊणी। 33 सर्ग और तरती टली जाओगी, पर मेरा वचन कदी नि टलना। 34 इजी री खतर सावधान रओ, एड़ा नि ओ कि तुसा रे मन, खुमार, मतवालापण और एसा जिवन्धिया री चिन्ता ते सुस्त ऊई जाओ और सेयो दिन तुसा पॉदि फंदे जेड़ा अचाणक आयी जाओ। 35 “कऊँकि से सारी तरतिया पॉदि और सब रणे वालेया पॉदि ईयाँ ई पड़ना। 36 इजी री खतर जागे रेओ, हर बखत प्रार्थना करदे रओ, ताकि तुसे इना सबी आऊणे वालिया घटना ते बचणे, और माणू रे पुत्रो सामणे खेड़े ऊणे जोगे बणो।” 37 यीशु दिने मन्दरो रे उपदेश करो थे और राती बारे जाई की जैतून नाओं रे पाहडो पॉदि रओ थे 38 और प्यागा तडके सब लोक तिना री सुणने खे मन्दरो रे तिना गे आया करो थे।

22 बिना सजेड़े री रोटिया रा त्योआरो, जेतेखे फसह रा त्योआर बी बोलोए, नेड़े था 2 और बड़े पुरोईत और शास्त्री एड़ी गल्ला री टोला रे थे कि यीशुए खे किंयाँ मरवाईए, पर सेयो लोका ते डरो थे। 3 तेबे शैतान यहूदा रे समायी गा, जेसखे, इस्करियोती बी बोलोए और बारा चेलैया बीचे गिणेया जाओ था। 4 तिने जाई की बड़े पुरोईत और परीदारा रे सरदारा साथे गल्ल किती कि यीशुए खे तिना रे आथो रे किंयाँ पकड़वाईये। 5 सेयो खुश ऊईगे और तेसखे पैसे देणे रा वचन दितेया। 6 से मानी गा और बिना उपद्रवो ते यीशुए खे तिना रे आथो रे पकड़वाणे रा मोका लगेया टोलने। 7 तेबे बिना सजेड़े री रोटिया रा त्योआरो था, जिदे फसह रे त्योआरो रा मिन्तू बलि करना जरूरी था। 8 यीशुए परस और यूहन्ना ये बोली की पेजे, “जाई की आसा खे खाणे खे फसह रे त्योआरो री रोटी त्यार करो।” 9 तिने तिना ते पूछेया, “तुसे केयी चाओए कि आसे तुसा खे फसह त्यार करूँ?” 10 यीशुए तिना खे बोलेया, “देखो नगरो रे जांदि ई तुसा खे एक माणू पाणिए रा कअड़ा चकी की मिलणा, जेते कअरो रे से जाओ, तुसे तेस पीछे चली जाणा 11 और तेस कअरो रे मालको खे बोलणा कि गुरूए ताखे बोली राखेया कि से मईमाना रा कमरा केयी ए, जेती आऊँ आपणे चेलैया साथे फसह रे त्योआरो री रोटी खाऊँ? 12 तेस तुसा खे एक सजी-सजाई री बाऊडो दखाणी, तुसे तेथी त्यारी करनी।” 13 चेलैया जाई की तेड़ा ई पाया, जेड़ा यीशुए तिना खे बोलेया था तेड़ा ई पाया और फसह रे त्योआरो री रोटी त्यार किती। 14 जेबे बखत आया तेबे सेयो प्रेरिता साथे रोटी खाणे बैठे। 15 तेबे यीशुए तिना खे बोलेया, “मेरी बड़ी इच्छा थी कि दुः ख सईन करने और मेरे मरने ते पईले तुसा साथे ये फसह रे त्योआरो री रोटी खाऊँ। 16 कऊँकि आऊँ तुसा खे बोलूँआ कि जदुओ तक से परमेशरो रे राज्य रे पूरा नि ओ, तदुओ तक मां से कदी नि खाणा।” 17 तेबे तिने अँगूरो रे रसो रा कटोरा लयी की परमेशरो रा धन्यवाद कितेया और बोलेया, “पकड़ो और आपू बीचे बांडी लओ। 18 कऊँकि आऊँ तुसा खे बोलूँआ कि जदुओ तक परमेशरो रा राज्य नि आओ, तदुओ तक मां अँगूरा रा रस आजो ते कदी नि पीणा।” 19 तेबे तिने रोटी लयी और धन्यवाद करी की तोड़ी और तिना खे ये बोली कि दिती, “ये मेरा शरीर ए, जो तुसा खे देणे लगी रा, मेरी यादा रे एड़ा ई करेया करना।” 20 ईयाँ ई तिने रोटिया ते बाद कटोरा लया और ये बोलदे ऊए

दितेया, “ये कटोरा मेरे तेस खूनो दे, जो तुसा री खतर बाह्या जाओआ, नयी वाचा ए। 21 पर देखो, मेरे पकड़वाणे वाले रा आथ मां साथे मेजो पॉदि ए। 22 कऊँकि आऊँ माणू रा पुत्र, जेड़ा मेरे बारे रे ठराई राखेया, जाणा ई ये। पर हाय! तेस माणूए खे जेसरी बजअ ते आऊँ पकड़वाया जाणा।” 23 तेबे सेयो आपू-बीचे बात-चीत करने लगे कि आसा बीचा ते एड़ा कूणे जेस एड़ा काम करना? 24 तिना बीचे ये बईस बी ऊणे लगी कि आसा बीचा ते बड़ा कुण ए? 25 यीशुए तिना खे बोलेया, “दुजिया जातिया रे राजा तिना पॉदि राज करोए और जो तिना पॉदि अवक राखोए, तिना खे उपकारक बोलोए। 26 पर तुसे एड़े नि ऊणा, बल्कि जो तुसा बीचे बड़ा ए, से छोटिया जेड़ा और जो बड़ा ए, से सेवको जेड़ा बणो। 27 कऊँकि बड़ा कुण ए? क्या से जो रोटिया पॉदि बैठी रा या से जो सेवा करने लगी रा? क्या से नि जो रोटिया पॉदि बैठी रा? पर आऊँ तुसा बीचे सेवको जेड़ा ए। 28 “पर तुसे सेयो ए, जो परीक्षा रे लगातार मां साथे रये 29 और जियाँ मेरे पिते माखे एक राज्य ठराई राखेया। 30 तियाँ ई आऊँ बी तुसा खे ठराऊँआ, ताकि तुसे मेरे राज्य रे मां साथे खाओ-पियो, बल्कि सिंहासनो रे बैठी की इस्राएलो रे बारा गोत्रा रा न्याय करो। 31 “शमोन, ओ शमोन! देख, शैताने तुसे लोक मांगी लये रे, ताकि कणका जेड़े फड़ाकुओ। 32 पर मैं तेरिया तई प्रार्थना किती कि तुसे मां पॉदि विश्वास करना नि छाड़ी देओ, और जेबे तूँ आपणा मन फेरो, तो आपणे पाई मजबूत करने।” 33 तिने बोलेया, “ओ प्रभु! आऊँ तुसा साथे जेला रे जाणे खे, बल्कि मरने खे बी त्यार ए।” 34 प्रभुए बोलेया, “ओ पतरस! आऊँ ताखे बोलूँआ कि आज मुर्गे बांग नि देणी, जदुओ तक तूँ माखे तीन बार जाणने ते नि मुकरना।” 35 यीशुए तिना खे बोलेया, “जेबे मैं तुसे सुसमाचार प्रचार करने बटुए, चोली और जोड़ेया ते बिना पेजे थे, तेबे क्या तुसा खे किजी चीजा री कमी ऊई?” तिने बोलेया, “किजी चीजा री नि।” 36 तेबे यीशुए बोलेया, “पर एबे जेसगे बटुआ ए, से लयी लो और तियाँ ई चोला बी और जेसगे तलवार निए, से आपणे टाले बेची की एक खरीदी लो। 37 कऊँकि आऊँ तुसा खे बोलूँआ कि ये जो पवित्र शास्त्रो रे लिखी राखेया, ‘से अपराधिया साथे गिणेया गया।’ से मां पॉदि ऊणा जरूरी ए, कऊँकि मेरे बारे रिया गल्ला पुरिया ऊणे वालिया ए।” 38 चेलैया बोलेया, “ओ प्रभु! देखो, एती दो तलवारी आए, तिने बोलेया बऊत ए।” 39 तेबे यीशु बारे निकली की आपणी रवाजा रे मुताबिक जैतूनो रे पाहडो पॉदि गये और चले बी तिना पीछे चली गे। 40 तेते जगरे रे पऊँछी की तिने आपणे चेलैया खे बोलेया, “प्रार्थना करदे रओ, ताकि परीक्षा रे नि पड़ो।” 41 तेबे सेयो आपू तिना ते थोड़ी जी दूर चली गे और कुटणे टेकी की प्रार्थना करने लगे 42 और बोलणे लगे, “ओ पिता! जे तुसे चाओ तो एस दुः खो खे मांगा गे ते दूर करी सकोए, तेबे बी मेरी इच्छा नि पर तुसा री इच्छा पूरी ओ।” 43 तेबे स्वर्गो ते एक स्वर्गदूत तिना खे दिशेया, जो तिना खे सामर्थ देयो था। 44 तेबे सेयो जादा मुश्किला रे, व्याकुल ऊई की ओर बी दिलो ते दुः खी ऊई की प्रार्थना करने लगे और तिना रा पसीना, मानो खूनो रे बड़े-बड़े टीपेया जेड़ा जमीना पॉदि छुटणे लगी रा था। 45 तेबे सेयो प्रार्थना करी की उठे और आपणे चेलैया गे गये और तिने सेयो उदास ऊई की सये रे देखे। 46 और तिना खे बोलेया, “सऊणे कऊँ लगी रे? उठो और प्रार्थना करो, ताकि परीक्षा रे नि पड़ो।” 47 सेयो ये बोलणे ई लगी रे थे कि एक बड़ी पीड़ तिना गे आयी और तिना बारा बीचा ते, एक जेसरा नाओं यहूदा था, तिना ते आगे-आगे आऊणे लगी रा था और से यीशुए गे आया, ताकि तेसखे चूमो। 48 यीशुए तेसखे बोलेया, “ओ यहूदा! क्या तूँ माणू रे पुत्रो खे चूमा लयी की पकड़वाएया?” 49 तिना रे साथिये जेबे देखेया कि क्या ऊणे वाला ए, तेबे बोलेया, “ओ प्रभु! क्या आसे तलवार चलाऊँ?” 50 तेबे तिना बीचा ते एकी जणे प्रदान पुरोईतो रे दासो पॉदि तलवार चलाई की तेसरा दाँणा कान ऊड़ाई ता। 51 तेबे यीशुए बोलेया, “एबे बस करो” और तेसरा कान छुँई की से ठीक करी ता। 52 तेबे यीशुए बड़े पुरोईतो ते, मन्दरो रे परीदरे देणे वाले सरदारो ते, बुजुर्ग ते और जो तिना पॉदि चढ़ने लगी रे थे, तिना खे बोलेया, “क्या तुसे आऊँ डाकु समजी राखेया जो माखे पकड़ने खे तलवारी और डण्डे लयी की निकली रे? 53 जेबे

आऊँ मन्दरो रे हर दिन तुसा साथे था, तेबे तो तुसे मां पाँदि आथ नि पाया। पर ये तुसा रा बखत ए और न्हरे रा अक्क ए। 54 तेबे सेयो तिना खे पकड़ी की प्रदान पुरोईतो रे आँगणो रे ल्याए और पतरस दूरो-दूरो तेई तिना पीछे-पीछे आईगा 55 और जेबे सेयो आँगणो रे आग बाली की बैठी रे थे, तेबे पतरस बी तिना बीचे बैठे गा। 56 तेबे एक दासी तेसखे आगी रे प्रयासे रे देखी की और तेसरे कनारो खे ताकि की बोलणे लगी, “ये बी तो तेस साथे था?” 57 पर तिने ये बोली की ना करी ती कि, “ओ जवाणसे! आऊँ तेसखे नि जाणदा।” 58 थोड़ी देर बाद किने ओरी तेसखे देखी की बोलेया, “तूँ बी तो तिना बीचा ते ए,” पतरसे बोलेया, “ओ माणू! आऊँ नि ए।” 59 तेबे कोई एक कंटे ते बाद एक ओर माणू पक्का ऊई की बोलणे लगेया, “पक्का ये बी तेस साथे था, कऊँकि ये बी गलीली ए।” 60 पतरसे बोलेया, “ओ माणू! आऊँ नि जाणदा कि तूँ क्या लगी रा बोलणे?” से ये बोलणे ई लगी रा था कि तेबुई मुर्गे बांग दिती। 61 तेबे यीशुए तेसखे मुड़ी की देखेया, तेबे पतरसो खे तिना री गल्ल याद आयी, जो तिने बोली थी कि, “आज मुर्गे री बांग देणे ते पर्ले तूँ माखे तीन बार जाणने ते मुकरना।” 62 तेबे से बारे निकली की फूटी-फूटी की रोणे लगेया। 63 जिने माणूए यीशु पकड़ी राखे थे, सेयो तिना रा मजाक ऊड़ाणे लगे और टीशणे लगे 64 और तिना रिया आखी टखी की तिना ते पूछेया, “भविष्यबाणी करी की बता कि तांदि किने बाई?” 65 तेबे तिने ओर बी बऊत निन्दा रिया गल्ला तिना रे बिरोदो रे बोलिया। 66 जेबे दिन ऊआ तेबे, बुजुर्गे, बड़े पुरोईते और शास्त्रए तिना खे आपणी बड़ी सभा रे ल्याई की पूछेया, 67 “जे तूँ मसीह ए, तो आसा गे बताई दे।” यीशुए बोलेया, “जे आऊँ बोलूँगा तो तुसा विश्वास नि करना। 68 और जे पूछूँ तो जवाब नि देणा। 69 पर आजो ते आऊँ माणू रा पुत्र सर्वशक्तिमान् परमेशरो रे दाँणे कनारे बैठे रा रणा।” 70 ये सुणी की सबी जणे बोलेया, “तो क्या तूँ परमेशरो रा पुत्र ए?” तिने तिना खे बोलेया, “तुसे आपू ई बोलणे लगी रे, कऊँकि आऊँ आप ए।” 71 तेबे तिने बोलेया, “एबे आसा खे गवाईया री क्या जरूरत ए, कऊँकि आसे आपू ई एसरे मुंओ ते सुणी ता रा।”

23 तेबे सारी सभा उठी की तिना खे पिलातुसो गे लयी गी। 2 सेयो ये बोली की तिना पाँदि दोष लगाणे लगे, “आसे ये लोका खे रोमी सरकारा रे खलाफ बरोद करने खे बईकांदि ऊए और कैसरो खे कर देणे खे ना करदे ऊए और आपू खे मसीह, राजा बोलदे ऊए सुणी राखेया।” 3 पिलातुसे तेसते पूछेया, “क्या तूँ यहूदिये रा राजा ए?” यीशुए तेसखे बोलेया, “तूँ आपू ई लगी रा बोलणे।” 4 तेबे पिलातुसे बड़े पुरोईत और लोका खे बोलेया, “आऊँ एस माणूए रे कोई दोष नि देखदा।” 5 पर सेयो ओर बी पक्के ऊई की बोलणे लगे, “ये गलीलो ते लयी की एथो तक, सारे यहूदिया रे उपदेशे देई-देई की लोका खे उकसाओआ।” 6 ये सुणी की पिलातुसे पूछेया, “क्या ये माणू गलीलो रा रणे वाला ए?” 7 तेबे ये जाणी की कि ये हेरोदेसो री रियासता राए, से हेरोदेसो गे पेजी ता, कऊँकि तिना दिना रे से बी यरूशलेमो रे था। 8 हेरोदेस यीशुए खे देखी की बऊत खुश ऊईगा, कऊँकि से बऊत दिना ते तिना खे देखणा चाओ था, कऊँकि तिने तिना रे बारे रे सुणी राखेया था और यीशुए ते कोई चिह्न देखणे री उम्मीद राखो था। 9 तेबे से तिना ते मुखती गल्ला पूछदा रिया, पर तिने तेसखे कुछ बी जवाब नि दितेया। 10 तेबे बड़े पुरोईत और शास्त्री खडे ऊई की तनो-मनो साथे तिना पाँदि दोष लगादे रये। 11 तेबे हेरोदेसे आपणे सिपाईया साथे तिना रा मजाक उड़ाया और भड़किले टाले पणयाई की पिलातुसो गे वापस पेजी ता। 12 तेसी दिनो ते हेरोदेस और पिलातुस दोस्त बणी गे, इजी ते पर्ले सेयो एकी-दूजे रे बैरी थे। 13 पिलातुसे बड़े पुरोईत, अधिकारी और लोक बुलाई की तिना खे बोलेया, 14 “तुसे एस माणूए खे लोका खे रोमी सरकारा रे खलाफ बरोद करने खे बईकाणे वाला बोली की मांगे ल्याई राखे और देखो, मैं तुसा सामणे एसरी जांच किती, पर जिना गल्ला रा तुसे एस पाँदि दोष लगी रे लगाणे, तिना गल्ला रे मैं एसरे कोई बी दोष नि पाया। 15 ना ई हेरोदेसे, कऊँकि तिने ये आसा गे वापस पेजी ता रा और देखो, एसते

एड़ा कुछ नि ऊई रा, जेतेरी बजअ ते एसखे मृत्यु दण्ड मिलो। 16 तेबे आऊँ तेसखे कोड़े लगवाई की छाडी देऊँआ।” 17 यहूदिया रे फसह रे त्योआरो रे दिने पिलातुस हर साल एकी कैदियो खे तिना खे छाडी देओ था। 18 तेबे सब मिली की चींगणे लगे, “एसरा काम-तमाम कर और आसा खे बरअब्बे खे छाडी दे।” 19 ये सेईए जो हुडुंगो री बजअ ते, जो नगरो रे ऊआ था और अत्या री बजअ ते जेला रे पायी ता था। 20 पर पिलातुसे यीशुए खे छाडणे री इच्छा ते लोक फेर समजयाए। 21 पर तिने चींगी की बोलेया, “एसखे क्रूसो पाँदि चढ़ाई देओ, क्रूसो पाँदि।” 22 तिने तीजी बार तिना खे बोलेया, “कऊँ, इने कुण जी बुराई करी राखी? मैं एसरे मृत्यु दण्डो लायक कोई बी गल्ल नि देखी। इजी री खातर आऊँ एसखे कुटवाई की पेजी देऊँआ।” 23 पर सेयो चींगी-चींगी की पीछे ई पड़ी गे कि एसखे क्रूसो पाँदि चढ़ाओ और तिना रा चींगणा प्रबल ऊईगा। 24 तेबे पिलातुसे आज्ञा दिती कि इना री बिनतिया रे मुताबिक कित्तेया जाओ। 25 तिने से माणू जो हुडुंग और अत्या री बजअ ते जेला रे पाया था और जेसखे सेयो माँगो थे, छाडीता और यीशु तिना री इच्छा रे मुताबिक तिना रे आथो रे देई ते। 26 जेबे सेयो यीशुए खे नीणे लगी रे थे, तेबे तिने शमोन नाओ रा एक कुरेनी माणू, जो दूजे गांव ते आऊणे लगी रा था, तेसी बखते से तिसिये निकलेया, पकड़ी की तेस पाँदि क्रूस लादी ता, ताकि एसखे यीशुए पीछे लयी चलो। 27 तेबे लोका री बड़ी पीड तिना पीछे चली पड़ी और मुखती जवाणसा बी, जो तिना पीछे रोओ थिया और छाती पीटो थिया। 28 यीशुए तिना खे मुड़ी की बोलेया, “ओ यरूशलेमो री बेटियो! माखे नि रोओ, बल्लिक आपू और आपणे बालका खे रोओ जो तुसा साथे ऊणे वाला ए 29 कऊँकि सेयो दिन आऊणे, जेबे बोलणा कि धन्य ए से जवाणसा जो बांझ ए और से गर्भ जिने बच्चे पैदा नि कित्ते और सेयो स्तन जिने दूद नि पलयाया। 30 तेस बखते तिना पाहड़ो ते बोलणा कि आसा पाँदि आयी जाओ और टिलेया खे कि आसा खे टखी देओ। 31 “कऊँकि जेबे सेयो अरेया डाला साथे एड़ा करोए, तो सूकेया साथे क्या कुछ नि करेया जाणा।” 32 सिपाई यीशुए साथे दो ओर माणूआ खे जो कुकर्मी थे, काणे खे लयी चले। 33 तेबे सेयो तेते जगा रे जेतेखे खोपड़ी बोले थे, पऊँछे, तेबे तिने तेती यीशु और सेयो दो जणे जो कुकर्मी थे, एक दाँणे कनारे और दूजा खूँजे कनारे क्रूसो पाँदि चढ़ाए। 34 तेबे यीशुए बोलेया, “ओ पिता! इना खे माफ कर, कऊँकि यो नि जाणदे कि क्या लगी रे करने?” और तिने चिट्ठिया पायी की तिना रे टाले बांडी ते। 35 लोक खडे-खडे देखणे लगी रे थे और अधिकारी बी मजाक करी-करी की बोलो थे, “इने ओर बचाए, जे ये परमेशरो रा मसीह ए और तेसरा चूणे राए, तो आपणे आपू खे बचाई लो।” 36 सिपाई बी नेड़े आओ थे और सिरका देई की तिना रा मजाक करी की बोले थे, 37 “जे तूँ यहूदिया रा राजा ए, तो आपू खे बचा।” 38 तिना पाँदि एक दोष-पत्र बी था लगे रा कि, “ये यहूदिया रा राजा ए।” 39 जो कुकर्मी लटाकाई राखे थे, तिना बीचा ते एकी जणे यीशुए री निन्दा करी की बोलेया, “क्या तूँ मसीह नि ए? तो आपू और आसा खे बचा।” 40 तेबे दूजे जणे तेसखे बकी की बोलेया, “क्या तूँ परमेशरो रा डर पनि मानदा? तूँ बी तो सेई सजा पुणतणे लगी रा। 41 आसे तो न्याय रे मुताबिक सजा पाणे लगी रे, कऊँकि आसे आपणे कामो रा अच्छा फल लगी रे पाणे, पर इने कोई बी बुरा काम नि कित्तेया।” 42 तेबे तिने बोलेया, “ओ यीशु! जेबे तूँ आपणे राज्य रे आए, तो मेरी सम्बाल बी लयी लया।” 43 तिने तेसखे बोलेया, “आऊँ ताखे सच लगी रा बोलणे कि तूँ आज ई मां साथे स्वर्गलोको रे ऊणा।” 44 और तकरीबन दोपईरो रे तीजे पईरो तक सारे देशो रे न्हारा ऊईगा। 45 और सूरजो रा प्रयासा चली गा, तेबे मन्दरो रा पड़दा पाँदि ते लई की थालो तक फटीगा और तिजी रे दो टुकडे ऊईगे। ए ये दखाओ कि एबे कोई माणू परमेशरो री हजुरिया रे जाई सकोआ। 46 तेबे यीशुए जोरे की बोलेया, “ओ पिता! आऊँ आपणी आत्मा तुसा रे आथो रे सम्बालूँआ और ये बोली की तिने प्राण छाडी ते।” 47 सूबेदारो जो कुछ ऊई रा था देखी की परमेशरो री तारीफ किती और बोलेया, “सच्ची ये माणू तर्मा था।” 48 तेबे पीड जो ये देखणे खे कट्टी ऊई री थी, ये घटना देखी की छाती पिटदी ऊई

वापस ऊईगी। 49 पर तिनारे सब जाण-पछयाण वाले और जो जवाणसा गलील प्रदेशो ते तिनारे साथे आयी रिया थिया, दूर खडिया ऊई की ये सब देखणे लगी री थिया। 50 तेती यूसुफ नाओं रा बडी सभा रा एक सदस्य था, जो पला और तर्मी मांण था 51 और तिनारे योजना और तिनारे इना कामो ते खुश नि था। से यहुदिया रे नगर अरिमतियाह रा रणे वाला था और परमेशरो रे राज्य री बाट न्यालने वाला था। 52 तिनारे पिलातुसो गे जाई की यीशुए री लोथ मांगी। 53 और से उतारी की मलमलो री चादरी रे लपेटी और कन्ना रे राखी, जो चट्टानी रे खणी राखी थी और तिदे कदी कोई नि राखी राखेया था। 54 से त्यारिया रा दिन था और आरामो रा दिन शुरू ऊणे वाला था। 55 तिनारे जवाणसे जो गलीलो ते तिनारे साथे आयी री थिया, पीछे-पीछे जाई की से कन्न देखी और ये बी कि तिनारे लोथ कियॉं थीं राखी री। 56 तेबे तिनारे आपणे कअरे वापस आयी की खुशबूदार चीजा और इत्र यीशुए रे शरीरो पाँदे मलने खे त्यार कित्तेया और आरामो रे दिने तिनारे आज्ञा रे मुताबिक आराम कित्तेया।

24 तेबे सेयो अफ्रते रे पईले दिने प्यागा-प्यागा खुशबूदार चीजा जो तिनारे त्यार कित्तिया थिया, कन्ना पाँदे लयी की आईया। 2 तिनारे पात्थर कन्ना पाँदा ते कनारे पाँदे खसकेया रा देखेया। 3 पर पीतरे जाई की यीशुए री लोथ नि पायी। 4 जेबे सेयो एसा गल्ला ते हैरान ऊणे लगी री थिया, तेबे दो मांण सूफेद टाले पईनी की तिनारे सामणे खडे ऊईगे, मतलब दो स्वर्गदूत एकदम आयी तिनारे सामणे खडे ऊईगे। 5 जेबे सेयो डरी गिया और तरतिया कनारे खे मूँ जूँगेया रा राखेया, तेबे तिनारे तिनारे खे बोलेया, “तुसे जिऊँदे खे मरे रेया बीचे कऊँ लगी रिया टोलने? 6 से एती निए बलिक जिऊँदा ऊईगा या, याद करो कि तिनारे गलीलो रे रंदे ऊए तुसा खे बोलेया था, 7 जरूरी ए कि आऊँ माणूँ रा पुत्र पापिया रे आथो रे पकड़वाया जाओ और क्रूसो पाँदे लटकाया जाओ और तीजे दिने जिऊँदा ऊई जाओ।” 8 तेबे यीशुए रिया गल्ला तिनारे खे याद आईया। 9 तेबे तिनारे कन्ना ते वापस ऊई कि तिनारे ग्यारा जणेया खे और ओरी सबी खे, यो सब गल्ला बताईया। 10 जिने प्रेरिते यो सब गल्ला बोलिया, सेयो, मरियम मगदलनी, यूहन्ना और याकुबो री आम्मा मरियम और तिनारे साथलिया ओर बी जवाणसा थिया। 11 पर तिनारे खे तिनारे री गल्ला काणियां जेडिया लगीया और तिनारे तिनारे रा विश्वास नि कित्तेया। 12 तेबे पतरस उठी की कन्ना आओखे दौडी की चली गा और तिनारे नपी की बस टाले ई पड़े रे देखे और जो ऊआ था तिजी ते हैरान ऊई की कअरो खे चली गा। 13 तेबे तेसी दिने तिनारे बीचा ते दो चले इम्माऊस नाओं रे गांव खे जाणे लगी रे थे, जो यरूशलेमो ते तकरीबन ग्यारा किलोमीटर दूर था। 14 सेयो इना सबी गल्ला खे, जो ऊई रिया थिया, आपू बीचे बातचीत करदे ऊए चली रे थे 15 और जेबे सेयो आपू बीचे बातचीत और पूछताछ करने लगी रे थे, तेबे यीशु आपू तिनारे साथे-साथे चलणे लगे। 16 पर तिनारे री आखिया एडिया बंद करी ती थिया कि सेयो तिनारे खे पछयाणी नि सके। 17 यीशुए तिनारे पूछेया, “यो केडिया गल्ला ए, जो तुसे चलदे-चलदे ऊए आपू बीचे करने लगी रे?” सेयो उदास जे खडे रे रई गे। 18 ये सुणी की तिनारे बीचा ते क्लियुपास नाओं रे मांणए बोलेया, “क्या तूँ यरूशलेमो रे कल्ला परदेशी ए, जो जाणदा नि कि आजकाल तेती क्या ऊई रा?” 19 तिनारे तिनारे पूछेया, “कुण जीया गल्ला?” तिनारे बोलेया, “यीशु नासरियो रे बारे रे, जो परमेशर और सबी लोका रे नेडे काम और वचनो रे सामर्थी भविष्यबक्ता था 20 और बडे पुरोईत और म्हारे अधिकारिए से पकड़वाईता, ताकि तेसखे मौता री सजा दिती जाओ और से क्रूसो पाँदे चढ़ाया। 21 पर आसा खे उम्मीद थी कि एस ई इस्राएलो खे छुटकारा देगा और इना सबी गल्ला ते अलावा एसा घटना खे आज तीजा दिन ए। 22 और एबे आसा बीचा ते बी कई जवाणसे आसे हैरानिया रे पायी ते रे, जो आज प्यागा कन्ना पाँदे गईया थिया 23 और जेबे तेसरी लोथ नि मिली, तेबे ये बोलदिया ऊईया आईया कि आसे स्वर्गदूता रा दर्शन पायी राखेया, जिने आसा गे बताया कि यीशु जिऊँदा ए। 24 तेबे आसा रे साथिया बीचा ते कई जणे तेती गये और जेडा

तिने जवाणसे बोलेया था, तेडा ई पाया, पर से नि देखेया।” 25 तेबे यीशुए तिनारे दो चलेया खे बोलेया, “ओ मूखों! और भविष्यबक्तेया रिया सबी गल्ला रे विश्वास करने रे मंदबुधियो! 26 क्या ये जरूरी नि था कि मसीह एस दुः खो ते बाद आपणी महिमारे आओ?” 27 तेबे तिनारे मूसे ते और सबी भविष्यबक्तेया ते शुरूओ ते और सारे पवित्र शास्त्रा बीचा ते, आपणे बारे रे लिखी रिया सबी गल्ला रा मतलब तिनारे खे समजयाई ता। 28 तदुओ कि सेयो तेस गांव रे पऊँछी गे, जेती सेयो जाणे लगी रे थे और यीशुए रे चलणे ते एडा लगे था कि सेयो आगे जाणा चाओए। 29 पर तिनारे सेयो ये बोली की रोके, “आसा साथे रओ, कऊँकि साँज ऊईगी री।” तेबे सेयो तिनारे साथे पीतरे रणे खे चली गे। 30 जेबे यीशु तिनारे साथे रोटी खाणे बैठे, तेबे तिनारे रोटी तोडी की धन्यवाद कित्तेया और तोडी की तिनारे खे देणे लगेया। 31 तेबे तिनारे री आखिया खुली गिया और तिनारे सेयो पछयाणी ले, तेबे यीशु तिनारे लूकी गे। 32 तिनारे आपू बीचे बोलेया, “जेबे से बाटा रे आसा साथे गल्ला करने लगी रा था और पवित्र शास्त्रो रा मतलब आसा खे समजयाणे लगी रा था, तेबे क्या आसा रे मनो रे उतेजना नि ओ थी?” 33 सेयो तेसी बखते उठी की यरूशलेमो खे वापस ऊईगे, और तिनारे ग्यारा चलेया खे और तिनारे रे साथिया खे कट्टे देखेया। 34 सेयो बोली थे, “प्रभु सच्ची जिऊँदे ऊईगे रे और शमीन पतरसो खे दिशेया।” 35 तेबे तिनारे बाटा रिया गल्ला तिनारे खे बताई तिया और ये बी कि तिनारे रोटी तोडदे बखते सेयो कियॉं पछयाणे? 36 सेयो इना गल्ला करने ई लगी रे थे कि यीशु आपू ई तिनारे बीचे खडे ऊईगे और तिनारे खे बोलेया, “तुसा खे शान्ति मिलो।” 37 पर सेयो कबराई गे, डरी गे और समजणे लगे कि केसी पूतो खे देखणे लगी रे। 38 यीशुए तिनारे खे बोलेया, “कबराणे कऊँ लगी रे? और तुसा रे मनो रे शक कऊँ ए? 39 मेरे आथा खे और मेरे पैरा खे देखो कि आऊँ सेईए, माखे छुँई की देखो, कऊँकि आत्मा रे आड्ड और मांस नि ऊँदे, जेडा माँदे देखणे लगी रे।” 40 ये बोली की तिनारे आपणे आथ पैर तिनारे गे बताए। 41 जेबे खुशिया रे मारे तिनारे खे विश्वास नि ऊआ कि यीशु जिऊँदा ऊईगा रा और हैरान ऊईगे, तेबे यीशुए बोलेया, “क्या एती तुसा गे कुछ रोटी आयी।” 42 तिनारे तिनारे पूजी रिया मछलिया रा टुकड़ा दित्तेया। 43 तिनारे लयी की तिनारे सामणे खया। 44 तेबे यीशुए तिनारे खे बोलेया, “यो मेरिया सेयो गल्ला ए, जो मैं तुसा साथे रंदे ऊए, तुसा खे बोली थिया, कि जरूरी ए कि जितणिया गल्ला मूसे रा बिधान और भविष्यबक्ता और पजनो री कताबा रे मेरे बारे रे लिखी राखिया, सेयो सब पुरिया ओ।” 45 तेबे यीशुए पवित्र शास्त्र समजणे खे तिनारे खे अक्ल दिती 46 और तिनारे खे बोलेया, “पवित्र शास्त्रो रे ईयां लिखी राखेया कि मसीहे दुः ख उठाणा और तीजे दिने मरे रेया बीचा ते जिऊँदा ऊणा 47 और यरूशलेम नगरो ते लयी की सबी जातिया खे मन फिराणे रा और पापो रिया माफिया रा प्रचार, तेसरे ई नाओं ते कित्तेया जाणा। 48 तुसे इना सबी गल्ला रे गवा ए 49 और देखो, मां आपू पवित्र आत्मा पेजणी जेतेरी प्रतिज्ञा मेरे पिते करी राखी और जदुओ तक स्वर्गो ते सामर्थ नि पाओ, तदुओ तक एस नगरो रेई रओ।” 50 तेबे यीशु तिनारे खे बैतनिय्याह नगरो तक बारे लईगे, और आपणे आथ चकी की तिनारे खे आशीष दिती। 51 और तिनारे खे आशीष देदे ऊए सेयो तिनारे ते लग ऊईगे और स्वर्गो खे चकी ते। 52 तेबे चले तिनारे गे माथा टेकी की और बडिया खुशिया साथे यरूशलेमो खे वापस ऊईगे। 53 और हर रोज मन्दरो रे आजीर ऊई की परमेशरो री स्तुति करेया करो थे।

यूहन्ना

1 सृष्टिया ते पईले वचन था, वचन परमेशरो साथे था और वचन परमेशर था। 2 येईं शुरूओ ते परमेशरो साथे था। 3 परमेशरे सब कुछ तेसरी जरिए पैदा कितेया और जो कुछ पैदा ऊई रा, तिना बीचा ते कोई बी चीज तेसते बिना नि ऊई। 4 तेसदे जीवन था और से जीवन माणुआ री जोति थी। 5 जोति न्हरे रे चमकदी रई; पर न्हरेा तिजी पॉई हावी नि ऊई सकेया। 6 परमेशरे एक माणु पजेया, जेसरा नाओं यूहन्ना था। 7 से तेसा ई जोतिया री गवाई देणे आया, ताकि सब तेसरी बजाअ ते विश्वासो रे आओ। 8 यूहन्ना आपू तो, से जोति नि था, पर तेसा जोतिया री गवाई देणे आयी रा था। 9 सच्ची जोति जो हर एक माणुए खे प्रयासा देओई, से आपणे आपू खे दुनिया रे लोका पॉई प्रकट करने वाली थी। 10 से दुनिया रे था और दुनिया तेसरे जरिए पैदा ऊई, पर दुनिया रे लोके से नि पछयाणा। 11 से आपणे कअरे आपणे लोका बीचे आया पर तेसरे आपणेया से नि मानेया। 12 पर जितणेया से मानेया, तिना खे तिने परमेशरो री ल्वाद ऊणे रा अक्क दितेया। मतलब-जो तेसरे नाओं पॉई विश्वास राखो थे। 13 सेयो ना तो खूनो ते, ना शरीरो री इच्छा ते, ना माणुए री इच्छा ते, पर परमेशरो ते पैदा ऊई रे। 14 और वचन माणु रे शरीरो रे आया और कृपा और सच्चाईया ते परिपूर्ण ऊई की आसा बीचे डेरा कितेया और आसे तेसरी एडी महिमा देखी, जेडी पिते रे एकलौते री महिमा। 15 यूहन्ने तेसरे बारे रे गवाई दिती और आक्का पाई की बोलेया, “से येईए, जेसरे बारे रे मैं बोलेया कि जो मांते बाद आऊणे लगी रा, से मांते बढ़ी की ए, कऊँकि से मांते पईले था।” 16 कऊँकि तेसरी कृपा री परिपूर्णता बीचा ते आसा सबी खे आशीषा पॉई आशीष मिली। 17 तेबेई परमेशरे बिधान तो मुसे रे जरिए दितेया, पर तिने यीशु मसीह रे जरिए कृपा और सच्चाई दखाई। 18 परमेशर कदी बी किने नि देखेया, केवल एकलौता पुत्रे, जो सच्ची ई आपू परमेशर ए, और जो पिते री गोदा रे ए, तिने ई ये प्रगट कितेया कि परमेशर केड़ा ए। 19 जेबे यहूदी अगुवे यरूशलेम नगरो ते पुरोईत और लेविया खे यूहन्ना ते ये पूछणे खे पेजेया, “तूँ कुण ए?” तो यूहन्ने गवाई दिती, 20 “आऊँ मसीह नि ए।” 21 तेबे तिने तेसते पूछेया, “तेबे तूँ कुण ए? क्या तूँ एलिव्याह भविष्यवक्ता ए?” तिने बोलेया, “आऊँ नि ए।” “तेबे तूँ क्या भविष्यवक्ता ए?” तिने बोलेया, “ना।” 22 तेबे तिने तेसते पूछेया, “तेबे तूँ कुण ए? ताकि आसे आपणे पेजणे वालेया खे जवाब देऊँ, तूँ आपणे बारे रे क्या बोलेया?” 23 यूहन्ने तिना लोका खे यशयाह भविष्यवक्ते रे वचना रा इस्तेमाल करी की बोलेया, “आऊँ सुणसाण जगरे एक आक्का पाणे वाले री आवाज ए, ताकि तुसे प्रभुए री बात सीदी करो।” 24 सेयो फरीसिये री तरफा ते पेजी राखे थे। 25 तिने तेसते ये सवाल पूछेया, “जे तूँ ना तो मसीह ए, ना एलिव्याह और ना भविष्यवक्ता ए, तो बपतिस्मा कऊँ देआ?” 26 यूहन्ने तिना सबी खे जबाब दितेया, “आऊँ तो पाणिण की बपतिस्मा देऊँआ, पर तुसा बीचे एक माणु खड़ी रा, जेसखे तुसे नि जाणदे। 27 मतलब-मांते बाद आऊणे वाला ए, जेसरे जोड़े रे फिथे बी आऊँ खोलणे जोगा नि ए।” 28 यो गल्ला यरदन नदिया ते पार बैतनिय्याह गांव रे ऊईया, जेती यूहन्ना लोका खे बपतिस्मा देओ था। 29 दूजे दिने तिने यीशुए खे आपू गे आऊँडे ऊए देखी की बोलेया, “देखो, ये परमेशरो रा मिन्दू ए, जो दुनिया रे पाप चकी की लयी जाओआ। 30 ये सेईए, जेसरे बारे रे मैं बोलेया था कि एक मर्द मां पीछे आओआ, जो मांते बी बड़ा ए, कऊँकि से मांते पईले था। 31 आऊँ तो तेसखे पछयाणुँ नि था कि से मसीह ए, पर आऊँ इजी री खातर पाणिण की बपतिस्मा देँदा ऊआ आया, ताकि से इस्त्राएलो रे प्रगट ऊई जाओ।” 32 यूहन्ने ये गवाई दिती, “जियाँ कबूतर उड़दा ऊआ थाले आओआ तियाँ ई तिने पवित्र आत्मा सर्गो ते उतरदे ऊए देखेया। और से तेस पॉई रूकी गा। 33 आऊँ तो तेसखे पछयाणुँ नि था, पर जिने आऊँ पाणिण साथे बपतिस्मा देणे खे पेजेया, तिने ई मांगे बोलेया, “जेस पॉई तूँ आत्मा खे उतरदे ऊए और रुकदे ऊए देखेगा, सेई पवित्र आत्मा ते बपतिस्मा देणे वाला

ए।” 34 मैं से देखेया और आऊँ तुसा खे सच-सच बोलूँआ कि येईं परमेशरो रा पुत्र ए।” 35 दूजे दिने फेर यूहन्ना और तेसरे चेलेया बीचा ते दो जणे खड़ी रे थे। 36 और तिने यीशुए खे, जो जाणे लगी रा था, देखी की बोलेया, “देखो, ये तो परमेशरो रा मिन्दू ए।” 37 तेबे सेयो दोनो चले तेसते ये सुणी की यीशुए पीछे चली पड़े। 38 यीशुए तिना खे आऊँडे ऊए देखी की पीछे मुडी की बोलेया, “तुसे केसखे लगी रे टोलने?” तिने तिना खे बोलेया “ओ गुरु! तुसे केयी रओए?” 39 यीशुए बोलेया, “चलोगे तो देखी लओगे।” तेबे तिने आयी की तिना रे रणे री जगा देखी और तेस दिने तिना साथे ई रये और ये दोपईरो ते बाद तकरीबन चार बजे रे करीब था। 40 तिना दूँई बीचा ते, जो यूहन्ने री गल्ल सुणी की तिना पीछे आए थे तिना बीचा ते एक शमोन पतरसो रा पाई अन्द्रियास था। 41 तिने पईले आपणे सके पाई शमोनो खे मिली की बोलेया, “आसा खे ख्रीस्ट, मतलब मसीह, मिली गा।” 42 अन्द्रियास तेसखे यीशुए गे ल्याया, यीशुए तेसखे देखी की बोलेया, “तूँ यूहन्ने रा पाऊ शमोन ए, तूँ कैफा नाओं ते जाणेया जाणा,” या पतरस जेतेरा मतलब पात्थर ऊणा। 43 दूजे दिने यीशुए गलील प्रदेशो खे जाणा चाया। जेबे फिलिप्पुस तिना खे मिलेया तो तेसखे बोलेया, “मां पीछे आईगा।” 44 फिलिप्पुस, अन्द्रियास और पतरसो रे नगर बैतसैदा रा रणे वाला था। 45 फिलिप्पुसे नतनएलो ते मिली की बोलेया, “जेसरे बारे रे मूसे बिधानो रे और भविष्यवक्ते बोली राखेया, से आसा खे मिली गा रा, से यूसुफो रा पाऊ यीशु नासरी ए।” 46 नतनएले तेसखे बोलेया, “क्या कोई खरी चीज बी नासरतो ते निकली सकोई?” फिलिप्पुसे तेसखे बोलेया, “चली की देखी लो।” 47 यीशुए नतनएलो खे आपू गे आऊँडे ऊए देखी की तेसरे बारे रे बोलेया, “देखो, ये सच्ची इस्त्राएली ए, एसरे कोई कपट नि ए।” 48 नतनएले तिना खे बोलेया, “तूँ मांखे कियॉ जाणेया?” यीशुए तेसखे जवाब दितेया, “इजी ते पईले फिलिप्पुसे तूँ बुलाया, जेबे तूँ दाऊगले रे डालो निठे था, तेबे मैं तूँ देखेया था।” 49 नतनएले तिना खे जवाब दितेया, “ओ गुरु! तूँ परमेशरो रा पुत्र ए, तूँ इस्त्राएलो रा महाराजा ए।” 50 यीशुए तेसखे उतर दितेया, “मैं जो ताखे बोलेया कि मैं तूँ दाऊगले रे डालो निठे देखेया, क्या तूँ तेबेई विश्वास करेया? तां इजी ते बी बड़े-बड़े काम देखणे।” 51 फेर तेसखे बोलेया, “आऊँ ताखे सच-सच बोलूँआ कि तां स्वर्ग खुलेया रा और परमेशरो रे स्वर्गदूत माणु रे पुत्रो पॉई उतरदे और ऊबे जाँदे ऊए देखणे।”

2 तीजे दिने गलील प्रदेशो रे काना नगरो रे केसी रा ब्या था और यीशुए री आम्मा बी तेती थी। 2 यीशु और तिना रे चले बी तेती ब्याओ खे बुलाई राखे थे। 3 जेबे अँगूरा रा रस कम ऊईगा, तेबे यीशुए री आम्मे तिना खे बोलेया, “तिना गे अँगूरा रा रस नि रया।” 4 यीशुए तेसा खे बोलेया, “ओ जवाणसे! ताखे मांते क्या काम ए? एबु मेरा आपणे आपू खे प्रकट करने रे बखत नि आयी रा।” 5 पर तिना री आम्मे दासा खे बोलेया, “जो कुछ ये तुसा खे बोलेगा, सेई करना।” 6 तेती यहूदिया री शुद्ध करने री रवाजा रे मुताबिक, पात्थरा रे छे बड़े कअड़े राखे रे थे, जिना रे दो-दो और तीन-तीन मण आओ था। 7 यीशुए दासा खे बोलेया, “कअडेया रे पाणी परी देओ।” तिने परी-परी करी ते। 8 यीशुए तेस दासो खे बोलेया, “एबे इजी बीचा ते थोड़ा पाणी निकयाली की पाट्टिया (भोज) रे प्रदानो गे लयी जाओ और तिने दासे एड़ा ई कितेया।” 9 जेबे पाट्टिया रे प्रदाने से पाणी चाखेया, जो अँगूरा रा रस बपीणा था, पर ये नि जाणो था कि केथा ते आया (पर जिने दासे पाणी निकयालेया था, सेयो जाणो थे) तेबे पाट्टिया रे प्रदाने लाड़े खे बुलाई की तेसखे बोलेया, 10 “हर एक माणु पईले बढिया अँगूरा रा रस देओआ और जेबे लोक पी की थकी जाओए, तेबे आदा देओआ, पर तँ बढिया अँगूरा रा रस एबुए तक राखी राखेया।” 11 यीशुए गलील प्रदेशो रे काना नगरो रे आपणा ये पईला चिह्न दखाई की आपणी महिमा प्रगट कित्ती और तिना रे चेलेया तिना पॉई विश्वास कितेया कि सच्ची येईं ई मसीह ए। 12 इजी ते बाद यीशु, तिना री आम्मा, तिना रे पाई और तिना रे चले कफरनहूम नगरो खे गये और तेती कुछ दिन तक रये। 13 यहूदिया रा फसह रा त्योआर नेडे

था और यीशु यरूशलेम नगरो खे गये। 14 तेबे तिने मन्दरो रे बलद, पेड, और कबूतरा खे बेचणे वाले और सरफि बैठे रे देखेया। 15 तेबे तिने रस्सिया रा कोडा बणाई की सब पेडा और बलद मन्दरो ते बारे निकयाली ते और सरफि रे पैसे बखेरी ते और चौकिया मूँदिया करी तिया 16 और कबूतरा खे बेचणे वालेया खे बोलेया, “इना खे एथा ते लयी जाओ, मेरे पिते रे कअरो खे बपारो रा कअर नि बणाओ।” 17 तेबे तिना रे चलेया खे याद आया कि पवित्र शास्त्रो रे लिखी राखेया, “तेरे कअरो री चिन्ता आऊँ पिते-पितेरे ई खाई जाणा” 18 तेबे यहूदिये तिना खे बोलेया, “तूँ जो ये करेया, तो आसा खे क्या चिह्न दखाएया?” 19 यीशुए तिना खे जवाब दित्तेया, “एस मन्दरो खे टाली देओ और मां ये तीन दिना रे फेर खड़ा करी देणा।” 20 यहूदिये बोलेया, “एस मन्दरो खे बानाणे खे छयाली साल लगी रे और क्या तां ये तीन दिना रे फेर खड़ा करी देणा?” 21 पर तिने आपणे शरीरो रे मन्दरो रे बारे रे बोलेया था। 22 तो जेबे सेयो मुड्दिया बीचा ते जिऊँदे ऊईगे थे, तेबे तिना रे चलेया खे याद आया कि तिने ये बोलेया था और तिने पवित्र शास्त्रो पाँदे और जो वचन यीशुए बोलेया था, विश्वास कित्तेया। 23 जेबे सेयो फसह रे त्योआरो रे बखते यरूशलेमो रे थे, तेबे बऊत जणेया, सेयो चिह्न, जो सेयो दखाओ थे, देखी की तिना पाँदे विश्वास कित्तेया। 24 पर यीशुए आपणे आपू खे तिना रे परोसे नि छाडेया, कऊँकि सेयो सबी खे जाणो थे 25 और तिना खे जरूरत नि थी कि मांणूए रे बारे रे कोई गवाई देओ, कऊँकि सेयो आपू जाणो थे कि मांणूए रे मनो रे क्या ए?

3 फरीसिया बीचा ते एक नीकुदेमुस नाओं रा मांणू था, जो यहूदिया रा धार्मिक अगुवा था। 2 तिने राती आयी की यीशुए खे बोलेया, “ओ गुरु! आसे जाणूए कि तूँ परमेशरो री तरफा ते गुरु ऊई की आयी रा, कऊँकि कोई बी इना चमत्कारा खे, जो तूँ दखाएया, जे परमेशर तेस साथे नि ओ, तो दखाई नि सकदा।” 3 यीशुए तेसखे बोलेया, “आऊँ ताखे सच-सच बोलूँआ कि जे कोई नये सिरे ते नि जम्मो, तो परमेशरो रा राज्य जेती परमेशर राज करेओ देखी नि सकदा।” 4 नीकुदेमुसे तिना खे बोलेया, “जेबे मांणू स्याणा उई गा, तेबे कियँ जम्मी सकेओ? क्या से आपणी आम्मा रे गर्भो रे दूजी बार जाई की जम्मी सकेओ?” 5 यीशुए बोलेया, “आऊँ ताखे सच-सच बोलूँआ कि जदुओ तक कोई मांणू पाणी और आत्मा साथे नि जम्मो, तो से परमेशरो रे राज्य रे नि जाई सकदा। 6 कऊँकि जो शरीरो साथे जम्मी रा, से शरीर ए और जो आत्मा साथे जम्मी रा, से आत्मा ए। 7 हैरान नि ओ कि मैं ताखे बोलेया, ‘तुसा खे नये सिरे ते जमणा जरूरी ए।’ 8 अवा जेथो खे चाओ, तेथो खे चलो ई और तूँ तिजी री छेड़ सुणेया, पर जाणदा नि कि से केथा ते आयी री और केथो खे जाओई? जो कोई आत्मा ते जम्मी रा, से एडा ईए।” 9 नीकुदेमुसे तिना खे बोलेया, “यो गल्ला कियँ ऊई सकेओईया?” 10 ये सुणी की यीशुए तेसखे उतर दित्तेया, “तूँ इस्राएलिया रा गुरु ऊई की बी क्या इना गल्ला खे नि समजदा? 11 आऊँ ताखे सच-सच बोलूँआ कि आसे जो जाणूए, से बोलूँए और जो आसे देखी राखेया, तिजी री गवाई देऊँए, और तुसे म्हारी गवाई नि मानदे। 12 जेबे मैं तुसा गे तरतिया रिया गल्ला बोलीया और तुसे विश्वास नि कित्तेया, तो जे आऊँ तुसा गे स्वर्गो रिया गल्ला बोलूँ, तो तुसा कियँ विश्वास करना। 13 कोई स्वर्गो रे नि चढ़ेया, बस से जो स्वर्गो ते उतरेया, मतलब आऊँ माणू रा पुत्र जो स्वर्गो रे ए। 14 और जेते टंगो रे मूसे जंगलो रे पीतलो रा साप ऊच्ये पाँदे चढ़ाया था, तियँ ई जरूरी ये कि आऊँ माणू रा पुत्र बी ऊच्ये पाँदे चढ़ाया जाओ। 15 ताकि जो कोई मां पाँदे विश्वास करो, से अनन्त जीवन पाओ। (aiōnios g166) 16 “कऊँकि परमेशरे दुनिया रे लोका ते एडा प्यार कित्तेया कि तिने आपणा एकलौता पुत्र देईता, ताकि जो कोई तेस पाँदे विश्वास करो, से नाश नि ओ, पर अनन्त जीवन पाओ। (aiōnios g166) 17 परमेशरे आपणा पुत्र दुनिया रे इजी खे नि पेजेया कि से दुनिया पाँदे दण्डो री आज्ञा देओ, पर इजी खे कि दुनिया रे लोक तेसरी बजअ ते उद्धार पाओ। 18 जो मां पाँदे विश्वास करोओ, तेस पाँदे दण्डो री आज्ञा नि ऊँदी, पर जो मां पाँदे विश्वास नि करदा, से दोषी

ठईरी चुकेया, कऊँकि तिने परमेशरो रे एकलौते पुत्रो रे नाओं पाँदे विश्वास नि कित्तेया। 19 और दण्डो री आज्ञा री बजअ ये कि जोति दुनिया रे आयी री और मांणूआ खे न्हारा जोतिया ते प्यारा लगेया, कऊँकि तिना रे काम बुरे थे। 20 कऊँकि जो कोई बुराई करेओ, से जोतिया ते बैर राखेओ और जोतिया रे नेडे नि आऊँदा, एडा नि ओ कि तेसरे कामो पाँदे दोष लगाया जाओ। 21 पर जो सच्चाईया पाँदे चलोआ, से जोतिया रे नेडे आओआ, ताकि तेसरे काम सामणे आओ कि सेयो परमेशरो री तरफा ते ऊई रे।” 22 इजी ते बाद यीशु और तिना रे चले यहूदिया प्रदेशो रे आए और यीशु तेती तिना साथे रई की बपतिस्मा देणे लगे। 23 यहून्ना बी सामरिया प्रदेशो रे शालेम नगरो रे नेडे, एनीन गांव रे बपतिस्मा देओ था, कऊँकि तेती बऊत पाणी था और लोक आयी की बपतिस्मा लओ थे। 24 यहून्ना तेस बखतो तक जेला रे नि पायी राखेया था। 25 तेती यहून्ने रे चलेया रा केसी यहूदिये साथे शुद्ध करने री रवाजा रे बारे रे बईस उई। 26 तेबे यहून्ने रे चलेया आयी की तेसखे बोलेया, “ओ गुरु! जो मांणू घरदरनो ते पार तां साथे था और जेसरे बारे रे तँ गवाई दित्ती थी, देखो, से बपतिस्मा देओआ और लोक तेसगे आओए।” 27 यहून्ने जवाब दित्तेया, “जदुओ तक मांणूए खे स्वर्गो ते नि दित्तेया जाओ, तदुओ तक से कुछ नि पायी सकदा। 28 तुसे तो आपू ई मेरे गवा ए कि मैं बोली राखेया, ‘आऊँ मसीह निए, पर तेसते आगे पेजी राखेया।’ 29 जेसरी लाडी ए, सेई लाडा ए, पर लाडे रा दोस्त जो खड़ा ऊई की तेसरी सुणोआ, लाडे रे बोलो ते बऊत खुश ओआ, एबे मेरी ये खुशी पूरी ऊई री। 30 जरूरी ए कि से बढदा जाओ और आऊँ कम ऊँदा जाऊँ। 31 “जो स्वर्गो ते आओआ, से सबी ते उत्तम ओआ, जो तरतिया ते आओआ, से तरतिया राए और तरतिया री गल्ला करोआ, जो परमेशरो री तरफा ते आओआ, से सबी ते ऊबे ए। 32 जो कुछ तिने देखेया और सुणेया, तेतेरी ई गवाई देओआ और कोई तेसरी गवाई नि मानदा। 33 पर जिने तेसरी गवाई मानी ली, तिने एते गल्ला पाँदे छाप देईती कि परमेशर सच्चा ए। 34 कऊँकि जो परमेशरे पेजी राखेया, से परमेशरो री गल्ला बोलीओ, कऊँकि परमेशर तेसखे आपणा आत्मा नापी-नापी की नि देँदा पर खुले दिलो ते देओआ। 35 पिता पुत्रो साथे प्यार राखेओ और तिने सारी चीजा तेसरे आथो रे देईती रिया। 36 जो परमेशरो रे पुत्रो पाँदे विश्वास राखेओ, अनन्त जीवन तेसरा ईए, पर जो परमेशरो रे पुत्रो री नि मानदा, तेस जीवन नि देखणा, पर परमेशरो रा रोष तेस पाँदे रओआ।” (aiōnios g166)

4 तेबे, जेबे यीशुए खे पता लगेया कि फरीसिये सुणी राखेया कि यीशु यहून्ने ते जादा चले बणाओआ और तिना खे बपतिस्मा देओआ। 2 हालाँकि यीशु आपू नि, पर तिना रे चले बपतिस्मा देओ थे। 3 तेबे सेयो यहूदिया प्रदेशो खे छाडी की फेर गलील प्रदेशो खे चली गे 4 और तिना खे सामरिया प्रदेशो रिये ऊई की जाणा पड़ेया। 5 तेबे सेयो सूखार नाओं रे सामरिया प्रदेशो रे एक नगरो तक आए, जो तेसा जमीना रे नेडे ए, जो याकूबे आपणे पाऊ यूसफो खे दित्ती थी 6 और से कूँआं बी जो याकूबे खणेया था, तेथी था। तेबे यीशु बाटा रे थके रे तेस कुँए पाँदे ईयां ई बैठीया। ये गल्ल दोषईरो रे तकरीबन ऊई। 7 तदुओ की एक सामरी जवाणस पाणी परने आयी। यीशुए तेसा खे बोलेया, “माखे पाणी पलयाई दे।” 8 कऊँकि तिना रे चले नगरो रे रोटी खरीदणे जाई रे थे। 9 तेबे सामरी जवाणसे तिना खे बोलेया, “तूँ यहूदी ऊई की मां सामरिया जवाणसा ते पाणी कऊँ मांगेया?” कऊँकि यहूदी सामरिया साथे कोई बी मिलणा-बर्तणा नि राखे थे। 10 यीशुए जवाब दित्तेया, “जे तूँ परमेशरो रे बरदानो खे जाणदी और ये बी जाणदी कि से कुण ए, जो ताखे बोलीओ, ‘माखे पाणी पलया,’ तो तूँ तेसते मांगदी और से ताखे पवित्र आत्मा जीवनो रे पाणिए रे रूपो रे देँदा।” 11 जवाणसे तिना खे बोलेया, “ओ प्रभु! तुसा गे तो पाणी परने खे कुछ आया ई नि और कूँआं डूगा ए, तो तेबे से जीवनो रा पाणी तुसा गे केथा ते आया? 12 क्या तुसे म्हारे पिता याकूबो ते बी बडे ए, जिने आसा खे ये कूँआं दित्तेया और आपू बी आपणे बाल-बच्चेया साथे और डांगरा साथे तिजी ते पिया।”

13 यीशुए तेसा खे जवाब दितेया, “जेस केसी बी ये पाणी पीणा, से फेर त्याया ऊणा। 14 पर जो कोई तेस पाणिए ते पीओगा, जो मां तेसखे देणा, से कदी फेर अनन्तकालो तक त्याया नि ऊणा, बल्कि जो पाणी मां तेसखे देणा, से तेसरे एक सूबल बणी जाणी जो अनन्त जीवनों तक बईदी रणी।” (aiōn g165, aiōnios g166) 15 जवाणसे तिना खे बोलेया, “ओ प्रभु! से पाणी माखे दे ताकि आऊँ त्यायी नि रुऊँ और ना आऊँ पाणी परने खे इतणी दूर आऊँ।” 16 यीशुए तेसा खे बोलेया, “जा और आपणे लाड़े खे एती बुलाई की ली आओ।” 17 जवाणसे जवाब दितेया, “आऊँ बिना लाड़े तेई,” यीशुए तेसा खे बोलेया, “तूँ ठीक लगी री बोलणे कि आऊँ बिना लाड़े तेई। 18 कऊँकि तूँ पाँज लाड़े करी चुकी री और जेस माणूए साथे तूँ एबुए, से बी तेरा लाड़ा निए, ये तै सच बोली राखेया।” 19 जवाणसे तिना खे बोलेया, “ओ प्रभु! माखे लगेओ कि तुसे भविष्यबक्ता ए। 20 आसा रे बाप-दादे एस पाहडो पाँदे ई आराधना किती और तुसे बोलेए कि जेती भक्ति करनी चाईयो से जगा यरूशलेम ए।” 21 यीशुए बोलेया, “ओ जवाणसे! मेरी गल्ला पाँदे विश्वास कर कि से बखत आऊणा, जेबे ना तुसा एते पाहडो पाँदे पिते री भक्ति करनी और ना ई यरूशलेमो रे। 22 तुसे सामरी लोक जेसखे जाणदे नि, तेसरी भक्ति करोए और आसे यहूदी जेसखे जाणूए, तेसरी भक्ति करूँए, कऊँकि उद्धार आसा यहूदिया बीचा ते ए। 23 पर से बखत आऊणा, बल्कि एबु बीए, जेबे सच्चे भक्ता, पिते री भक्ति आत्मा और सच्चाईया साथे करनी, कऊँकि पिता आपू खे एड़े ई भक्ति करने वालेया खे टोलोआ। 24 परमेशर आत्मा ए, इजी खे जरूरी ए कि तेसरी भक्ति करने वाले आत्मा और सच्चाईया साथे भक्ति करो।” 25 जवाणसे तिना खे बोलेया, “आऊँ जाणूँ कि मसीह जेसखे ख्रिस्त बोलेए, आऊणे वाला ए, जेबे से आऊणा, तेबे तेस आसा खे सब गल्ला बताणिया।” 26 यीशुए तेसा खे बोलेया, “आऊँ जो ताखे बोलणे लगी रा, सेई ये।” 27 तदुओ तक तिना रे चले आईगे और हेरान ऊईगे कि सेयो जवाणसा साथे गल्ला करने लगी रे, तेबे बी किने नि बोलेया, “तूँ क्या चापेया?” या “तेसा साथे कऊँ लगी रा गलाणे?” 28 तेबे जवाणस आपणा कअड़ा छाडी की नगरो खे चली गी और लोका खे बोलणे लगी, 29 “आओ, एक माणूए खे देखो, जिने सब कुछ, जो मैं करी राखेया, माखे बताई ता, केथी येई तो मसीह तो निए?” 30 तेबे सेयो नगरो ते निकली की यीशुए खे देखणे खे तिना गे आऊणे लगे। 31 तदुओ खे यीशुए रे चले तिना ते बिनती करने लगे, “ओ गुफ! कुछ खाई लो।” 32 पर तिने तिना खे बोलेया, “मांगे खाणे खे एड़ी रोटी ए, जो तुसे नि जाणदे।” 33 तेबे चले आपू बीचे बोलणे लगे, “जेबे आसे चली गे थे तो क्या कोई गुरुए खे कुछ खाणे खे ल्याई राखेया?” 34 यीशुए तिना खे बोलेया, “मेरी रोटी ये कि आऊँ आपणे पेजणे वाले री इच्छा पाँदे चलूँ और तेसरा काम पूरा करूँ। 35 क्या तुसेई नि बोलदे कि बडाई ऊणे खे एबु चार मीने पड़े रे ए। देखो, आऊँ तुसा खे बोलूँआ कि आपणिया आखिया चकी की डोरूआ खे देखो, कि सेयो बाडणे खे पावकी चुके रे। 36 बाडणे वाला मजदूरी पाओआ और अनन्त जीवनों खे फल कट्टा करोआ, ताकि बाणे वाला और बाडणे वाला दोनो मिली की खुशी मनाओ। (aiōnios g166) 37 कऊँकि इजी पाँदे ये कहावत ठीक बैठो ई कि बाणे वाला ओर ए और बाडणे वाला ओर ए। 38 मैं तुसे तेस डोरूआ खे बाडणे खे पेजी राखे, जिदे तुसे मईणत नि करी राखी, ओरी मईणत किती और तुसे तिना री मईणता रे फलो रे इस्सेदार ऊए।” 39 तेस नगरो रे बऊत सामरिये तेसा जवाणसा रे कईणे पाँदे यीशुए पाँदे विश्वास किन्तेया, कऊँकि तेसे ये गवाई दिती थी, “तिने सब कुछ जो मैं करी राखेया, माखे बताई ता।” 40 तेबे जेबे सेयो सामरी यीशुए गे आए, तेबे तिना ते बिनती करने लगे कि आसा साथे एथी रओ, तेबे सेयो तेती दो दिन तक रये। 41 तिना रे उपदेश सुणी की ओरी बी कई जणे विश्वास किन्तेया। 42 तेबे तेसे जवाणसे बोलेया, “एबे आसे तुसा रे बोलणे तेई विश्वास नि करदे, कऊँकि आसे आपू सुणी राखेया और जाणूँए कि सच्ची, येई दुनिया रा उद्धारकर्ता ए।” 43 तेबे दो दिनो ते बाद सेयो तेथा ते निकली की गलीलो खे गये। 44 कऊँकि यीशुए आपू ई बोली राखेया कि भविष्यबक्ता आपणे देशो रे आदर

नि पाँदा। 45 जेबे सेयो गलीलो रे आये तेबे गलीली तिना साथे खुश ऊई की मिले, कऊँकि जितणे काम तिने यरूशलेमो रे त्योआरो रे बखते किन्ते थे, तिने सेयो सब देखे थे, कऊँकि सेयो बी त्योआरो खे जाई रे थे। 46 तेबे यीशु फेर गलील प्रदेशो रे काना गांव रे आए, जेती तिने पाणी अँगूरा रा रस बणाई ता था। तेती राजे रा एक कर्मचारी था, जेसरा पाऊ कफरनहूम नगरो रे बमार था। 47 जेबे तिने ये सुणेया कि यीशु यहूदिया ते गलीलो खे आईगा रा, तेबे से तिना गे गया और तिना ते बिनती करने लगेया कि चली की मेरे पाऊए खे ठीक करी दे, कऊँकि से मरने वाला ए। 48 यीशुए तेसखे बोलेया, “जदुओ तक तुसे चिह्न और अचम्बे काम नि देखी लओगे, तदुओ तक कदी बी विश्वास नि करी सकदे।” 49 राजे रे कर्मचारिये तिना खे बोलेया, “ओ प्रभु! मेरे पाऊए रे मरने ते पईले चलो।” 50 यीशुए तेसखे बोलेया, “जा, तेरा पाऊ जिऊँदा ए।” तिने माणूए यीशुए री बोली री गल्ला पाँदे विश्वास किन्तेया और चली गा। 51 से जेबे बाटा रेई था कि तदुओ खे तेसरे दास तेसखे मिली गे और बोलणे लगे, “तेरा पाऊ जिऊँदा और तन्दरूस्त ए।” 52 तिने तेसते पूछेया, “कुण जी कअडिया से ठीक ऊणे लगेया था?” तिने तेसखे बोलेया, “काल तकरीबन दोपईरो रे एक बजे रे करीब तेसरा बुखार उतरी गा था।” 53 तेबे से पिता समजी ए कि ये तेस बखते ई ऊआ, जेस बखते यीशुए तेसखे बोलेया था, “तेरा पाऊ जिऊँदा ए।” और तिने और तेसरे सारे करीबने यीशुए पाँदे विश्वास किन्तेया। 54 ये दूजा सामर्था रा काम था, जो यीशुए यहूदिया प्रदेशो ते आई कि गलील प्रदेशो रे दखाया।

5 इना गल्ला ते बाद यहूदिया रा एक त्योआर ऊआ और यीशु यरूशलेमो खे गये। 2 यरूशलेमो रे पेडा रे फाटको (प्रवेश द्वार) रे नेडे एक कुण्ड ए, जेतेखे इब्रानी पाषा रे बैतसैदा बोलेए और तिदे पाँज बरडे ए। 3 इना रे बऊत लंगडे, बमार, अन्दे और सूके रे अंग वाले पाणिए रे ईलणे री उम्मीदा दे पड़े रे रओ थे। 4 कऊँकि ठराए रे बखतो रे परमेशरो रे स्वर्गदूत कुण्डो रे उतरी की पाणिए खे ईलाया करो थे, पाणी ईलदे ई जो कोई पईले उतरो था, से ठीक ऊई जाओ था, चापे तेसरी कोई बी बमारी कऊँ नि ओ। 5 तेती एक माणू था, जो ठती साला ते बमार था। 6 यीशुए तेसखे पड़ेया रा देखी की और ये जाणी की कि से बऊत दिना ते एड़िया ई दशा रे ए, तेसते पूछेया, “क्या तूँ ठीक ऊणा चापेया?” 7 तिने बमारे बोलेया, “ओ प्रभु! मेरी मताद करने खे कोई माणू निए कि जेबे पाणी ईलाया जाओ, तो माखे कुण्डो रे उतारो, पर मेरे पऊँछणे ते पईले ई कोई दूजा मांते पईले ई उतरी जाओआ।” 8 यीशुए तेसखे बोलेया, “उठ और आपणा मांजा चकी की चल-फिर।” 9 से माणू तेबुई ठीक ऊईगा और आपणा मांजा चकी की चलणे-फिरने लगेया। से आरामो रा दिन था। 10 तेबे यहूदी अगुवे तेसखे, जो ठीक ऊई रा था, बोलणे लगे, “आज तो आरामो रा दिन ए, मूसे रा बिधानो रे मुताबिक ताखे मांजा चकणा ठीक निए।” 11 तिने तिना खे जवाब दितेया, “जिने आऊँ ठीक किन्तेया, तिने ई माखे बोलेया, ‘आपणा मांजा चकी की चल-फिर।’” 12 तिने तेसते पूछेया, “से कुण माणू ए, जिने ताखे बोलेया, ‘आपणा मांजा चकी की चल-फिर?’” 13 पर जो ठीक ऊईगा था, से नि जाणो था कि से कुण ए, कऊँकि तेते जगा रे पीडू ऊणे री बजअ ते यीशु तेथा ते आटी गे थे। 14 इना गल्ला ते बाद से यीशुए खे मन्दरो रे आँगणो रे मिलेया। यीशुए तेसखे बोलेया, “देख, तूँ ठीक ऊईगा रा, दुबारा पाप नि करना, एड़ा नि ओ कि इजी ते जादा मुसीबत तां पाँदे पड़ी जाओ।” 15 तिने माणूए जायी की यहूदी अगुवे गे बताई ता कि जिने आऊँ ठीक करी राखेया से यीशु ए। 16 इजी बजअ ते यहूदी अगुवे यीशुए खे सताणे लगे, कऊँकि सेयो एड़े काम आरामो रे दिने करो थे। 17 तेबे यीशुए तिना खे बोलेया, “मेरा पिता परमेशर एबुए तक काम करोआ और आऊँ बी काम करूँआ।” 18 इजी री बजअ ते यहूदी अगुवे ओर बी जादा तिना खे काणे री कोशिश करने लगे, कऊँकि से ना बस आरामो रे दिने री बिधि-बिदान तोड़ोआ, बल्कि परमेशरो खे आपणा पिता बोली की आपणे आपू खे परमेशरो जेड़ा मानोआ। 19 तेबे यीशुए तिना खे बोलेया, “आऊँ तुसा खे सच-सच बोलूँआ कि आऊँ आपणे आपू ते

कुछ नि करी सकदा, बस से जो पिते खे करदा ऊआ देखूँआ, कऊँकि जो-जो काम से करोआ, आऊँ बी तियाँ ई करोआ। 20 कऊँकि पिता मांते ते प्यार राखोआ और जो-जो काम से आपू करोआ, तिना सबी खे से माखे दखाओआ और तेस इना ते बी बडे काम माखे दखाणे, ताकि तुसे हैरान ओ। 21 कऊँकि जियाँ पिता मरे रेया खे उठालोआ और जिऊँदा करोआ, तियाँ ई आऊँ बी जिना खे चाओआ, जिऊँदा कऱूँआ। 22 पिता केसी रा बी न्याय नि करदा, पर न्याय करने रा सारा काम मांगे गे सम्बाली ता रा। 23 ताकि सब लोक जियाँ पिते रा आदर करोए, तियाँ ई मेरा बी आदर करो, जो मेरा आदर नि करदा, से पिते रा आदर पनि करदा, जिने से पेजी राखेया। 24 आऊँ तुसा खे सच-सच बोलूँआ कि जो मेरा वचन सुणी की मेरे पेजणे वाले रा विश्वास करोआ, अनन्त जीवन तेसरा ईए और तेस पाँदे दण्डो री आज्ञा नि ऊँदी, बल्कि से मौता ते पार ऊई की जीवने रे जाई चुकेया रा। (aiōnios g166) 25 “आऊँ तुसा खे सच-सच बोलूँआ कि से बखत आओआ, और एबुए, जिदे मरे रेया लोका, परमेशरो रे पुत्रो री आवाज सुणी और जिना सुणी, सेयो सदा खे जिऊँदे ऊई जाणे। 26 कऊँकि जियाँ पिता आपणे आपू रे जीवन राखोआ, तियाँ ई तिते माखे बी अक्क देई राखेया कि आपणे आपू रे जीवन राखूँ, 27 बल्कि पिते माखे लोका रा न्याय करने रा अक्क बी देई राखेया, कऊँकि आऊँ माणूँ रा पुत्र ए। 28 इजी ते हैरान नि ओ, कऊँकि से बखत आऊणा, जेबे जितणे बी कऱा रे ए, मेरी आवाज सुणी की जिऊँदे ऊई जाणे। 29 जिने-जिने खरा करी राखेया सेयो दुबारा जीवन पाणे खे उठणे और जिने बुरई करी राखी, सेयो दण्ड पाणे खे दुबारा उठणे। 30 “आऊँ आपणे आपू ते कुछ नि करी सकदा, जेड़ा पिते ते सुणूँआ, तेड़ा ई न्याय कऱूँआ और मेरा न्याय सच्चा ए, कऊँकि आऊँ आपणी इच्छा नि, पर आपणे पेजणे वाले री इच्छा चाऊँआ। 31 जे आऊँ आपू ई आपणी गवाई देऊँ, तो मेरी गवाई सच्ची नि। 32 एक ओर ए जो मेरी गवाई देओआ और आऊँ जाणूँआ कि मेरी जो गवाई से देओआ, से सच्ची ए। 33 तुसे यूहन्ना बपतिस्मा देणे वाले गे आपणे लोक पूछणे खे पेजे और तिने सच्चाईया री गवाई दिती। 34 पर आऊँ आपणे बारे रे माणूँआ री गवाई नि चांदा, तेबे बी आऊँ इना गल्ला इजी खे बोलूँआ, ताकि तुसा खे उद्धार मिलो। 35 यूहन्ना बपतिस्मा देणे वाला बलदा और चमकदे ऊए दिऊए जेड़ा था और तुसा खे कुछ देरा खे तेसरी जोतिया रे मग्न ऊणा अच्छा लगेया। 36 “पर जो मांगे गवाई ए, से यूहन्ना बपतिस्मा देणे वाले री गवाईया ते बडी ए। कऊँकि जो काम पिते मांगे पूरा करने खे सम्बाली राखेया, मतलब-येई काम जो आऊँ कऱूँआ, सेयो मेरे गवा ए कि पिते आऊँ पेजी राखेया। 37 और पिते जिने आऊँ पेजी राखेया, तिने ई मेरी गवाई देई राखी, तुसे ना कदी तेसरी आवाज सुणी राखी और ना कदी तेसरा रूप देखी राखेया 38 और तेसरे वचने खे मनो रे नि बठयालदे, कऊँकि जो तिने पेजी राखेया, तुसे तेसरा विश्वास नि करदे। 39 तुसे पवित्र शास्त्रो रे टोलोए, कऊँकि तुसे समजोए कि तुसा खे अनन्त जीवन तिदे मिलोआ और ये सेईए, जो मेरी गवाई देओआ। (aiōnios g166) 40 “तेबे बी तुसे अनन्त जिन्दगी पाणे खे मांगे नि आऊणा चांदि। 41 आऊँ माणूँआ ते आदर नि चांदा। 42 पर आऊँ तुसा खे जाणूँआ कि तुसा रे परमेशरो रा प्यार नि। 43 आऊँ आपणे पिता परमेशरो रे नाओं ते आयी रा और तुसे माखे नि मानदे, जे कोई दूजा आपणे ई नाओं ते आओ, तो तुसा से मानी लणा। 44 तुसे जो एकी-दूजे ते आदर चाओए और से आदर जो एक मात्र परमेशरो री तरफा ते ए, चांदि नि, कियाँ विश्वास करी सकोए? 45 ये नि समजो कि मां पिते सामणे तुसा पाँदे दोष लगाणा, तुसा पाँदे तो दोष लगाणे वाला अया, मतलब-मूसा, जेस पाँदे तुसे उम्मीद राखी री ए। 46 कऊँकि जे तुसे मूसे रा विश्वास करदे, तो मेरा बी विश्वास करे, कऊँकि तिने मेरे बारे रे लिखी राखेया। 47 पर जे तुसे तेसरी लिखी री गल्ला रा विश्वास नि करदे, तो मेरी गल्ला रा कियाँ करना?”

6 इना गल्ला ते बाद यीशु गलीलो रे समुद्रो दे, मतलब-तिबिरियास समुद्रो ते पार गये। 2 तेबे एक बडी पारी पीड़ तिना पीछे आईगी, कऊँकि जो

सामर्थ रे काम यीशु बमारा पाँदे करो थे, सेयो तिना खे देखो थे। 3 तेबे यीशु पाहडो पाँदे चढी की आपणे चलेया साथे तेती बैठीगे। 4 यहूदिया रा फसह रा त्योआर नेडे था। 5 तेबे यीशुए आपणिया आखी चकी की एक बडी पीड़ आपू गे आऊँदी ऊई देखी, तेबे फिलिप्पुसो खे बोलेया, “एबे आसे इना खे केथा ते रोटी खरीदी की ल्याऊँ?” 6 पर तिने ये गल्ल तेसखे परखणे खे बोली, कऊँकि सेयो आपू जाणो थे कि मां क्या करना। 7 फिलिप्पुसे तिना खे बोलेया, “दो सौ चाँदिए रे सिक्केया रे मोलो री रोटी तिना खे थोड़ी-थोड़ी करी की बी पूरी नि ऊणी।” 8 तिना रे चलेया बीचा ते शमौन पतरसो रे पाईए अन्द्रियासे तिना खे बोलेया, 9 “एती एक पाऊ ए, जेसगे पाँज जो रिया रोदिया और दो मछलिया ए, पर इतणे लोका खे यो केयी ऊणिया?” 10 यीशुए बोलेया, “लोका खे बठयाली देओ।” तेते जगरे रे बऊत काआ था, तेबे लोक, जिना रे मर्दा री संख्या तकरीबन पाँज हजार री थी, तेती बैठीगे। 11 तेबे यीशुए सेयो रोदिया लईया और धन्यवाद करी की बैठणे वालेया खे बांडी तिया और तियाँ ई मछलिया बी जितणिया सेयो चाओ थे, तिना खे बांडी तिया। 12 जेबे सेयो खाई की रज्जी गे, तेबे तिने आपणे चलेया खे बोलेया, “बचे रे टुकडे कट्टे करी देओ, कुछ बी सेटणा नि।” 13 तेबे तिने कट्टे करी ते और बारा टोकरिया परी तिया, जबकि सेयो पांजा रोदिया रे टुकडे थे, जो खाणे वालेया ते बाद बची रिया थिया। 14 तेबे जो सामर्था रे काम यीशुए करी की दखाए, तिना देखी की लोक बोलणे लगे, “से भविष्यबक्ता जो दुनिया रे आऊणे वाला था, पक्का येईए।” 15 यीशु ये जाणी की कि सेयो माखे राजा बनाणे खे पकड़ना चाओए, फेर सेयो पाहडो पाँदे कल्ले चली गे। 16 जेबे साँज ऊई, तेबे तिना रे चले समुद्रो रे कनारे चली गे 17 और किस्तिया रे चढी की समुद्रो ते पार कफरनहूमो खे जाणे लगे। तेस बखते न्हारा ऊईगा था और यीशु एबुए तक तिना गे नि पऊँछी रे थे। 18 तेबे तूफानो री बजअ ते समुद्रो रे लईरा उठणे लगिया। 19 जेबे सेयो किस्तिया रे सर करदे ऊए तकरीबन पाँज-छः किलोमीटर निकली गे, तेबे तिने यीशु समुद्रो रे चलदे ऊए और किस्तिया रे नेडे आऊँदे ऊए देखे और सेयो डरी गे। 20 पर तिने तिना खे बोलेया, “आऊँ ए, डरो नि।” 21 तेबे सेयो तिना खे किस्तिया रे चढाणे खे त्यार ऊईगे और तेबे से किस्ती फटाफट तेती पऊँछी गी, जेती सेयो जाणा चाओ थे। 22 दूजे दिने तेसे पीड़े, जो समुद्रो ते पार थी खड़ी री, तिने देखेया कि एती तो एक किस्तिया खे छाडी की ओर कोई किस्ती नि थी और यीशु आपणे चलेया साथे तेसा किस्तिया रे नि चढे, पर बस तिना रई चले गये। 23 तेबे बी ओर किस्तिया तिबिरियास नगरो ते तेते जगरे रे नेडे आईया, जेती तिने यीशुए रे धन्यवाद करने ते बाद रोटी खाई थी। 24 तेबे जेबे पीड़े देखेया कि एती ना तो यीशु ए और ना तिना रे चले, तेबे सेयो बी किस्तिया रे चढी की यीशुए खे टोलदे ऊए, कफरनहूम नगरो रे पऊँछी गे। 25 समुद्रो ते पार जेबे सेयो यीशुए खे मिले तेबे तिने बोलेया, “ओ गुरु! तुसे एती कदी आये?” 26 यीशुए जवाब दितेया, “आऊँ तुसा खे सच-सच बोलूँआ कि तुसे माखे इजी री खातर नि टोलदे कि तुसे मेरे सामर्था रे काम देखो, पर इजी री खातर कि तुसे रोदिया खाई की रज्जी गे। 27 नाशवान रोदिया खे मईणत नि करो, पर तेसा रोदिया खे मईणत करो, जो अनन्त जीवने देओई, जो मां माणूँ रे पुत्रो तुसा खे देणी, कऊँकि पिता परमेशरो माखे इजी खे देणे रा अक्क देई राखेया।” (aiōnios g166) 28 तिने यीशुए खे बोलेया, “परमेशरो रे काम करने खे आसे क्या कऱूँ?” 29 यीशुए बोलेया, “परमेशरो रा काम ये कि तुसे तेस पाँदे, जो तिने पेजी राखेया, विश्वास करो।” 30 तेबे तिने तिना खे बोलेया, “तेबे तुसे कुण जा चिह्न दखाओ कि आसे तेस देखी की तुसा पाँदे विश्वास करिए, तुसे कुण जा काम दखाओए? 31 आसा रे बाप-दादे जंगलो रे मन्ना खाया, जियाँ पवित्र शास्त्रो रे लिखी राखेया कि तिने तिना खे खाणे खे स्वर्गो ते रोटी दिती।” 32 यीशुए तिना खे बोलेया, “आऊँ तुसा खे सच-सच बोलूँआ कि मूसे सेयो रोदिया तुसा खे स्वर्गो ते नि दितिया, बल्कि मेरा पिता तुसा खे सच्ची रोदिया स्वर्गो ते देओआ। 33 कऊँकि परमेशरो री रोटी सेईए, जो स्वर्गो ते ऊतरी की दुनिया रे लोका खे जीवन देओई।” 34 तेबे तिने तिना खे बोलेया, “ओ प्रभु! एसा

रोटिया आसा खे सदा देया कर।” 35 यीशुए तिना खे बोलेया, “जीवनो री रोटी आऊँ ए; जो मांगे आऊणा, से कदी पूखा नि ऊणा और जेस मां पॉदि विश्वास करना, से कदी त्याया नि ऊणा। 36 पर मैं तुसा खे बोलेया था कि तुसे आऊँ देखी बी लया रा, तेबे बी विश्वास नि करदे। 37 जो कुछ पिता माखे देओआ, से सब मांगे आऊणा। जो कोई मांगे आऊणा से मां कदी नि निकयालना। 38 कऊँकि आऊँ आपणी इच्छा नि बल्कि आपणे पेजणे वाले री इच्छा पूरी करने खे स्वर्गो ते उतरी रा। 39 और मेरे पेजणे वाले री इच्छा ये कि, जो कुछ तिने माखे देई राखेया, तिजी बीचा ते आऊँ कुछ नि रचाऊँ, पर तेस आखरी दिना रे फेर जिऊँदा करहँ। 40 कऊँकि मेरे पिते री इच्छा ये कि जो कोई पुत्रो खे देखो और तेस पॉदि विश्वास करो, से अनन्त जीवन पाओ और मां से आखरी दिनो रे फेर जिऊँदा करना।” (aiōnios g166) 41 तेबे यहूदी तिना पॉदि कुड़कुड़ाणे लगे, कऊँकि तिने बोलेया था, “जो रोटी स्वर्गो ते उतरी, से आऊँ ई ये।” 42 तेबे तिने बोलेया, “क्या ये यूसुफो रा पाऊ यीशु नि ए, जेसरे माए-बाओ खे आसे जाणुँए? तेबे ये कऊँ बोलोआ कि आऊँ स्वर्गो ते उतरी रा?” 43 यीशुए तिना खे जवाब दितेया, “आपू बीचे नि कुड़कुड़ाओ। 44 कोई मांगे नि आयी सकदा, जदुओ तक पिता, जिने आऊँ पेजी राखेया, तेसखे खिँजी ना लओ और आऊँ तेसखे आखरी दिनो रे फेर जिऊँदा नि करी देऊँ। 45 भविष्यबक्ता रे लेखो रे ये लिखी राखेया, सेयो सब परमेशरो री तरफा ते सखाए रे ऊणे। जिने किने बी पिते ते सुणेया और सीखी राखेया, से मांगे आओआ। 46 किने बी पिता परमेशर नि देखी राखेया, मांते अलावा, जो पिता री तरफा ते पेजी राखेया, बस तिने ई पिता देखी राखेया। 47 “आऊँ तुसा खे सच-सच बोळुँआ कि जो कोई विश्वास करोआ, अनन्त जीवन तेसरा ईए। (aiōnios g166) 48 जीवनो री रोटी आऊँ ई ये। 49 तुसा रे बाप-दादे जंगलो रे मन्ना खाया और मरी गे। 50 ये से रोटी ये, जो स्वर्गो ते उतरौई, ताकि माणू तिजी बीचा ते खाओ और मरो नि। 51 जीवनो री रोटी, जो स्वर्गो ते उतरी, से आऊँ ई ये। जे कोई इजी रोटिया ते खाओ, तो सदा जिऊँदा रणा। जो रोटी मां दुनिया रे लोका खे सदा री जिन्दगिया खे देणी, से मेरा शरीर ए।” (aiōn g165) 52 ये सुणी की यहूदी लोक आपू बीचे लड़ने लगे, “ये माणू कियँ आसा खे आपणा मांस खाणे खे देई सकोआ?” 53 यीशुए तिना खे बोलेया, “आऊँ तुसा खे सच-सच बोळुँआ कि जदुओ तक मां माणू रे पुत्रो रा मांस नि खाओ और मेरा खून नि पियो, तुसा रे अनन्त जीवन नि ए। 54 जो मेरा मांस खाओआ और मेरा खून पियोआ, अनन्त जीवन तेसरा ईए; और मां आखरी दिनो रे से फेर जिऊँदा करना। (aiōnios g166) 55 कऊँकि मेरा मांस ई तो खाणे री चीज ए और मेरा खून ई तो पीणे री चीज ए। 56 जो मेरा मांस खाओआ और मेरा खून पियोआ, से मांदे पक्का बणेया रा रओआ और आऊँ तेसरे। 57 जियँ जिऊँदे पिता परमेशरे आऊँ पेजी राखेया और आऊँ पिते री बजअ ते जिऊँदा ए, तियँ ई से बी, जो माखे खाओगा, जिऊँदा रणा। 58 आऊँ ई से रोटी ए जो स्वर्गो ते उतरी री। तेसा रोटिया जेड़ी नि ए, जो बाप-दादेया खाई और मरी गे, जो कोई एसा रोटिया खाओगा, से सदा जिऊँदा रणा।” (aiōn g165) 59 यो गल्ला यीशुए कफरनहूम ननारो रे प्रार्थना रे कअरो रे, उपदेश देँडे ऊए बोलिया। 60 तेबे तिना रे चेलेया बीचा ते कई जणे ये सुणी की बोलेया, “यो गल्ला तो कठोर ए, इना कुण सुणी सकोआ?” 61 यीशु आपणे मनो रे ये जाणी की कि मेरे चले आपू बीचे एते गल्ला पॉदि कुड़कुड़ाओए, तिना ते पूछेया, “क्या तुसा खे इना गल्ला ते ठोकर लगेई? 62 और जे तुसे मां माणू रे पुत्रो खे, जेती आऊँ पईले था, तेती ऊबे स्वर्गो खे जाँदे ऊए देखोगे, तो क्या ऊणा? 63 परमेशरो रा आत्मा ईए जो जीवन देणे वाला ए, पर शरीर ये नि देई सकदा, जो मैं तुसा खे बोली राखेया, सेयो आत्मिक बी ए और जीवन बी ए। 64 पर तुसा बीचा ते कई जणे तो एड़े ए, जो विश्वास नि करदे।” कऊँकि यीशु तो पईले तेई जाणो था कि जो विश्वास नि करदे, सेयो कूणे? और केस आऊँ पकड़वाणा? 65 और तिने बोलेया, “तेबेई तो मैं तुसा खे बोलेया था कि जदुओ तक केसी खे पिते री तरफा ते ये बरदान नि दितेया जाओ, तदुओ तक से मांगे नि आयी सकदा।” 66 ये सुणी की तिना रे

चेलेया बीचा ते कई जणे उल्टे फिरी गे और तिजी ते बाद तिना साथे नि चले। 67 तेबे यीशुए तिना बारा चेलेया खे बोलेया, “क्या तुसे बी जाणा चाओए?” 68 शमोन पतरसे तिना खे जवाब दितेया, “ओ प्रभु! आसे केसगे जाऊँ? अनन्त जीवनो री गल्ला तो तुसा गे ई ये (aiōnios g166) 69 और आसे विश्वास कितेया और जाणी गे रे कि परमेशरो रा पवित्र जन तूँ ई ये।” 70 यीशुए तिना खे बोलेया, “क्या मैं तुसे बारा जणे नि चूणी राखे? तेबे बी तुसा बीचा ते एक माणू शैतान ए।” 71 ये तिने शमोन इस्करियोतियो रे पाऊ यहूदा रे बारे रे बोलेया था, कऊँकि येई तिना बारा चेलेया बीचा ते था, जो यीशुए खे पकड़वाणे वाला था।

7 इना गल्ला ते बाद यीशु गलील प्रदेशो रे कुमदे-फिरदे रये, कऊँकि यहूदी अगुवे तिना खे काणे री कोशिश करने लगी रे थे, तेबेई तो सेयो यहूदिया प्रदेशो रे कूमणा नि चाओ थे। 2 यहूदिया रा चूंगड़िया रा त्योआर नेडे था। 3 यीशुए रे पाईए तिना खे बोलेया, “एथा ते यहूदिया प्रदेशो खे चली जा, ताकि जो चमत्कारा रे काम तूँ करेया, तिना कामा तेरे और चले तेती बी देखो। 4 कऊँकि एड़ा कोई नि ऊणा, जो मशुर ऊणा चाओ और लुकी की काम करो, जे तूँ इना काम करोआ, तो आपू खे दुनिया रे सामणे ल्याओ।” 5 कऊँकि तिना रे पाई बी तिना पॉदि विश्वास नि करो थे। 6 तेबे यीशुए तिना खे बोलेया, “मेरा सई बखत एबु नि आयी रा, पर तुसा रिया तई सारा बखत ए। 7 दुनिया रे लोक तुसा ते बैर नि करी सकदे, पर से मांते बैर करोए, कऊँकि आऊँ तेसा रे बिरोदो रे येई गवाई देऊँआ कि तेसा रे काम बुरे ए। 8 तुसे त्योआरो रे जाओ, आऊँ एबु एस त्योआरो खे नि जाई सकदा, कऊँकि एबुए तक मेरा सई बखत पूरा नि ऊई रा।” 9 यीशु तिना साथे इना गल्ला करी की गलील प्रदेशो रेई रई गे। 10 पर जेबे तिना रे पाई त्योआरो खे चली गे, तेबे सेयो आपू बी सामणे नि, पर चोरिए जे चली गे। 11 तेबे यहूदी अगुवे त्योआरो रे तिना खे ये बोली की टोलने लगे कि, “से केयी ए?” 12 और लोका बीचे चोरिए-चोरिए तिना रे बारे रे मुखती गल्ला ऊईया, बऊत जणे बोलो थे, “से पला माणू ए और कई जणे बोलो थे कि नई, से तो लोका खे भरमाओआ।” 13 तेबे बी यहूदिया रे डरो रे मारे कोई बी माणू तिना रे बारे रे खुली की नि बोलो था। 14 जेबे त्योआरो रे आदे दिन बीती गे, तेबे यीशु मन्दरो रे आँणो रे जाई की उपदेश देणे लगे। 15 तेबे यहूदिये हैरान ऊई की बोलेया, “एसखे बिना पढ़े बिद्या केथा ते आईगी?” 16 यीशुए तिना खे बोलेया, “मेरा उपदेश मेरा नि, बल्कि मेरे पेजणे वाले राए। 17 जे कोई परमेशरो री इच्छा पॉदि चलणा चाओ, तो तेसखे एस उपदेशो रे बारे रे पता लगी जाणा कि ये परमेशरो रिया तरफा तेया या आऊँ आपू ते बोळुँआ। 18 जो आपू ते कुछ बोलोआ, से आपणी तारीफ चाओआ, पर जो आपणे पेजणे वाले री तारीफ चाओआ, सेई परसे रे जोगा ए और से पापी नि ए। 19 क्या मूसे तुसा खे बिधान नि देई राखेया? तेबे बी तुसा बीचा ते कोई बी बिधानो पॉदि नि चलदा। तुसे माखे काणा कऊँ चाओए?” 20 लोके जवाब दितेया, “तांदे दुष्टामा ए, ताखे कुण काणा चाओआ।” 21 यीशुए तिना खे जवाब दितेया, “मैं आरामो रे दिने एक चमत्कार कितेया और तुसे सब हैरानी करोए। 22 तुसे बोलोए कि मूसे तुसा खे खतने री आज्ञा देई राखी। इजी री बजअ ते तुसे आरामो रे दिने मांणूआ रा खतना करोए। ये नियम मूसे री तरफा ते नि ए, पर तुसा रे बाप-दादेया रे बखतो ते चले आयी रे। 23 तेबेई तो आरामो रे दिने मांणूए रा खतना करेया जाओआ, ताकि मूसे रे बिधानो री आज्ञा टली नि जाओ, तो तुसे मां पॉदि रोष कऊँ करोए कि मैं आरामो रे दिने एक माणू अच्छी रीतिया ते ठीक कितेया। 24 मैं देखी की न्याय नि करो, पर ठीक-ठीक न्याय करो।” 25 तेबे कई यरूशलेमी लोक बोलणे लगे, “क्या ये सेई नि ए, जेसखे काणे री कोशिश ऊणे लगी री? 26 पर देखो, ये तो खुल्लमखुल्ला गल्ला करोआ और कोई एसखे कुछ नि बोलदा, केथी एड़ा तो नि ए कि अधिकारिए सच-सच जाणी ला रा कि येई मसीह ए? 27 एसखे तो आसे जाणुँए कि ये केथो राए; पर मसीह जेबे आऊणा, तेबे केसी नि जाणना कि से केथो राए?” 28 तेबे यीशुए मन्दरो रे आँणो रे उपदेश देँडे

ऊए जोरे की बोलेया, “तुसे माखे जाणोए और ये बी जाणोए कि आऊँ केथो राए, आऊँ आपू ते नि आयी रा, पर माखे पेजणे वाला सच्चा ए, तेसखे तुसे नि जाणदे। 29 पर आऊँ तेसखे जाणूँआ, कऊँकि आऊँ तेसरी तरफा ते और तिने आऊँ पेजी राखेया।” 30 तेबे तिने सेयो पकड़ना चाए, पर तेबे बी किने बी तिना पाँदे आथ नि पाया, कऊँकि तिना रा सई बखत एबुए तक नि आयी रा था। 31 तेबे बी पीड़ा बीचा ते कई जणेया तिना पाँदे विश्वास कित्तेया और बोलणे लगे, “मसीह जेबे आऊणा, तो क्या एसते जादा सामर्था रे काम दखाणे, जो इने दखाए?” 32 फरीसिये, लोका ते तिना रे बारे रे यो गल्ला चोरिए-चोरिए करदे ऊए सुणिया और बड़े पुरोईत और फरीसिये तिना खे पकड़ने खे मन्दरो रे पईरदार पेजे। 33 तेबे यीशुए बोलेया, “आऊँ थोड़ी देर तक ओर तुसा साथे ए, तेबे आपणे पेजणे वाले गे चली जाणा। 34 तुसा आऊँ टोलना, पर मिलणा नि और जेती आऊँ ए, तेती तुसे आयी नि सकदे।” 35 तेबे यहूदिये अगुवे आपू बीचे बोलेया, “ये केयी जाणा, कि आसा खे नि मिलणा? क्या ये तिना बीचे जाणा, जो यूनानो रे ओरे-पारे ऊई की रओए और यूनानिया खे बी उपदेश देओगा? 36 ये क्या गल्ल ए, जो इने बोली कि, ‘तुसा आऊँ टोलना, पर मिलणा नि और जेती आऊँ ए, तेती तुसे आयी नि सकदे?’” 37 तेबे त्योआरो रे आखरी दिने, जो खास दिन था, यीशु खईडे ऊईगे और आक्का पाई की बोलेया, “जेसखे त्याय ए, तो से मांगे आओ और पियो। 38 जो मां पाँदे विश्वास करोगा, जेड़ा पवित्र शास्त्रो रे लिखी राखेया, ‘तेसरे दिलो ते जिन्दगिया रे पाणिए रिया नदिया बईदिया निकलनिया।” 39 तिने ये वचन पवित्र आत्मा रे बारे रे बोलेया, जो तिना पाँदे विश्वास करने वालेया खे मिलणे वाली थी। कऊँकि पवित्र आत्मा एबुए तक नि उतरी रा था, कऊँकि यीशु एबुए तक आपणी महिमा रे नि पऊँछेया था। 40 तेबे पीड़ा बीचा ते किने-किने ये गल्ला सुणी की बोलेया, “सच्ची येई से भविष्यबक्ता ए, जेसरे आऊणे री आसे उम्मीद लगाई राखी।” 41 कईए बोलेया, “ये मसीह ए।” पर कईए बोलेया कऊँ, “क्या मसीह गलील प्रदेशो ते आऊणा? 42 क्या पवित्र शास्त्रो रे नि लिखी राखेया कि मसीह दाऊदो रे कुलो रे और बैतलहमो रे गांव ते आऊणा, जेती दाऊद रओ था?” 43 तेबे तिना री बजअ ते लोका बीचे फूट पड़ी गी। 44 तिना बीचा ते कई जणे यीशुए खे पकड़ना चाओ थे, पर किने बी तिना पाँदे आथ नि पाया। 45 तेबे मन्दरो रे पईरदार, बड़े पुरोईत और फरीसिया गे वापस आए, तेबे तिने तिना खे बोलेया, “तुसे तेसखे कऊँ नि ल्याए?” 46 मन्दरो रे पईरदार बोलेया, “किने बी मांणूए कदी बी एड़िया गल्ला नि बोल्या।” 47 फरीसिये पईरदार खे बोलेया, “क्या तुसे बी भरमाई गे दे? 48 क्या अधिकारी और फरीसिया बीचा ते किने बी तेस पाँदे विश्वास करी राखेया? 49 पर यो लोक जो मूसे रे बिधानो खे नि जाणदे, परमेशरो री तरफा ते सापित ए।” 50 नीकुदेमुसे जो पईले यीशुए गे राती आया था और तिना बीचा ते एक था, तिना खे बोलेया, 51 “क्या आसा रा बिधान केसी मांणूए खे, जदुओ तक तेसरी सुणी की जाणी नि लओ कि से क्या करोए; दोषी मानोआ?” 52 तिने तेसखे जबाब दित्तेया, “ओ नीकुदेमुस, क्या तूँ बी गलील प्रदेशो राए? पवित्र शास्त्रो रे टोल और देख कि गलील प्रदेशो ते कोई बी भविष्यबक्ता आई नि सकदा।” 53 तेबे सब आपणे-आपणे कओरो खे चली गे।

8 यीशु जैतूनो रे पाहडो पाँदे चली गे। 2 आगले दिने प्यागा फेर से मन्दरो रे आईगे और बऊत लोक तिना गे आईगे और यीशु मन्दरो रे आँगणो रे बैठी की तिना खे उपदेश देणे लगे। 3 तेबे शास्त्री और फरीसी एक जवाणसा खे ल्याए, जो व्याभिचार करदे ऊए पकड़ी थी और से बीचे खड़ी करी ती 4 और यीशुए खे बोलेया, “ओ गुरु! ये जवाणस व्याभिचार करदे ऊए पकड़ी राखी। 5 बिधानो रे मूसे आसा खे आज्ञा देई राखी कि एड़िया जवाणसा खे पथरवार करना चाईयो। तो तुसे एसा जवाणसा रे बारे रे क्या बोलोए?” 6 तिने तिना खे परखणे खे ये गल्ल बोली, ताकि तिना रे दोष लगाणे खे कोई गल्ल पकड़ो, पर यीशु चुकी की गूठिये की जमीना पाँदे लिखणे लगे। 7 जेबे सेयो तिना ते पुछदे ई रये, तेबे तिने सीदे ऊई की तिना खे बोलेया, “तुसा

बीचा ते जो निष्पाप ए सेई एसा पाँदे पईले पात्हर बाओ।” 8 और तेबे फेर चुकी की जमीना पाँदे गूठिया साथे लिखणे लगे। 9 पर सेयो ये सुणी की बड़ेया ते लयी की छोटया तक, एक-एक करी की निकली गे और यीशु कल्ले रई गे और जवाणस तेथी बीचे खड़ी री रईगी। 10 यीशुए सीदे ऊई की तेसा खे बोलेया, “ओ जवाणसे! सेयो केयी गे? क्या किने बी तां पाँदे दण्डो री आज्ञा नि दिती?” 11 तेसे बोलेया, “ओ प्रभु! किने पनि।” यीशुए बोलेया, “आऊँ बी तां पाँदे दण्डो री आज्ञा नि देँदा, जा और फेर पाप नि करना।” 12 तेबे यीशुए फेर लोका खे बोलेया, “दुनिया री जोति आऊँ ई ये, जो मां पीछे आऊणा, से न्हरे रे नि चलणा, बल्कि तेस जोति पाणी जो जीवन देओई।” 13 फरीसिये तिना खे बोलेया, “तूँ आपणी गवाई आपू देओआ, तेरी गवाई ठीक नि।” 14 यीशुए तिना खे बोलेया, “बेशक आऊँ आपणी गवाई आपू ई देऊँआ, तेबे बी मेरी गवाई ठीक ए, कऊँकि आऊँ जाणूँआ कि आऊँ केथा ते आयी रा और केथो खे जाऊँआ? पर तुसे नि जाणदे कि आऊँ केथा ते आयी रा और केथो खे जाऊँआ? 15 तुसे मूँ देखी की न्याय करोए, आऊँ केसी रा न्याय नि करदा 16 और जे आऊँ न्याय करूँ बी, तो मेरा न्याय सच्चा ए, कऊँकि आऊँ कल्ला नि, पर पिता जिने आऊँ पेजी राखेया मां साथे ए। 17 तुसा रा बिधानो रे बी लिखी राखेया कि दो जणेया री गवाई मिली की ठीक ओई, 18 एक तो आऊँ आपणी गवाई देऊँआ और दूजा पिता मेरी गवाई देओआ, जिने आऊँ पेजी राखेया।” 19 तिने तिना खे बोलेया, “तेरा पिता केयी ए?” यीशुए बोलेया, “ना तुसे माखे जाणदे और ना मेरे पिते खे, जे तुसे माखे जाणदे तो मेरे पिते खे बी जाणदे।” 20 यो गल्ला तिने मन्दरो रे आँगणो रे उपदेश देँदे ऊए पण्डार कओरो रे बोलिया और किने बी सेयो पकड़े नि, कऊँकि एबुए तक तिना रा सई बखत नि आयी रा था। 21 यीशुए फेर तिना खे बोलेया, “आऊँ जाऊँआ और तुसा आऊँ टोलना और आपणे पापो रे मरने। जेती आऊँ जाऊँआ, तेती तुसे नि आयी सकदे।” 22 तेबे यहूदिये अगुवे बोलेया, “क्या ये आपणे आपू खे कायी देओगा, जो बोलोआ, ‘जेती आऊँ जाऊँआ तेती तुसे नि आयी सकदे?’” 23 यीशुए तिना खे बोलेया, “तुसे ऊँदले ए और आऊँ स्वर्गो राए, तुसे दुनिया रे ए और आऊँ दुनिया रा नि। 24 तेबेई तो मैं तुसा खे बोलेया कि तुसे आपणे पापो ते मरने, कऊँकि जे तुसे विश्वास नि करोगे कि आऊँ सेईए, तो आपणे पापो रे मरने।” 25 यहूदी अगुवे तिना खे बोलेया, “तूँ कूणो?” यीशुए तिना खे बोलेया, “आऊँ सेईए, जो शुरुओ ते तुसा खे बोलदा ऊआ आयी रा, 26 तुसा रे बारे रे मां बऊत कुछ बोलणा और न्याय करना ए, पर मेरा पेजणे वाला सच्चा ए और जो मैं तेसते सुणी राखेया, सेई दुनिया रे लोका खे बोळूँआ।” 27 सेयो एबुए तक ये नि समजे कि यीशु तिना गे आपणे पिता परमेशरो रे बारे रे बोलणे लगी रा। 28 तेबे यीशुए बोलेया, “जेबे तुसा आऊँ माणू रा पुत्र ऊच्चे पाँदे चढ़ाणा, तेबे जाणना कि आऊँ सेईए और आपणे आपू ते कुछ नि करदा, बल्कि जिंयाँ पिता परमेशरो माखे सखयाली राखेया, तियाँ ई इना गल्ला खे बोळूँआ। 29 माखे पेजणे वाला मां साथे ए, तिने आऊँ कल्ला नि छाडी राखेया, कऊँकि आऊँ सदा सेई काम करूँआ, जेते साथे से खुश ओआ।” 30 सेयो इना गल्ला बोलणे ई लगी रे थे कि बऊत जणेया तिना पाँदे विश्वास कित्तेया। 31 तेबे यीशुए तिना यहूदिया खे, जिने तिना पाँदे विश्वास कित्तेया था, बोलेया, “जे तुसे मेरे वचनो रे बणे रे रओगे, तो सच्ची मेरे चले ठईरने। 32 तुसा सच जाणना और सच्यो तुसे आजाद करने।” 33 तिने यीशुए खे बोलेया, “आसे तो अब्राहमो रे कुलो ते ए और कदी केसी रे दास नि ऊए। तेबे तुसे कऊँ बोलोए कि तुसे आजाद ऊई जाणो?” 34 यीशुए तिना खे जवाब दित्तेया, “आऊँ तुसा खे सच-सच बोळूँआ कि जो कोई पाप करोआ, से पापो रा दास ए। 35 दास सदा कअरे नि रँदा, पाऊ सदा कअरे रओआ। (aiōn g165) 36 तेबे जे पुत्र तुसा खे आजाद करोगा, तो सच्ची तुसे आजाद ऊई जाणे। 37 आऊँ जाणूँआ कि तुसे अब्राहमो रे कुलो ते ए, तेबे बी मेरा वचन तुसा रे दिलो रे नि बसदा, तेबेई तो तुसे माखे काणा चाओए। 38 आऊँ सेई बोळूँआ, जो मैं पिते गे देखी राखेया और तुसे सेई करदे रओए, जो तुसे आपणे पिते ते सुणी राखेया।”

39 तिने बोलेया, “आसा रा पिता तो अब्राहम ए।” यीशुए तिना खे बोलेया, “जे तुसे अब्राहमो री ल्वाद ऊँदे तो अब्राहमो जेडे काम करदे। 40 पर एबे तुसे मां जेडे माणूण खे काणा चाओए, जिने तुसा गे से सच्चा वचन बताया, जो परमेशरो ते सुणेया, ये तो अब्राहमे नि कित्तेया था। 41 तुसे आपणे पिते जेडा काम करोए।” तिने यीशुए खे बोलेया, “आसे व्याभिचारो ते नि जम्मी रे, आसा रा एक ई पिता ए, मतलब-परमेशर।” 42 यीशुए तिना खे बोलेया, “जे परमेशर तुसा रा पिता ऊँदा, तो तुसे मां साथे प्यार राखदे, कऊँकि आऊँ परमेशरो री तरफा ते आयी रा, आऊँ आपू ते नि आयी रा, बल्कि तिने ई आऊँ पेजी राखेया। 43 तुसे मेरी गल्ल कऊँ नि समजदे? क्या तेबे कि तुसे मेरा वचन नि सुणी सकदे? 44 तुसा रा पिता शैतान ए और तुसे आपणे पिते री इच्छा पूरी करना चाओए। से तो शुरूओ तेई अच्यारा ए और सच्चो पॉँदे खड़ा नि रंदा, कऊँकि सच तेसरे आया ई नि, जेबे से चूठ बोलोआ, तेबे से आपणे ई सबाओ ते बोलोआ, कऊँकि से चूठा ए, बल्कि चूठो रा पिता ए। 45 पर आऊँ जो सच बोलूँआ, तेबेई तो तुसे मेरा विश्वास नि करदे। 46 तुसा बीचा ते कुण माखे पापी ठराओआ? जे आऊँ सच बोलूँआ, तो तुसे मेरा विश्वास कऊँ नि करदे? 47 जो कोई परमेशरो राए, से परमेशरो री गल्ला सुणोआ। ये गल्ला तुसे तेबे नि सुणदे, कऊँकि तुसे परमेशरो रे निए।” 48 यीशुए तिना की यहूदिये तिना खे बोलेया, “क्या आसे ठीक नि बोलदे कि तूँ सामरी ए और ताँदे दुशाल्मा ए?” 49 यीशुए जवाब दित्तेया, “माँदे दुशाल्मा निए, पर आऊँ आपणे पिते रा आदर करूँआ और तुसे मेरा आदर नि करदे। 50 पर आऊँ आपणा आदर नि चाँदा, पर आ, एक तो आप, जो मेरा आदर करवाणा चाओआ और से इजी रा न्याय करोआ। 51 आऊँ तुसा खे सच-सच बोलूँआ कि जे कोई माणू मेरे वचनो पॉँदे चलोगा, तो तेसखे अनन्तकालो तक मौत नि आऊणी।” (aiōn g165) 52 यहूदिये यीशुए खे बोलेया, “एबे तो आसे जाणी ला रा कि ताँदे दुशाल्मा ए, अब्राहम तो मरी गा रा और भविष्यबक्ता बी मरी गे रे और तूँ बोलेया कि ‘जो कोई मेरे वचनो पॉँदे चलोगा, तो तेसखे अनन्तकालो तक मौत नि आऊणी।’ (aiōn g165) 53 आसा रा पिता अब्राहम तो मरी गा रा, क्या तूँ तेसते बड़ा ए? भविष्यबक्ता बी मरी गे रे, तूँ आपणे आपू खे क्या समजैया?” 54 यीशुए बोलेया, “जे आऊँ आपणी महिमा आपू ई करने लगी जाऊँ, तो मेरी महिमा कुछ निए, पर मेरी महिमा करने वाला मेरा पिता ए, जेसखे तुसे बोलोए कि आसा रा परमेशर ए। 55 तुसे तो से नि जाणेया, पर आऊँ तेसखे जाणूँआ, और जे बोलूँ कि आऊँ तेसखे नि जाणदा, तो आऊँ तुसा जेडा चूठा ठईँगा, पर आऊँ तेसखे जाणूँआ और तेसरे वचनो पॉँदे चलूँआ। 56 तूसा रा पिता अब्राहम मेरा दिन देखणो री इच्छा रे बरूत मग्न था और तिने देखेया और खुश ऊआ।” 57 यहूदिये तिना खे बोलेया, “एबुए तक तूँ पंजा साला रा नि ऊआ, तेबे बी तँ अब्राहम देखी राखेया?” 58 यीशुए तिना खे बोलेया, “आऊँ तुसा खे सच-सच बोलूँआ कि अब्राहमो रे पैदा ऊणे ते पईले, आऊँ ए।” 59 तेबे तिने यीशुए खे बाणे खे पात्थर चके, पर यीशु लुकी की मन्दरो ते निकली गे।

9 यीशु और तिना रे चलेया तीसिए जाँदे ऊए एक एडा माणू देखेया, जो जन्मो तेई अन्दा था। 2 तेबे तिना रे चलेया तिना ते पूछेया, “ओ गुरु! किने पाप कित्तेया था, इने माणूण, जो अन्दा जम्मेया या एसरे माए-बाओ?” 3 यीशुए जवाब दित्तेया, “ना तो इने पाप करी राखेया और ना एसरे माए-बाओ कि ये अन्दा जम्मेया, पर ये तेबे ऊआ, ताकि परमेशरो रे सामर्थ्य रे काम एस पॉँदे प्रगट ओ। 4 जिने आऊँ पेजी राखेया, आसा खे जरूरी ये कि आसे तेसरे काम दिनी-दिने ई नपटयाणा जरूरी ए, कऊँकि से रात आऊणे वाली ए, जिदे कोई काम नि करी सकदा। 5 जदुओ तक आऊँ दुनिया रे ए, तदुओ तक, दुनिया री जोति ए।” 6 ये बोली की तिने जमीना पॉँदे थूकेया और तेस थूको साथे माट्टी सीनी किती और से माट्टी तेस अन्दे रिया आखी रे मली की 7 तेसखे बोलेया, “जा, और शीलोलो रे कुण्डो रे आपणी आखी तोई लो” (जेतेरा मतलब पेजे राए) तेबे तिने जायी की आखी तोईया और देखदा ऊआ आया। 8 तेबे तेस माणूण रे पड़ीसिये और जिने से पईले पीख

मांगदा ऊआ देखेया था, एकी दूजे ते बोलणे लगे, “क्या ये सेई निए, जो बैठेया रा पीख मांगो था?” 9 कइए बोलेया, “ये सेईए,” ओरी बोलेया, “ना, ये तो तेसरा हमशक्ल ए।” तिने बोलेया, “आऊँ सेईए।” 10 तेबे सेयो तेसते पूछणे लगे, “तेरिया आखी किंयाँ ठीक ऊईगिया?” 11 तेबे तिने बोलेया, “यीशु नाओं रे एक माणूण माट्टी सेडी और मेरी आखी रे मली और माखे बोलेया, ‘जा और शीलोलो रे कुण्डो रे आपणी आखी तोई लो।’ तेबे आऊँ कुण्डो रे गया और आखी तोई की देखणे लगी गा।” 12 तिने तेसते पूछेया, “से माणू केयी ए?” तिने बोलेया, “आऊँ नि जाणदा।” 13 तेबे लोक तेसखे, जो पईले अन्दा था, फरीसिये गे लयी गे। 14 जेस दिने यीशुए माट्टी सेडी की तेसरी आखी ठीक कित्तिया थिया, से आरामो रा दिन था। 15 तेबे फरीसिये बी तेसते पूछेया, “तेरिया आखी किंयाँ ठीक ऊईगिया?” तिने बोलेया, “तिने मेरी आखी रे माट्टी लगाई, तेबे में तोईया और एबे देखणे लगेया।” 16 तेबे कई फरीसी बोलणे लगे, “ये माणू परमेशरो री तरफा ते निए, कऊँकि से आरामो रा दिन नि मानदा।” ओरी बोलेया, “पापी माणू किंयाँ एडे चिह्न दखाई सकोआ?” तेबे तिना बीचे फूट पड़ी गी। 17 तिने तेस अन्दे खे फेर बोलेया, “जिने तेरी आखी कित्तिया ठीक कि तूँ तेसरे बारे रे क्या बोलेया?” तिने बोलेया, “से भविष्यबक्ता ए।” 18 पर यहूदिया खे विश्वास नि ऊआ कि ये अन्दा था और एबे देखोआ, जदुओ तक तिने तेसरे माए-बाओ बुलाई की 19 सेयो नि पूछी ले, “क्या ये तुसा रा पाऊ ए, जेसखे तुसे बोलोए कि अन्दा जम्मी रा? तेबे एबे किंयाँ देखोआ?” 20 तेसरे माए-बाओ बोलेया, “आसे ये तो जाणूँ कि ये आसा रा पाऊ ए और जन्मो ते अन्दा था। 21 पर ये नि जाणदे कि किंयाँ देखणे लगी गा और ना ई ये जाणदे कि किने एसरिया आखी ठीक कित्तिया। से छोट जा बच्चा निए, तेसते ई पूछी लो, तेस आपणे बारे रे आपू ई बताई देणा।” 22 यो गल्ला तिने तेबे बोलिया कऊँकि, सेयो यहूदी अगुओ ते डरो थे, कऊँकि यहूदी अगुवे एक मत ऊई चुके थे कि जे कोई ये विश्वास करोगा कि से मसीह ए, तो से प्रार्थना रे कअरो ते निकयाली देणा। 23 इजी री बजअ ते तेसरे माए-बाओ बोलेया, “से छोट जा बच्चा निए, एसते ई पूछी लो।” 24 तेबे यहूदी अगुवे तेस माणूण ते, जो अन्दा था, दूजी बार बुलाई की तेसखे बोलेया, “परमेशरो खे गवा मानी की सच बोल, आसे तो जाणूँ कि से माणू पापी ए।” 25 तिने बोलेया, “आऊँ नि जाणदा कि से पापी ए कि नई, आऊँ एक गल्ल जाणूँआ कि आऊँ पईले अन्दा था और एबे देखी सकूँआ।” 26 तिने तेसखे फेर बोलेया, “तिने तां साथे क्या कित्तेया और तेरी आखी किंयाँ ठीक कित्तिया?” 27 तिने तिना खे बोलेया, “आऊँ तो तुसा खे बोली चुकेया रा और तुसेई नि सुणेया, एबे दूजी बार कऊँ सुणना चाओए? क्या तुसे बी तेसरे चले बणना चाओए?” 28 तेबे सेयो तेसखे खरा-बुरा बोलणे लगे, “तूँ ई तेसरा चेला ए, आसे तो मूसे रे चले ए। 29 आसे जाणूँ कि परमेशरे मूसे साथे गल्ला कित्तिया, पर एस माणूण खे नि जाणदे कि केथो राए?” 30 तिने तिना खे बोलेया, “ये तो हैरानिया री गल्ल ए कि तुसे नि जाणदे कि से केथो राए, तेबे बी तिने मेरिया आखी ठीक कित्तिया। 31 आसे जाणूँ कि परमेशर पापिया री नि सुणदा, पर जे कोई परमेशरो रा भक्त ओ और तेसरी इच्छा पॉँदे चलोआ, तो से तेसरी सुणोआ। 32 दुनिया री शुरूआता ते ये कदी बी सुणने बीचे नि आया कि किने बी जन्मो रे अन्दे रिया आखी ठीक कित्तिया ओ। (aiōn g165) 33 जे ये माणू परमेशरो री तरफा ते नि ऊँदा, तो कुछ पनि करी सको था।” 34 तिने तेसखे जवाब दित्तेया, “तूँ तो बिल्कुल पापो ते जम्मी रा, तूँ आसा खे क्या सिखाएया?” और तिने से बारे निकयाली ला। 35 जेबे यीशुए सुणेया कि तिने से बारे निकयाली ता, तेबे सेयो तेसखे मिले और बोलेया, “क्या तूँ माणू रे पुत्रो पॉँदे विश्वास करेया?” 36 तिने जवाब दित्तेया, “ओ प्रभु! से कुणे कि आऊँ तेस पॉँदे विश्वास करूँ?” 37 यीशुए तेसखे बोलेया, “तँ से देखी बी राखेया और जो तां साथे जपणे लगी रा से येईए।” 38 तिने बोलेया, “ओ प्रभु! आऊँ विश्वास करूँआ।” और तिने तिना गे माथा टेकेया। 39 तेबे यीशुए बोलेया, “आऊँ एसा दुनिया पॉँदे न्याय करने आयी रा ताकि जो देखदे नि, सेयो देखो और जो देखोए, सेयो अन्दे ऊई

जाओ।” 40 जो फरीसी तिना साथे थे तिने यो गल्ला सुणी की तिना खे बोलेया, “क्या आसे बी अन्दे ए?” 41 यीशुए तिना खे बोलेया, “जे तुसे अन्दे ऊँदे तो पापी नि ऊँदे, पर एबे बोलोए कि आसे देखूँए, तेबेई तो तुसा रा पाप बणेया रा रओआ।”

10 यीशुए फेर बोलेया, “आऊँ तुसा खे सच-सच बोलूँआ कि जो कोई गवाईणीरे ते द्वारो ते नि जांदा, पर ओरी किसिये चढ़ी जाओआ, से चोर और डाकू ए। 2 पर जो-जो द्वारो रिये आओआ, से पेडा खे चराणे वाला ए। 3 तेसखे द्वारपाल द्वार खोली देओआ और पेडा तेसरा ग्लाणा पछयाणोईया और से आपणी पेडा खे नाओ लयी-लयी की बुलाओआ और बारे लयी जाओआ। 4 जेबे से आपणी सारी पेडा खे बारे निकाली चुकोआ, तेबे से तिना रे आगे-आगे चलोआ और पेडा तेस पीछे-पीछे चलणे लगेईया, कऊँकि सेयो तेसरा ग्लाणा पछयाणोईया। 5 पर सेयो ओरी पीछे नि जांदिआ, बल्कि तेसगे ते नठी जाओईया, कऊँकि सेयो ओरी री आवाज नि पछयाणदिआ।” 6 यीशुए तिना खे ये उदारण बोलेया, पर सेयो नि समजे कि यो कुण जी गल्ला ए, जो ये आसा खे बोलणे लगी रा। 7 तेबे यीशुए तिना खे फेर बोलेया, “आऊँ तुसा खे सच-सच बोलूँआ कि पेडा रा पीतरे आऊणे रा द्वार आऊँ ए। 8 जितणे मांते पईले आए, सेयो सब चोर और डाकू ए, पर मेरी पेडे तिना री नि सुणी। 9 द्वार आऊँ ए, जे कोई मेरे जरिए पीतरे जाओगा, तो उद्धार पाओगा, और पीतरे-बारे आया-जाया करना और तेसखे चारा मिलणा। 10 चोर कोई ओर काम करने नि, पर बस चोरी करने, काणे और सत्यानाश करने आओआ, आऊँ तेबे आया कि सेयो जीवन पाओ और बऊत जादा पाओ। 11 अच्छा चराणे वाला आऊँ ए, अच्छा चराणे वाला आपणी पेडा खे आपणा प्राण तक देई देओआ। 12 मजदूर, जो ना तो चराणे वाला ए और ना पेडा रा मालक ए, जेबे भेड़िया आओआ, तो पेडा खे छाडी की नठी जाओआ और भेड़िया तिना पेडा पाँदे अमला करोआ और पेडा खे ओरे-पारे करी देओआ। 13 से तेबे नठी जाओआ, कऊँकि से एक मजदूर ए और तेसखे पेडा री चिन्ता नि। 14 “अच्छा चराणे आऊँ ए, आऊँ आपणी पेडा खे जाणूआ और मेरी पेडा माखे जाणोईया। 15 जियाँ पिता माखे जाणोआ और आऊँ तेसखे जाणूआ और आऊँ पेडा खे आपणे प्राण देऊँआ। 16 मेरिया ओर बी पेडा ए, जो एथो री गवाईणी रिया निया, माखे सेयो बी ल्याऊणिया जरूरी ए, तिना मेरा ग्लाणा सुणना, तेबे एक ई चूण्ड और एक ई चराणे वाला ऊणा। 17 पिता तेबे मांते प्यार राखोआ, कऊँकि आऊँ आपणे प्राण देई देऊँआ, ताकि तेस फेर लयी लूँ। 18 कोई बी मांते मेरा प्राण लई नि सकदा, बल्कि आऊँ तेसखे आपू ई देई देऊँआ। माखे देणे रा अक्क ए और तिजी खे फेर लणे रा अक्क बी ए, ये आज्ञा मेरे पिते ते माखे मिली री।” 19 इना गल्ला री बजअ ते यहूदिया बीचे फेर फूट पड़ी गी। 20 तिना बीचा ते बऊत जणे बोलणे लगे, “एसरे दुष्टात्मा ए और ये पागल ए, एसरी कऊँ सुणोए?” 21 ओरी बोलेया, “इना गल्ला एडा मांणू नि बोली सकदा, जेसरे दुष्टात्मा ओ, क्या दुष्टात्मा अन्दे रिया आखी खोली सकोई?” 22 यरूशलेमो रे समर्णो रा त्योआर था और ठण्डी रा बखत था। 23 यीशु मन्दरो रे आँगणो रे सुलेमानो रे बरंडे(बरामदा) रे कूमणे-फिरने लगी रे थे। 24 तेबे यहूदिये सेयो केरी ते और तिना ते पूछेया, “तां आसा रा मन कदुओ तक दुबिदा रे राखणा? जे तूँ मसीह ए, तो आसा गे साफ-साफ बोली दे।” 25 यीशुए तिना खे बोलेया, “मैं तो तुसा खे बोलेया पर तुसे मेरा विश्वास नि कित्तेया, जो काम आऊँ पिते रे नाओँ ते कहुँआ, सेयो ई मेरे गवा ए। 26 पर तुसे मेरा विश्वास तेबे नि करदे, कऊँकि तुसे मेरी पेडा बीचा ते नि। 27 मेरी पेडा मेरा ग्लाणा पछयाणोईया और आऊँ तिना खे जाणूआ, और सेयो मां पीछे-पीछे चलोईया। 28 आऊँ तिना खे अनन्त जीवन देऊँआ और सेयो कदी नाश नि ऊणिया, और तिना खे कोई मांते छुड़ाई की लई नि सकदा। (aiōn g165, aiōnios g166) 29 मेरे पिता, जिने माखे सेयो देई राखिया, सबी ते बड़ा ए और कोई तिना खे पिते रे आथो ते छुड़ाई की लई नि सकदा। 30 आऊँ और पिता एक ए।” 31 यहूदिये फेर तिना खे पथराव करने खे पाथर चके।

32 तेबे यीशुए तिना खे बोलेया, “मैं तो तुसा खे आपणे पिते री तरफा ते बऊत खरे काम दखाई राखे, तिना बीचा ते तुसे कुण जे कामो री बजअ ते मां पाँदे पथराव करोए?” 33 यहूदिये तिना खे जवाब दित्तेया, “खरे कामा खे आसे तां पाँदे पथराव नि लगी रे करने, बल्कि परमेशरो री निन्दारो बजअ ते और इजी री बजअ ते कि तूँ मांणू ऊई की आपू खे परमेशर बोलोआ।” 34 यीशुए तिना खे बोलेया, “क्या तुसा रे पवित्र शास्त्रो रे नि लिखी राखेया, ‘मैं बोली राखेया, तूँ ईश्वर ए’? 35 तुसे जाणोए कि पवित्र शास्त्रो री गल्ल बदली नि सकदी। जिना गे परमेशरो रा वचन पऊँछी रा, तिने तिजी खे ईश्वर बोलेया, 36 तेबे जो पिते पवित्र ठईराई की दुनिया पाँदे पेजी राखेया, तुसे तेसखे बोलोए कि तूँ निन्दा करोआ, कऊँकि मैं बोली राखेया कि आऊँ परमेशरो रा पुत्र ए। 37 जे आऊँ पिते रे काम नि करदा, तो मेरा विश्वास नि करो। 38 पर जे आऊँ कहुँआ, तेबे चाए मेरा विश्वास नि करो, पर तिना कामो रा विश्वास तो करो। ताकि तुसे जाणो और समजो कि पिता माँदे और आऊँ पिते रे ए।” 39 तेबे तिने फेर तिना खे पकड़ने री कोशिश किती, पर सेयो तिना रे आथो ते निकली गे। 40 तेबे यीशु यरदनो ते पार तेसा जगा रे गये, जेती यूहन्ना पईले बपतिस्मा देया करो था और तेथी रये। 41 तेबे बऊत जणे तिना गे आनी की बोलणे लगे, “यूहन्ने तो कोई चमत्कार नि दखाए, पर जो कुछ यूहन्ने इना रे बारे रे बोलेया था, से सब सच था।” 42 और तेती बऊत जणेया यीशुए पाँदे विश्वास कित्तेया।

11 मरियम और तेसा री बईण मार्था रे गांव बैतनिय्याहो रे लाजर नाओँ रा एक मांणू बमार था। 2 ये सेई मरियम थी, जेसे यीशुए रे पैरा पाँदे इत्र मली की आपणे बालो साथे टूसे थे। एसा रा ई पाई लाजर बमार था। 3 तेबे तेसा री बईणे तिना खे संदेशा पेजेया, “ओ प्रभु! देख, जेस साथे तुसे प्यार राखोए, से बमार ऊई रा।” 4 ये सुणी की यीशुए बोलेया, “ये बमारी मरने जोगी नि, बल्कि परमेशरो री महिमा खे ए, ताकि तेसरी बजअ ते परमेशरो रे पुत्रो री महिमा ओ।” 5 यीशु मार्था और तेसा री बईण और तिना रे पाई लाजरो खे प्यार करो थे। 6 तो जेबे तिने सुणेया कि से बमार ए, तेबे जेती सेयो थे, तेती दो दिन ओर रूकी गे। 7 तेबे दो दिनो ते बाद तिने आपणे चलेया खे बोलेया, “आओ, आसे फेर यहूदिया प्रदेशो खे चलूँए।” 8 चलेया तिना खे बोलेया, “ओ गुरु! एबु तो यहूदी अगुवे तुसा पाँदे पथराव करना चाओ थे और क्या तुसे फेर बी तेथी जाणा चाओए।” 9 यीशुए बोलेया, “क्या दिनो रे बारा कंटे नि ऊँदे? जे कोई दिने चलो तो कोई ठोकर नि खाँदा कऊँकि से एसा दुनिया रा प्रयासा देखोआ। 10 पर जे कोई राथियो खे चलोआ, तो से ठोकर खाओआ, कऊँकि तेसरे प्रयासा नि।” 11 तिने यो गल्ला बोलिया और इजी ते बाद तिना खे बोलणे लगे, “आसा रा दोस्त लाजर सयी गा रा, पर आऊँ तेसखे जगाणे चली रा।” 12 तेबे चलेया तिना खे बोलेया, “ओ प्रभु! जे से सयी रा तो से बची जाणा।” 13 यीशुए तो तेसरी मौता रे बारे रे बोलेया था, पर सेयो समजे कि तिने तेसरी नींजा ते सऊणे रे बारे रे बोलेया। 14 तेबे यीशुए तिना खे साफ बोली ता, “लाजर मरी गा रा 15 और आऊँ तुसा री बजअ ते खुश ए कि आऊँ तेती नि था, ताकि तुसे विश्वास करो, पर एबे आओ आसे तेसगे चलूँए।” 16 तेबे थोमे, जेसखे दिदमुस बोली थे, तिने आपणे साथले चलेया खे बोलेया, “आओ, आसे बी तेस साथे मरने खे चलूँए।” 17 तेबे यीशुए खे बैतनिय्याह गांव रे आयी की पता चलेया कि लाजरो खे कबरा रे राखे रे चार दिन ऊईगे रे। 18 बैतनिय्याह, यरूशलेमो ते नेडे कोई तीन किलोमीटर था। 19 बऊत सारे यहूदी मरियम और मार्था रे गे तिना रे पाईए रे बुलावे खे आयी रे थे। 20 जेबे मार्थ यीशुए रे आऊणे रा समाचार सुणेया, तेबे से तिना खे मिलणे गयी, पर मरियम कअरे ई बैठी रई। 21 मार्थ यीशुए खे बोलेया, “ओ प्रभु! जे तुसे एती ऊँदे, तो मेरा पाई कदी नि मरदा 22 और एबे बी आऊँ जाणूँ कि जो कुछ तुसा परमेशरो ते मांणगा, से तुसा खे मिलणा।” 23 यीशुए तेसा खे बोलेया, “तेरा पाई जिऊँदा ऊई जाणा।” 24 मार्थ तिना खे बोलेया, “आऊँ जाणूँ कि आखरी दिना रे दुबारा जिऊँदा ऊणा रे बखते से फेर जी उठणा।” 25 यीशुए

तेसा खे बोलेया, “दुबारा जिऊँदा ऊणा और जीवन आऊँ ईए, जे कोई मां पॉदि विश्वास करोआ, से जे मरी बी जाओ, तेबे बी जिऊणा। 26 और जो कोई जिओआ और मां पॉदि विश्वास करोआ, से अनन्तकालो तक नि मरना। क्या तूँ एसा गल्ला पॉदि विश्वास करेई?” (aion g165) 27 तेसे तिना खे बोलेया, “आ, ओ प्रभु, आऊँ विश्वास करी चुकी री कि परमेशरो रा पुत्र मसीह, जो दुनिया रे आऊणे वाला था, सेयो तुसेई ये।” 28 ये बोली की से चली गी और आपणी बईण मरियमा खे चोरिए जे बुलाई की बोलेया, “गुरु एथी ई ये और ताखे बुलाणे लगी रा।” 29 ये सुणदे ई से फटाफट उठी की तिना गे आयी। 30 यीशु एषुए तक गांव रे नि पऊँछी रे थे, बल्कि तेथी थे, जेती मार्था तिना खे मिली थी। 31 तेबे जो यहूदी तेसा साथे कअरे थे और तेसा खे शान्ति देणे लगी रे थे। ये देखी की कि मरियम फटाफट उठी की बारे चली गी री, सेयो समजे कि से कब्रा पॉदि रोणे जाई री, तेसा पीछे चली गे। 32 जेबे मरियम तेती पऊँछी, जेती यीशु थे, तो तिना खे देखी की तिना रे पैरा पॉदि पड़ी की और बोलणे लगी, “ओ प्रभु! जे तुसे एती उँदे, तो मेरा पाई कदी नि मरदा।” 33 जेबे यीशुए तेसा खे और तिना यहूदिया खे, जो तेसा साथे आये थे, रोँदे ऊए देखेया, तो आत्मा रे बऊत उदास और बेचैन ऊईगा 34 और तिने बोलेया, “तुसे तेसरा शरीर केयी दबाई राखेया?” तिने तिना खे बोलेया, “ओ प्रभु! चली की देखी लो।” 35 यीशुए री आखी रे पाणी आईगा। 36 तेबे यहूदिये बोलेया, “देखो, ये तेसखे कितणा प्यार करो था।” 37 पर तिना बीचा ते बऊत जणेया बोलेया, “क्या ये, जिने अन्दे री आखी ठीक कित्तिया, ये पनि करी संकेया कि तेसखे मरने ते बचाई देओ?” 38 यीशु मनो रे उदास ऊई की कब्रा पॉदि आए, से एक गुफा थी और एक पात्थर तेते पॉदि राखी राखेया था। 39 यीशुए बोलेया, “पात्थरो खे टाओ।” तेस मरे री बईण मार्था तिना खे बोलणे लगी, “ओ प्रभु! तेसते तो एबे बास आओए, कऊँकि तेसखे मरे रे चार दिन ऊईगे रे।” 40 यीशुए तेसा खे बोलेया, “क्या मैं ताखे नि बोली राखेया था कि जे तूँ विश्वास करेगी, तो परमेशरो री महिमा खे देखेगी।” 41 तेबे तिने से पात्थर टाया, तेबे यीशुए आखी चकी की बोलेया, “ओ पिता आऊँ तेरा धन्यवाद करूँआ कि तूँ मेरी प्रार्थना सुणी ली री 42 और आऊँ जाणूँ था कि तूँ मेरी सदा सुणेया, पर जो पीड़ नेडे-तेडे खड़ी री, तिना री बजअ ते मैं बोलेया, ताकि सेयो विश्वास करो कि तूँ आऊँ पेजी राखेया।” 43 ये बोली की तिने जोरे की बोलेया, “ओ लाजर, कब्रा ते बारे निकली की आईजा।” 44 जो मरी गा था, से कफनो ते आथ पैर बानेया रा निकली गा और तेसरा मूँ टाल्ले की लपेटे रा था, यीशुए बोलेया, “एसखे खोली की जाणे देओ।” 45 तेबे जो यहूदी मरियमा गे आयी रे थे और जेबे तिना रा ये काम देखेया, तेबे तिना बीचा ते कई जणेया तिना पॉदि विश्वास कित्तेया। 46 पर तिना बीचा ते कई जणे फरीसिया गे जाई की यीशुए रे कामो रा समाचार दितेया। 47 तेबे बडे पुरोईत और फरीसिये बऊत बड़ी सभा रे लोका खे कट्टे करी की बोलेया, “आसे क्या करूँए? ये मांणू तो बऊत चमत्कार दखाओआ। 48 जे आसे तेसखे ईयां ई छाडी देऊँगे तो, सबी तेस पॉदि विश्वास करने लगी जाणा और रोमिया एती आयी की आसा री जगा और जाति दूँई पॉदि अक्क करी लणा।” 49 सभा रे सदस्यया बीचा ते कैफा नाओं रे एक मांणूए, जो तेस बखतो रा प्रदान पुरोईत था, तिना खे बोलेया, “तुसे कुछ नि जाणदे 50 और ना ई ये सोचदे कि तुसा खे ये खरा ए कि आसा रे लोका री खातर एक मांणू मरो और सारी जातिया नाश नि ओ।” 51 ये गल्ल तिने आपणी तरफा ते नि बोली, बल्कि तेस बखतो रा प्रदान पुरोईत उणे री बजअ ते भविष्यबाणी कित्ती कि यीशु इस्राएलो रे लोका रिया तई मरना 52 और ना बस तेसा जातिया खे, बल्कि इजी खे बी कि परमेशरो री बिखरी री ल्वादा खे एक करी देओ। 53 तेबे तेसी दिनों ते यहूदी अगुवे यीशुए खे मारने री तरकीब टोलने लगे। 54 तेबेई ती यीशु तेस बखतो ते यहूदिया प्रदेशो रे खुल्लेआम नि कूमी संके, पर तेथा ते सुणसाण जगा रे नेडो रे एप्रैम नाओं रे देशो रे, एक नगरो खे चली गे और आपणे चलेया साथे तेथी रणे लगे। 55 तेबे यहूदिया रा फसह रा त्योआर नेडे था और बऊत सारे लोक फसह ते पईले ई गांव ते यरूशलेमो खे गये कि आपणे

आपू खे शुद्ध करिए। 56 तेबे सेयो यीशुए खे टोलने लगे और मन्दरो रे खडे ऊई की आपू बीचे बोलणे लगे, “तुसे क्या सोचोए? क्या से त्योआरो रे नि आऊणा?” 57 बडे पुरोईत और फरीसिये ये आज्ञा देई राखी थी कि जे केसी खे ये पता ओ कि यीशु केईये, तो बताओ ताकि तेसखे पकड़ी सकूँ।

12 तेबे यीशु फसह रे त्योआरो ते छे दिन पईले बैतनिय्याह गांव रे आए, जेती लाजर था; जो यीशुए मरे रेया बीचा ते जिऊँदा कित्तेया था। 2 तेती तिने तिना खे पाट्टी त्पार कित्ती और मार्था सेवा करने लगी री थी और लाजर तिना बीचा ते एक था, जो यीशुए साथे पाट्टी त्पार बेटे। 3 तेबे मरियमे जटामासिया रा आदा सेर बऊत मईगा इत्र लयी की यीशुए रे पैरा पॉदि मलेया और आपणे बालो की तिना रे पैर टूसे और इत्रो री खूशबुओ साथे सारा कर खुशबूदार ऊईगा। 4 पर तिना रे चलेया बीचा ते यहूदा इस्करियोती नाओं रा एक चेला, जो तिना खे पकड़वाणे वाला था, बोलणे लगेया, 5 “ये इत्र तीन सौ चाँदिए रे सिक्केया रे बेची की कंगाला खे कऊँ नि बांडी ता।” 6 तिने ये गल्ल इजी री खातर नि बोली कि तेसखे कंगाला री चिन्ता थी, पर तेबे कऊँकि से चोर था और तेसगे तिना री पैसेया री थैली रओ थी और तिदे जो कुछ पाओ थे, से निकयाली देओ था। 7 यीशुए बोलेया, “एसा खे कल्ली छाडी देओ। एसे मेरे दबाणे री त्पारिया खे एड़ा करी राखेया। 8 कऊँकि कंगाल तो तुसा साथे सदा रओए, पर आऊँ तुसा साथे सदा नि रणा।” 9 जेबे यहूदिया री बड़ी पीड़ जाणी गी कि से एथी ए, तो सेयो सिर्फ यीशुए री ई बजअ ते नि, बल्कि लाजरो खे मिलणे खे बी आए थे, जो तिने मरे रेया बीचा ते जिऊँदा कित्तेया था। 10 तेबे बडे पुरोईत लाजरो खे बी काणे री तरकीब बणाई। 11 कऊँकि लाजरो री बजअ ते बऊत सारे यहूदिये तिना खे छाडी की यीशुए पॉदि विश्वास कित्तेया। 12 दूजे दिने बऊत सारे लोके त्योआरो खे आये, जेबे लोके सुणेया यीशु यरूशलेमो खे आऊणे लगी रे। 13 तेबे तिने खजूरो रिया डालिया लईया और तिना खे मिलणे खे चली पडे और जोरे-जोरे साथे बोलणे लगे, “होशान्ना! धन्य इस्राएलो रा राजा, जो प्रभुए रे नाओं ते आयी रा।” 14 जेबे यीशुए खे गहदे रा एक बच्चा मिलेया, तो सेयो तेस पॉदि बैठीगे और से यरूशलेम नगरो खे आये। ये तिंयां ई ऊआ जेड़ा पवित्र शास्त्रो रे लिखी राखेया, 15 “ओ यरूशलेमो रे लोको! उरो नि, देख, तेरा राजा गहदे रे बच्चे पॉदि बैठी की आऊणे लगी रा।” 16 यीशुए रे चले यो गल्ला पईले नि समजे थे, पर जेबे यीशुए री महिमा सामणे आयी, तेबे तिना खे याद आया कि यो गल्ला तिना रे बारे रे लिखी राखी थिया; और लोके तिना साथे एड़ा बर्ताव कित्तेया। 17 तेबे पीड़ा रे तिने लोके, जो तेस बखते तिना साथे थे, ये गवाई दिती कि तिने लाजर कब्रा ते बुलाई की मरे रेया बीचा ते जिऊँदा कित्तेया था। 18 एतेरी बजअ ते लोके तिना खे मिलणे आए थे, कऊँकि तिने सुणेया था कि तिने ये सामर्था रा काम दखाया। 19 तेबे फरीसिये आपू बीचे बोलेया, “सोचो, तुसा ते तो कुछ पनि उणे लगी रा, देखो, दुनिया रे सारे लोक एस पीछे ई चली पड़ी रे।” 20 जो लोक फसह रे त्योआरो खे भक्ति करने आए थे, तिना बीचा ते कुछ यूनानी थे। 21 तिने गलील प्रदेशो रे बैतसैदा नगरो रे रणे वाले फिलिप्पुसो गे आयी की बिनती कित्ती कि, “श्रीमान् जी! आसे यीशुए साथे मिलणा चाऊँए।” 22 फिलिप्पुसे आयी की अन्द्रियासो खे बोलेया, तेबे तिने दूँई यीशुए खे बोलेया। 23 तेबे यीशुए तिना खे बोलेया, “से बखत आईगा रा कि माणू रे पुत्रो री महिमा ओ। 24 आऊँ तुसा खे सच-सच बोळूँआ कि जदुओ तक कणका रा दौणा जमीना रे पड़ी की मरी नि जाओ, से कल्ला रओआ, पर जेबे मरी जाओआ, तेबे बऊत फल ल्याओआ। 25 जो आपणे प्राणो खे प्यारा मानोआ, से तेसखे खोई देओआ, और जेसखे एसा दुनिया रे आपणा प्राण प्यारा निए, तेस अनन्त जीवनो तक से बचाणा। (aionios g166) 26 जे कोई मेरी सेवा करो, तो मां पीछे आयी जाओ और जेती आऊँ ऊणा, मेरा सेवक बी तेथी रणा और जो मेरी सेवा करोआ, मेरा पिता तेसरा आदर करोआ। 27 “एबे मेरा जिऊँ बचेचैन उणे लगी रा। तो एबे आऊँ क्या बोळूँ? ‘ओ पिता, माखे एसा कअडिया ते बचा!’ पर आऊँ इजी बजअ ते एसा कअडिया गे पऊँछी रा। 28 ओ पिता, आपणे नाओं

री महिमा करा।” तेबे स्वर्गां ते ये आवाज आई कि, “मैं एसरी महिमा करी राखी और फेर बी करनी।” 29 तेबे जो लोक खड़ी की सुणने लगी रे थे तिने बोलेया, “बादल गरजेया” ओरी बोलेया, “कोई स्वर्गदूत तेथा ते बोलेया।” 30 तेबे यीशुए बोलेया, “ये शब्द माखे नि पर तुसा रे फाईदे खे आयी रा। 31 एबे एसा दुनिया रा न्याय ओआ। एबे एस दुनिया रा सरदार निकयाली देणा 32 और आऊँ जे तरतिया पाँदा ते ऊच्चे रे चढाया जाऊँगा, तो सबी खे आपू गे खींजूँगा।” 33 ये बोली की तिने ये सामणे ल्याई ता कि से केडी मौता साथे मरना। 34 तेबे लोके तिना खे बोलेया, “आसे पवित्र शास्त्री री ये गल्ल सुणी राखी कि मसीह सदा जिऊँदा रणा, तेबे तुसे कऊँ बोलोए कि माणू रे पुत्रो खे ऊच्चे रे चढाणा जरूरी ए? ये माणू रा पुत्र कूणे?” (aiōn g165) 35 यीशुए तिना खे बोलेया, “जोति एबे थोड़ी जी देरा खे तुसा बीचे ए। जदुओ तक जोति तुसा साथे ए, तदुओ तक चलदे रओ। एडा नि ओ कि न्हैरा तुसा खे आयी की केरी देओ, जो न्हैरे रे चलोआ, से नि जाणदा कि केयी जाणे लगी रा। 36 जदुओ तक जोति तुसा साथे ए, जोतिया पाँदे विश्वास करो, ताकि तुसे जोतिया री ल्वाद बणो।” इना गल्ला बोली की यीशु चली गे और तिना ते लूके रे रये। 37 तिने तिना सामणे इतणे चमत्कार दिखाए, पर तेबे बी तिने तिना पाँदे विश्वास नि कितेया। 38 ताकि यशायाह हबिष्यबक्ते रा वचन पूरा ओ, जो तिने बोलेया था, “ओ प्रभु! किने आसा रे सुसमाचारो पाँदे विश्वास करी राखेया? और परमेशरो रा बाहुबल केसणे प्राट ऊई रा?” 39 एतेरी बजअ ते सेयो विश्वास नि करी सके, कऊँकि यशायाहे फेर बी बोलेया, 40 “तिने तिना री आखी अंदिया और मन काठा करी राखेया, केथी एडा नि ओ कि सेयो आखी ते देखो और मनो ते समजो और फिरो और आऊँ तिना खे ठीक करूँ।” 41 यशायाहे यो गल्ला तेबे बोलेया, कऊँकि तिने यीशुए री आऊणे वाली महिमा देखी और तिने तेसरे बारे रे गल्ला कित्तिया। 42 तेबे बी अधिकारिया बीचा ते कई जणे तिना पाँदे विश्वास कितेया। पर फरीसिये री डरो री बजअ ते सामणे नि आऊणा चाओ थे, एडा नि ओ कि प्रार्थना रे कअरो ते निकयाले जाओ। 43 कऊँकि माणूआ ते तारीफ, तिना खे परमेशरो री तारीफा ते जादा प्यारी लगे थी। 44 यीशुए जेरे की बोलेया, “जो मां पाँदे विश्वास करोआ, से मां पाँदे नि, बल्कि मेरे पेजणे वाले परमेशरो पाँदे विश्वास करोआ। 45 और जो माखे देखोआ, से मेरे पेजणे वाले खे देखोआ। 46 आऊँ दुनिया रे जोति ऊई की आयी रा, ताकि जो कोई मां पाँदे विश्वास करो, से न्हैरे रे नि रओ। 47 जो कोई मेरिया गल्ला सुणी की नि मानो, आऊँ तेसखे दोषी नि ठईराँदा, कऊँकि आऊँ दुनिया रे लोका खे दोषी ठईराणे खे नि, बल्कि दुनिया रे लोका खे बचाणे आयी रा। 48 जो माखे तुछ जाणोआ और मेरी गल्ला नि मानदा, तेसखे दोषी ठईराणे वाला एक ईए, मतलब-जो वचन मैं बोली राखेया, तेस ई आखरी दिने रे से दोषी ठईराणा। 49 कऊँकि मैं आपणी तरफा ते गल्ला नि करी राखिया, पर पिते, जिने आऊँ पेजी राखेया, तिने ई माखे आज्ञा देई राखी कि क्या-क्या बोलूँ? और कियॉ बोलूँ? 50 और आऊँ जाणूआ कि तेसरी आज्ञा अनन्त जीवन ए, तेबेई तो जो आऊँ बोलूँआ, जेडा पिते मांगे बोली राखेया, तेडा ई बोलूँआ।” (aiōnios g166)

13 फसह रे त्योआरो ते पईले जेबे यीशुए जाणी ला कि मेरी से कअडी आईगी री कि दुनिया खे छाडी की पिते गे जाऊँ। तेबे आपणे लोका खे जो दुनिया रे थे, जेडा प्यार राखो था, अंतो तक तेडा ई प्यार राखेया। 2 रात की रोतिया रे बखते जेबे शैतान, यहूदा इस्करियोतियो रे मनो रे ये गल्ल पाई चुकेया था कि यीशुए खे पकड़वाओ, 3 यीशुए, ये जाणी की कि पिते सारा अक्क मेरे आधो रे देईता रा और आऊँ परमेशरो गे ते आयी रा और परमेशरो गे ई जाणा, 4 रोतिया गे ते उठी की आपणे टाल्ले खोली ते और पडतणी लयी की आपणा लक बानेया। 5 तेबे पाँडे रे पाणी लयी की आपणे चलेया रे पैर तोये और जो पडतणी आपणे लको रे थी बानी री, तिजी साथे साफ करने लगे। 6 जेबे सेयो शमौन पतरसो गे आए, तेबे तिने तिना खे बोलेया, “ओ प्रभु! क्या तुसे मेरे पैर तोणे लगी रे?” 7 यीशुए बोलेया, “जो आऊँ कऊँआ, से तूँ एबु नि जाणदा, पर इजी ते बाद समजणा।” 8 पतरसे

तिना खे बोलेया, “तुसे मेरे पैर कदी नि तोई सकदे!” ये सुणी की यीशुए तेसखे बोलेया, “जे तूँ माखे आपणे पैर नि तोणे देगा, तो मां साथे तेरा कुछ बी साजा निया।” (aiōn g165) 9 शमौन पतरसे तिना खे बोलेया, “ओ प्रभु! तेबे मेरे पैर नि बल्कि मेरे आथ और सिर बी तोई दे।” 10 यीशुए तेसखे बोलेया, “जो नायी चुकेया रा, तेसरे पैर तोणे ते अलावा कुछ ओर तोणे ते मतलब निए, बल्कि से बिल्कुल शुद्ध ए और तूँ बी शुद्ध ए, पर सब के सब निए।” 11 सेयो आपणे पकड़वाणे वाले खे जाणो थे, तेबेई तो तिने बोलेया, “तुसे सब के सब शुद्ध निए।” 12 जेबे यीशु तिना रे पैर तोई चुके और फेर आपणे टाले पईनी की बैठेगे, तेबे तिने चलेया खे पूछेया, “क्या तुसे समजे कि मैं तुसा साथे क्या कितेया? 13 तुसे माखे गुरू और प्रभु बोलोए और ठीक ई बोलोए, कऊँकि आऊँ तुसा रा गुरू और प्रभु ए। 14 जे मैं प्रभु और गुरू ऊई की तुसा रे पैर तोये, तो तुसा बी नम्र ऊई की एकी दूजे रे पैर तोणे चाईयो। 15 कऊँकि मैं तुसा गे नमूना दखाई ता कि जियॉ मैं तुसा साथे करी राखेया, तुसे बी तियाँ ई करेया करो। 16 “आऊँ तुसा खे सच-सच बोलूँआ, दास आपणे मालको ते बडा नि ऊँदा, और ना पेजेया रा आपणे पेजणे वाले ते। 17 तुसे तो इना गल्ला खे जाणोए और जे इना पाँदे चलो, तो धन्य ए। 18 आऊँ तुसा सबी रे बारे रे नि बोलदा, जो मैं चूपी लये रे, तिना खे आऊँ जाणूआ, पर ये इजी खे ए, ताकि पवित्र शास्त्री रा ये वचन पूरा ओ कि, जिने मेरा दोस्त ऊई की मां साथे रोटी खाई सेई मेरे खलाफ ऊईगा। 19 एबे आऊँ तिजी रे ऊणे ते पईले तुसा खे जताई देऊँआ कि जेबे ये ऊई जाओ, तो तुसे विश्वास करो कि आऊँ सेईए। 20 आऊँ तुसा खे सच-सच बोलूँआ कि जो मेरे पेजे रे खे मानोआ, से माखे मानोआ और जो माखे मानोआ, से मेरे पेजणे वाले खे मानोआ।” 21 ये बोली की यीशु आत्मा रे बेचैन ऊईगे और तिने आपणे चलेया ते बोलेया, “आऊँ तुसा खे सच-सच बोलूँआ कि तुसा बीचा ते एकी जणे आऊँ पकड़वाणा।” 22 चले ये शक करी की कि यो केसरे बारे रे बोलणे लगी रे, एकी दूजे खे देखणे लगे। 23 तिना रे चलेया बीचा ते एक जेस साथे यीशु प्यार राखो थे, यीशुए री छतिया री तरफा खे चुकी की तिना री बगला रे बैठी रा था। 24 तेबे शमौन पतरसे तेसरी तरफा खे साआरा करी की बोलेया, “बता तो, यो केसरे बारे रे बोलणे लगी रे?” 25 तेबे तिने तियाँ ई यीशुए री छतिया री तरफा खे चुकी की पूछेया, “ओ प्रभु! से कूणे?” 26 यीशुए बोलेया, “जेसखे मां ये रोतिया रा टुकड़ा डबोई की देणा, सेईए।” तेबे तिने टुकड़ा शमौनो रे शाऊन, यहूदा इस्करियोतियो खे दितेया, 27 रे रोतिया रा टुकड़ा खाई ई शैतान तेसरे समईगा गा, तेबे यीशुए बोलेया, “जो तूँ करने लगी रा, से फटाफट करा।” 28 पर ओरी चलेया ये नि जाणेया कि तिने ये गल्ल कऊँ बोली। 29 यहूदे गे पैसेया री थैली रओ थी, तेबे किने-किने समजेया कि यीशुए इजी रे बारे रे बोलेया कि जो कुछ आसा खे त्योआरो रे दिने खे चाईयो, से खरीद या कंगाला खे कुछ देई दे। 30 तेबे यहूदा रोतिया रा टुकड़ा खाणे ते बाद फटाफट बारे चली गा और से राथियो रा बखत था। 31 जेबे से बारे चली गा, तेबे यीशुए बोलेया, “एबे मां माणू रे पुत्रो री महिमा ऊई और परमेशरो री महिमा तेसरे ऊई री। 32 तो परमेशरे बी आपू रे पुत्रो री महिमा करनी, बल्कि फटाफट करनी। 33 ओ बालको! आऊँ तुसा साथे थोड़ी देर ओर ए, तेबे तुसा आऊँ टोलना और जेडा मैं यहूदी अगुवा खे बोलेया, “जेती आऊँ जाऊँआ, तेती तुसे नि आयी सकदे,” तेडा ई एबे आऊँ तुसा खे बी बोलूँआ। 34 आऊँ तुसा खे एक नयी आज्ञा देऊँआ कि एकी-दूजे साथे प्यार राखो, जेडा मैं तुसा साथे प्यार राखी राखेया। तेडा ई तुसे बी एकी-दूजे साथे प्यार राखो। 35 जे तुसे आपू बीचे प्यार राखोणे तो इजी तेई सबी जाणी लणा कि तुसे मेरे चले ए।” 36 शमौन पतरसे तिना खे बोलेया, “ओ प्रभु! तुसे केयी चली रे?” यीशुए बोलेया, “जेती आऊँ एबु चली रा, तेती तूँ एबु मां पीछे नि आयी सकदा, पर इजी ते बाद मां पीछे आऊणा।” 37 पतरसे तिना खे बोलेया, “ओ प्रभु! एबु आऊँ तुसा पीछे कऊँ नि आयी सकदा? आऊँ तो तुसा खे आपणे प्राण देणे खे बी त्यार ए।” 38 यीशुए बोलेया, “क्या तां माखे आपणे प्राण देणे? आऊँ ताखे सच-सच बोलूँआ कि मुर्गो बांग नि देणी, जदुओ तक तां मेरा तीन बार ना नि करना।”

14 यीशुए आपणे चेलिया खे बोलेया, “तुसरा रा मन बेचैन नि ओ, तुसे परमेशरो पंदि विश्वास राखोए, मां पंदि बी राखो। 2 मेरे पिते रे कअरो रे बऊत जगा ए रणे खे, जे ऊँदी नि तो मां तुसरा खे बोली देणा था, कऊँकि आऊँ तुसरा खे जगा त्यार करने जाऊँआ 3 और तेती जाई की तुसरा खे जगा त्यार करने ते बाद मां तुसे आयी की आपू साथे लयी जाणे खे पेर आऊणा, ताकि जेती आऊँ रऊँ, तुसे बी मां साथे तेथी रओ। 4 और जेती आऊँ जाऊँआ, तुसे तेथी री बाट जाणोए।” 5 थोमे तिना खे बोलेया, “ओ प्रभु! आसे नि जाणदे कि तुसे केयी जाओए? तो बाट कियाँ जाणी सकूँए?” 6 यीशुए तेसखे बोलेया, “बाट, सच्चाई और जीवन आऊँ ईए; मांते बिना कोई बी पिते गे नि पऊँछी सकदा। 7 जे तुसे आऊँ जाणी राखेया, तो मेरा पिता बी जाणी राखेया और एबे तेसखे जाणो बी ए और से देखी बी राखेया।” 8 फिलिप्पुसे तिना खे बोलेया, “ओ प्रभु! पिते खे आसा गे बताई देओ, येई आसा खे बऊत ए।” 9 यीशुए तेसखे बोलेया, “ओ फिलिप्पुस! आऊँ इतणे दिना ते तुसरा साथे ए और क्या तूँ माखे नि जाणदा? जिने आऊँ देखी राखेया, तिने पिता देखी राखेया, तेबे तूँ कऊँ बोलेया कि पिते खे आसा गे दखाई देओ? 10 क्या तूँ विश्वास नि करदा कि आऊँ पिते रे ए और पिता मांदि ए? यो गल्ला जो आऊँ तुसरा खे बोळूँआ, आपणी तरफा ते नि बोलदा, पर पिता मांदि रई की आपणे काम करोआ। 11 मेरा विश्वास करो कि आऊँ पिते रे ए और पिता मांदि ए, नई तो तिना चमत्कारा री बजअ ते जो मैं करी राखे मेरा विश्वास करो। 12 आऊँ तुसरा खे सच-सच बोळूँआ कि जो मां पाँदि विश्वास राखोआ, यो काम, जो आऊँ कऊँआ, तेस बी करने, बल्कि इना ते बी बडे काम करने, कऊँकि आऊँ पिते गे चली रा। 13 और जो कुछ तुसे मेरे नाओं ते मांगोगे, सेई मां करना ताकि पाऊए री बजअ ते पिते री महिमा ओ। 14 जे तुसे मांते, मेरे नाओं ते कुछ बी मांगोगे, तो मां से करना। 15 “जे तुसे मांते प्यार राखोए, तो मेरी आज्ञा खे मानोगे। 16 आऊँ पिते ते प्रार्थना कऊँगा और तेस तुसरा खे एक ओर मददगार पेजणा, ताकि से तुसरा साथे सदा रओ। (aion g165) 17 से पवित्र आत्मा ए जो परमेशरो रे बारे रे पूरी सच्चाई बताओआ। जेसखे दुनिया मानी नि सकदी, कऊँकि से ना तेसखे देखोआ और ना तेसखे जाणोआ, तुसे तेसखे जाणोए, कऊँकि से तुसरा साथे रओआ और से तुसरा रे ऊणा। 18 “मां तुसे अनाथ नि छाडणे, आऊँ तुसरा गे वापस आऊँआ। 19 और थोडी जी देर रईगी री कि दुनिया आऊँ नि देखणा, पर तुसरा आऊँ देखणा, कऊँकि आऊँ जिऊँदा ए, तुसे बी जिऊँदे रणे। 20 जेबे आऊँ जिऊँदा ऊई की वापस आऊँणा, तेस दिने तुसरा जाणना कि आऊँ आपणे पिते रे ए और तुसे मांदि ए और आऊँ तुसरा रे ए। 21 जेसगे मेरी आज्ञा ओ और से तिना खे मानोआ, सेई मां साथे प्यार राखोआ, तेसते मेरे पिते प्यार राखणा और मां बी तेसते प्यार राखणा और आपणे आपू खे तेसदे प्रगट कऊँगा।” 22 तिने यहूदे, जो इस्करियोती नि था, तिने बोलेया, “ओ प्रभु! क्या ऊआ कि तुसे आपू खे आसा पाँदि प्रगट करना चाओए और दुनिया रे लोका पंदि नि?” 23 यीशुए तेसखे बोलेया, “जे कोई मांते प्यार राखोआ, तो तेस मेरे उपदेश मानणे और मेरे पिते तेसते प्यार राखणा और आसे तेसगे आऊणे और तेस साथे रणे। 24 “जो मांते प्यार नि करदा, से मेरे उपदेश नि मानदा और जो उपदेश तुसे सुणोए, से मेरा नि बल्कि पिते राए, जिने आऊँ पेजेया। 25 यो गल्ला मैं तुसरा साथे रंदि ऊए तुसरा खे बोलिया। 26 पर मददगार, मतलब-पवित्र आत्मा, जो पिते मेरे नाओं ते पेजणा, तेस तुसरा खे सारिया गल्ला सिखयाणियाँ और जो कुछ मैं तुसरा खे बोली राखेया, तेस तुसरा खे सब कुछ याद दलयाणा। 27 “आऊँ तुसरा खे शान्ति देऊँआ, आपणी शान्ति तुसरा खे देऊँआ, जियाँ दुनिया देओई, आऊँ तुसरा खे नि देंदा, तुसरा रा मन नि कबराओ और ना डरो। 28 तुसे सुणेया कि मैं तुसरा खे बोलेया, आऊँ जाऊँआ और तुसरा गे फेर आऊँआ, जे तुसे मांते प्यार राखदे, तो एसा गल्ला ते खुश ऊँदे कि आऊँ पिते गे चली रा, कऊँकि पिता मांते बड़ा ए। 29 मैं एबे तिना सारी घटना ऊणे ते पईले तुसरा खे बोली ताकि जेबे से ऊई जाओ, तो तुसे मां पाँदि विश्वास करो। 30 मांगे एबे तुसरा साथे गल्ला करने खे ओर जादा बखत निए, कऊँकि एसा दुनिया रा सरदार

आऊणे वाला ए। मां पाँदि तेसरा कोई अक्क निए। 31 पर ये तेबे ऊआ, ताकि दुनिया जाणो कि आऊँ पिते ते प्यार कऊँआ और जियाँ पिते माखे आज्ञा दित्ती, आऊँ तियाँ ई कऊँआ। उठो, एथा ते चलूँए।”

15 “सच्ची अँगूरा री बेल आऊँ ई ये और मेरा पिता जिम्मीदार ए। 2 जो डाली मांदि ए और फलदी नि, से तेसा खे बाडी देओआ और जो फलोई, से तेसा री कांट छांट करोआ, ताकि ओर बी जादा फलो। 3 तुसे तो तेस उपदेशो री बजअ ते, जो मैं तुसरा खे बोली राखेया, शुद्ध ए। 4 तुसे मांदि बणे रे रओ और आऊँ तुसरा रे। जियाँ डाली जे अँगूरा री बेला रे बणी री नि रओ, तो आपणे आपू ते नि फली सकदी, तियाँ ई तुसे बी जे मांदि बणे रे नि रओगे, तो फली नि सकदी। 5 आऊँ अँगूरा री बेल ए, तुसे डालिया ए, जो मांदि बणेया रा रओआ और आऊँ तेसरे, तिदे बऊत फल लणोआ, कऊँकि मांते लग रई की तुसे कुछ पनि करी सकदे। 6 जे कोई मांदि बणेया रा नि रओ, तो से तेसा बेकार और सूकी डालिया जेड़ा सेटेया जाओआ और लोक तिजी खे कट्टे करी की आगी रे सेटी देओए और सेयो फूखी जाओईया। 7 जे तुसे मांदि बणे रे रओ और मेरे उपदेश तुसरा रे बणे रे रओ, तो जो चाओ, से माँगो और से तुसरा खे ऊई जाणा। 8 मेरे पिते री महिमा इजी साथे ई ओई कि तुसे बऊत सारा फल ल्याओ। तेबेई तुसे मेरे चले ऊणे। 9 “जेड़ा पिते मां साथे प्यार राखेया, तेड़ा ई मैं तुसरा साथे प्यार राखेया। मेरे प्यारो रे बणे रओ। 10 जे तुसे मेरी आज्ञा खे मानोगे, तो मेरे प्यारो रे बणे रे रणे, जियाँ मैं आपणे पिते री आज्ञा मानी राखिया और तेसरे प्यारो रे बणेया रा रऊँआ। 11 मैं तुसरा खे यो गल्ला तेबे बोलिया ताकि मेरी खुशी तुसरा रे बणी री रओ और तुसरा री खुशी पूरी ऊई जाओ। 12 मेरी आज्ञा ये कि जेड़ा मैं तुसरा साथे प्यार राखेया, तेड़ा ई प्यार तुसे बी एकी-दूजे साथे राखो। 13 इजी ते बड़ा प्यार केसी रा निए कि कोई आपणे दोस्ता खे आपणा प्राण देओ। 14 जो कुछ आज्ञा आऊँ तुसरा खे देऊँआ, जे तुसे मानो, तो तुसे मेरे दोस्त ए। 15 आजो ते आऊँ तुसरा खे दास नि बोळूँगा, कऊँकि दास नि जाणदा कि मालक क्या करोआ, पर मैं तुसरा खे दोस्त बोलेया, कऊँकि मैं जो गल्ला आपणे पिते ते सुणिया, सेयो सब तुसरा खे बताई तिया। 16 तुसे आऊँ नि चुणेया, पर मैं तुसे चुणी राखे और तुसे ठराए, ताकि तुसे जाई की फल ल्याओ और तुसरा रा फल बणेया रा रओ कि जो कुछ तुसे मेरे नाओं ते पिते ते माँगो, से तुसरा खे देओ। 17 इना गल्ला री आज्ञा आऊँ तुसरा खे तेबे देऊँआ, ताकि तुसे एकी-दूजे साथे प्यार राखो। 18 “जे दुनिया रे लोक तुसरा ते बैर राखोए, तो तुसे जाणोए कि तिने तुसरा ते पईले मांते बी बैर राखेया। 19 जे तुसे दुनिया रे ऊँदे, तो दुनिया रे लोक तुसरा साथे आपणेया जेड़ा प्यार राखदे, कऊँकि तुसे दुनिया रे निए, बल्कि मैं तुसे चुणी ले रे, तेबेई तो दुनिया तुसरा ते बैर राखोई। 20 याद राखो कि मैं तुसरा खे क्या बोलेया था कि दास आपणे मालको ते बड़ा नि ऊँदा, जे तिने आऊँ सताया, तो तुसे बी सताणे, जे तिने मेरा उपदेश मानी ला, तो तुसरा रा बी मानी लणा। 21 मां पाँदि विश्वास करने री बजअ ते तिना तुसरा साथे बुरा बर्ताव करना, कऊँकि सेयो मेरे पेजणे वाले परमेशरो खे नि जाणदे। 22 जे आऊँ नि आऊँदा और तिना साथे गल्ला नि करदा, तो सेयो पापी नि ठईरंदे, पर एबे तिना खे तिना रे पापो खे कोई बाहा निए। 23 जो मांते बैर राखोआ, से मेरे पिते ते बी बैर राखोआ। 24 “जे आऊँ तिना बीच सेयो चमत्कारा रे काम नि करदा, जो ओरी किने नि कित्ते, तो सेयो पापी नि ठईरंदे, पर एबे तो तिने आऊँ तिना चमत्कारा रे काम करदे ऊए देखी ला रा और तिने मांते और मेरे पिता दूँई ते बैर कित्तेया। 25 और ये तेबे ऊआ, ताकि से वचन पूरा ओ, जो तिना रे पवित्र शास्त्रो रे लिखी राखेया, ‘तिने मांते बेकार बैर कित्तेया।’ 26 पर जेबे से मददगार आऊणा, जो मां तुसरा गे पेजणा, मतलब-सच्यो रा आत्मा, जो पिते री तरफा ते निकली रा, तो तेस मेरी गवाई देणी 27 और तुसे बी गवा ए, कऊँकि तुसे शुरूओ तेई मां साथे रई रे।”

16 “यो गल्ला मैं तुसरा खे तेबे बोलिया, ताकि तुसे केसी रे बी बईकवे रे नि आओ। 2 तिना तुसे प्रार्थना रे कअरो ते निकाली देणे, बल्कि से

बखत आऊणा कि जेस केसी तुसे काणे, तेस समजणा कि आसे परमेशरो री सेवा करने लमी रे। 3 तिना एडा तेबे करना, कऊँकि तिने ना पिता जाणेया और ना माखे जाणेया। 4 पर यो गल्ला मैं तुसा खे तेबे बोलिया, ताकि जेबे तिना रा बखत आओ, तेबे तुसा खे याद आयी जाओ कि मैं तुसा खे पईले ई बोली ता था और जदुओ ते तुसे मेरे चले बणे मैं तुसा खे यो गल्ला तेबे नि बोलिया, कऊँकि आऊँ तुसा साथे था। 5 “एबे आऊँ आपणे पेजणे वाले गे चली रा और तुसा बीचा ते कोई मांते नि पुछदा, “तूँ केयी चली रा?” 6 पर मैं यो जो गल्ला तुसा खे बोली राखिया, तेबेई तो तुसा रा मन दुः खी ऊईगा रा। 7 तेबे बी आऊँ तुसा खे सच बोलूँआ कि मेरा जाणा तुसा री तई अछा ए, कऊँकि जे आऊँ नि जाऊँगा, तो से मददगार तुसा गे नि आऊणा, पर जे आऊँ जाऊँगा, तो तेस तुसा गे पेजी देऊँगा। 8 तेस आयी की दुनिया खे पाप, परमेशरो री धार्मिकता और न्याय रे बारे रे दोषी ठराणा। 9 “पापो रे बारे रे तेबे, कऊँकि सेयो मां पाँद विश्वास नि करदे 10 और धार्मिकता रे बारे रे तेबे, कऊँकि आऊँ पिते गे जाऊँआ और तुसा आऊँ फेर नि देखणा। 11 न्याय रे बारे रे तेबे, कऊँकि दुनिया रा सरदार मतलब शैतान दोषी ठईराई ता रा। 12 माखे तुसा ते ओर बी गल्ला बोलणिया ए, पर एबु तुसे तिना खे सईन नि करी सकदे। 13 पर जेबे से, मतलब-सच्यो रा आत्मा आऊणा, तेबे तुसा खे सब सच्यो री बात बतावे, कऊँकि तेस आपणी तरफा ते नि बोलणा, पर जो कुछ तेस परमेशरो ते सुणना, सेई बोलणा और आऊणे वाली गल्ला तुसा गे बताणिया। 14 तेस मेरी महिमा करनी, कऊँकि तेस मेरिया गल्ला बीचा ते लयी की तुसा खे बताणिया। 15 जो कुछ पिते राप, से सब मेरा ए, तेबेई तो मैं बोलेया कि तेस मेरी गल्ला बीचा ते लयी कि तुसा खे बताणिया। 16 “थोड़ी देरा तक तुसा आऊँ नि देखणा और तेबे थोड़ी देरा बाद आऊँ देखणा।” 17 तेबे तिना रे बऊत चलेया आपू बीचे बोलेया, “ये क्या ए, जो ये आसा खे बोलणे लगी रे, “थोड़ी देर तुसा आऊँ नि देखणा और तेबे थोड़ी देर बाद आऊँ देखणा?” और ये इजी खे कऊँकि आऊँ पिते गे जाऊँआ।” 18 तेबे तिने बोलेया, “ये थोड़ी देर, जो ये बोलणे लगी रे, क्या गल्ल ए? आसे नि जाणदे कि क्या लगी रे बोलणे?” 19 यीशुए ये जाणी की कि यो मांते इजी रा मतलब पूछणा चाओए, तिना खे बोलेया, “क्या तुसे आपू बीचे मेरी इना गल्ला रे बारे रे पूछ-ताछ करोए कि थोड़ी देर बाद तुसा आऊँ नि देखणा और थोड़ी देर बाद आऊँ देखणा? 20 आऊँ तुसा खे सच-सच बोलूँआ कि मेरे मरने ते बाद तुसे रोणे और दुः ख करना, पर दुनिया रे लोका खुश ऊणा, तुसा खे दुः ख ऊणा, पर जेबे आऊँ जिऊँदा ऊई की वापस आऊणा तो तुसा रा दुः ख, खुशिया रे बदली जाणा। 21 जेबे जवाणस बच्चा पैदा करने लगोई, तो तेसा खे पीड ओई, कऊँकि तेसा रे दुः खो री कअडी आयी पऊँछोई, पर जेबे से बालक जम्मी चुकोई, तो तेबे एसा खुशिया साथे कि दुनिया रे एक माणू पैदा ऊआ, तेस दुः खो खे फेर याद नि करदी। 22 तियाँ ई तुसा खे बी एबुए तक दुः ख ए, पर आऊँ तुसा खे फेर मिलणा और तुसा रे मनो रे खुशी ऊणी और तुसा री खुशी केसी पनि छिनणी। 23 तेस दिने तुसा मांते कुछ नि पूछणा, आऊँ तुसा खे सच-सच बोलूँआ कि जे पिते ते कुछ मांगोणे, तो तेस मेरे नाओं ते तुसा खे देणा। 24 एबुए तक तुसे मेरे नाओं ते पिता ते कुछ नि मांगेया, परमेशरो ते मांगो तो तुसा खे मिलणा, ताकि तुसा री खुशी पूरी ऊई जाओ। 25 “मैं तुसा खे यो गल्ला उदारणा रे बोलिया, पर से बखत आऊणा जेबे मां तुसा खे फेर उदारणा रे नि बोलणा, बल्कि खुली की पिते रे बारे रे तुसा गे बताणा। 26 तेस दिने तुसा आपू मेरे नाओं ते पिते ते मांगणा, और आऊँ तुसा खे ये नि बोलदा कि आऊँ तुसा रिया तई पिते ते प्रार्थना करूँगा। 27 कऊँकि पिता परमेशर तो आपू बी तुसा ते प्यार राखोआ, कऊँकि तुसे मां साथे प्यार राखी राखेया और ये बी विश्वास कित्तेया कि आऊँ पिते री तरफा ते आयी रा। 28 आऊँ पिते ते निकली की दुनिया रे आयी रा, फेर दुनिया खे छाडी की पिते गे जाऊँआ।” 29 तिना रे चलेया बोलेया, “देखो, एबे तो तुसे खुली की बोलणे लगी रे और कोई बुजाणी नि बोलदे। 30 एबे आसा खे पता लगी गा कि तुसे सब कुछ जाणोए और तुसा खे कोई मतलब निए कि कोई तुसा ते कुछ पूछो, इजी पाँद आसे विश्वास करूँए कि तुसे परमेशरो री तरफा

ते आयी रे।” 31 ये सुणी की यीशुए तिना खे बोलेया, “क्या एबे तुसे विश्वास करोए 32 देखो, से कअडी आऊणी, बल्कि आईगी री कि तुसा ओरे-पारे ऊई की आपणी-आपणी बाटा रिये जाणा और आऊँ कल्ला छाडी देणा, तेबे बी आऊँ कल्ला नि रणा, कऊँकि पिता मां साथे ए। 33 मैं तुसा खे यो गल्ला तेबे बोलिया, ताकि तुसा खे मांदे शान्ति मिलो, दुनिया रे तुसा खे क्लेश ओआ, पर इम्मत राखो, मैं एसा दुनिया रा सरदार शैतान जीती ला रा।”

17 यीशुए आपणे चलेया खे यो सब गल्ला बोलणे ते बाद आपणिया आखी समों री तरफा खे चकिया और बोलेया, “ओ पिता! से बखत आईगा रा, आपणे पुत्रो री महिमा कर, ताकि पुत्र बी तेरी महिमा करो। 2 कऊँकि तें तेसखे सबी प्राणिया पाँद अक्क दितेया कि जो तें तेसखे देई राखे, तिना सबी खे से अनन्त जीवन देओ (aiōnios g166) 3 और अनन्त जीवन ये कि सेयो ताखे महान सच्चे परमेशरो खे और यीशु मसीह खे, जो तें पेजी राखेया, जाणो। (aiōnios g166) 4 जो काम तें माखे करने खे दितेया था, से काम पूरा करी की मैं तरतिया पाँद तेरी महिमा किती। 5 एबे ओ पिता! तूँ आपू साथे मेरी महिमा, तेसा महिमा साथे कर, जो दुनिया री सृष्टिया ते पईले, मेरी तां साथे थी। 6 “मैं तेरा नाओं तिना माणूआ गे प्रगट कित्तेया, जो तें माखे दुनिया बीचा ते दित्ते, सेयो तेरे थे और तें सेयो माखे दित्ते और तिने तेरे वचन मानी ले रे। 7 एबे तिना खे पता लगी गा रा कि जो कुछ तें माखे देई राखेया, से सब तेरी तरफा ते ए। 8 कऊँकि जो उपदेश तें माखे दित्ते, मैं सेयो तिना गे पऊँछाए और तिने सेयो माने और सच-सच जाणी ला रा कि आऊँ तेरी तरफा ते आयी रा और विश्वास करी ला रा कि तें ई आऊँ पेजी राखेया। 9 आऊँ तिना खे बिनती करूँआ, जो तें माखे देई राखे, कऊँकि सेयो तेरे ए। दुनिया रे लोका खे आऊँ बिनती नि करदा। 10 और जो कुछ मेरा ए से सब कुछ तेरा ए, और जो तेरा ए से मेरा ए और इना ते मेरी महिमा प्रगट ऊई री। 11 “आऊँ एबे दुनिया रे नि रणा, पर मेरे चले एसा दुनिया रे रणे और आऊँ तांगे आऊणे लगी रा, ओ पवित्र पिता! आपणी तेसा सामर्था ते जो तें माखे देई राखी, तिना री रक्षा कर ताकि सेयो आसा जेडे, एक ओ। 12 जेबे आऊँ तिना साथे था, तेबे मैं तेरे तेस नाओं ते, जो तें माखे देई राखेया, तिना री रक्षा किती, मैं तिना री चौकसी किती और विनाशो रे पाऊए खे छाडी की तिना बीचा ते कोई बी नाश नि ऊआ, ताकि पवित्र शास्त्रो री गल्ल पूरी ओ। 13 पर एबे आऊँ तांगे आऊँआ और इना गल्ला खे दुनिया रे रंदे ऊए बोलूँआ कि सेयो मेरी खुशी आपू रे पूरी करो। 14 मैं तेसा वचन तिना गे पऊँछाई ता रा और दुनिया रे लोके तिना ते बैर कित्तेया, कऊँकि जिंयाँ आऊँ दुनिया रा निए, तियाँ ई सेयो बी दुनिया रे निए। 15 “आऊँ ये प्रार्थना नि करदा कि तूँ तिना खे दुनिया तेई चकी लो, पर ये कि तूँ तिना खे तेस दुष्टो ते बचाई कि राख। 16 जिंयाँ आऊँ दुनिया रा निए, तियाँ ई सेयो बी दुनिया रे निए। 17 सच्यो रे जरिए तिना खे पवित्र कर, तेरा वचन सच्चा ए। 18 जिंयाँ तें आऊँ दुनिया रे पेजेया, तियाँ ई मैं बी सेयो दुनिया रे पेजे। 19 तिना रे फाईदी री खातर आऊँ आपणे आपू खे पवित्र करूँआ, ताकि सेयो बी सच्यो रे जरिए पवित्र करे जाओ। 20 “आऊँ सिर्फ इना चलेया खेई बिनती नि करदा, पर तिना खे बी, जेस इना रे वचनो रे जरिए मां पाँद विश्वास करना। 21 ताकि सेयो सब एक ओ, जिंयाँ तूँ ओ पिता मांदे ए और आऊँ तांदे ए, तियाँ ई सेयो बी आसा रे ओ, ताकि दुनिया रे लोक विश्वास करो कि तें ई आऊँ पेजी राखेया। 22 से महिमा, जो तें माखे देई राखी, मैं तिना खे दित्ती, ताकि सेयो तियाँ ई एक ओ, जिंयाँ आसे एक ए। 23 आऊँ तिना रे और तूँ मांदे, ताकि सेयो सिद्ध ऊई की एक ऊई जाओ और दुनिया जाणो कि तें ई आऊँ पेजी राखेया और जेडा तें मां साथे प्यार राखेया, तेडा ई तिना साथे प्यार राखेया। 24 ओ पिता! आऊँ चाऊँआ कि जो तें माखे देई राखे, जेती आऊँ ए, तेती सेयो बी मां साथे ओ, ताकि सेयो मेरी तेसा महिमा खे देखो, जो तें माखे देई राखी, कऊँकि तें दुनिया री सृष्टिया ते पईले, मां साथे प्यार राखेया। 25 ओ धार्मिक पिता! दुनिए आऊँ नि जाणेया, पर मैं तूँ जाणेया और इने चलेया बी जाणेया कि तें ई आऊँ पेजी

राखेया। 26 मैं तेरा नाओं तिनो गे बताया और बतांदा रऊँगा कि जो प्यार ताखे मांते था, से तिनो रे रओ और आऊँ तिनो रे रऊँ।”

18 यीशु इना गल्ला बोली की आपणे चलेया साथे किद्रोनो रे नाले ते पार गये, तेती एक बगीचा था, जिदे सेयो और तिनो रे चले गये। 2 तेसरा पकड़वाणे वाला यहूदा बी से जगा जाणो था, कऊँकि यीशु आपणे चलेया साथे तेती जाया करो था 3 तेबे यहूदा सिपाईया री एक पलटण, बडे पुरोईत और फरीसिया री तरफा ते मन्दरो रे पईरदारा खे लयी की दिऊए, मशाला री अण्डियार लयी की तेती आया। 4 तेबे यीशुए तिनो सबी गल्ला खे जो तिनो पाँदे आऊणे वालिया थिया, जाणी की निकले और तिनो खे बोलणे लगे, “केसखे टोलने लगी रे?” 5 तिनो तिनो खे जवाब दितेया, “यीशु नासरिये खे।” यीशुए तिनो खे बोलेया, “आऊँ ई ये” और तिनो खे पकड़वाणे वाला यहूदा बी तिनो साथे खड़ी रा था। 6 यीशुए रे ये बोलेदे ई, “आऊँ ईए,” सेयो पीछे आटी की जमीना पाँदे रूडी गे। 7 तेबे तिनो फेर तिनो ते पूछेया, “तुसे केसखे टोलोए?” तिनो बोलेया, “यीशु नासरिये खे।” 8 यीशुए बोलेया, “आऊँ तो तुसा खे बोली चुकेया कि आऊँ ईए, जे माखे टोलने लगी रे तो इना लोका खे जाणे देओ।” 9 ये तेबे ऊआ ताकि से वचन पूरा ओ, जो तिनो बोलेया था, “जो तैं माखे देई राखे, तिनो बीचा ते मैं एक पनि खोया।” 10 शमोन पतरसे जो तलवार तेसगे थी, खिंजी और प्रदान पुरोईतो रे दासो पाँदे चलाई की तेसरा दाँणा कान ई उड़ाईता, तेस दासो रा नाओं मलखूस था। 11 तेबे यीशुए पतरसो खे बोलेया, “आपणी तलवार म्यानो रे राखी दे, जो कटोरा मेरे पिते देई राखेया, क्या आऊँ तेस नि पीऊँ?” 12 तेबे सिपाईए, सूबेदारे और यहूदिया रे मन्दरो रे पईरदारे यीशु पकड़ी की बानी ते। 13 और पईले तिनो खे हन्ने गे लयी गे, कऊँकि से तेस सालो रे प्रदान पुरोईत केफे रा सऊरा था। 14 ये सेई कैफा था, जिने यहूदिया खे सला दित्ती थी कि आसा रे लोका री खारन एक मांणूए रा मरना ठीक ए। 15 शमोन पतरस और एक ओर चेला बी यीशुए पीछे-पीछे चली पडे। ये चेला प्रदान पुरोईतो रा जाणने वाला था और यीशुए साथे प्रदान पुरोईतो रे आँगणो रे गया। 16 पर पतरस द्वारो गे खडे रा रया, तेबे से दूजा चेला, जो प्रदान पुरोईतो री जाण-पछयाणा रा था, बारे निकलेया और द्वारपालिना खे बोली की पतरसो खे पीतरे ली आया। 17 तेसे दासिये, जो द्वारपालिनी थी, पतरसो खे बोलेया, “क्या तूँ बी एस मांणूए रे चलेया बीचा ते ए?” तिनो बोलेया, “आऊँ नि।” 18 दास और मन्दरो रा पईरदारे ठण्डी रे मारे आग बाली की खड़ी की सेखणे लगी रे थे और पतरस बी तिनो साथे खड़ी की आग सेखणे लगी रा था। 19 तेबे प्रदान पुरोईते यीशुए ते तिनो रे चले और तिनो रे उपदेशो रे बारे रे पूछेया। 20 यीशुए जवाब दितेया, “मैं दुनिया रे खुली की गल्ला कित्तिया, मैं प्रार्थना रे कओरो रे और मन्दरो रे, जेती सब यहूदी कट्टे ओया करो थे, सदा उपदेश दितेया और चोरिए कुछ नि बोलेया। 21 तूँ मांते कऊँ पूछेया? सुणने वालेया ते पूछ कि मैं तिनो खे क्या बोलेया? देख, सेयो जाणोए कि मैं क्या-क्या बोलेया?” 22 जेबे तिनो ये बोलेया, तेबे मन्दरो रे पईरदारा बीचा ते एक ई जणे, जो नेडे था खडे रा, यीशुए खे थप्पड बाई की बोलेया, “क्या तूँ प्रदान पुरोईतो खे ईयाँ जवाब देआ।” 23 यीशुए तेसखे बोलेया, “जे मैं बुरा बोलेया, तो तेसा बुराईया पाँदे गवाई दे, पर जे खरा बोली राखेया, तो माखे कऊँ बाणे लगी रा?” 24 हन्ने यीशु बानेया रा कैफे प्रदान पुरोईतो गे पेजी ता। 25 शमोन पतरस खडे रा आग सेखणे लगी रा था। तेबे तिनो तेसखे बोलेया, “क्या तूँ बी एसरे चलेया बीचा ते ए?” तिनो बोलेया, “आऊँ नि।” 26 प्रदान पुरोईतो रे दासो बीचा ते एकी जणे जो तेसरे टब्बरो बीचा ते था, जेसरा कान पतरसे बाडीता था, बोलेया, “क्या मैं तूँ यीशुए साथे बगीचे रे नि देखेया था?” 27 पतरसे फेर ना करी ती और तेबुई मुर्गें बांग दित्ती। 28 तेबे सेयो यीशुए खे कैफे गे ते राज्यपालो रे मुख्यालय रे लयी गे और प्यागा रा बखत था, पर सेयो आपू पीतरे नि गये, ताकि अशुद्ध ना ओ, पर फसह रे त्योआरो री रोटी खाई सको। 29 तेबे पिलातुस तिनो गे बारे निकलेया और बोलेया, “तुसे एस मांणूए पाँदे

किजी गल्ला रा दोष लगाओए?” 30 तिनो जवाब दितेया, “ये मांणू अपराधी ए, तेबेई तो आसे एसखे तांगे लई की आई रे।” 31 पिलातुसे तिनो खे बोलेया, “तुसेई एसखे लयी जाई की आपणे बिधानो रे मुताबिक न्याय करो।” यहूदिये अगुवे तेसखे बोलेया, “आसा खे अक्क नि ए कि कसी रा प्राण लऊँ।” 32 ये तेबे ऊआ ताकि यीशुए री से गल्ल पूरी ओ, जो तिनो ये साअरा करदे ऊए बोली थी कि तेसरा मरना केडा ऊणा। 33 तेबे पिलातुस फेर राज्यपालो रे मुख्यालय रे पीतरे गया और यीशुए खे बुलाई की तिनो ते पूछेया, “क्या तूँ यहूदिये रा राजा ए?” 34 यीशुए बोलेया, “क्या तूँ ये गल्ल आपणी तरफा ते बोलणे लगी रा या ओरी मेरे बारे रे तांगे बोली?” 35 पिलातुसे बोलेया, “तुसे क्या सोचोए आऊँ यहूदी ए? तेरी जातिया वाले और बडे पुरोईते ई तूँ मेरे आथो रे देई राखेया। तैं एड़ा क्या करी राखेया?” 36 यीशुए जवाब दितेया, “मेरा राज्य एसा दुनिया रा नि ए, जे मेरा राज्य एसा दुनिया रा ऊँदा, तो मेरे सेवक लइदे और माखे यहूदी अगुवो रे आथो रे नि देँ, पर एबे मेरा राज्य एथो रा नि ए।” 37 पिलातुसे तिनो खे बोलेया, “तो क्या तूँ राजा ए?” यीशुए बोलेया, “तूँ आपू बोलेया कि आऊँ राजा ए मैं तेबेई तो जन्म लया और तेबेई तो दुनिया रे आथी रा कि सच्यो री गवाई देऊँ, जो कोई सच्चाईया ते प्यार राखेओ, से मेरा शब्द सुणोआ।” 38 पिलातुसे बोलेया, “तो सच क्या ए?” ये बोली की से फेर यहूदी अगुवे गे चली गा और तिनो खे बोलेया, “आऊँ तो तेसदे कोई दोष नि पाँदा।” 39 पर तुसा री ये रवाज ए कि आऊँ फसह रे त्योआरो रे तुसा खे एक मांणू छाडी देऊँ, तेबे क्या तुसे चाओए कि आऊँ तुसा खे यहूदिया रा राजा छाडी देऊँ? 40 तेबे तिनो चींगी की बोलेया, “एसखे नि पर आसा खे बरअब्बे खे छाडी दे।” जो हुडदंग और अत्या री बजअ ते जेला रे पाया था।

19 तेबे पिलातुसे यीशुए खे कोडे लगवाए। 2 सिपाईए कांडेया रा मुकट बूणी की तिनो रे सियो पाँदे राखी ता और तिनो खे बेंगणी टाले पईनाए। 3 और तिनो गे आथी-आथी की बोलणे लगे, “ओ यहूदिया रे राजा प्रणाम!” और तिनो खे थप्पड बाए। 4 तेबे पिलातुसे फेर बारे निकली की लोका खे बोलेया, “देखो, आऊँ तेसखे तुसा गे फेर बारे ल्याऊँआ, ताकि तुसे जाणो कि आऊँ तेसदे कोई दोष नि पाँदा।” 5 तेबे यीशु कांडेया रा मुकट और बेंगणी टाले पणयाई की बारे निकयाले और पिलातुसे बोलेया, “देखो, ये मांणू।” 6 तेबे बडे पुरोईते और मन्दरो रे पईरदारे ए सेयो देखे और जॉरे की बोलेया, “एसखे क्रूसो पाँदे चढाओ, क्रूसो पाँदे।” पिलातुसे तिनो खे बोलेया, “तुसेई एसखे लयी की क्रूसो पाँदे चढाओ, कऊँकि आऊँ एसदे कोई दोष नि पाँदा।” 7 यहूदिये अगुवे तेसखे बोलेया, “आसा रा बी बिधान ए और म्हारे बिधानो रे मुताबिक, ये क्रूसो पाँदे चढाणे जोगा ए कऊँकि तिनो आपू खे परमेशरो रा पुत्र बताया।” 8 जेबे पिलातुसे ये गल्ल सुणी, तेबे ओर बी डरीगा। 9 तेबे फेर राज्यपालो रे मुख्यालय रे पीतरे गया और यीशुए खे बोलेया, “तूँ केथो राए?” पर यीशुए तेसखे कोई बी जवाब नि दितेया। 10 पिलातुसे तिनो खे बोलेया, “मांगे कऊँ नि बोलदा? क्या तूँ नि जाणदा कि ताखे छाडणे रा अक्क मांगे ए और ताखे क्रूसो पाँदे चढाणे रा बी?” 11 यीशुए बोलेया, “जाणे परमेशरो री तरफा ते ए अक्क देई राखेया, तेबेई तेरा मां पाँदे अक्क ए, तिनो आऊँ तेरे आथो रे पकड़वाया, तेसरा पाया जदा ए।” 12 तेबे पिलातुसे सेयो छाडणा चाए, पर यहूदिये चींगी-चींगी की बोलेया, “जे तूँ एसखे छाडी देगा, तो तेरी भक्ति कैसरो री तरफा खे नि ए, जो कोई आपणे आपू खे राजा बणाओआ, से कैसरो रा सामणा करोआ।” 13 इना गल्ला सुणी की पिलातुस यीशुए खे बारे ल्याया और तेती एक चबूतरा था, जेतेखे इब्रानिया रे गबता बोलोए, और न्याय आसणो रे बैठेया। 14 ये फसह रे त्योआरो री त्यारिया रा दिन था और दोपईरो रे तकरीबन था, तेबे तिनो यहूदिये खे बोलेया, “देखो, येईए तुसा रा राजा।” 15 पर सेयो चींगे और बोलेया, “लयी जा, लयी जा, एसखे क्रूसो पाँदे चढाओ।” पिलातुसे तिनो खे बोलेया, “क्या आऊँ तुसा रे राजे खे क्रूसो पाँदे चढाऊँ?” बडे पुरोईते जवाब दितेया, “कैसरो खे छाडी की आसा रा कोई राजा नि ए।” 16 तेबे पिलातुसे

यीशु क्रूसो पाँद चढ़ाणे खे तिना रे आथो रे देईते, ताकि तिना खे क्रूसो पाँद चढ़ाई देओ। 17 तेबे सेयो यीशुए खे लयी गे। और सेयो आपणा क्रूस चकी की तेसा जगा तक गये, जेतेखे खोपड़िया री जगा बोलो थे और इब्रानिया रे गुलगुता। 18 तेती तिने सेयो और तिना साथे दो ओर मांणु क्रूसो पाँद चढ़ाए, एकी खे ओरे और दूजे खे पोरे और बीचे यीशु। 19 तेबे पिलातुसे एक दोष पत्र लिखी की क्रूसो पाँद लगाईता और तिदे लिखी राखेया था, “यीशु नासरी यहूदिया रा राजा।” 20 ये दोष पत्र बऊत यहूदिये पढ़ेया, कऊँकि से जगा, जेती यीशु क्रूसो पाँद चढ़ाए थे से जगा यरूशलेम नगरो ते नेडे ई थी और पत्र, इब्रानी, लतीनी और यूनानिया रे लिखेया रा था। 21 तेबे यहूदिया रे बडे पुरोईते पिलातुसो खे बोलेया, “यहूदिया रा राजा नि लिख, पर ये लिख कि तिने बोलेया, “आऊँ यहूदिया रा राजा ए।” 22 पिलातुसे बोलेया, “मैं जो लिखी ता, से लिखी ता।” 23 जेबे सिपाई यीशुए खे क्रूसो रे चढ़ाई चुके, तेबे तिना रे टाले लयी की चार इस्से कित्ते, हर सिपाईए खे एक इस्सा, तेबे तिने कुरता बी लया पर कुरता बिना सलाईया ते ऊबो ते लयी की ऊँदो तक बुणेया रा था। 24 तेबे तिने आपू बीचे बोलेया, “आसे एसखे फाड़ना रणी देऊँ, पर एते पाँद पर्या पाऊँए कि ये केसरा ऊणा। ये तेबे ऊआ कि पवित्र शास्त्रो री गल्ल पूरी ओ, “तिने आपू बीचे मेरे टाले बांडी ते और मेरे टालेया पाँद पर्ल पायी,।” 25 तो सिपाईए एडा ई कित्तेया। यीशुए रे क्रूसो गे तिना री आम्मा और तेसा री बईण, क्लोपासो री लाडी मरियम और मरियम मगदलिनी खडी रिया थिया। 26 जेबे यीशुए आपणी आम्मा और तेस चले खे जेसते से प्यार राखो था, नेडे खडे रा देखेया तो आपणी आम्मा खे बोलेया, “ओ जवाणसे, देख, ये तेरा पाऊँए।” 27 तेबे तिने चले खे बोलेया, “ये तेरी आम्मा ए।” तेबे तेसी बखते से चेला तेसा खे आपणे कअरे लयी गा। 28 इजी ते बाद यीशुए ये जाणी की कि एबे सब कुछ ऊईगा, ताकि पवित्र शास्त्रो री गल्ल पूरी ओ, तिने बोलेया, “आऊँ त्याया ए।” 29 तेती एक सिरके रा पांडा परी की था राखेया रा, तेबे तिने स्पंजो रा टाला सिरके रे सेडेया और डण्डे पाँद राखी की तिना रे मुओ रे लगाया। 30 जेबे यीशुए से सिरका चाखेया, तेबे बोलेया, “पूरा ऊआ” और सिर चुकाई की प्राण छाडी ते। 31 तेबे से त्यारिया रा दिन था, यहूदिये पिलातुसो ते बिनती किती कि तिना री खुटिया तोड़ी देओ और तिना खे ऊतारी देओ, ताकि आरामो रे दिने सेयो क्रूसो रे नि रओ, कऊँकि ये आरामो रा दिन बड़ा दिन था। 32 तेबे सिपाईए आयी की पईले रिया खुटिया तोड़िया, तेबे दूजे रिया, जो तिना साथे क्रूसो रे चढ़ाई राखे थे। 33 पर जेबे यीशुए गे आयी की देखेया कि ये मरी चुकेया रा, तो तिना री खुटिया नि तोड़िया। 34 पर सिपाईया बीच ते एकी जणे एक बड़छा बखिया रे कुसाया और तेते बीच ते तेबुई खून और पाणी निकलेया। 35 जिने ये देखेया, तिने ई ये गवाई दिती और तेसरी गवाई सच्ची ए और से जाणोआ कि सच बोलणे लगी रा, ताकि तुसे बी विश्वास करो। 36 यो गल्ला तेबे ऊईया, ताकि पवित्र शास्त्रो रा से वचन पूरा ओ, “तेसरी कोई बी आड्डी तोड़ी नि जाणी।” 37 फेर एक ओरी जगा रे ये लिखी राखेया, “जिने से ऊजी राखेया, तिना पाँद नजर करनी।” 38 इना गल्ला ते बाद अरिमतियाह गांव रा यूसुफे, जो यीशुए रा चेला था, पर यहूदी अगुओ रे डरो रे मारे से एसा गल्ला खे छिपाए रे राखो था, तिने पिलातुसो ते बिनती किती कि आऊँ यीशुए री लोथ लयी जाऊँ; और पिलातुसे तेसरी बिनती सुणी और से आयी की तिना री लोथ लयी गा। 39 नीकुदेमुस बी, जो पईले यीशुए गे राथियो खे गया था, पंजा सेरो रे तकरीबन मिलेया रा गन्धरस और एलवा ल्याया। 40 तेबे तिने यीशुए री लोथ लयी और यहूदिया रे दबाणे री स्वाजा रे मुताबिक सेयो खुशबूदार चीजा साथे कफनो रे लपेटेया। 41 तेसा जगा रे जेती यीशु क्रूसो पाँद चढ़ाए थे, एक बगीचा था और तेस बागीचे रे एक नयी कन्न थी, जेती कदी कोई नि राखेया था। 42 तेबे यहूदिया री त्यारिया रे दिनो री बजअ ते, तिने यीशुए री लोथ तिदे ई राखी, कऊँकि से कन्न नेडे थी।

20 अफ्रते रे पईले दिने मरियम मगदलिनी कुछ ओर जवाणसा साथे प्यागा ई न्हरे-न्हरे कन्ना पाँद आयी और तिने पात्थर कन्ना पाँदा ते

आटेया रा देखेया। 2 तेबे सेयो दौडी की शमोन पतरस और बाकि चलेया गे गईया, जिना खे यीशु प्यार करो थे, और बोलेया, “सेयो प्रभुए रे शरीरो खे कन्ना ते निकाली की लयी गे रे और आसे नि जाणदिया कि तिना खे केयी लयी गे रे।” 3 तेबे पतरस और दूजा चेला निकली की कन्ना गे गये। 4 और दोनो साथे-साथे दौडेन लगी रे थे, पर दूजा चेला पतरसो ते आगे दौडी की कन्ना पाँद पईले पऊँछेया। 5 तिने नपी की टाले ई पड़े रे देखे, पर से पीतरे नि गया। 6 तेबे शमोन पतरस तेसते पीछे-पीछे पऊँछेया और कन्ना रे पीतरे गया और टाले पड़े रे देखे। 7 और से टाल्ला जो तिना रे सिरो रे था बानेया रा, से टालेया साथे नि था, पर एक लग जगा रे था लपेटेया रा। 8 तेबे दूजा चेला बी, जो कन्ना पाँद पईले पऊँछेया था, पीतरे गया और देखी की विश्वास कित्तेया कि यीशु मरेया रे बीचा ते जिऊँदा ऊईगा रा। 9 सेयो एबुए तक पवित्र शास्त्रो री गल्ल नि समजे थे कि से मरेया रे बीचा ते जिऊँदा ऊणा था। 10 तेबे सेयो चले आपणे कअरो खे वापस ऊईगे। 11 पर मरियम रोदी ऊई कन्ना गे ई बारे खडी री रई और रोदी-रोदी कन्ना खे चूकी की देखदी रई। 12 तेबे तेसे दो स्वगदूत सफेद टाले पईने रे, एक सरयाणे रे और दूजा पाईदिया रे बेटे रे देखे, जेती यीशुए री लोथ थी पड़ी री। 13 तेबे तेसा खे बोलेया, “ओ जवाणसे तूँ कऊँ लगी री रोणे?” तेसे तिना खे बोलेया, “सेयो मेरे प्रभुए रे शरीरो खे चकी की लयी गे रे और आऊँ नि जाणदी कि सेयो केयी लयी गे रे।” 14 ये बोली कि से पीछे मुडी और यीशु खडे रे देखे और पछयाणे नि कि यीशु ए। 15 यीशुए तेसा खे बोलेया, “ओ जवाणसे तूँ कऊँ लगी री रोणे? केसखे टोलेई?” तेसे माली समजी की तिना खे बोलेया, “ओ महाराज! जे तुसे तिना रा शरीर चकी की लयी गे रे तो मांगे बताई दे कि केयी राखी राखे और आऊँ तिना खे लयी जाऊँगी।” 16 यीशुए तेसा खे बोलेया, “मरियम!” तेसे पीछे मुडी की तिना खे इब्रानी पाषा रे बोलेया, “रब्बुनी!” मतलब-ओ गुरु! 17 यीशुए तेसा खे बोलेया, “माखे नि छूँ, कऊँकि आऊँ एबुए तक ऊबे पिते गे नि जाई रा, पर मेरे पाईया गे जाई की तिना खे बोली दे कि आऊँ आपणे पिते गे और तुसा रे परमेशरो गे ऊबे जाऊँआ।” 18 मरियम मगदलिनिये जाई की चलेया गे बताया, “मैं प्रभु देखे, तिने मां साथे गल्ला कित्तिया।” 19 तेसी दिने, जो अफ्रते रा पईला दिन था, साँजके बखते, जेबे तेथो रे द्वार, जेती चले थे, यहूदी अगुओ रे डरो रे मारे बंद थे, तेबे यीशु आए और बीचे खडे ऊई की तिना खे बोलेया, “तुसा खे शान्ति मिलो।” 20 और ये बोली की तिने आपणे आथ और आपणी पसली तिना खे दखाए, तेबे चले यीशुए खे देखी की खुश हुए। 21 यीशुए तिना खे फेर बोलेया, “तुसा खे शान्ति मिलो; जिंयाँ पिते आऊँ पेजी राखेया, तिंयाँ ई आऊँ बी तुसा खे दुनिया रे पेजुँआ।” 22 ये बोली की तिने तिना पाँद फूकर दिती और बोलेया, “पवित्र आत्मा लओ। 23 जिना रे पाप तुसे माफ करो, तिना खे माफ ऊईगे और जिना रे पाप तुसे माफ नि करोगे, तिना रे पाप माफ नि ऊणे।” 24 पर बारा चलेया बीच ते एक, मतलब-थोमा, जेसखे दिदुमुस बी बोलोए, जेबे यीशु आए, तो से तिना साथे नि था। 25 जेबे ओर चले तेसखे बोलणे लगे, “आसे यीशु देखे, तेबे तिने तिना खे बोलेया, “जदुओ तक आऊँ तिना रे आथो रे परेगा रे छेद नि देखी लऊँ और परेगा रे छेदो रे आपणी गूठी और तिना री पसलिया रे आपणा आथ नि पाई लऊँ, तदुओ तक आऊँ विश्वास नि करदा कि से मरेया रे बीचा ते जिऊँदा ऊईगा रा।” 26 एक अफ्रते ते बाद फेर तिना रे चले पीतरे थे और थोमा तिना साथे था और द्वार बंद थे, तेबे यीशुए आयी की और बीचे खडी की बोलेया, “तुसा खे शान्ति मिलो।” 27 तेबे तिने थोमे खे बोलेया, “आपणी गूठी ओरे ल्याई की मेरी पसलिया रे पा ओर अविश्वासी नि, पर विश्वासी नि।” 28 ये सुणी की थोमे बोलेया, “ओ मेरे प्रभु! ओ मेरे परमेशार!” 29 यीशुए तेसखे बोलेया, “तैं तो माखे देखी की विश्वास करी राखेया, पर धन्य सेयो, जिने बिना देखे विश्वास कित्तेया।” 30 यीशुए ओर बी बऊत चमत्कार चलेया सामणे दखाए, जो एसा कताबा रे लिखी नि राखे। 31 पर यो तेबे लिखे, ताकि तुसे विश्वास करो कि यीशु ई परमेशरो रा पुत्र मसीह ए, और विश्वास करी की तिना रे नाओ ते अनन्त जीवन पाओ।

21 इना गल्ला ते बाद यीशु तिबिरियास समुद्रो रे कनारे आपणे चेलैया सामणे आए और ईयां सामणे आए, 2 शमौन पतरस और थोमा, जेसखे दिदुमुस बी बोलोए और गलीलो रे काना नगरो रा नतनएल और जब्दिए रे पाऊ और यीशुए रे चेलैया बीचा ते दो ओर जणे कट्टे थे। 3 शमौन पतरसे तिना खे बोलेया, “आऊँ मछलिया पकड़ने जाऊँआ।” तिने बोलेया, “आसे बी तां साथे चलूँए।” तेबे सेयो निकली की किस्तिया रे चढे, पर तेसा राती कुछ नि पकड़ेया। 4 आगले दिने प्याग ऊँदे ई यीशु कनारे पाँदे थे खडे रे, पर चेलैया नि पछयाणे कि यीशु ए। 5 तेबे यीशुए तिना खे बोलेया, “ओ बालको! क्या तुसा गे कुछ खाणे खे आए?” तिने बोलेया, “ना।” 6 तिने तिना खे बोलेया, “किस्तिया रे दाँणी तरफा खे जाल पाओ, तो मिलणा।” तेबे तिने जाल पाया और एबे बऊत मछलिया ऊणे री बजअ ते जाल खिजी नि सके। 7 तेबे तिने चले जेस साथे यीशु प्यार राखो थे, पतरसो खे बोलेया, “ये तो प्रभु ए।” शमौन पतरसे ये सुणी की कि यीशु ए, लको रे टाला बानी ला, कऊँकि से नांगा था और समुद्रो रे छवाल खाई ती। कऊँकि से यीशु खे मिलणे खे बड़ा उताऊला था 8 पर ओर चले डोंगिया पाँदे मछलिया रा फरेया रा जाल खीजदे ऊए आए, कऊँकि सेयो कनारे ते बऊत दूर नि थे, पर दो सौ की आथ दूर थे। 9 जेबे सेयो कनारे पाँदे पऊँछे, तेबे तिने सुलगे रे फेऊओ पाँदे मछली देखी और रोटी देखी। 10 यीशुए तिना खे बोलेया, “जो मछलिया तुसे एबु पकड़ी राखिया, तिना बीचा ते कुछ ल्याओ।” 11 शमौन पतरसे डोंगिया पाँदे चढ़ी की एक सौ तिरपन बडिया मछलिया रा परेया रा जाल कनारे पाँदे खीजेया और इतणिया मछलिया ऊँदे ऊए बी जाल नि फटेया। 12 यीशुए तिना खे बोलेया, “आओ रोटी खाओ।” पर चेलैया बीचा ते केसी खे बी याओ नि ऊआ कि तिना ते पूछो, “तूँ कूणे?” कऊँकि सेयो जाणो थे कि यो यीशु ए। 13 यीशुए आगे बढ़ी की रोटी लयी की तिना खे दिती और तियाँ ई मछली बी। 14 ये तीजी बार था कि यीशुए मरने ते बाद चेलैया खे दर्शन दिते। 15 रोटी खाणे ते बाद यीशुए शमौन पतरसो खे बोलेया, “ओ शमौन, यूहन्ने रे पाऊ! क्या तूँ इना ते जादा माखे प्यार करेया?” तिने बोलेया, “आ प्रभु, तुसे तो जाणोए कि आऊँ तुसा खे प्यार करूँआ।” तिने तेसखे बोलेया, “मेरे मिन्दूआ खे चरा।” 16 तिने फेर दूजी बार तेसखे बोलेया, “ओ शमौन, यूहन्ने रा पाऊ! क्या तूँ माखे प्यार करेया?” तिने बोलेया, “आ प्रभु, तुसे तो जाणोए कि आऊँ तुसा खे प्यार करूँआ।” तिने तेसखे बोलेया, “मेरी पेडा री रखवाली करा।” 17 तिने तीजी बार तेसखे बोलेया, “ओ शमौन, यूहन्ने रा पाऊ! क्या तूँ माखे प्यार करेया?” पतरस उदास ऊईगा कि तिने तीजी बार मांते येई गल्ल पूछी ली। तेबे तिने बोलेया, “ओ प्रभु! तुसे तो सब कुछ जाणोए कि आऊँ तुसा खे प्यार करूँआ।” यीशुए तेसखे बोलेया, “मेरी पेडा खे चरा। 18 आऊँ ताखे सच-सच बोलूँआ कि जेबे तूँ जवान था, तेबे आपणा लक बानी की जेती चाओ था, तेती कूमो-फिरो था, पर जेबे तूँ स्याणा ऊणा, तेबे दूजे आपणे आथ लांबे करने और तेरा लक बानी की जेती से चाओगा, तूँ लयी जाणा।” 19 तिने इना गल्ला ते जताई ता कि पतरसे केडिया मीता साथे परमेशरो री महिमा करनी। तेबे तिने तेसखे बोलेया, “मां पीछे आईजा।” 20 पतरसे मुड़ी की से चेला देखेया, जेस साथे यीशु प्यार राखो थे, और जिने रोटी खादे ऊए तिना री छातिया री तरफा खे चूकी की पूछेया था, “ओ प्रभु! तुसा खे पकड़वाणे वाला कूणे?” 21 तेसखे देखी की पतरसे यीशुए खे बोलेया, “ओ प्रभु! एसरा क्या आल ऊणा?” 22 यीशुए तेसखे बोलेया, “जे आऊँ चाऊँ कि ये मेरे वापस आऊणे तक रुकेया रा रओ, तो ताखे क्या ए? तूँ मां पीछे आईजा।” 23 तेबेई तो पाईया बीचे ये गल्ल फैली गी कि से चेला नि मरना, पर यीशुए ये नि बोलेया कि ये नि मरना, पर ये कि “जे आऊँ चाऊँ कि ये मेरे वापस आऊणे तक रुकेया रा रओ, तो ताखे क्या ए?” 24 ये सेई चेला ए जो इना गल्ला री गवाई देओआ और जिने यो गल्ला लिखी राखिया और आसे जाणूँए कि तेसरी गवाई सच्ची ए। 25 ओर बी बऊत सारे काम ए, जो यीशुए कित्ते, जे सेयो एक-एक करी की लिखे जांदे, तो आऊँ समजूँआ

कि जो कताबा बी लिखिया जांदिया और सेयो दुनिया रे बी नि औडणिया थिया।

प्रेरितों के काम

1 ओ श्रीमान्, थियुफिलुस! मैं पर्ईली कताब तिना सबी गल्ला रे बारे रे लिखी, जो प्रभु यीशु शुरूओ ते करदा और सिखांदा रया। 2 जदुओ तक से परमेशरो रे जरिए स्वर्गो रे नि चकेया गया, तदुओ तक तेसरे स्वर्गो रे चकणे ते पर्ईले, तिने आपणे चुणे रे प्रेरिता खे पवित्र आत्मा रे जरिए आज्ञा देंदा रया। 3 और यीशुए दुःखो ते और मौता ते बाद, बऊठ ई पवके सबूता साथे आपणे आपू खे प्रेरिता गे जिऊंदा दखाया और चाली दिनेओ तक सेयो तिना खे दिशदे रये और परमेशरो रे राज्य रिया गल्ला करदे रये। 4 तेबे तिने चेलेया खे मिली की आज्ञा दित्ती, “यरूशलेमो खे नि छोडो, पर पिते रे तेस वादे रा पूरे ऊणे रा इन्तजार करदे रओ, जेतेरे बारे रे तुसे मांते सुणी चुके रे। 5 कऊँकि यूहन्ने तो पाणिण ए साथे बपतिस्मा देई राखेया, पर थोड़े दिन बाद तुसा पवित्र आत्मा रा बपतिस्मा पाणा।” 6 तेबे तिने कट्टे ऊई की तिना ते पूछेया, “ओ प्रभु! क्या तुसा एसी बखते ई इस्राएलो खे राज्य फेरी देणा?” 7 तिने तिना खे बोलेया, “तेस बखतो खे और तेसा कअड़िया खे जाणना, जो पिते आपणे ई अक्को रे राखी राखे, तुसा रा काम नि ए। 8 पर जेबे पवित्र आत्मा तुसा पाँदे आऊणा, तेबे तुसा सामर्थ पाणी और यरूशलेम नगरो रे, सारे यहूदिया और सामरिया प्रदेशो रे और तरतिया रे कनारे तक तुसे मेरे गवा ऊणे।” 9 ये बोलदे ऊए सेयो, तिना रे देखदे-देखदे परमेशरो रे जरिए स्वर्गो खे चकी ते और बादलो री बजअ ते सेयो तिना खे जादा देरा तक देखी नि सके। 10 जेबे तिना खे जांदे ऊए सेयो सर्गो खे ताकणे लगी रे थे, तेबे दो मांणु सफेद टाले पर्ईने रे अचाणक तिना बीचे आयी की खडे ऊईगी 11 और तिना खे बोलेया, “ओ गलीली मदीं! तुसे खडे ऊई की सर्गो खे कऊँ लगी रे देखणे? येई यीशु जो तुसा गे ते स्वर्गो खे चकी ला रा, जियाँ तुसे से स्वर्गो खे जांदा ऊआ देखी राखेया, तियाँ ई से फेर आऊणा।” 12 तेबे चले जैतनु नाओं रे पाहडो ते, जो यरूशलेम नगरो रे नेडे तकरीबन एक किलोमीटरो री दुरिया रे ए, यरूशलेमो खे वापस ऊए। 13 जेबे सेयो नगरो रे पऊँछे, तेबे सेयो तेसा बाऊडी दे गये, जेती पतरस, यूहन्ना, याकूब, अन्द्रियास, फिलिप्पुस, थोमा, बरतुल्मे, मत्ती, हलफर्डसो रा पाऊ याकूब, शमोन जेलोतेस और याकूबो रा पाऊ यहूदा रओ थे। 14 यो सब कईया जवाणसा साथे और प्रभु यीशुए री आम्मा मरियम और तिना रे पाईया साथे एक चित्त ऊई की प्रार्थना रे लगे रये। 15 तिना दिना रेई पतरस पाईया बीचे, जो एक सौ बीईया रे तकरीबन विश्वासी थे, खडा ऊई की बोलणे लगेया, 16 “ओ पाईयो जरूरी था कि पवित्र शास्त्रो रा से लेख पूरा ओ, जो पवित्र आत्मे दाऊदो रे मुंओ ते यहूदा रे बारे दे, जो प्रभु यीशुए खे पकड़ने वालेया रा अगुवा था, पर्ईले तेई बोलेया था। 17 यहूदा तो आसा बीचे गिणेया गया और तेसा सेवकाईया रे शामिल ऊआ।” 18 तिने पापो री कमाईया ते एक डोरू खरीदेया और सिसरो रे पारे रूडेया और तेसरा पेट फटीगा और तेसरी सारिया आज्ञा निकली गिया, 19 और एसा गल्ला खे यरूशलेमो रे रणे वाले जाणी गे, एथो तक कि तेस डोरूआ रा नाओं तिना री पाषा रे हकलदमा, मतलब-खुनो रा डोरू पड़ी गा। 20 पतरसे बोलेया, “कऊँकि भजनसंहिता रे लिखी राखेया, “तेसरा कअर उजडी जाओ और तिदे कोई ना बसो,” और तेसरी अध्यक्षो री जगा कोई ओर लयी लो।” 21 “तेबेई ये जरूरी ए कि एक एडा मांणु चुणेया जाओ जो प्रभु यीशुए रे कित्ते रे सारे कामो रे गवा ओ। प्रभु यीशुए खे यूहन्ने रे जरिए बपतिस्मा देणे ते लयी की तिना रे स्वर्गो रे चकणे तक ये आदमी आसा साथे प्रभु यीशुए रे मरे रेया बीचा ते जिऊँदा ऊणे रा गवा बणो। 22 खरा ए कि तिना बीचा ते एक मांणु आसा साथे, यीशुए रे जिऊँदे ऊणे रा गवा ऊई जाओ।” 23 तेबे तिने दो जणे खडे कित्ते, एक यूसुफ, जेसखे बरसब्वास बी बोलोए, जेसरा छोटो नाओं युस्तुस ए और दूजा मत्तियाहा। 24 तेबे ये बोली की प्रार्थना कित्ती, “ओ प्रभु! तुसे जो सबी रे मनो खे जाणोए, ये बताओ कि तुसे इना ढूँई बीचा ते कुण चुणी राखेया, 25 ताकि से एसा सेवा री और प्रेरिताईया री जगा लई लओ, जेसखे यहूदा छाडी की

आपणी जगा खे गया।” 26 तेबे तिने तिना रे बारे रे चिट्टिया पाईया और पत्री मत्तियाहो रे नाओं पँदे निकली, तेबे से तिना ग्यारा प्रेरिता साथे गिणेया गया।

2 जेबे यहूदिया रा पिन्तेकुसो रा त्योआरो रा दिन आया, तेबे सेयो सब एकी जगा रे कट्टे थे। 2 तदुओ की एकदम सर्गो ते बडे तूफानो री जी छेड ऊई और तिजी ते सारा कअर, जेती सेयो थे बैठे रे, गूँजी गा। 3 तिना खे आगी रिया लुपिया जेडिया जीबा निकलदिया ऊईया दिशिया और तिना बीचे सबी पाँदे आयी की ठईरी गिया। 4 तेबे सेयो सब पवित्र आत्मा ते परी गे और जियाँ पवित्र आत्मे तिना खे बोलणे री सामर्थ दित्ती, सेयो लग-लग पाषा रे बोलणे लगे। 5 तिना दिना रे बऊठ भक्त यहूदी जो परमेशरो ते डरो थे, दुनिया रे हर देशो ते त्योआर मनाणे आये थे और यरूशलेम नगरो रे रणे लगी रे थे। 6 जेबे से छेड ऊई, तेबे पीड कट्टी ऊईगी और लोक कबराई गे, कऊँकि हर एकी खे येई सुणो था कि ये मेरी ई पाषा रे बोलणे लगी रे। 7 सेयो सब हैरान ऊई की बोलणे लगे, “देखो, ये जो बोलणे लगी रे, क्या सब गलीली नि ए? 8 तो तेबे ये क्या ऊणे लगी रा, तेबे आसे सब आपणी-आपणी जन्म-भूमिया री पाषा कऊँ सुणने लगी रे? 9 आसा बीचा ते जो पारथी, मेदी और एलामी लोक, मेसोपोटामिया, यहूदिया, कप्पूदकिया, पुन्तुस, आसिया, 10 फुगिया, पंफूलिया, मिस्र और लिबिया वासी जो कुरेनो रे नेडे-तेडे ए, इना सबी देशो रे रणे वाले और रोमो रे रणे वाले यहूदी और यहूदी तर्म तारण करने वाले, 11 मतलब क्या यहूदी और क्या यहूदी तर्म तारण करने वाले, क्रेती और अरबी बी ए, पर आपणी-आपणी पाषा रे तिना ते परमेशरो रे बडे-बडे कामो रे बारे रे चर्चा सुणने लगी रे।” 12 तेबे सेयो सब हैरान ऊईगे और कबराई की एकी-दूजे खे बोलणे लगे, “ये क्या ऊणे लगी रा?” 13 पर ओरी मजाक करी की बोलेया, “सेयो तो नये शराबो रे नशे रे चूर ए।” 14 तेबे पतरस तिना ग्यारा चेलेया साथे खडा ऊआ और जोरे की बोलणे लगेया, “ओ यहूदिया! और ओ यरूशलेमो रे सब रणे वालो! ये जाणी लो और कान लगाई की मेरी गल्ला सुणो। 15 जेडा तुसे समजणे लगी रे, यो लोक नशे रे नि ए, कऊँकि एबु तो प्यागा रे नौ ई बजी रे। 16 पर ये से गल्ल ए, जो परमेशरे योएल भविष्यबक्ते रे जरिए बोली थी, 17 “परमेशर बोलोआ कि आखरी रे दिना रे एडा ऊणा, कि मां आपणा आत्मा सबी मांणूआ पाँदे लटणा और तुसा रे माठे-बेटिया भविष्यबाणी करनी और तुसा रे जवाना दर्शन देखणे और तुसा रे बुजुर्गा सुणने देखणे। 18 बल्कि मां आपणे दास और दासिया पँदे तिना दिना रे आपणी आत्मा बीचा ते लटणा और तिना भविष्यबाणी करनी 19 और मां ऊबे सर्गो रे अचम्बे रे काम और ऊँदे तरतिया रे चिह्न, मतलब-खून, आग और तुँपे रे बादल दखाणे। 20 प्रभुए रा न्याय रा दिन आऊणे ते पर्ईले सूरज काला और चाँद खुनो जेडा लाल ऊई जाणा। 21 और जेस केसी प्रभुए रा नाओं लणा, तेसरा ई उद्धार ऊणा।” 22 “ओ इस्राएलियो! इना गल्ला खे सुणो, यीशु नासरी एक मांणु था। जेसरा परमेशरो री तरफा ते ऊणे रा सबूत, तिना सामर्थ रे कामो, अचम्बे रे कामो ते और चमत्कारा ते प्रगट ए। जो परमेशरे तुसा बीचे, तेसरे जरिए दखाए, जेसखे तुसे आपू बी जाणोए। 23 तेस ई यीशुए जो परमेशरो री ठराई री योजना और पर्ईलके ज्ञानो रे मुताबिक पकडवाया। तेबे तुसे से पापिया रे आथो क्रूसो पाँदे चढाई की मरवाईता। 24 पर सेई परमेशरे मौता रे बंदनो ते छुडाई की जिऊँदा कित्तेया, कऊँकि ये ऊणा नि था कि से तेसरे वशो रे रंदा। 25 कऊँकि दाऊद यीशु मसीह रे बारे रे बोलोआ, “आऊँ सदा प्रभुए खे आपणे सामणे देखदा रया, कऊँकि से मेरी दाँणी तरफा खे ए, ताकि आऊँ कबराई नि जाऊँ। 26 इजी री बजअ ते मेरा मन खुश ऊआ और मेरी जीब मन्न ऊई, बल्कि मेरा शरीर बी उम्मीदा रे बसे रा रणा। 27 कऊँकि तां मेरा प्राण नरको रे नि छोडणा और तां आपणा पवित्र जन सड़ने नि देणा। (Hades 986) 28 तैं माखे जीवनों री बाट बताई राखी, तां आपणे दर्शनो रे जरिए आऊँ खुशिये की परी देणा। 29 “ओ पाईयो! आऊँ तेस कुलपति दाऊदो रे बारे रे तुसा खे इम्मता साथे बोली सकूँआ कि से तो मरी गा और दबाई बी

दित्तेया और तेसरी कन्न आजो तक आसा मे मौजूद ए। 30 से भविष्यबक्ता था और ये जाणो था कि परमेशरे मांते कसम खाई की वादा करी राखेया कि मां तेरे वंशो बीचा ते एक जणा तेरे सिंहासनो पाँदे बढायलना। 31 तिने ऊणे वाली गल्ला खे पड़ले तेई देखी की मसीह रे जिऊँदे ऊणे रे बारे रे भविष्यबाणी किन्ती, कि ना तो तेरा प्राण नरको रे छाडेया और ना ई तेसरा शरीर सडेया। (Hades 986) 32 येई यीशु परमेशरे जिऊँदा कित्तेया, जेसरे आसे सब गवा ए। 33 तियाँ ई परमेशरो रे दाँणे आथो ते सबी ते उचा पद पाई की और पिते ते से पवित्र आत्मा पाई की जो वादा कित्तेया था, तिने ये लटेया, जो आज तुसे देखोए और सुणोए। 34 कऊँकि दाऊद तो स्वर्गो रे नि चढ़ना, पर से आपू बोलीओ, “प्रभुए परमेशरे मेरे प्रभुए खे बोलेया; 35 मेरे दाँणे बैठ, जदुओ तक आऊँ तेरे बैरिया खे तेरे पैरा निठे नि करी देऊँ।” 36 “तो एबे इस्राएली रा सारा कराना, पक्का जाणी लओ कि परमेशरे तेसी यीशुए खे, जो तुसे क्रूसो पाँदे चढ़ाया, प्रभु बी और मसीह बी ठराया।” 37 तेबे सुणने वाले लोका खे विश्वास ऊँगा कि आसे गलत काम करी राखेया और सेयो पतरसो खे और बाकि प्रेरिता खे पूछणे लगे, “ओ पाईयो! आसे क्या करिए?” 38 पतरसे तिना खे बोलेया, “पापो ते मन फिराओ, और तुसा बीचा ते हर एक आपणे-आपणे पापो री माफिया खे यीशु मसीह रे नाओं ते बपतिस्मा लओ, तो तुसा खे पवित्र आत्मा रा दान मिलेगा। 39 ये वादा तुसे और तुसा री ल्वाद और तिना सबी दूरो-दूरो रे लोका खे बीए, जो प्रभुए म्हारे परमेशरे आपू गे बुलाणे।” 40 पतरसे बऊत ओर गल्ला री गवाई देई-देई की बी समजयाया, “आपणे आपू खे एसा टेडिया जातिया ते बचाओ।” 41 तो जिने लोके पतरसो रा वचन सुणी की मानेया, तिने बपतिस्मा लया और तेसी दिने तीन हजार माणूआ रे तकरीबन विश्वासिया साथे मिली गे। 42 तेबे ये सब विश्वासी प्रेरिता ते शिक्षा पाणे और संगति राखणे रे और रोटी तोड़ने रे और प्रार्थना करने रे लगे रे रये 43 और यरूशलेमो रे सबी लोका खे डर ऊँगा और बऊत अचम्बे रे काम और चिह्न प्रेरित करो थे। 44 और सेयो सब विश्वास करने वाले कट्टे रओ थे और तिना री सब चीजा साजिया थिया। 45 और सेयो आपणी-आपणी सम्पति और सामान बेची-बेची की जेडी जेसरी जरूरत ओ थी, बांडी देओ थे। 46 और सेयो हर रोज एक मन ऊई की मन्दरो रे कट्टे ओ थे और कअरे-कअरे रोटी तोड़ी की खुश और मन लगाई की रोटी खाया करो थे 47 और परमेशरो री स्तुति करो थे और सब लोक तिना ते खुश थे और जो उद्धार पाओ थे तिना खे प्रभु हर रोज तिना बीचे मिलाई देओ था।

3 पतरस और यूहन्ना तकरीबन दोपईरो रे तीन बजे प्रार्थना रे बखते मन्दरो रे जाणे लगी रे थे। 2 तेबे लोक एक लंगड़े खे ल्याए, जो जन्मो तेई लंगड़ा था। तेसखे सेयो हर रोज मन्दरो रे तेस द्वारा पाँदे, जेतेखे सुन्दर बोलीए, बढयाली देओ थे, ताकि से मन्दरो रे जाणे वालेया ते पीख माँगी। 3 जेबे तिने पतरस और यूहन्ना मन्दरो रे जाँदे ऊए देखे, तो तिना ते पीख माँगी। 4 पतरसे यूहन्ने साथे तेसरी तरफा खे बडे ई त्यानो साथे देखी की बोलेया, “आसा कनारो खे देख।” 5 तेबे पीख मांगणे वाला जन्मो रा लंगड़ा तिना ते कुछ पाणे री उम्मीदा ते तिना खे ताकणे लगेया। 6 तेबे पतरसे बोलेया, “सुईना और चाँदी मांगे आए नि, पर जो मांगे आए, से लाखे देऊँआ, यीशु मसीह नासरियो रे नाओं ते उठ और चल-फिर।” 7 तेबे पतरसे तेसरा दाँणा आथ पकड़ी की से खड़ा कित्तेया और तेबुई तेसरे पैरा और खुटिया रे जान आईगी। 8 से उटकी की खड़ा ऊँगा और चलणे-फिरने लगेया और चलदा उछलदा और परमेशरो री स्तुति करदा ऊआ तिना साथे मन्दरो रे आँगणो रे गया। 9 सबी लोके से उटकदे और परमेशरो री स्तुति करदा ऊआ देखी की 10 से पछयाणी ला कि ये तो सेई लंगड़ा ए, जो मन्दरो रे सुन्दर फाटको पाँदे बैठी की पीख माँगी था और तेस कामो ते जो तेस साथे ऊआ था, सेयो बऊत हैरान ऊँगी। 11 जेबे से पतरस और यूहन्ने खे पकड़े रे था, तो सब लोक बऊत हैरान ऊई की जेतेखे सुलेमानो रा बरंडा (बरामदा) बोलीए, तिना गे दौड़दे ऊए आए। 12 ये देखी की पतरसे लोका खे बोलेया,

“ओ इस्राएलियो! तुसे एस माणूए खे देखी की अचम्बा कऊँ करोए? और आसा री तरफा खे ईयाँ कऊँ लगी रे देखणे कि मानो आसे ई आपणी सामर्थ या भक्तिया ते ये चलणे-फिरने जोगा करी राखेया? 13 अब्राहम, इसहाक और याकूबो रे परमेशर, आसा रे बाप-दादेया रे परमेशरे आपणे सेवक यीशुए री महिमा किन्ती, जो तुसे मारने खे यहूदी अगुवे रे आथो रे पकडवाया। जेबे पिलातुसे तेसखे छाडणे रा बिचार बणाया, तेबे तुसे तेसरे सामणे तेसरी बेज्जती किन्ती। 14 तुसे यीशुए खे मानणे ते ना किन्ती जो पवित्र और तर्मी था और बिनती किन्ती कि एक खुनिए खे तुसा खे छाडेया जाओ 15 और तुसे अनन्त जीवनो खे बनाणे वाला मरवाईता, जो परमेशरे मरे रेया बीचा ते जिऊँदा कित्तेया और एसा गल्ला रे आसे गवा ए। 16 और यीशुए मसीह रेई नाओं ते, तेस विश्वासो रे जरिए, जो तेसरे नाओं पाँदे ए, एस माणूए खे जेसखे तुसे देखणे लगी रे और जाणो बी ए कि सामर्थ देई राखी, तिने विश्वासे ई, जो तेसरे जरिए ए, से तुसा सबी सामणे, पला-चंगा करी ता। 17 “एबे ओ पाईयो! आऊँ जाणूँआ कि तुसे और तुसा रे अगुवे यीशु अणजाणे रे काई ते। कऊँकि तुसे नि जाणो थे कि सेई मसीह था। 18 पर जो गल्ला परमेशरे सबी भविष्यबक्तेया रे मुँओ ते पड़ले ई बुलाईया थिया कि तेसरे मसीह दुःख सईन करना और मरना, से तिने तियाँ ई पूरा कित्तेया। 19 इजी री खातर मन फिराओ और वापस आओ, कि तुसा रे पाप माफ ऊई जाओ, ताकि प्रभुए रे सामणे शान्तिया रे दिन आओ। 20 और से यीशुए खे पेजो, जो तुसा खे पड़ले तेई मसीह चुणी राखेया। 21 जरूरी ये कि से स्वर्गो रे तेस बखतो तक रओ, जदुओ तक कि से सबी गल्ला खे सुदारी नि लओ, जेतेरे बारे रे परमेशरे आपणे पवित्र भविष्यबक्तेया रे मुँओ ते बोली राखेया। (aiōn 9165) 22 जेडा कि मूसे बोली राखेया, प्रभु परमेशरे तुसा रे पाईया बीचा ते, तुसा खे मां जेडा एक भविष्यबक्ता पेजणा, जो कुछ से तुसा खे बोली, से करना। 23 पर हर माणू जो तेस भविष्यबक्ते री नि सुणोणा, से लोका बीचा ते नाश ऊणा। 24 “ओर शमुएलो ते लयी की तेसरे बाद वालेया तक, जितणे भविष्यबक्ते गल्ल बोली, तिने सबी इना दिना रा संदेश देई राखेया। 25 तुसे सब तिना भविष्यबक्तेया री ल्वाद और तेस वादे रे इस्सेदार ए, जो परमेशरे तुसा रे बाप-दादेया साथे बानी, जेबे तिने अब्राहमो खे बोलेया कि तेरे कुलो रे जरिए तरतिया रे सारे करानेया आशीष पाणी, 26 परमेशरे आपणे सेवको खे मरे रेया बीचा ते जिऊँदा करी की सबी ते पड़ले तुसा गे पेजेया, ताकि तुसा बीचा ते हर एकी खे तेसरी बुगईया ते फेरी की आशीष देओ।”

4 जेबे सेयो लोका खे ये बोलणे लगी रे थे, तेबे पुरोईत, मन्दरो रे सरदार और सडूकी तिना पाँदे खे आईगे। 2 कऊँकि तिना खे बऊत रोष आईगा कि सेयो लोका खे सिखाओ थे और प्रभु यीशुए रा उदारण देई-देई की मरे रेया रा जिऊँदे उठणे रा प्रचार करो थे। 3 तेबे तिने सेयो पकड़ी की प्यागा तक जेला रे राखे, कऊँकि साँज ऊँगी थी। 4 पर जिने-जिने वचन सुणेया, तिना बीचा ते बऊत जणेया यीशुए पाँदे विश्वास कित्तेया और तिना री गिणती पाँज हजार मर्दो रे तकरीबन ऊँगी। 5 दूजे दिने एडा ऊआ कि यहूदिया रे अगुवे, बुजुर्ग और शास्त्री, 6 प्रदान पुरोईत हन्ना, कैफा, यूहन्ना, सिकन्दर और जितणे प्रदान पुरोईतो रे कराने रे थे, सब यरूशलेमो रे कट्टे ऊँगीं। 7 सेयो तिना खे बीचे खडे करी की पूछणे लगे, “तुसे ये काम कुण जी सामर्था ते और केसरे नाओं ते कित्तेया?” 8 तेबे पतरसे पवित्र आत्मा ते परी की बुजुर्गो खे बोलेया, 9 “ओ लोका रे सरदारो और बुजुर्गो! आसे एस कमजोर माणूए साथे जो पलाई करी राखी, जे आज तिजी रे बारे रे पूछ-ताछ ओई कि से कियॉ ठीक ऊआ, 10 तो तुसे सब और सारे इस्राएली लोक जाणी लओ कि यीशु मसीह नासरियो रे नाओं ते, जो तुसे क्रूसो पाँदे चढ़ाईता और परमेशरे से मरे रेया बीचा ते जिऊँदा कित्तेया, आज तिना रे नाओं रे जरिए ये माणू तुसा सामणे पला-चंगा खड़ा ए। 11 यीशु मसीह ई सेई पात्थर ए, जो तुसे राजमिस्त्रिए ठुकराईता और ये कूणे रे सिरे रा पात्थर ऊँगा। 12 यीशुए ते बगैर केसी दूजे रे जरिए उद्धार निए, कऊँकि स्वर्गो रे निठे और माणूआ बीचे और कोई नाओं नि देई राखेया, जेसरे जरिए आसे

उद्धार पाई सकूँ।” 13 जबे तिने पतरस और यूहन्ने री इम्मत देखी और ये जाणी ला कि यो तो अनपढ़ और सादारण माणू ए तो हैरान ऊड़ी, तेबे सेयो पछयाणे कि यो तो प्रभु यीशुए साथे रओ थे। 14 तेबे तेस माणूए खे जो ठीक ऊईगा था, पतरस और यूहन्ने साथे खड़ा देखी की यहूदी अणुवे तिना रे खलाफ कुछ नि बोली सके। 15 पर तिना खे सभा ते बारे पेजी की आपू बीचे बिचार करने लगे, 16 “आसे इना माणूआ साथे क्या करिए? कऊँकि यरूशलेमो रे सब रणे वालेया खे पता ए कि इने एक खास चमत्कार दखाई राखेया और आसे तिजी ते मुकरी नि सकदे। 17 पर इजी री खातर कि लोका बीचे ये गल्ल और जादा नि फैली जाओ, आसे तिना खे तमकी देऊँए कि सेयो एस नाओं ते फेर कदी केसी माणूए साथे गल्ला नि करो।” 18 तेबे तिने सेयो बुलाए और तिना खे चेतावणी देई की बोलेया, “यीशुए रे नाओं ते कुछ नि बोलणा और ना सखयाणा।” 19 पर पतरस और यूहन्ने तिना खे जवाब दितेया, “तुसेई न्याय करो कि क्या ये परमेशरो रे नेड़े खरा ए कि आसे परमेशरो री गल्ला ते बढ़ी की तुसा री गल्ल मानूँ? 20 कऊँकि ये तो आसा ते ऊई नि सकदा, जो आसे देखी राखेया और सुणी राखेया, से नि बोलूँ।” 21 तेबे तिने सेयो और बी तमकाए और छाडी ते, कऊँकि लोका री बजअ ते तिना खे कोई बी सजा देणे रा बाना नि मिलेया, कऊँकि जो घटना ऊई थी, तिजी री बजअ ते सब लोक परमेशरो री तारीफ करो थे। 22 कऊँकि से माणू, जो चमत्कारी रूपो ते ठीक ऊईगा था, चाली साला ते जादा उम्रा रा था। 23 सेयो छूटी की आपणे साथिया गे गये और जो कुछ बड़े पुरोईते और बुजुर्गे तिना साथे कितेया था, सब कुछ तिना गे बताया। 24 ये सुणी की तिने एक चित्त ऊई की जारे की परमेशरो खे बोलेया, “ओ स्वामी! तूँ सेईए जिने स्वर्ग, तरती, समुद्र और जो कुछ तिना रे बणाई राखेया, 25 तँ पवित्र आत्मा रे जरिए आपणे सेवक, आसा रे पिता, दाऊदो रे मुंओ ते बोलेया, “दूजिये जातिये आल्ला कऊँ पाया? और देशो रे लोक बेकारो री गल्ला कऊँ सोचिया? 26 प्रभु और मसीह रे अभिषेक किते रे बिरोदो रे तरतिया रे राजा खड़े ऊए और हाकिम एकी साथे कट्टे ऊईगे। 27 “कऊँकि सच्ची तेरे सेवक यीशुए रे बिरोदो रे, जेसरा तँ अभिषेक कितेया, हेरोदेस और पुन्तियुस पिलातुस बी दूजी जातिया साथे और इस्राएलिया साथे एस नगरो रे कट्टे ऊए। 28 कि जो कुछ पईले ते तेरी सामर्थ और समजा ते ठहरिया था, से ई ओ। 29 एबो, ओ प्रभु, तिना री तमकिया खे सुण, और आपणे दासा खे ये बरदान दे कि तेरा वचन बड़ी ई इम्मत साथे सुणाऊँ। 30 ठीक करने खे तूँ आपणा आथ बढ़ा कि चिह्न और अचम्बे रे काम तेरे पवित्र सेवक यीशुए रे नाओं ते करे जाओ।” 31 जबे सेयो प्रार्थना करी चुके, तेबे से जगा, जेती सेयो खड़ी रे थे, से जगा इल्ली गी और सेयो सब पवित्र आत्मा ते परी गे और परमेशरो रा वचन इम्मता साथे सुणादे रये। 32 विश्वास करने वालेया री मण्डली एक चित्त और एक मनो री थी, एथो तक कोई बी आपणी जायदाता खे आपणी नि बोलो था, बल्कि सब कुछ साजा था। 33 प्रेरित बड़ी सामर्था साथे प्रभु यीशुए रे जिऊँदे ऊणे री गवाई देँदे रये और तिना सबी पाँदे बड़ी कृपा थी। 34 तिना बीचे कोई बी गरीब नि था, कऊँकि जिना गे जमीन या कअर थे, सेयो तिना खे बेची-बेची की बिकी री चीजा रा दाम ल्याओ थे और से प्रेरिता रे पैरा गे राखी देओ थे। 35 और जेडी, जेसखे जरूरत ओ थी, तिजी रे मुताबिक हर एकी विश्वासिये खे प्रेरित बांडी देओ थे। 36 यूसुफ नाओं रा साईप्रस टापूए रा एक लेवी था, जेसरा नाओं प्रेरिते बरनबास, मतलब-इम्मत देणे वाला माणू राखी राखेया था। 37 तेसरी कुछ जमीन थी, जो तिने बेची ती और दामो रे पैसे ल्याई की प्रेरिता खे देई ते कि सेयो तिजी खे जरूरतमंद लोका बीचे बांडी देओ।

5 हनन्याह नाओं रे एक माणूए आपणी लाडी सफीरा साथे मिली की आपणी जमीना रा एक पाअग बेची ता 2 और तिजी रे दामो बीचा ते कुछ आपू खे राखी ता और ये गल्ल तेसरी लाडी बी जाणो थी और तिजी रा एक इस्सा ल्याई की प्रेरिता खे देईता। 3 तेबे पतरसे बोलेया, “ओ हनन्याह! शेताने तेरे मनो रे ये गल्ल कियौँ पाई कि तूँ पवित्र आत्मा ते चूठ बोले और

जमीना रे दामो बीचा ते कुछ आपू खे राखी दे? 4 जदुओ तक से तांगे रई, क्या तेरी नि थी? और जेबे बिकी गी तो क्या तेरे वशो रे नि थी? तेरे मनो रे एस बुरे कामो रा बिचार कियौँ आया? तँ माणूआ ते नि, पर परमेशरो ते चूठ बोलेया।” 5 इना गल्ला सुणी की हनन्याह जमीना पाँदे रूडी गा और मरी गा और सबी सुणने वालेया खे डर लगी गा। 6 तेबे जवाने आयी की तेसरी अर्थी बणाई और बारे लयी जाई की से दबाई ता। 7 तकरीबन तीन कंटे ते बाद तेसरी लाडी पीतरे आयी और जो कुछ ऊआ था, तिजी रे बारे रे तेसा खे पता नि था। 8 तेबे पतरसे तेसा खे बोलेया, “मांगे बता क्या तुसे से जमीन इतणे रेई बेची?” तेसे बोलेया, “आ, इतणे रेई।” 9 पतरसे तेसा खे बोलेया, “ये क्या गल्ल ऊई कि तुसे दूईँ प्रभुए रे पवित्र आत्मा री परीक्षा खे एडा कितेया? देख, तेरे लाड़े खे दबाणे वाले द्वारो पाँदे ई खड़ी रे और तूँ बी बारे लयी जाणी।” 10 तेबे से फटाफट तेसरे पैरा पाँदे पड़ी गी और मरी गी और जवाने पीतरे आयी की से मरी री देखी और से बी बारे लयी जाई की तेसा रे लाड़े साथे दबाई ती। 11 तेबे यरूशलेमो री सारी मण्डली और इना गल्ला खे सब सुणने वाले बऊत ई जादा डरी गे। 12 प्रेरिता रे जरिए बऊत चिह्न और अचम्बे रे काम लोका बीचे दखाए जाओ थे और मसीह रे सब विश्वासी एक मन ऊई की सुलेमानो रे बरंड़े रे कट्टे ओषा करो थे। 13 पर ओरी बीचा ते जिने यीशुए पाँदे एषुए तरक विश्वास नि करी राखेया था केसी खे बी ये इम्मत नि ओ थी कि तिना बीचे जायी की मिली जाईए, पर तेबे बी लोक तिना री तारीफ करो थे। 14 विश्वास करने वाले बऊत सारे मर्द और जवाणसा प्रभुए री मण्डलिया रे ओर बी जादा आयी की मिलणे लगे। 15 एथो तक कि लोक बमारा खे सड़का रे ल्याई-ल्याई की माँजे पाँदे लटयाई देओ थे कि जेबे पतरस आओ, तेबे तेसरा टवांवा ई तिना बीचा ते केसी पाँदे पड़ी जाओ। 16 यरूशलेमो रे नेड़े-तेड़े रे नगरो ते बी बऊत लोक बमारा खे और दुष्टात्मा रे सताए रे, तिना गे ल्याई-ल्याई की कट्टे ओं थे और सेयो सबी खे ठीक करो थे। 17 तेबे प्रदान पुरोईत ओर तेसरे सब साथी, जो सद्किया रे टोलिया रे थे, चेलेया रे खलाफ जलना ते परी गे 18 और तिने प्रेरित पकड़ी की जेला रे बंद करी ते। 19 पर राथियो खे प्रभुए रे एक स्वर्गदूते जेला रे द्वार खोली की तिना खे बारे निकयाली की बोलेया, 20 “जाओ और मन्दरो रे खड़े ऊई की एस अनन्त जीवनो रा पूरा संदेश लोका खे सुणाओ।” 21 जेड़ा तिना खे बताई राखेया था प्याग ऊँदे ई सेयो मन्दरो रे जाई की उपदेश देणे लगे। तेबे प्रदान पुरोईत और तेसरे साथिये आयी की महासभा और इस्राएलिया रे सारे बुजुर्ग कट्टे किते ओर जेला रे सन्देशा पेजेया कि तिना खे ल्याओ। 22 पर मन्दरो रे पईरदारो तेती पऊँछी की चले जेला री नि पाये और वापस ऊई की सन्देशा दितेया 23 कि आसे जेला खे बड़ी चौकसिया साथे बंद कितेया रा और पईरदारा खे बारे द्वारो पाँदे खड़े रा देखेया, पर जेबे खोलेया, तेबे पीतरे कोई नि मिलेया। 24 जेबे मन्दरो रे पईरदारो रे प्रदान और बड़े पुरोईते ये गल्ल सुणी, तो तेबे तिना रे बारे रे पारी चिन्ता रे पड़ी गे कि एबे क्या ऊणा? 25 तदुओ कि किने आयी की तिना गे बताया, “देखो, जो तुसे जेला रे बंद करी राखे थे, सेयो माणू तो मन्दरो रे खड़े ऊई की लोका खे उपदेश देणे लगी रे।” 26 जबे तिने सुणेया तेबे मन्दरो रे पईरदारो रे प्रदान आपणे पईरदारा साथे तेती जाई की चेलेया खे महासभा रे सामणे ली आया, पर जबरदस्ती नि, कऊँकि सेयो लोका ते डरो थे कि केथी आसा पाँदे पात्थर नि बाओ। 27 तिने सेयो फेर ल्याई की महासभा सामणे खड़े करी ते, तेबे प्रदान पुरोईते तिना ते पूछेया, 28 “क्या आसे तुसे सावधान नि किते थे कि तुसे एस नाओं ते उपदेश नि देणा? तेबे बी देखो, तुसे सासा यरूशलेम आपणे उपदेशो ते परी ता रा और तेसे माणूए री अत्या रा दोष आसा रे गले पाँदे ल्याऊणा चाओए।” 29 तेबे पतरसे और ओरी प्रेरिते जवाब दितेया, “माणूए री आज्ञा ते बढ़ी की परमेशरो री आज्ञा खे मानणा ई म्हारा फर्ज ए। 30 आसा रे बाप-दादेया रे परमेशरे प्रभु यीशु मरे रेया बीचा ते जिऊँदा कितेया, जो तुसे क्रूसो पाँदे चढ़ाई की मरवाईता था। 31 सेई परमेशरे प्रभु और उद्धारक ठईराई की आपणे दाँणे आथो ते ऊच्या करी ता, ताकि से इस्राएलिया खे मन फिराओ री शक्ति और पापो ते माफी देओ। 32 और आसे इना गल्ला रे गवा ए और

पवित्र आत्मा रे बी, जो परमेश्वर तिन खे दित्ती, जो तेसरी आज्ञा मानोए।” 33 ये सुणी की महासभा रे सदस्य जलने लगे और तिने चले काणा चाए। 34 पर गमलिलएल नाओं रे एक फरीसिये, जो धर्मशास्त्री और सबी लोका बीचे जाणा-मानेया रा था, कचैरिया रे खड़े ऊई की प्रेरिता खे थोड़ी देरा खे बारे जाणे री आज्ञा दित्ती। 35 तेबे तिने महासभा रे सदस्य खे बोलेया, “ओ इस्राएलियो! जो कुछ इना माणूआ साथे करना चाओए, सोची समजी की करना। 36 कऊँकि इना दिना ते पईले थियुदास ये बोलदा रओ था कि आऊँ बी कुछ आए; और कोई चार सौ माणू तेस साथे ऊईगे, पर से कायी ता और जितणे लोक तेसखे मानो थे, सब ओरे-पोरे ऊईगे और खत्म ऊईगे। 37 तिजी ते बाद नाओं लिखाईया रे दिने रे यहूदा गलीली उठेया और तिने कुछ लोक आपणी तरफा खे करी ते, तेसरा बी नाश उई गा और जितणे लोक तेसखे मानो थे, सब ओरे-पोरे ऊईगे। 38 “इजी री खातर आऊँ तुसा खे बोलूँआ कि इना माणूआ ते दूर ई रओ और इना ते कोई मतलब नि राखो, कऊँकि जे ये तर्म या काम माणूआ री तरफा ते ओ, तो तेबे तो नाश ऊई जाणे, 39 पर जे परमेश्वरो री तरफा ते, तो तुसे इना खे कदी बी खत्म नि करी सकदे, केथी एड़ा ना ओ कि तुसे परमेश्वरो साथे बी लड़ने वाले ठईरो।” 40 तेबे तिने तेसरी गल्ला मानी ली और प्रेरित बुलाए और कूटे और ये आज्ञा देई की छाडी ते कि यीशुए रे नाओं ते फेर कदी गल्ला नि करनिया। 41 चले एसा गल्ला ते खुश ऊई की महासभा रे सामणे ते चली गे कि आसे तेसरे नाओं री खातर नरादर ऊणे जोगे तो ऊए। 42 तेबे चले हर रोज मन्दरो रे और कअरे-कअरे उपदेश करने और एसा गल्ला रा सुसमाचार सुनाणे ते नि रूके कि यीशु ई मसीह ए।

6 तिना दिना रे जेबे चले बऊत ऊणे लगे, तेबे यूनानी पाषा बोलणे वाले यहूदी चले इब्रानी पाषा बोलणे वाले यहूदी चलेया पँदि कुड़कुड़ाणे लगे, “हर दिने री चीजा देणे रे आसा री बिदुआ री खबर-सम्बाल नि लँदे।” 2 तेबे तिने बारा चलेया विश्वासिया री सारी मण्डली आपू गे कट्टी बुलाई की बोलेया, “ये ठीक निए कि आसे परमेश्वरो रे वचनो रा प्रचार करना और शिक्षा देणा छाडी की खुलाणे-पलयाणे री सेवा रे लगे रईये। 3 इजी री खातर ओ पाईयो! आपू बीचा ते सात जाणे-माणे मर्दा खे, जो पवित्र आत्मा ते परे रे और सुलजे रे ओ, चुणी लो, ताकि आसे तिना खे ये काम देई देईए। 4 पर आसा तो प्रार्थना, वचनो रा प्रचार और उपदेश देणे री सेवा रे लगे रे रणा।” 5 ये गल्ल सारी मण्डलिया खे ठीक लगी और तिने स्तिफनुस नाओं रा एक माणू जो विश्वासो रे और पवित्र आत्मा ते परे रा था और फिलिप्पुस, नीकानोर, तीमौन, परमिनास, अन्ताकिया वाला नीकुलाऊस, जो यहूदी मतो रे आईगा था, चुणी ले। 6 तेबे ये प्रेरिता सामणे खड़े कित्ते। और इना चुणे रे माणूआ खे प्रार्थना कित्ती और तिना पँदि आथ राखी की तिना खे सेवा करने रा अक्क दित्तेया। 7 तेबे परमेश्वरो रा वचन फैलदा गया और यरूशलैमो रे चलेया री गिणती बड़दी गयी और यहूदी पुरोईता रा एक बड़ा समाज यीशु मसीह पँदि विश्वास करी की एसा मतो खे मानणे वाला ऊईगा। 8 स्तिफनुस कृपा और सामर्था ते परिपूर्ण ऊई की लोका खे बड़े-बड़े चिह्न और अचम्बे रे काम दखाया करो था। 9 पर कुछ लोके स्तिफनुसो रा बरोद कित्तेया। बरोद करने वाले तेस प्रार्थना रे कअरो रे सदस्य थे जो गुलामिया ते आजाद ऊई रे थे, और कुरेनी, सिकन्दरिया, किलिकिया और आसिया रे लोका बीचा ते कई एक उठी की स्तिफनुसो साथे बईस करने लगे। 10 पर तेस जानो ते और पवित्र आत्मा रा, जेते री मतादा ते से गल्ला करो था, सेयो सामणा नि करी सके। 11 तेबे तिने कई लोक स्तिफनुसो रे बारे रे चूठ बोलणे खे उकसाए जो बोलणे लगे, “आसे ये मूसे और परमेश्वरो रे खलाफ निन्दा री गल्ला करदे ऊए सुणी राखेया।” 12 तेबे लोक, बुजुर्ग और शास्त्रिया खे पड़काई की तेस पाँदो खे आईगे और तेसखे पकड़ी की महासभा रे लयी गे। 13 और चूठे गवा खड़े करी ते और स्तिफनुसो पँदि आरोप लगाई की बोलेया, “ये माणू एसा पवित्र जगा रे बारे रे और मूसे रा बिधानो रे खलाफ बोलणा नि छाडदा। 14 कऊँकि आसे ये, ये बोलदे ऊए सुणी राखेया कि एसी यीशु

नासरिये ये मन्दर टाली देणा और सेयो रवाजा बदली देणियां जो मूसे आसा गे सम्बाली राखिया।” 15 तेबे सबी लोके जो सभा रे बैठी रे थे, तेसखे ताकणे लगे तो तिने तेसरा मूँ स्वर्गदूतो जेड़ा देखेया।

7 तेबे प्रदान पुरोईत पूछेया, “क्या ये आरोप सच ए?” 2 स्तिफनुसे उतर दित्तेया, “ओ पाईयो और पिताओं सुणो! आसा रा पिता अब्राहम हारान नगरो रे बसणे ते पईले, जेबे मेसोपोटामिया प्रदेशो रे था, तेबे सामर्था परमेश्वर तेसखे दर्शन दित्तेया 3 और तिने बोलेया, ‘तूँ आपणे देशो ते निकली की और आपणे परिवारो ते निकली की तेस देशो रे चली जा, जो मां ताखे दखाणा।’ 4 तेबे से कसदियो रे देशो ते निकली की हारान नगरो रे जाई की बसी गा। तेसरे पिते रे मरने ते बाद परमेश्वर से तथा ते एस देशो रे ल्याई की बसाया, जेती एबे तुसे रओए। 5 तेस बखते परमेश्वर तेसखे कुछ बी जायदात, बल्कि पैर राखणे तक बी जगा नि दित्ती, बल्कि परमेश्वर वादा कित्तेया कि मां ये देश ताखे और तांते बाद तेरे वंशो खे देई देणा। हालाँकि तेस बखते तेसरा कोई बी पाऊ नि था। 6 परमेश्वर एड़ा बोलेया, ‘तेरी ल्वादा रे लोक पराये देशो रे परदेशी ऊणे और तिना सेयो दास बनाणे और चार सौ साला तक तिना खे दुःख देणा।’ 7 तेबे परमेश्वर बोलेया, ‘जेसा जातिया रे सेयो दास ऊणे, तेसा खे मां सजा देणी और तिजी ते बाद तिना तेस देशो ते निकली की एस देशो रे आधी की मेरी सेवा करनी।’ 8 परमेश्वर अब्राहमो साथे खतने री वाचा कित्ती। जेबे अब्राहमो रे पाऊ इसहाको रा जन्म ऊआ तो आठुए दिने तेसरा खतना कित्तेया। इसहाको ते याकूब और याकूबो ते बारा कुलपति जम्मे। 9 “कुलपतिये यूसुफो साथे दुश्मणी राखी की से मिस्र देशो खे जाणे वालेया रे आथे बेची ता, पर परमेश्वर तेस साथे था 10 और परमेश्वर यूसुफो खे सारे क्लेशो ते छुड़ाई की मिस्रो रे राजा फिरौनो री नजरा रे कृपा और बुद्धि दित्ती। फिरौन राजे यूसुफो खे मिस्र देशो और आपणे सारे कअरो पँदि हाकिम बनाया। 11 जेबे यूसुफ राज्यपाल था तेबे सारे मिस्र और कनानो देशो रे अकाल पड़ी गा, जेतेरी बजअ ते पारी क्लेश ऊईगा और आसा रे बाप-दादेया खे अन्न नि मिलो था। 12 पर याकूब ये सुणी की कि मिस्र देशो रे अन्न आए, आसा रे बाप-दादेया खे पईली बार तथा ते अन्न खरीदणे खे पेजेया। 13 दूजी बार यूसुफ आपणे पाईया सामणे आया और यूसुफो री जाति फिरौनो खे पता लगी गी। 14 तेबे यूसुफे आपणे पिते याकूबो खे संदेशा पेजेया और आपणे सारे टबबरो रे, जो पचयात्तर माणू थे, मिस्र देशो खे बुलाए। 15 तेबे याकूब मिस्रो रे आया और तेती से और आसा रे बाप-दादे मरी गे। 16 तिना री लोथा शाकेमो रे पऊँछाई की तेसा कब्र रे राखिया, जो अब्राहमे चाँदी देई की शाकेमो रे हमरो री ल्वादा ते खरीदी थी। 17 “पर जेबे तेसा कसमा रा पूरा ऊणे रा बखत नेड़े आया, तेबे जो वादा परमेश्वर अब्राहमो साथे कित्तेया था, तेबे मिस्रो रे सेयो लोक बडी गे और बऊत ऊईगे। 18 तेबे मिस्रो रे दूजा राजा ऊआ, जो यूसुफो खे नि जाणो था। 19 तिने आसा री जातिया साथे चलाकी करी की आसा रे बाप-दादेया साथे गलत बर्ताव कित्तेया, एथो तक की तिना खे आपणे नये जम्मे रे बालक सेटणे पड़े, ताकि सेयो जिऊँदे नि रओ। 20 तेस बखते मूसे रा जन्म ऊआ। से परमेश्वरो री नजरा रे बऊत ई सुन्दर था और से तीन मीन्ने तक आपणे पिते रे कअरे लकोई की पालेया। 21 जेबे तेसखे लकोई की राखणा मुश्किल ऊईगा तेबे तिने से टोकरिया दे पाई की नदिया रे हड़ाईता, तेबे फिरौनो री बेटिये से चकी ला और आपणा पाऊ समजी की पालेया। 22 मूसे खे मिस्रिया री सारी विधा पढ़ाई और से वचन और कामो रे सामर्था था। 23 “जेबे मूसा चालिया साला रा ऊआ तेबे तेसरे मनो रे आया कि आऊँ आपणे इस्राएली पाईया खे मिलूँ। 24 तेती तिने एक इस्राएली माणूए पँदे अन्याय ऊँदे ऊए देखेया और से बचाया और मिस्रिए खे काई की जो सताई राखे थे, बदला लया। 25 तिने सोचेया कि मेरे पाईया समजणा कि परमेश्वर मेरे आथो साथे तिना खे गुलामिया ते आजाद करना, पर सेयो नि समजे। 26 दूजे दिने जेबे सेयो आपू बीचे लडने लगी रे थे, तेबे से तेती आईगा और ये बोली की तिना खे मलाप करने खे बोलेया कि ओ मर्दा! तुसे तो पाई-पाई ए, एकी-दूजे

पॉँद अन्वया कऊँ करोए? 27 पर जो आपणे पड़ोसिया पॉँद अन्वया करने लगी रा था तिनै से ये बोली की कनारै टाई ता, 'तूँ किने आसा पॉँद हाकिम और न्यायी बणाई राखेया? 28 क्या जियॉ तँ काल मिस्री काया, माखे बी काणा चाएया?' 29 ये गल्ल सुणी की मूसा नठी गा और मिद्यान देशो रे जाई की परदेशी ऊई की रणे लगेया और तेती तेसरे दो पाऊ ऊए। 30 "जेबे पूरे चाली साल मिद्यान देशो रे बीती गे, तेबे एक स्वर्गदूते सीनै पाहड़ो रे जंगलो रे तेसखे फुखडे ऊए जाडो री लूपिया रे दर्शन दित्ते। 31 मूसा ये दर्शन देखी की हेरान ऊईगा और जेबे देखणे खे ओर नेडे गया, तेबे प्रभुए री आवाज ऊई, 32 'आऊँ तेरे बाप-दादे, अब्राहम, इसहाक और याकूबो रा परमेशर ए' तेबे मूसे खे डरो रे मारे थरुनी छूटी गी, एथो तक कि तेसखे देखणे री इम्मत नि रई। 33 तेबे प्रभुए तेसखे बोलेया, 'आपणे पैरो ते जोड़े खोली दे, कऊँकि जेते जगा रे तूँ खड़ी रा, से पवित्र जगा ए। 34 मैं सच्ची आपणे लोका री जो मिस्र देशो रे बुरी दशा देखी राखी और तिना रा कणना और तिना रा रोणा सुणी राखेया, तेबेई तो आऊँ तिना खे छुड़ाणे खे उतरी रा, एबे आओ और मां तूँ मिस्र देशो रे पेजणा।' 35 "ये सेई मूसा ए जो इस्राएलिए ये बोली की नकारिता था कि तूँ किने आसा पॉँद हाकिम और न्यायी ठईराई राखेया? सेई परमेशरे हाकिम और छुड़ाणे वाला बणाया। तेस स्वर्गदूतो रे जरिए, जिने तेसखे जाडो रे दर्शन दित्तेया था, पेजेया। 36 येई मांण मिस्र देशो रे और लाल समुद्र और जंगलो रे चालिया साला तक अचम्बे रे काम और चिह्न दखाई-दखाई की तिना खे निकयाली की ली आया। 37 ये सेई मूसा ए, जिने इस्राएली लोका खे बोलेया, 'परमेशरे तुसा रे पाईया बीचा ते तुसा रिया तई मां जेडा एक भविष्यबक्ता चकणा।' 38 ये सेई मूसा ए जिने जंगलो रे मण्डलिया रे बीचे, तेस स्वर्गदूतो साथे सीनै पाहड़ो पॉँद तेस साथे गल्ला कित्तिया और आसा रे बाप-दादेया साथे था, तेसखे ई जिऊँदे वचन मिले ताकि आसा तक पऊँछाओ। 39 पर आसा रे बाप-दादेया मूसा री गल्ल मानणी नि चायी। तिनै से ठुकाराईता और सेयो मिस्र देशो खे वापस जाणा चाओ थे। 40 "और लोके मूसा रे पाई हारूणो खे बोलेया, 'आसा खे एडा देवता बणा, जो आसा ते आगे-आगे रओ और आसा खे वापस मिस्र देशो खे लयी चलो, कऊँकि ये मूसा जो आसा खे मिस्र देशो ते निकयाली की ल्याया, आसे नि जाणदे कि एसखे क्या ऊआ?' 41 तिना दिना रे तिनै एक बाहु बणाई की तेसरी मूर्तिया ते आगे बलि चढ़ाई और आपणे आथो रे कामो रे मनन ऊणे लगे। 42 तेबे परमेशरे तिना ते आपणा मूँ मोडी ला और सेयो छडी ते, ताकि सगँ रिया चीजा खे पूजो, जेडा भविष्यबक्तेया री कताबा रे परमेशरे बोली राखेया, 'ओ इस्राएलो रे लोको! क्या तुसे सुनसाण जगा रे चाली साल रई की पशु बलि और अन्नबलि माखे ई चढ़ादे नि रये? 43 और तुसे मोलेक देवता री बेदी बणाई और रिफान देवता रे तारे खे लयी की फिरदे रओ थे, मतलब-तिना मूर्तिया खे जो तुसे माथा टेकणे खे बणाए थे, तो मां तुसे बेबीलोने तो पोरे लयी जाई की बसाई देणे। 44 "साक्षिया रा तम्बू सुनसाण जगा रे आसा रे बाप-दादेया बीचे था, जेडा परमेशरे ठईराया, जिने मूसे खे बोलेया, 'जेडा तँ आयी की देखी राखेया, तिजी रेई मुताबिक इजी खे बणा।' 45 तेसी तम्बूओ खे आसा रे बाप-दादे पुराणे जमाने ते पाई की यहोशूओ साथे एती ल्याए, जेस बखते तिनै अन्व जातिया रा अक्क पाया, जो परमेशरे आसा रे बाप-दादेया रे सामणे ते निकयाली ता और से तम्बू राजा दाऊदो रे बखतो तक रया। 46 दाऊदो पॉँद परमेशरे कृपा किन्ती, तेबे तिनै बिनती किन्ती कि मां याकूबो रे परमेशरो खे मन्दर बनाणा। 47 पर तेसरे पाऊ सुलेमाने परमेशरो खे मन्दर बणाया। 48 पर परमप्रदान आथो रे बणाए रे मन्दरो रे नि रंदा, जेडा कि भविष्यबक्ते री कताबा रे परमेशरे बोलेया, 49 "परमेशर बोलोआ कि स्वर्ग मेरा सिंहासन और तरती मेरे पैरो री चौकी ए, माखे तुसा केडा मन्दर बनाणा? मेरे आराम करने री कुण जी जगा ऊणी? 50 क्या यो सब चीजा मेरे आथो की निए बणाई रिया? 51 "ओ टीठ और परमेशरो री गल्ल ना मानणे और ना सुणने वाले लोको! तुसे सदा पवित्र आत्मा रा बरोद करोए। जेडा तुसा रे बाप-दादे करो थे, तेडा ई तुसे बी करोए। 52 भविष्यबक्तेया बीचा ते कुण नि तुसा रे बाप-दादेया नि सताए

और तिनै से तर्मी, जेसरे आऊणे रे बारे रे पुराणे बखतो ते सन्देश देणे वाला ई काई ता और एबे तुसे बी तेसरे पकड़वाणे वाले और काणे वाले ऊए। 53 तुसा खे स्वर्गदूता रे जरिए बणाया रा बिधान तो मिलेया, पर तुसे से बिधान मानेया नि।" 54 इना गल्ला खे सुणी की यहूदी अमुयेया खे इतणा गुस्सा आईगा और स्तिफनुसो पॉँद आपणे दाँद किरडने लगे। 55 पर तिनै पवित्र आत्मा ते परिपूर्ण ऊई की स्वर्गो खे देखेया और परमेशरो री महिमा किन्ती और प्रभु यीशुए खे परमेशरो रे दाँणे कनारै खडा देखी की बोलेया, 56 "देखो, आऊँ स्वर्गो खे खुले रा और माणू रे पुत्रो खे परमेशरो रे दाणे कनारै खडे रा देखूआ।" 57 तेबे तिनै जोरे की चींगी की आपणे कान बंद करी ते और एक चित्त ऊई की तेस पॉँद झपटे। 58 तेबे तेसखे यरूशलेम नगरो ते बारे लयी जाई की पात्थर बाणे लगे और तिना री अत्या करी ती। जो गवा थे तिनै आपणे टाले शाऊल नाओं रे एक जवानो रे पैरो पॉँद खोली की रखवाली करने खे राखी ते। 59 सेयो स्तिफनुसो खे पात्थर बांटे रये और से ये बोली की प्रार्थना करदा रया, "ओ प्रभु यीशु मेरी आत्मा खे ग्रहण कर।" 60 तेबे तिनै कुटणे टेकी की जोरे की बोलेया, "ओ प्रभु! एस पापो रा दोष तिना पॉँद नि लगा।" ये बोली की से मरी गा। शाऊल बी तेसरी मौता रे शामिल था।

8 शाऊल स्तिफनुसो री मौता रे पूरी तरह ते शामिल था। तेसी दिने यरूशलेम नगरो री मण्डलिया पॉँद बऊत उपद्रव ऊणे लगेया और प्रेरिता खे छाडी की सब विश्वासी यहूदिया और सामरिया रे प्रदेशो रे ओरे-पोरे ऊईगे। 2 तेबे कुछ भगत लोके स्तिफनुस कब्रा रे राखेया और तेसखे बऊत दुः ख कित्तेया। 3 शाऊल मण्डलिया खे ऊजाइने लगी रा था और कअरे-कअरे कूसी की मर्द और जवाणसा विश्वासिया खे कसिटी-कसिटी की जेला रे पाओ था। 4 जो विश्वासी ओरे-पोरे ऊईगे थे, सेयो सुसमाचार सुणांदि ऊए, कुमदे-फिरदे रये। 5 फिलिप्पुस सामरिया प्रदेशो रे एक नगरो रे जाई की मसीह रा प्रचार करने लगेया 6 और जो गल्ला फिलिप्पुसे बोलेया सेयो लोके सुणी की और जो चमत्कार से दखाओ था तिना खे देखी की एक मन ऊई की त्यान लगाया। 7 कऊँकि फिलिप्पुसो री आज्ञा ते बऊत जणेया ते दुष्टात्मा जोरे-जोरे साथे चींगी की निकली गया और बऊत सारे अदरंगो रे रोगी और लंगड़े बी ठीक कित्ते। 8 तेबे तेस नगरो रे बऊत शान्ति ऊईगी। 9 इजी ते पईले तेती शमोन नाओं रा एक मांणू रओ था, जो जादू-टौणा करी की सामरिया जातिया रे लोका खे हेरान करो था और आपणे आपू खे कोई बडा मांणू बताओ था। 10 और सब छोटिया ते लयी की बड़ेया तक तेसखे मानो थे और बोलो थे, "ये मांणू परमेशरो री से सामर्थ ए, जेतेखे महान बोलेए।" 11 तिनै बऊत दिने ते सेयो आपणे जादूओ रे कामो साथे हेरान करी राखे थे। तेबेई तो सेयो तेसखे बऊत मानो थे। 12 पर जेबे तिनै फिलिप्पुसो पॉँद विश्वास कित्तेया, जो परमेशरो रे राज्य रा और प्रभु यीशु मसीह रे नाओं रा सुसमाचार सुणाओ था, तेबे लोक, क्या मर्द क्या जवाणसा, सब बपतिस्मा लणे लगे। 13 तेबे शमौने आपू बी विश्वास कित्तेया और बपतिस्मा लई की फिलिप्पुसो साथे रणे लगेया, से चिह्न और बडे-बडे सामर्थ रे काम देखी की हेरान ओ था। 14 जेबे प्रेरिते, जो यरूशलेम नगरो रे रओ थे, सुणेया कि सामरिया रे लोके परमेशरो रा वचन मानी ला रा, तेबे पतरस और यूहन्ना तिना गे पेजे। 15 तेबे तिनै जाई की तिना खे प्रार्थना किन्ती, ताकि पवित्र आत्मा खे पाओ। 16 कऊँकि से एबुए तक केसी पॉँद नि उतरेया था, तिनै तो बस प्रभु यीशुए रे नाओं ते बपतिस्मा लयी राखेया था। 17 तेबे पतरस और यूहन्ने तिना पॉँद आथ राखे और पवित्र आत्मा तिना पॉँद आया। 18 जेबे शमौने देखेया कि प्रेरिता रे आथ राखणे ते पवित्र आत्मा दितेया जाओआ, तेबे तिनै तिना गे पैसे ल्याई की तिना खे बोलेया, 19 "ये सामर्थ माखे बी देयो ताकि जेस केसी पॉँद आथ राखूँ, तेसखे पवित्र आत्मा मिलो।" 20 पतरस तेसखे बोलेया, "तेरे पैसे तां साथे ई नाश ओ, कऊँकि तँ परमेशरो रा दान पैसेया साथे खरीदणे रे बारे रे सोचेया। 21 एते सेवा रे तेरा मेरा कोई लेणा-देणा निए कऊँकि तेरा मन परमेशरो सामणे सच्चा निए। 22 इजी री खातर आपणी एसा बुराईया ते मन फिराई की प्रभुए ते प्रार्थना कर,

ऊई सकोआ कि तेरे मनो रा बिचार माफ ऊई जाओ। 23 कऊँकि आऊँ देखणे लगी रा कि ताखे इतणी जलन ओई और पापो रे बन्दनो रे पड़े राए।” 24 शमौने जवाब दितेया, “तुसे मेरिया तई प्रभुए ते प्रार्थना करो कि जो गल्ला तुसे बोलिया, तिना बीचा ते कोई बी मां पाँदे नि पड़ो।” 25 तेबे सेयो गवाई देई की और प्रभु यीशुए रा वचन सुणाई की यरूशलेमो खे वापस ऊईगी और तिने सामरिया रे बऊत सारे गांव रे सुसमाचार सुणाया। 26 तेबे प्रभुए रे एक स्वर्गदूते फिलिप्पुसो खे बोलेया, “उठी की दक्खणा री तरफा खे, तेसा बाटा रे जा, जो यरूशलेमो ते गाजा नगरो खे जाओई। ये रेगिस्तान बाट ए।” 27 फिलिप्पुस उठी की चली गा। बाटा रे तेसरी मुलाकात एक खोजे ते ऊई, जो कूश देशो री राणी कन्दके रा मन्त्री और खजान्ची था। से भक्ति करी की यरूशलेमो ते वापस आऊणे लगी रा था। 28 से आपणे रथो रे था बैठेया रा और यशायाह भविष्यबक्ते री कताब पढ़दा ऊआ आपणे देशो खे जाणे लगी रा था। 29 तेबे पवित्र आत्मे फिलिप्पुसो खे बोलेया, “नेड़े जाई की एस रथो साथे ऊई जा।” 30 फिलिप्पुसे तेसरी तरफा खे दौड़ी की से यशायाह भविष्यबक्ते री कताब पढ़दे ऊए सुणेया और पूछेया, “जो तूँ पढ़ने लगी रा क्या समजणे बी लगी रा त?” 31 तिने बोलेया, “जदुओ तक माखे कोई समजयाओ गा नि, तदुओ तक माखे कियौँ समज आऊणा?” तेबे तिने फिलिप्पुसो ते बिन्ती किती कि रथो पाँदे चढ़ी की मां साथे बैठी जा। 32 पवित्र शास्त्रो रा जो पाठ से पढ़ने लगी रा था, से ये था “से पेडा जेडा काणे खे पऊँछाया और जिंयाँ मिन्दु आपणे ऊन कापणे वालेया सामणे चुप रओआ, तिंयाँ ई तिने बी आपणा मूँ नि खोलेया। 33 तेसरी दीनता रे तेसरा न्याय नि ऊआ और तेसरे बखतो रे लोका रे बारे रे केस बताणा, कऊँकि तरतिया ते तेसरी जिन्दगी लयी ली।” 34 तेबे खोजे फिलिप्पुसो ते पूछेया, “आऊँ तांते बिन्ती करूआ कि भविष्यबक्ता ये किजी रे बारे रे बोलणे लगी रा आपणे या केसी दूजे रे बारे रे?” 35 तेबे फिलिप्पुसे बोलणा शुरू कितेया और एते ई शास्त्रो ते शुरू करी की तेसखे प्रभु यीशुए रा सुसमाचार सुणाया। 36 बाटा रे चलदे ऊए सेयो पाणिए रे कनारे पऊँछे, तेबे खोजे बोलेया, “देख, एती पाणी ए, एबे माखे बपतिस्मा लणे ते कुण रोकी सकोआ?” 37 फिलिप्पुसे बोलेया, “जे तूँ सारे मनो ते विश्वास करेया, तो लई सकोआ।” तिने बोलेया, “आऊँ विश्वास करूआ कि यीशु मसीह परमेशरो रा पुत्र ए।” 38 तेबे तिने रथ खड़ा करने री आज्ञा दिती और खोजा और फिलिप्पुस दोनो जणे पाणिए बीचे गये और फिलिप्पुसे तेसखे बपतिस्मा दितेया। 39 जेबे सेयो पाणिए ते निकली की पाँदे आए, तेबे प्रभुए रा पवित्र आत्मा फिलिप्पुसो खे चकी की लयी गा। और खोजे से फेर नि देखेया और से खुश ऊईगा कि परमेशरे आऊँ बचाईता और आपणे देशो खे चली गा। 40 तेबे फिलिप्पुस अशदोद नगरो रे आयी की निकलेया और जदुओ तक कैसरिया नगरो रे नि पऊँछेया, तदुओ तक नगरो-नगरो रे सुसमाचार सुणांदा रया।

9 शाऊल जो एबुए तक प्रभु यीशुए रे चलेया खे तमकाणे और काणे री ताका रे था, प्रदान पुरोईतो गे गया। 2 और तेसते दमिश्क नगरो रे नाओं रे प्रार्थना रे कअरो रे नाओं पाँदे इजी खे चिटिया मांगिया कि क्या मर्द क्या जवाणसा, जिना खे से एस पंथो रे पाओगा, तिना खे बानी की यरूशलेमो रे ली आऊँ। 3 जेबे शाऊल और तेसरे लोक चलदे-चलदे दमिश्क नगरो रे नेड़े पऊँछे, तेबे एकदम सर्गो ते तेसरे चऊँ कनारे ते जोति चमकी 4 और से जमीना पाँदे रूडी गा और तिने प्रभुए री ये आवाज सुणी, “ओ शाऊल! ओ शाऊल! तूँ माखे कऊँ सताणे लगी रा?” 5 तिने पूछेया “ओ प्रभु! तूँ कुण ए?” तिने बोलेया, “आऊँ यीशु ए। जेसखे तूँ सताप्या। 6 पर एबे उठी की नगरो खे जा और जो कुछ करना, से ताखे बताई देणा।” 7 जो माणु तेस साथे थे, सेयो चुपचाप रये, कऊँकि तिना खे आवाज तो सुणने लगी री थी, पर कोई दिशो नि था। 8 तेबे शाऊल जमीना पाँदा ते उठेया, पर जेबे तिने आखी खोलिया तेबे तेसखे कुछ नि दिशेया। तेबे सेयो तेसरा आथ पकड़ी की तेसखे दमिश्क नगरो खे लयी गे। 9 से तीन दिन तक नि देखी सकेया और ना ई तिने खाया-पिया। 10 दमिश्क नगरो रे हनन्याह नाओं रा एक चेला था,

तेसखे प्रभु यीशुए दर्शनो रे बोलेया, “ओ हनन्याह!” तिने बोलेया, “हां प्रभु!” 11 तेबे प्रभु यीशुए तेसखे बोलेया, “उठी की तेसा गलिया रे जा, जेतखे सीदी बोलाए और यहूदा रे कअरे शाऊल नाओं रे एक तरसुसो रे रणे वाले खे पूछी लो, कऊँकि देख, से प्रार्थना लगी रा करने। 12 तिने दर्शणो रे देखेया कि हनन्याह नाओं रे एक माणुए पीतरे आई की तेस पाँदे आथ राखे ताकि फेर देखणे लगे।” 13 हनन्याह बोलेया, “ओ प्रभु! मैं एस माणुए रे बारे रे बऊत जणेया ते सुणी राखेया कि इने यरूशलेमो रे तेरे पवित्र लोका साथे बडिया-बडिया बुराईया करी राखिया। 14 और एती बी एसखे बड़े पुरोईतो री तरफा ते अक्क मिली रा कि जो लोक तां पाँदे विश्वास करोए, तिना सबी खे बानी की यरूशलेमो खे लयी जाओ।” 15 पर प्रभुए तेसखे बोलेया, “तूँ चली जा, कऊँकि से तो दूजी जातिया और राजा और इस्राएली लोका सामणे मेरा नाओं रा प्रचार करने खे मेरा चुणे रा जणा ए। 16 और मां तेसखे बताणा कि मेरे नाओं खे तेसखे केडा-केडा दुः ख उठाणा पड़ना।” 17 तेबे हनन्याह उठेया और तेस कअरो रे गया जेती शाऊल था और तेस पाँदे आपणा आथ राखेया और बोलेया, “ओ शाऊल पाई! प्रभु, मतलब-यीशु जो तेसा बाटा रे, जिसिये तूँ आया और ताखे दिशेया था, तिने ई आऊँ पेजी राखेया, ताकि तूँ फेर देखणे लगे और पवित्र आत्मा ते परिपूर्ण ऊई जाओ।” 18 तेबे तेसरी आखी ते छिलके जे निकले और से देखणे लगेया और तिने उठी की बपतिस्मा लया, 19 तेबे रोटी खाई की तागत पाई। से कई दिन तक तिना चलेया साथे रया, जो दमिश्क नगरो रे थे। 20 तेबे से फटाफट दमिश्क नगरो रे प्रार्थना रे कअरो रे प्रभु यीशुए रा प्रचार करने लगेया, “यीशु ई परमेशरो रा पुत्र ए।” 21 तेबे सब सुणने वाले हैरान ऊई की बोलणे लगे, “क्या ये सेई माणु निए, जो यरूशलेमो रे तिना खे जो यीशुए रे विश्वासी थे, नाश करी देओ था और एती बी इजी खे आया था कि तिना खे बानी कि बड़े पुरोईतो गे लयी जाओ।” 22 पर शाऊल और बी सामर्था ऊँदा गया और एसा गल्ला रा सबूत देई-देई की कि मसीह येईए, दमिश्क नगरो रे रणे वाला यहूदिया रा मूँ बंद करदा रया। 23 जेबे बऊत दिन बीती गे, तेबे यहूदिये मिली की तेसखे काणे री तरकीब निकयाली। 24 पर तिना री तरकीब शाऊलो खे पता लगी गी। सेयो तो तेसखे काणे री ताका रे रात-दिन फाटको रिये लगे रे रओ थे, 25 पर राथियो खे चलेया शाऊल टोकरिया रे बठयालेया और शहरपनाहो पाँदा ते लटकाई की उतारी ता। 26 यरूशलेमो रे जाई की तिने चलेया साथे मिलणे रा उपाय कितेया, पर सब तेसते डरो थे, कऊँकि तिना खे विश्वास नि ओ था कि से बी चेला ए। 27 पर बरनबसो से आपु साथे प्रेरिता गे लयी जाई की तिना खे बोलेया कि इने कियौँ प्रभु यीशु दमिश्क नगरो री बाटा रे देखेया और इने तेस साथे गल्ला कितिया और तेबे इने दमिश्को रे बडी ई इम्मत साथे प्रभु यीशुए रा प्रचार कितेया। 28 चलेया बरनबासो री गल्ला पाँदे विश्वास कितेया और शाऊल तिना साथे यरूशलेमो रे आऊँदा-जांदा रया और निडर ऊई की प्रभु यीशुए रे नाओं रा प्रचार करो था। 29 से यूनानी पाषा बोलणे वाले यहूदिया साथे गल्ल-बात और बईस करो था। तेबे सेयो तेसखे काणे री कोशिश करने लगे। 30 ये जाणी की पाई तेसखे कैसरिया नगरो रे ली आए और तरसुस नगरो खे पेजी ता। 31 तेबे सारे यहूदिया, गलील और सामरिया प्रदेशो री मण्डलिया खे चैन मिलेया और मण्डली विश्वासो रे बडूदी गई। से प्रभुए रे डरो रे और पवित्र आत्मा री शान्तिया रे चलदी और गिणतिया रे बडूदी गई। 32 तेबे एडा ऊआ कि पतरस सबी प्रदेशा रे कुमदा-फिरदा ऊआ तिना पवित्र लोका गे बी पऊँछेया, जो लुद्दा नगरो रे रओ थे। 33 तेती तेसखे ऐनियास नाओं रा माणु मिलेया, जेसखे अदरंग था और से आठ साला ते माँजे पाँदे पड़ेया रा रओ था। 34 पतरसे तेसखे बोलेया, “ओ ऐनियास! प्रभु यीशु मसीह ताखे ठीक करोआ, उठ, आपणा बछऊणा बछा। तेबे से फटाफट खड़ा ऊईगा।” 35 तेबे लुद्दा और शारोण नगरो रे बऊत सारे रणे वाले, तेसखे देखी की प्रभु यीशुए पाँदे विश्वास कितेया। 36 याफा नगरो रे तबीता, मतलब-दोरकास प्रभु यीशुए पाँदे विश्वास करने वाली चेली रओ थी। से बऊत खरे काम और दान करदी रओ थी। 37 तिना दिना रे जेबे पतरस लुद्दा नगरो रे था से बमार ऊई की मरी

गी और तिने से नुलाई की बाऊड़ी रे राखी ती। 38 लुद्धा याफा रे नेडे था, चेलैया ये सुणी की कि पतरस तेती ये, दो मांणू पेजी की तेसते बिनती किक्ती कि, “आऊणे रे देर नि करा।” 39 तेबे पतरस तिना साथे आईगा और जेबे पऊँछी गा, तेबे सेयो तेसखे तेस बाऊड़ी रे लयीं गे और तेती सब बिदुआ रोंदिया उईया तेसगे खडिया ऊई गिया और जो टाले और कुरते दोरकासे तिना साथे रूँ दे ऊए बनाए थे, दखाणे लगिया। 40 तेबे पतरसे सब जणियां बारे करी तिया और कुटणे टेकी की प्रार्थना किक्ती और लोथा रे कनारे देखी की बोलेया, “ओ तबीता! उठ।” तेबे तेसे आपणी आखिया खोली तिया और पतरसो खे देखी की उठी की बैठी गी। 41 तिने आथो रा सआरा लगाई की से ठवाली और पवित्र लोका खे और बिदुआ खे बुलाई की से जिऊँदी-जागदी दखाई ती। 42 ये गल्ल सारे याफा नगरो रे फैली गी और बऊत जणेया प्रभु यीशुए पाँदे विश्वास कित्तेया। 43 पतरस याफा नगरो रे शमोन नाओं रे केसी चामड़े रा काम करने वाले मांणू रे कअरे बऊत दिनो तक रया।

10 कैसरिया नगरो रे कुरनेलियुस नाओं रा एक मांणू था, जो इतालियानी नाओं री पलटणा रा सूबेदार था। 2 से विश्वासी था और आपणे सारे कराने समेत परमेशरो ते डरो था और से यहूदिया रे लोका खे बऊत दान देओ था और हर रोज परमेशरो ते प्रार्थना करो था। 3 तिने दिनो रे तीजे पईरो रे नेडे दर्शनो रे साफ देखेया कि परमेशरो रा एक स्वर्गदूत तेसगे पीतरे आयी की बोलोआ, “ओ कुरनेलियुस!” 4 कुरनेलियुसे से त्यानो साथे देखेया और डरी की बोलेया, “ओ प्रभु! क्या ए?” तिने तेसखे बोलेया, “तेरी प्रार्थना और तेरे दान याद करने खे परमेशरो रे सामणे पऊँछी रे 5 और एबे याफा नगरो रे कोई मांणूआ खे पेजी की शमोनो खे, जेसखे पतरस बोलोए, बुलाई लो। 6 शमोन चामड़े रा काम करने वाले रे कअरे पराऊणा ए, जेसरा कअर समुद्रे रे कनारे ए।” 7 जेबे से स्वर्गदूत जिने तेस साथे गल्ला कित्तिया थिया, चली गा, तेबे तिने दो दास और जो तेस साथे रओ थे, तिना बीचा ते एक विश्वासी सिपाई बुलाया। 8 तिना खे सारिया गल्ला बताई की सेयो याफा नगरो खे पतरसो खे बुलाणे पेजे। 9 दूजे दिने जेबे सेयो चलदे ऊए नगरो रे पऊँछे, तेबे त्याडिया जे पतरस छतो पाँदे प्रार्थना करने खे चढेया। 10 तेबे तेसखे पूख लगी और से कुछ खाणा चाओ था; पर जेबे सेयो रोटी बनाणे री त्यारी करने लगी रे थे, तदुओ की से बेओश ऊईगा। 11 तेबे तिने देखेया कि सर्ग खुली गा और एक बड़ी चादर, पांडे जेड़ी चऊँ कूणे ते लटकी री, तरतिया री तरफा खे उतरने लगी री। 12 जिदे तरतिया रे सब प्रकारा रे चऊँ पैरा वाले जानवर और रेंगणे वाले जन्तु और सर्गो रे पंछी थे। 13 तेबे तेसखे एक शब्द सुणेया, “ओ पतरस उठ और काई की खा।” 14 पर पतरसे बोलेया, “ना प्रभु, कदी पनि, कऊँकि मैं कदी बी अपवित्र या अशुद्ध चीज नि खाई।” 15 तेबे दूजी बार तेसखे शब्द सुणेया, “जो कुछ परमेशरो शुद्ध ठराई राखेया, तेसखे अशुद्ध नि बोल।” 16 तीन बार एड़ा ई ऊआ। तेबे फटाफट से पांडा सर्गो खे चकी ता। 17 जेबे पतरस आपणे मनो रे दुबिदा रे था कि ये दर्शन जो मैं देखेया क्या ऊई सकोआ? तेबे देखो, सेयो मांणू जो कुरनेलियुसे पेजे थे, शमोनो रे कअरो रा पता लगाई की द्वारा पाँदे आयी की खडे ऊईगे 18 और आक्का पाई की पूछणे लगे, “क्या शमोन, जेसखे पतरस बोलोए, एथी पराऊणा ए?” 19 पतरस तो तेस दर्शनो रे बारे रे सोचणे ई लगी रा था कि पवित्र आत्मे तेसखे बोलेया, “देख तीन मांणू ताखे टोलने लगी रे। 20 तो उठ और थाले जा और फटाफट तिना साथे चली जा, कऊँकि मैं ई सेयो पेजी राखे।” 21 तेबे पतरसे उतरी की तिना मांणूआ खे बोलेया, “देखो, जेसखे तुसे टोलने लगी रे, से आऊँ ईए। तुसा रे आऊणे री क्या बजअ ए?” 22 तिने बोलेया, “कुरनेलियुस सूबेदार, जो तर्मी और परमेशरो ते डरने वाला ए और सारी यहूदी जातिया रे जाणेया-माणेया मांणू ए, तिने एक पवित्र स्वर्गदूतो ते चेतावणी पाई कि ताखे आपणे कअरे बुलाई की तांते वचन सुणो।” 23 तेबे तिने सेयो पीतरे बुलाई की तिना री पराऊणचारी किक्ती और दूजे दिने से तिना साथे गया और याफा नगरो रे कुछ विश्वासी पाईया बीचा ते कई जणे तेस साथे चली पड़े। 24 दूजे दिने सेयो कैसरिया नगरो रे पऊँछे और

कुरनेलियुस आपणे टब्वरो वालेया साथे और खास दोस्ता साथे कट्टे ऊई की तिना खे न्यालने लगी रा था। 25 जेबे पतरस पीतरे आऊणे लगी रा था, तेबे कुरनेलियुस तेसखे मिलेया और तेसरे पैरा पाँदे पड़ी की माथा टेकेया। 26 पर पतरसे तेसखे उठाली की बोलेया, “खड़ा ओ, आऊँ बी तो मांणू ए।” 27 तेबे से तेस साथे बातचीत करदा ऊआ पीतरो खे गया। तेबे तिने बऊत सारे लोक कट्टे देखी की 28 पतरसे तिना खे बोलेया, “तुसे जाणोए कि दुजिया जातिया साथे संगति करना या तेसरे कअरे जाणा, यहूदी नियमा रे खलाफ ए, पर परमेशरे माखे बताई राखेया कि केसी बी मांणूए खे अशुद्ध या अपवित्र नि बोलो। 29 तेबेई तो जेबे आऊँ बुलाया, तेबे बिना कुछ बोले चली की आया। एबे आऊँ पुछूँआ कि आऊँ किजी खे बुलाई राखेया?” 30 कुरनेलियुसे बोलेया, “एसा कअडिया चार दिन पूरे ऊईगे, आऊँ आपणे कअरे तीजे पईरो रे प्रार्थना करने लगी रा था, तेबे देखो, एक मांणू चमकीले टाले पईनी की मां सामणे आयी की खड़ा ऊईगा 31 और बोलणे लगेया कि, ओ कुरनेलियुस! तेरी प्रार्थना सुणी ली री और तेरे दान परमेशरो रे सामणे याद करी राखे। 32 इजी री खातर केसी खे याफा नगरो रे पेजी की शमोनो खे, जेसखे पतरस बोलोए, तेसखे बुला। से समुद्रे रे कनारे शमोन चामड़े रा काम करने वाले रे कअरे पराऊणा ए। तेस आई की तुसा खे परमेशरो रा संदेश सुनाणा। 33 तेबे मैं फटाफट तांणे लोक पेजे और तौं खरा कित्तेया जो आईगा। एबे आसे सब परमेशरो सामणे ए, ताकि जो कुछ परमेशरे तांणे बोली राखेया, से सुणिंए।” 34 तेबे पतरसे बोलेया, “एबे माखे निश्चा ऊआ कि परमेशर केसी रा पक्षपात नि करदा। 35 बल्कि हर जातिया दे, जो परमेशरो ते डरोआ और तर्मां रे काम करोआ, से तेसखे अच्छा लगेओ। 36 जो वचन तिने इस्राएलिया गे पेजेया, जेबे तिने प्रभु यीशु मसीह रे जरिए (जो सबी रा प्रभु ए) शान्तिया रा सुसमाचार सुणाया। 37 से वचन तुसे जाणोए, जो यूहन्ने रे बपतिस्मे रे प्रचारो ते बाद गलील प्रदेशो ते शुरू उई की यहूदिया प्रदेशो रे बऊत सारी जगा रे फैली गा। 38 परमेशरे किंयां प्रभु यीशु नासरी पवित्र आत्मा और सामर्था ते अभिषेक कित्ते। से पलाई करो था और बऊत सारे लोक जो शैतानो रे सताए रे ओ थे, अच्छा करदा फिरेया, कऊँकि परमेशर तेस साथे था। 39 “आसे तिना सबी कामो रे गवा ए, जो तिने यहूदिया प्रदेशो रे और यरूशलेमो रे बी कित्ते और यहूदी अगुवे से यरूशलेमो रे क्रूसो पाँदे लटकाई की काई ता। 40 पर से परमेशरे तीजे दिने जिऊँदा कित्तेया और प्रयात बी करी ता। 41 सबी लोका खे नि, बल्कि तिना गवाओ पाँदे, जो परमेशरे पडले ई चुणीं ले थे, मतलब-आसा पाँदे, जिने तेसरे मरने और जिऊँदे ऊणे ते बाद तेस साथे खाया-पिया। 42 तिने आसा खे आज्ञा दित्ती कि सबी लोका बीचे प्रचार करो और गवाई देओ कि ये सेई, जो परमेशरे जिऊँदेया रा और मरे रेया रा न्यायी ठराई राखेया। 43 तेसरी सब भविष्यबक्ता गवाई देओए, ताकि जो कोई तेस पाँदे विश्वास करो, तेसखे तेसरे नाओं ते पापो ते माफी मिलणी।” 44 पतरस इना गल्ला खे बोलणे ई लगी रा था कि वचनो रे सबी सुणने वालेया पाँदे पवित्र आत्मा उतरी गा 45 और जितणे खतना करे रे यहूदी विश्वासी पतरसो साथे आए थे, सेयो सब हैरान ऊईगे कि दुजिया जातिया पाँदे बी पवित्र आत्मा रा दान लटी राखेया। 46 कऊँकि तिने सेयो लग-लग पाषा बोलदे ऊए और परमेशरो री तारीफ करदे ऊए सुणे। 47 तेबे पतरसे बोलेया, “क्या कोई पाणिंए खे रोकी सकोआ कि यो बपतिस्मा नि पाओ, जिने आसा जेड़ा परमेशरो री तरफा ते पवित्र आत्मा पाई राखेया?” 48 और पतरसे आज्ञा दित्ती कि तिना खे प्रभु यीशु मसीह रे नाओं ते बपतिस्मा देओ, तेबे तिने तेसते बिनती किक्ती कि तुसे कुछ दिन ओर आसा साथे रओ। तेबे से तिना साथे कुछ दिन ओर रईगा।

11 तेबे प्रेरिते और विश्वासी पाईए जो यहूदिया प्रदेशो रे थे, सुणेया कि दूजिये जातिये बी परमेशरो रा वचन मानी ला रा। 2 जेबे पतरस यरूशलेमो रे आया, तेबे खतना करे रे यहूदी विश्वासी तेस साथे बईस करने लगे 3 और बोलेया, “तैं बिना खतना कराए दूजी जातिया रे कअरे जाई की तिना साथे खाणा बी खाई ला।” 4 तेबे पतरसे तिना खे शुरूओ ते एक-एक

करी की सुणाय्या, 5 “आऊँ याफा नगरो रे प्रार्थना करने लगी रा था और बेओश ऊई की एक दर्शन देखेया, कि एक बड़ी चादर, एक पांडे जेड़ी, चऊँ कूणे ते लटकी री समों ते उतरी की मांगे आयी। 6 जेबे मैं तिजी पाँद त्वान कित्तेया, तेबे तिदे तरतिया रे चऊँ पैरा वाले जानवर और बणो रे पशु, लूरने वाले जन्तु और समों रे पंछी देखे 7 और ये शब्द बी सुणेया, ‘ओ पतरस उठ, मार और खा।’ 8 “मैं बोलेया, ‘ना प्रभु! ना, कऊँकि कोई बी अपवित्र या अशुद्ध चीज मैं कदी नि खाई।’ 9 तेबे एतरे जवाबो रे दूजी बार समों ते शब्द ऊआ, ‘जो कुछ परमेशरे शुद्ध ठराई राखेया, तेसखे अशुद्ध नि बोला।’ 10 तीन बार एड़ा ई ऊआ, तेबे सब कुछ समों खे खिंची ता। 11 और देखो, तेबुई तीन माणू जो कैसरिया नगरो ते मांगे पेजी राखे थे, तेस कअरो रे, जेती आसे थे, आयी की खड़े ऊईगे। 12 तेबे पवित्र आत्मे माखे तिना साथे चुप-चाप जाणे खे बोलेया और यो छे पाई बी मां साथे आईगे और आसे तेस माणूए रे कअरे गये। 13 तिने आसा गे बताया कि मैं एक स्वर्गदूत आपणे कअरे खड़े रा देखेया, जिने माखे बोलेया कि याफा रे माणूआ खे पेजी की शमौनो खे, जेसखे पतरस बी बोलेओ, बुला। 14 तेस तांगे एड़िया गल्ला बोलणिया, जेते साथे था और तरे कराने उद्वार पाणा। 15 “जेबे आऊँ तिना साथे गल्ला लगी रा था करने, तेबे पवित्र आत्मा तिना पाँद तिवाँ ई आया, जियाँ शुरुओ रे पेन्तिकुस्तो रे दिने आसा पाँद उतरेया था। 16 तेबे माखे प्रभुए रा से वचन याद आया, जो तिने बोलेया था, ‘यूहन्ने तो पाणिए साथे बपतिस्मा दित्तेया, पर तुसा पवित्र आत्मा रा बपतिस्मा पाणा।’ 17 तो जेबे परमेशरे बी तिना खे सेई दान दित्तेया, जो आसा खे प्रभु यीशु मसीह पाँद विश्वास करने ते मिलेया था, तो आऊँ कुण था, जो परमेशरो खे रोकी सऊँआ?” 18 ये सुणी की यहूदी विश्वासी चुप रये और परमेशरो री तारीफ करी की बोलणे लगे, “तेबे तो परमेशरे दुजिया जातिया खे बी अनन्त जीवनो खे बुरे कामा ते मन फिराणे रा मौका देई राखेया।” 19 तेबे जो लोक तेस क्लेशो रे मारे जो स्तिफनुसो री बजअ ते पड़ेया था, ओरे-पारे ऊईगे थे, तेबे सेयो कूमदे-फिरदे फीनीके प्रदेश, साईप्रस टापू और अन्ताकिया नगरो रे पऊँछे, पर सेयो यहूदिया ते अलावा केसी ओरी खे परमेशरो रा वचन नि सुणाओ थे। 20 पर तिना बीचा ते कुछ विश्वासी साईप्रसवासी और कुरेनी थे, जो अन्ताकिया नगरो रे आयी की यूनानिया खे बी प्रभु यीशु मसीह रे सुसमाचारो रिया गल्ला सुणाओ थे। 21 प्रभुए री सामर्थ्य तिना साथे थी और बऊत सारे दूजिया जातियो रे लोक तिना रे संदेशो पाँद विश्वास करी की प्रभुए री तरफा खे फिरी गे। 22 जेबे तिना रे बारे रे यरूशलैमो री मण्डलिया रे सुणने खे मिलेया, तेबे तिने बरनबास अन्ताकिया नगरो खे पेजेया। 23 से तेती पऊँछी की ओर परमेशरो री कृपा देखी की खुश ऊआ और तिने सबी खे उपदेश दित्तेया कि तन-मन लगाई की प्रभुए साथे चीपटे रे रओ। 24 बरनबास एक खरा माणू था और पवित्र आत्मा और विश्वासो रे परिपूर्ण था और बऊत सारे लोक प्रभुए रे मिली गे। 25 तेबे बरनबास शाऊल खे टोलने तरसुसो खे चली गा। 26 और जेबे सेयो तेसखे मिले, तो तेसखे अन्ताकिया नगरो रे ली आया। तेबे एड़ा ऊआ कि बरनबास और शाऊल एक साल तक मण्डलिया साथे मिलदे और बऊत सारे लोका खे यीशुए रा उपदेश देँदे रये और चलेया खे सबी ते पईले अन्ताकिया नगरो रे मसीह बोलेया। 27 तिना दिना रेई कुछ विश्वासी जो भविष्यबक्ता थे, यरूशलैमो ते अन्ताकिया नगरो खे आए। 28 तिना बीचा ते अगबुस नाओं रे एक भविष्यबक्ते खड़े ऊई की पवित्र आत्मा री प्रेरणा ते ये बताया कि सारी दुनिया रे बऊत बड़ा अकाल पड़ना और से अकाल क्लीदियुस महाराजे रे बखतो रे पड़ना। 29 चलेया न्याय कित्तेया कि हर एक आपणिया-आपणिया आऊँदणियां रे मुताबिक, यहूदिया प्रदेशो रे रणे वाले विश्वासी पाईया री मतादा खे कुछ पेजी। 30 तिने एड़ा ई कित्तेया और बरनबास और शाऊल गे बुजुर्ग लोका खे कुछ पैसे पेजी ते।

12 तेस बखते हेरोदेस राजा मण्डलिया रे कई लोक दुः ख देणे खे पकड़े। 2 तिने यूहन्ने रा पाई याकूब तलवारे की मरवाया। 3 जेबे तिने देखेया कि यहूदी लोक इजी ते खुश ओए, तेबे तिने पतरस बी पकड़ी ता। सेयो

अखमीरी रोटिया रे त्योआरो रे दिन थे। 4 हेरोदेसे पतरस पकड़ी की जेला रे पायी ता और रखवालिया खे चार-चार सिपाईया खे चार पड़े रे राखेया। एड़ी इच्छा ते ताकि तेसखे फसह रे त्योआरो ते बाद लोका सामणे ल्याईए। 5 पतरस जेला रे कई दिना ते बंद था, पर मण्डली तेसरी खातर दिऊआ बाली की परमेशरो ते प्रार्थना लगी री थी करने। 6 जेबे हेरोदेस तेसखे लोका सामणे मुकद्दमा चलाणे खे ल्याऊणे वाला था, तो तेसा ई राती पतरस दो जंजीरा साथे बाने रा, दो सिपाईया रे बीच सऊणे लगी रा था और पड़ेदार द्वारा पाँद जेला री रखवाली लगी रे थे करने। 7 अचाणक प्रभुए रा एक स्वर्गदूत आयी की पतरसो रे नेड़े खड़ा ऊईगा और तेती कोठरिया रे जोति चमकणे लगी और तिने पतरसो री पसलिया रे आथ बाई की से जगाया और बोलेया, “उठ, फटाफट कर।” तेसरे आथो ते जंजीरा खुली की छूटी गिया। 8 तेबे स्वर्गदूते तेसखे बोलेया, “लक बान और आपणे बूट पईनी लो।” तिने तेड़ा ई कित्तेया। तेबे स्वर्गदूते तेसखे बोलेया, “आपणे टाले पईनी की मां पीछे आईजा।” 9 से निकली की तेस पीछे आईगा, पर ये नि जाणो था कि जो स्वर्गदूत करने लगी रा, से सचची ये, बल्कि ये समजणे लगी रा था कि आऊँ सुपना लगी रा देखणे। 10 तेबे सेयो पईले और दूजे पड़े ते निकली की तेस लोए रे फाटको गे पऊँछे, जो नगरो री तरफा खे था। से तिना खे आपू तेई खुली गा और सेयो निकली की एकी गलिया रिये गये, तदुओ की स्वर्गदूत तेसखे छाडी की चली गा। 11 तेबे पतरसे ओशा रे आयी की बोलेया, “एबे आऊँ सच जाणी गा रा कि प्रभुए आपणा स्वर्गदूत पेजी की आऊँ हेरोदेसो रे आथो ते छुड़ाई ता और यहूदी अगुवा री सारी उम्मीद तोड़ी ती।” 12 ये जाणी की परमेशरे से छुड़ाई ता रा पतरस तेस यूहन्ने री आम्मा मरियमा रे कअरे आया, जेसखे मरकुस बी बोलेओ। तेती बऊत सारे विश्वासी कट्टे ऊई की प्रार्थना करने लगी रे थे। 13 जेबे तिने फाटको री द्वारी खटखटाई तेबे रुदे नाओं री एक दासी देखणे आयी। 14 पतरसो री आवाज पछयाणी की तेसे खुशिया रे मारे फाटक नि खोलेया, पर पीतरे दौड़ी की गयी और बताया, “पतरस द्वारा पाँद खड़ी रा।” 15 तिने तेसा खे बोलेया, “तू पागल ए?” पर से पक्का ऊई की बोलणे लगी कि से पतरस ईए। तेबे तिने बोलेया, “तेसरा स्वर्गदूत ऊणा।” 16 पर पतरस दरवाजा खटखटांदा ई रया। तेबे तिने द्वारी खोली और तेसखे देखी की हैरान ऊईगे। 17 तेबे तिने तिना खे आथो साथे सारा कित्तेया कि चुप रओ और तिना खे बताया कि प्रभु माखे कियाँ जेला ते निकयाली की ल्याया और बोलेया, “याकूब और पाईया खे ये गल्ल बताई देणी।” तेबे से निकली की दूजी जगा खे चली गा। 18 प्यागा-प्यागा सिपाईया बीच आल्ला-गोल्ला ऊणे लगेया कि पतरसो रा क्या ऊआ? 19 जेबे हेरोदेसे तेसखे टोलने री आज्ञा दिती और मिलेया नि, तेबे तिने पड़ेदारा री परख करी की तिना खे आज्ञा दिती कि तिना खे काई दो। तेबे से यहूदिया प्रदेशो खे छाडी की कैसरिया नगरो रे जाई की कुछ बखतो खे रणे लगेया। 20 राजा हेरोदेसे सूर और सैदा नगरो रे लोका ते बऊत नराज था। तेबे सेयो एक मन ऊई की हेरोदेसो गे आए। तिने बलास्तुसो खे, जो राजे रा एक दास था, मनाई की मेल-जोल करना चाया, कऊँकि हेरोदेसो राजे रे देशो ते तिना रे देशो रा पालण-पोषण ओ था। 21 ठराए रे दिनो रे हेरोदेस राजवस्त्र पईनी की न्याय आसणो रे बैठेया और तिना खे पाषण देणे लगेया। 22 तेबे लोक जोरे की बोलणे लगे, “ये तो माणूए रा नि, पर परमेशरो रा शब्द ए।” 23 तेसी बखते प्रभुए रे एक स्वर्गदूते तेबुई तेसखे बाई, कऊँकि तिने परमेशरो री महिमा नि किती और तेसरे कीड़े पड़ी गे और कीड़े पड़ने री बजअ ते से मरी गा। 24 पर परमेशरो रा वचन लगतार फैलदा गया और विश्वासी री गिणती बड़ी गई। 25 जेबे बरनबास और शाऊल यहूदिया प्रदेशो रे यहूदी विश्वासिया खे मताद करने रा काम पुरा करी चुके, तेबे यूहन्ने खे, जेसखे मरकुस बी बोलेओ, साथे लयी की यरूशलैमो ते अन्ताकिया खे वापस ऊए।

13 अन्ताकिया नगरो री मण्डलिया रे कई भविष्यबक्ता और उपदेशक थे। जियाँ-बरनबास, शमौन जेसरा दूजा नाओं नीगर बी बोलेओ, लूकियुस

कुरेनी और चौथाई देशों के राजे हेरोदेसों साथे पलेया-बड़ेया रा पाई मनाहेम और शाऊल। 2 जेबे सेयो बअरतो साथे प्रभुए री भक्ति करने लगीं रे थे, तेबे पवित्र आत्मे बोलेया, “मेरी तँई बरनबासो खे और शाऊलो खे तेस काम करने खे लग करी देओ, जेतेरी खातर मैं सेयो बुलाई राखे।” 3 तेबे तिने बअरत और प्रार्थना करी की और तिना पाँदे आथ राखी की सेयो परमेशरो रा काम करने खे पेजे। 4 तेबे बरनबास और शाऊल पवित्र आत्मा रे पेजे रे अन्ताकिया नगरो ते सिलुकिया नगरो खे गये और तेथा ते जाहजो रे चढ़ी की साईप्रस टापूए पाँदे सलमीसो खे चली गे। 5 तेबे तिने सलमीसो रे पऊँछी की परमेशरो रा वचन यहूदिया रे प्रार्थना रे कअरो रे सुणाया और यहून्ना मरकुस तिना री मताद करने वाला था। 6 सेयो तेस सारे टापूओ रिये ऊँदे ऊए पाफुस नगरो तक पऊँछे। तेती तिना खे बारयीशु नाओं रा एक यहूदी जादू-टोणे वाला और चूठा भविष्यबक्ता मिलेया। 7 से हाकिम, सिरिगियुस पौलुसो साथे था। सिरिगियुस पौलुस अक्लमंद माणू था। तिने बरनबास और शाऊलो खे आपू गे बुलाई की परमेशरो रा वचन सुणना चाया। 8 पर एलिमास जादू करने वाले, कऊँकि येई तेसरे नाओं रा मतलब ए, तिना रा बिरौद करी की हाकिमो खे यीशुए पाँदे विश्वास करने ते रोकना चाओ था। 9 तेबे शाऊले, जेसरा नाओं पौलुस की ए, तिने पवित्र आत्मा ते परिपूर्ण ऊई की एलिमास जादूगरो री तरफा खे एक टक लगाई की देखेया और बोलेया, 10 “ओ सारे कएट और ऊशयारिया ते परे रे शैतानो री ल्वादा! सकल तमों रे बैरी, क्या तां प्रभुए री सीदी बाट, टेडी करने ते नि छाडणी? 11 एबे देख, प्रभुए री सजा ताखे मिलणी और तूँ कुछ बखतो तक अन्दा रणा और सूरज नि देखणा।” तेबे तेबुई चाला-माला और न्हेरा तेस पाँदे छाईगा और से ओरे-पोरे टटोलने लगेया, ताकि कोई तेसरा आथ पकड़ी की लयी चलो। 12 तेबे हाकिमे जो कुछ ऊई रा था, से देखी की और प्रभुए रे उपदेशो ते हैरान ऊई की प्रभु यीशुए पाँदे विश्वास कित्तेया। 13 पौलुस और तेसरे साथी पाफुस नगरो ते जाहज खोली की पंफूलिया प्रदेशो रे पिरगा नगरो रे आए। तेबे यहून्ना मरकुस तिना खे छाडी की यरूशलेमो खे वापस ऊईगा। 14 तेबे सेयो पिरगा नगरो ते आगे पऊँछी की पिसिदिया प्रदेशो रे अन्ताकिया नगरो रे पऊँछे और आरामो रे दिने प्रार्थना रे कअरो रे जाई की बैठोगे। 15 मूसे रा बिधान और भविष्यबक्तेया री कताब पढ़ने ते बाद, प्रार्थना रे कअरो रे सरदार तेसरे खे सन्देशा पेजेया, “ओ पाईयो! जे लोका री बढोतरिया री खातर तुसा रे मनो रे कुछ गल्ल आपू तो बोली।” 16 तेबे पौलुस खेडे ऊई की आथो साथे साअरा करी की बोलेया, “ओ इस्राएलियो! और परमेशरो ते डरने वालेयो, सुणो। 17 इना इस्राएलिया रे लोका रे परमेशरे आसा रे बाप-दादे चुणी ले और जेबे सेयो मिस्र देशो रे परदेशी ऊई की रओ थे, तेबे तिना री तरक्की कित्ती और बऊत बडी सामर्था साथे निकयाली की ली आया। 18 एथो तक सेयो परमेशरो री आज्ञा खे तोडदे रये तेबे बी परमेशर तिना खे कोई चाली साल तक सुनसाण जगा रे तिना खे सईन करदा रया। 19 “तिने कनान देशो रे सात जातिया रा नाश करी की तिना री जमीन आपणे लोका रे कब्जे रे करी ती। 20 एते सारे कामो रे तकरीबन कोई साडे चार सौ साल लगे। इजी ते बाद परमेशरे तिना खे शमूएल भविष्यबक्ता रे आऊणे तक तिना रे न्यायी ठराए। 21 जेबे शमूएल एबु बी तिना रा अगुवा था तेबे इस्राएली लोके आपू खे एक राजा मांगेया। तेबे परमेशरे चाली साला खे बिन्यामीनो रे गोत्रा बीचा ते एक माणूए खे, मतलब-कीशो रा पाऊ शाऊल, तिना रा राजा बणाया। 22 तेबे परमेशरे शाऊलो खे राजे रे पदो ते टाई की तेसरी जगा पाँदे दाऊदो खे इस्राएलिया रा राजा बणाया। जेसरे बारे रे तिने गवाई दिती कि माखे यिश्ने रा पाऊ दाऊद, मेरे मनो रे मुताबिक मिली गा रा, तेस ई मेरी सारी इच्छा पूरी करनी।” 23 “इजी रेई बंशो बीचा ते परमेशरे आपणे वादे रे मुताबिक, इस्राएलो गे एक उद्धारकर्ता, मतलब-प्रभु यीशुए खे पेजेया। 24 जेसरे आऊणे ते पईले यहून्ने सबी इस्राएलिया खे मन फिराणे रे बपतिस्मे रा प्रचार कित्तेया। 25 जेबे यहून्ना आपणी सेवा पूरी करने वाला था, तेबे तिने बोलेया कि तुसे माखे क्या बोलोए? आऊँ मसीह निए, पर देखो, जो मांते बाद एक आऊणे वाला ए, से मांते इतणा महान ए, आऊँ

तेसरे पैरो रे जोड़े रे फिथे खोलणे जोगा बी निए। 26 “ओ पाईयो! तुसे जो अन्नाहमो री ल्वादा ए और तुसे जो परमेशरो ते डरोए, तुसा गे एतेरे उद्धारो रा वचन पेजे राए। 27 यरूशलेमो रे रणे वाले और तिना रे अधिकारिए, ना यीशु पछयाणा और ना भविष्यबक्ते रिया गल्ला समजिया, जो हर आरामो रे दिने पडी जाओई। तेबेई से दोषी ठराई की सेयो गल्ला पुरिया कित्तिया। 28 तिने काणे जोगा तेसरे कोई दोष नि देखेया, तेबे बी पिलातुसे बिनती कित्ती कि से काया जाओ। 29 जेबे तिने तेसरे बारे रे पवित्र शास्त्रो रे लिखी रिया सारिया गल्ला पुरिया कित्तिया। तिने से कूसो पाँदे लटकाई की काई ता और तेबे कूसो पाँदे ते उतारी की कन्ना रे राखेया। 30 पर परमेशरे से मरे रेया बीचा ते जिऊँदा कित्तेया। 31 और से तिना खे जो तेस साथे गलील प्रदेशो ते यरूशलेमो खे आए थे, बऊत दिनो तक आपणे चलेया खे दिशदा रया। लोका सामणे एबे सेयो ई तेसरे गवा ए। 32 “आसे बी तुसा खे तेस वादे रे बारे दे, जो परमेशरे बाप-दादेया साथे कित्तेया था, ये सुसमाचार सुणाऊँए। 33 कि परमेशरे यीशुए खे मरे रेया बीचा ते जिऊँदा करी की सेई वादा आसा री ल्वादा खे पूरा कित्तेया, जेडा भजनसंहिता रे दूजे पजनो रे परमेशरे मसीह रे बारे बोली राखेया कि “तूँ मेरा पुत्र ए, आज मैं ई तूँ पैदा करी राखेया। 34 “और तेसरे ईयां मरे रेया बीचा ते जिऊँदे ऊणे रे बारे रे बी कि से कदी नि सडो, परमेशरे ये बोली राखेया मां दाऊदो पाँदलिया पवित्र और अटल कृपा तुसा पाँदे करनिया। 35 तेबेई तो दाऊदे एकी ओरी पजनो रे बी बोली राखेया कि “तां आपणा पवित्र जन सडने नि देणा। 36 “कऊँकि दाऊद तो परमेशरो री इच्छा रे मुताबिक आपणे बखतो री सेवा पूरी करी की मरी गा और आपणे बाप-दादेया साथे जाई की मिली गा और सडी बी गया। इजी रे जरिए आसे जाणूए कि दाऊदे ये गल्ला आपणे बारे रे नि बोली राखिया। 37 पर ये गल्ला यीशुए रे बारे रे बोली राखिया थिया जो परमेशरे मरे रेया बीचा ते जिऊँदा करी राखेया, से सडेया नि। 38 “इजी री खातर, ओ पाईयो! तुसे जाणी लो कि एसरी ई बजअ ते पापो री माफिया रा सुसमाचार तुसा खे दित्तेया जाओआ 39 और जिना गल्ला साथे तुसे मूसे रिया बिधानो रे जरिए निर्दोष नि ठईरी सको थे, तिना सबी ते हर एक विश्वास करने वाला, यीशुए री बजअ ते निर्दोष ठईरोआ। 40 तेबेई तो चौकस रओ, एडा नि ओ कि जो भविष्यबक्ता री कताबा रे लिखी राखेया, 41 तुसा पाँदे बी आओ कि, “ओ निन्दा करने वाले देखो और हैरान ओ और खत्म ऊई जाओ, कऊँकि आऊँ तुसा रे दिने रे एक काम कर्हआ, एडा काम कि जे कोई तुसा ते तिजी रे बारे रे पूछो, तो तुसा कदी विश्वास नि करना।” 42 पौलुस और बरनबासो रे प्रार्थना रे कअरो ते बारे निकलदे बखते लोक तिना ते बिनती करने लगे कि आगले आरामो रे दिने तुसे आसा खे फेर इना गल्ला खे सुणाओ। 43 जेबे प्रार्थना रे कअरो रे लोक उठी गे, तेबे यहूदी और तिना रे मतो रे आए रे भक्ता बीचा ते बऊत पौलुस और बरनबासो पीछे आईगे और तिने तिना साथे गल्ला करी की सेयो समजयाए कि परमेशरो री कृपा रे बणे रे रओ। 44 आगले आरामो रे दिने नगरो रे तकरीबन सारे लोक परमेशरो रा वचन सुणने खे कट्टे ऊईगे। 45 पर यहूदी अगुवे पीडा खे देखी की जलना साथे परी गे और निन्दा करदे ऊए पौलुसो री गल्ला रे बिरौदो रे बोलणे लगे। 46 तेबे पौलुस और बरनबासे निडर ऊई की बोलेया, “जरूरी था कि पईले तुसा खे परमेशरो रा वचन सुणाया जांदा। पर जबकि तुसे लोके से नकारिता और आपू खे अनन्त जीवनो जोगा बणाओए, तो देखो, आसे दुजिया जातिया खे परमेशरो रा वचन सुणाणे खे जाऊँए। (aiōnios g166) 47 कऊँकि प्रभुए आसा खे ये आज्ञा देई राखी कि “मैं तूँ दुजिया जातिया खे जोति ठराई राखेया; ताकि तुसा रे जरिए सारी तरतिया पाँदे उद्धार ल्याया जाओ।” 48 ये सुणी की दूजी जाति खुश ऊई और परमेशरो रे वचनो री तारीफ करने लगे और जितणे अनन्त जीवनो खे बणाई राखे थे, तिने विश्वास कित्तेया। (aiōnios g166) 49 तेबे प्रभुए रा वचन तेस सारे देशो रे फैलणे लगेया। 50 पर यहूदिया रे अगुवे भक्त और तर्मी जवाणसा और नगरो रे खास लोक उकसाए और पौलुस और बरनबासो पाँदे उपद्रव करवाई की सेयो आपणे इलाके ते निकयाली ते। 51 तेबे पौलुस और बरनबास तिना सामणे आपणे

पैरा री तूड़ चाड़ी की इकुनियुम नगरो खे चली गे 52 और अन्ताकिया नगरो रे चले खुशिया साथे और पवित्र आत्मा ते परिपूर्ण ऊँदे गये।

14 इकुनियुम नगरो रे एड़ा ऊआ कि पौलुस और बरनबास यहूदिया रे प्रार्थना रे कअरो रे साथे गये और एड़िया गल्ला कित्तिया कि यहूदी और यूनानिया बीचा ते कई जणे विश्वास कित्तेया। 2 पर ना मानणे वाले यहूदिये दुजिया जातिया रे मन विश्वासी पाईया रे खलाफ उकसाए और फूट पैदा करी ती। 3 पौलुस और बरनबास बऊत दिनो तक तेती रये और प्रभुए पंदि विश्वास करी की इम्तता साथे गल्ला करो थे और से तिनारे रे आथो साथे चिह्न और अचम्बे रे काम करवाओ था और आपणी कृपा रे वचनो पंदि गवाई देओ था। 4 पर इलाके रे लोका बीचे फूट पड़ी गी थी और तेबे कुछ लोक यहूदिया रे कनारे और कुछ प्रेरितारी तरफा खे ऊईगे थे। 5 जेबे दूजी जाति और यहूदी तिनारा मजाक करने और तिनारा खे पत्थराव करने खे आपणे अधिकारिया समेत तिनारा पंदि दौड़े, 6 तेबे तिनारा खे एसा गल्ला रा पता लगी गा और सेयो लूकाउनिया प्रदेशो रे लुस्त्रा और दिरबे रे नगरो रे और ओरे-पोरे रे प्रदेशो रे नठीगे 7 और तेती जाई की सुसमाचार सुणाणे लगे। 8 लुस्त्रा नगरो रे एक माणू था बठे रा, जो पैरा ते कमजोर था। से जन्मो तेई लंगड़ा था और कदी पनि चली रा था। 9 से पौलुसो खे गल्ला करदे ऊए सुणने लगी रा था और तिनारे एक टक लगाई की देखेया कि एसखे ठीक ऊणे रा विश्वास ए 10 और जोरे की बोलेया, “आपणे पैरा रे पारे सीदा खड़ा ऊई जा।” तेबे से उटकी की चलणे-फिरने लगेया। 11 लोके पौलुसो पंदि विश्वास करी की लूकाउनिया पाषा रे जोरे की बोलेया, “देवता आसा गे उतरी की आईगे रे।” 12 तेबे तिनारे बरनबासो खे यूनानी देवते रा नाओं पंदि ज्यूस और पौलुसो खे हिस्से बोलिया, कऊँकि ये संदेश करने रे खास था। 13 ज्यूस तेस मन्दरो रा पुजारी था, जो तेपरं नगरो रे सामणे था। बेल और फूला रे आर फाटका पंदि लगाई की लोका साथे बलिदान करना चाओ था। 14 पर बरनबास और पौलुस प्रेरिते जेबे सुणेया, तो तेबे तिनारे आपणे टाले फाड़े और पीड़ा रे लमखणे लगे और आक्का पाई की बोलणे लगे, 15 “ओ लोको! तुसे क्या लगी रे करने? आसे बी तो तुसा जेड़े दुः ख-सुख पोगणे वाले माणू ए और तुसा खे सुसमाचार सुणाऊँए कि तुसे इना बेकारा रिया चीजा ते लग ऊई की जिऊँदे परमेशरो री तरफा खे फिरो, जिने स्वर्ग, तरती, समुद्र और जो कुछ तिनारे आए, से बणाया। 16 तिनारे बीते रे बखतो रे सब जातिया आपणी-आपणी बाटा रे चलणे दित्तिया। 17 तेबे बी तिनारे आपणे आपू खे बिना गवाओ ते नि छाडेया, पर से पला करदा रया और सर्गो ते बर्खा और फलदार ऋतु देई की तुसारे रे मनो खे रोटी और खुशिया ते परदा रया।” 18 ये बोली की बी तिनारे लोक बडिया मुश्किला ते रोके कि तिनारे खे बलिदान नि करो। 19 पर कुछ यहूदिये अन्ताकिया और इकुनियुम नगरो ते आयी की लोक आपणी तरफा खे करी ते और पौलुसो खे पात्थर बाए और तेसखे मरे रा समजी की नगरो ते बारे कसिटी की लयी गे। 20 पर जेबे चले आईकि तेसरे चऊँ कनारे खड़े ऊईगे, तेबे से उठी की नगरो खे चली गा और दूजे दिने बरनबासो साथे दिरबे खे चली गा। 21 तेबे पौलुस और बरनबास तेस नगरो रे लोका खे सुसमाचार सुणाई की और बऊत सारे चले बणाई की लुस्त्रा और इकुनियुमो रे ऊँदे ऊए अन्ताकिया नगरो खे वापस ऊईगे 22 और सेयो हर नगरो रे चलेया रे मनो खे स्थिर (पक्का) करदे रये और ये उपदेश देंदे रओ थे कि विश्वासो रे बणे रे रओ और ये बोलदे रओ थे, “आसा खे बड़े क्लेश उठाई की परमेशरो रे राज्य रे जाणा पड़ना” 23 और तिनारे हर एक मण्डलिया रे तिनारा खे बुजुर्ग ठईराए और बअरतो साथे प्रार्थना करी की सेयो प्रभुए रे आथो रे सम्बाली ते, जेस पंदि तिनारे विश्वास कित्तेया था। 24 तेबे सेयो पिसिदिया प्रदेशो रे ऊँदे ऊए पंफूलिया प्रदेशो रे पऊँछे। 25 तेबे पंफूलिया प्रदेशो रे पिरगा नगरो रे वचन सुणाई की अत्तलिया नगरो रे आए 26 और तेथा ते सेयो जाहजो रे अन्ताकिया नगरो रे आए, जेथा ते तिनारा खे परमेशरो री कृपा रे सम्बाली की तेस कामो खे पेजेया था जेतेखे सेयो एबे पूरा करी की वापस आईगे। 27 तेती पऊँछी की तिनारे मण्डली कट्टी किन्ती

और तिनारे बताया कि परमेशरे आसा साथे रई की कितणे बड़े-बड़े काम कित्ते और दुजिया जातिया खे विश्वासो रा दरवाजा खोली ता। 28 पौलुस और बरनबास चलेया साथे बऊत दिन तक रये।

15 तेबे कुछ यहूदी विश्वासी यहूदिया प्रदेशो ते अन्ताकिया नगरो रे आयी की विश्वासी पाईया खे सखयाणे लगे, “जे मूसे री रवाजा रे मुताबिक तुसारा खतना नि ओ तो तुसे उद्धार नि पाई सकदे।” 2 जेबे पौलुस और बरनबासो रा तिनारा साथे बऊत चगड़ा और बईस ऊई तो कलीसिये ये फैंसला लया कि पौलुस और बरनबासो खे कुछ ओर माणूआ साथे एसा गल्ला रे बारे रे सोचणे खे यरूशलेम नगरो रे प्रेरिता और बुजुर्गो गे पेजो। 3 तेबे मण्डलिया सेयो थोड़ी जी दूर तक पऊँछाए और सेयो फीनीके और सामरिया प्रदेशो ते ऊँदे ऊए दुजिया जातिया रे मन फिराणे रा समाचार सुणादि गये और सब विश्वासी पाई खुश कित्ते। 4 जेबे सेयो यरूशलेमो रे पऊँछे, तेबे मण्डली, प्रेरित और बुजुर्गो तिनारा साथे खुश ऊई की मिले और पौलुस और बरनबास बताया कि परमेशरे आसा साथे रंदे ऊए केड़े-केड़े काम कित्ते थे। 5 पर फरीसिया रे पंथो बीचा ते जिने विश्वास कित्तेया था, तिनारा बीचा ते कई जणे उठी की बोलेया, “दूजी जातिया खे खतना करणा और मूसे रे बिधानो खे मानणे री आज्ञा देणी चाईयो।” 6 तेबे प्रेरित और बुजुर्ग एसा गल्ला रे बारे रे विचार करने खे कट्टे ऊए। 7 तेबे पतरसे बऊत बईस ऊणे ते बाद खड़े ऊई की तिनारे खे बोलेया, “ओ पाईयो! तुसे जाणोए कि बऊत दिन ऊईगे कि परमेशरे तुसारा बीचा ते आऊँ चुणी ला रा, ताकि दूजी जाति मेरे मुंओ ते सुसमाचारो रा वचन सुणी की विश्वास करो। 8 मनो खे परखणे वाले परमेशरे तिनारे खे बी आसा जेड़ा पवित्र आत्मा देई की तिनारा री गवाई दिती 9 और विश्वासो रे जरिए तिनारे रे मन शुद्ध करी की आसा रे और तिनारे कोई फर्क नि राखेया। 10 तो एबे तुसे कऊँ परमेशरो री परीक्षा करोए की चलेया री क्याड़िया (गरदन) पंदि एड़ा जूंगड़ा राखो, जेतेखे ना म्हारे बापदादे चकी सको थे और ना आसे चकी सकदे? 11 पर आ, आसा रा ये तो निश्चा ए कि जियाँ तिनारा प्रभु यीशुए री कृपा ते उद्धार पाणा, तियाँ ई आसा बी पाणा।” 12 तेबे सारी सभा चुप-चाप ऊई की बरनबास और पौलुसो री सुणने लगी कि परमेशरे तिनारे जरिए दुजिया जातिया बीचे केड़े-केड़े चिह्न और अचम्बे रे काम दखाए। 13 जेबे बरनबासे और पौलुसे आपणा पाषण देणा बन्द कित्तेया, तेबे याकूब बोलणे लगेया, “ओ पाईयो, मेरी सुणो। 14 शमोन पतरसे बताया कि परमेशरे पईले-पईले दुजिया जातिया पंदि केड़ी कृपा दृष्टि कित्ती कि तिनारा बीचा ते आपणे नाओं खे एक प्रजा बणाई लो। 15 इजी साथे भविष्यबक्ते रिया गल्ला बी मिलोईया, जेड़ा लिखी राखेया, 16 “इजी ते बाद मां फेर आयी की दाऊदो रा टले रा डेरा चकणा और तिजी रे खंडहर फेर बणाणे और से खड़ा करना। 17 ताकि बाकि माणू, मतलब-सब दुजिया जातिया, जो मेरे नाओं ते जाणे जाओए, प्रभुए खे टोलो। 18 ये सेई प्रभु बोलोआ, जो दुनिया री सृष्टिया ते इना गल्ला रा समाचार देंदा आयी री। (aiōn g165) 19 “तेबे मेरा बिचार ये कि दुजिया जातिया बीचा ते जो लोक परमेशरो री तरफा खे फिरोए, आसे तिनारा खे दुः ख नि देईए। 20 पर तिनारा खे लिखी की पेजिये जे सेयो मूर्तिया री अशुद्धात्मा, व्याभिचार और गला कोटे रे मासो ते और खूनो ते दूर रओ। 21 कऊँकि पुराणे बखतो ते नगरो-नगरो रे मूसारे रे बिधानो रा प्रचार करने वाले चलदे आयी रे और से हर आरामो रे दिने प्रार्थना रे कअरो रे पढ़ी जाओई।” 22 तेबे यरूशलेमो री सारी मण्डलिया समेत प्रेरिता और बुजुर्गो खे अच्छा लगेया कि आपू बीचा ते कई माणूआ खे चुणो, मतलब-यहूदा, जेसखे बरसब्बास बी बोलोए, सीलास जो विश्वासी पाईया रा मुखिया था, तिनारा खे पौलुस और बरनबासो साथे अन्ताकिया री कलीसिया खे पेजो। 23 तिनारे तिनारे रे आथो रे ये लिखी की पेजेया, “अन्ताकिया नगर, सीरिया और किलिकिया प्रदेशो रे रणे वाले सब विश्वासी पाईया खे जो दुजिया जातिया बीचा ते ए, प्रेरित और बुजुर्ग पाईया री नमस्ते। 24 आसे सुणी राखेया कि आसा बीचा ते कई जणिया तेती जाई की तुसे आपणी गल्ला ते कबराईते और तुसारे रे मन पल्टी ते रे, पर आसे

तिना खे आज्ञा नि दित्ती थी। 25 इजी री खातर आसे एक चित्त ऊई की ठीक समजेया कि चुणे रे मांगूआ खे आपणे प्यारे बरनबास और पौलुसो साथे तुसा गे पेजिये। 26 ये तो एड़े मांगू ए, जिने आपणे प्राण आसा रे प्रभु यीशु मसीह री खातर मुसीबता रे पाई राखे 27 और आसे यहूदा और सीलास पेजी राखे, जिना आपणे मुंओ ते बी यो गल्ला बोली देगियां। 28 पवित्र आत्मा और आसा खे ठीक लगेया कि इना जरूरी गल्ला खे छाडी की तुसा पाँदे ओर बोज नि पाऊँ 29 कि तुसे मूर्तिया रे सामणे बलि कित्ते रे और खुनो ते, गला कोटे रे मासो ते और व्याभिचारो ते दूर रओ, तो तुसा रा पला ऊणा और शुभा।” 30 तेबे, सेयो विदा ऊई की अन्ताक्रिया नगर रे पऊँछे और सभा कट्टी करी की से पत्री तिना खे देईती। 31 सेयो पत्री पढ़ी की तेस उपदेशो री गल्ला ते बऊत ई जादा खुश ऊईगे। 32 तेबे यहूदा और सीलासे, जो आपू बी भविष्यबक्ता थे, बऊत गल्ला साथे विश्वासी पाईया खे उपदेश देई की मजबूत कित्ते। 33 यहूदा और सीलास कुछ दिन रई कि विश्वासी पाईया ते शान्तिया साथे बिदा ऊए कि आपणे पेजणे वालेया गे यरूशलेमो खे जाओ। 34 पर सीलासे अन्ताक्रिया रेई रणे रा निश्चा कित्तेया और यहूदा कल्ला ई यरूशलेमो खे चली गा। 35 पौलुस और बरनबास अन्ताक्रिया रेई रई गे और बऊत और लोका साथे प्रभु यीशुए रा वचन और सुसमाचार सुणादे रये। 36 कुछ दिनों ते बाद पौलुसे बरनबासो खे बोलेया, “जेती-जेती नगरो रे आसे प्रभुए रा सुसमाचार सुणाया था, आओ, फेर चली की आपणे विश्वासी पाईया खे देखूँए कि केडे ए।” 37 तेबे बरनबासे यहूदने खे, जेसखे मरकुस बी बोलोए, साथे लणे रा बिचार कित्तेया। 38 पर पौलुसे तेसखे, जो पंफूलिया प्रदेशो रे लग ऊईगा था और कामो खे तिना साथे नि गया, तेसखे साथे निणा अच्छा नि समजेया। 39 तेबे एड़ी बईस ऊई कि पौलुस और बरनबास एकी-दूजे ते लग ऊईगे और बरनबास मरकुसो खे लयी की जाहजो रे साईप्रस टापूए खे चली गा। 40 पर पौलुसे सीलास चुणेया और विश्वासी पाईया खे परमेशरो री कृपा रे देई की तेथा ते चली गा। 41 से मण्डलिया खे मजबूत करदा ऊआ, सीरिया और किलिकिया प्रदेशो रिये ऊँदे ऊए गया।

16 तेबे से दिरबे और लुस्त्रा नगरो रे बी गया, और देखो, तेती तीमुथियुस नाओं रा एक चेला था, जो केसी विश्वासी यहूदिणिया रा पाऊ था, पर तेसरा पिता यूनान देशो रा रणे वाला था। 2 से लुस्त्रा और इकुनियुम नगरो रे विश्वासी पाईया बीचे जाणेया-मानेया रा था। 3 पौलुसो री इच्छा थी की ये बी मां साथे चलो और जो यहूदी लोक तिना जगा रे थे तिना री बजअ ते तेसरा खतना कित्तेया, कऊँकि सेयो सब जाणो थे कि एसरा पिता यूनान देशो रा रणे वाला था। 4 तेबे पौलुस और तिना रे साथी नगरो-नगरो रे जाँदे ऊए तिना बिधिया खे, जो यरूशलेमो रे प्रेरिते और बुजुगं ठराई राखी थी, मानणे खे तिना खे पऊँछाँदे जाओ थे। 5 ईयां मण्डली विश्वासी रे मजबूत ऊँदी रई और गिणतिया रे हर रोज बड़दी गयी। 6 तेबे सेयो फूमिया और गलातिया रे प्रदेशो रिये ऊँदे ऊए गये और पवित्र आत्मे तिना खे आसिया प्रदेशो रे वचन सुनाणे खे ना कित्ती। 7 तेबे तिने मूसिया प्रदेशो रे नेडे पऊँछी की बितूनिया नगरो खे जाणा चाया, पर प्रभु यीशुए रे पवित्र आत्मे सेयो जाणे नि दित्ते। 8 तेबे सेयो मूसिया प्रदेशो रे ऊई की त्रोआसो नगरो खे आए। 9 तेबे पौलुसे राथियो खे दर्शन देखेया कि एक मकदुनी मर्द खडे रा, तेसते बिनती करी की बोलोआ, “पार उतरी की मकिदुनिया खे आओ और आसा री मताद कर।” 10 तेसरा ये दर्शन देखेदे ई तिने फटाफट मकिदुनिया प्रदेशो खे जाणा चाया, ये समजी की कि परमेशरे सेयो सुसमाचार सुनाणे खे तेती बुलाई राखे। 11 तेबे त्रोआसो नगरो ते जाहज खोली की आसे सीदे सुमात्राके टापूए खे और दूजे दिने नियापुलिस नगरो खे आए। 12 तेथा ते आसे फिलिप्पिया रे पऊँछे, जो मकिदुनिया प्रान्तो रा खास नगर और रोमिया री बस्ती थी और आसे तेस नगरो रे कई दिन तक रये। 13 आरामो रे दिने आसे नगरो रे फाटको ते बारे नदिया रे कनारे ये समजी की गये कि तेती प्रार्थना करने खे जगा ऊणी और बैठी की तिना जवाणसा साथे, जो कट्टिया ऊईया थिया, गल्ला करने लगे। 14 लुदिया नाओं री थुआतीरा नगरो री,

बैंगणी टाले बेचणे वाली परमेशरो री एक भक्त जवाणस सुणने लगी री थी और प्रभुए तेसा रा मन खोलेया, ताकि से पौलुसो री गल्ला खे त्यान करी की सुणो। 15 जेबे तेसे आपणे कराने समेत बपतिस्मा लया, तेबे तेसे बिनती कित्ती, “जे तुसे माखे प्रभुए री विश्वासणी समजोए तो चली की मेरे कअरे रओ।” 16 जेबे सेयो प्रार्थना करने री जगा रे जाणे लगी रे थे, तेबे आसा खे एक दासी मिली, जेसा रे आऊणे वाले बखतो रे बारे रे बताणे वाली दुष्टात्मा थी और जो एड़ा करने ते से आपणे स्वामिया खे बऊत कुछ कमाई की ली आओ थी। 17 से पौलुस और आसा पीछे आयी की चींगणे लगी कि, “यो मांगू परमप्रदान परमेशरो रे दास ए, जो आसा खे उद्धारो री कथा सुणाओए।” 18 से बऊत दिन तक एड़ा ई करदी रई। पर पौलुस दुःखी ऊईगा और मूँफेरी की तेसा दुष्टात्मा खे बोलेया, “आऊँ ताखे प्रभु यीशु मसीह रे नाओं ते आज्ञा देऊँआ कि एसा बीचा ते निकली जा और से तेसी बखते ई निकली गी।” 19 जेबे तेसा रे स्वामिए देखेया कि आसा री कमाईया री उम्मीद चली गी, तेबे सेयो पौलुस और सीलासो के पकड़ी की चौको रे प्रदाना गे खिंजी की लयी गे 20 और तिना खे यहूदिया रे हाकिमा गे लयी जाई की बोलेया, “यो लोक जो यहूदी ए, आसा रे नगरो रे बऊत जादा शोर-शराबा लगी रे करने। 21 और एडिया रवाजा बताणे लगी रे जिना खे ग्रहण करना या मानगा आसा रोमिया खे ठीक निए।” 22 तेबे पीड़ा रे लोक पौलुस और सीलासो रे बिरोदो रे कट्टे ऊई की चड़ी गे और हाकिमे तिना रे टाले फाड़ी की खोली ते और तिना खे डण्डे बाणे री आज्ञा दित्ती। 23 तेबे तिना खे बऊत डण्डे बाई की सेयो जेला रे पाई ते और जेलरो खे आज्ञा दित्ती कि इना री चौकसी राखणी। 24 तिने एड़ी आज्ञा पाई की सेयो पीतरो री कोठरिया रे राखे और तिना रे पैर काठो रे टोकी ते। 25 तकरीबन आदी राथियो तक पौलुस और सीलास प्रार्थना करदे ऊए परमेशरो रे पजन लगी रे थे गाणे और बन्दुए तिना खे सुणने लगी रे थे। 26 तदुओ की एकदम बऊत बड़ा इल्लण ऊआ, एथो तक कि जेला री निऊँआ तक इल्ली गिया और फटाफट सब द्वार खुली गे और सबी रे बन्दन खुली गे। 27 तेबे जेलर जागी गा और जेला रे द्वार खुले देखी की समजेया कि बन्दुए नठीगे रे, तेबे तिने तलवार खिंजी की आपू खेई बाणी चायी। 28 पर तदुओ कि पौलुसे जेरे की बोलेया, “आपणे आपू खे कुछ बी नुकशाण नि पऊँचा, कऊँकि आसे सब एथी ए।” 29 तेबे जेलरे दिऊआ मंगवाई की पीतरो खे लमखणे लगेया और शरथरंदा ऊआ पौलुस और सीलासो रे आगे रुडेया। 30 तेबे तिने तिना खे बारे ल्याई की बोलेया, “ओ सज्जनों! उद्धार पाणे खे आऊँ क्या करहँ?” 31 तिने बोलेया, “प्रभु यीशुए पाँदे विश्वास कर, तेबे ताखे और तेरे कराने खे उद्धार मिलणा।” 32 तेबे पौलुस और सिलासे तेसखे और तेसरे सारे कअरो रे लोका खे प्रभुए रा वचन सुणाया। 33 तेबे राथियो खे तेसी कअडिया रे जेलरे पौलुस और सिलास निए और तिना रे जख्न तोए और तिने आपणे लोका समेत फटाफट बपतिस्मा लया। 34 तेबे तिने सेयो आपणे कअरे निए और तिना खे रोटी खुलाई और सारा कराना परमेशरो पाँदे विश्वास करी की खुश ऊआ। 35 जेबे दिन ऊआ, तेबे हाकिमे सिपाईया गे सन्देशा पेजेया, “तिना मांगूआ खे छाडी देओ।” 36 जेलरे यो गल्ला पौलुसो गे बोलिया, “हाकिमे तुसा खे छाडणे खे बोली ता रा, तो एबे निकली की बेफिकर ऊई की चली जाओ।” 37 पर पौलुसे तेसखे बोलेया, “तिने आसे, हालाँकि रोमी मांगू ए, दोषो ते बिना, लोका सामणे कुटे और जेला रे पाईते। एबे क्या चोरिए-चोरिए निकयाली देओए? एड़ा नि ऊणा, पर सेयो आपू आयी की आसा खे बारे निकयाली की लयी जाओ।” 38 सिपाईए ये गल्ल हाकिमा खे बोली ती और सेयो ये सुणी की सेयो कि रोमी ए, डरी गे। 39 तेबे तिने आयी की तिना ते माफी मांगी और बारे लयी जाई की बिनती कित्ती कि नगरो ते बारे चली जाओ। 40 तेबे सेयो जेला ते निकली की लुदिया रे कअरे गये और विश्वासी पाईया साथे मिली की तिना खे बोलेया तुसा खे शान्ति मिलो और चली गे।

17 तेबे पौलुस और सीलास अम्फिपुलिस और अपुल्लोनिया नगरो रिये ऊई की थिस्सलुनीके नगरो खे आए, जेती यहूदिया रा एक प्रार्थना रा कअर था। 2 तेबे पौलुस आपणी रवाजा रे मुताबिक तिना गे गया और तिना रे आरामो रे दिने पवित्र शास्त्रो बीचा ते तिना साथे बईस किक्ती 3 और से तिना रा मतलब तिना रा उदारण देई-देई की समजयाओ था कि मसीह रा दुः ख उठाणा और मरे रेया बीचा ते जिऊंदा ऊणा जरूरी था, “येई यीशु, जेसरी आऊं तुसा खे कथा सुणाऊंआ, मसीह ए।” 4 तिना बीचा ते कुछ यहूदिये और कई यूनानी भक्ते और बऊत सारी तर्मी जवाणसे मानी ला और पौलुस और सीलासो साथे, मिली गे। 5 पर यहूदिया खे जलन ऊईगी और तिने बजारू माणूआ बीचा ते कई दुष्ट माणू आपू साथे मलाई ते और पीड़ (भीड़) लगाई की नगरो रे शोर-शाराबा करने लगे और यासोनो रे कअरो रे चढ़ाई करी की पौलुस और सीलास लोका सामणे ल्याऊणा चाए। 6 तेबे तिना रे तेती ना मिलणे ते बाद सेयो जोरे-जोरे साथे ये बोली की यासोन और कई ओर विश्वासी पाईया खे नगरो रे हाकिमो सामणे खिंजी की ली आए, “यो लोक, जिने दुनिया बी उल्ट-पुल्ट करी ती री, एती बी आईगे रे 7 और यासोने यो आपणे कअरे राखी राखे और यो सब के सब बोलेओ कि यीशु राजा ए और महााराजा केसरो री आज्ञा रा बिरोद करोए।” 8 तिने लोका खे ओर नगरो रे हाकिमो खे ये सुणाई की सेयो डराई ते। 9 तेबे तिने यासोन और बाकि लोका ते जमानत लयी की सेयो छाडी ते। 10 विश्वासी पाईए रातो-रात पौलुस और सीलास बिरिया नगरो खे पेजी ते और सेयो तेती पऊँछी की यहूदिया रे प्रार्थना रे कअरो रे गये। 11 यो लोक तो थिस्सलुनीके नगरो रे यहूदिया ते ठीक थे और तिने बड़ी लालसा साथे वचन ग्रहण कित्तेया और हर रोज पवित्र शास्त्रो रे टोलंदे रये कि यो गल्ला सचिचया कि नई। 12 तेबे तिना बीचा ते कई जणे और यूनानी दमदार जवाणसा बीचा ते और मर्दा बीचा ते बी कई जणे विश्वास कित्तेया। 13 पर जेबे थिस्सलुनीके रे यहूदी जाणी गे कि पौलुस बिरिया नगरो रे बी परमेशरो रा सुसमाचार सुनाणे लगी रा, तेबे सेयो तेती बी आईगे और लोका खे उकसाणे लगे और आल्ला-गोल्ला करने लगे। 14 तेबे विश्वासी पाईए पौलुस फटाफट बिदा कित्तेया कि समुद्रो रे कनारे चली जा, पर सीलास और तीमुथियुस बिरिया रेई रईगे। 15 पौलुसो खे पऊँछाणे वाले तेसखे एथेंस नगरो तक लयी गे और सीलास और तीमुथियुसो खे ये आज्ञा लयी की बिदा ऊआ कि मांगे फटाफट आयी जाओ। 16 जेबे पौलुस एथेंस नगरो रे सीलास और तीमुथियुसो खे न्यालने लगी रा था, तेबे नगरो खे मूर्तिया साथे परे रा देखी की तेसरा जिऊ बऊत दुः खी ऊईगा। 17 तेबे से प्रार्थना रे कअरो रे यहूदिया खे और भक्ता खे और चौको रे जो बी लोक मिलो थे, तिना साथे हर रोज बईस करो था। 18 तेबे इपिकूरी और स्तोईकी ज्ञानिया बीचा ते कई जणे तेस साथे बईस करने लगे और बऊत जणेया बोलेया, “ये बकवासी क्या बोलणा चाओआ?” पर ओरी बोलेया, “ये ओरी देवतेया रा प्रचार करने वाला लगेओआ, कऊँकि ये यीशुए रा और दुबारा जिऊंदा ऊणे रा सुसमाचार सुणाओआ।” 19 तेबे सेयो तेसखे आपू साथे अरियुपगुस नाओं रे प्रार्थना रे कअरो रे लयी गे और पूछेया, “क्या आसे जाणी सकूँए कि ये जो नौखी गल्ला, जो तू सुणाएया, क्या ए? 20 कऊँकि तू आसा खे नऊखिया ई गल्ला सुणाएया, इजी री खातर आसे जाणना चाऊँए कि इना रा मतलब क्या ए?” 21 (कऊँकि बऊत सारे एथेंस रे लोक और परदेशी जो तेती रओ थे, नईया-नईया गल्ला बोलणे और सुणने ते अलावा ओर कोई बी कामो रे आपणा बखत नि बिताओ थे।) 22 तेबे पौलुस अरियुपगुस प्रार्थना रे कअरो रे खड़े ऊई की बोलेया, “ओ एथेंस नगरो रे लोको! आऊँ देखूँआ कि तुसे हर गल्ला रे देवतेया खे बड़ा मानणे वाले ए। 23 कऊँकि जेबे आऊँ कूमदे-फिरदे ऊए तुसा री पूजणे रिया चीजा खे देखणे लगी रा था, तेबे एक एड़ी बेदी बी देखी, जेतेरे लिखी राखेया रा था, अणजाणे ईश्वरो खे। तो जेसखे तुसे बिना जाणे पूजोए, आऊँ तुसा खे तेसरा समाचार सुणाऊंआ। 24 “जिने परमेशरे तरती और तिजी री हर चीज बणाई, से स्वर्ग और तरतिया रा स्वामी ऊई की आथो रे बणाए रे मन्दरो रे नि रंदा 25 और ना ई किजी बी चीजा ते मतलब राखी की माणूआ रे आथो

री सेवा लओआ, कऊँकि से आपू ई सबी खे जीवन, श्वास और सब कुछ देओआ। 26 तिने एक ई मूलो ते माणूआ री सब जातिया, सारी तरतिया रे रणे खे बणाई राखिया और तिना रे बणाए रे बखत और रणे री सीमा इजी री खातर बानी राखिया। 27 परमेशरे एड़ा तेबे कित्तेया ताकि लोक तेसखे टोलो, उम्मीद राखो कि तेसखे टटोली की पायी सकोए, तेबे बी से आसा बीचा ते केसी ते बी दूर निए। 28 कऊँकि आसे तेसेदे ई जिऊँदे, चलदे-फिरदे और खड़े रऊँए, जेड़ा तुसा रे कितणे कविये बी बोली राखेया कि, आसे तो तेसेरे ई वंश ए। 29 तेबे परमेशरो रा वंश ऊई की आसा खे ये समजणा ठीक निए कि ईश्वर, सुईना, रूपा या पात्थरो जेड़ा ए, जो माणूआ री कारीगरिया ते और सोच-विचारा ते गढ़ी राखे। 30 “तेबेई परमेशरे लोका री अज्ञानता रे बखतो खे त्यान नि दितेया, पर एबे हर जगा रे सबी माणूआ खे मन फिराणे री आज्ञा देओआ। 31 कऊँकि तिने एक दिन बणाई राखेया, जिदे तेस, तेस माणूए रे जरिए तर्मां साथे एसा दुनिया रा न्याय करना, जो तिने बणाई राखी और तेसखे मरे रेया बीचा ते जिऊँदा करी की ये गल्ल सबी पाँदे परमाणित करी ती री।” 32 मरे रेया दुबारा जिऊँदा ऊणे री गल्ल सुणी की बऊत जणे तेसरा मजाक करने लगे और बऊत जणे बोलणे लगे, “ये गल्ला आसे तांते फेर करे लाई सुणोगे।” 33 तबे पौलुस तिना बीचा ते निकली गे। 34 पर कई सारे माणू तेस साथे मिली गे और तिने प्रभु यीशुए पाँदे विश्वास कित्तेया, जिना बीचा ते दियुनसियुस अरियुपगुस था और दमरिस नाओं री एक जवाणस थी और तिना साथे ओर बी बऊत माणू थे।

18 इजी ते बाद पौलुस एथेंस नगरो खे छाडी की कुरिन्थुस नगरो खे आया। 2 तेबे तेती तेसखे अक्विला नाओं रा यहूदी मिलेया, जेसरा जन्म पुन्तुस प्रदेशो रे ऊआ था। से आपणी लाड़ी प्रिस्क्रल्ला समेत इटलिया प्रदेशो ते कुछ बखत पईले ई आनी रा था, कऊँकि महाराजा क्लौदियुसे सबी यहूदिया खे रोमो ते निकलले री आज्ञा दित्ती थी। पौलुस तिना खे मिलणे तिना रे कअरे गया। 3 पौलुस और अक्विला रा एक ई काम था, इजी री खातर से तिना साथे रया और सेयो काम करने लगे और तिना रा तम्बू बनाणे रा काम था। 4 पौलुस हर आरामो रे दिने प्रार्थना रे कअरो रे बईस करी की यहूदी और यूनानिया खे बी यीशु मसीह पाँदे विश्वास करने खे समजयाओ था। 5 जेबे सीलास और तीमुथियुस मकिडूनिया प्रदेशो ते आए, तेबे पौलुस वचन सुनाणे री धुना रे लगी की यहूदिया खे गवाई देओ था कि प्रभु यीशु ई मसीह ए। 6 पर जेबे यहूदी बिरोद और निन्दा करने लगे, तेबे तिने आपणे टाले चाड़ी की मतलब इना गल्ला दे मेरा तुसा साथे कोई लेणा-देणा निए तिना खे बोलेया, “तुसा रा खून तुसा री क्याड़िया पाँदे रओ; आऊँ निर्दोष ए, आजो ते मां दुजिया जातिया गे जाणा और तिना खे परमेशरो रा वचन सुनाणा।” 7 तेथा ते चली की से तीतुस युस्तुस नाओं रे परमेशरो रे एक भगतो रे कअरे दूजिया जातिया खे उपदेश देणे आया, जेसरा कअर प्रार्थना रे कअरो रे नेड़े था। 8 तेबे प्रार्थना रे कअरो रे सरदारो क्रिसपुसे आपणे सारे कराने समेत प्रभुए पाँदे विश्वास कित्तेया और बऊत सारे कुरिन्थियों रे रणे वाले सुणी की विश्वासो रे आए और बपतिस्मा लया। 9 तेबे प्रभुए राथियो खे दर्शनी रे पौलुसो खे बोलेया, “डर नि, बल्कि बोलदा जा और चुप नि रओ। 10 कऊँकि आऊँ तां साथे ए और केसी बी तां पाँदे चढ़ाई करी की तेरा नुकशाण नि करना, कऊँकि एस नगरो रे मेरे बऊत सारे लोक ए।” 11 तेबे पौलुस तिना बीचे परमेशरो रा वचन सिखांदा ऊआ डेडी साल तक रया। 12 जेबे गल्लियो अखाया प्रदेशो रा हाकिम था, तेबे यहूदी लोक एक ऊई की पौलुसो पाँदे चढ़ी गे और तेसखे न्याय आसणो सामणे ल्याई की बोलणे लगे, 13 “ये लोका खे समजयाओआ कि परमेशरो री भक्ति ईयां करनी ओ, जो बिधानो ते उल्टी ए।” 14 जेबे पौलुस बोलणे ई वाला था, तेबे गल्लिये यहूदिया खे बोलेया, “ओ यहूदिया! जे ये कोई अन्याय या दुष्टता री गल्ल ऊँदी तो ठीक था कि आऊँ तुसा री सुणदा। 15 पर जे ये बईस शब्द, नाओं और तुसा रा बिधानो रे बारे रे ए, तो तुसेई जाणो, कऊँकि आऊँ इना गल्ला रा न्यायी नि बणना चांदा।” 16 तेबे गल्लियो सेयो

न्याय आसणो रे सामणे ते निकलवाई ते। 17 तेबे बऊत सारे लोके प्रार्थना रे कअरो रा सरदार सोफिथनेस पकडैया और न्याय आसणो सामणे कुटैया, पर गल्लिये इना गल्ला री कोई परवा नि कित्ती। 18 तेबे पौलुस बऊत दिन तक कुरिन्थ नगरो रे रया। तेबे तिने विश्वासी पाईया ते बिदा लयी की किछिया रे जाई की इजी री खातर बाल कटवाए, कऊँकि तिने मान्त कित्ती थी। तेबे से जाहजो रे सीरिया खे चली गा और तेस साथे प्रिस्किल्ला और अक्विला थे। 19 तेबे तिने इफिसुस नगरो रे पऊँछी की प्रिस्किल्ला और अक्विला तेती छाडी ते और आपू प्रार्थना रे कअरो रे जाई की यहूदिया साथे बईस करने लगेया। 20 तेबे लोके तेसते बिनती कित्ती, “आसा साथे कुछ ओर दिन तक रओ।” पर से मानेया नि। 21 पर ये बोली की तिना ते बिदा ऊआ, “जे परमेशर चाओगा तो आऊँ तुसा गे फेर आऊँगा।” तेबे से इफिसुसो ते जाहज खोली की चली गा 22 और कैसरिया नगरो रे उतरी की यरूशलेमो खे गया और मण्डलिया खे नमस्ते करी की अन्ताकिया नगरो खे आया। 23 तेबे से कुछ दिन तेती रई की अन्ताकिया नगरो ते चली गा और एक तरफा ते गलातिया रे और फूगिया रे प्रदेशो रे सबी चेलेया खे मजबूत करदा ऊआ फिरेया। 24 अपुल्लोस नाओ रा एक यहूदी, जेसरा जन्म सिकन्दरिया नगरो रे ऊआ था, जो विद्वान माणं था और पवित्र शास्त्रो खे अच्छी तरअ ते जाणो था, इफिसुसो नगरो रे आया। 25 तिने प्रभुए री बाटा री शिक्षा पाई राखी थी और मन लगाई की प्रभु यीशुए रे बारे रे ठीक-ठीक सुणाओ था और सीखाओ था, पर से बस यूहन्ने रे बपतिस्मे री गल्ल जाणो था। 26 अपुल्लोस प्रार्थना रे कअरो रे निडर ऊई की बोलणे लगेया। पर प्रिस्किल्ला और अक्विला तेसरी गल्ल सुणी की तेसखे आपणे कअरे लयी गे और तिने परमेशरो री बाट तेसखे ओर बी ठीक-ठीक बताई। 27 जेबे तिने निश्च कित्तेया कि पार ऊतरी की अखाया प्रदेशो खे जाऊँ, तेबे विश्वासी पाईया तेसखे तसल्ली देई की चेलेया खे लिखेया कि सेयो तेसखे अच्छी तरअ ते मिलेओ और तिने तेती पऊँछी की तेसरी बऊत मताद कित्ती, जिने कृपा री बजअ ते विश्वास कित्तेया था। 28 कऊँकि से पवित्र शास्त्रो ते सबूत देई-देई की कि यीशु ई मसीह ए, बड़ी ई प्रबलता साथे यहूदिया खे सबी सामणे निरूतर करदा रया।

19 जेबे अपुल्लोस कुरिन्थुस नगरो रे था, तेबे पौलुस दूर-दराजो रे प्रदेशो ते ऊई की इफिसुस नगरो रे आया, तेती कुछ चेलेया ते मिले 2 तिने बोलेया, “क्या तुसे विश्वास करदे बखते पवित्र आत्मा पाया?” तिने बोलेया, “आसे तो पवित्र आत्मा रे बारे रे नि ए सुणेया रा।” 3 पौलुसे तिना खे बोलेया, “तेबे तुसे केसरा बपतिस्मा लयी राखेया?” तिने बोलेया, “यूहन्ने रा बपतिस्मा।” 4 पौलुसे बोलेया, “यूहन्ने ये बोली की मन फिराणे रा बपतिस्मा दित्तेया कि जो मांते बाद आऊणे वाला ए तेस पाँदे, मतलब-प्रभु यीशुए पाँदे विश्वास करना।” 5 ये सुणी की तिने प्रभु यीशुए रे नाओं ते बपतिस्मा लया। 6 और जेबे पौलुसे तिना पाँदे आथ राखेया, तो तेबे तिना पाँदे पवित्र आत्मा उतरेया और सेयो लग-लग पाषा बोलणे लगे और भविष्यबाणी करने लगे। 7 यो सब तकरीबन बारा मर्द थे। 8 तेबे पौलुस प्रार्थना रे कअरो रे जाई की तीन मीन्ने तक निडर ऊई की बोलदा रया और परमेशरो रे राज्य रे बारे रे बईस करदा और समजयाँदा रया 9 पर जेबे बऊत जणेया कठोर ऊई की विश्वास करने ते न कित्ती, बल्कि लोका सामणे एसा बाटो खे बुरा बोलणे लगे, तेबे तिने तिना खे छाडी की चले लग करी ते और हर रोज तुरन्नुसो री पाठशाला रे उपदेश करो था। 10 दो साला तक येई ऊँदा रया, एथो तक कि आसिया प्रदेशो रे रणे वाले क्या यहूदी, क्या यूनानी सबी प्रभुए रा वचन सुणी ला। 11 परमेशर पौलुसो रे जरिए सामर्थ्य रे नऊखे काम दखाओ था। 12 एथो तक कि रूमाल और टाल्ले तेसरे शरीरो साथे छवाँई की बमारा पाँदे राखो थे और सेयो ठीक ऊई जाओ थे और दुष्टात्मा तिना ते निकली जाओ थी। 13 पर कुछ यहूदी लोक जो संवावा करदे फिरदे रओ थे, ये बोलणे लगे, “जेसदे दुष्टात्मा ओ, तिना पाँदे प्रभु यीशुए रा नाओं, ये बोली की फूक बाओ थे कि जेस यीशुए रा प्रचार पौलुस करोआ आऊँ ताखे तेसरी

कसम देऊँआ।” 14 तेबे सिक्कवा नाओं रे एक यहूदी बड़े पुरोईतो रे सात पाऊ थे, जो एड़ा ई करो थे। 15 पर दुष्टात्मे बोलेया, “यीशुए खे तो आऊँ जाणूँ और पौलुसो खे बी पछयाणूँ, पर तूँ कूणे?” 16 तेबे तिने माणंए जेसदे दुष्टात्मा थी, तिना पाँदे लमखी की और तिना खे बसो रे ल्याई की तिना पाँदे एड़ा उपद्रव कित्तेया कि सेयो नांगे और काईल ऊई की तेस कअरो ते नठीगे। 17 ये गल्ल इफिसुसो रे रणे वाले यहूदी और यूनानी, सबी खे पता लगी गी और सेयो सब डरी गे और प्रभु यीशुए रे नाओं री तारीफ ऊई। 18 जिने विश्वास कित्तेया था तिना बीचा ते कई जणेया आयी की आपणे-आपणे काम मानी ले और सामणे ल्याए। 19 और जादू करने वालेया बीचा ते कई जणेया आपणी-आपणी पोथिया कट्टिया करी की सबी सामणे फूकी तिया और जेबे तिना रा दाम जोडेया, तो सेयो पंजा ह्वार चाँदिए रे सिक्के रे बराबर निकलिया। 20 ईयाँ प्रभुए रा वचन जोरो-शरो साथे फैलदा गया और प्रबल ऊँदा गया। 21 जेबे यो गल्ला ऊई चुकिया तेबे पौलुसे आत्मा रे ठाणी ला कि मकिदुनिया और अखाया प्रदेशो ते ऊई की यरूशलेमो खे जाऊँ और बोलेया, “तेती जाई की माखे रोम नगरो खे देखणा बी जरूरी ए।” 22 तेबे आपणी सेवा करने वालेया बीचा ते तीमूथियुस और इरास्तुसो खे मकिदुनिया प्रदेशो रे पेजी की आपू कुछ दिन तक आसिया प्रदेशो रे इफिसुस नगरो रेई रई गा। 23 तेस बखते एस पंथो रे बारे रे बऊत आल्ला-गोल्ला ऊआ। 24 कऊँकि देमेत्रियुस नाओं रा एक सन्यार अरतिमिसो री देविया रे मन्दरो री चाँदिए री मूर्तिया बणवाई की कारीगरा खे बऊत काम दलाओ था। 25 देमेत्रियुसे तिना खे और एड़ी चीजा रे कारीगरा खे कट्टे करी की बोलेया, “ओ पाईयो! तुसे जाणोए कि एस काम करी की आसा खे कितणा पैसा मिलेओ। 26 तुसे देखोए और सुणो बी ए कि सिर्फ इफिसुस नगरो रेई नि बल्कि सारे आसिया प्रदेशो रे ये बोली-बोली की इने पौलुसे बऊत लोका खे समजयाया और परमाई बी राखे, कि जो आथे की बणाई राखे, से ईश्वर नि ए। 27 और एबे सिर्फ एसा गल्ला रा ई डर नि ए कि आसा रे एस कामो री प्रतिष्ठा जांदि रणी, बल्कि ये बी कि महान देवी अरतिमिसा रा मन्दर तुच्छ समजेया जाणा और जेसखे सारा आसिया प्रदेश और दुनिया पूजो ई, तिजी री खासियत बी जांदि रणी।” 28 तिना खे ये सुणी की रोष आईगा और सेयो चींगी-चींगी की बोलणे लगे, “इफिसियों री अरतिमिस महान ए।” 29 तेबे सारे नगरो रे बड़ा आल्ला पड़ी गा और लोके गयुस और अरिस्तर्खुस मकिदुनिया प्रदेशो खे जो पौलुसो साथे यात्री थे, पकड़ी ते और एक चित्त ऊई की रंगशाला खे दोड़ी मे। 30 जेबे पौलुसे लोका गे पीतरे जाणा चाया तेबे चेलेया से जाणे नि दित्तेया। 31 आसिया रे कुछ हाकिमा बीचा ते बी तेसरे कई दोस्ते, तेसखे सन्देशा पेजेया और बिनती कित्ती कि रंगशाला रे जाई की आपणी जिन्दगी मुसीबता रे नि पाणी। 32 तेबे कोई कुछ बोलणे लगे और कोई कुछ, कऊँकि सभा रे बऊत गडबडी उणे लगी री थी और बऊत जणे लोक ये पनि जाणो थे कि आसे किजी खे कट्टे ऊई रे। 33 तेबे तिने सिकन्दरो खे, जो यहूदिये खड़ा कित्तेया था, पीड़ा (भीड) बीचा ते आगे कित्तेया। सिकन्दर आथो साथे सारा (ईशारा) करी की लोका सामणे कुछ बोलणा चाओ था। 34 पर जेबे तिना खे पता लगेया कि ये यहूदी ए, तो सब के सब एक शब्दो ते कोई दो कंटे तक चींगदे रये कि इफिसियों री अरतिमिस महान ए। 35 तेबे नगरो रे मन्त्रिये लोका खे शान्त करी की बोलेया, “ओ इफिसियों रे लोको! कुण नि जाणदा कि इफिसियों रा नगर बड़ी देवी अरतिमिसो रे मन्दर और ज्यूस मतलब सर्गो री तरफा ते सेटिया री मूरता रा रखवाला ए। 36 तो तेबे इना गल्ला रा कोई जवाब नि ऊई सकदा, तो तुसा खे ठीक ए कि चुप रओ और बिना सोचे-समजे कुछ नि करो। 37 कऊँकि तुसे इना माणंआ खे, जो ल्याई राखे, ना मन्दरो खे लूटणे वाले ए और ना ई आसा री देविया रे निन्दक ए। 38 जे देमेत्रियुस और तेसरे साथी कारीगरा खे केसी ते कोई बईस ओ तो कचैरी खुली ए और न्याय करने खे हाकिम बी ए, सेयो एकी दूजे पाँदे दोष लगाओ। 39 पर तुसे जे केसी ओरी गल्ला रे बारे रे पूछणा चाओए, तो सभा सामणे न्याय करेया जाणा। 40 माखे डर ए कि जेबे राज्यपालो एस अंगामे रे बारे रे सुणना तो तेस बोलणा कि आसे रोमी

सरकारा रे खलाफ बिद्रोह करने री कोशिश लगी रे करने। कऊँकि एस अंगामे रा कोई कारण निए, तो आसे एसा पीड़ा रे कट्टे ऊणे रा कोई जवाब नि देई सकदे।” 41 तेबे तिने ये बोली की तिने सभा बिदा कित्ती।

20 जेबे आल्ला-गोल्ला बंद ऊईगा, तेबे पौलुसे चले बुलाई की तिना री डम्मत बढ़ाई और तिना ते बिदा ऊई की मकिदुनिया प्रदेशो खे चली गा। 2 तेबे से तेस सारे देशो ते ऊई की और तिना खे बऊत डम्मत देई की यूनान प्रदेशो खे आया। 3 जेबे तीन मीन्ने यूनानो रे रई की जाहजो रे सीरिया प्रदेशो खे जाणे वाला था, तेबे तिने सुणोया कि कुछ यहूदी अगुवे बाटा रे तेसखे काणे री ताका रे लगी रे, तेबे तिने आपणे मनो रे ठाणी ला कि मकिदुनिया प्रदेशो ते ऊई की सीरिया प्रदेशो खे जाऊँ। 4 एसा यात्रा रे बिरिया रे पुरूसो रा पाऊ सौपत्रुस और थिस्सलूनीकियो नगरो बीचा ते अरिस्तर्खुसो रा सिकुन्दुस और दिरबे नगरो रा गयुस और लुस्त्रा नगरो ते तीमुथियुस, आसिया प्रदेशो रा तुखिकुस और त्रुफिमुस आसा साथे थे। 5 सेयो आसा रे साथी यात्री आसा ते आगे चली गे और त्रोआस नगरो रे पऊँछी की आसा खे न्यालदे रये। 6 तेबे आसे अखमीरी रोटिया रे त्योआरो ते बाद फिलिप्पिया नगरो ते जाहजो रे चढी की पाँज दिना रे त्रोआसो रे तिना गे पऊँछे और साता दिना तक तेथी रये। 7 अपन्ते रे पईले दिने जेबे आसे रोटी तोड़ने खे कट्टे ऊए, तेबे पौलुसे, जो दूजे दिने जाणे वाला था, तिना साथे गल्ला करने लगोया और आदी राती तक गल्ला ई करदा रया। 8 जेसा बाऊड़ी रे आसे कट्टे थे, तिदे बऊत सारे दिऊए थे बले रे 9 और यूतुखुस नाओं रा एक जवान द्वारिया रे बैठी की गर्डी नीजा रे चुलारे खाणे लगी रा था और जेबे पौलुस गल्ला लगी रा था करने तेबे से नीजा रे चुलारे रे तीजिया बाऊड़ी ते रूडी गा और जेबे कुछ लोक तेसखे चकणे थाले आये तेबे से मरी चुकेया था। 10 पर पौलुस उतरी की थाले गया और तेस साथे चिपटी गा और गले लगाई की बोलेया, “कबराओ नि, कऊँकि एसरा प्राण एसदे ईए।” 11 तेबे फेर ऊबे जाई की रोटी तोड़ी और खाई की इतणी देरा तक तिना साथे गल्ला करदा रया कि प्याग ऊईगी और तेबे से चली गा। 12 तेबे सेयो तेस जवानो खे जिऊँदा ली आए और तिना खे बऊत शान्ति ऊई। 13 आसे पईले तेई जाहजो रे चढी की अस्सुस नगरो खे ये सोची की आगे गये कि तेथा ते आसे पौलुसो खे चढाई लऊँए, कऊँकि तिने ये बोली राखेया था कि मां आपू ई पैदल जाणा। 14 जेबे से अस्सुस नगरो रे आसा खे मिलेया, तेबे आसे तेसखे जाहजो रे चढाई की मितुलेन नगरो खे ली आए। 15 तेथा ते जाहज खोली की आसे दूजे दिने खियुस नगरो रे ऊँडे ऊए सामुस नगरो रे पऊँछी गे। तेबे दूजे दिने मिलेतुस नगरो खे आए। 16 पौलुसे ठाणी ला की से इफिसुस नगरो खे छाडी की आगे बढ़ी जाओ, ताकि तेसखे आसिया प्रदेशो रे रणा नि पड़ो। कऊँकि से जल्दीया रे था कि ऊई सको तो तेसरा पिन्तेकुस त्योआरो रा दिन यरूशलेमो रे बीतो। 17 जेबे आसे मिलेतुस नगरो रे पऊँछे तो पौलुसे इफिसुस नगरो खे सन्देशा पेजेया और मण्डलिया रे बुजुर्ग बुलाए। 18 जेबे सेयो तेसगे आए, तेबे तिना खे बोलेया, “तुसे जाणोए कि पईले ई दिने ते जेबे आऊँ आसिया नगरो रे पऊँछेया, तो आऊँ हर बखत आजो तक तुसा साथे कियो रया? 19 मतलब-बडी दीनता ते, आपू निकयाली-निकयाली की और तिना परीक्षा ते, जो यहूदिया रे षडयन्त्रा री बजअ ते मां पॉंदे पड़ी, तेबे बी आऊँ प्रभुए री सेवा करदा रया। 20 और जो-जो गल्ला तुसा रे फाईदे री थिया, तिना खे बताणे, लोका रे सामणे ल्याऊणे और कअरे-कअरे सखयाणे ते कदी बी पीछे नि अटेया। 21 बल्कि यहूदी और यूनानिया सामणे गवाई देँदा रया कि परमेशरो री तरफा खे मन फिराणा और आसा रे प्रभु यीशुए पॉंदे विश्वास करना चाईयो। 22 “और एबे देखो, आऊँ पवित्र आत्मा रा बानेया रा यरूशलेमो खे जाऊँआ और आऊँ ये नि जाणदा कि मां पॉंदे तेती क्या-क्या बितणी। 23 बस येई कि पवित्र आत्मा हर नगरो रे गवाई देई-देई की माखे बोलोआ कि बन्दन और क्लेश ताखे त्यार ए। 24 पर आऊँ आपणे प्राणो खे कुछ नि समजदा कि तेसखे प्यारे जाणूँ, बल्कि ये कि आऊँ आपणी दौड़ा खे और आपणी सेवकाईया खे पूरा करूँ, जो मैं परमेशरो

री कृपा रे सुसमाचारो पॉंदे गवाई देणे खे प्रभु यीशु मसीहे ते पाई राखी 25 “और एबे देखो, आऊँ जाणूँआ कि तुसा सबी जणोया, जिना खे आऊँ परमेशरो रे राज्य रा सुसमाचार सुणांदा रया, मेरा मूँ फेर नि देखणा। 26 इजी री खातर आऊँ आजके दिने रे तुसा खे गवाई देई की बोलूँआ कि जे तुसा बीचा ते कोई बी यीशुए पॉंदे विश्वास करने ते बगैर मरी जाओआ तो आऊँ सबी रे खुनो ते निर्दोष ए। 27 कऊँकि आऊँ परमेशरो री सारी इच्छा खे तुसा खे पूरी रीतिया ते मनाणे ते पीछे नि अटेया। 28 “इजी री खातर आपणी और पूरे चूण्डो री चौकसी करो, जेते साथे पवित्र आत्मे तुसे अध्यक्ष बणाई राखे कि तुसे परमेशरो री मण्डलिया री रखवाली करो, जो तिने आपणे खून बाहई की खरीदी राखी। 29 आऊँ जाणूँआ कि मांते जाणे ते बाद तुसा बीचे चूटे उपदेशक आऊणे और विश्वासिया खे बऊत नुकशाण पऊँछणा। 30 तुसा बीचा ते बी एड़े-एड़े माणू खडे ऊणे, जिना चलेया खे आपू पीछे खिंजणे खे टेडिया-मेडिया गल्ला बोलणिया। 31 इजी री खातर जाणोए रओ, और याद राखे कि मैं तीन साल तक रात-दिन आपू निकयाली-निकयाली की हर एकी खे चेतावणी देणा नि छाडेया। 32 एबे आऊँ तुसा खे परमेशरो गे और तेसरी कृपा रे वचनो गे सम्बाली देऊँआ, जो तुसा री तरक्की करी सकोआ और सबी पवित्र कित्ते रे लोका खे साजी करी की जायदात देई सकोआ। 33 “मैं केसी रे बी चाँदी-सूईने और टालेया रा लालच नि कित्तेया। 34 तुसे आपू जाणोए कि इने आथे मेरे और मेरे साथिया री जरूरता पूरी करी राखिया। 35 मैं तुसा खे सब कुछ करी की दखाया कि कियोँ मईणत करी की कमजोर सम्बालने और प्रभु यीशु मसीहे रिया गल्ला याद राखणिया जरूरी ए कि तिने आपू ई बोली राखेया कि लणे ते देणा अच्छा ए।” 36 ये बोली की तिने कुटणे टेके और तिना सबी साथे प्रार्थना कित्ती। 37 तेबे सेयो बऊत रोए और पौलुसो रे गलो रे चिपकी की तेसखे चूमणे लगे। 38 सेयो खास करी की इना गल्ला रा दुःख करो थे, जो तिने बोलिया थिया कि तुसा मेरा मूँ फेर नि देखणा और तेबे तिने से जाहजो तक पऊँछाया।

21 जेबे आसे तिना ते विदा ऊई की जाहज खोलेया, तेबे सिदी बाटा ते कोस टापूए खे आए और दूजे दिने रूदुस टापूए दे और तेथा ते पतरा टापूए दे। 2 तेबे एक जाहज फीनीके नगरो खे जांदा ऊआ मिलेया और तेस पॉंदे चढी की यात्रा शुरू कित्ती। 3 जेबे आसा खे साईप्रस टापू खूँजे कनारे दिशेया, आसे तिजी खे छाडी की सीरिया प्रदेशो खे चली की सूरो रे उतरे, कऊँकि तेती जाहजो रा बोजा उतारना था। 4 तेबे तेती चलेया खे पाई की सात दिन तक रये, तिने पवित्र आत्मा रे सिखाए रे पौलुसो खे बोलेया, “यरूशलेमो नगरो रे पैर नि राखणा।” 5 सात दिना बाद जेबे तेथा ते आसा रे जाणे रा बखत आया, तेबे आसे तेथा ते चली पड़े और सबी जवाणसे बालका समेत आसे नगरो ते बारे पऊँछाए, तेबे आसे कनारे पॉंदे पऊँछी की कुटणे टेकी की प्रार्थना कित्ती। 6 तेबे एकी-दूजे ते बिदा ऊए, आसे तो जाहजो रे चढ़े और सेयो आपणे-आपणे कअरो खे वापस ऊईगी। 7 जेबे आसे सूर नगरो ते जलयात्रा पूरी करी की पतुलिमथिस नगरो रे पऊँछे, तेबे आसे विश्वासी पाईया खे नमस्ते करी की तिना साथे एक दिन रये। 8 दूजे दिने आसे तेथा ते चली की कैसरिया नगरो खे आए और फिलिप्पुस सुसमाचार प्रचारको रे कअरे, जो साता बीचा ते एक था, जेसखे यरूशलेमो रे चलेया बिदुआ री देखपाल करने खे चुणी राखेया था, जाई की तेसरे कअरे रये। 9 तेसरी चार कुआँरी बेटिया थिया, जो भविष्यबाणी करो थिया। 10 जेबे आसे तेती बऊत दिन तक रई चुके, तेबे अगबुस नाओं रा एक भविष्यबक्ता यहूदिया प्रदेशो ते आया। 11 तिने आसा गे आयी की पौलुसो रा पटक लया और आपणे आथ पैर बानी की बोलेया, “पवित्र आत्मा ये बोलोआ कि जेस माणूए रा ये पटका ए, से यरूशलेमो रे यहूदिया ईयाँ बानणा और दुजिया जातिया रे आथो रे देई देणा।” 12 जेबे आसे यो गल्ला सुणिया, तो आसे और तेथो रे लोके पौलुसो ते बिनती कित्ती कि यरूशलेमो खे नि जाणा। 13 पर पौलुसे बोलेया, “तुसे क्या लगी रे करने कि रोयी-रोयी की मेरा मन लगी रे दुःखी करने? आऊँ तो प्रभु यीशुए रे नाओं ते

यश्शलेमो रे बाने जाणे खेई नि, बलिक मरने खे बी त्यार ए।” 14 जेबे से तिना ते नि मानेया, तो आसे ये बोली की चुप ऊईगे, “प्रभुए री इच्छा पूरी ओ।” 15 कुछ दिना ते बाद आसे पक्का इरादा करी की यश्शलेमो खे चली गे। 16 कैसरिया नगरो रे बी कई चले आसा साथे चली पड़े और मनासोन नाओं रे साईप्रसो रे रणे वाले रे एक पुराणे चले रे कअरे साथे ली आए, ताकि आसे तेसरे कअरे रऊँ। 17 जेबे आसे यश्शलेमो रे पऊँछे, तेबे विश्वासी पाई आसा साथे बड़े खुश ऊई की मिले। 18 दूजे दिने पौलुस आसा खे लयी की याकूबो गे गया, जेती सब बुजुर्ग कट्टे थे। 19 तेबे तिने तिना खे नमस्ते करी की जो-जो काम परमेशरे तेसरी सेवकाईया रे जरिए दुजिया जातिया बीचे कित्ते थे, एक-एक करी की सब बताए। 20 तिने ये सुणी की परमेशरो री महिमा किनी, तेबे तिने बोलेया, “ओ पाई! तू देखणे लगी रा कि यहूदिया बीचा ते कई हजार माणूपू विश्वास कित्तेया और सब बिधानो री धुन लगाई राखोए 21 तिना यहूदी विश्वासिया खे तेरे बारे रे बताया कि तू दुजिया जातिया बीचे रणे वाले यहूदिया खे मूसे रे बिधानो खे छाडणे रे बारे रे सिखाएया और बोलोआ कि ना आपणे बच्चेया रा खतना कराओ और ना ई रवाजा पाँदे चलो, तो क्या करना चाईयो? 22 लोका जरूर सुणना कि तू आयी रा। 23 इजी री खातर जो आसे ताखे बोलूँ, से कर, आसा गे एती चार माणूपू, जिने मान्मत मानी राखी। 24 तिना खे लयी की तेस साथे आपणे आपू खे शुद्ध कर और तिना खे खर्चा दे, ताकि सेयो बाल कटवाओ। तेबे सबी खे पता लगी जाणा कि जो गल्ला तिना खे तेरे बारे रे सिखाईया गईया, तिना री कोई जड़ निए, पर तू आपू बी बिधानो खे मानी की तिजी रे मुताबिक चलेया 25 पर तिना दुजिया जातिया रे बारे रे, जिने विश्वास कित्तेया, आसे ये न्याय लयी की लिखी की पेजी राखेया कि सेयो मूर्तिया सामणे बलि कित्ते रे मासो ते, खूनो ते, गला कोटे रे मासो ते और व्याभिचारो ते बचे रओ।” 26 तेबे पौलुस तिना माणूआ खे लयी की दूजे दिने तिना साथे शुद्ध ऊई की मन्दरो रे गया और बताई ता कि शुद्ध ऊणे रे दिन, मतलब-तिना बीचा ते हर एकी खे चढावा चड़ाए जाणे तको रे दिन कदी पूरे ऊणे। 27 जेबे सेयो सात दिन पूरे ऊणे वाले थे, तेबे आसिया प्रदेशो रे यहूदिये पौलुसो खे मन्दरो रे देखी की सब लोक उकसाये और ये बोली की से पकड़ी ता, 28 “ओ इस्राएलियो! मताद करो, ये सेई माणू ए, जो लोका खे और बिधानो खे और एथो री जगा रे बिरोदो रे, हर जगा रे सबी लोका खे सिखाओआ, एथो तक कि यूनानिया खे बी मन्दरो रे ल्याई की तिने ये पवित्र जगा अशुद्ध करी ती।” 29 तिने तो इजी ते पर्ले त्रुफिमस इफिसुसवासिए खे पौलुसो साथे नगरो रे देखेया था और समजो थे कि पौलुस तेसखे मन्दरो रे ली आयी रा। 30 तेबे सारे नगरो रे आल्ला पड़ी गा और लोक दौड़ी की कट्टे ऊईगे और पौलुसो खे पकड़ी की मन्दरो ते बारे कसिटी की ली आए और फटाफट द्वार बन्द करी ते। 31 जेबे सेयो तेसखे काणा चाओ थे, तेबे पलटणा रे सरदारो खे सन्देशा पऊँछेया कि सारे यश्शलेम नगरो रे आल्ला पड़ी रा। 32 तेबे से फटाफट सिपाईया और सूबेदारा खे लयी की तिना गे थाले दौड़ी की आया। जेबे पीडे फौजिया री पलटणा रे सरदारो खे और सिपाईया खे देखी की पौलुसो खे मारने कुटणे खे बन्द करी ता। 33 तेबे पलटणा रे सरदारो पौलुसो रे नेडे आयी की से पकड़ी ता और दो जंजीरा साथे बानणे री आज्ञा देई की पूछणे लगेया, “ये कूणे और इने क्या करी राखेया?” 34 पर पीड़ा (भीड़) बीचा ते कोई कुछ बोलणे लगे और कोई कुछ और जेबे शोर-शराबे रे मारे ठीक सच्चाईया रा पता नि लगेया तो तेसखे गदो रे लयी जाणे री आज्ञा दिती। 35 जेबे से संग माणू पाँदे पऊँछेया, तेबे एड़ा ऊआ कि पीड़ा रे दबाओ री बजअ ते सिपाईया खे से चकी की निणा पड़ेया। 36 कऊँकि लोका री पीड़ ये बोली की तेस पीछे पड़ी गी कि एसरा अन्त करी दो। 37 जेबे सेयो पौलुसो खे गदो रे निणे वाले थे, तेबे तिने पलटणा रे सरदारो खे बोलेया, “क्या माखे आज्ञा आयी कि आऊँ ताखे कुछ बोलूँ?” तिने बोलेया, “क्या तू यूनानी पाषा जाणेया? 38 क्या तू सेई मिसी निए, जो इना दिनो ते पर्ले बिरोदी बनाई की चार हजार आतंकबादी लोका खे जंगलो रे लयी गा था?” 39 पौलुसे बोलेया, “आऊँ तो तरसुसो रा यहूदी माणू ए, किलिकिया रा

प्रसिद्ध रणे वाला निवासी आ और आऊँ तांते बिनती कऊँआ कि माखे लोका ते गल्ला करने दे।” 40 जेबे तिने आज्ञा दिती, तेबे पौलुसे संगओ पाँदे खड़े ऊई की लोका खे आथो साथे सारा (ईशारा) कित्तेया, जेबे सेयो चुप ऊईगे, तेबे से इब्रानी पाषा रे बोलणे लगेया।

22 “ओ पाईयो! और पितरो, मेरा जवाब सुणो, जो आऊँ एबे तुसा सामणे बोलणे लगी रा।” 2 सेयो ये सुणी की कि से आसा साथे इब्रानी पाषा (भाषा) दे बोलोआ, और बी चुप ऊईगे। तेबे तिने बोलेया, 3 “आऊँ ते यहूदी माणू ए, और किलिकिया प्रदेशो रे तरसुस नगरो रा जन्मे राए, पर एस नगरो रे गमलिएलो रे पैरा गे बैठी की पढाई राखेया और बाप-दादेया रे बिधानो री ठीक रीतिया रे सखाई राखेया और परमेशरो खे एड़ी धुन लगाई री राखूँ था, जिंयाँ तुसे सब जणे आज लगाणे लगी रे। 4 और मैं मर्द और जवाणस दूँई खे बानी-बानी की और जेला रे पाई-पाई की एस पंथो खे एथो तक सताया कि सेयो मरवाईते। 5 एसा गल्ला रे प्रदान पुरोईत और बड़ी सभा रे सब बुजुर्ग गवा ए कि तिना बीचा ते आऊँ पाईया रे नाओं पाँदे चिट्रिया लयी की दमिश्क नगरो खे जाणे लगी रा था, ताकि जो तेती बी ओ तिना खे बी सजा दलाणे खे बानी की यश्शलेमो खे ल्याऊँ। 6 “जेबे आऊँ चलदे-चलदे दमिश्क नगरो रे नेडे पऊँछेया, तेबे एड़ा ऊआ कि तकरीबन त्याड़िया जे सर्गो ते एकदम ज्योति मेरे चऊँ कनारे चमकी। 7 और आऊँ जमीना पाँदे रूड़ी गा, तेबे मैं ये शब्द सुणेया, ‘ओ शाऊल! ओ शाऊल! तू माखे कऊँ सताणे लगी रा? 8 मैं बोलेया, ‘ओ प्रभु! तू कूणे ए?’ तिने बोलेया, ‘आऊँ यीशु नासरी ए, जेसखे तूँ सताएया।’ 9 और मेरे साथिया ज्योति तो देखी, पर जो मां साथे जणणे लगी रा था, तिने तेसरा शब्द तो सुणेया, पर से समजी नि सके। 10 तेबे मैं बोलेया, ‘ओ प्रभु! आऊँ क्या करूँ?’ प्रभु आखे बोलेया, ‘उठी की दमिश्को रे जा और जो कुछ तेरे करने राए, तेती ताखे सब कुछ बताया जाणा।’ 11 जेबे तेसा ज्योतिया रे चमकणे ते माखे कुछ नि दिशेया, तेबे आऊँ आपणे साथिया रे आथ पकड़ी की दमिश्क नगरो रे आया। 12 “तेबे हनन्याह नाओं रा बिधानो रे मुताबिक एक चेला था, जो तेती रणे वाले सबी यहूदिया बीचे सुनाम था, मांगे आया। 13 और खड़े ऊई की माखे बोलेया कि ओ शाऊल पाई फेर देखणे लगी जा। तेसी बखते मेरी आखी खुली गिया और मैं से देखेया। 14 तेबे तिने बोलेया कि आसा रे बाप-दादेया रे परमेशरे तूँ इजी री खातर ठराई राखेया; ताकि तू तेसरी इच्छा खे जाणे और तेस तर्मियो खे देखी सके और तेसरे मुंओ ते गल्ला सुणी सके। 15 कऊँकि तू तेसरी तरफा ते सबी माणूआ सामणे तिना गल्ला रा गवा ऊणा, जो तें देखी राखिया और सुणी राखिया। 16 एबे देर कऊँ लगी रा करने? उठ बपतिस्मा लओ और तेसरा नाओं लयी की आपणे पापो खे तोओ। 17 “जेबे आऊँ फेर यश्शलेमो रे आयी की मन्दरो रे प्रार्थना लगी रा था करने, तेबे बेओश ऊईगा। 18 और तिने देखेया कि से माखे बोलोआ कि फटाफट यश्शलेमो ते निकली जा, कऊँकि तिना लोका जो एती ए मेरे बारे रे तेरी गवाई नि मानणी। 19 मैं बोलेया कि ओ प्रभु! तुसे तो जाणोए कि आऊँ तुसा पाँदे विश्वास करने वालेया खे जेला रे पाऊँ था और जगा-जगा प्रार्थना रे कअरो रे कुटवाऊँ था। 20 और जेबे तेरे गवा स्तिफुनुसो रा खून बड़णे लगी रा था, तेबे आऊँ बी तेथी खड़ा था और एसा गल्ला रे शामिल था और तेसखे काणे वालेया रे टालेया री देख-रेख करूँ था। 21 और प्रभुए माखे बोलेया, ‘चली जा, कऊँकि मां तूँ दुजिया जातिया गे दूर-दूर पेजणा।’” 22 सेयो लोक एसा गल्ला तक तेसरी सुणदे रये, तेबे जोरे की बोलणे लगे, “एड़े माणूए रा अन्त करो, एसरा जिऊँदा रणा ठीक निए।” 23 जेबे सेयो चिंगणे, टाले सेटणे और सर्गो रे तूड़ उड़ाओ थे, 24 तेबे पलटणा रे सरदारो बोलेया, “एसखे गदो रे लयी जाओ और कोड़े बाई कि परखो, ताकि माखे बी पता लगे कि लोक किजी री बजअ ते एसरे बिरोदो रे एड़े चिंगणे लगी रे।” 25 जेबे तिने से तसमेया साथे बानेया, तेबे पौलुसे तेस सूबेदारो ते, जो नेडे था खड़ेया रा बोलेया, “क्या ये ठीक ए कि तुसे एक रोमी माणूए खे और से बी बिना दोषो ते, कोड़े बाओ?” 26 सूबेदारो ये सुणी की पलटणा रे

सरदारो मे जाई की बोलेया, “तूँ ये क्या लगी रा करने? ये तो रोमी मांगू ए।” 27 तेबे पलटणा रे सरदार तेसगे आयी की बोलेया, “मांगे बता कि क्या तूँ रोमी ए?” तिने बोलेया, “आ।” 28 ये सुणी की पलटणा रे सरदार बोलेया, “मैं रोमी ऊणे रा पद बऊत पैसे देई की पाई राखेया।” पौलुसे बोलेया, “आऊँ तो जन्मो तेई रोमी ए।” 29 तेबे सेयो लोक जो तेसखे परखणे वाले थे। सेयो फटाफट तेसगे ते आटी गे और पलटणा रा सरदार बी ये जाणी की कि ये रोमी ए और मैं ये बानी राखेया, डरीगा। 30 दूजे दिने से ठीक-ठीक जाणने री इच्छा ते कि यहूदी तेस पाँदे कऊँ दोष लगाणे लगी रे, तेसरे बन्दन खोली ते और बड़े पुरोईत और सारी सभा खे कट्टे ऊणे री आज्ञा दिती और पौलुस थाले ल्याई की तिना सामणे खड़ा करी ता।

23 पौलुसे महासभा खे टकटकी लगाई की देखेया और बोलेया, “ओ पाईयो! मैं आजो तक परमेशरो खे बिल्कुल सच्चाईया साथे जीवन बिताया।” 2 हनन्याह प्रदान पुरोईत, तिना री, जो तेसगे खड़ी रे थे, तेसरे मुँओ रे थपडू बाणे खे बोलेया। 3 तेबे पौलुसे तेसखे बोलेया, “ओ दखावटी मांगू, परमेशरे तूँ काणा, तां पाँदे परमेशरो री मार पड़नी। तूँ बिधानो रे मुताबिक मेरा न्याय करने बैठी रा और तेबे क्या बिधानो रे खलाफ माखे बाणे खे बोलणे लगी रा?” 4 जो नेडे थे खडे रे तिने बोलेया, “क्या तूँ परमेशरो रे प्रदान पुरोईतो खे बुरा लगी रा बोलणे?” 5 पौलुसे बोलेया, “ओ पाईयो! माखे नि था पता कि ये प्रदान पुरोईत ए, कऊँकि पवित्र शास्त्रो रे लिखी राखेया कि आपणे लोका रे प्रदानो खे बुरा नि बोल।” 6 तेबे पौलुसे ये जाणी की कि कितणे सद्की ए और कितणे फरीसी ए, सभा रे आक्का पाई की बोलेया, “ओ पाईयो! आऊँ फरीसी और फरीसिया रे वंशो राए, मेरे येया री उम्मीद और दुबारा जिऊँदा ऊणे रे बारे रे मेरा मुकद्दमा ऊणे लगी रा।” 7 जेबे तिने ये गल्ल बोली तेबे फरीसी और सद्किया बीचे चगड़ा ऊणे लगेया और सभा रे फूट पड़ी गी। 8 कऊँकि सद्किया रा ये विश्वास ए कि ना तो दुबारा जिऊँदा ऊणा ए, ना स्वर्गदूत ए और ना ई आत्मा ए, पर फरीसी इना सबी गल्ला खे मानो थे। 9 तेबे बऊत आल्ला पड़ी गा और बऊत शास्त्री, जो फरीसिया रे दलो रे थे, उठी की ये बोली की चगड़े लगे, “आसे एस मांगूए रे कोई बुराई नि पाँदे और जे कोई आत्मा या स्वर्गदूत एस साथे बोलेया, तो तेबे क्या ए?” 10 जेबे बऊत चगड़ा ऊईगा, तेबे पलटणा रे सरदार, इजी रे डरो ते कि से केशी पौलुसो रे टुकड़े-टुकड़े नि करी देओ, पलटणा खे आज्ञा दिती, “उतरी की पौलुसो खे तिना बीचा ते जबरदस्ती खिजी की निकयालो और गढ़ो रे ली आओ।” 11 तेसी राती प्रभु यीशुए पौलुसो मे आयी की बोलेया, “ओ पौलुस! इम्मत राख, कऊँकि जेडी तँ यरूशलेमो रे मेरी गवाई दिती, तेडी ई ताखे रोमो रे बी गवाई देणी पड़नी।” 12 जेबे दिन ऊआ, तेबे कुछ यहूदिये एक ऊई की बोलेया और कसम खाई, “जदुओ तक आसे पौलुसो खे काई नि देऊँगे, तदुओ तक खाऊँगे या पिऊँगे तो आसा पाँदे धिक्कार ए।” 13 जिने आपू बीचे ये कसम खाई, सेयो चालिया ते पाँदे थे। 14 तिने बड़े पुरोईत और बुजुर्ग मे आयी की बोलेया, “आसे ये ठाणी राखेया कि जदुओ तक आसे पौलुसो खे नि काई लऊँगे, तदुओ तक जे कोई कुछ चाखो गा बी, तो आसा पाँदे धिक्कारो पाँदे धिक्कार ए। 15 इजी री खातर एबे बड़ी सभा समेत पलटणा रे सरदारो खे समजयाओ कि पौलुसो खे तांगे ली आओ, मानेया कि तुसे तेसरे बारे रे ओर बी परख करना चाओए और आसे तेसरे पऊँछणे ते पईले ई, तेसखे काणे खे त्यार रणे।” 16 पर पौलुसो री बईणा रे पाऊए सुणेया कि सेयो तेसखे काणे री ताका रे ए, तेबे तिने पौलुसो खे गढ़ो रे जाई की सन्देशा दितेया। 17 पौलुसे सूबेदारा बीचा ते एकी खे आपू गे बुलाई की बोलेया, “एस जवानो खे पलटणा रे सरदारो मे लयी जाओ, ये तेसखे कुछ बोलणा चाओआ।” 18 तेबे सुबेदारे पौलुसो रे पांणजे खे पलटणा रे सरदारो मे लयी जाई की बोलेया, “पौलुस बन्दुए माखे बुलाई की बिनती कित्ती कि ये जवान पलटणा रे सरदारो ते कुछ बोलणा चाओआ, एसखे तेसगे लयी जा।” 19 पलटणा रे सरदार तेसरा आथ पकड़ी की और तेसखे लग जे लयी जाई की पूछेया, “मांगे क्या बोलणा चाएया?”

20 तिने बोलेया, “यहूदिये अगुवे एकता करी राखी कि तांते बिनती करो कि काल पौलुसो खे बड़ी सभा रे ल्याओ, मानेया कि तूँ ओर ठीक तरअ ते तेसखे परखणा चाएया। 21 पर एसरी ए बिनतिया नि मांगणी, कऊँकि तिना बीचा ते चाली मांगूआ ते पाँदे पौलुसो खे काणे री ताका रे ए, जिने ये ठाणी ला रा कि जदुओ तक आसे पौलुसे खे काई नि देऊँगे, तदुओ तक खाऊँ, पिऊँगे तो आसा पाँदे धिक्कार ए, और एबु सेयो त्यार ए और तेरे वचनो री उम्मीद देखणे लगी रे।” 22 तेबे पलटणा रे सरदार जवानो खे ये आज्ञा देई की बिदा कित्तेया, “केसी गे नि बोलणा कि तँ मांगे ये गल्ल बोली राखी।” 23 तेबे सेनापतिये दो सूबेदारा खे बुलाई की बोलेया, “दो सी सिपाई, सत्तर सवार और दो सी भालेत, पहर राथियो खे कैसरिया नगरो खे जाणे खे त्यार करी की राखो 24 और पौलुसो री सवारिया खे कोडे त्यार राखो, ताकि तेसखे फेलिक्स हाकिमो गे ठीक-ठाक पऊँछाया जाओ।” 25 सेनापतिये राज्यपालो खे ईयां पत्री बी लिखी, 26 “महाप्रतापी फेलिक्स हाकिमो खे क्लौदियूस लूसियासो री तरफा ते नमस्ते। 27 ये मांगू यहूदिये पकड़ी की काणा चाया, पर जेबे माखे पता लगेया कि ये रोमी ए, तेबे पलटण लयी की छुड़ाई की ली आया। 28 आऊँ जाणना चाऊँ था कि सेयो एस पाँदे किजी री बजअ ते तेस पाँदे दोष लगाणे लगी रे, इजी री खातर आऊँ तेसखे तिना री महासभा रे लयी गा। 29 तेबे माखे पता लगी गा कि सेयो आपणी यहूदी बिधानो रे बईसो रे बारे रे एस पाँदे दोष लगी रे लगाणे, पर काणे जोगा और बानणे जोगा एसदे कोई दोष नि ए। 30 जेबे मांगे बताया गया कि सेयो लोक एसखे काणे री ताका रे लगी रे, तो मैं फटाफट से तांगे पेजी ता और दुश्मणा खे बी आज्ञा दिती कि तां सामणे तेसखे निर्दोष करेयो।” 31 तो तेबे जियॉ सिपाईया खे आज्ञा दिती थी तियाँ ई सिपाईए पौलुसो खे रातो-रात अन्तिपत्रिस नगरो खे ली आए। 32 दूजे दिने सेयो सवारा खे पौलुसो साथे कैसरिया नगरो खे जाणे खे छाडी की आपू गढ़ो खे वापस आईगे। 33 तिने कैसरिया नगरो रे पऊँछी की हाकिमो खे पत्री दिती और पौलुस बी तेस सामणे खड़ा कित्तेया। 34 राज्यपाले पट्टी की पूछेया, “ये मांगू कुण जे प्रदेशो राए?” पौलुसे उतर दितेया, “आऊँ किलिकिया प्रदेशो राए।” 35 जेबे जाणी ला कि किलिकिया राए तो राज्यपाले तेसखे बोलेया, “जेबे तेरे दुश्मण बी आओगे, तेबे आऊँ तेरा मुकद्दमा कळंगा।” तिने पौलुस हेरोदेसो रे किले रे पडरे रे राखणे री आज्ञा दिती।

24 पाँज दिना ते बाद हनन्याह नाओं रा प्रदान पुरोईत कई बुजुर्ग और तिरतुल्लुस नाओं रे केसी वकीलो खे साथे लयी की कैसरिया नगरो खे आया, तिने हाकिमो सामणे पौलुसो पाँदे दोष लगाया। 2 जेबे पौलुस बुलाया, तेबे तिरतुल्लुस तिना पाँदे दोष लगाई की बोलणे लगेया, “ओ महाप्रतापी फिलेक्स! तेरे जरिए जो आसा खे बड़ा राम मिलोआ और तेरे प्रबन्धो ते इना जातिया खे कितणिया बुराईया सुदारिया जाओईया, 3 इना खे आसे हर जगा और हर प्रकारो ते धन्यवादा साथे मानूँए। 4 पर इजी री खातर कि आऊँ तेरा ओर जादा बखत खराब नि करना चांदा। आऊँ तांते बिनती कळँआ कि कृपा करी की म्हारिया दो-एक गल्ला सुणी लो। 5 कऊँकि आसे ये मांगू ऊदम मचाणे वाला और दुनिया रे सारे यहूदिया बीचे अंगामा करने वाला और नासरियो रे अड़दंगे कामो रा मुखिया पाई राखेया। 6 इने मन्दर अशुद्ध करना चाया पर आसे ये पकड़ी ता। (आसे एसखे आपणे बिधानो रे मुताबिक सजा दिती ऊँदी) 7 पर पलटणा रे सरदार लूसीयासे ये आसा ते जबरदस्ती छुड़ाई ला, 8 और दुश्मणा खे तां सामणे आऊणे खे बोलेया इना सबी गल्ला खे जिना रे बारे रे आसे एस पाँदे दोष लगाणे लगी रे, ताखे आपू ई एसखे परखी की पता लगी जाणा।” 9 यहूदिये बी तेसरा साथ देई की बोलेया कि यो गल्ला ईयां ई आईया। 10 जेबे हाकिमे पौलुसो खे बोलणे खे सारा (संकेत) कित्तेया, तेबे पौलुसे जवाब दितेया, “जेबे माखे पता लगेया कि तूँ बऊत साला ते एसा जातिया रा न्याय करदा आयी रा, तेबेई खुशिया साथे आपणा जवाब देऊँआ। 11 तूँ आपू जाणी सकेया कि जदुओ ते आऊँ यरूशलेमो रे भक्ति करने खे मन्दरो रे आया, माखे बारा दिना

ते जादा नि ऊई रे। 12 और तिने आऊँ ना मन्दरो रे, ना प्रार्थना रा कअर, ना नगरो रे केसी साथे बईस करदे या पीड़ (भीड़) लगादे ऊए देखेया, 13 और ना ई सेयो तिना गल्ला खे, जिना रा सेयो मां पाँदे दोष लगाणे लगी रे, तां सामणे सच साबित करी सकोए। 14 पर आऊँ तां सामणे ये मानी लऊँआ कि जेते कामो खे यो अइदणे काम बोलोए तेसरी ई रीतिया ते आऊँ आपणे बाप-दादेया रे परमेशरो री सेवा कर्हूआ और जो गल्ला बिधान और भविष्यबक्तेया री कताबा रे लिखी राखिया, तिना सबी पाँदे विश्वास कर्हूआ 15 और परमेशरो ते उम्मीद राखूँआ कि जो सेयो आपू बी राखोए कि तर्मी और पापी दोनो जिऊँदे ऊणे। 16 इजी ते आऊँ आपू बी कोशिश कर्हूआ कि परमेशरो री और मांणूआ री तरफा ते मेरा विवेक सदा निर्दोष रओ। 17 “बऊत साला ते बाद आऊँ आपणे गरीब लोका खे दान पऊँछाणे और पेंट चढ़ाणे यरूशलेम नगरो खे आया था। 18 तिने आऊँ मन्दरो रे शुद्ध दशा रे और बिना पीड़ा ते और बिना दंगा करदे ऊए पेंट चढ़ादे ऊए देखेया-पर आ, आसिया प्रदेशो रे कई यहूदी थे, तिना खे ठीक था 19 कि जे मेरे बिरदो रे तिना री कोई गल्ल ओ तो, एती मां सामणे आयी की मां पाँदे दोष लगादे। 20 या यो आपू ई बोली कि जेबे आऊँ महासभा सामणे खड़ा था, तेबे इने माँदे कुण जा अपराध पाया? 21 एसा एकी गल्ला खे छाडी की जो मैं इना बीचे आक्का पाई की बोली थी, ‘मरे ऊए रे जिऊँदे ऊणे रे बारे रे आज मेरा तुसा सामणे मुकद्दमा ऊणे लगी रा।’” 22 फेलिक्स जो एस कामो रिया गल्ला ठीक-ठीक जाणो था, सेयो ये बोली की टाली ते, “जेबे पलटणा रा सरदार लूसियास आऊणा, तेबे तुसा री गल्ला रा न्याय कर्हूआ।” 23 सूबेदारो खे बोलेया कि पौलुसो खे कुछ टीअल (छूट) देई की रखवाली करेयो पर तेसरे दोस्ता बीचा ते केसी खे बी तेसरी सेवा करने ते नि रोकणा। 24 थोड़े दिनो ते बाद राज्यपाल फेलिक्स आपणी लाड़ी दूसिल्ला खे, जो यहूदिणी थी, साथे लयी की केसरिया नगरो खे आया और पौलुसो खे बुलाई की तेस विश्वासो रे बारे दे, जो यीशु मसीह पाँदे ए, तेसते सुणेया। 25 जेबे पौलुस तर्म, सब्र और आऊणे वाले न्याय रे बारे रे बताओ था, तेबे फेलिक्स डरदे ऊए बोलेया, “एबु तो जा, मौका मिलणे पाँदे मां तूँ फेर बुलाणा।” 26 राज्यपाल फेलिक्सो खे पौलुसो ते कुछ पैसे मिलणे री बी उम्मीद थी, इजी री बजअ ते से तेसखे ओर बी बुलाई-बुलाई की गल्ला करो था। 27 पर जेबे दो साल बीती गे, तेबे पुरकियुस फेस्तुस फेलिक्सो री जगा पाँदे राज्यपाल बणेया और फेलिक्स यहूदिया खे खुश करने री इच्छा ते पौलुसो खे बन्दुआ ई छाडी गा।

25 फेस्तुस यहूदिया प्रदेशो रे राज्यपालो रा काम सम्बालने ते तीन दिन बाद केसरिया नगरो ते यरूशलेमो खे गया। 2 तेबे बड़े पुरोईत और यहूदी अगुवे तेस सामणे पौलुसो पाँदे आरोप लगाए। 3 तिने फेस्तुसो ते बिनती किती कि से पौलुस खे यरूशलेमो खे बुलाणे री कृपा करो, कऊँकि सेयो पौलुसो खे बाटा रेई काणे री ताका रे थे। 4 फेस्तुस बोलेया, “पौलुस केसरिया रे पईरे रे ए और मां आपू तेती चट ई जाणा।” 5 फेर बोलेया, “जो तुसा बीचे अक्क राखोए, सेयो बी साथे चलो और जे इने मांणूए कुछ बुरा काम करी राखेया, तो तेस पाँदे दोष लगाओ।” 6 फेस्तुस यरूशलेमो रे तिना बीचे कोई आठ-दस दिन रई की केसरिया नगरो खे गया और दूजे दिने न्याय आसणो पाँदे बैठी की पौलुसो खे ल्याऊणे री आज्ञा दिती। 7 जेबे से आया, तेबे जो यहूदी अगुवे यरूशलेमो ते आयी रे थे, तिने नेडे-तेडे खड़ी की तेस पाँदे बऊत सारे दोष लगाए, जिना रा तिना गे कोई सबूत नि था। 8 पर पौलुसे जवाब दित्तेया, “मैं ना तो यहूदिया रा बिधानो रा, ना ई मन्दरो रा और ना ई कैसरो रे खलाफ कुछ अपराध करी राखेया।” 9 तेबे फेस्तुसे यहूदिया खे खुश करने री इच्छा ते पौलुसो ते पूछेया, “क्या तूँ यरूशलेमो खे जाणा चाएया और तेती मां सामणे तेरे एस मुकद्दमे रा न्याय कित्तेया जाणा?” 10 पौलुसे बोलेया, “आऊँ कैसरो रे न्याय आसणो सामणे खड़ी रा, मेरे मुकद्दमे रा एथी न्याय ऊणा चाईयो, जेड़ा तूँ अच्छी तरअ ते जाणैया कि यहूदिया रा मैं कुछ बी अपराध निए कित्तेया रा। 11 जे आऊँ अपराधी ए और काणे

जोगा कुछ अपराधो रा काम करी राखेया, तो मरने ते नि मुकरदा। पर जिना गल्ला रा यो यहूदी अगुवे मां पाँदे दोष लगाणे लगी रे, जे तिना बीचा ते कोई गल्ल सच नि ऊई, तो कोई माखे तिना रे आशो रे नि देई सकदा। आऊँ कैसरो ते विनती कर्हूआ, सेई मेरा न्याय करो।” 12 तेबे फेस्तुसे मन्त्रिया री सभा साथे बात-चीत करी की बोलेया, “तैं कैसरो ते विनती करी राखी, तूँ कैसरो गे ई जाणा।” 13 कुछ दिन बितणे ते बादो ते अग्रिप्पा राजा और तेसरी छोटी बईण बिरनिके केसरिया रे आयी की फेस्तुसो खे मिले। 14 तिना रे बऊत दिन तक तेती रणे ते बादो ते फेस्तुसे पौलुसो रे बारे रे राजे गे बताया कि एक मांणू ए, जेसखे फेलिक्स बन्दुआ छाडी गा रा। 15 जेबे आऊँ यरूशलेमो रे था, तेबे बड़े पुरोईत और यहूदिया रे बुजुगं तेस पाँदे आरोप लगाया और चाया कि तेसखे सजा मिलो। 16 पर मैं तिना खे बोलेया, “रोमिया री एड़ी रवाज निए कि केसी मांणूए खे सजा मिलो, जदुओ तक अपराधिया खे तेस पाँदे दोष लगाणे वाले रे आमणे-सामणे खडे ऊई की दोषो रा जवाब देणे रा अवसर नि मिलो। 17 तो जेबे यहूदी अगुवे मां साथे केसरिया आये थे, तेबे मैं देर नि किती, पर दूजे ई दिने न्याय आसणो रे बैठी की तेस मांणूए खे ल्याऊणे री आज्ञा दिती। 18 जेबे तेसरे दुखमण खडे ऊए, तेबे तिने एड़ी बुरी गल्ला रा दोष नि लगाया, जेड़ी आऊँ सचमजूँ था। 19 पर सेयो आपणे तर्म और यीशु नाओं रे केसी मांणूए रे बारे दे, जो मरी गा था और पौलुस तेसखे जिऊँदा बताओआ, बईस करो थे। 20 आऊँ उलजणा रे पड़ी गा कि इना गल्ला रा पता कियौँ लगाऊँ? इजी री खातर मैं पौलुसो ते पूछेया, क्या तूँ यरूशलेम जाणा चाएगा, ताकि तेती इना गल्ला रा न्याय ओ? 21 पर जेबे पौलुसे विनती किती कि मेरे मुकद्दमे रा न्याय महाराजाधिराजो गे ओ, तो तेबे मैं आज्ञा दिती कि जदुओ तक तेसखे कैसरो गे नि पेजूँ, तदुओ तक तेसखे कैदा रे राखेया जाओ।” 22 तेबे अग्रिप्पे फेस्तुसे खे बोलेया, “आऊँ बी तेस मांणूए री सुणना चाऊँआ।” तिने बोलेया, “तां काल सुणी लणी।” 23 तेबे दूजे दिने, जेबे महाराजा अग्रिप्पा और बिरनिके बड़ी धूमधामा साथे पलटणा रे सरदार और नगरो रे बड़ेया लोका साथे दरबारो रे पऊँछेया, तेबे फेस्तुसे आज्ञा दिती कि पौलुसो खे ली आओ। 24 फेस्तुसे बोलेया, “ओ राजा अग्रिप्पा और सब लोको, जो आसा साथे एती ए, तुसे एस मांणूए खे देखोए, जेसरे बारे रे सारे यहूदिये यरूशलेम और एती बी चींगी-चींगी की मांते बिनती किती कि एसरा जिऊँदा रण ठीक निए। 25 पर मैं जाणी ला की तिने एड़ा कुछ नि करी राखेया की तेसखे मारी देओ, और बल्कि तिने आपू ई महाराजे ते विनती किती, तेबे मैं तेसखे रोम पेजणे रा फैसला कित्तेया। 26 पर मैं तेसरे बारे रे कोई ठीक गल्ल नि पाई, ताकि आपणे स्वामिण खे लिखूँ, इजी री खातर आऊँ एसखे तुसा सामणे और महाराज अग्रिप्पा तां सामणे ल्याई राखेया, ताकि परखणे ते बाद माखे कुछ लिखणे खे मिलो 27 कऊँकि बन्दुओ खे पेजणा और जो तेस पाँदे दोष लगाई राखे, सेयो नि बताणे, माखे बेकार लगेओ।”

26 अग्रिप्पे पौलुसो खे बोलेया, “ताखे आपणे बारे रे बोलणे री आज्ञा आए।” तेबे पौलुस आथ आगे करी की जवाब देणे लगेया, 2 “ओ अग्रिप्पा राजा! जितणी गल्ला रा यहूदी अगुवे मां पाँदे दोष लगाणे लगी रे, आज तां सामणे तिना रा जवाब देणे खे आऊँ आपू खे धन्य समजूँआ। 3 खास कर इजी खे कि तूँ यहूदिया रे सब व्यवहार और बईसा खे जाणेया। तेबे आऊँ बिनती कर्हूआ कि शान्त ऊई की मेरी सुणो। 4 “जेड़ा मेरा चाल-चलण शुरूओ ते आपणी जातिया बीचे और यरूशलेमो रे था, ये सब यहूदिया रे अगुवा जाणोए। 5 सेयो जे गवाई देणा चाओए, तो शुरूओ ते माखे पछयाणोए कि आऊँ फरीसी ऊई की आपणे तर्मों रे सबी ते खरे पन्थो रे मुताबिक चलेया। 6 और एबे तेस वादे री उम्मीदा री बजअ ते, जो परमेशरो आसा रे बाप-दादेया साथे किती थी, मां पाँदे मुकद्दमा चली रा। 7 तेसी वादे रे पूरे ऊणे री उम्मीद लगाए रे आसा रे बारा गोत्र, आपणे सारे मनो ते रात-दिन परमेशरो री सेवा करदे आयी रे। ओ राजा! इजी उम्मीदा रे बारे रे यहूदी मां पाँदे दोष लगाणे लगी रे। 8 जबकि जादातर यहूदी ये विश्वास करोए

कि परमेश्वर मरे रेया खे जिऊँदा करोआ, तो तुसा रे एती, ये गल्ल कऊँ विश्वासो जोगी नि समजी जांदी? 9 "मैं बी सोचेया था कि यीशु नासरियो रे नाओं रे बिरोदो रे माखे बऊत कुछ करना चाईयो। 10 और मैं यरूशलेमो रे एड़ा ई कित्तेया और बडे पुरोईता ते अक्क पाई की बऊत सारे पवित्र लोक जेला रे पाए और जेबे सेयो काए जाओ थे, तो आऊँ बी तिना रे बिरोदो रे आपणी सलाह देऊँ था। 11 आऊँ हर प्रार्थना रे कअरो रे तिना खे कूटी-कूटी की यीशुए री निन्दा करवाऊँ था, एथो तक कि रोषो रे मारे इतणा पागल ऊईगा कि बारले नगरो रे जाई की बी तिना खे सताऊँ था। 12 "एसी धुना रे जेबे आऊँ बडे पुरोईता ते अक्क और आज्ञा-पत्र लयी की दमिशको नगरो खे जाणे लगी रा था, 13 तेबे ओ राजा! बाटा रे त्याड़िया जे, मैं सर्गों ते एक सूरजो री चमका ते बी बढ़ी की एक जोति आपू पाँद और साथे चलणे वालेया रे चऊँ कनारे चमकदी ऊई देखी। 14 और जेबे आसे सब जमीना पाँद रूडी गे, तेबे मैं इब्रानी पाषा (भाषा) रे मां साथे बोलदे ऊए ये शब्द सुणेया, 'ओ शाऊल! ओ शाऊल! तूँ माखे कऊँ सताणे लगी रा? पईने पाँद लाते बाणी ईदे तेरा ई नुकशाण ए।' 15 मैं बोलेया, 'ओ प्रभु! तूँ कुण ए?' प्रभुए बोलेया, 'आऊँ यीशु ए, जेसखे तूँ सताएया। 16 पर तूँ उठ, आपणे पैरा पाँद खडाओ, कऊँकि मैं ताखे इजी री खातर दर्शन देई राखेया, ताकि ताखे तिना गल्ला रा सेवक और गवा हरऊँ, जो तें देखी राखिया और तिना रा बी, जिना री तंदई मां ताखे दर्शन देणा 17 यहूदियो और दुजिया जातिया ते, जिना बीचे आऊँ ताखे पेजणे लगी रा मां तूँ तिना ते बचाणा। 18 ताकि तूँ तिना री आखी खोल, ताकि सेयो न्हरे ते जोतिया री तरफा खे और शैतानो रे अक्को ते परमेश्वरो रे राज्य री तरफा खे फिरो। ताकि सेयो पापो री माफी और तिना लोका साथे जो मां पाँद विश्वास करने ते पवित्र कित्ते रे ए, जायदात पाओ।' 19 "तो ओ अग्रिप्पा राजा! मैं तेस स्वर्गिय दर्शनी री गल्ल मानी ली। 20 पर पईले दमिशक नगरो रे और तेबे यरूशलेमो रे रणे वालेया खे, तेबे यहूदिया रे सारे देशो रे और दुजिया जातिया खे समजयांदा रया कि मन फिराओ और परमेश्वरो री तरफा खे फिरी की मन फिराणे जोगा काम करो। 21 इना गल्ला री बजअ ते यहूदी माखे मन्दरो रे पकड़ने और काणे री कोशिश करो थे। 22 पर परमेश्वरो री मडरबानिया ते आऊँ आजो तक बणी रा और छोटे-बडे सबी सामणे गवाई देऊँआ और तिना गल्ला खे छाडी की और कुछ नि बोलदा, जो भविष्यबक्ते और मूसे बी बोलेया कि ऊणे वालिया ए 23 कि मसीह खे दुः ख ऊणा और तेस ई सबी ते पईले मरे देया बीचा ते जिऊँदे ऊई की यहूदी लोका बीचे और दुजिया जातिया बीचे जोतिया रा प्रचा करना।" 24 जेबे पौलुस ईयां जवाब देणे लगी रा था, तेबे फेस्तुसे जोंरे की बोलेया, "ओ पौलुस, तूँ पागल ऊईगा रा, जादा पढाईये तूँ पागल बणाई ता दा।" 25 पर पौलुसे बोलेया, "ओ महाप्रतापी फेस्तुस! आऊँ पागल निए, पर सच्चाई और बुद्धि री गल्ल करूँआ। 26 राजा बी जेस सामणे आऊँ निडर ऊई की बोलणे लगी रा, इना गल्ला खे जाणोआ और माखे विश्वास ए कि इना गल्ला बीचा ते कोई एसते छीपी दी निए, कऊँकि ये घटना कोई कूणे रे नि ऊई री। 27 ओ अग्रिप्पा राजा! क्या तूँ भविष्यबक्तेया पाँद विश्वास करेया? आ, आऊँ जाणूआ कि तूँ विश्वास करेया।" 28 तेबे अग्रिप्पे पौलुसो खे बोलेया, "तूँ थोड़ा जा ई समजयाणे ते माखे मसीह बनाणा चाएया?" 29 पौलुसे बोलेया, "मेरी परमेश्वरो ते ये प्रार्थना ए कि क्या थोड़े जे, क्या बऊत जे, बस तूँई नि, पर जितणे लोक आज मेरी सुणने लगी रे, इना बन्दना खे छाडी की सेयो मां जेडे मसीह बणी जाओ।" 30 तेबे राजा, हाकिम और बिरनिके और तिना साथे बैठणे वाले खडे ऊईगे 31 और लग जे जाई की आप बीचे बोलणे लगे, "ये माणू एड़ा कुछ तो नि करदा, जो मौत या फसतणे जोगा ओ।" 32 अग्रिप्पे फेस्तुसो खे बोलेया, "जे ये माणू केसरो री दुहाई नि देंदा, तो छूटी सको था।"

27 जेबे फेस्तुस राज्यपालो खे ये पक्का निश्चा ऊईगा कि आसे जाहजो रे इटलिया प्रदेशो रे रोम नगरो खे जाईए, तो तेबे तिने पौलुस और कुछ ओर कैदी बी यूलियुस नाओं री महाराजा अगुस्तुसो री पलटणा रे एक

सूबेदारो रे आथो रे देई ते। 2 अद्रमुत्तियुमो नगरो रे एक जाहजो पाँद, जो आसिया प्रदेशो रे कनारे री जगा रे जाणे वाला था, चढ़ी की आसे से खोली ता और अरिस्तर्खुस नाओं रा एक माणू आसा साथे था जो मकिदुनी प्रदेशो रे थिस्सलुनीके नगरो रा रणे वाला था। 3 दूजे दिने आसे सैदा नगरो रे पऊँछे और यूलियुसे पौलुसो पाँद कृपा करी की से साथिया गे जाणे दित्तेया ताकि से तिना ते जरूरी चीजा ली आओ। 4 तेथा ते आसे लोके दुबारा यात्रा शुरू कित्ती। उल्टी अवा चलणे री बजअ ते आसे साइप्रसो टापूए री आड़ा रिये चले 5 और किलिकिया और पंफूलिया नगरो रे नेडे समुद्रो रे ऊई की लूसिया प्रदेशो रे मूरा नगरो रे उतरे। 6 तेती सूबेदारो खे सिकन्दरिया नगरो रा एक जाहज इटलिया प्रदेशो खे जांदा ऊआ मिलेया और तिने आसे तिदे चढ़ाई ते। 7 जेबे आसे बऊत दिन तक, आऊल्ले-आऊल्ले चली की मुश्कला ते कनिदुस नगरो रे सामणे पऊँछे, तो तेबे कऊँकि अवा आसा खे आगे जाणे नि देओ थी, आसे सलमोने रे सामणे ते ऊई की क्रेते टापूए री आड़ा रे चले 8 और तिजी रे कनारे-कनारे पाँद मुश्कला ते चली की शुभ लंगरबारी नाओं री एक जगा रे पऊँछे, जेथा ते लसया नगर नेडे था। 9 जेबे बऊत दिन बीती गे और जलयाना रे मुसीबत तेबे ओ थी, कऊँकि बअरतो रे दिन एबे बीती गे थे। तेबे पौलुसे सेयो ये बोली की समजयाए, 10 "ओ सज्जनो! माखे एड़ा लमोआ कि एसा यात्रा रे विपदा और बऊत नुकशाण, माल और जाहजो रा ई नि, बल्कि म्हारे प्राणो रा बी ऊणे वाला ए।" 11 पर सूबेदारो पौलुसो री गल्ला ते बढ़ी की कप्तान और जाहजो रे मालको री गल्ल मानी। 12 से बन्दरगाह ठण्ड बिताणे खे ठीक नि थी, इजी री खातर बऊत जणेया रा बिचार ऊआ कि जे तेथा ते जाहज खोली की जे कियॉ बी ऊई सको, तो फीनिक्सो रे पऊँछी की ठण्ड बिताईये। ये तो क्रेते टापूए री एक बन्दरगाह ए, जो दक्खण-पच्छम और उत्तर-पच्छमी री तरफा खे खुलोआ। 13 जेबे कुछ-कुछ दक्खण री अवा चलणे लगी, तेबे ये समजी गे कि आसा रा मालब पूरा ऊईगा, आसे लंगर चकेया और कनारे पाँदिए क्रेते टापूए रिये जाणे लगे। 14 पर थोड़ी देर बाद जमीना री तरफा ते बऊत बडा तूफान आईगा, जेतेखे यूरकुलीन बोलोए। 15 जेबे तूफान जाहजो साथे टकराया, तेबे जाहज तेस सामणे ठईरी नि सकेया, तेबे आसे से हडने दित्तेया और ईयां ई हडदे ऊए चली गे। 16 तेबे कौदा नाओं रे एक छोटे जे टापूओ री आड़ा रे हडदे-हडदे, बडी मुश्कला साथे डोंगिया खे वशो रे करी सके। 17 तेबे मल्लाहे से चकी की बऊत तरीके करी की जाहज थालो ते बानेया और सुरतिस खाड़िया रे चोरबालुओ पाँद फसणे रे डरो ते तिने लंगरो खे थोड़ा थाले ऊतारी की जाहज अवा साथे-साथे हडने खे छाडीता। 18 जेबे आसे तूफानो ते बऊत छुनके और ताक्के खाए, तेबे दूजे दिने सेयो जाहजो रा माल सेटणे लगे 19 और तीजे दिने तिने आपणे आथो साथे जाहजो रा साज्र समान बी सेटी ता। 20 जेबे बऊत दिन तक ना सूरज दिशेया और ना तारे और बडा तूफान चलदा रया, तेबे आखरी रे आसा रे बचणे री उम्मीद बी जांदी रई। 21 जेबे सेयो बऊत दिन तक पूखे रई चुके, तेबे पौलुसे तिना बीचे खडे ऊई की बोलेया, "ओ लोको! तुसा खे चाईयो था कि तुसे मेरी गल्ल मानी की क्रेते टापूए ते जाहज नि खोलदे और ना ई बिपदा आऊँदी और ना ई ये नुकशाण ऊँदा। 22 पर एबे आऊँ तुसा खे समजयाऊँआ कि इम्मत राखो, कऊँकि तुसा बीचा ते केसी रे बी प्राणो रा नुकशाण नि ऊणा, पर सिर्फ जाहजो रा। 23 कऊँकि परमेश्वर जेसरा आऊँ ए और जेसरी सेवा करूँआ, तेसरे स्वर्गदूते आज राती मांगे आयी की बोलेया, 24 ओ पौलुस! डर नि, तेरा कैसरो रे सामणे खडा ऊणा जरूरी ए, और देख परमेश्वरे तां पाँद कृपा करी की सबी खे जो तां साथे यात्रा करोए, ताखे देईते रे। 25 इजी री खातर ओ सज्जनो! इम्मत राखो, कऊँकि आऊँ परमेश्वरो पाँद विश्वास राखूँआ कि जेडा मांगे बोली राखेया, तेड़ा ई ऊणा। 26 पर आसा खे केसी टापूओ रे जाई की टिकणा चाईयो।" 27 जेबे चऊदवीं रात आयी और आसे अद्रिया समुद्रो रिये पटकदे फिरने लगी रे थे, तेबे आदिया राती रे नेडे मल्लाहे अनुमानो ते जाणेया कि आसे केसी देशो रे नेडे पऊँछणे लगी रे। 28 थाह लयी की तिने सैती मीटर डूगा पाया और थोड़ा जा आगे चली की फेर थाह लयी, तेबे सताई मीटर डूगा पाया।

29 तेबे पात्थरो वाली जगा रे टकराणे रे डरो ते तिने जाहजो री पिछाड़िया रे चार लंगर बाए और प्याग न्यालने री कामना करदे रये। 30 पर जेबे मल्लाह जाहजो ते नठणा चाओ थे और तिने जाहजो रे सामणे री तरफा ते लंगर पाणे रे बाने रे डोंगी समुद्रो रे ऊतारी ती। 31 तेबे पौलुसे सूबदार और सिपाईया खे बोलेया, “इना रा जाहजो रे रणा जरूरी ए तेबे तुसे बची सकोए।” 32 तेबे सिपाईए रस्से बाडी की डोंगी रुड़ाई ती। 33 जेबे प्याग ऊणे वाली थी, तेबे पौलुसे ये बोली की सब रोटी खाणे खे समजयाए, “आज चौदा दिन ऊईगे कि तुसे उम्मीद देखदे-देखदे रये और बिल्कुल रोटी नि खाई। 34 इजी री खातर आऊँ तुसा खे बोलूँआ कि सब रोटी खाई लो जेते साथे तुसा रा बचाव ओ, और तुसे सब बिल्कुल ठीक-ठाक रणे।” 35 ये बोली की तिने रोटी लयी की सबी सामणे परमेशरो रा धन्यवाद करी की तोड़ी और खाणे लगेया। 36 तेबे सेयो सब बी इम्मत बानी की रोटी खाणे लगे। 37 आसे सब मिली की जाहजो रे दो सौ छयात्तर जणे थे। 38 जेबे सेयो रोटी खाई की रजी गे तेबे कणक समुद्रो रे सेटी की जाहज अलका करने लगे। 39 जेबे दिन ऊआ, तेबे तिने से देश नि पछयाणेया, पर एक खाड़ी देखी, जेतेरा कनारा चौरस था और सोचेया कि जे ऊई सको तो एते पाँदे ई जाहजो खे टिकाऊँए। 40 तेबे तिने लंगर खोली की समुद्रो रे छाडीता और तेबुई पतवारा रे रस्से खोली ते ओर अवा रे सामणे आगला पाल चड़ाई की कनारे पाँदो खे चले। 41 पर जेती दो समुद्रो रे संगमो री जगा पड़ो थी, तेती तिने जाहज टिकाया, तेबे तिजी रा आगला इस्सा तो ताक्का खाई की दबी गी और टली नि सकी, पर पिछला इस्सा लईरा रे जोरो ते टूटणे लगेया। 42 तेबे सिपाईए सोचेया कि कैदिया खे काई देऊँए, केथी एड़ा नि ओ कि कोई तरी की नठी जाओ। 43 पर सूबदार पौलुसो खे बचाणे री खातर सेयो एड़ा करने ते रोके और बोलेया कि जो तरी सकोए, सेयो पईले ई छवाल लयी की कनारे पाँदे निकली जाओ 44 और बाकी कोई पाटड़ेया पाँदे और कोई जाहजो री ओरी केसी चीजा रे साअरे निकली जाओ। इयाँ सब बची की जमीना पाँदे बची की निकली गे।

28 जेबे आसे सब यात्री कनारे पाँदे ठीक-ठाक पऊँछी गे, तेबे आसा खे पता लगेया कि एस टापूओ खे माल्टा बोलेओ। 2 तेथो रे रणे वाले लोके आसा पाँदे नऊका प्यार दखाया, कऊँकि बादल बरसणे री बजअ ते ठण्ड थी, तेबे तिने आग सुलगाई की आसे सब ठराए। 3 जेबे पौलुसे लकडुआ रा पारा (गट्टा) कट्टा करी की आगी पाँदे राखेया, तेबे एक साप आगी रे सेको रे निकलेया और तेसरे आथो रे लिपटी गा। 4 जेबे तेथो रे रणे वालेया साप तेसरे आथो रे लक्रेया रा देखेया, तेबे आपू बीचे बोलेया, “सच्ची ये मांण अत्यारा ए, हालाँकि समुद्रो ते बची गा, पर तेबे बी न्यायी देविए जिऊँदा नि रणे दितेया।” 5 पौलुसे साप आगी रे चड़ाकी ता और तेसखे कोई नुकशाण नि ऊआ। 6 पर सेयो लोक न्यालदे रये कि तेसरे सोजा आयी जाणा या एकदम रूडी की मरी जाणा, पर जेबे सेयो बऊत देर तक देखदे रये कि एसरा कुछ नि बिगड़ेया, तेबे तिने ओर ई बिचार कितेया और बोलेया, “ये तो कोई देवता ए।” 7 तेसा जगा रे नेड़े-तेड़े तेस टापूओ रे प्रदान पुबलियुसो री जमीन थी। तिने आसे आपणे कअरे दोस्ता जेडे नि ए और तीन दिन तक प्यारो साथे पराऊणचारी कित्ती। 8 पुबलियुसो रा पिता बुखार और खूनो री आंवा रा रोगी था, तेबे पौलुसे तेसरे कमरे रे जाई की तेसखे प्रार्थना कित्ती और तेस पाँदे आथ राखी की से ठीक कितेया। 9 जेबे एड़ा ऊआ, तेबे तेस टापूओ रे बाकी बमार बी पौलुसो गे आईगे और तिने सेयो ठीक कित्ते। 10 तिने आसा री बऊत आओ-बैठ कित्ती और जेबे आसे तेथा ते तीन मीन्ने बाद चलणे लगे, तेबे जो कुछ आसा खे जरूरी था, से जाहजो पाँदे राखी ता। 11 तीन मीन्ने ते बाद आसे सिकन्दरिया रे एक जाहजो पाँदे चली पड़े, जो तेस टापूओ पाँदे ठण्ड पड़ने री बजअ ते रूकेया रा था। तेते जाहजो रे आगले इस्से पाँदे एक जोड़ी देवतेया री मूरत दियुसकूरी गद्दी री थी। 12 सुरकूसा नगरो रे लंगर पाई की आसे तेती तीन दिन तक रये। 13 तेथा ते आसे कूमी की रेगियुम नगरो रे आए और एक दिन बाद दक्खणो ते अवा चली, तेबे आसे दूजे दिने पुतियुले नगरो रे आए। 14 तेती

आसा खे विश्वासी पाई मिले और तिना रे बोलणे पाँदे आसे तिना रे कअरे सात दिन तक रये और तेबे रोमो खे चली गे। 15 रोमो ते कुछ विश्वासी पाई आसा रा समाचार सुणी की कि आसे तेती आऊणे लगी रे सेयो अप्पियुसो रे चौको रे और तीन सराँए तक आसा खे मिलणे खे आए, जिना खे देखी की पौलुसे परमेशरो रा धन्यवाद कितेया और इम्मत बानी। 16 जेबे आसे रोम नगरो रे पऊँछे, तेबे पौलुसो खे एक सिपाईए साथे, जो तेसरी रखवाली करो था, कल्ले रणे री आज्ञा मिली। 17 तीन दिना ते बाद तिने यहूदिया रे खास लोक बुलाए और जेबे सेयो कट्टे ऊए तो तिना खे बोलेया, “ओ पाईयो, मैं आपणे लोका रे या आपणे बाप-दादेया रे व्यवहारो रे बिरोदो रे कुछ नि बोलेया, तेबे बी कैदी बनाई की यरूशलैमो ते रोमी सरकारा रे आथो रे सम्बाली ता। 18 तिने आऊँ परखी की छाड़णा चाया, कऊँकि मादे मृत्यु-दण्डो जोगा कोई दोष नि था। 19 पर जेबे यहूदी अगुवे इजी रे बिरोदो रे बोलणे लगे, तेबे माखे कैसरो ते विनती करनी पड़ी, ये सोची की नि कि मां आपणे लोका पाँदे कोई दोष लगाणा था। 20 इजी री खातर मैं तुसे बुलाई राखे ताकि तुसा साथे मिलूँ और बातचीत करूँ, कऊँकि इस्राएलो री उम्मीदा खे आऊँ इना जंजीरा रे जकड़ी रा।” 21 तिने तेसखे बोलेया, “ना आसा खे तेरे बारे रे यहूदिया प्रदेशो ते चिट्ठिया मिलिया और ना ई विश्वासी पाईया बीचा ते आयी की किने तेरे बारे रे कुछ बताया और ना ई बुरा बोलेया। 22 पर तेरा बिचार क्या ए? सेई आसा तांते सुणना चाऊँए, कऊँकि आसे जाणूए कि हर जगा रे एस मतो रे बिरोदो रे लोक गल्ला करोए।” 23 तेबे तिने पौलुसो खे एक दिन ठराया और बऊत लोक तेसरे गे कट्टे ऊए और से परमेशरो रे राज्य री गवाई देँदा ऊआ और मूसे रा बिधान और भविष्यबक्तेया री कताबा ते प्रभु यीशुए रे बारे रे समजयाई-समजयाई की प्यागा ते साँजा तक बोलदा रया। 24 तेबे कुछ जणेया सेयो गल्ला मानी लईया और कुछ जणेया विश्वास नि कितेया जो पौलुसे बोलिया थिया। 25 जेबे सेयो आपू बीचे एक मत नि ऊए, तेबे पौलुसो री एसा एक गल्ला बोलणे पाँदे चली गे, “पवित्र आत्मे यशायाह भविष्यबक्ते रे जरिए तुसा रे बाप-दादेया खे ठीक ई बोलेया, 26 “जाई की इना लोका खे बोल कि सुणदे तो रणे, पर समजणे नि और देखदे तो रणे, पर दिशणा नि। 27 कऊँकि इना लोका रा मन मोटा और तिना रे कान पारी ऊईगे रे और तिने आपणी आखी बंद करी ती रिया, एड़ा नि ओ कि सेयो कदी आखी ते देखो और कानो ते सुणो और मनो ते समजो और फिरो और आऊँ तिना खे ठीक करूँ। 28 “तेबे तुसे जाणो कि परमेशरो रे एस उद्धारो री कथा दुजिया जातिया गे पेजी ती री और तिना सुणनी।” 29 जेबे तिने ये बोलेया तो यहूदी आपू बीचे बऊत बईस करने लगे और तेथा ते चली गे। 30 से पूरे दो साल तक आपणे खर्चे रे कअरो रे रया 31 और जो तेसगे आओ थे, तिना सबी ते मिलदा रया और बिना रोका-टोका ते बऊत निडर ऊई की परमेशरो रे राज्य रा प्रचार करदा ऊआ और प्रभु यीशु मसीह री गल्ला सिखांदा रया।

रोमियों

1 आऊँ पौलुस एसा चिट्ठिया खे लिखणे लगी रा जो यीशु मसीह रा दास ए। परमेशरे आऊँ प्रेरित ऊणे खे चुणी राखेया। तिने आऊँ सुसमाचारो रा प्रचार करने खे लग करी राखेया। 2 परमेशरे पईले तेई आपणे भविष्यबक्ताओं रे जरिए पवित्र शास्त्रो रे एस सुसमाचारो री प्रतिज्ञा किक्ती थी। 3 ये सुसमाचार आपणे पुत्र वंशो रे प्रभु यीशु मसीह रे बारे रे था। से शरीरो रे मुताबिक तो जरा दाऊदो रे अंशो ते जम्मेया, 4 और पवित्र आत्मा री सामर्थ ते से मरे रेया बीचा ते जिऊँदा ऊआ। इजी ते ये साबित ऊआ कि से परमेशरो रा पुत्र ए और सेई यीशु मसीह आसा रा प्रभु ए। 5 यीशु मसीह रे जरिए माखे कृपा और प्रेरिताईया रा काम मिलेया, ताकि तेसरे नाओं री बजअ ते सब जातिया रे लोक सुसमाचारो पाँदे विश्वास करो और तेसरी आज्ञा मानो। 6 जिना बीचा ते तुसे बी ओ, जिना खे परमेशरे प्रभु यीशु मसीह रे लोक ऊणे खे बुलाई राखेया। 7 आऊँ ये चिट्ठी तुसा सबी लोका खे लिखणे लगी रा जो रोम नगरो रे परमेशरो रे प्यारे ए और आपणे पवित्र लोक ऊणे खे बुलाई राखे, आसा रे पिता परमेशर और प्रभु यीशु मसीह री तरफा ते तुसा खे कृपा और शान्ति मिलदी रओ। 8 पईले आऊँ तुसा सबी खे प्रभु यीशु मसीह रे जरिए आपणे परमेशरो रा धन्यवाद कऱूँआ, कऱूँकि यीशु मसीह रे तुसा रे विश्वासो री चर्चा सारी दुनिया रे ऊणे लगी रिया। 9 परमेशर, जेसरी सेवा आऊँ आपणे पूरे मनो ते तेसरे पुत्रो रे सुसमाचारो रे बारे रे कऱूँआ, सेई मेरा गवा ए कि आऊँ आपणी प्रार्थना रे तुसा लोका खे लगातार याद करदा रऱूँआ। 10 और हर रोज आपणी प्रार्थना रे बिनती कऱूँआ कि परमेशरो री इच्छा रे मुताबिक माखे आखरी रे तुसा लोका गे आऊणे रा मौका मिलो। 11 कऱूँकि आऊँ तुसा खे मिलणे री बड़ी इच्छा कऱूँआ, ताकि आऊँ तुसा खे कोई आत्मिक बरदान देऊँ, जेते कि तुसे विश्वासो रे मजबूत ऊई जाओ। 12 मेरा मतलब ये कि आऊँ तुसा खे और तुसे माखे आपू बीचे एक दूजे खे विश्वासो रे मजबूत करिए। तुसे मजबूत ऊई जाणे कऱूँकि तुसे जाणोए कि मैं कियॉ विश्वास किक्तेया और आऊँ मजबूत ऊई जाणा कऱूँकि आऊँ जाणूँआ ए कि तुसे कियॉ विश्वास करोए। 13 ओ साथी विश्वासियो! आऊँ नि चाँदा कि तुसे इजी ते अणजाण रओ कि मैं बार-बार तुसा गे आऊणा चाया पर एषुए तक आऊँ रोकी की राखी राखेया। आऊँ चाऊँआ कि जेडे मैं दूजी कऱूँ जगा रे दुजिया जातिया रे मसीह रे चले बणाए, तेडे ई रोमो रे तुसा बीचे मसीह रे चले बणाई सकूँ। 14 आऊँ आपणे आपू खे यूनानी पाषा बोलणे वालेया रा और अन्यभाषिया रा, अक्लमंद और मूर्खा खे सुसमाचारो रा प्रचार करने खे कर्जदार ए। 15 तो तेबे आऊँ तुसा खे बी जो रोम नगरो रे रओए, सुसमाचार सुनाणे खे त्यार ए। 16 कऱूँकि आऊँ मसीह रे बारे रे एस सुसमाचारो ते शर्मादा निए। ये तिना सबी खे उद्धारो रे निमित्त परमेशरो री सामर्थ ए, सबी ते पईले यहूदिया खे तिजी ते बाद दूजी जातिया खे जो एस सुसमाचारो पाँदे विश्वास करोए। 17 कऱूँकि सुसमाचारो रे परमेशरो री धार्मिकता विश्वासो ते और विश्वासो खे प्रगट ओई, जेड़ा पवित्र शास्त्रो रे लिखी राखेया, “विश्वासो रे जरिए तर्मी माणू जिऊँदा रणा।” 18 परमेशरो रा रोष तो तिना सबी री अभक्ति और पापो पाँदे जो लोक करोए स्वर्गो ते प्रगट ओआ, जो सच्यो खे पापो रे कामो ते दबाई की राखोए। 19 इजी खे परमेशरो रे बारे रे ज्ञान तिना रे मनो रे प्रगट ए, कऱूँकि परमेशरे तिना पाँदे प्रगट करी राखेया। 20 परमेशरो रे अणदेखे गुण, मतलब तेसरी सनातन सामर्थ और परमेशरो री तागत दुनिया री सृष्टिया रे बखतो ते, तेसरे कामे की देखणे रे आओए। इजी खे तिना लोका गे आपणे आपू खे बचाणे खे कोई जवाब निए, “आसे परमेशरो खे नि जाणोए।” (aidios q126) 21 कऱूँकि तिने परमेशरो खे जाणोए ऊए बी परमेशरो खे परमेशरो जोगा आदर और धन्यवाद नि किक्तेया। इजी रे बदले सेयो लोक बेकारो रे सोचणे लगे, एथो तक की तिना रे मूर्ख मनो रे न्हारा ऊईगा। 22 सेयो आपू खे अक्लमंद जताई की मूर्ख बणी गे। 23 और तिने अविनाशी महिमामय परमेशरो री आराधना छाडी की

नाशवान माणू, पंछी, जानवर और लूरने वाले जन्तुआ री मूर्तिया री आराधना किक्ती। 24 इजी री बजअ ते परमेशरे सेयो तिना रे शरीरो री पापमय इच्छा रे मुताबिक यौन अशुद्धता खे छाडी ते ताकि सेयो आपू बीचे बुरे कामो रे जरिए आपणे शरीरो रा अनादर करो। 25 तिने परमेशरो री सच्चाईया रे बारे रे विश्वास करने ते ना किक्ती और चूठो पाँदे विश्वास किक्तेया। तिने परमेशरो रे बजाये तिना रे जरिए बणाई री सृष्टिया री पूजा और सेवा किक्ती, जो सदा धन्य ए। आमीन! (aiōn q165) 26 इजी री खातर परमेशरे सेयो निर्लज्ज वासनाओं रे वशो रे छाडी ते। एथो तक कि तिना री जवाणसे बी आपणा कुदरती यौन सम्बन्ध छाडी की तिजी खे जो सबाओ रे खलाफ ए, बदली ता। 27 तियॉ ई मर्द बी जवाणसा साथे कुदरती मेलजोल छाडी की आपू बीचे कामातुर ऊई की जलने लगे और मर्द, मर्दा साथे बेशर्म काम करी की आपू पाँदे बुरे कामा री सजा रा ठीक फल पाया। 28 इजी ते बाद बी तिने ये ठीक नि समजेया कि परमेशरो रे सारे ज्ञानो खे मानो। तो परमेशरे बी सेयो सब गलत काम करने खे तिना रे नक्कमे मनो रे वशो रे छाडी ते। 29 सेयो सबी प्रकारा रे पाप, दुष्टता, लोब, बैरभावो ते परी गे और जलन, अत्या, चगडे, छल और ईर्ष्या ते परी गे और चूगलखोर, 30 बदनाम करने वाले, परमेशरो ते करीणा करने वाले, ओरी रा अनादर करने वाले, कमण्डी, त्वालिया देणे वाले, बुरिया-बुरिया गल्ला बनाणे वाले, माया-बाओ रा कईणा ना मानणे वाले, 31 निर्बुध्द, विश्वासघाती, दयारहित और निर्दयी ऊईगे। 32 सेयो परमेशरो री ये तर्मी री बिधि जाणोए कि एडे-एडे काम करने वालेया खे मौता री सजा मिलणी, तेबे बी ना सिर्फ आपणे आपू ई एडे काम करोए, बल्कि करने वालेया ते बी खुश ओ ए।

2 तुसा खे लगीआ कि तुसे एडे लोका पाँदे दोष लगाई सकोए पर ओ दोष लगाणे वाली! तूँ जो दूजेया पाँदे दोष लगाएया तंगे कोई बाह्य निए। कऱूँकि जेसा गल्ला रा तूँ दूजे पाँदे दोष लगाएया, तेसी गल्ला रे आपणे आपू खे बी दोषी बणाएया, इजी री खातर, जो तूँ दोष लगाएया, आपू बी तिना ई कामा करेया। 2 और आसे जाणूँए कि एडे-एडे काम करने वालेया पाँदे परमेशरो री तरफा ते ठीक-ठीक दण्डो री आज्ञा ओई 3 और ओ माणू! तूँ जो एडे-एडे काम करने वालेया पाँदे दोष लगाएया और आपू तेडे ई काम करेया, क्या समजेया कि तूँ परमेशरो रे दण्डो ते बची जाणा? 4 क्या तूँ परमेशरो री पलाई, सईन शीलता और धीरजरूपी दौलता खे तुच्छ जाणोआ? और क्या ये नि समजदा कि परमेशरो री कृपा ताखे मन फिराणे री तरफा खे लई जाओई? 5 पर तुसे टोठ मनो रे ए और आपणे बुरे कामा ते मन फिराणे ते मना करी देओए। एड़ा करी की तुसे आपू खे बऊत पारी सजा कट्टी करने लगी रे। रोषो रा दिन आऊणे वाला ए जिदे परमेशरो री धार्मिकता रा न्याय प्रकट ऊणा। 6 परमेशरो हर एकी खे तेसरे कामो रे मुताबिक प्रतिफल देणा। 7 जो लोक खरे कामो रे खडे रई की महिमा, आदर और अमरता री टोला रे, तिना खे परमेशरो अनन्त जीवन देणा। (aiōnios q166) 8 पर जो स्वार्थी ए और सच्यो खे नि जाणोए, बल्कि बुरे काम करोए, तिना पाँदे परमेशरो रा रोष और कोप पडना। 9 और क्लेश और संकट हर एकी माणूए रे प्राणो पाँदे, जो बुरा करोआ, आऊणा। परमेशरो सबी ते पईले यहूदिया रा न्याय करना और तिजी ते बाद दूजिया जातिया रा न्याय करना। 10 पर महिमा, आदर और शान्ति हर एकी खे मिलणी, जो पला करोआ, पईले यहूदिया खे मिलणी, तेबे दूजिया जातिया खे। 11 कऱूँकि परमेशर केसी रा पक्ष नि करदा। 12 कऱूँकि जिने बिना मूसे रा बिधान पाए, पाप किक्तेया, तिना खे बिना मूसे रा बिधानो तेई सजा मिलणी और यहूदी जिने मूसे रा बिधान पाई कि पाप किक्तेया, तिना रा न्याय मूसे रा बिधानो रे मुताबिक ई ऊणा। 13 कऱूँकि परमेशरो रे एती बिधानो खे सुणने वाले तर्मी निए, पर बिधानो पाँदे चलणे वाले तर्मी ठराए जाणे। 14 तेबे, जेबे दूजी जातिया रे लोक, जिना गे मूसे रा बिधान निए, सबाओ तेई बिधानो री गल्ला पाँदे चलोए और मूसे रा बिधान तिना गे ना ऊणे पाँदे बी, सेयो ये सिद्ध करी देओए की तिना रे मनो रे एक बिधान ए 15 सेयो परमेशरो रे

बिधानो रिया गल्ला आपणे दिलो रे लिखी रिया दखाओए। तिना रे विवेक बी गवाई देओए। तिना रे बिचार तिना खे कदी दोष लगाओए तो कदी तिना खे निर्दोष ठराओए। 16 ये तेस दिने सपष्ट ऊई जाणा जेस दिने परमेशर मेरे सुसमाचारो रे मुताबिक यीशु मसीह रे जरिए माणूआ री गुप्त गल्ला रा न्याय करोगा, 17 आपणे बारे रे सोच जो तूँ आपू खे यहूदी समजेया और बिधानो पाँदे विश्वास राखेया और तूँ त्वालिया मारिया कि आऊँ परमेशरो रे खास जन ए। 18 तुसे परमेशरो री इच्छा जाणोए और तुसे खरिया-खरिया गल्ला जाणोए कऊँकि तुसे यो सब गल्ला मूसे रा बिधानो ते सीखी राखिया। 19 तुसा खे ये निश्चा ए कि तुसे अन्दे लोका खे पक्का ई बाट दखाई सकोए और जो न्हेंरे रे पटकणे लागी रे तिना खे तुसे जोतिया जेडे ए। 20 तुसे सोचोए, “आऊँ मूर्खा खे सिखाणे वाला और बालका रा उपदेशक ए।” तुसा खे निश्चा ए कि परमेशरो रा बिधान तुसा खे पुरा ज्ञान और सच्चाई देओआ। 21 पर तूँ जो ओरी खे सिखाएया, आपणे आपू खे कऊँ नि सिखांदा? तूँ ओरी खे चोरी ना करने रा उपदेश दे आ और आपू ई चोरी करेया! 22 तूँ जो बोलेया, “व्याभिचार नि करना,” तो आपू ई व्याभिचार कऊँ करेया? तूँ जो मूर्तिया ते नफरत करेया, तो आपू ई कऊँ मन्दरा खे लूटोआ? 23 तूँ परमेशरो रा बिधानो रे बारे रे कमण्ड करेया और बिधानो खे ना मानी की परमेशरो रा नरादर कऊँ करेया। 24 इजी खे जेडा कि पवित्र शास्त्रो रे लिखी राखेया, “तुसा लोका री बजअ ते दूजी जातिया बीचे परमेशरो रे नाओं री निन्द ओई।” 25 जे तूँ बिधानो पाँदे चले, तो खतने ते तो लाब ए, पर जे तूँ बिधानो खे नि माने, तो तेरा खतना बिना खतने जेडा ए। 26 तेबे जे बिना खतने रा माणू परमेशरो रे बिधानो री बिधिया खे मानेया करो, तो क्या तेसरे बिना खतने री दशा, खतने रे बराबर नि गिणी जाणी? 27 और जो माणू शारीरिक रुपो ते बिना खतने ते परमेशरो रे बिधानो खे पूरा-पूरा मानोआ, तेस तुसे दोषी ठईरणे, कऊँकि तुसा गे परमेशरो रा लिखेया रा बिधान ए और खतना ऊँदे ऊए बी तुसे बिधानो खे नि मानदे। 28 असली यहूदी से नि ए जेसरा सिर्फ बारला रूप यहूदिया जेडा ए और असली खतना से नि ए जो बारले रुपो ते सिर्फ शरीरो रे करी राखेया। 29 पर यहूदी सेईए, जो मनो रे और खतना सेईए, जो पवित्र आत्मा रे जरिए दिलो रे कितेया जाओआ, ना कि लेखो खे मानणे ते, ईयाँ ई तारीफ आपणिया तरफा ते नि, बल्कि परमेशरो री तरफा ते ओई।

3 तो ओरी री बजाए यहूदिया खे जादा क्या मिलेया? और खतने ते क्या फायदा ऊआ? 2 आ, हर प्रकारा ते बऊत कुछ फायदा ऊआ। सबी ते जरूरी तो ये कि परमेशरो रे वचन यहूदिया गे सम्बाली ते। 3 जे कुछ विश्वासघाती निकले बी तो क्या ऊआ? क्या तिना रे विश्वासघाती ऊणे ते परमेशरो रा कितेया रा वादा बेकार जाणा? 4 कदी पनि! बल्कि परमेशर सदा सच बोलोआ और दुनिया रा हर माणू चूटा ठईरी सकोआ, जेडा लिखी राखेया, “जेते कि तूँ आपणी गल्ला रे तर्मी बणो, और न्याय करदे ऊए तेरी जय ओ।” 5 तेबे जे आसा रे बुरे काम परमेशरो री धार्मिकता दखाओई, तो आसे क्या बोलूँ? क्या ये कि परमेशर जो रोष करोआ, अन्यायी ए? ये तो आऊँ माणूआ री रीतिया पाँदे बोलूँआ। 6 कदी पनि। जे परमेशर अन्यायी ऊँदा तो तेस दुनिया रा न्याय कियँ करना? 7 जे मेरे चूटो री बजअ ते, परमेशरो री सच्चाई तेसरी महिमा खे जादा करी की सामणे आयी, फेर कऊँ पापिया जेडा आऊँ दण्डो जोगा ओऊँआ। 8 कुछ लोक ये बोलदे ऊए आसा पाँदे दोष लगाओ कि इने बोलेया, “आसा खे बुरे काम करने देओ ताकि कुछ पला ऊई जाओ।” जो लोक मेरे बारे रे एडिया गल्ला बोलोए से सजा पाणे जोगे ए। 9 तो फेर क्या ऊआ? क्या आसे यहूदी ओरी ते जादा खरे ए? कदी पनि। कऊँकि आसे यहूदी और यूनानी दुई पाँदे ये दोष लगाई चूके रे कि सेयो सब के सब पापो रे वशो रे ए। 10 जेडा पवित्र शास्त्रो रे लिखी राखेया, “परमेशरो री नजरा रे कोई तर्मी नि ए, एक पनि। 11 कोई समजदार नि ए, कोई बी परमेशरो खे टोलने वाला नि ए। 12 सब परमेशरो ते दूर ऊईगे रे, सब के सब नक्कमे बणी गे रे, कोई पला करने वाला नि ए, एक पनि। 13 तिना

रा गला खुली री कन्न ए, तिने ई आपणी जीबा ते छल कितेया, तिना रे ओठा रे सापो जेडा विष निकलोआ। 14 और तिना रा मूँ श्राप और कड़वाहटा ते फरे राए। 15 तिना रे पैर खून करने खे फुर्तिले ए। 16 तिना री बाटा रे नाश और क्लेश ए। 17 तिने शान्तिया री बाट नि जाणी। 18 तिना रे परमेशरो रा डर अया ई नि।” 19 आसे जाणूए कि बिधान जो कुछ बोलोआ, तिना खेई बोलोआ, जो बिधानो रे अधीन ए, ताकि लोका खे बाह्या बनाणे ते रोकणे खे हर एक मूँ बंद करेया जाओ और सारी दुनिया रे लोक परमेशरो रे सामणे दोषी ठईरो। 20 कऊँकि बिधानो रे कामो ते कोई बी लोक परमेशरो रे सामणे तर्मी नि ऊणे, कऊँकि मूसे रा बिधान आसा खे दखाओआ कि आसे सब पापी ए। 21 पर एबे मूसा रे बिधानो खे बिना माने परमेशरो री धार्मिकता प्रगट ऊई री। ये गल्ला मूसे रा बिधान और भविष्यबक्तेया री कताबा रे बऊत पईले तेई लिखी राखिया कि परमेशर आसा खे कियँ धार्मिक बणाओआ। 22 मतलब-परमेशरो री से धार्मिकता, जो प्रभु यीशु मसीह पाँदे विश्वास करने ते, सब विश्वास करने वालेया खे ए। यहूदी और दूजिया जातिया बीचे कुछ भेद नि ए। 23 कऊँकि सबी पाप करी राखेया और परमेशरो री महिमा ते दूर ऊईगे रे। 24 पर परमेशरो री कृपा ते तेस छुटकारे रे जरिए, जो यीशु मसीह रे ए, मुफतो रे तर्मी ठराए जाओए। 25 परमेशरे यीशु मसीह खे आसा री खातर बलिदान ऊणे खे पेजेया। यीशु मसीह आपणी जिन्दगिया रा बलिदान इजी खे दितेया ताकि आसे तेस पाँदे विश्वास करी की परमेशरो रे नेडे जाई सकिए। बऊत पईले परमेशरे ये दखाणे खे कितेया कि से सईन शीलता दखाणे रे और पापिया खे माफ करने रे सई था। इजी ते ये बी पता चलोआ कि परमेशर सई ए, जेबे से तिना लोका खे अपनाओआ जो यीशुए पाँदे विश्वास करोए। 27 तो क्या एडा कुछ ए जेते कि आसे कमण्ड करी सकिए? तिजी खे तो कोई जगा ई नि ए, कुण जे नियमा री बजअ ते? क्या इजी खे कि आसे बिधानो खे मानूँ? ना, बल्कि यीशु मसीह पाँदे विश्वास करने री बजअ ते। 28 इजी री खातर आसे एते नतीजे पाँदे पऊँछी रे कि माणू बिधानो रे कामो ते बिना, विश्वासो रे जरिए तर्मी बणोआ। 29 क्या परमेशर सिर्फ यहूदिया रा ईए? क्या दूजी जातिया रा नि ए? आ, दुजिया जातिया रा बीए। 30 कऊँकि परमेशर एक ईए, जेस खतने वाले विश्वासो ते और बिना खतने वाले बी विश्वासो ते तर्मी ठराणे। 31 तो क्या आसे बिधानो खे विश्वासो रे जरिए बेकार ठराऊँ? कदी पनि, बल्कि बिधानो खे स्थिर करूँए।

4 एबे आसे आपणे पुर्वज अब्राहमो रे बारे क्या बोलिये? क्या तिना खे शरीरो री नजरा ते कुछ मिलेया या कृपा ते मिलेया? 2 जे अब्राहम अच्छे कामो ते तर्मी ठराया जांदा, तो से आपू पाँदे कमण्ड करी सको था। पर से आपणे अच्छे कामा खे परमेशरो रे नेडे कमण्ड नि करी सकदा। 3 पवित्र शास्त्र क्या बोलोआ? “अब्राहमे परमेशरो पाँदे विश्वास कितेया और ये तेसखे धार्मिकता गिणी गयी।” 4 काम करने वालेया री मजदूरी देणा दान नि ए, पर अक्क समजेया जाओआ। 5 से माणू जो परमेशरो खे खुश करने खे बिधानो खे नि मानदा, बल्कि परमेशरो रे जो भक्तिहिनो खे तर्मी बणाओआ तिदे विश्वास करोआ, तो तेसरा ये विश्वास तेसखे धार्मिकता गिणेया जाओआ। 6 जेसखे परमेशर बिना कामो ते मतलब बिना बिधान माने तर्मी ठराओआ, तेसखे दाऊद बी धन्य बोलोआ। 7 “धन्य ए सेयो जिना रे बुरे काम माफ ऊए, और जिना रे पाप पुलाईते। 8 धन्य ए से माणू जेसरे पापो रा लेखा प्रभु ए कदी नि लणा।” 9 क्या ये धन्य वचन सिर्फ खतना वाले यहूदिया खे ईए या बिना खतना वाले दुजिया जातिया खे बीए? आसा रा मानणा ए, “अब्राहमो खे तेसरा विश्वास धार्मिकता गिणेया गया।” 10 तो तेसरी धार्मिकता कियँ गिणी गई? खतने री दशा रे या बिना खतने री दशा रे? खतने री दशा रे नि, बल्कि बिना खतने री दशा रे। 11 बिना खतने ते रंदे बखते तिना खे विश्वासो रे जरिए जो धार्मिकता मिली, तिजी पाँदे मुहरा साई खतने रा चिह्न लगाया। ईयाँ अब्राहम तिना सबी रा बी पिता बणेया, जो बिना खतने री दशा रे विश्वास करोए, जेते कि तिना रा बी विश्वास तिना खे

धार्मिकता मानेया जाओ 12 अब्राहम तिना खतने वालेया रे बी पिता बणे, जो ना सिर्फ खतने पाँदे निर्भर रओए, पर आसा रे पिता अब्राहमो रे तेस विश्वासो पाँदे चलोए, जो तिने बिना खतने री दशा रे कितेया था। 13 परमेशरे अब्राहम और तेसरे वंशो ते वादा कितेया था कि की सेयो दुनिया रे बारस ऊणे। ये इजी खे नि ऊआ कि अब्राहमे बिधान मानेया, बल्कि इजी खे ऊआ कि तिने परमेशरो पाँदे विश्वास कितेया और परमेशरे सेयो तर्मा माने। 14 जे अब्राहम और तेसरे वंशो खे बिधानो खे मानणे ते वादा मिलेया तो विश्वास बेकार और निष्फल साबित ऊआ। 15 बिधानो खे नि मानणा रोष पैदा करोई और जेती बिधान निए, तेती तिजी रा ऊल्लंघन पनिए। 16 ये वादा परमेशरो रे विश्वासो पाँदे निर्भर ए, ताकि परमेशरो रा वादा तिना री कृपा रे जरिए पक्का ऊई जाओ। ये वादा सिर्फ अब्राहमो रे वंशो खे निए जिना गे बिधान ए। बल्कि तिना खे बीए, जो अब्राहमो जेडे विश्वासो वाले बी ए, सेई तो आसा सबी रा पिता ए। 17 जेडा पवित्र शास्त्रो रे लिखी राखेया, “मैं तू बऊत सारी जातिया रा पिता ठराई राखेया।” आसा रे पुर्वज अब्राहमे तेस ई परमेशरो पाँदे विश्वास कितेया और जो मरे रेया खे जिऊँदा करोआ और जो गल्ला आईया ई नि, तिना रा नाओ एडा लओआ, कि मानो सेयो आईया। 18 तिने निराशा रे बी उम्मीद राखी की विश्वास कितेया, इजी री खातर कि तेस वचनो रे मुताबिक ओ कि, “तेरा वंश एडा ऊणा” कि से बऊत सारी जातिया रा पिता ऊणा। 19 और से जो एक सो साला रा था आपणे मरे रे जे शरीर और सारा रे गर्भो री मरी री जी दशा जाणी की बी विश्वासो रे मजबूत बणेया रा रया। 20 ना ई अविश्वासी ऊई कि परमेशरो रे वादे पाँदे शक कितेया, पर विश्वासो रे मजबूत रई कि परमेशरो री महिमा किती। 21 और निश्चा कितेया कि जेसा गल्ला रा परमेशरे वादा करी राखेया, से तेसा खे पूरी करने रे बी सामर्थी ए। 22 तेसरे विश्वासो री बजअ ते ये तेसखे धार्मिकता गिणेया गया। 23 और ये वचन कि विश्वास तेसखे धार्मिकता गिणेया गया, ना बस तेसखे लिखेया गया 24 बल्कि आसा खे बी, जिना खे विश्वास धार्मिकता गिणेया जाणा, मतलब आसा खे जो परमेशरो पाँदे विश्वास करोए, जिने आसा रे प्रभु यीशुए खे मरे रेया बीचा ते जिऊँदा कितेया। तो आसे बी तेस विश्वासो री बजअ ते तर्मा माने जाणे। 25 यीशु मसीह आसा रे बुरे कामो री खातर मौता री सजा खे पकड़वाया गया और आसा खे तर्मा ठराणे खे जिऊँदा बी कितेया।

5 जेबे आसे विश्वासो रे जरिए तर्मा ठईरे, तो आपणे प्रभु यीशु मसीह रे जरिए जो तिने आसा खे करी राखेया परमेशरो साथे मेल राखिए। 2 मसीह रे जरिए विश्वासो री बजअ ते आसा री पऊँछ तेसा कृपा तक ऊई री, जिदे आसे एबे बणे रे। आसे एसा गल्ला पाँदे कमण्ड करूँए कि आसा खे परमेशरो री महिमा रे इस्सेदार बणने री उम्मीद ए। 3 बस येई नि, बल्कि आसा खे क्लेशो पाँदे बी कमण्ड करना चाईयो, ये जाणी की कि क्लेशो ते सब्र 4 और सब्रो ते खरा निकलना और खरे निकलने ते उम्मीद जागोई 5 और उम्मीदा ते शर्म नि ऊँदी, कऊँकि पवित्र आत्मा, जो परमेशरे आसा खे देई राखेया तिजी रे जरिए परमेशरो रा प्यार आसा रे मनो रे पाई राखेया। 6 कऊँकि जेबे आसे कमजोर ई थे, तेबे मसीह ठीक बखतो पाँदे भक्तिहीना री खातर मरेया। 7 केसी तर्मा जणे खे कोई मरो, ये तो मुश्किल ए। फेर बी ऊई सकोआ कि केसी खरे माँगूए री खातर कोई मरने खे त्यार ऊई जाओ। 8 पर जेबे आसे पापी ई थे, तेबुई मसीह आसा री खातर मरेया। इजी ते परमेशरे आसा रिया तई आपणे प्यारो रा सबूत दितेया। 9 जे आसे मसीह रे खूनो रे जरिए तर्मा ठराई राखे, तो आसे पक्का ई मसीह रे जरिए परमेशरो रे रोषो ते बची जाणे। 10 जेबे आसे परमेशरो रे बैरी ई थे तो तेसरे पुत्रो री मौत ऊणे रे जरिए आसा रा मेल परमेशरो साथे ऊआ, तेबे मेल ऊई जाणे पाँदे, तेसरे जीवनी री बजअ ते आसा उद्धार कऊँ नि पाणा? 11 और बस येई नि, पर एबे तो आसा रे प्रभु यीशु मसीह रे जरिए परमेशरो ते मेल ऊईगा रा इजी खे आसे परमेशरो रे खुश ए। 12 तेबेई जेडा एक माँगू आदमो रे जरिए पाप दुनिया रे आया और पापो रे जरिए मृत्यु आयी और ईयाँ ई मृत्यु सबी माँगूआ रे फैली गी, कऊँकि सबी पाप करी राखेया। 13 मूसे रा बिधान

आऊणे ते पईले ई दुनिया रे पाप था। पर जेती बिधान निए, तेती पाप नि गिणेया जादा। 14 तेबे बी आदमो ते लयी कि मूसे तक मौते तिना लोका पाँदे बी राज कितेया, जिने आदमो जेडा आज्ञा तोड़ने रे जरिए पाप नि कितेया। आदम तेस माँगूए रा चिह्न था जो आऊणे वाला था। 15 पर आदमो रे पाप और परमेशरो री दया ते परी री कृपा रे बऊत बड़ा फर्क ए। कऊँकि जेबे एक माँगूए रे पापो री बजअ ते बऊत सारे माँगू मरे। तियाँ ई परमेशरो री कृपा और धार्मिकता रा तोफा जो तिने आसा खे यीशु मसीह रे जरिए दितेया बऊत सारे लोका रा पाप माफ करने खे बऊत बड़ा दान ए। 16 परमेशरो रा दितेया रा तोफा आदमो रे पापो जेडा निए। कऊँकि एक ई अपराध मौता री सजा लयी की आया। पर बऊत सारे अपराधा ते बाद परमेशरे जो बरदान दितेया तिजी रे जरिए पापो खे माफ करी की आपणी नजरा रे तर्मा बणाईते। 17 कऊँकि जेबे एक माँगूए रे पापो री बजअ ते मौते तेस एक ई री बजअ ते सारे लोका पाँदे राज कितेया, तो जेबे सेयो लोक कृपा और धर्मरूपी बरदान बऊत जणेया ते पाओ ए, सेयो एक माँगूए ते, मतलब प्रभु यीशु मसीह रे जरिए तिना पक्का अनन्त जीवनी रा राज करना। 18 तेबे जेडा एक पाप सबी माँगूआ खे मौता री सजा री बजअ ऊआ, तेडा ई एक तर्मा रा काम बी सबी माँगूआ रे जीवनी खे तर्मा ठराणे री बजअ ऊआ। 19 कऊँकि जेडा एक माँगूए री आज्ञा ना मानणे ते बऊत लोक पापी ठईरे तियाँ ई एक माँगूए री आज्ञा मानणे ते बऊत लोक तर्मा ठईरने। 20 बादो ते मूसे रा बिधान दितेया ताकि लोक एडा समजी सको कि से कितणा पापी ए। पर जेती पाप बऊत ऊआ, तेती कृपा तिजी ते बी केथी जादा ऊई। 21 ताकि जेडा पापो मौत फैलादे ऊए सारे लोका पाँदे राज कितेया, तेडा ई आसा रे प्रभु यीशु मसीह रे जरिए परमेशरो री कृपा तिना खे धार्मिक बणाओई और अनन्त जीवन देओई। (aiōnios g166)

6 परमेशर आपणी कृपा ते आसा रे पापो खे माफ करोआ। तो आसे क्या बोलूँ? क्या आसे पाप करदे रईए, ताकि कृपा बऊत ओ? 2 कदी पनि, आसे जेबे पापो खे मरी गे तो आगो खे तिदे कियाँ जीवन बिताईये? 3 आसे जाणूए कि आसे जितणेया बी प्रभु यीशु मसीह रा बपतिस्मा लया, तो तेसरी मौता रा बपतिस्मा लया। 4 इजी खे जेबे आसे बपतिस्मा लया तो आसे यीशु मसीह साथे मारे गये और गाड़े गये। ताकि जियाँ मसीह पिता परमेशरो री महिमा रे जरिए मरे रेया बीचा ते जिऊँदा कितेया, तियाँ ई आसे बी नये जीवनी री जी चाल चलिए। 5 कऊँकि जे आसे तेसरी मौता री समानता रे तेस साथे जुड़ी गे रे, तो पक्का ई तेसरे जिऊँदे ऊणे री समानता रे बी तेस साथे जुड़ी जाणे। 6 आसे जाणूए कि आसा रा पुराणा जीवन यीशु मसीह साथे कूसो पाँदे चढ़ाईता रा ताकि पापो रा शरीर बेकार ऊई जाओ और आसे आगे खे पापो रे दास नि रऊँ। 7 जेबे आसे यीशु मसीह साथे मरी गे तो पापो रे वशो ते छूटी गे। 8 तेबे जे आसे मसीह साथे मरी गे, तो आसा रा विश्वास ये कि तेस साथे जिऊँदे बी ऊई जाणे। 9 आसे ये जाणूए कि मसीह मरे रेया बीचा ते जिऊँदा ऊई की फेर मरना नि। तेस पाँदे फेर मौत नि आऊणी। 10 जेबे मसीह मरी गा, तो पापो खे एक ई बार मरी गा, पर एबे जो जिऊँदा ए, तो परमेशरो री खातर जिऊँदा ए। 11 ईयाँ ई तुसे बी आपणे आपू खे पापो खे मरे रा, पर परमेशरो री खातर यीशु मसीह रे जिऊँदा समजो। 12 इजी खे पापी इच्छा तुसा रे नाश ऊणे वाले शरीरो रे राज्य नि करो ताकि तुसे तेसरी इच्छा रे अधीन रओ। 13 और ना आपणे शरीरो रे अंगा खे अधर्मो रा अधियार ऊणे खे पापो खे सम्बालो, पर आपणे आपू खे मरे रेया बीचा ते जी उठे रा जाणी की आपणी जिन्दगी परमेशरो गे सम्बालो और आपणे शरीरो रे अंगा खे तर्मा रा अधियार ऊणे खे आपणी पूरी जिन्दगी परमेशरो गे सम्बाली देओ। 14 तेबे तुसा लोका पाँदे पापो रा कोई अक्क नि रणा। कऊँकि तुसे एबे बिधानो रे साअरे नि जिऊँदे बल्कि परमेशरो री कृपा रे साअरे जिओ ए। 15 तो क्या ऊआ? क्या आसे इजी री खातर पाप करिए कि आसे बिधानो रे अधीन निए, बल्कि कृपा रे अधीन ए? कदी पनि। 16 तुसे जाणोए कि जेबे केसी री आज्ञा मानणे खे तुसे आपणे आपू खे देई देओए और तेसरी आज्ञा

खे मानोए तेबे तुसे तेसरे गुलाम बणी जाओए। ये गुलामी चाए पापो री ओ जेतेरा नतीजा मौत ए, चाए परमेशरो री ओ जेतेरी आज्ञा मानणे रा नतीजा धार्मिकता ए। 17 पर परमेशरो रा धन्यवाद ओ कि तुसे जो पापो रे दास थे, एबे मनो ते तेस उपदेशो खे मानणे वाले ऊईगे, जेतेरे सखाए रे तुसे चले। 18 परमेशरो रे जरिए पापो ते छुड़ाई की तर्मा रे दास ऊईगे। 19 आऊँ तुसा री शरीरो री कमजोरिया री बजअ ते माणुआ री रीतिया पाँदे बोलुँआ। जियाँ तुसे आपणे शरीरो रे अंग अशुद्ध और कुकर्मो रे दास करी की सम्बालेया था। तियाँ ई एबे आपणे शरीरो रे अंग पवित्रता खे तर्मा रे दास करी की सम्बाली देओ। 20 जेबे तुसे पापो रे दास थे, तेबे तर्मा री तरफा ते आजाद थे। 21 तुसे बुरे काम कित्ते और एबे तुसे तिना गल्ला ते शर्मिदा ओए। तिना सारे बुरे कामा ते तुसा खे क्या फायदा ऊआ? कऊँकि तिना रा अंत तो मौत ए। 22 पर एबे पापो ते आजाद ऊई की परमेशरो रे दास बणी की तुसा खे से फल मिलेया, जेते कि पवित्रता मिलोई और तिजी रा अंत अनन्त जीवन ए। (aiōnios g166) 23 कऊँकि पापो री मजदूरी तो मौत ए, पर परमेशरो रा बरदान आसा रे प्रभु यीशु मसीह रे अनन्त जीवन ए। (aiōnios g166)

7 ओ साथी विश्वासियो! आऊँ बिधानो खे जाणने वालेया खे बोलुँआ, क्या तुसे नि जाणदे कि जदुओ तक माणु जिऊँदा रओआ, तदुओ तक ई तिना खे बिधान मानणा पड़ोआ? 2 ब्यायी री जवाणस बिधानो रे मुताबिक आपणे लाड़े रे जिऊँदे जिऊए, तेस साथे बंदी री रओई। पर जे लाड़ा मरी जाओ, तो से लाड़े रा बिधानो ते जो तेसा खे तेसते बानी की राखोई छूटी जाओई। 3 जे से आपणे लाड़े रे जिऊँदे जिऊए केसी ओरी मर्दो साथे रिस्ता बणाई लओ, तो तेसा खे व्याभिचारिणी बोलोए। पर जे लाड़ा मरी जाओ, तो से तेसा बिधानो ते छूटी गी, एथो तक कि से केसी ओरी मर्दो साथे ब्या करी लओगी, तो तेबे व्याभिचारिणी नि ऊणी। 4 तो ओ साथी विश्वासियो! जेबे तुसे मसीह साथे मरी गे तो तुसे बिधानो खे मरी गे। पर एबे तुसे मसीह रे मतलब जो मरे रेया बीचा ते जिऊँदा ऊईगा बणी गे रे, ताकि आसे परमेशरो खे फल ल्याऊँ। 5 जेबे आसे पापी शरीरो रे वशो रे थे, तो पापो री इच्छा, जो बिधानो ते थी, मौता रा फल पैदा करने खे, आसा रे अंगा रे काम करो थी। 6 पर आसे बिधानो खे मरी गे जेसरे बंदनो रे आसे पईले बंदी रे थे, एबे आसे बिधानो ते छूटी गे। ईयाँ आसे पुराणी लिखी रा बिधानो रे मुताबिक नि, बल्कि पवित्र आत्मा रे मुताबिक नईया रीतिया ते परमेशरो री सेवा करुँए। 7 तो आसे क्या बोलुँ? क्या बिधान पाप ए? कदी पनि, बल्कि बिना बिधानो ते आऊँ पापो खे नि पछयाणदा। जे बिधान नि बोलदा, “लालच नि कर,” तो आऊँ ये नि जाणदा कि लालच क्या ए। 8 पर पापे मौका पाई की आज्ञा रे जरिए माँदे सब किन्सा रा लालच पैदा कितेया। कऊँकि बिना बिधानो ते पाप मुड़दा ए। 9 एक बखत था जेबे आऊँ बिधानो खे नि जाणू था और आऊँ जिऊँदा था। पर जेबे मैं आज्ञा खे जाणेया तेबे मेरे पितरे पाप करने री इच्छा जागी और आऊँ परमेशरो ते दूर ऊईगा। 10 सेई आज्ञा, जो जिन्दगी देणे खे थी, माखे मौता री बजअ ऊई। 11 कऊँकि पापे मौका पाई की आज्ञा रे जरिए आऊँ बईकाया, और तिजी साथे आऊँ कायी बी दितेया। 12 ईयाँ आसे देखुँए कि बिधान पवित्र ए और तिजी री आज्ञा पवित्र ए, ठीक ए और खरी ए। 13 तो क्या बिधान जो अच्छा था, माखे मौत ऊई? कदी पनि। बल्कि पाप तेसा खरी चीजे की माखे मौत पैदा करने वाला ऊआ ताकि तेसरा पाप सामणे आओ, और आज्ञा रे जरिए पाप बऊत जादा पापमय ठईरो। 14 आसे जाणुँए कि बिधान तो आत्मिक ए। पर आऊँ सिर्फ एक माणु ए और शरीर और पापो री गुलामिया रे पुरिया तरअ ते बिकी रा। 15 और जो आऊँ करुँआ, से नि जाणदा, कऊँकि जो आऊँ चाऊँआ, से नि करदा, पर जेतेते माखे नफरत ओई, सेई करुँआ। 16 जे, जो आऊँ चाँअदा नि, सेई करुँआ, तो आऊँ मानी लऊँआ कि बिधान खरा ए। 17 तो एड़ी दशा रे तेसा खे करने वाला आऊँ निए, बल्कि पाप ए, जो माँदे बसी रा। 18 कऊँकि आऊँ जाणूआ कि माँदे मतलब मेरे पापी शरीरो रे कोई खरी चीज वास नि करदी। पले काम करने री इच्छा तो माँदे आयी, पर खरे काम माँते

नि ऊँदे। 19 कऊँकि जेस खरे कामो री इच्छा आऊँ करुँआ, पर करी नि सकदा, पर जेसा बुराईया री इच्छा नि करदा, सेई करुँआ। 20 पर जे आऊँ सेई करुँआ, जेतेरी इच्छा नि करदा, तो से करने वाला आऊँ नि रया, पर पाप, जो माँदे बसी रा। 21 ईयाँ मेरा अनुभव ये कि जेबे आऊँ खरा करने री इच्छा करुँआ, तो माँते बुरा काम ई ऊई जाओआ। 22 आऊँ दिलो ते तो परमेशरो रा बिधानो ते बऊत खुश रऊँआ, 23 पर माखे आपणे शरीरो रे अंगा रे दूजा ई बिधान दिखोई, जो मेरी अक्ला रा बिधानो ते लड़ोई और माखे पापो रा बिधानो रे बंदनो रे पाई देओई, जो मेरे शरीरो रे अंगा रे ए। 24 आऊँ केडा बदनसीब माणु ए। आऊँ एस शरीरो ते जो मौत लयी की आओई केस छुड़ाणा? 25 आऊँ परमेशरो रा धन्यवाद करुँआ जिने माखे प्रभु यीशु मसीह रे जरिए उद्धार दितेया। ईयाँ तो आऊँ आपणी अक्ला ते परमेशरो रे बिधानो राए, पर शरीरो ते पापो रे बिधानो रा इस्तेमाल करुँआ।

8 तो एबे जो यीशु मसीह रे ए, तिना पाँदे दण्डो री आज्ञा निए। कऊँकि सेयो शरीरो रे मुताबिक नि, पर आत्मा रे मुताबिक चलोए। 2 पवित्र आत्मा तुसा खे जिन्दगी देणी जो यीशु मसीह ते आओई। तेसा तुसे पाप और मौता ते आजाद करी देणे। 3 कऊँकि जो काम मूसे रा बिधान आसा रे पापी शरीरो रे सबाओ री बजअ ते कमजोर ऊई की नि करी सकी। से काम परमेशरे कितेया। मतलब आपणे ई पुत्रो खे आसा जेडा पापी शरीरो री समानता रे और आसा रे पापो री खातर बलिदान ऊणे खे पेजी की परमेशरे मसीह रे शरीरो रे पापो पाँदे दण्डो री आज्ञा दित्ती। 4 कऊँकि बिधानो री बिधिया री इच्छा आसा रे पापी शरीरो रे सबाओ रे मुताबिक नि, बल्कि पवित्र आत्मा रे मुताबिक चलोँ, पूरी करी जाओ। 5 कऊँकि शारीरिक माणु शरीरो री गल्ला रे मन लगाओए, पर आध्यात्मिक पवित्र आत्मा री गल्ला पाँदे मन लगाओए। 6 शरीरो रे मन लगाणा तो मौत ए, पर आत्मा रे मन लगाणा जिन्दगी और शान्ति ए। 7 कऊँकि शरीरो रे पापी सबाओ पाँदे मन लगाणा तो परमेशरो साथे बैर राखणा ए। कऊँकि ना तो पापी सबाओ परमेशरो रा बिधानो रे अधीन ए और ना ई ऊई सकोआ। 8 और जो लोक पापमय शारीरिक दशा रे, सेयो परमेशरो खे खुश नि करी सकदे। 9 पर जबकि पवित्र आत्मा तुसा रे बसोआ, तो तुसे पापी शरीरो रे सबाओ री दशा रे निए, बल्कि आत्मिक दशा रे। जे केसी रे पवित्र आत्मा निए, तो से तेसरा जन निया। 10 और जे मसीह तुसा रे ए, तो शरीर पापो री बजअ ते मरे राए, पर आत्मा तर्मा री बजअ ते जिऊँदी ए। 11 और जे परमेशरो रा आत्मा, जिने प्रभु यीशु मरे रेया बीचा ते जिऊँदा कितेया, तुसा रे बसी रा, तो जिने मसीह मरे रेया बीचा ते जिऊँदा कितेया, से तुसा रे मरे रे शरीरो खे बी आपणे आत्मे की, जो तुसा रे बसी री, जिऊँदा करोगा। 12 तो ओ साथी विश्वासियो, आसे शरीरो रे कर्जदार निए कि शरीरो रे मुताबिक दिन काटिए। 13 कऊँकि जे तुसे शरीरो रे मुताबिक दिन काटोगे, तो मरने, जे पवित्र आत्मा ते शरीरो रे पापी सबाओ रे कामो खे मारोगे, तो जिऊँदे रणे। 14 कऊँकि जितणे लोक परमेशरो री आत्मा रे मुताबिक चलोए, सेयो ई परमेशरो रे पुत्र ए। 15 कऊँकि तुसा लोका खे गुलामिया री आत्मा नि मिली जेते कि फेर डरने लगे। बल्कि परमेशरो रा आत्मा मिली रा जेबे तिने तुसे आपणे गोदी पुत्रो रे रूपो रे अपनाए। एबे आसे तिना खे “ओ अब्बा, ओ पिता” करी की बुलाऊँए। 16 पवित्र आत्मा आपू ई आसा री आत्मा साथे गवाई देओआ कि आसे परमेशरो री लवाद ए। 17 और जे आसे लवाद ए, तो बारस बीए, बल्कि परमेशरो रे बारस और मसीह साथले बारस ए। सिर्फ एक शर्त ए कि आसे मसीह साथे दुः ख उठाऊँए कि आसे तेस साथे महिमा बी पाऊँ। 18 आऊँ समजूआ कि एस बखतो रे दुः ख और क्लेश, तेसा महिमा रे सामणे, जो आसा पाँदे प्रगत ऊणे वाली ए, कुछ पनिए। 19 कऊँकि सृष्टि बड़ी उम्मीदा साथे परमेशरो री लवादा रे प्रगत ऊणे री बाट न्यालने लगी री। 20 कऊँकि परमेशरे जो कुछ बी बणाया तिने सबी चीजे आपणी अहमियत खोई ती, इने सबी चीजे आपणी अहमियत आपणी इच्छा ते नि खोई बल्कि परमेशरे आपू एडा कितेया। पर एक उम्मीद ए 21 कि सृष्टि आपू ई नाशो रे बंदनो ते

छुटकारा पाई कि, परमेशरो री ल्वादा री महिमा री आजादिया खे प्राप्त ओ। 22 कऊँकि आसे जाणूँ कि सारी सृष्टि एबुए तक जदुओ ते आदमे पाप करी राखेया मिली की करलाओई और पीड़ा रे पडी की तड़फोई। 23 और बस सृष्टि ई नि पर आसे बी पितरे ई पितरे करलाऊँए। आसा खे तो पवित्र आत्मा मिली चुकी रा जो परमेशरो री दया रे दानो रा पईला फल ए। आसे बी बडी उम्मीदा साथे गोदीपुत्र उणे री, मतलब-आपणे शरीरो रे छुटकारे री बाट न्याल्द रेऊँए। 24 आसा खे उम्मीदा रे जरिए ई उद्धार मिली रा। पर जेते चीजा री उम्मीद ओई, जेबे से देखणे खे मिलो, तो फेर तिजी री उम्मीद नि करी जांदी। कऊँकि जेसा चीजा खे कोई देखणे लगी रा, तो तिजी री उम्मीद कऊँ करनी? 25 पर जेसा चीजा खे आसे देखदे नि, जे तिजी री उम्मीद राखूँ, तो सब्रो साथे तेसा खे नयालू बी ए। 26 ईयाँ ई पवित्र आत्मा बी आसा री मताद करोआ जेबे परमेशरो पाँदे आसा रा विश्वास कमजोर ओआ। कऊँकि आसे नि जाणदे कि प्रार्थना कियॉँ करनी चाईयो। पर पवित्र आत्मा आपू ई एडिया आहें परी-परी की, जो बखाण नि करी सकदे, आसा खे बिनती करोआ। 27 परमेशर जो आसा रे मनो खे परखणे वाला ए, ये जाणोआ कि पवित्र आत्मा रा मकसद क्या ए। कऊँकि से पवित्र लोका खे परमेशरो री इच्छा रे मुताबिक बिनती करोआ। 28 आसे जाणूँ कि जो लोक परमेशरो खे प्यार करीए, तिना खे सब गल्ला मिली की पलाई पैदा करोईया, मतलब तिना खेई, जो तेसरी इच्छा रे मुताबिक बुलाई राखे। 29 कऊँकि जो परमेशरे पईले तेई चुणी लये रे, सेयो पईले तेई ठराई बी राखे कि तेसरे पुत्रो जेडे ओ, ताकि से सारे बच्चेया बीचे जेठा ओ। 30 फेर जो परमेशरे पईले ते चुणी राखे, सेयो बुलाए बी और जो बुलाए, सेयो तर्मी बी ठराई राखे और जो तर्मी ठराए, तिना खे महिमा बी देई राखी। 31 इना सबी गल्ला खे त्यानो रे राखदे ऊए आसे एते नतीजे पाँदे पऊँछुए कि जे परमेशर आसा री तरफा खे आया, तो आसा रा बिरोदी कुण ऊई सकोआ? 32 परमेशरे जिने आपणा एकलौता पुत्र पनि राखी छाडेया, पर आसा पाँदे कृपा करी की से आसा सबी खे देईता। तो इतणा देणे ते बाद, तेस आसा खे आपणे पुत्रो साथे सब कुछ कऊँ नि देणा? 33 परमेशरो रे चुणे रेया पाँदे दोष केस लगाणा? परमेशर ईए जो, तिना खे तर्मी ठराणे वाला ए। 34 आसा पाँदे कुण दोष लगाई सकोआ? कोई बी नि। कऊँकि से यीशु मसीह ईए जिने आपणा प्राण आसा रिया तई देईता और तिजी ते बाद मुडेदेया बीचा ते जिऊँदा बी ऊईगा और परमेशरो रे दॉणे कनारे ए और आसा री खातर बिनती बी करोआ। 35 कुण आसा खे मसीह रे प्यारो ते लग करी सकोआ? क्या क्लेश, संकट, उपद्रव, अकाल, नांगापण, खतरा या तलवार? 36 जेडा कि पवित्र शास्त्रो रे लिखी राखेया, “ताखे आसे पुरे दिन घात करे जाऊँए, आसे फाटणे वाली पेडा जेडे गिणी राखे।” 37 पर इना सबी गल्ला रे आसे तेसरे जरिए, जिने आसा खे प्यार कित्तेया, आसा गे उम्मीदा ते बी बढी की जीत ए। 38 कऊँकि माखे पक्का पता ए कि आसा खे परमेशरो रे प्यारो ते, जो आसा रे प्रभु यीशु मसीह रे ए, कोई बी लग नि करी सकदा। ना मृत्यु, ना जीवन, ना स्वर्गदूत, ना दुष्टात्मा, ना वर्तमान, ना भविष्य, ना सामर्थ, ना ऊच्चा, ना डूगा और ना ई कोई सृष्टि।

9 आऊँ मसीह रे सच बोलूँआ, चूठ नि बोलदा और मेरा विवेक बी पवित्र आत्मा रे गवाई देओआ 2 कि माखे बरूत दुः ख ए और मेरा मन मेरे लोका री खातर दुः खदा रओआ। 3 कऊँकि आऊँ एथो तक चाऊँ था कि आपणे यहूदी पाईया खे, जो शरीरो ते मेरे टब्बरो रे ए, आपू ई मसीह ते श्रापित और लग ऊई जांदा। 4 सेयो बी मां ई जेडे इस्राएली लोक ए। सेयो लोक बी परमेशरो रे चुणे रे गोदीपुत्र ए। परमेशरे आपणी महिमा तिना लोका पाँदे प्रकट कित्ती। तिने तिना लोका साथे वाचा बानी और आपणा बिधान दित्तेया। परमेशरो तिना लोका खे आपणी भक्ति करने खे और आपणा नौखा वादा पाणे खे खास अक्क दित्तेया। 5 मशुर पूर्वज बी तिना रेईए और मसीह बी शरीरो रे भावो ते तिना ई बीचा ते ऊआ। से परमेशर ए जो सबी पाँदे राज करोआ तेसरी तारीफ जुगो-जुगो ऊँदी रओ। आमीन्। (aiōn g165) 6 फेर बी

ये नि समजणा चाईयो कि परमेशर आपणा बादा निबाणे रे असफल ऊईगा रा। कऊँकि इस्राएलो रे वंशो रे जन्म लणे वाले सब लोक सच्चे इस्राएली नि। 7 अब्राहमो रे वंशो रे जन्म लणे तेई सब परमेशरो री सच्ची ल्वादा नि बणी जांदे। कऊँकि परमेशरे अब्राहमो खे बोलेया, “जिना इसहाको रे वंशो ते जन्म लणा सेयो ई तेरे वंशो रे माने जाणे।” 8 इजी रा मतलब ये ए कि शरीरो ते जम्मे रे परमेशरो री ल्वादा नि, पर वादे रे जरिए जम्मे रेई अब्राहमो रे असली वंश गिणे जाओए। 9 कऊँकि वादे रा वचन ये ए, “आगले साल एस बखते मां फेर आऊणा और सारा रे एक पुत्र ऊणा।” 10 और बस येई नि, पर जेबे रिबका रे गर्भो रे एकी मर्द मतलब आसा रे पुर्वज इसहाको ते जुडुवा बच्चे थे। 11 और एबुए तक ना बालक जमी रे थे और ना तिने कुछ पला या बुरा कित्तेया रा था कऊँकि परमेशरो री इच्छा, जो तेसरे चुणे रे मुताबिक ए, कर्मो री बजअ ते नि, पर बुलाणे वालेया री बजअ ते बणी रओ। 12 तिने बोलेया, “जेठा छोटे रा दास ऊणा।” 13 जेडा पवित्रो शास्त्रो रे लिखी राखेया, “मैं याकूबो खे प्यार कित्तेया, पर एसाव अप्रिय जाणेया।” 14 तो आसे क्या बोलूँ? क्या परमेशरो रे कअरे अन्याय ए? कदी पनि। 15 कऊँकि परमेशरे मूसे खे बोलोआ, “आऊँ जेस केसी पाँदे बी दया करना चाऊँ, तेस पाँदे दया कऊँआ, और जेस केसी पाँदे कृपा करना चाऊँ, तेस पाँदे ई कृपा कऊँआ।” 16 इजी खे ये माणूँआ री इच्छा या तेसरी मईणती पाँदे निर्भर नि करदे, बल्कि दया करने वाले परमेशरो पाँदे निर्भर रओए और जेसखे से चुणना चाओआ तेस पाँदे दया करोआ। 17 कऊँकि पवित्र शास्त्रो रे मिस्रो रे राजा फिरौनो खे बोलेया था, “मैं तूँ इजी खे राजा बणाया ताकि आऊँ तांदि आपणी सामर्थ दखाऊँ और मेरे नाओं रा प्रचार सारी तरतिया रे ओ।” 18 तो परमेशर जेस पाँदे चाओआ, तेस पाँदे दया करोआ और जेसखे चाओआ, तेसखे हठी बणाई देओआ। 19 तेबे कुछ लोका माखे बोलणा, “जे एडा ए तो परमेशरो कियॉँ आसा खे दोषी ठराई सकोआ? कऊँकि कोई बी तिना खे रोकी नि सकदा जो से करना चाओआ।” 20 ओ पाई! पला तूँ कुण ए, जो परमेशरो ते बईस करी करोआ? क्या कअडी री चीज, कअडणे वालेया खे बोली सकोई कि तैं आऊँ एडी कऊँ बणाई राखी? 21 क्या कम्मारो खे माट्टिया पाँदे अक्क नि ए कि एक ई चाको पाँदो ते, एक पांडा खास कामो रे इस्तेमालो खे और दूजा हर रोज इस्तेमाल करने खे बणाओ? 22 हालाँकि परमेशरो खे आपणा रोष और आपणी सामर्थ प्रगट करने रा अक्क ए, फेर बी से तिना लोका साथे बरूत ई सब्र राखोआ, जिना पाँदे तिना रा रोष आओआ और जो विनाशो खे त्यार कित्ते थे। 23 तिने एडा इजी खे कित्तेया कि दया रे तिना पांडेया पाँदे आपणी महिमा री शान प्रकट करना चाओ था जो तिने पईले तेई तेसा महिमा खे त्यार कित्ते। 24 मतलब आसा पाँदे जिने तिने ना बस यहूदिया बीचा ते, बल्कि दूजी जातिया बीचा ते बी बुलाया। 25 जेडा परमेशर होशे भविष्यवक्ता री कताबा रे बी दुजिया जातिया रे बारे रे बोलोआ, “जो मेरी प्रजा नि थी, तिना खे मां आपणी प्रजा बोलणा और जो प्यारी नि थी, तिना खे प्यारा बोलूँगा।” 26 और, “एडा ऊणा कि जेते जगा रे तिना खे एडा बोलेया था कि ‘तुसे मेरी प्रजा नि ए,’ तेते जगा रे सेयो ‘जिऊँदे परमेशरो री ल्वादा ऊणे।’” 27 और यशायाह भविष्यवक्ता इस्राएली लोका रे बारे रे आक्का पाई की बोलोआ, “चाए इस्राएलिया रे ल्वादा री गिणती समुद्रो रे बालूए रे बराबर ओ, तेबे बी तिना बीचा ते थोडे ई बचणे। 28 कऊँकि प्रभुए आपणा वचन तरतिया रे पूरा करी की धार्मिकता ते चट ई तरतिया रे लोका रा न्याय करना।” 29 जेडा यशायाह भविष्यवक्ते पईले बी बोलेया था, “जे सेनाओं रा प्रभु, आसा खे कोई वंश नि छोडत, तो आसे सदोमो जेडे ऊई जाणे थे और गमोरा जेडे ठईरे थे।” 30 तो आसे क्या बोलूँ? ये कि दूजी जाति, जो तर्मां खे नि टोलो थे, तिना खे धार्मिकता मिली, मतलब तेसा धार्मिकता खे जो विश्वासो ते ए। 31 पर इस्राएली लोक जो तर्मां रे बिधानो खे टोलदे ऊए, तर्मां बणने रे सफल नि ऊए। 32 किजी खे? इजी री खातर कि सेयो विश्वासो ते नि, पर मानो अच्छे कामा ते तेसखे टोलोए, तिने तेस ठोकरा रे पात्थरो पाँदे ठोकर खाई। 33 जेडा पवित्र शास्त्रो रे लिखी राखेया, “देखो, आऊँ सियोन नगरो रे एक

ठोकर लगणे पात्थर और ठोकर खाणे री जान राखूँआ और जेस तेस पाँदे विश्वास करना, से शर्मिदा नि ऊणा।”

10 ओ साथी विश्वासियो, मेरे मनो री इच्छा और इस्राएली लोका खे मेरी परमेशरो ते प्रार्थना ये ए कि तिना खे उद्धार मिलो। 2 कऊँकि आऊँ तिना री गवाई देऊँआ कि तिना खे परमेशरो री खातर धुन रओई, तिना लोका खे तिना री सेवा करने री ठीक समज नि ए। 3 कऊँकि सेयो परमेशरो री धार्मिकता ते अणजाण ऊई की और आपणी धार्मिकता बनाणे री कौशिश करदे रओए। सेयो परमेशरो रे जरिए तय किती री धार्मिकता रे अधीन नि ऊए। 4 कऊँकि मसीह ई धार्मिकता रे बिधानो र अंत ए और हर एक विश्वास करने वाले खे धार्मिकता देओए। 5 कऊँकि मूसे ये लिखी राखेया कि जो माणू तेसा धार्मिकता पाँदे, “जो बिधानो रे ए चलोआ से इजी बजअ ते जिऊँदा रणा।” 6 पर जो धार्मिकता विश्वासो ते ए, से ईयाँ बोलोई, “तूँ आपणे मनो रे ये नि बोलणा कि स्वर्गो पाँदे कुण चढ़ना?” मसीह खे त्वारी कि ल्याऊणे खे, 7 या डूगे रे कुण उतरना? मतलब मसीह खे मेरे रेया बीचा ते जिऊँदा करी की ऊबो खे निणे खे। (Abysos g12) 8 पर से क्या बोलोई? “परमेशरो र वचन तुसा गे ए, से तुसा रे मुँओ रे और तुसा रे मनो रे ए।” ये विश्वासो र से वचन ए, जो आसे प्रचार करूँए। 9 जे तूँ आपणे मुँओ ते यीशुए खे प्रभु जाणी की अंगीकार करेगा और आपणे मनो रे विश्वास करेगा कि परमेशरे से मेरे रेया बीचा ते जिऊँदा कित्तेया, तो तेरा पक्का उद्धार ऊणा। 10 कऊँकि विश्वास दिलो ते करेया जाओआ जेतेरा नतीजा धार्मिकता ए और अंगीकार मुँओ ते करेया जाओआ जेतेरा नतीजा उद्धार ए। 11 जियाँ यशायाहे पवित्र शास्त्रो रे लिखी राखेया, “जो कोई तेस पाँदे विश्वास करेगा, से शर्मिदा नि ऊणा।” 12 यहूदिया रे और यूनानिया रे कोई फर्क नि ए, कऊँकि परमेशर सबी र प्रभु ए और आपणे सब नाओं लणे वालेया खे उद्धार ए। 13 जियाँ पवित्र शास्त्रो रे लिखी राखेया, “जेस केसी प्रभुए र नाओं लणा, तेसरा उद्धार ऊणा।” 14 पर जेस पाँदे तिने विश्वास नि कित्तेया, सेयो तेसरा नाओं कियाँ लओ? और जेसरे बारे रे सुणेया नि, तेस पाँदे विश्वास कियाँ करना और प्रचारका ते बिना कियाँ सुणना? 15 और जे पेजे नि जाओ, तो कियाँ प्रचार करो? जेड़ा पवित्र शास्त्रो रे लिखी राखेया, “तिना रे पैर केड़े खरे ए, जो अच्छी गल्ला र सुसमाचार सुणाओए।” 16 पर सबी इस्राएलिए तेस सुसमाचारो पाँदे विश्वास नि कित्तेया। जेड़ा यशायाह भविष्यवक्ता बोलोआ, “ओ प्रभु, किने आसा रे सुसमाचारो पाँदे विश्वास करी राखेया?” 17 तो विश्वास सुणने ते और सुणना मसीह रे वचनो ते ओआ। 18 पर आऊँ पुछूँआ, क्या तिने मसीह रे बारे नि सुणेया? सुणेया तो जरूर ए, कऊँकि पवित्र शास्त्रो रे लिखी राखेया, “तिना री आवाज सारी तरतिया पाँदे, और तिना रे वचन दुनिया रे कनारे तक पऊँछी गे रे।” 19 आऊँ फेर पुछूँआ कि क्या इस्राएलो रे लोक नि जाणो थे? पईले तो प्रभुए मूसे रे जरिए ये बोलोआ, “मां तिना रे जरिए, जो यहूदी जाति नि ए, तुसा रे मनो रे जलन पैदा करनी, मां एक मूर्ख दूजिया जातिया रे जरिए, तुसा खे रिस दलाणी।” 20 तेबे यशायाह बड़ी ई इम्तना साथे बोलोआ, “जो माखे नि टोलो थे, तिना खे आऊँ मिली गा और जो माखे पूछो तक नि थे, तिना रे सामणे आऊँ आया।” 21 पर इस्राएलो रे लोका रे बारे रे परमेशर यशायाह रे जरिए ये बोलोआ, “आऊँ सारे दिन आपणे आथ एक आज्ञा ना मानणे वाली और बईस करने वाली प्रजा री तरफा खे फैलाए रे रया।”

11 एबे आऊँ पुछूँआ, “क्या परमेशरे आपणी प्रजा छाडी ती? कदी पनि। आऊँ बी तो इस्राएली ए, अब्राहमो रे वंश और बिन्यामीनो रे गोत्रो तेआ।” 2 परमेशरे आपणी से प्रजा नि छाडी, जेसखे से पईले तेई जाणो था, क्या तुसे नि जाणदे कि पवित्र शास्त्र एलियाह भविष्यवक्ता रे बारे रे क्या बोलोआ कि से इस्राएलो रे लोका रे बिरोदो रे परमेशरो ते बिनती करोआ? 3 तिने बोलेया, “ओ प्रभु, तिने तेरे भविष्यवक्ता काईते और तेरिया बेदिया नाश करी तिया। आऊँ ई कल्ला बची गा और सेयो मेरे प्राण बी लयी लणा चाओए।” 4 पर परमेशरे एलियाह खे उत्तर दित्तेया, “मैं आपू खे सात हजार

मर्द राखी राखे, जिने चूठे बाअल देवता रे आगे कुटणे टेकी की आराधना नि किती।” 5 तो ईयाँ ई एस बखते बी, परमेशरो री कृपा ते चुणे रे कुछ यहूदी लोक बाकि ए। 6 जे ये परमेशरो री कृपा ते ऊई रा, तो तेबे बिधानो रे कामा ते नि ए। जे ये बिधानो रे कामा रे जरिए ऊँदा तो कृपा फेर कृपा नि रदी। 7 फेर नतीजा क्या ऊआ? ये कि इस्राएली परमेशरो री जेसा कृपा खे टोलने लगी रे थे, से तिना खे नि मिली, बल्कि चुणे रेया खे मिली और बाकि लोक हठी बणाईते। 8 जेड़ा पवित्र शास्त्रो रे लिखी राखेया, “परमेशरे तिना लोका खे आजके दिनो तक सुस्त दमाक देई राखेया और एडिया आखी दित्तिया, जो देखी ना सको और एडे कान, जो सुणी नि सको।” 9 और राजा दाऊद बोलोआ, “तिना री रोटी तिना खे जाल, और फन्दा बणे; से तिना खे सजा और रूडने री बजअ ऊई जाओ। 10 तिना री आखी रे तलोजा आई जाओ जेते कि देखी नि सको और तूँ सदा तिना री पीठी खे मुसीबता रे बोजो निठे चुकाई की राख।” 11 तो आऊँ फेर पुछूँआ कि क्या इस्राएली लोके इजी खे ठोकर खाई कि सेयो सदा खे नाश ऊई जाओ? कदी पनि। पर तिना रे अविश्वासो री बजअ ते दूजी जातिया खे उद्धार मिलेया, कि इस्राएली लोका खे जलन ओ। 12 तो जे तिना र अविश्वास दुनिया रे लोका खे बड़ी आशीष और तिना री कमी दूजी जातिया खे सम्पत्तिया री बजअ ऊई, तो कितणी जादा आशीष उणी जेबे सब इस्राएली लोक परमेशरो पाँदे विश्वास करी लओगे। 13 आऊँ तुसा दूजी जातिया खे इना सबी गल्ला खे बोलूँआ, जबकि आऊँ दूजी जातिया खे प्रेरित ए। माखे आपणी एसा सेवा पाँदे बडा गर्व ए। 14 ताकि कियाँ बी आऊँ आपणे यहूदी लोका ते जलन कराई की तिना बीचा ते कई जणेया खे बचाऊँ। 15 कऊँकि जेबे तिना र त्याग करना दुनिया रे लोका खे परमेशरो साथे मिलापो री बजअ ऊई, तो क्या तिना र मसीह खे ग्रहण करना मेरे रेया बीचा ते जिऊँदे उणे रे बराबर नि ऊणा? 16 जेबे गूँदे रे आटे र पईला पेड़ा पवित्र ठईरेया, तो पूरा गूँदिया र आटा बी पवित्र ए, और जेबे जड़ पवित्र ठईरी, तो डालिया बी पवित्र आईया। 17 इस्राएलो रे लोक जैतूनो रे डालो री डालिया जेड़े ए और पिता अब्राहम, इसहाक और याकूब तेस जैतूनो रे डालो री जड़ा जेड़े ए। तुसे दूजिया जातिया रे लोक जैतूनो रे डालो पाँदे कलम चढ़ाई री डालिया जेड़े ए और तूँ जंगली डालिया जेड़ा तेसा बाडी री डालिया री जगा पाँदे जैतूनो री जड़ा री चिकणाईया र इस्सेदार ऊआ। 18 पर तँ तेसा बाडी री डालिया ते आपणे आपू खे बढी की नि समजणा और जे तूँ आपणे आपू खे तिना ते बढी कि समजेया तो जाणी लो कि तूँ जड़ा खे नि, पर जड़ ताखे सम्बालोई। 19 तेबे तँ बोलणा, “डालिया तेबे बाडिया ताकि मां पाँदे तिजी री अच्छी कलम चढ़ाई जाओ।” 20 ये सच ए, सेयो तो अविश्वासो री बजअ ते बाडी की लग करी तिया, पर तूँ विश्वासो री बजअ ते आपणी जगा पाँदे बणे र रओआ। इजी री खातर कमण्ड नि कर, बल्कि डर। 21 कऊँकि जेबे परमेशरे कुदरती डालिया नि छाडिया, तो तूँ पनि छाडणा। 22 इजी री खातर परमेशरो री दया और सखती देख, जो रूडी गे, तिना पाँदे सखती और तँ पाँदे दया, तूँ तिदे बणेया र रओ, नयी तो तूँ बी बाडी देणा। 23 जे इस्राएलो रे लोक बी विश्वास करना शुरू करी देओ तो सेयो बी फेर तेस डालो रे कलम चढ़ाई की जोड़े जाणे कऊँकि परमेशर सामर्थी ए कि फेर तिना खे जोड़ी सकोआ। 24 कऊँकि जे तूँ तेसा जैतूना ते, जो सबआओ तेई जंगली ए बाडी दित्तेया और सबआओ रे खलाफ अच्छी जैतूना रे डालो साथे जोड़ी ता, तो यो जो कुदरती डालिया ए, आपणी ई जैतूना रे कलम चढ़ाई की चट ई कऊँ नि बढना! 25 ओ साथी विश्वासियो! केथी एडा नि ओ कि तुसे आपणे आपू खे अक्लमंद समजी लो, इजी री खातर आऊँ चाऊँआ कि तुसे एस भेदो खे जाणी लो कि जदुओ तक दूजी जातिया पूरी तरअ ते नि आयी जाओ, तदुओ तक इस्राएलो र ए एक इस्सा एडा ई सख्त रणा। 26 और ईयाँ ई सारे इस्राएलो रे लोका खे उद्धार मिलणा, जेड़ा कि पवित्र शास्त्रो रे लिखी राखेया, “छुड़ाणे वाला सिड्योन नगरो ते आऊणा और अभक्ति याकूबो रे वंशो ते दूर करनी। 27 और तिना साथे मेरी ये वाचा ऊणी, जबकि मां तिना रे पाप माफ करी देणे।” 28 सेयो सुसमाचारो नि नजरा ते तो आपू ई दुजिया जातिया री खातर परमेशरो रे बैरी

ए। पर चुपने रे नजरा ते बाप-दादेया री बजअ ते परमेशरो रे प्यारे ए। 29 कऊँकि परमेशर आपणे बरदानो ते और बुलाहटा ते कदी पीछे नि अटदा। 30 कऊँकि जियाँ तुसे पईले ई परमेशरो री आज्ञा नि मानी, पर एबे इसाएली लोका री आज्ञा ना मानणे ते तुसा पाँदे दया ऊई। 31 तियाँ ई तिने बी एबे आज्ञा नि मानी ताकि तुसा पाँदे जो दया ओई, इजी ते तिना पाँदे बी दया ओ। 32 कऊँकि परमेशरे सबी लोका खे आज्ञा ना मानणे री बजअ ते बन्दी बणाई की राखेया, ताकि से सबी लोका पाँदे दया करो। (e1653) 33 वाह, परमेशरो री कृपा रा धन, बुद्धि और ज्ञान कितणे गम्भीर ए! तेसरे विचार कितणे गइरे ए, और तेसरी बाट कितणी साफ ए। 34 “प्रभुए रा मन किने जाणेया? या तेसरा सलाहकार कुण ऊआ? 35 या किने तेसखे पईले कुछ देई राखेया, जेतेरा बदला तेसखे दितेया जाओ?” 36 कऊँकि परमेशरो री तरफा ते और तेसरे जरिए और तेसखे ई सब कुछ ए, तेसरी महिमा जुगो-जुगो तक ऊँदी रओ। आमीन्। (a10n g165)

12 इजी री खातर ओ साथी विश्वासियो! आऊँ तुसा खे परमेशरो री दया याद कराई की बिनती कऊँआ कि आपणे आपू खे जिऊँदा और पवित्र और परमेशरो खे अच्छा लगदा ऊआ बलिदान करी की चढ़ाओ। परमेशरो री सेवा करने रा येई सच्चा तरीका ए। 2 और एसा दुनिया रे लोका जेडे नि बणो, बल्कि तुसा रे मनो रा नवाँ ऊई जाणे ते, तुसा रा चाल-चलण बी बदलदा रओ। ताकि तुसे परमेशरो री खरी, भावती और सिद्ध इच्छा अनुभवो ते पता करदे रओ। (a10n g165) 3 कऊँकि आऊँ तेसा कृपा री बजअ ते, जो माखे मिली री, तुसा बीचा ते हर एकी खे बोलूँआ कि जेड़ा समजणा चाईयो, तिजी ते बही की कोई बी आपू खे नि समजो, पर जेड़ा परमेशरे हर एकी खे विश्वासो रे नतीजे रे मुताबिक बांडी ता रा, तेड़ा ई अच्छी सोचा साथे आपू खे समजो। 4 कऊँकि जेडे म्हारे एक ई शरीरो रे बऊत अंग ए और सबी अंग रा एक जेड़ा काम निए, 5 तेड़ा ई आसे जो बऊत ए, मसीह रे एक शरीर ऊई की आपू बीचे एकी दूजे रे अंग ए। 6 जबकि तेसा कृपा रे मुताबिक, जो आसा खे देई राखी, आसा खे लग-लग बरदान मिली रे, तो जेसखे भविष्यबाणी करने रा बरदान मिली रा, से विश्वासो रे नतीजे रे मुताबिक भविष्यबाणी करो। 7 ईयाँ ई जे सेवा करने रा बरदान मिली रा, तो सेवा करदे रओ, जे कोई सिखाणे वाला ए, तो सिखाणे रे लगे रा रओ। 8 जेसखे औंसला देणे रा दान मिली रा, से लोका खे औंसला देँदा रओ, दान देणे वाला उदारता ते देँदा रओ, जो अगुवाई करोआ, से लगना साथे अगुवाई करदा रओ, जो दया करो, से खुशिया ते दया करो। 9 प्यार बिना कपटो ते ओ, बुराईया ते नफरत करो, पलाईया रे लगे रे रओ। 10 पाईचारे रे प्यारो ते एकी-दूजे ते प्यार करो, आपू बीचे आदर करने रे एकी-दूजे ते जादा बढ़ो। 11 कडी मईगँत करो और आलसी नि बणो। आत्मिक खुशिया ते परे रे रओ, प्रभुए री सेवा करदे रओ। 12 उम्मीदा रे खुश ऊँदे रओ, क्लेशो रे स्थिर रओ, हर बखत प्रार्थना करदे रओ। 13 परमेशरो रे लोका खे जो कुछ जरूरी ओ, तिदे तिना री मताद करो, पराऊणचारिया रे लगे रे रओ। 14 आपणे सताने वालेया खे आशीष देओ, आशीष देओ, श्राप नि देओ। 15 खुशी करने वालेया साथे खुशी करो और रोणे वालेया साथे रोओ। 16 आपू बीचे एक जेड़ा मन राखो, कमपडी नि बणो। पर गरीब लोका साथे संगति राखणे खे सदा त्यार रओ। आपणी नजरा रे अक्लमंद नि ओ। 17 बुराईया रे बदले केसी साथे बुराई नि करो, जो गल्ल सबी लोका रे नेडे खरो ओ, तिना री चिन्ता करेया करो। 18 जेथो तक ऊई सको आपणे सबी माणुआ साथे मेल-जोल राखो। 19 ओ प्यारो! आपणा बदला नि लओ, पर परमेशरो रे रोषो खे मौका देओ, कऊँकि पवित्र शास्त्रो रे परमेशर बोलोआ, “बदला लणा मेरा काम ए, मां ई प्रतिफल देणा।” 20 पर ये बी लिखी राखेया, “जे तेरा बेरी पूखा ओ, तो तेसखे रोटी खुला, जे त्याया ओ, तो तेसखे पाणी पल्या। कऊँकि तुसा रे एड़ा करने ते तेसरा सिर शरमा रे मारे चूकी जाणा।” 21 बुराईया ते नि आरो, बल्कि पलाईया ते बुराईया खे जीती लओ।

13 हर एक माणू बडे अधिकारिया रे अधीन रओ, कऊँकि कोई अक्क एड़ा निए, जो परमेशरो री तरफा ते नि ओ और जो अक्क आए, सेयो परमेशरे रे जरिए ई ठराई राखे। 2 इजी ते जो कोई अधिकारिए रा बिरोद करोआ, से परमेशरो री आज्ञा रा बिरोद करोआ और बिरोद करने वालेया दण्ड पाणा। 3 कऊँकि जो कोई खरा काम करोए तिना खे अधिकारिया ते डरने री जरूरत निए। पर जो कोई बुरे काम करोआ तिना खे अधिकारिया ते डरना चाईयो। जे तूँ अधिकारिया ते निडर रणा चाओआ तो खरा काम कर और तेसरी तरफा ते तेरी तारीफ ऊणी। 4 कऊँकि से तेरी पलाईया खे परमेशरो रा सेवक ए, पर जे तूँ बुराई करे, तो डर। कऊँकि तिने तलवार बेकारो रे नि लयी राखी बल्कि से परमेशरो रा सेवक ए ताकि तेसरे रोषो रे मुताबिक बुरे काम करने वालेया खे दण्ड देओ। 5 इजी री खातर तिना रे अधीन रणा ना बस तेस रोषो ते, बल्कि डरो ते जरूरी ए, बल्कि विवेक बी येई गवाई देओआ। 6 इजी री खातर सरकारा खे मामला बी देओ, कऊँकि शासन करने वाले परमेशरो रे सेवक ए और सदा एसी कामो रे लगे रे रओए। 7 इजी री खातर हर एकी रा अक्क चुकाया करो, जेसखे मामला चाईयो, तेसखे मामला देओ, जेसखे शुल्क चाईयो, तेसखे शुल्क देओ, जेसते डरना चाईयो, तेसते डरो, जेसरा आदर करना चाईयो, तेसरा आदर करो। जो तारीफा जोगा ए, तेसरी तारीफ करो। 8 आपू बीचे प्यारो खे छाडी की केसी बी गल्ला रे केसी रे बी कर्जदार नि ओ। कऊँकि जो दूजे साथे प्यार राखोआ, तिने ई बिधान पूरा करी राखेया। 9 मूसे रा बिधानो रे बऊत सारी आज्ञा ए कि व्याभिचार नि करना, अत्या, चोरी, लालच नि करना और इना खे छाडी की ओर कोई बी आज्ञा ओ तो सबी रा निचोड़ एसा आज्ञा रे मिलोआ कि आपणे पड़ोसिये ते आपू जेड़ा प्यार राख। 10 प्यार पड़ोसियो री कुछ बी बुराई नि करदा। इजी री खातर जो प्यार करोआ से परमेशरो रे बिधानो खे पूरा करोआ। 11 और बखतो खे पछयाणी की एड़ा ई करो, कऊँकि एबे तुसा खे नीजा ते जागणे री कअडी आईगी री, कऊँकि जेस बखते आसे विश्वास कितेया था, तेस बखतो रे बिचारो ते एबे आसा रा उद्धार नेडे ए। 12 रात बऊत बीती गी री और दिन निकलने वाला ए, इजी री खातर आसे न्हरे रे कामो खे छाडी कि जोतिया रे अथियार बानी लऊँए। 13 जेड़ा दिनो खे अच्छा लणोआ, तेड़ी ई आसा सीदी चाल चलणी चाईयो, ना कि लीलाक्रीडा, पियवकड़, ना व्याभिचार, ना लिचड़पण और ना चगड़े रे और जलना रे। 14 बल्कि प्रभु यीशु मसीह खे पईनी लो और शरीरो री बुदी इच्छा खे पूरा करने रा उपाय नि करो।

14 विश्वासो रे कमजोर लोका खे तिना रे विश्वासो रे बारे रे केसी बी शंका ते बगैरे ई अपनाई लो। 2 कऊँकि कुछ लोका खे विश्वास ए कि सब कुछ खाणा चाईयो, पर जो विश्वासो रे कमजोर ए, से साग-पात ई खाओआ। 3 जो लोक मांस खाओए तिना खे शाकाहारी लोक तुच्छ नि समजो और शाकाहारी लोक मांस खाणे वाले लोका पाँदे दोष नि लगाओ। कऊँकि परमेशरे सेयो दोनो ई ग्रहण करी राखे। 4 तूँ कुण ए जो प्रभुए रे सेवको पाँदे दोष लगाएया? तेसरा बणेया रा रणा और रुड़ना, तेसरे मालको तेई रिश्ता राखोआ, बल्कि से खड़ा ई करेया जाणा, कऊँकि प्रभु तेसखे खड़ा करी सकोआ। 5 तियाँ ई कोई तो एकी दिनी खे, दूजे ते बड़ा मानोआ और केसी खे सब दिन एक जेडे ए। हर एक आपणे ई मनो रे निश्चा करी लो। 6 जो केसी खास दिनो खे मानोआ, से प्रभुए खे मानोआ। जो खाओआ, से प्रभुए री खातर खाओआ, कऊँकि से परमेशरो रा धन्यवाद करोआ और जो खाँदा नि, से प्रभुए री खातर नि खाँदा और परमेशरो रा धन्यवाद करोआ। 7 कऊँकि आसा बीचा ते कोई ना तो आपणी खातर जिओआ और ना ई कोई आपणी खातर मरोआ। 8 कऊँकि आसे जे जिऊँदे ए, तो प्रभुए री खातर जिऊँदे ए और जे मरूँए, तो प्रभुए री खातर मरूँए। ईयाँ आसे जिऊँ, चाए मरूँ, आसे प्रभुए रेईए। 9 कऊँकि मसीह इजी री खातर ई मरेया और जिऊँदा बी ऊआ, से मरे रा और जिऊँदेया रा सबी रा प्रभु ए। 10 तूँ आपणे साथी विश्वासिया पाँदे दोष कऊँ लगाएया? या आपणे साथी विश्वासिया खे

तुच्छ कऊँ समजैया? आसे सब परमेशरो रे न्याय आसणो सामणे खड़े ऊणे। 11 कऊँकि पवित्र शास्त्रो रे लिखी राखेया, “प्रभु बोलोआ कि मेरी जिन्दगिया री कसम कि ‘हर एकी मेरे सामणे आपणे कुटणे टेकणे और हर एक माणूआ परमेशर मानणा।” 12 तो आसा बीचा ते हर एकी परमेशरो खे आपणे-आपणे कामा रा लेखा देणा। 13 तो आगे ते आसे एकी-दूजे पाँदे दोष नि लगाओ, पर तुसे येई ठाणी लो कि कोई आपणे पाईया सामणे ठेस या ठोकर खाणे री बजअ नि ओ। 14 आऊँ जाणूआ कि प्रभु यीशुए ते माखे निश्चा ऊई रा कि कोई बी खाणे री चीज आपू ते अशुद्ध नि। पर जो कोई तिजी खे अशुद्ध समजोआ, से तेसखे अशुद्ध ए। 15 जे तेरा पाई तेरी रोतिया ते नराज ओआ, तो तेबे तूँ प्यारो ते नि चलदा। जेतेरी खातर मसीह मरेया, तेसखे तूँ आपणी रोतिया री बजअ ते नाश नि कर। 16 जो तुसा री नजरा रे ठीक ए तिजी री दूजे लोक निंदा नि करो। 17 कऊँकि परमेशरो रे राज्य रे खाणे-पीणे री अहमियत नि, बल्कि तर्म, मेल और खुशी ए जो पवित्र आत्मा ते ओआ। 18 जो कोई इजी रीतिया ते मसीह री सेवा करोआ, से परमेशरो खे अच्छा लगेओ और माणूआ बीचे ग्रहण करने जोगा ओआ। 19 इजी री खातर आसा खे इना गल्ला री कोशिश करनी चाईयो जिना साथे मेल-जोल और एकी-दूजे रे विश्वासो खे मजबूत करने रे मताद मिलो। 20 रोतिया री खातर परमेशरो रा काम नि बिगाड़। सब कुछ तो शुद्ध ए, पर तेस माणूए खे बुरा ए, जेसखे तेसरी रोटी खाणे ते ठोकर लगोई। 21 पला तो ये कि तूँ ना तो मांस खा और ना दाखरस पी और ना ई कुछ एड़ा कर, जेते की तेरा साथी विश्वासी ठोकर खाओ। 22 इना चीजा रे बारे रे जो बी तुसा रा विश्वास ओ, से तुसा रे और परमेशरो बीचली गल्ल ए। धन्य से माणूँ जो तेसा गल्ला रे, जेसखे से ठीक समजोआ, आपणे आपू खे दोषी नि मानदा 23 पर जो शक करी की खाओआ, से दण्डो जोगा ठईरी चुकेया, कऊँकि से विश्वास करी की नि खांदा। जो कुछ विश्वासो ते नि, से पाप ए।

15 जे म्हारा विश्वास मजबूत ए तो तिना साथी विश्वासिया साथे जिना रा विश्वास कमजोर ए तिना साथे धीरज राखो। आसा खे आपणे आपू खे खुश करने रे बदले तिना खे खुश करने री कोशिश करनी चाईयो। 2 आसा बीचा ते हर एक आपणे साथी विश्वासिया खे तेसरी पलाईया खे तिना खे खुश करो और तिना रे विश्वासो खे मजबूत करने री कोशिश करो कि तिना री तरक्की ओ। 3 कऊँकि मसीहे आपणे आपू खे खुश नि कित्तेया, पर जेड़ा पवित्र शास्त्रो रे लिखी राखेया, “तेरी निन्दा करने वालेया मेरी निन्दा करी राखी।” 4 जितणिया गल्ला पईले तेई पवित्र शास्त्रो रे लिखी राखी थिया, सेयो आसा री ई शिक्षा री खातर ई लिखिया ताकि आसे सब और पवित्र शास्त्रो री शान्तिया रे जरिए उम्मीद राखूँ। 5 आऊँ प्रार्थना करूँआ कि सब और इमन्ती रा दाता परमेशर तुसा खे ये बरदान देओ कि यीशु मसीह रे मुताबिक आपू बीचे एक मन ऊई कि रओ। 6 ताकि तुसे एक मन और एक आवाज ऊई की आसा रे प्रभु यीशु मसीह रे पिता परमेशरो री बढ़ाई करो। 7 तेबे, जेड़ा मसीहे बी परमेशरो री महिमा री खातर तुसे अपनाए, तेड़े ई तुसे बी एकी-दूजे खे अपनाओ। 8 आऊँ बोलूँआ कि जो वादे बाप-दादिया रा से दिते थे, तिना खे मजबूत करने खे, मसीह, परमेशरो री सच्चाईया रा सबूत देणे खे खतना कित्ते रे लोका रा सेवक बणेया। 9 और दूजी जाति बी परमेशरो री दया पाई कि तेसरी बढ़ाई करो। जेड़ा पवित्र शास्त्रो लिखी राखेया, “इजी री खातर जातिया-जातिया बीचे मां तेरा धन्यवाद करना और तेरे नाओं रे पजन गाणे।” 10 फेर बोली राखेया, “ओ दूजिया जातिया रे सब लोको, परमेशरो री प्रजा साथे खुशी मनाओ।” 11 एकी ओरी जगा लिखी राखेया, “ओ दूजिया जातिया रे सब लोको, प्रभुए री स्तुति करो और ओ राज्य-राज्य रे सब लोको, तेसखे सराओ।” 12 और तेबे यशायाह बोलोआ, “यिश्शे रे वंशो ते एक सामणे आऊणा और दूजी जातिया रा हाकिम ऊणे खे उठणा, तेस पाँदे दूजी जातिया उम्मीद राखणी।” 13 आऊँ परमेशरो ते प्रार्थना करूँआ कि जो उम्मीदा रा दाता ए, तुसा खे विश्वास करने रे सब प्रकारा री खुशी और शान्तिया ते परिपूर्ण करो, ताकि पवित्र आत्मा री

सामर्था ते तुसा री उम्मीद बढ़ी जाओ। 14 ओ मेरे साथी विश्वासियो! माखे आपू बी तुसा रे बारे रे निश्चा ए कि तुसे आपू बी पलाईया ते फरे रे और परमेशरो रे जानो ते बी फरे रे ए और एकी दूजे खे समजयाई सकोए। 15 तेबे बी मैं केथी-केथी याद दलाणे खे, तुसा खे बऊत इम्मत करी की लिखेया, ये तेस अनुग्रहो री बजअ ते ऊआ, जो परमेशरे माखे देई राखेया। 16 आऊँ दूजिया जातिया खे प्रभु यीशु मसीह रा सेवक ऊई की परमेशरो रे सुसमाचारो री सेवा, पुरोईतो जेड़ी करूँ। जेते कि दूजी जाति परमेशरो रे आगे अपनाणे जोगी भेंट बणी सको और पवित्र आत्मा रे जरिए परमेशरो खे पूरी तरअ ते पवित्र बणो। 17 तो आऊँ यीशु मसीह री बजअ तेई परमेशरो री सेवा रे गर्व करी सकूँआ। 18 आऊँ ये बोलणे खे इम्मत राखूँआ कि मसीहे मेरे जरिए जो नौखा काम करी राखेया जेतेरा नतीजा ये निकलेया कि दूजिया जातिया रे लोके परमेशरो पाँदे विश्वास कित्तेया जेबे तिने मेरा वचन सुणेया और मेरे काम देखे। 19 ये सब चिह्न और अचम्बे रे काम पवित्र आत्मा री सामर्था ते मेरे ई जरिए कित्ते। एथो तक कि मैं यरूशलेमो ते लयी की चऊँ कनारे इल्लुरिकुमो तक, मसीह रे सुसमाचारो रा पूरा-पूरा प्रचार कित्तेया। 20 मेरे मनो री खुशी ये कि जेती-जेती यीशु मसीह रा नाओं नि लया, तेथी सुसमाचार सुणाऊँ, एडा नि ओ कि दूजे री निऊँवा पाँदे कजर बणाऊँ। 21 पर जेड़ा पवित्र शास्त्रो रे लिखी राखेया, तेड़ा ई ओ, “जेसगे तेसरा सुसमाचार नि पऊँछेया, तिना ई देखणा और जिने सुणेया नि, सेयो ई समजणा।” 22 तेबेई तो आऊँ तुसा गे आऊणे ते बार-बार रूकेया रा रया। 23 पर एबे माखे इना प्रदेशा रे मेरे कामा खे ओर जगा नि रई और बऊत साला ते माखे तुसा गे आऊणे री इच्छा ए। 24 तेबे, जेबे आऊँ स्पेनो खे जाऊँगा, तो तुसा गिये ई जाऊँगा, कऊँकि माखे उम्मीद ए कि तेसा यात्रा रे आऊँ तुसा ते मिलूँ और जेबे तुसा री संगतिया ते मेरा जिऊ कुछ फरी जाओ, तो तुसे माखे स्पेनो रे सफरो खे मताद करी कि आगे पऊँछाई देओ। 25 पर एबु तो परमेशरो रे लोका री सेवा करने खे यरूशलेमो खे जाऊँआ। 26 कऊँकि मकिदुनिया और अखाया प्रदेशो रे लोका खे ये अच्छा लगेया कि यरूशलेमो रे परमेशरो रे लोका रे गरीबा खे कुछ चंदा कट्टा करिए। 27 तिने ये खुशिया साथे तो कित्तेया, सेयो यरूशलेमो रे रणे वाले लोका रे कर्जदार बी ए, कऊँकि जेबे दूजी जातिया रे लोके तिना ते आत्मिक धन पाई राखेया तो तिना खे बी ठीक ए कि शारीरिक गल्ला रे तिना री सेवा करो। 28 तो तेबे आऊँ एस कामो खे पूरा करी की और तिना गे एस चंदे खे सम्बाली कि तुसा गिये ऊँदा ऊआ स्पेनो खे जाऊँगा। 29 और आऊँ जाणूँआ कि जेबे आऊँ तुसा गे आऊणा, तो मसीह री पूरी आशीषा साथे आऊणा। 30 और ओ साथी विश्वासियो! आऊँ प्रभु यीशु मसीह रा जो आसा रा प्रभु ए और पवित्र आत्मा रे प्यारो री याद दलाई की तुसा ते बिनती करूँआ कि माखे परमेशरो ते प्रार्थना करने खे मां साथे लौलीन रओ। 31 ताकि आऊँ यहूदिया प्रदेशो रे अविश्वासिया ते बचे रा रऊँ और मेरी से सेवा, जो यरूशलेमो खे ए, परमेशरो रे लोका खे अच्छी लगे 32 और आऊँ परमेशरो री इच्छा ते तुसा गे खुशिया साथे आयी की तुसा साथे आराम करूँ। 33 आऊँ प्रार्थना करूँआ शान्तिया रा परमेशर तुसा सबी साथे रओ। अमीन।

16 आऊँ पौलुस फिबे खे बिनती करूँआ कि तुसे तेसा रा आदर करो। से आसा री साथी विश्वासी बईण और किस्त्रिया नगरो री मण्डलिया री सेविका ए। 2 तुसे लोक बईण फिबे खे प्रभुए री सेविका जाणी की तेसा रा स्वागत करो। और जेसा केसी गल्ला रे तेसा खे तुसा ते मतलब ओ, तेसा री मताद करो। कऊँकि तेसा रा बऊत जणेया पाँदे, बल्कि मां पाँदे बी तेसा रा उपकार ए। 3 बईण प्रिस्क्ल्ला और तेसा रा लाड़ा अक्विवाला खे बी, जो यीशु मसीह रे मां साथे काम करने वाले ए, नमस्ते। 4 तिने मेरा प्राण बचाणे खे आपणी जिन्दगी दाव पाँदे लगाईती थी और बस आऊँ ई नि, बल्कि दूजी जातिया री सारी मण्डली बी, तिना रा धन्यवाद करोई। 5 और तेसा मण्डलिया खे बी नमस्कार, जो तिना रे कअरे कट्टे ओए। मेरे प्यारे इपैनेतुसो खे, जो मसीह खे अपनाणे वालेया बीचा ते आसिया प्रदेशो रा

पईला फल ए, नमस्ते। 6 मरियमा खे, जैसे तुसा री खातर बऊत मईणत किक्ती, नमस्कार। 7 पाई अन्दुनीकुस और बईण यूनियासो खे, जो मां जेडे ई यहूदी ए और मां साथे जेला रे कैद ऊए थे, तिना खे मां पौलुसो रा नमस्कार। सेयो लोक प्रेरिता बीचे जाणे-माणे रे थे और मांते पईले मसीह खे मानणे वाले ऊए। 8 पाई अम्पलियातुसो खे, जो प्रभुए रे मेरा प्यारा ए, नमस्कार। 9 पाई उरबानुसो खे, जो मसीह रे आसा साथे काम करने वाला ए और मेरे प्यारे इस्तखुसो खे नमस्कार। 10 अप्पिलेसो खे जो मसीह रे खरा निकलेया, नमस्कार। अरिस्तुबुलुस रे कराने खे नमस्कार। 11 मेरे साथी यहूदी पाई हेरोदियोनो खे नमस्कार। नरकिस्सुसो रे कराने रे जो लोक प्रभुए रे ए, तिना खे नमस्कार। 12 प्रभुए री सेवा रे मईणत करने वालिया जवाणसा त्रूफैना और त्रूफोसा खे, जो प्रभुए रे मईणत करोए, नमस्कार। प्यारी बईण पिरसिसो खे, जिने प्रभुए रे बऊत मईणत किक्ती, नमस्कार। 13 रूफुसो खे, जो प्रभुए रे चुणी राखेया और तेसरी आम्मा खे जो मेरी बी आम्मा जेडी ए, दूई खे नमस्कार। 14 असुकितुसो और फिलगोन, हिर्मेस, पत्रुबास, हिर्मास और तिना रे साथले साथी विश्वासिया खे, नमस्कार। 15 फिलुलुगुस, यूलिया, नेर्युस और तेसरी बईण, उलुम्पास और तिना साथले सब परमेशरो रे लोका खे नमस्कार। 16 आपू बीचे गले लगी की नमस्कार करो। तुसा खे मसीह री सारी मण्डलिया री तरफा ते नमस्कार। 17 एबे ओ साथी विश्वासियो, आऊँ तुसा ते बिनती करूँआ कि तिना लोका ते चौकस रओ जो तेसा शिक्षा रे खलाफ, जो तुसे पाई राखी और से फूट पडने और ठोकर खाणे री बजअ ओए। तिना ते दूर रओ। 18 कऊँकि एडे लोक म्हारे प्रभु मसीह री नि, बलिक आपणे पेटो री सेवा करोए। सेयो लोक चिकणी-चूपड़िया गल्ला करी की सीदे-सादे मनो वाले लोका खे बईकाई देओए। 19 तुसा री आज्ञा मानणे रे बारे रे सबी लोका खे पता लगी गा रा। इजी री बजअ ते आऊँ तुसा रे बारे रे खुश ओऊँआ। पर आऊँ ये चाऊँआ कि तुसे पलाईया खे, अक्लमंद, पर बुराईया खे पोले बणे रे रओ। 20 परमेशरो जो शान्तिया रा दाता ए, तुसा रे पैरो निठे शैतानो खे तुसा ते चट ई मंडाणा। म्हारे प्रभु यीशुए री कृपा तुसा पाँदे सदा ऊँदी रओ। 21 मां साथे काम करने वाला तीमथियुसो री तरफा ते और मेरे यहूदी साथी लूकियुस, यासोन और सोसिपत्रुस तुसा लोका खे नमस्कार बोलोए। 22 आऊँ तिरतियुस जो पौलुसो री तरफा ते ये चिट्ठी लिखणे लगी रा, प्रभुए रे तुसा लोका खे नमस्कार बोलूँआ। 23 गयुस रा, जो मेरी और मण्डलिया री पराऊणचारी करने वाला ए, तेसरा तुसा खे नमस्कार। इरास्तुस, जो नगरो रा पण्डारी ए और पाई क्वारतुसो रा, तुसा खे नमस्कार। 24 आऊँ प्रार्थना करूँआ कि आसा रे प्रभु यीशु मसीह री कृपा, तुसा सबी लोका पाँदे सदा ऊँदी रओ। 25 तेस परमेशरो री स्तुति ओ, जो तुसा लोका खे मेरे सुसमाचार और प्रभु यीशु मसीह रे संदेशो रे मुताबिक स्थिर राखणे रे सामर्थी ए। ये सुसमाचार से पेट ए जो जुगो-जुगो ते छिपेया रा था। (aiōnios g166) 26 पर एबे सामणे आयी की सनातन परमेशरो री आज्ञा ते, भविष्यबक्तेया रे पवित्र शास्त्रो री कताबा रे जरिए, सबी जातिया खे बताया कि सेयो विश्वासो ते आज्ञा मानणे वाले ऊई जाओ। (aiōnios g166) 27 तेस कल्ले अक्लमंद परमेशरो री बऊत जादा, प्रभु यीशु मसीह रे जरिए, जुगो-जुगो तक महिमा ऊँदी रओ। आमीन्। (aiōn g165)

1 कुरिन्थियों

1 ये चिट्ठी मां पौलुस और आसा रे पाई सोस्थिनसो री तरफा ते ए। आऊ परमेशरो री इच्छा ते यीशु मसीह रा प्रेरित ऊणे खे बुलाई राखेया। 2 आऊ ये चिट्ठी परमेशरो री तेसा मण्डलिया खे लिखूआ जो कुरिन्थुस नगरो रे ए। तुसे लोक यीशु मसीह रे जरिए पवित्र कित्ते रे और तिना सबी परमेशरो रे लोका साथे तुसे बी तिना रे लोक ऊणे खे बुलाए राखे जो हर जगा आसा रे प्रभु यीशु मसीह रे नाओं री मतलब से जो आसा रा और तिना रा सबी रा प्रभु ए, स्तुति करोए। 3 आऊ प्रार्थना करूआ कि म्हारे पिता परमेशर और प्रभु यीशु मसीह री तरफा ते, तुसा खे कृपा और शान्ति मिलदी रओ। 4 आऊ तुसा रे बारे रे आपणे पिता परमेशरो रा धन्यवाद सदा करूआ, कऊँकि परमेशरो तुसा खे कृपा ते यीशु मसीह साथे एक करने रे जरिए बऊत आशीष देई राखी। 5 तुसे लोक यीशु मसीह रे हर तरअ ते भरपूर करी राखे। से ये ए कि तिने तुसा खे आपणे वचन बोलणे और समजणे खे हर तरअ ते खास काबलियत देई राखी। 6 ये तेसा गल्ला खे साबित करोआ कि मैं मसीह रे बारे जो बताया था से सच ए। 7 नतीजन एस बखते, जबकि तुसे आसा रे प्रभु यीशु मसीह रे आऊणे री बडी बेसबरिया साथे इन्तजार करने लगी रे, तुसा रे पवित्र आत्मा रे जरिए दित्ते रे केसी बी आत्मिक बरदानो री कमी निए। 8 परमेशरो तुसे आखरी तक विश्वासो रे मजबूत बी करने, ताकि तुसे आसा रे प्रभु यीशु मसीह रे आऊणे तक निर्दोष ठईरो। 9 परमेशर विश्वासो जोगा ए, जिने तुसे आपणे पुत्र, आसा रे प्रभु यीशु मसीह री संगतिया रे बुलाई राखे। 10 ओ साथी विश्वासियो! आऊँ तुसा ते आसा रे प्रभु यीशु मसीह रे नाओं ते बिनती करूआ कि तुसे सब एक ई गल्ल बोलो और तुसा बीचे फूट नि ओ, पर एक ई मन और एक ई श्रादा करी की मिले रे रओ। 11 कऊँकि ओ मेरे साथी विश्वासियो! खलोए रे कराने रे लोके, मांगे तुसा रे बारे रे बताई राखेया कि तुसा बीचे चगड़े ऊणे लगी रे। 12 मेरे बोलणे रा मतलब ये ए कि तुसा बीचा ते कोई आपणे आपू खे पौलुसो रा चेला, कोई अपुल्लोसो रा, कोई पतरसो रा और कोई मसीह रा चेला बोलोआ। 13 तुसे लोक जो करने लगी रे से ठीक निए, क्या मसीह बंटी गा रा? क्या पौलुस तुसा री खातर क्रूसो पँदि चढ़ाया? या क्या तुसा खे पौलुसो रे नाओं ते बपतिस्मा मिलेया? 14 आऊँ परमेशरो रा धन्यवाद करूआ कि क्रिस्तुस और ग्युस इना दो पाईया खे छाडी की मैं तुसा बीचा ते केसी खे बी बपतिस्मा नि दित्तेया। 15 केथी एड़ा नि ओ कि कोई बोलो कि तुसा खे मेरे नाओं ते बपतिस्मा मिलेया। 16 और आ, मैं स्तिफनासो रे कराने खे बी बपतिस्मा दित्तेया, इना खे छाडी की आऊँ नि जाणदा कि मैं ओरी केसी खे बपतिस्मा दित्तेया। 17 यीशु मसीहे आऊँ बपतिस्मा देणे नि पेजेया। बल्कि तिने आऊँ सुसमाचार प्रचार करने पेजी राखेया और मैं ये काम मांणूआ रे शब्दो रे ज्ञानो रे मुताबिक नि कित्तेया एड़ा नि ओ कि मसीह रा क्रूस बेकार ठईरो। 18 जो लोक विनाशो री बाटा रिये चलोए तिना लोका खे क्रूसो री शिक्षा मूर्खता री गल्ल ए। पर आसा लोका खे जो उद्धारो री बाटा रिये चलोए क्रूसो री शिक्षा परमेशरो री सामर्थ ए। 19 कऊँकि पवित्र शास्त्रो रे लिखी राखेया, “मां ज्ञानवानो रा ज्ञान नाश करना और समजदारा री समज तुच्छ करी देणी।” 20 तो फेर समजदार लोका खे आसे क्या बोलिये? यहूदी बिधानो रे जाणने वाले माहिर शास्त्रिए रे बारे रे आसे क्या बोलिये? दुनिया रे तिना लोका रे बारे आसे क्या बोलिये जो बोलणे रे बऊत चलाक ए? परमेशरे दुनिया रा ज्ञान मूर्ख और बेकार ठराईता रा। (aiōn g165) 21 कऊँकि परमेशरे आपणे ज्ञानो रे मुताबिक ये देखेया कि दुनिया रे लोक आपणे ज्ञानो रे जरिए तिना खे कदी बी नि जाणी सकदे, तेबेई तिना लोका रा उद्धार करने खे जो विश्वास करोए सुसमाचारो रे प्रचारो रा इस्तेमाल कित्तेया, हालाँकि कुछ लोक इजी खे मूर्खता री गल्ल समजोए। 22 ये यहूदी लोका खे मूर्खता री गल्ल ए जो स्वर्गो ते चिह्न चाओए, और दूजिया जातिया रे लोका खे बी मूर्खता री गल्ल ए जो मांणूआ रे ज्ञानो री टोला रे ए। 23 पर आसे तो तेस क्रूसो पँदि चढ़ाए रे

मसीह रा प्रचार करूँए, जो यहूदिया खे ठोकरा री बजअ और दूजिया जातिया खे मूर्खता री गल्ल ए। 24 पर परमेशरो रे चुणे रे लोका खे क्या यहूदी, क्या दूजी जाति दूई खेई येई मसीह परमेशरो री सामर्थ और परमेशरो रा ज्ञान ए। 25 कऊँकि परमेशरो री मूर्खता, मांणूआ रे ज्ञानो ते ज्ञानवान ए और परमेशरो री कमजोरी, मांणूआ री तागती ते बऊत तागतबर ए। 26 ओ साथी विश्वासियो! आपणे तिना दिना खे याद करो जेबे तुसे परमेशरे बुलाए थे तेबे तुसे न तो दुनिया री नजरा रे ज्ञानी थे, न ई बऊत तागतबर थे और न ई समाजो रे तुसा रा कोई दबदबा था। 27 ज्ञानी मांणू शर्मिदा करने खे परमेशरे सेयो चूणी ले रे, जिना खे दुनिया मूर्ख समजोई। तागतबरा खे बी शर्मिदा करने खे तिने सेयो चूणी ले रे, जो दुनिया री नजरा रे कमजोर ए। 28 गणमानय लोका रे कमण्डो खे चूर करने खे परमेशरे सेयो लोक चूणी ले जो दुनिया री नजरा रे नीच, तुच्छ और कुछ नि समजे जाओए। 29 परमेशरे एड़ा इजी खे कित्तेया ताकि कोई बी प्राणी तेसरे सामणे कमण्ड नि करी सको। 30 पर परमेशरे आसे यीशुए साथे एक करी ते रे और मसीह रे जरिए तिने आसा खे आपणा ज्ञान दित्तेया। परमेशर आपणी नजरा रे आसा खे तर्मी बी बणाओआ। तिने मसीह रे जरिए आसे पवित्र करी राखे और से आसा खे आसा रे पाणे ते छुटकारा देओआ। 31 ताकि जेड़ा पवित्र शास्त्रो रे लिखी राखेया, तेड़ा ई ओ, “जो कमण्ड करो, से सिर्फ प्रभुए पँदि कमण्ड करो।”

2 ओ साथी विश्वासियो! जेबे आऊँ परमेशरो रा पेत सुणांदा ऊआ तुसा गे आया था, तो आऊँ बड़े शब्दा रा या मांणूआ रे ज्ञानो रा इस्तेमाल नि कित्तेया। 2 कऊँकि मैं ये ठाणी ला था कि तुसा बीचे यीशु मसीह, बल्कि क्रूसो पँदि चढ़ाए रे मसीह खे छाडी की ओरी केसी गल्ला खे नि जाणू। 3 आऊँ कमजोर और डरो साथे और बऊत थरथरांदा ऊआ, तुसा साथे रिया 4 और मेरी शिक्षा और मेरे प्रचारो रे ज्ञानो री लुबाणे वालिया गल्ला नि थिया, बल्कि पवित्र आत्मा और सामर्थ रा सबूत था। 5 इजी खे तुसा रा विश्वास मांणूआ रे ज्ञानो पँदि नि, बल्कि परमेशरो री सामर्थ पँदि निर्भर ओ। 6 फेर बी आऊँ तिना लोका खे ज्ञानो रा संदेश सुणाऊँआ, जो आत्मिक तौरो पँदि सिद्ध ए। पर ये ज्ञान ना तो एसा दुनिया रा और ना एसा दुनिया रे हाकिमा राए, जिना रा नाश ऊणा तय ए। (aiōn g165) 7 पर आसे परमेशरो रा से गुप्त ज्ञान, पेतो री रीतिया पँदि बताऊँए, जो परमेशरे जुगो ते आसा री महिमा खे ठराया। (aiōn g165) 8 परमेशरो री एसा योजना खे दुनिया रे हाकिमा बीचा ते किने नि समजेया, कऊँकि जे समजदे तो तेजोमय प्रभुए खे क्रूसो पँदि नि चढ़ादे। (aiōn g165) 9 पर जेड़ा पवित्र शास्त्रो रे लिखी राखेया, “जो गल्ला आखी ते नि देखिया और ना कानो ते सुणिया और जो गल्ला मांणूआ रे चित्तो रे नि चढ़िया सेयो ई आईया, जो परमेशरे आपणे प्यार करने वालेया खे त्यार करी राखिया।” 10 पर परमेशरे इना गल्ला खे पवित्र आत्मा रे जरिए आसा प्रेरिता पँदि प्रगट कित्तेया। पवित्र आत्मा सब गल्ला, बल्कि परमेशरो रिया खास गल्ला बी जाणोआ। 11 मांणूआ बीचा ते कुण केसी मांणूआ री गल्ल जाणोआ? बस मांणूआ री आपणी आत्मा जो तेसरे ए। तियाँ ई परमेशरो री गल्ला कोई नि जाणदा, बस परमेशरो री आत्मा ई जाणोई। 12 पर आसा रे दुनिया रा आत्मा निए, पर से आत्मा पायी राखेया, जो परमेशरो री तरफा ते ए कि आसे तिना गल्ला खे जाणू, जो परमेशरे आसा खे देई राखिया। 13 जेबे आसे ये गल्ला तुसा खे सिखाऊँए तो मांणूआ री तरफा ते आये रे ज्ञानो रा इस्तेमाल नि करदे। बल्कि आसे तिना वचना खे बोलीँए जो आत्मा रे जरिए देई राखे, आत्मिक सच्चाईया री व्याख्या करने खे पवित्र आत्मा रे वचनो खे इस्तेमाल करोए। 14 पर शारीरिक मांणू परमेशरो री आत्मा री सच्चाई ग्रहण नि करदा, कऊँकि सेयो तिना री नजरा रे मूर्खता री गल्ला ए और ना से तिना खे जाणी सकोआ, कऊँकि तिना री परख आत्मिक रीतिया ते ओई। 15 आत्मिक जका सब कुछ जाणोआ, पर से आपू केसी ते नि परखेया जांदा। 16 कऊँकि प्रभुए रा मन किने जाणी राखेया कि तेसखे सखयाओ? पर आसा रे मसीह रा मन ए।

3 ओ साथी विश्वासियो, जेबे आऊँ तुसा साथे था तो तुसा लोका खे गईरी शिक्षा नि देई सकैया जियँ आऊँ आत्मिक लोका खे देऊँआ। मैं तुसा साथे ईयां गल्ला कित्तिया मानो तुसे शारीरिक लोक ए या जेड़े कि मसीह जिन्दगिया रे छोटे बच्चे ओ। 2 तेस बखते मैं तुसा लोका खे परमेशरो रे वचनो री शुरूओ री शिक्षा तो दित्ती पर गईरी शिक्षा नि दित्ती कऊँकि तुसे तेस बखते एड़ी शिक्षा समजणे जोगे नि थे। सच तो ये ए कि तुसे इजी खे एबे बी नि समजी सकदे। 3 तुसे विश्वासी ऊई की बी तुसा र बर्ताव एबुए तक अविश्वासिया जेड़ा ए। आऊँ जाणूआ कि तुसा बीचा ते कई जणे एकी दूजे ते जलो ए और चगड़ा करोए और अविश्वासिया जेड़ा न्याय करोए? क्या तुसे अविश्वासी माणूआ री रीतिया पाँदे नि चलदे? 4 कऊँकि जेबे एक बोलोआ कि आऊँ पौलुसो राए और दूजा कि आऊँ अपुल्लोसो रा, तो क्या तुसा रा सबाओ संसारिक माणूए जेड़ा निए? 5 तो फेर अपुल्लोसो कुणे ए? और पौलुस कुणे ए? आसे लोक परमेशरो रे बस सेवक ईए, जिना रे जरिए तुसे मसीह रे विश्वास कित्तेया। आसा बीचा ते हर कोई से काम करोआ जो काम करने खे प्रभुए देई राखेया। 6 जे आऊँ तुसा री तुलना डोरूआ ते कऊँ तो आऊँ ई से ए जिने तुसा रे दिलो रे वचनो रा बीज बाई राखेया और अपुल्लोसे से सिंजेया। पर परमेशर ईए जिने से बढ़ाया। 7 इजी री खातर ना तो बाणे वाले रा और ना सिंजणे वाले रा कुछ महत्व ए, पर सिर्फ परमेशरो रा महत्व ए जो तिने से बढ़ाई राखेया ए। 8 बाणे वाले और सिंजणे वाले दूई रा एक ई मकसद ए, पर हर एक माणूए आपणी ई मईणता रे मुताबिक परमेशरो ते आपणी मजदूरी पाणी। 9 कऊँकि आसे दोनो मिली की परमेशरो खे काम कऊँए। तुसे कुरिन्थो रे विश्वासी परमेशरो री खेती और परमेशरो रे कअर ए। 10 परमेशरो री तेसा कृपा रे मुताबिक, जो माखे देई राखी, मैं अक्लमंद राजमिस्त्रिए जेड़ी निऊँ पाई और दूजा तेते पाँदे रद्दा राखोआ, पर हर एक माणू चोक्स रओ कि से तेस पाँदे केड़ा रद्दा राखोआ। 11 कऊँकि तेसा निऊँआ खे छाडी की जो पड़ी री ए और से प्रभु यीशु मसीह ए, कोई दूजी निऊँ नि पाई सकदा 12 जे मसीह सेवक परमेशरो री तरफा ते दित्ती री सई शिक्षा खे सिखाओए तो सेयो तेस कअरो खे बनाणे वालेया जेड़े ए जिने सुईना, चाँदी और मईगा पात्थरो जेड़ी अच्छी किस्मा री चीजा रा इस्तेमाल करी की निऊँ बणाई। पर जे से चूठी शिक्षा सिखाओए तो से तेस कअरो खे बनाणे वाले जेड़े ए जो काठ, काआ और पुओ जेड़ा कटिया समानो रा इस्तेमाल करी की निऊँ पाओए। 13 पर न्याय रे दिनो रे आगी रे जरिए प्रकट ऊई जाणा कि हर एक कअर बनाणे वालेया केड़ा काम करी राखेया। आगी रे जरिए हर काम परखेया जाणा कि से काम केड़ा ए। 14 जे केसी रे जरिए बणाया रा कअर तिजी पाँदे बणे रा खड़ा रओगा तो तेस तिजी रा इनाम पाणा। 15 पर जे मसीह केसी माणूए खे बोलोआ कि इने अच्छा काम नि करी राखेया तो तेस माणूए मसीह री तरफा ते इनाम नि पाणा। पर तेस माणूए परमेशरो रे जरिए दित्ती री अनन्त जिन्दगी नि खोणी। 16 क्या तुसे नि जाणदे कि तुसे परमेशरो रा मन्दर ए और परमेशरो री पवित्र आत्मा तुसा रे वास करोआ? 17 जे कोई परमेशरो रे मन्दरो खे नाश करोगा, तो परमेशरो से नाश करी देणा। कऊँकि परमेशरो रा मन्दर पवित्र ए और से मन्दर तुसे ए। 18 कोई आपणे आपू खे तोखा नि देओ, जे तुसा बीचा ते कोई एसा दुनिया री नजरा रे आपणे आपू खे ज्ञानी समजोआ, तो से मूर्ख बणो कि ज्ञानी ऊई जाओ। (1aion g165) 19 कऊँकि एसा दुनिया रा ज्ञान परमेशरो रे नेड़े मूर्खता ए, जेड़ा कि पवित्र शास्त्रो रे लिखी राखेया, “से ज्ञानिया खे तिना री चलाकिया रे फरसाई देओआ।” 20 और फेर पवित्र शास्त्र ये बी बोलोआ, “प्रभु ज्ञानिया रे बचारा खे जाणोआ कि बेकार ए।” 21 इजी री खातर माणूआ पाँदे कोई कमण्ड नि करो कऊँकि सब कुछ तुसा राए। 22 क्या पौलुस, क्या अपुल्लोस, क्या पतरस, क्या दुनिया, क्या जिन्दगी, क्या मरण, क्या बर्तमान, क्या भविष्य, सब कुछ तुसा राए 23 और तुसे मसीह रे ए और मसीह परमेशरो राए।

4 तुसे लोक आसा खे मसीह रे सेवक और परमेशरो रे पेतो रा पण्डारी समजो जिना खे सुसमाचरो री लुकी री सच्चाईया खे समजयाणे रा काम समाली राखी। 2 एबे पण्डारियो ते ये उम्मीद कित्ती जाओई कि से विश्वासो जोगा निकलो। 3 पर मेरी नजरा रे ये बऊत छोटी गल्ल ए कि तुसे या माणूआ रा कोई न्यायी माखे परखो, बल्कि आऊँ बी आपणे आपू खे नि परखदा। 4 कऊँकि मेरा विवेक माखे केसी बी गल्ला रे दोषी नि ठरंदा, पर इजी ते आऊँ निर्दोष नि ठईरदा कऊँकि मेरा परखणे वाला प्रभु ए। 5 तो जदुओ तक प्रभु नि आओ, बखतो ते पईले केसी बी गल्ला रा न्याय नि करो, तेसी तो न्हैरे रे लकोईया रिया गल्ला प्रयासे रे दखाणियां और मनो रे विचार सामणे ल्याऊणे, तेबे परमेशरो री तरफा ते हर एकी री तारीफ ऊणी। 6 ओ साथी विश्वासियो, मैं इना गल्ला रे तुसा खे आपणी और अपुल्लोसो री चर्चा उदारणा री रीतिया पाँदे करी राखी, ताकि तुसे आसा रे जरिए ये सीखो कि कोई बी माणू पवित्र शास्त्रो रे लिखी री गल्ला ते आगे नि बड़ना और एक अगुवे रा पक्ष लयी की दूजे अगुवे रा अनादर करदे ऊए गर्व नि करना। 7 कऊँकि तांदे और दूजे रे कुण भेद करोआ? और तांगे क्या ए, जो तँ दूजे ते नि पाया और जबकि तँ दूजे ते पाई राखेया, तो एड़ा कमण्ड कऊँ करेया कि मानो पाई नि राखेया? 8 तुसे तो रजी गे, तुसे अमीर ऊई चुके, तुसे आसा ते बिना राज्य कित्तेया, पर पला ऊँदा कि तुसे राज्य करदे और आसे बी तुसा साथे राज्य करदे। 9 मेरी समजा रे परमेशरे आसा प्रेरिता खे सबी ते बाद तिना लोका जेड़े ठराया, जिना रे मरने री आज्ञा ऊई चुकी ओ, कऊँकि आसे दुनिया और स्वर्गदूत और माणूआ खे तमाशा ठईरी रे। 10 लोक आसा खे मूर्ख समजोए ए कऊँकि आसे मसीह रा प्रचार कऊँए। पर तुसे लोक ये समजी बैठे कि आसे अक्लमंद मसीह ए। आसे कमजोर समजे जाऊँए ए, पर तुसे आपणे आपू खे तागतबर समजोए। लोक तुसा रा आदर करोए, पर आसा रा नरादर ओआ। 11 आसे इना दिना तक पूखे-त्याये और नांगे ए और मुक्के खाऊँए और मारे-मारे फिऊँए, 12 और आपणे ई आथो रा काम करी की मईणत कऊँए। लोक बुरा बोलोए और आसे तिना खे आशीष देऊँए। सेयो सताओए, आसे सईन कऊँए। 13 सेयो लोक आसा खे बदनाम करोए और आसे तिना ते नरमाईया साथे गल्ल कऊँए। एथो तक एबे बी लोक आसा रा आदर नि करदे सेयो बोलोए कि आसा री कोई बी कीमत नि ए। 14 आऊँ तुसा खे शर्मिंदा करने खे इना गल्ला खे नि लिखदा, पर आपणे प्यारे बालक जाणी की तुसा खे चिताऊँआ। 15 कऊँकि मसीह रे तुसा खे सखयाणे वाले दस हजार बी ऊँदे, तेबे बी तुसा रे पिते बऊत नि ए, इजी री खातर कि यीशु मसीह रे सुसमाचरो रे जरिए आऊँ तुसा रा पिता ऊआ। 16 तो आऊँ तुसा ते बिनती कऊँआ कि मेरी जी चाल चलो। 17 इजी री खातर मैं तीमुथियुसो खे, जो प्रभुए रे मेरा प्यारा और विश्वासो जोगा पाऊ ए, तुसा गे पेजी राखेया और से तुसा खे मसीह रे मेरा चाल-चलण याद कराओगा, जेड़ा कि आऊँ हर जगा, हर एकी मण्डलिया रे इजी रे बारे रे उपदेश कऊँआ। 18 कुछ लोक ये समजी की कमण्ड करी की ईयां फूली गे रे कि मानो आऊँ तुसा गे फेर आऊणा ई नि। 19 पर प्रभु चाओ तो आऊँ तुसा गे चट ई आयी जाणा और तिना कमण्ड कित्ते रिया गल्ला खे नि, पर तिना रे परमेशरो री सामर्थ्य खे बी जाणी लऊँगा कि तिना रे पितरे ये सामर्थ्य आये की नई। 20 कऊँकि परमेशरो रा राज्य गल्ला रे नि ए, पर सामर्थ्य रे ए। 21 तुसे क्या चाओए? क्या आऊँ डण्डा लयी की तुसा गे आऊँ या प्यारो रे और नरमाईया री आत्मा साथे?

5 कुछ लोके माखे बताया कि तुसा रे व्याभिचार ओआ, बल्कि एड़ा व्याभिचार जो अविश्वासिया बीचे पनि ऊँदा कि एक माणू आपणे पिते री लाड़िया साथे व्याभिचार करोआ। 2 इजी ते अलावा इना गल्ला री बजअ ते तुसा खे शर्मिंदा ऊई की शोग करना चाईयो था पर तुसे कमण्ड करोए। एड़ा काम करने वाले माणूए खे तो तुसा बीचा ते निकाली देणा चाईयो था। 3 शारीरिक तौरो पाँदे तुसा बीचे मौजूद ना ऊणे पाँदे बी आऊँ तुसा बीचे आत्मा रे मौजूद ए। आऊँ तेस बुरा काम करने वाले माणूए रे खलाफ आपणा

फैंसला यीशु मसीह रे नाओं ते देई चुके रा मानो आँऊ तेती आपू मौजूद ए। 4 जेबे तुसे मण्डलिया रे कट्टे ओए तेस बखते आँऊ तुसा साथे आत्मा रे मौजूद रणा और ईयाँ ई आसा रे प्रभु यीशुए री सामर्थ बी तुसा बीचे मौजूद रणी। 5 तेबे तुसे तेस माणूए खे बारे निकाली देओ और शैतानो रे हवाले करी देओ ताकि तेसरा पापी सबाओ शरीरो रा नाश ओ पर तेसरी आत्मा प्रभु यीशुए रे दिनो रे उद्धार पाओ। 6 तुसा रा कमण्ड करना ठीक निए, क्या तुसे नि जाणदे कि थोड़ा जा सजेड़ा पूरे गुँदे रे आटे खे सजेड़ा करी देओआ। 7 पुराणा सजेड़ा निकयाली की आपणे आपू खे शुद्ध करो कि नया गुँदे रा आटा बणी जाओ, ताकि तुसे बिना सजेड़े वाली फसह रे त्योआरो री रोतिया जेड़े ओ, कऊँकि आसा रा बी फसह जो मसीह ए, बलिदान ऊई रा। 8 तो आओ आसे त्योआरो रे खुशी मनाईये, ना तो पुराणे सजेड़े की और ना बुराई और दुष्टता रे सजेड़े की, पर सीदी और सच्ची बिना सजेड़े री रोतिया ते। 9 मैं आपणी पिछली चिट्ठिया रे तुसा खे लिखी राखेया कि व्याभिचारिया री संगति नि करना। 10 ये नि कि तुसे बिल्कुल ई एसा दुनिया रे व्याभिचारी या लोबी या अन्दर करने वाले या मूर्तिपूजका री संगति नि करो। कऊँकि एते दशा रे तो तुसा खे दुनिया ते निकली ई जाणा पड़दा। 11 मेरे बोलणे रा मतलब ये कि जे कोई मसीह रा विश्वासी बोली की व्याभिचारी, लोबी, मूर्तिपूजक, गाली देणे वाला, पिचकड़ या अन्दर करने वाला ओ, तो तेसरी संगति नि करो, बल्कि एड़े माणूआ साथे रोटी पनि खाओ। 12 माखे मण्डलिया ते बारलेया अविश्वास लोका रा न्याय करने ते क्या काम? पर पक्के तौरों पाँदे मण्डलिया रे पितरे पाप करने वाले लोका रा न्याय करने री जिम्मेवारी तुसा री ए। 13 पर मण्डलिया ते बारलेया अविश्वासिया रा न्याय परमेशर करोआ। इजी री खातर तेस कुकर्मियों खे आपू बीचा ते बारे निकयाली देओ।

6 क्या तुसा बीचा ते केसी खे बी इतनी इम्मत ए कि जेबे दूजे साथे चगड़ा ओ, तो तेबे न्याय करने खे पापिया गे जाओ और परमेशरो रे लोका गे नि जाओ? 2 क्या तुसे नि जाणदे कि परमेशरो रे लोका दुनिया रा न्याय करना? तो जेबे तुसा दुनिया रा न्याय करना ए, तो क्या तुसे छोटे ते छोटे चगड़े रा न्याय करने जोगे पनिए? 3 क्या तुसे नि जाणदे कि आसा स्वर्गदूता रा न्याय करना? तो क्या दुनिया री गल्ला रा न्याय नि करिए? 4 जे तुसा बीचे कुछ दुनिया री गल्ला रा कुछ चगड़ा ए तो फैंसला करवाणे खे बारलेया लोका गे कऊँ जाओए जो मण्डलिया री नजरा रे कुछ नि समजे जाँदे? 5 आऊँ तुसा खे शर्मिदा करने खे ये बोलीँआ। क्या तुसा बीचे सच्ची कोई बी अक्लमंद नि मिलदा, जो आपणे साथी विश्वासिया रा न्याय करी सको? 6 बल्कि एक विश्वासी दूजे विश्वासिये रे खलाफ मुकद्दमा करोआ और से बी अविश्वासिया सामणे। 7 जे तुसा बीचे एकी दूजे रे खलाफ चगड़े रा मुकद्दमा चली रा ओ तो तुसे पईले ई आरी चुके रे। इजी रे बजाए तुसे ये अन्याय कऊँ नि सईन करदे? आपणा नुकशाण कऊँ नि सईन करदे? 8 इजी रे बदले तुसे आपू ई अन्याय करोए और तोखा देओए और से बी साथी विश्वासिया खे। 9 क्या तुसे नि जाणदे कि अन्यायी लोक परमेशरो रे राज्य रे बारस नि ऊणे? तोखा नि खाओ; ना वेश्यागामी, ना मूर्तिपूजा, ना परस्त्रीगमन, ना लुच्चे, ना पुरुषगामी, 10 ना चोर, ना लोब, ना पिचकड़, ना गाली देणे वाला, ना अन्दर करने वाले परमेशरो रे राज्य रे बारस ऊणे। 11 और तुसा बीचे कितणे तो एडे ई थे, पर तुसे प्रभु यीशु मसीह रे नाओं ते और म्हारे परमेशरो री आत्मा ते तोए राखे और पवित्र ऊए और तर्मी ठईरे। 12 जे तुसा बीचा ते कोई ये बोली, “माखे सब कुछ करने री जाज़त ए” पर सब कुछ मेरे फाईदे री निया। आँऊ बी बोली सकूँआ, “माखे सब कुछ करने री जाज़त ए,” पर मां केसी बी चीजा रा गुलाम नि बणना। 13 कोई ये बी बोलोगा, “रोटी पेटो खे ए और पेट रोतिया खे ए” ये गल्ल सच ए पर परमेशरो पेट और रोटी दोनो नाश करी देणे। शरीर व्याभिचारो खे निए, बल्कि प्रभुए खे ए और प्रभु शरीरो री देख-रेख करने वाला ए। 14 परमेशरे जिंयाँ आपणी सामर्थाँ साथे प्रभु जिऊँदा कितेया तियाँ ई आसे बी तेस आपणी सामर्थाँ ते जिऊँदे करने। 15 क्या तुसे नि जाणदे कि तुसा रा शरीर मसीह रे शरीरो रा अंग ए? तो क्या

आऊँ मसीह रे अंग लयी की तिना खे वेश्या रे अंग बणाऊँ? कदी पनि। 16 क्या तुसे नि जाणदे कि जो कोई वेश्या साथे व्याभिचार करोआ, से तेसा साथे एक तन ऊई जाओआ? कऊँकि से पवित्र शास्त्रो रे लिखी राखेया, “सेयो दोनो एक तन ऊणे।” 17 और जो प्रभुए री संगतिया रे रओआ, से तेस साथे एक आत्मा ऊई जाओआ। 18 व्याभिचारो ते बचे रे रओ। माणू जितणे पाप करोआ, सेयो शरीरो ते बारे ए, पर व्याभिचार करने वाला आपणे ई शरीरो रे खलाफ पाप करोआ। 19 क्या तुसे नि जाणदे कि तुसा रा शरीर पवित्र आत्मा रा मन्दर ए? से तुसा खे परमेशरो री तरफा ते मिली रा और से तुसा रे बसे राए। तुसा पाँदे तुसा रा आपणा अक्क निए। 20 कऊँकि प्रभुए तुसे आपणी जिन्दगिया रा दाम देई की मोले लयी राखे। इजी री खातर आपणे शरीरो रे जरिए परमेशरो री महिमा करो।

7 एबे मां तिना सवालो रा जवाब देणा जो तुसे चिट्ठी लिखी की मांते पूछेया, “क्या लोका खे ब्या करना ठीक ए?” 2 इजी रे बारे रे मेरा बिचार ये ए कि व्याभिचारो रे डरो ते हर एक मर्दो री लाड़ी और लाड़िया रा लाड़ा ओ। 3 लाड़ा आपणी लाड़िया रा अक्क पूरा करो और तियाँ ई लाड़ी बी आपणे लाड़े रा अक्क पूरा करो। 4 लाड़िया खे आपणे शरीरो पाँदे अक्क निए, बल्कि तेसा रे लाड़े रा अक्क ए, तियाँ ई लाड़े खे बी आपणे शरीरो पाँदे अक्क निए, पर लाड़िया राए। 5 तुसे एकी दूजे ते लग नि रओ, पर कुछ बखतो तक आपू बीचली रजाबंदिया ते कि प्रार्थना खे बखत मिलो। फेर साथे रओ, एड़ा नि ओ कि तुसा रे असंयमे की शैतान तुसा खे परखो। 6 आऊँ जो ये बोलीँआ से सिर्फ सलाह ए पर आज्ञा रे तौरों पाँदे निए। 7 आऊँ ये चाऊँआ कि जेड़ा आऊँ अया, तेड़े ई सब माणू ओ, पर हर एकी खे परमेशरो री तरफा ते खास-खास बरदान मिली रे, केसी खे केड़ा और केसी खे ओरी तरअ रा। 8 पर आऊँ कुआँरे और बिदुआ रे बारे रे बोलीँआ कि तिना खे एड़े ई रणा ठीक ए, जेड़ा आऊँ ए। 9 पर जे सेयो संयम नि करी सको, तो ब्या करी लो, कऊँकि ब्या करना कामातुर रणे ते ठीक पला ए। 10 जिना रा ब्या ऊई चुके रा, तिना खे आऊँ नि, पर प्रभु आज्ञा देओआ कि लाड़ी आपणे लाड़े ते लग नि रओ। 11 और जे लग बी ऊई जाओ तो बिना दूजे ब्याओ ते रओ या आपणे लाड़े साथे फेर मेल-जोल करी लो और ना ई लाड़ा आपणी लाड़िया खे छाडो। 12 दूजे खे प्रभु नि पर आऊँ ई बोलीँआ, जे केसी विश्वासी पाईए री लाड़ी आसा रे प्रभुए रे विश्वास नि राखदी ओ और तेस साथे रणे ते खुश ओ, तो से तेसा खे नि छाडो। 13 और जेसा विश्वासी जवाणसा रा लाड़ा आसा रे प्रभुए रे विश्वास नि राखदा ओ और तेसा साथे रणे ते खुश ए, से लाड़े खे नि छाडो। 14 कऊँकि एड़ा लाड़ा जो विश्वास नि राखदा ओ, से लाड़िया री बजअ ते पवित्र ठईरोआ और एड़ी लाड़ी जो विश्वास नि राखदी, लाड़े री बजअ ते पवित्र ठईरोई, नई तो तुसा रे बाल-बच्चे अशुद्ध ठईरदे, पर एबे पवित्र ए। 15 पर जो मर्द विश्वास नि राखदा, जे से लग ऊणा चाओआ, तो लग ऊणे देओ, एड़ी दशा रे कोई बी विश्वासी पाई या बईण बंदनो रे निए, पर जे ऊई सको तो आपणे अविश्वासी लाड़े या लाड़िया साथे ब्याओ रे बंदनो रे बणे रे रओ कऊँकि परमेशरे आसे मेल-जोलो खे बुलाई राखे। 16 ओ लाड़ियो! तुसे याद राखो कि तुसा री बजअ ते तुसा रे लाड़े उद्धार पाई सकोए और ओ लाड़ियो! तुसे बी याद राखो कि तुसा री बजअ ते तुसा री लाड़िया उद्धार पाई सकोईया। 17 जो आँऊ बोलणे लगी रा तिजी रा निचोये ये ए कि हर एक माणू जेसा बी दशा रे परमेशरे बुलाई राखेया तिजी रेई बणेया रा रओ और तिजी रे मुताबिक ई आपणी जिन्दगी जिओ। आँऊ सबी मण्डलिया खे येई नियम ठराऊँआ 18 जे प्रभुए रे विश्वास करने ते पईले केसी रा खतना ऊई चुकी रा तो से बिना खतने रा नि बणो। जे प्रभुए रे विश्वास करने ते पईले केसी रा खतना नि ऊई रा ओ तो से खतना नि कराओ। 19 ना खतना कुछ अया और ना बिना खतने ते, पर परमेशरो री आज्ञा खे मानणा ई सब कुछ ए। 20 हर एक माणू जेसा बी दशा रे परमेशरे बुलाई राखेया तिजी रेई बणेया रा रओ। 21 जे तूँ दासो री दशा रे बुलाई राखेया, तो चिन्ता नि कर। पर जे दासत्व ते आज्ञा ऊणे रा मौका मिलो तो एते मौके रा फाईदा जरूर उठा।

22 कऊँकि जो दासो री दशा रे प्रभुए रे बुलाई राखेया, से प्रभुए रा आजाद कित्ते राए और तियाँ ई जो आजादिया री दशा रे बुलाई राखेया, से मसीह रा दास ए। 23 परमेशरे बऊत बडी कीमत चुकाई की तुसे मोले लयी राखे, माँगूआ रे दास नि बणो पर परमेशरो रे दास बणो। 24 ओ साथी विश्वासियो, जो जेडी दशा रे बुलाई राखेया, से तिदे ई परमेशरो साथे रओ। 25 कुआँरिया रे बारे रे प्रभुए री कोई आज्ञा माखे नि मिली, पर प्रभुए आपणी दया ते माखे ज्ञान देई राखेया जेते पाँदे परोसा करेया जाई सकोआ और तिजी रे मुताबिक आँऊ राय देऊँआ। 26 आँऊ समजूँआ कि आज-काल के क्लेशो रे येई अच्छा ए कि माँगू जेडी दशा रे आए, तेडी ई दशा रई रओ। 27 जे तेरी लाडी आए, तो तेसा ते लग ऊणे री कोशिश नि कर। जे तेरे लाडी निए, तो लाडिया री टोल नि कर 28 फेर बी जे तूँ ब्या बी करे, तो इदे कोई पाप निए। जे कोई कुआँरी बेदिया ब्या करोई तो से पाप नि करदी। पर एडे लोका खे एस जिन्दगिया रे शारीरिक दुः ख सईणे पडने। आऊँ तुसा लोका खे इना तेई बचाणा चाऊँआ। 29 ओ साथी विश्वासियो, आऊँ ये बोलूँआ कि बखत कम करी ता रा, इजी री खातर चाईयो कि जिना रे लाडी आए, सेयो तेडे ओ, मानो तिना रे लाडी निए। 30 और रोणे वाले एडे ओ, मानो रंदि नि और खुशी करने वाले एडे ओ, मानो खुशी नि करदे और मोले लणे वाले एडे ओ कि मानो तिना गे कुछ अया ई नि। 31 एसा दुनिया साथे बर्ताव करने वाले एडे ओ कि दुनिया रेई नि ऊई जाओ, कऊँकि एसा दुनिया रे रीति और सबओ बदलदा जाओआ। 32 मेरी इच्छा ये ए कि तुसे दुनिया री लालसा ते दूर रओ। कुआँरा मर्द प्रभुए री सेवा चिन्ता रे रओआ कि प्रभुए खे कियँ खुश राखिए। 33 पर ब्याए रा माँगू दुनिया री चिन्ता रे रओआ कि आपणी लाडिया खे कियँ खुश राखूँ। 34 ब्याईया री और कुआँरिया री पसंदा रे बी फर्क ए। कुआँरी एसा चिन्ता रे रओई कि से प्रभुए री कियँ सेवा करो। से शरीर और आत्मा दूँई रे पवित्र ऊणे री कोशिश करदी रओई। पर ब्याई री दुनिया री चिन्ता रे रओई कि आपणे लाडे खे खुश राखूँ। 35 ये गल्ला तुसा रेई फाईदे खे बोलूँआ, ना कि तुसा खे फसाणे खे, बल्कि इजी री खातर कि जेडा शोभा देओआ, तेडा ई करेया जाओ कि तुसे एक चित्त ऊई की प्रभुए री सेवा रे लगे रे रओ। 36 जे कोई ये समजो कि आऊँ आपणी तेसा कुआँरिया रा अक्क मारने लगी रा, जेसारी जवानी टली जाओई और जरूरत बी ओ, तो जेडा चाओ, तेडा करो, इदे पाप निए, से तेसा रा ब्या ऊणे देओ। 37 पर जो मनो रे पक्का रओआ और तेसखे जरूरत नि ओ, बल्कि आपणी इच्छा खे पूरी करने रा अक्क राखोआ और आपणे मनो रे ये गल्ल ठाणी ली री ओ कि माँ आपणी बेटी कुआँरी राखणी, से पला करोआ। 38 आपणी कुआँरिया रा ब्या करी देओआ, से खरा करोआ और जो ब्या नि करदा, से ओर बी खरा करोआ। 39 जदुओ तक केसी जवाणसा रा लाडा जिऊँदा रओआ, तदुओ तक से तेसते बंदी री ए, पर जेबे तेसा रा लाडा मरी जाओआ, तो जेस साथे चाओ, ब्या करी सकोई, पर बस प्रभुए रे। 40 पर जेडी आए जे तेडी ई रओ, तो मेरे ख्यालो ते ओर बी धन्य ए और आऊँ समजूँआ कि परमेशरो री आत्मा मांदे बीए।

8 तुसा री चिटिया रे तुसे लोके मूर्तिया रे सामणे बलि किन्ती रिया चीजा रे बारे रे पूछेया था। इजी रे बारे रे आसा सबी खे ज्ञान ए; पर ज्ञान आसा रे कमण्ड पैदा करोआ, पर प्यारो ते तरक्की ओई। 2 जे कोई समजो कि आऊँ कुछ जाणूँआ, तो जेसरे बारे रे जाणना चाईयो, तेसरे बारे रे तो एबुए तक कुछ जाणेया नि। 3 पर जे कोई परमेशरो ते प्यार राखोआ, तो तेसखे परमेशर पछयाणोआ। 4 तो फेर आँऊ मूर्तिया रे सामणे बलि किन्ती रिया चीजा खे खाणे रे बारे रे उतर देणा चाऊँआ। आसे जाणूँए कि मूर्ति दुनिया रे कोई चीज निए और एकी खे छाडी की ओर कोई परमेशर निए। 5 हालाँकि सर्गो रे और तरतिया रे बऊत सारी चीजा खे ईश्वर और प्रभु बोलोए। पर तिना बीचा ते कोई बी ईश्वर और प्रभु निए 6 तेबे बी आसा रे नेडे तो एक ई परमेशर ए, मतलब-पिता, जेसारी तरफा ते सब चीजा ए और आसे तेसखे ई आए और एक ई प्रभु ए, मतलब-यीशु मसीह, जेसरे जरिए सब कुछ ऊईया

और आसे बी तेसरे ई जरिए ए। 7 पर सबी खे ये ज्ञान निए, पर कितणे तो एबुए तक मूर्तिया खे कुछ समजणे री बजअ ते, मूर्तिया रे सामणे बलि किन्ती रिया चीजा खे मूर्तिया रा प्रसाद समजो की खाई लओए और तिना रे एस कामो ते तिना रा विवेक कमजोर ऊणे री बजअ ते अशुद्ध ऊई जाओआ। 8 रोटी आसा खे परमेशरो रे नेडे नि पऊँछाँदी, जे आसे नि खाऊँ, तो आसा रा कुछ काअटा निए और जे खाईये, तो कुछ फाईदा निए। 9 पर चौकस रओ, एडा नि ओ कि तुसा री ये आजादी केथी कमजोरा खे ठोकरा री बजअ ऊई जाओ। 10 कऊँकि जे कोई ताखे ज्ञानियो खे मूर्तिया रे मन्दरो रे रोटी खाँदा ऊआ देखो और से जो मनो ते कमजोर ओ, तो क्या तेसरा कमजोर मन तेते हदा तक नि पटकी जाणा कि तेसरी मूर्तिया रे सामणे बलि किन्ती री चीजा खे खाणे री इम्मत नि ऊई जाणी? 11 एसा रीतिया रे तेरे ज्ञानो री बजअ ते से पाई जेसरा विश्वास कमजोर ए, जेसखे मसीह मरेया, नाश ऊई जाणा। 12 ईयाँ विश्वासी पाईया रे खलाफ पाप करने और तिना रे विवेको खे जो कमजोर ए चोट पऊँछाणे रे जरिए तुसे यीशु मसीह रे खलाफ पाप करोए। 13 इजी बजअ ते जे रोटी मेरे केसी विश्वासी पाईए खे ठोकर खुलाओ, तो माँ कदी बी केसी रीतिया ते मांस नि खाणा, एडा नि ओ कि आऊँ आपणे विश्वासी पाईए खे ठोकरा री बजअ बणूँ। (ai0n g165)

9 आऊँ से सब कुछ करने खे आजाद ए जो आँऊ चाऊँआ। आऊँ एक प्रेरित ए। मैं यीशुए खे जो म्हारा प्रभु ए देखी राखेया। मेरे ई जरिए तुसे मसीह पाँदे विश्वास कित्तेया। 2 आऊँ ओरी री नजर रे चाए प्रेरित नि बी ए तेबे बी तुसा री तई तो प्रेरित ए। आँऊ सेईए जो तुसा बीचे सुसमाचार लयी की आया। प्रभु यीशुए रे तुसा रा विश्वास साफ-साफ बताओआ कि आँऊ मसीह रा प्रेरित ए। 3 जो लोक मेरी प्रेरिताईया रे बारे रे सवाल पूछोए तिना खे मेरा येई जवाब ए! 4 बरनबास और माखे पक्के तौरो पाँदे प्रेरिता रे रूपो रे आपणे कामो रे बदले खाणे-पीणे री चीजा लणे रा अक्क ए। 5 ओरी प्रेरिता और प्रभुए रे पाई और पतरसो साई माखे बी मसीह पाँदे विश्वास करने वाली जवाणसा साथे ब्या करी कि आपू साथे लयी चलणे रा अक्क ए। 6 माखे और बरनबासो खे बी ओरी प्रेरिता जेडे पैसेया री मताद पाणे रा अक्क ए और आसा खे आपणी जिन्दगी जिऊणे खे काम करने री जरूरत निए। 7 एडा कोई सिपाई निए जो आपणा ई पैसा खर्च करी की सिपाईए रा काम करोआ। एडा कोई जिम्मीदार निए जो अँगूरा रा बगीचा लगाई की तिजी रा फल नि खाँदा ओ। एडा कोई माँगू निए जो डंगर पाली की तिना रा दूद नि पीँदा ओ। 8 आऊँ इना गल्ला खे सिर्फ माँगूआ रे बिचारे रे आधारो पाँदे नि बोलदा। मूसे रा बिधान बी येई गल्ला बोलाई। 9 कऊँकि मूसे रा बिधानो रे लिखी राखेया, “खल्याणो रे जोडे रे बखते चलदे ऊए बलदा रा मूँ नि बानणा।” क्या परमेशर बलदा री ई चिन्ता करोआ? 10 या खास करी की आसा खे बोलोआ। आ, आसा खेई लिखी राखेया, कऊँकि खरा ए कि डोरू बाणे वाला उम्मीदा साथे बाओ और खलयाणो रे पूए ते अन्न लग करने वाला फसला रा अक्कदार ऊणे री उम्मीद तो राखोआ। 11 जे आसे तुसा दे आत्मिक बीज बाई राखे, तो क्या शारीरिक रोटिया री उम्मीद करनी कोई बडी गल्ल ए? 12 जे ओरी रा तुसा पाँदे ये अक्क ए, तो क्या आसा रा इजी ते जादा नि उणा? फेर बी आसे ये अक्क कामो रे नि ल्याए। पर सब कुछ सईन करूँए, ताकि आसा री बजअ ते मसीह रे सुसमाचारो रे कोई रुकावट नि ओ। 13 क्या तुसे नि जाणदे कि जो पवित्र चीजा री सेवा करोए, सेयो मन्दरो ते खाओए और जो बेदिया री सेवा करोए, सेयो बेदिया साथे अक्कदार ओए। 14 ईयाँ प्रभुए री ये आज्ञा ए कि जो लोक सुसमाचारो रा प्रचार करोए तिना री आऊँदणी सुसमाचारो ते ओ। 15 पर इना अधिकारा बीचा ते मैं एकी रा बी कदी इस्तेमाल नि कित्तेया। ये गल्ला मैं इजी खे बी नि लिखिया कि एडा कुछ मेरे बारे रे कित्तेया जाओ। बजाए इजी रे की कोई मांते तेसा गल्ला खेई छीनी लओ जेतेरा माखे गर्व ए। इजी ते तो आँऊ मरी जाणा ई खरा समजूँआ। 16 जे आऊँ सुसमाचार सुणाऊँ, तो इदे माखे कोई कमण्ड करने री गल्ल निए। कऊँकि सुसमाचार सुनाणा माखे

दिती री जिम्मेवारी ए और जे आऊँ सुसमाचारि नि सुणाऊँ, तो माखे हाय! 17 जे आऊँ आपणी इच्छा ते ये काम करूँआ तो माखे तिजी री मजदूरी मिली जाणी। पर जे आऊँ ये काम बिना इच्छा ते करूँआ जेते री जिम्मेवारी परमेशरे माखे देई राखी तो आऊँ मजदूरिया री उम्मीद नि करी सकदा। 18 तो फेर मेरी कुण जी मजदूरी ए? से ये कि आऊँ बिना कुछ लये सुसमाचारो रा प्रचार मुप्तो ते करूँआ। और सुसमाचारो ते जूड़े आपणे अक्को रा पुरा इस्तेमाल नि करदा। 19 हालाँकि आऊँ केसी रे बी अधीन नि ए फेर बी मैं आपणे आपू खे सबी रा दास बणाईता रा कि आऊँ जादा ते जादा लोका खे मसीह हे खिंजी की ल्याऊँ। 20 आऊँ यहूदिया खे यहूदी बणेया ताकि, यहूदिया खे मसीह हे खिंजी की ल्याऊँ। जो लोक बिधानो रे अधीन ए, तिना री खातर आऊँ बिधानो रे अधीन ना ऊँदे ऊए बी बिधानो रे अधीन बणेया कि तिना खे जो बिधानो रे अधीन ए, खिंजी की ल्याऊँ। 21 तियाँ ई जो लोक बिधानो रे अधीन नि ए तिना खे मसीह हे ल्याऊणे खे तिना जेड़ा ई आऊँ बी बणीगा। हालाँकि मसीह रा बिधानो रे अधीन ऊणे री बजअ ते आऊँ आपू परमेशरो रा बिधानो ते आजाद नि ए। 22 आऊँ कमजोरा खे, कमजोर जा बणेया कि कमजोरा खे मसीह हे खिंजी की ल्याऊँ, आऊँ सबी मांगूआ खे सब कुछ बणेया कि कियॉँ ना कियॉँ कइयाँ जणेया खे बचाऊँ। 23 आऊँ सब कुछ सुसमाचारो खे करूँआ, ताकि ओरी साथे तिजी रा अक्कदार ऊई जाऊँ। 24 क्या तुसे नि जाणदे कि दौड़ा रे तो सब दौड़ोए, पर इनाम एक ई लयी जाओआ? तुसे तेडे ई दौड़ो, ताकि जीती जाओ। 25 हर एक पर्दलवाण सबी किजी रा संयम करोआ, सेयो तो एक मुरजाणे वाले मुकुटो खे पाणे री खातर इतणा सब करोए, पर आसे तो तेस मुकुटो खे करूँए, जो मुरजाणा नि। 26 इजी री खातर आऊँ तेस मांगूए जेड़ा दौड़ोआ, जेसरे सामणे एक लक्ष्य ए, आऊँ अवा रे मुक्के नि बाँदा। 27 आऊँ आपणे शरीरो खे बाऊँआ और कुट्टुँआ और बसो रे ल्याऊँआ, एड़ा नि ओ कि ओरी खे प्रचार करी की आऊँ आपू ई केसी रीतिया ते नकम्मा ठईरूँ।

10 ओ साथी विश्वासियो, आऊँ चाऊँआ कि तुसे लोक तिना गल्ला खे याद करो कि आसा रे सब बाप-दादे बादलो ते थाले थे और सब के सब समुद्रो रे बीचा ते पार ऊईगे 2 आसे ये बोली सकूँए कि जियाँ आसे प्रभु यीशुए रे विश्वासी ऊणे खे बपतिस्मा लया तियाँ ई तिने लोके बी बादलो रे और समुद्रो रे मूसे रा बपतिस्मा लया। 3 और सबी एक ई आत्मिक रोटी खाई। 4 और सबी एक ई आत्मिक पाणी पिया, कऊँकि सेयो तेसा आत्मिक चट्टानी ते पियो थे, जो तिना साथे-साथे चलो थी और से चट्टान मसीह था। 5 पर परमेशर तिना बीचा ते कई जणेया ते खुश नि ऊआ, इजी री बजअ ते सेयो सुनसाण जगा रे मरी गे। 6 यो सब गल्ला आसा खे चेतावणी ए कि जेड़ा आसा रे बाप-दादेया लालच कित्तेया, तेड़ा आसे बुरी चीजा रा लालच नि करूँ 7 और ना तुसे मूर्तिया खे पूजणे वाले बणो, जेड़ा कि तिना बीचा ते कई जणे बणी गे थे, जेड़ा पवित्र शास्त्रो लिखी राखेया, “लोक खाणे-पीणे बैठे और खेलणे-कूदणे ऊठे।” 8 ना आसे ब्याभिचार करूँ, जेड़ा तिना बीचा ते कई जणे कित्तेया, और एकी दिनो रे तेई हजार लोक मरी गे। 9 ना ई आसा खे प्रभु परखणा चाईयो, जेड़ा तिना बीचा ते कई जणे कित्तेया और सापो रे जरिए नाश कित्ते। 10 ना ई तुसे कुड़कुड़ाओ, जियाँ तिना बीचा ते कई जणे कुड़कुड़ाए और नाश करने वाले स्वर्गदूतो रे जरिए नाश कित्ते 11 पर तिना पाँदे बीती रिया सेयो सारिया गल्ला चिह्न थिया और सेयो आसा री चेतावणिया खे लिखी राखिया जो दुनिया रे आखरी बखतो रे रओए। (aiōn g165) 12 इजी री खातर जो ये समजोआ कि आऊँ विश्वासो रे मजबूत ए, से चौकस रओ। केथी एड़ा नि ओ कि रूडी जाओ। 13 तुसे केसी एड़ी परीक्षा रे नि पड़े, जो मांगूआ रे सईणे ते बारे ओ। पर परमेशर विश्वासो जोगा ए और तेस तुसे सामर्था ते बारे परीक्षा रे नि पड़ने देणे, बल्कि परीक्षा साथे-साथे तिजी ते बचणे री बात बी परमेशरो तुसा खे देणी, ताकि तुसे सईन करी सको। 14 इजी बजअ ते ओ मेरे साथी विश्वासियो, मूर्तिपूजा ते बचे रे रओ। 15 आऊँ अक्लमंद जाणी की तुसा खे बोलूँआ तिजी रे बारे रे सोचो कि से

ठीक ए कि नि। 16 से धन्यवादो रा कटोरा, जेस पाँदे आसे धन्यवाद करूँए, क्या आसा खे मसीह रे खूनो दे साजेदार नि बणांदा? से रोटी जो आसे तोड़ुए, क्या आसा खे मसीह रे शरीरो दे साजेदार नि बणांदा? 17 कऊँकि एक ई रोटी ए, तो आसे बी जो बऊत ए, एक शरीर ए, कऊँकि आसे सब तेसा एक ई रोटिया रे इस्सेदार ओऊँए। 18 जो शरीरो ते तो इस्राएली ए, तिना री रवाजा खे देखो। जेबे सेयो लोक बेदिया पाँदे चढ़ाई री बलिया खे खाओए तो सेयो परमेशरो री आराधना रे इस्सेदार बणी जाओए। ईयाँ ई जो लोक मूर्तिया पाँदे चढ़ाई राखी रोटी खाओए तो सेयो मूर्तिया री पूजा रे बी इस्सा लओए। 19 फेर मेरे बोलणे रा क्या मतलब ए? क्या ये कि मूर्तिया रे आगे कित्तेया रा बलिदान कुछ आए, या मूर्ति कुछ आए? ना। 20 बल्कि ये कि दूजी जाति जो मूर्तिया खे बलिदान करोई, से परमेशरो खे नि ए, पर दुष्टात्मा खे बलिदान करोए और आऊँ नि चांदा कि तुसे दुष्टात्मा रे सहभागी ओ। 21 तुसे प्रभुए रे कटोरे और दुष्टात्मा रे कटोरे, दूई ते नि पी सकदे। तुसे प्रभुए री मेज और दुष्टात्मा री मेज, दूई रे साजे नि ऊई सकदे। 22 जे तुसे लोक एड़ा करोए तो पक्का ई प्रभुए खे रोष दलाऊँए। याद राखो कि तुसे प्रभुए ते बढ़ी की तागतबर नि ए? 23 जे तुसा बीचा ते कोई ये बोलो, “माखे सब कुछ करने री जाज़त ए” पर सब कुछ तुसा खे ठीक निया। तुसे बोलोए, “माखे सब कुछ करने री जाज़त ए” पर सब कुछ फाईदे रा नि ए। 24 कोई आपणी ई पलाईया खे नि टोलो, बल्कि ओरी री बी। 25 जो कुछ कसाईया रे गे बिकोआ, से खाओ और विवेको री बजअ ते कुछ नि पूछो। 26 पवित्र शास्त्र बोलोआ, “कऊँकि तरती और तरतिया रे जो कुछ बी ए सब कुछ प्रभुए रा ईए।” 27 जे अविश्वासिया बीचा ते कोई तुसा खे निऊँदा देओ और तुसे जाणा चाओए, तो जो कुछ तुसा सामणे राखेया जाओआ सेई खाओ और विवेको री बजअ ते कुछ नि पूछो। 28 पर जे कोई तुसा खे बोलो कि ये तो मूर्तिया खे बलि किनी री चीज ए, तो तेस बताणे वाले री बजअ ते और विवेको री बजअ ते नि खाओ। 29 मेरा मतलब, तुसा रे आपणे विवेको ते नि ए पर दूजे मांगूए रे विवेको ते ए। मेरी आजादी कऊँ केसी दूजे मांगूए री बजअ ते परखी जाओ। 30 जे आऊँ धन्यवादो री प्रार्थना करी की रोटिया रे साजा ओऊँआ, तो माँ पाँदे दोष कऊँ लगाया जाओआ। जेतेखे मैं परमेशरो रा धन्यवाद करी राखेया। 31 तो तुसे चाए खाओ, चाए पियो, चाए जो कुछ करो, सब कुछ परमेशरो री महिमा खे करो। 32 तुसे ना तो यहूदी और ना दूजी जातिया खे और ना ई परमेशरो री मण्डलिया खे ठोकरा री बजअ बणो। 33 आऊँ बी सबी गल्ला रे सबी खे खुश राखणे री कोशिश करूँआ और आऊँ आपणे पले नि, पर ओरी रे पले रा त्यान राखूँआ ताकि सेयो उद्धार पाओ।

11 जेड़ा आऊँ मसीह री जी चाल चलूँआ, तुसे मेरी जी चाल चलो। 2 आऊँ तुसा खे सराऊँआ कि सबी गल्ला रे तुसे माखे याद करोए और जो शिक्षा मैं तुसा खे देई राखी, तिजी रा सावदानिया साथे पालण करदे रओ। 3 पर आऊँ चाऊँआ कि तुसे एसा गल्ला खे जाणी लो कि हर एकी मर्दो रा सिर मसीह ए और जवाणसा रा सिर मर्द ए और मसीह ए और सिर परमेशर ए। 4 जो मर्द सिर टकी की प्रार्थना और भविष्यबाणी करोआ, से मसीह री बेज्जती करोआ जो कि तेसरा सिर ए। 5 पर जो जवाणस क्वाड़े सिर प्रार्थना या भविष्यबाणी करोई, से आपणे लाड़े री बेज्जती करोई जो कि तेसा रा सिर ए, कऊँकि से गँजी ऊणे रे बराबर ए। 6 जे जवाणस चादरु नि टखो, तो बालू बी कटाई लो, जे जवाणसा खे बालू कटवाणा या सिर गँजा करना शर्मा री गल्ल ए, तो चादरु टखो। 7 आ, मर्दो खे आपणा सिर टकणा ठीक नि ए, कऊँकि मर्द परमेशरो रे रूपो रे बणाई राखेया और से तेसरी महिमा ए, ईयाँ ई जवाणस बी मर्दो री महिमा खे दखाओई। 8 कऊँकि पईला मर्द आदम जवाणसा ते नि ऊआ, पर पईली जवाणस हव्वा मर्दो ते ऊई। 9 और मर्द जवाणसा खे नि बणाया, पर जवाणस मर्दो री तँई बणाई राखी। 10 इजी री खातर इजी बजअ ते और स्वर्गदूता री बजअ ते जवाणसा खे ठीक ए कि से आपणी अधीनता दखाणे खे आपणे सिरो खे टकी की राखो। 11 तेबे बी प्रभुए रे ना तो जवाणस बिना मर्दो ते और ना मर्द बिना

जवाणसा ते ए। 12 कऊँकि जियाँ जवाणसा मर्दो ते आई, तियाँ ई एबे हर मर्द रा जन्म जवाणसा ते ओआ और सब चीजा परमेशरो ते आओईया। 13 तुसे आपू ई सोचो कि क्या जवाणसा खे क्वाड़े सिरें परमेशरो ते प्रार्थना करना खरी गल्ल ए? 14 क्या कुदरती तौरों पाँदे तुसे नि जाणदे कि जे माणू लांबे बाल राखो, तो तेसखे बेज्जतिया री गल्ल ए। 15 पर जे जवाणसा लांबे बाल राखो तो तेसा खे शोभा ए, कऊँकि बाल तेसा खे टखणे खे देई राखे। 16 पर जे कोई बईस करना चाओ, तो ये जाणी लो कि ना म्हारी और ना परमेशरो री मण्डलिया री एड़ी रवाज ए। 17 ये आज़ा देँडे ऊए आऊँ तुसा खे नि सरंदा, कऊँकि आराधना सभा रे तुसा रे कट्टे ऊणे ते पलाई निए, पर नुकशाण ओआ। 18 कऊँकि पईले तो आऊँ ये सुणूँ था कि जेबे तुसे मण्डलिया रे आराधना खे कट्टे ओए, तो तुसा रे फूट ओई और आऊँ कुछ-कुछ विश्वास बी कर्हूँआ। 19 तुसा लोकारे फूट ऊणा तो एकी तरअ ते जरूरी ए ताकि ये साफ ऊई जाओ कि तुसा बीचे कृण लोक खरे चाल-चलणो रे चलोए। 20 जेबे तुसे लोक एकी जगा रे कट्टे ओए तो सच्ची तुसा री दिलचस्पी प्रभु भोजो रे नि ऊँदी। 21 कऊँकि खाणे रे बखते एकी-दूजे ते पईले केसी खे न्याले बगैर आपणी रोटी खाई लओआ, तो कोई तो पूखा रओआ और कोई मतवाला ऊई जाओआ। 22 क्या खाणे-पीणे खे तुसा रे कअर निए? या परमेशरो री मण्डलिया खे तुछ जाणोए और जिना गे अया नि तिना खे शर्मिदा करोए? आऊँ तुसा खे क्या बोलूँ? क्या एते गल्ला रे तुसा री तारीफ करूँ? ना! आऊँ एसा गल्ला रे तुसा री बिल्कुल बी तारीफ नि करदा। 23 जो शिक्षा मैं तुसा खे दिती थी ये सेई शिक्षा ए जो माखे प्रभुए ते मिली री और मैं तुसा गे बी पऊँछाई ती कि प्रभु यीशुए, जेस राती पकड़वाऊआ, रोटी लयी 24 और धन्यवाद करी की तोड़ी और बोलेया, “ये मेरा शरीर ए, जो तुसा खे ए, मेरी याद रे येई करेया करो।” 25 ईयाँ ई तिने रोदिया ते बाद कटोरा बी लया और बोलेया, “ये कटोरा मेरे खूनो रे जरिए किती री नयी वाचा ए, जेबे कदी पियो, तो मेरी याद रे येई करेया करो।” 26 कऊँकि जेबे कदी तुसे ये रोटी खाओए और एस कटोरे बीचा ते पियोए, तो प्रभुए री मौता खे, जदुओ तक से नि आओ, प्रचार करोए। 27 इजी री खातर जो कोई अनुचित रीतिया ते प्रभुए री रोटी खाओआ या तेसरे कटोरे बीचा ते पियोआ, से प्रभुए रे शरीर और खूनो रा अपराधी ठईरना। 28 इजी री खातर माणू आपणे आपू खे परखी लो और इजी रीतिया ते इजी कटोरे ते खाओ और इजी कटोरे ते पियो। 29 कऊँकि जो खादे-पीदे बखते प्रभुए रे शरीरो खे नि पछयाणो, से एस खाणे और पीणे ते आपू पाँदे दण्ड ल्याओआ। 30 इजी बजअ ते तुसा बीचा ते बऊत कमजोर और रोगी ए और बऊत सारे तो मरी बी गये। 31 जे आसे आपणे आपू खे परखदे, तो परमेशरो आसा खे दण्ड नि देणा। 32 पर प्रभु आसा खे दण्ड देई की आसा री ताड़ना करोआ, ताकि आसे दुनिया साथे दोषी नि ठईरूँ। 33 इजी री खातर ओ मेरे साथी विश्वासियो, जेबे तुसे प्रभु भोज खाणे खे कट्टे ओए, तो एकी-दूजे खे रुकेया करो 34 जे कोई पूखा ओ, तो आपणे कअरे खाई लो, जेते साथे तुसा रा कट्टा ऊणा दण्डो री बजअ नि बणो और बाकि गल्ला आऊँ आयी की ठीक करी देऊँगा।

12 ओ साथी विश्वासियो, आऊँ चाऊँआ कि तुसे लोक पवित्र आत्मा रे जरिए दिते रे आत्मिक बरदानो रे बारे रे ठीक-ठीक समजी लओ। 2 तुसे जाणोए कि जेबे तुसे प्रभुए पाँदे विश्वास नि करो थे तो तेबे गूँगिया मूर्तिया पीछे जियाँ चलाए जाओ थे तियाँ ई चली पड़ो थे। 3 इजी री खातर आऊँ तुसा खे समजयाणा चाऊँआ कि जो कोई परमेशरो री आत्मा री अगुवाईया ते बोलोआ, से नि बोलदा कि यीशु सापित ए और सिर्फ पवित्र आत्मा ई केसी खे ये बोलणे जोगा बणाओआ, “यीशु ई प्रभु ए।” 4 आत्मिक बरदान तो कई प्रकारे रे ए, पर आत्मा एक ईए 5 और सेवा बी कई प्रकारा री ए, पर प्रभु एक ईए 6 परमेशर कई तरीके ते आसा री जिन्दगिया रे काम करोआ पर परमेशर एक ईए, जो आसा सबी रे जरिए काम करोआ। 7 परमेशर आसा सबी खे आत्मिक बरदान देओआ ताकि आसे एकी दूजे री

सेवा करी सकिए। 8 परमेशरो री आत्मा एकी माणूए खे बुद्धिया साथे परेया रा संदेश बोलणे री योग्यता देओआ और सेई आत्मा केसी दूजे माणूए खे जानो रे मुताबिक संदेश बोलणे री योग्यता देओआ। 9 सेई आत्मा केसी माणूए खे मसीह रे विश्वास करने री योग्यता देओआ और केसी खे तेसी ई आत्मा ते चंगा करने रा बरदान दितेया जाओआ। 10 सेई आत्मा केसी खे सामर्था रे काम करने री शक्ति और केसी खे भविष्यबाणी करने री योग्यता देओआ। फेर केसी ओरी खे तिजी खे परखणे री योग्यता देओआ कि से वचन परमेशरो री आत्मा री तरफा तेआ या दुष्टात्मा री तरफा तेआ। फेर केसी ओरी खे कई प्रकारा री पाषा बोलणे री योग्यता देओआ और केसी ओरी खे तेसा पाषा रा मतलब बताणे री योग्यता देओआ। 11 ये सारे बरदान एक ई आत्मा रा काम ए। से आपणी इच्छा रे मुताबिक हर माणूए खे लग-लग बरदान देओआ। 12 कऊँकि जियाँ शरीर तो एक ए और तिजी रे अंग बऊत ए और तेस एक शरीरो रे सब अंग, बऊत ऊँदे ऊए बी, सब मिली की एक ईए, तियाँ ई मसीह बीए। 13 कऊँकि आसे सबी क्या यहूदी, क्या दूजी जाति, क्या दास, क्या आजाद एक ई आत्मा रे जरिए, एक शरीर ऊणे री तई बपतिस्मा लया और आसा सबी खे एक ई आत्मा पलयाया। 14 शरीरो रे एक ई अंग नि, बल्कि बऊत अंग ए। 15 जे पेर बोलो, “आऊँ आथ निए, तेबे आऊँ शरीरो रा अंग नि, तो क्या तेसरे एड़ा बोलणे ते से शरीरो रा अंग नि रंदा? 16 जे कान बोलो, “आऊँ आखी रा निए, तेबे आऊँ शरीरो रा अंग नि, तो क्या तेसरे एड़ा बोलणे ते से शरीरो रा अंग नि रंदा? 17 जे सारा शरीर आखी रा ई ऊँदा, तो सुणना केथो ते था? जे सारा शरीर कानो रा ई ऊँदा, तो सिंगणा केथो ते था? 18 पर सच्ची परमेशरे अंग आपणी इच्छा रे मुताबिक एक-एक करी की शरीरो रे राखी राखे। 19 जे सेयो सारे एक ई अंग ऊँदे, तो शरीर केथा ऊँदा? 20 पर एबे अंग तो बऊत सारे ए, पर शरीर एक ईए। 21 आख आथो खे नि बोली सकदी, “माखे तेरी कोई जरूरत निए।” ना सिर पैरो ते बोली सकदा, “माखे तेरी कोई जरूरत निए।” 22 पर शरीरो रे सेयो अंग, जो ओरी ते कमजोर लगेए, बऊत ई जरूरी ए। 23 शरीरो रे जिना अंगा खे आसे आदरो जोगा नि समजदे, तिना खेई आसे जादा आदर देऊँए, और गुप्त अंगा रा खास त्यान राखदे ऊए तिना खे आसे टकी की राखूँए, 24 तेबे बी म्हारे आदरो जोगे अंगा खे खास देख-पालो री जरूरत निए। पर परमेशरे शरीर एड़ा बणाईता कि जेस अंगो खे आदरो री कमी थी, तिजी रा ई ओर बी आदर ओ। 25 ताकि शरीरो रे फूट नि पड़ो, बल्कि अंग एकी-दूजे री बराबर चिन्ता करो। 26 तेबेई तो जेबे एकी अंगो खे दुः ख ओआ, तो सारे अंगा खे तिजी साथे दुः ख ओआ। जे एकी री तारीफ ओई, तो तिजी साथे सारे अंग खुशी मनाओए। 27 ईयाँ ई तुसे सारे मिली की मसीह रा शरीर ए और लग-लग तेसरे अंग ए। 28 मसीह रे एस शरीरो रे परमेशरे लग-लग माणू नियुक्त करी राखे, पईले प्रेरित, दूजे भविष्यबक्ता, तीजे गुरु, तेबे सामर्था रे काम करने वाले, तेबे ठीक करने वाले, तेबे उपकार करने वाले, तेबे प्रदान और कई प्रकारा रिया पाषा बोलणे वाले। 29 क्या सारे प्रेरित ए? क्या सारे भविष्यबक्ता ए? क्या सारे उपदेशक ए? क्या सारे सामर्था रे काम करने वाले ए? 30 क्या सबी खे ठीक करने रा बरदान ए? क्या सारे कई प्रकारा रिया पाषा बोलीए? क्या सारे अनुवाद करोए? 31 तुसे बडे ते बडे बरदानो री धुना रे रओ, पर आऊँ तुसा खे ओर बी सबी ते खरी बाट बताऊँआ।

13 जे आऊँ माणूआ रिया और स्वर्गदूता रिया पाषा बोलूँ और प्यार नि राखूँ, तो आऊँ ठणठणादा ऊआ पीतल और छणछण करदी ऊई झांजर ए। 2 जे आऊँ भविष्यबाणी करी सकूँ और सारे पेट और सब प्रकारा रे ज्ञानो खे समजूँ और माखे एथो तक विश्वास ओ कि आऊँ पाहड़ो खे टाई सकूँआ, पर प्यार नि राखूँ, तो आऊँ कुछ पनिए। 3 जे आऊँ आपणी सारी सम्पति कंगाला खे खुलवाई देऊँ या आपणा शरीर फूकणे खे देई देऊँ और प्यार नि राखूँ, तो माखे कुछ बी फाईदा निए। 4 प्यार सबखोर ए और कृपा करने वाला ए। प्यार जलन नि करदा, प्यार आपणी तारीफ नि करदा और कमण्ड नि करदा। 5 प्यार अनुचित रीतिया ते नि चलदा, से आपणी पलाई

नि चांदा, प्यारो रे चट गुस्सा नि आऊँदा, बुरा नि मानदा। 6 प्यार कुकर्मां ते खुश नि ऊँदा, पर सच्यो ते खुश ओआ। 7 प्यार सारिया गल्ला सईन करी लओआ, सारिया गल्ला रा विश्वास करोआ, सबी गल्ला री उम्मीद राखोआ, सबी गल्ला रे सन्न राखोआ। 8 प्यार कदी दणदा नि, भविष्यबाणिया ओ तो, खत्म ऊई जाणिया, पाषा ओ तो खत्म ऊई जाणिया, ज्ञान ओ तो मिटी जाणा। 9 कऊँकि आसा रा ज्ञान आदा-अदुरा ए और आसा री भविष्यबाणी बी अदुरी ए। 10 पर जेबे सर्वसिद्ध आऊणा, तो अदुरा मिटी जाणा। 11 जेबे आऊँ बालक था, तेबे आऊँ बालको जेड़ा बोलूँ था, बालका जेड़ा मन था, बालका जेड़ी समज थी, पर जेबे स्याणा ऊईगा, तेबे बालका रिया गल्ला छडी तिया। 12 एबे आसा खे शीशे रे तुन्दला जा दिखोआ, पर तेस बखते आमणे-सामणे देखणा। एस बखते मेरा ज्ञान आदा-अदुरा ए पर तेस बखते मेरा ज्ञान तेड़ा ई ऊणा जेड़ा एस बखते मेरे बारे रे परमेशरो राए। 13 पर एबे विश्वास, उम्मीद, प्यार यो तीनों स्थाई ए, पर इना बीचे सबी ते बड़ा प्यार ए।

14 एकी-दूजे ते प्यारो खे हर तरअ ते कोशिश करो। आत्मिक बरदानो री बी धुना रे रओ, खास करी की ये कि भविष्यबाणी करो। 2 कऊँकि जो दुजिया पाषा रे गल्ल करोआ, से माणूआ साथे नि, बल्कि परमेशरो साथे गल्ला करोआ। तेबेई तो तेसरी गल्ला केसी खे बी समज नि आऊँदिया, कऊँकि से पेतो रिया गल्ला पवित्र आत्मा रे उई की बोलोआ। 3 पर जो भविष्यबाणी करोआ, से ओरी ते तरक्की, उपदेश और सन्नो री गल्ला करोआ। 4 जो दुजिया पाषा रे गल्ला करोआ, से आपणे ई विश्वासो खे मजबूत करोआ, पर जो भविष्यबाणी करोआ, से मण्डलिया रे विश्वासियो रे विश्वासो खे मजबूत करोआ। 5 आऊँ चाऊँआ कि तुसे सारे दुजिया पाषा रे गल्ला करो, पर जादा ये चाऊँआ कि भविष्यबाणी करो। कऊँकि जे दूजी पाषा बोलणे वाला मण्डलिया री तरक्किया खे अनुवाद नि करो, तो भविष्यबाणी करने वाला तेसते बड़ा ए। 6 इजी री खातर ओ साथी विश्वासियो, जे आऊँ तुसा गे आयी की दुजिया पाषा रे जपूँ तो मेरिया गल्ला ते तुसा खे क्या फाईदा ऊणा? पर जे आऊँ परमेशरो रे जरिए दित्तिया रा प्रयासा, ज्ञान, भविष्यबाणी या उपदेशो रिया गल्ला तुसा साथे करूँ तो इजी ते तुसा खे जरूर फाईदा ऊणा। 7 ईयाँ जे निर्जाव चीजा बी, जिना री छेड निकलोई, जियाँ बंसरी या बीन, जे तिना री आवाजा रे फर्क नि ओ, तो जो फूकेया या बजाया जाओआ, से कियाँ पछयाणना? 8 जे तुरहिया री आवाज साफ नि ओ, तो लड़ाईया खे केस त्यारी करनी? 9 ईयाँ जे तुसे जीबा ते साफ गल्ला नि बोली, तो जो कुछ बोलेया जाओआ, से कियाँ समजणा? तुसे तो अवा साथे गल्ला करने वाले ई ऊणे। 10 दुनिया रे चाए कितणिया ई प्रकारा रिया पाषा कऊँ नि ओ, पर तिना बीचा ते हर एक पाषा रा आपणा मतलब ओआ। 11 पर जे आऊँ केसी गल्ला रा मतलब नि समजूँ, तो बोलणे वाले री नजरा रे परदेशी लगणा और बोलणे वाला मेरी नजरा रे परदेशी ऊणा। 12 तुसा लोका रे बारे रे बी येई गल्ला सच ए। तुसे लोक आत्मिक बरदानो री धुना रे रओए, तो एड़े बरदान पाणे री कोशिश करो जेते की मण्डलिया री तरक्की ओ। 13 इजी बजअ ते जो दूजी पाषा बोली, तो से प्रार्थना करो कि तिजी रा अनुवाद बी करी सको। 14 तेबे जे आऊँ दुजिया पाषा रे जपूँ, तो मेरी आत्मा प्रार्थना करोई, पर मेरा दमाक काम नि करदा। 15 तो क्या करना चाईयो? मँ आत्मा ते बी प्रार्थना करनी और दमाको ते प्रार्थना करनी। आत्मा ते बी गाणा और दमाको ते बी गाणा। 16 नई तो जे तू आत्मा तेई धन्यवाद करेगा, तो तेबे अज्ञानिया तेरे धन्यवादा पाँदे आमीन कियाँ बोलणा? कऊँकि से तो जाणदा नि कि तू क्या बोलणे लगी रा। 17 तू तो ठीक-टंगो रे धन्यवाद करेया, पर दूजेया री तरक्की नि ऊँदी। 18 आऊँ आपणे परमेशरो रा धन्यवाद करूँआ कि आऊँ तुसा सबी ते जादा दुजिया पाषा रे बोलूँआ। 19 पर मण्डलिया रे दुजिया पाषा रे दस हजार गल्ला बोलणे ते, माखे ये और बी खरा लणोआ कि ओरी खे सिखाणे री तई अक्ला ते पाँज ई गल्ला बोलूँ। 20 ओ साथी विश्वासियो, तुसे समजणे रे बालक नि बणो, पर तेबे बी बुराईया रे बालक रओ, पर समजणे रे स्याणे बणो। 21

पवित्र शास्त्रो रे लिखी राखेया, “मं दुजिया पाषा बोलणे वालेया रे जरिए और पराए मुँओ रे जरिए इना लोका साथे गल्ला करनिया, तेबे बी तिना मेरी नि सुणनी। प्रभु बोलीआ।” 22 तेबेई तो दुजिया पाषा रे गल्ला करनिया विश्वासियो खे निए, बल्कि अविश्वासियो खे चिह्न ए और भविष्यबाणी करनी अविश्वासियो खे निए, बल्कि विश्वासियो खे चिह्न ए। 23 तेबे जे मण्डली एकी जगा रे कट्टे ओ और सब के सब दूजी पाषा बोली, तेबे जो लोक एसा पाषा खे नि समजदे या अविश्वासी लोक पीतरे आयी जाओ, तो क्या तिना तुसा खे पागल नि बोलणा? 24 पर जे सारे भविष्यबाणी करने लगे, तेबे जो लोक इजी खे नि समजदे या अविश्वासी माणू पीतरे आयी जाओ, तो सबी से दोषी ठरणा और परखी लणा, 25 और तेसरे मनो रे पेट सामणे आयी जाणे और तेबे तेस मुँओ रे पारे पड़ी की परमेशरो गे माथा टेकणा और तेस मानी लणा कि सच्ची परमेशर तुसा बीचे ए। 26 ओ साथी विश्वासियो, सुणो, क्या करना चाईयो? जेबे तुसे आराधना करने खे कट्टे ओए, तो हर एकी रे दिलो रे, पजन, उपदेश, दूजी पाषा, प्रयासा और दुजिया पाषा रा मतलब बतादे रणा चाईयो। सब कुछ आत्मिक तरक्किया खे ऊणा चाईयो। 27 जे दुजिया पाषा रे गल्ला करनिया ओ, तो दो-दो या बऊत ओ तो तीन-तीन जणे बारिया-बारिया ते बोलो और पक्का ई तिजी खे अनुवाद करने खे कोई ना कोई ऊणा चाईयो। 28 लो जे अनुवाद करने वाला नि ओ, तो दूजी पाषा बोलणे वाले खे मण्डलिया रे शान्त रणा चाईयो और आपणे मनो ते और परमेशरो साथे गल्ला करदा रओ। 29 भविष्यबक्तेया बीचा ते दो या तीन जणे बोली और बाकि लोक तिना रे वचनो खे परखो 30 जे तेसी बखते केसी दूजे खे परमेशरो रा प्रकाशन मिलो तो से जो एस बखते भविष्यबाणी करने लगी रा तो से चुप ऊई जाओ 31 कऊँकि तुसे सारे एक-एक करी की भविष्यबाणी करी सकोए, ताकि सब सीखो और सब आँसला पाओ। 32 एक भविष्यबक्ता जो परमेशरो रा वचन बोलीआ से आपणे आपू खे वशो रे राखोआ। से आपणी इच्छा रे मुताबिक बोलणे रे या चुप रणे रे निपुण ए। 33 कऊँकि परमेशर गडबडी नि करदा, पर शान्ति बनाणे वाला ए। जेड़ा पवित्र लोका रिया सारिया मण्डलिया रे ए। 34 जवाणसा खे मण्डलिया री सभा रे चुप रणा चाईयो, कऊँकि तिना खे गल्ला करने री आज्ञा निए, पर अधीन रणे री आज्ञा ए, जेड़ा बिधानो रे लिखी बी राखेया। 35 जे सेयो कुछ सिखणा चाओ, तो कअरे आपणे लाड़े ते पूछो। कऊँकि मण्डलिया रे जवाणसा रा जपणा शर्मा री गल्ल ए। 36 क्या परमेशरो रा वचन तुसा बीचा ते निकली रा या बस तुसा तक ई पऊँछी रा? 37 जे कोई माणू आपणे आपू खे भविष्यबक्ता या आत्मिक जणा समजो, तो से जाणी लो कि जो गल्ला आऊँ तुसा खे लिखूँआ, सेयो प्रभुए री आज्ञा ए। 38 पर जे कोई एसा सच्चाईया खे नि मानो, तो से बी नि मानेया जाणा। 39 तेबेई ओ साथी विश्वासियो, भविष्यबाणी करने री धुना रे रओ और दूजी पाषा बोलणे ते ना नि करो। 40 तुसे आराधना रे बखते जो कुछ बी करोए सारिया गल्ला तमीज्जारे और एक-एक करी की कित्तिया जाओ।

15 ओ साथी विश्वासियो, एबे बी आऊँ तुसा खे सेई सुसमाचार याद दलाऊँआ जेतारा मैं तुसा बीचे प्रचार कित्तिया था। से सुसमाचार तुसे मानेया बी था और जिदे तुसे बणे रे बीए। 2 परमेशरे तेसी सुसमाचारो रे जरिए तुसा रा उद्धार करी राखेया। जे तुसे तेसी सुसमाचारो रे जो मैं तुसा बीचे प्रचार कित्तिया था तिदे बणे रे रओगे नयी तो तुसा रा विश्वास करना बेकार ए। 3 इजी बजअ ते मैं तुसा लोका खे प्रभु यीशुए ते मिली री बऊत जरूरी सच्चाई बताई ती। से सच्चाई ये ए कि पवित्र शास्त्रो रे मुताबिक यीशु मसीह आसा रे पापो री तई मरी गा। 4 और दबाए गये और पवित्र शास्त्रो रे मुताबिक तीजे दिने जिऊँदे बी ऊईगे। 5 तेबे पतरसो खे और तेबे बारा चेलेया खे दिखे। 6 इजी ते बाद पाँज सौ ते जादा विश्वासी पाईया खे दिखे, जिना बीचा ते बऊत जणे एबुए तक जिऊँदे ए और कुछ जणे मरी गे रे। 7 फेर याकूबो खे दिखे, तेबे सबी प्रेरिता खे दिखे 8 और सबी ते बाद माखे बी दिखे, जो मानो आदे दिना रा जम्मैया रा ओ। 9 कऊँकि आऊँ प्रेरिता बीचे सबी

ते छोटा ए, बल्कि प्रेरित बोलणे रे काबिल पनिए, कऊँकि मैं परमेशरो री मण्डली सताई थी। 10 पर आऊँ जो प्रेरित ए, से परमेशरो री कृपा ते ए और तेसरी कृपा जो मां पाँदे ऊई, से बेकार नि ऊई। पर मैं तिना सबी प्रेरिता ते बड़ी की मईणत बी किन्ती तेबे बी ये मेरी तरफा ते नि ऊआ, पर परमेशरो री कृपा ते, जो मां पाँदे ए। 11 तो चाए आऊँ ए, चाए सेयो ओ, आसे येई प्रचार करूँ और इजी पाँदे ई तुसे विश्वास बी कित्तेया। 12 जबकि मसीह रा प्रचार करेया जाओआ कि से मेरे रेया बीचा ते जिऊँदा ऊआ, तो तुसा बीचा ते बऊत जणे कऊँ बोलोए कि मेरया रा दुबारा जिऊँदा ऊणा ऊई नि सकदा? 13 जे मेरे ऊए रा दुबारा जिऊँदा ऊणा ऊई नि सकदा, तो मसीह पनि जिऊँदा ऊँदा। 14 जे मसीह पनि जिऊँदा ऊआ, तो आसा रा प्रचार करना बी बेकार ए और तुसा रा विश्वास बी बेकार ए। 15 बल्कि आसे परमेशरो रे चूठे गवा ऊए, कऊँकि आसे परमेशरो रे बारे रे ये गवाई दिती कि तिने मसीह मेरे रया बीच ते जिऊँदा कित्तेया। पर जे मेरे रे जिऊँदे नि कित्ते जाँदे तो परमेशरे मसीह बी जिऊँदा नि कित्तेया। 16 आऊँ फेर बोलूँआ जे मुइदे जिऊँदे नि ऊँदे, तो मसीह बी जिऊँदा नि ऊआ। 17 और जे मसीह जिऊँदा नि ऊआ, तो तुसा रा विश्वास बेकार ए और तुसे एबुए तक आपणे पापो रे फसी रे। 18 बल्कि जो विश्वासी मसीह रे मरी गे रे, सेयो बी नाश ऊई चुके रे। 19 जे आसे बेक एसा जिन्दगिया रेई मसीह री उम्मीद राखूँए, तो आसे सबी मांणूआ ते नबाग ए। 20 पर सच्चाई ये ए कि परमेशरे मसीह मुइदेया बीचा ते जिऊँदा करी ता रा और से मेरे रेया बीचा ते जिऊँदा ऊणे वाला पईला फल बणी चुकी रा। 21 जियाँ एक मांणू आदमो रे जरिए मौत आयी, तियाँ ई एक मांणू मतलब मसीह रे जरिए मेरे रेया बीचा ते दुबारा जिऊँदा ऊणा बी आया। 22 जियाँ आदमो रे सारे मरोए, तियाँ ई मसीह रे सारे जिऊँदे करे जाणे। 23 पर हर एकी आपणी-आपणी बारिया ते मेरे रेया बीचा ते जिऊँदे ऊणे रा इन्तजार करना। तिना बीचा ते पईला फल मसीह ए। इजी ते बाद सेयो सारे जो मसीह रे आऊणे तक तिना रे बणे रणे। 24 इजी ते बाद अंत ऊणा, तेस बखते तेस सारी प्रदानगिरी, सारा अक्क और सामर्थ्य रा अंत करी की राज्य परमेशर पिते रे आथो रे देई देणा। 25 कऊँकि जदुओ तक परमेशर तेसरे दुश्मणा खे तेसरे वशो रे नि करी देओगा, तदुओ तक तेसरा राज्य करना जरूरी ए। 26 सबी ते बादला दुश्मण जो नाश करना, से मौत ए। 27 पवित्र शास्त्र बोलोआ, “परमेशरे सब कुछ तेसरे पैरा निठे करी ता,” पर जेबे से बोलोआ कि सब कुछ तेसरे वशो रे करी ता रा तो ये साफ ए कि परमेशर जिने सब कुछ मसीह रे वशो रे करी ता रा, तो परमेशर इदे सबी रे शामिल निया। 28 जेबे सब कुछ तेसरे अधीन ऊई जाणा, तो पुत्र आपू बी तेसरे अधीन ऊई जाणा, तिने सब कुछ तेसरे अधीन करी ता ताकि परमेशर ई सबी चीजा रा मालक ओ। 29 नई तो जो लोक मेरे रेया खे बपतिस्मा लओए, तिना क्या करना? जे मुइदे जिऊँदे ऊँदे ई नि, तो तेबे तिना खे बपतिस्मा कऊँ लओए? 30 और आसे बी कऊँ हर कअड़ी खतरया रे पड़े रे रऊँए? 31 ओ साथी विश्वासियो, तुसे लोक प्रभु यीशु मसीह रे माखे कमण्ड ए। आऊँ तुसा री कसम खाई की बोलूँआ कि माखे हर रोज मौता रा सामणा करना पड़ोआ। 32 जे आऊँ मांणूआ री रीतिया ते इफिसुसो रे बणो रे डांगरा ते लडेया, तो माखे क्या फाईदा ऊआ? जे मुइदे जिऊँदे नि कित्ते जाओगे, “तो आओ, खाओ-पीओ, कऊँकि काल तो मरी ई जाणे।” 33 तिना लोका ते तोखा नि खाओ जो एडिया गल्ला बोलोए, “बुरी संगत खरे चाल-चलणो खे बिगाड़ी देओई।” 34 ओशा रे आओ और पाप करना छाडी देओ। कऊँकि बऊत जणे एड़े ए, जो परमेशरो रे नि जाणदे। आऊँ तुसा खे शर्मिंदा ऊणे खे ये बोलणे लमी रा। 35 एबे केसी ये बोलणा, “मुइदे कियँ जिऊँदे ओए और कण जे शरीरो रे आओए?” 36 ओ बिना दमाको वालेयो! जो कुछ तू बाएआ, जदुओ तक से नि मरो, जिऊँदा नि ऊँदा। 37 और जो तू बाएआ, ये से शरीर निए, जो जमणे वाला ए, पर सेई दौणा ए चाए कणका रा चाए केसी ओरी अन्नो रा 38 पर परमेशर आपणी इच्छा रे मुताबिक तेसखे शरीर देओआ और हर एक बीजो खे तेसरा खास शरीर। 39 सारे शरीर एक जेड़े निए, बल्कि मांणूआ रा शरीर ओर ए, डांगरा रा शरीर ओर ए, पंछिया रा

शरीर ओर ए, मछलिया रा शरीर ओर ए। 40 स्वर्गिय शरीर ए और संसारिक शरीर बीए, पर स्वर्गिय शरीरो रा तेज ओर ए और संसारिक शरीरो रा तेज ओर ए। 41 सूरजो रा तेज ओर ए, चाँदो रा ओर और तारेया रा तेज ओर ए कऊँकि एक तारे ते दूजे तारे रे तेजो रे फर्क ए। 42 मुइदेया रा जिऊँदा ऊणा बी एड़ा ईए। शरीर नाश ऊणे री दशा रे बाया जाओआ और अविनाशी रूपो रे जिऊँदा ओआ। 43 जेबे म्हारे शरीरो खे दबाया जाओआ तेस बखते से बदसूरत और कमजोर ओआ। पर जेबे से जिऊँदे ऊई जाणे तेबे से बाँके और सामर्थ्य बणी जाणे। 44 कुदरती शरीर बाया जाओआ और आत्मिक शरीर जिऊँदा ओआ, जबकि कुदरती शरीर ए, तो आत्मिक शरीर बीए। 45 एड़ा ई पवित्र शास्त्रो रे लिखी बी राखेया, “पईला मांणू, मतलब-आदम जिऊँदा प्राणी बणेया” पर आखरी आदम मतलब मसीह अनन्त जिन्दगी देणे वाला बणेया। 46 पर पईले आत्मिक नि था, पर कुदरती था, तेबे इजी ते बादो ते आत्मिक बणेया। 47 पईला मांणू तरती ए, मतलब-माट्रिया रा बणेया रा था, दूजा मांणू स्वर्गिय ए। 48 जेड़ा से माट्रिया रा बणेया रा था, तेड़े ई ओर माट्रिया रे बणी रे थे और जेड़ा से स्वर्गिय ए, तेड़े ई ओर बी स्वर्गिय ए। 49 जियाँ आसे माट्रिया रे बणे रे मांणूए रा रूप धारण कित्तेया तियाँ ई आसा स्वर्गिय मांणूए रा रूप धारण करना। 50 ओ साथी विश्वासियो, आऊँ ये बोलूँआ कि मांस और खून परमेशरो रे राज्य रे अक्कदार नि ऊई सकदे और ना ई नाश ऊणे वाला अविनाशो रा अक्कदार ऊई सकोआ। 51 देख, आऊँ तुसा खे पेतो री गल्ल बताऊँआ कि आसा बीचा ते कुछ तो नि मरने पर बदली जाणे। 52 और ये सब कअडिया रेई, पलक झपकदे ई आखरी तुरही फूकदे ई ऊई जाणा, कऊँकि तुरहिया रे फूकर बाई जाणी और मुइदे अविनाशी दशा रे ठवाले जाणे और आसे बदली जाणे। 53 कऊँकि जरूरी ए कि से नाशवान शरीर अविनाशो खे पईनी लो और ये मरनहार शरीर अमरता खे पईनी लो। 54 जेबे ये नाशवान अविनाशो खे पईनी लओगा और ये मरनहार शरीर अमरता खे पईनी लओगा, तेबे से वचन जो पवित्र शास्त्रो रे लिखी राखेया पूरा ऊई जाणा, “जय मौत निगली ली। 55 ओ मौत! तेरी जय केयी रई? ओ मौत! तेरा डंग केयी रया?” (Hades g86) 56 मौता रा डंग पाप ए और पापो खे बिधानो ते तागत मिलोई। 57 पर परमेशरो रा धन्यवाद ओ, जो म्हारे प्रभु यीशु मसीह रे जरिए आसा खे जयवंत करोआ। 58 तो ओ मेरे साथी विश्वासियो, विश्वासो रे पक्के और अटल बणे रे रओ और प्रभुए रे कामो रे सदा बड़दे जाओ, कऊँकि तुसे जाणोए कि प्रभुए रे तुसा री मईणत बेकार निए।

16 एबे यरूशलेम नगरो रे परमेशरो रे लोका खे चंदा कट्टा करने रे बारे जो सवाल तुसे मांते पूछेया था तिजी रे बारे रे मैं जो आज्ञा गलातिया प्रदेशो री मण्डलिया खे देई राखी, तेसा ई आज्ञा खे तुसे बी मानेया करो। 2 अप्तरे रे पईले दिने तुसा बीचा ते हर एक आपणी आऊँदणिया रे मुताबिक कुछ आपू गे राखी लया करो, ताकि मेरे आऊणे रे चंदा नि करना पड़ो। 3 और जेबे आऊँ आऊँगा, तो जिना खे तुसे चाओगे, तिना खे आऊँ चिट्टिया देई की पेजी देऊँगा कि तुसा रा दान यरूशलेम नगरो रे पऊँछाई देओ। 4 जे तुसा खे ठीक लगे कि आऊँ बी जाऊँ, तो सेयो मां साथे जाई सकोए। 5 मां मकिदुनिया प्रदेशो रा सफर पूरा करी की तुसा गे आऊणा। कऊँकि आऊँ मकिदुनिया जाणे वाला ए 6 जे ऊई सकोगा तो मां तुसा रे एती कुछ बखतो तक रणा और शायद आऊँ ठण्ड तुसा गे ई बिताऊँ। इजी ते बाद मां जेती बी जाणा ओगा, तुसे लोक माखे तेती जाणे रा इन्तजाम करी देओ। 7 कऊँकि आऊँ एबे बाटा रे तुसा साथे मिलणा नि चांदा, पर माखे उम्मीद ए कि प्रभु चाओगा तो कुछ बखतो तक तुसा साथे रऊँगा। 8 पर मां पेन्तिकुस्तो रे त्योआरो तक इफिसुस नगरो रे रणा। 9 कऊँकि माखे तेती एक बड़ा और कामो रा सेवा रा द्वार खुली रा और बिरोदी बऊत ए। 10 जेबे तीमुथियुस आओ तो एसा गल्ला रा त्यान राखणा कि तेसखे तुसा गे कोई चिन्ता नि ऊणी चाईयो, कऊँकि से मां जेड़ी प्रभुए री सेवा करोआ। 11 इजी री खातर कोई तेसखे तुच्छ नि जाणो। पर तेसखे शान्तिया साथे ओरे पऊँछाई देओ

कि मांगे आयी जाओ। कऊँकि आऊँ तेसखे न्यालने लगी रा कि से विश्वासी पाईया साथे आओ। 12 पाई अपुल्लोसो ते में बिनती करी राखी कि तुसा गे पाईया साथे जाओ। पर तिने तेस बखते जाणे री कोई इच्छा नि किन्ती, पर जेबे मोका मिलोगा, से आयी जाणा। 13 जागदे रओ, विश्वासो रे पक्के रओ, निडर बणो, तागतबर ओ। 14 जो कुछ करोए, प्यारो रे करो। 15 ओ साथी विश्वासियो, तुसे स्तिफनासो रे कराने खे जाणोए कि सेयो अखाया प्रदेशो रे पईले फल थे और परमेशरो रे लोका री सेवा खे त्यार रओ थे। 16 तुसे लोक एड़े अगुवो री आज्ञा खे मानो और तिना सबी लोका री बी मानो जो तिना साथे मईणत करोए। 17 आऊँ स्तिफनास, फूरतूनातुस और अखईकुसो रे आऊणे ते खुश ऊआ, कऊँकि तिने तुसा री कमी पूरी किन्ती। 18 तिने मेरी और तुसा रे मनो री चिन्ता दूर करी ती। तुसे एड़े लोका रा आदर करेया करो। 19 आसिया प्रदेशो री मण्डलिया री तरफा ते तुसा खे नमस्कार। अक्विला और तेसरी लाडी प्रिस्क्ल्ला रा और तिना री कअरो री मण्डलिया रा बी तुसा खे प्रभुए रे बऊत-बऊत नमस्कार। 20 सबी विश्वासी पाईया री तरफा ते तुसा खे नमस्कार, गले लगी की आपू बीचे नमस्कार करो। 21 मां पौलुसो रा आपणे आथो रा लिखेया रा नमस्कार। 22 जे कोई प्रभुए साथे प्यार नि राखो, तो से स्थापित ए। ओ म्हारे प्रभु आओ। 23 प्रभु यीशु मसीहे री कृपा तुसा पाँदे ऊँदी रओ। 24 मेरा प्यार यीशु मसीह रे तुसा सबी साथे रओ। आमीन्।

2 कुरिन्थियों

1 ये चिट्ठी पौलुस और आसा रा पाई तीमथियुसो री तरफा ते ए। आऊँ पौलुस परमेशरो री इच्छा ते यीशु मसीह रा प्रेरित ए। ये चिट्ठी परमेशरो री तेसा मण्डलिया रे नाओं पाँदे लिखूँआ जो कुरिन्थुस नगरो रे ए और परमेशरो रे सब पवित्र लोका रे नाओं पाँदे जो सारे अखाया प्रदेशो रे रओए। 2 म्हारे पिता परमेशर और प्रभु यीशु मसीह री तरफा ते कृपा और शान्ति मिलदी रओ। 3 म्हारे प्रभु यीशु मसीह रे पिता परमेशरो रा धन्यवाद ओ। परमेशर दया रा पिता और सब प्रकारा री सुख-शान्ति देणे वाला ए। 4 परमेशर म्हारे सबी क्लेशो रे सुख-शान्ति देओआ ताकि आसे बी ओरी लोका खे तिना रे क्लेशा रे सेई सुख-शान्ति देई सकिए जो परमेशरो ते आसे पाई राखी। 5 कऊँकि जियाँ मसीह रे दुः खो रे आसे जादा सहभागी ओए, तियाँ ई आसे शान्तिया रे बी मसीह रे जरिए जादा सहभागी ओए। 6 जे आसे क्लेश पाऊँए, तो ये तुसा री शान्ति और उद्धारो खे ए और जे आसे शान्ति पाऊँए, तो ये तुसा री शान्तिया खे ए। जेतेरे असरो ते तुसे सब्रो साथे तिना क्लेशो खे सयी लओए, जिना खे आसे बी सऊँए। 7 और म्हारी उम्मीदा तुसा रे बारे रे पक्की ए, कऊँकि आसे जाणूँए कि जेडे तुसे म्हारे दुः खो रे सहभागी ए, तेडे ई तुसे आसा री शान्तिया रे बी सहभागी ऊणे। 8 ओ साथी विश्वासियो! आसे नि चाँदे कि तुसे म्हारे तिना क्लेशो ते अणजाण रओ जो आसिया प्रदेशो रे आसा पाँदे पड़ेया कि एडे पारी बोजो ते दबी गे थे, जो म्हारे सईणे ते बी बारे था। एथो तक कि आसे आपणी जिन्दगिया ते जिऊणे री बी उम्मीद छाडी ती थी। 9 बल्कि आसे आपणे मनो रे समजी ला था कि आसा पाँदे मौता री सजा ऊई चुकी री। पर ये तेबे ऊआ ताकि आसे आपू पाँदे नि, पर तेस परमेशरो पाँदे विश्वास राखिए आसे रेयो खे जिऊँदा करोआ। 10 तिने ई आसे एडी बडी मौता ते बचाए और बचाणे बीए। तेस पाँदे आसा री ये उम्मीद ए कि से आसा खे आगे बी बचांदा रणा। 11 जेडा कि तुसे बी आपणी प्रार्थना रे जरिए म्हारी मताद करोए कि जो बरदान बऊत लोका री प्रार्थना रे जरिए आसा खे मिलेया, तिजी री बजअ ते बऊत लोक म्हारी तरफा ते धन्यवाद करो। 12 आसा खे इजी गल्ला पाँदे कमण्ड ए कि आसा रा विवेक साफ ए कि दुनिया रे और खास करी की तुसा बीचे म्हारा चाल-चलण परमेशरो जोगा, एडा पवित्र और सच्चाईया साथे था, जो शरीरो रे ज्ञानो ते नि, बल्कि परमेशरो री कृपा साथे था। 13 आसे तुसा खे ओर कुछ नि लिखेदे, बस सेई जो तुसे पढो या मानो बी ए। माखे उम्मीद ए कि एक दिन तुसा आऊँ पुरिया तरअ ते समजी लणा। 14 जेडा तुसा बीचा ते कितणे जणेया मानी ला रा कि आसे तुसा रे कमण्डो री बजअ ए तियाँ ई तुसे बी प्रभु यीशुए रे वापस आऊणे रे दिने आसा खे कमण्डो री बजअ ठईरने। 15 और एस परोसे ते आऊँ चाऊँ था कि पईले तुसा गे आऊँ ताकि तुसा खे एक और दान मिलो। 16 मेरी सलाह थी कि आऊँ तुसा गिये ऊई कि मकिदुनिया प्रदेशो खे जाऊँ और फेर मकिदुनिया प्रदेशो ते तुसा गे आऊँ। तिजी ते बाद तुसे माखे सफरो रे जरूरी समान देई की यहूदिया प्रदेशो खे पेजो। 17 इजी री खातर मैं जो ये सोचेया था तो क्या मैं तिदे लापरवाई दखाई? या जो आऊँ करना चाऊँआ क्या से दुनिया रे लोका रे मुताबिक कऊँआ कि एक ई बखतो री गल्ला दे आ-आ बी करदा रऊँ और ना-ना बी करदा रऊँ? 18 जियाँ सच्ची ई परमेशर विश्वासो जोगा ए, तियाँ ई आसा री गल्ला रे बी “आ” रा मतलब आ और “ना” रा मतलब ना ई ओआ। 19 कऊँकि परमेशरो रा पुत्र यीशु मसीह जेसरा प्रचार सिलवानुस, तीमथियुस और मैं तुसा बीचे कितेया। तिदे आ और ना दोनो नि थे, बल्कि तिदे सदा आ और आ ई थी। 20 कऊँकि परमेशरो री जितणिया बी प्रतिज्ञा ए, सेयो सब मसीह रे आ साथे ए, इजी बजअ ते तेस साथे आमीन बी ऊई ताकि म्हारी बजअ ते परमेशरो री महिमा ओ। 21 और जो आसा खे तुसा साथे मसीह रे पक्का करोआ और जिने आसा रा अभिषेक कितेया, सेई परमेशर ए। 22 जिने आसा पाँदे छाप बी करी ती री और बयाने रे आत्मा आसा रे मनो रे दिती। 23 आऊँ परमेशरो खे

गवा कऊँआ कि आऊँ एबुए तक कुरिन्थ नगरो रे इजी री खातर नि आया कऊँकि आऊँ तुसा खे जो गलत काम तुसे करी राखे तिजी खे डांटणा नि चाऊँ था। 24 ये नि कि आसे विश्वासो रे बारे रे तुसा पाँदे अक्क जताणा चाऊँए, पर तुसा री खुशिया रे शामिल ए, कऊँकि तुसे विश्वासो साथे ई खडे रओए।

2 मैं आपणे मनो रे ये ठाणी ला था कि एक बार फेर तुसा गे आई कि तुसा खे दुःख नि देऊँ। 2 कऊँकि तेती आई कि जे आऊँ ई तुसा खे दुःखी करूँ तो माखे खुश करने वाला कुण ऊणा, बस सेई जो मैं दुःखी कितेया? 3 मैं तुसा खे ये गल्ल इजी खे लिखी ताकि एडा नि ओ कि मेरे आऊणे ते जिना ते माखे खुशी मिलणी चाईया, आऊँ तिना ते दुःखी ऊई जाऊँ। कऊँकि माखे तुसा सबी पाँदे एसा गल्ला रा विश्वास ए कि जो मेरी खुशी ए, सेई तुसा सबी री बी ए। 4 बडे क्लेश और मनो रे कष्टो ते मैं आसू बाई-बाई कि से चिट्ठी तुसा खे लिखी थी। इजी री खातर नि कि तुसे उदास ऊई जाओ, बल्कि इजी री खातर नि तुसे तेस बडे प्यारो खे जाणी लओ, जो माखे तुसा ते ए। 5 जे किने दुःखी करी राखे, तो आऊँ ई नि बल्कि कुछ-कुछ तो तुसे सब लोक बी दुःखी करी राखे। आऊँ इजी रे बारे रे इजी ते जादा कुछ ओर नि बोलणा चाँदा। 6 ये सजा जो तुसे विश्वासी पाईया बीचा ते तेसखे देई राखी काफी ए। 7 इजी ते तो ये खरा ए कि तेसरा अपराध माफ करो और तेसखे शान्ति देओ। एडा नि ओ कि एडा माणूँ, निराशा रेई डूबी जाओ। 8 इजी बजअ ते आऊँ तुसा ते बिनती कऊँआ कि तेसखे आपणे प्यार-प्रेमो रा सबूत देओ। 9 कऊँकि मैं इजी खे बी लिखेया था ताकि तुसा खे परखूँ कि तुसे सब मेरी गल्ला खे मानणे खे त्यार ए कि नई। 10 जेसखे तुसे कुछ माफ करोए, तेसखे आऊँ बी माफ कऊँआ। कऊँकि मैं बी जो कुछ माफ करी राखेया, जे माफ करी राखेया ओ, तो तुसा री बजअ ते मसीह री जगा पाँदे ऊई की माफ करी राखेया, 11 ताकि शेतानो रा आसा पाँदे कोई दावो नि चलो। कऊँकि आसे तेसरी चाला ते अणजाण नि। 12 जेबे आऊँ मसीह रा सुसमाचार मानणे खे त्रोआस नगरो रे आया और प्रभुए माखे सुसमाचार प्रचार करने खे मौका देईता। 13 तेबे मेरे मनो खे चैन नि मिलेया कऊँकि मैं आपणा विश्वासी पाई तीतुस नि देखेया। तेबेई मैं त्रोआस नगरो रे विश्वासी लोका ते बिदा ऊई की मकिदुनिया प्रदेशो खे तीतुसो खे टोलने वापस चली गा। 14 पर परमेशरो रा धन्यवाद ओ, कऊँकि मसीह री एकता री बजअ ते से आसा खे सदा आपू साथे चलाओआ और आसा के जय दलाओआ और आपणे ज्ञानो री खुशबू आसा रे जरिए हर जगा रे फैलांदा रओआ। 15 आसे परमेशरो खे मसीह री खुशबू जेडे ए। जो सुसमाचार आसे प्रचार करी राखेया से चाए से उद्धार पाणे वाले ओ या नाश ऊणे वाले ओ सबी लोका खे एक खुशबू जेडा फैलणे लगी रा। 16 बऊत जणेया खे तो मरने जोगी मौता री बास और बऊत जणेया खे जिऊणे जोगी जिऊणे री खुशबू और पल्ला इना गल्ला जोगा कुण ए? 17 कऊँकि आसे तिना सबी जेडे नि। जो परमेशरो रे वचनो रा प्रचार अमीर ऊणे खे करोए। पर मनो री सच्चाईया ते और परमेशरो री तरफा ते, परमेशरो खे आजीर जाणी की मसीह रे बोली।

3 क्या आसे फेर आपणी बडयाईया करने लगे? या आसा खे कईया लोका जेडे सपारीशा री चिट्ठिया तुसा गे ल्याऊणिया या तुसा ते लणियां ए? 2 तुसे आपू ई आसा खे चिट्ठिया जेडे ए जो आसा खे सपारिश करोए और तुसा खे सब माणूँ पछयाणोए और पढोए। 3 ये सामणे ए कि तुसे मसीह री चिट्ठिया जेडे ए, जो मसीह आसे रे जरिए लखाई। ये चिट्ठी स्याईया ते नि। बल्कि जिऊँदे परमेशरो री पवित्र आत्मा ते, पात्थरो री पट्टिया पाँदे नि, बल्कि दिलो रे मासो री पट्टिया पाँदे लिखी राखी। 4 आसे मसीह रे जरिए परमेशरो पाँदे एडा ई परोसा राखूँए। 5 आसे ये नि बोलदे कि आसा गे कुछ करने री काबलियत ए। पर म्हारी काबलियत परमेशरो री तरफा ते ए। 6 तिने आसे नई वाचा रा काम करने जोगे सेवक बणाए। ये वाचा लिखी रे बिधानो री नि बल्कि आत्मा री ए। कऊँकि बिधान मौता खे जन्म देओआ पर आत्मा जिन्दगी देओई। 7 जे मौता रा से बिधान, जेतेरे अक्षर पात्थरा पाँदे

खणे थे, एथो तक तेजोमय ऊई की मूसे रे मुंओ पॉदले तेजो री बजअ ते जो कटदा बी जाओ था, इस्राएली तेसरे मुंओ पॉद देखी नि सको थे। 8 तो आत्मा री वाचा ओर बी तेजोमय कऊँ नि ऊणी? 9 कऊँकि जेबे दोषी ठईराणे वाली वाचा तेजोमय थी, तो परमेशरो रे सामणे तर्मा ठईराणे वाली नई वाचा ओर बी तेजोमय कऊँ नि ऊणी? 10 सच तो ए कि जो तेजोमय था से बी तेसा नई वाचा रे तेजो री तुलना रे तेजोमय नि ठईरिया। 11 जेबे मूसे रा बिधान इतणी तेजोमय थी जो थोड़े ई बखतो खे थी तो नई वाचा रा तेज कितणा जादा ऊणा जो सदा खे ए? 12 तो एड़ी उम्मीद राखी कि आसे इम्मत साथे बोलूँ। 13 आसे मूसे जेड़े नि, जिने आपणे मुंओ पॉद पड़दा पाया था ताकि इस्राएली लोक तेस कटणे वाले तेजो रे अंतो खे नि देखो। 14 पर इस्राएली लोक बिना दमाको रे ऊईगे। आजो तक पुराणी वाचा खे पढ़दे बखते तिना रे दिलो पॉद तेड़ा ई पड़दा पड़े रा रओआ। ये पड़दा सिर्फ मसीह पॉद विश्वास करने तेई उठाया जाई सकोआ। 15 और आजो तक जेबे कदी मूसे री कताब पढ़ी जाओई, तो तिना रे दिलो पॉद पड़दा पड़े रा रओआ और सेयो इजी खे पूरिया तरअ ते समजी नि सकदे। 16 पर जेबे कदी तिना रा दिल प्रभु यीशुए री तरफा खे फिरना, तेबे से पड़दा उठी जाणा। 17 प्रभु और पवित्र आत्मा एक ईए और जेती केथी प्रभुए रा आत्मा ए, तेती बिधानो ते आजादी ए। 18 पर जेबे आसा सबी रे क्वाड़े मुंओ पॉदो ते प्रभुए रा प्रताप ईयां सामणे आओआ, जिंयां शीशे रे, तो प्रभुए रे पवित्र आत्मा रे जरिए आसे तेसी तेजस्वी रूपो रे अंश-अंश करी की बदलदे जाऊँए।

4 तेबे जेबे आसा पॉद परमेशरो री एड़ी दया ऊई कि आसा खे परमेशरो रा संदेश प्रचार करने री सेवा मिली, तो आसे इम्मत नि छाडदे। 2 पर आसे शरमा रे गुप्त काम छाडी ते। ना चलाकिया रे चलूँ और ना ई परमेशरो रे वचनो रे मिलाऊट करूँए। परमेशर आसा रा गवा ए कि आसे सिर्फ सच बोलूँ, जेते की ओर लोक ये पक्का जाणी लो कि आसे परोसे जोगे ए। 3 जे आसा रे सुसमाचारो पॉदो जो आसे प्रचार कित्तेया पड़दा पड़ी रा, तो ये नाश ऊणे वालेया खेई पड़ी रा। 4 और तिना अविश्वासिया खे, जिना रा दमाक एते दुनिया रे ईश्वर शैताने अन्दा करी ता रा ताकि मसीह जो परमेशरो रा रूप ए, तेसरे तेजोमय सुसमाचारो खे नि समजी सको। (aiōn g165) 5 आसे आपणे बारे रे प्रचार नि करदे। बल्कि यीशु मसीह रा प्रचार करूँए कि से प्रभु ए। आसे यीशुए री बजअ ते आपणे आपू खे तुसा लोका रे सेवक समजूँए। 6 तेबेई परमेशर बोलेया, “न्हरे बीचा ते जोति चमको,” और सेई आसा रे दिलो रे चमकेया ताकि परमेशरो री महिमा खे पछयाणी सको जो यीशु मसीह रे प्रकट ऊई री। 7 आसे माट्रिया रे पांडेया जेड़े ए जिदे ये धन राखी राखेया। ताकि एसा गल्ला रा पता लगी जाओ कि ये बडी सामर्थ म्हारी तरफा ते नि, बल्कि परमेशरो री ई तरफा तेईए। 8 आसा खे चऊँ कनारो ते क्लेश तो ओआ, पर मुसीबता रे नि पड़दे। आसे कबरए रे तो आए, पर निराश नि ऊँदे। 9 सताए तो जाऊँए, पर छाडे नि जांदे, रूड़ाए तो जाऊँए, पर नाश नि ऊँदे। 10 आसे हर बखत आपणे शरीरो रे यीशुए रे दुःख और मौता खे लयी की फिर्हूँए, ताकि यीशुए रा जीवन बी आसा रे शरीरो ते प्रकट ओ। 11 कऊँकि आसे जिऊँदे जिऊए सदा यीशुए री बजअ ते मौता रे आथो रे सम्बाले जाऊँए ताकि यीशुए रा जीवन बी आसा रे मरने वाले शरीरो ते प्रकट ओ। 12 इजी बजअ ते मौत तो आसा पॉद असर पाओई पर अनन्त जीवन तुसा पॉद असर पाओआ। 13 पर आसे प्रचार करना जारी राखूँए कऊँकि आसा मे सेई विश्वास ए जो पवित्र शास्त्रो रे लिखी राखेया, “मैं परमेशरो पॉद विश्वास कित्तेया, तेबेई मैं बोलेया।” 14 कऊँकि आसे जाणूँए कि परमेशर जिने प्रभु यीशुए खे मरे रेया बीचा ते जिऊँदा कित्तेया। तेस आसे बी यीशुए रे सहभागी जाणी कि जिऊँदे करने। तिजी ते बाद परमेशरो आसे तुसा साथे आपणे सामणे आजीर करने। 15 ये सब कुछ तुसा लोका री पलाईया खे ऊणे लगी रा, तेबेई जादा ते जादा लोका जाणी लणा कि परमेशर कितणा दयालु ए और तिना परमेशरो री तारीफ और धन्यवाद करना। 16 इजी री खातर आसे इम्मत नि छाडदे, हालाँकि आसा रा बारला

रूप नाश बी ऊँदा जाओआ, तेबे बी आसा रा पीतरला रूप हर होज नया ऊँदा जाओआ। 17 कऊँकि आसा रा दूँई कअडिया रा अलका जा क्लेश आसा खे बडत ई खास और अनन्त जीवनो री महिमा पेदा करोआ (aiōnios g166) 18 और आसे देखी री चीजा खे नि, पर बिना देखी री चीजा खे देखदे रऊँए, कऊँकि देखी री चीजा तो थोड़े ई दिनो खे ए, पर बिना देखी री चीजा सदा बणी री रओईया। (aiōnios g166)

5 आसे जाणूँए कि तरतिया पॉद आसा रा शरीर एक तम्बूए जेड़ा ए जिदे आसे रओए। पर जेबे आसा रा तरतिया पॉदला तम्बू सरिखा कअर टालेया जाणा, तो आसा खे परमेशरो री तरफा ते स्वर्गो पॉद एड़ा भवन मिलणा, जो आथो साथे बणाए रा कअर नि, पर सदा खे बणेया रा ऊणा। (aiōnios g166) 2 आसे एते शरीरो रे तरतिया पॉद कणदे रऊँए और तेस स्वर्गो रे कअरो खे तारण करने री इच्छा करदे रऊँए। 3 जेबे आसा से स्वर्गिय शरीर पाई लणा तेबे आसे नांगे नि पाए जाणे। 4 और आसे एस तम्बू सरिखे शरीरो रे रंदे ऊए बोजो साथे दबे रे कणदे रऊँए, कऊँकि आसे संसारिक शरीर छाडे बिना तेस पॉद स्वर्गिय शरीर पईनणा चाऊँए। ताकि जो मरनहार शरीर ए से अविनाशी शरीरो रे बदली जाओ 5 और परमेशर आपू ईए जिने आसे इजी गल्ला खेई त्यार करी राखे, और तिने आसा खे बयाने रे पवित्र आत्मा बी देई राखेया। ये बयाना से बाद ए जो परमेशरो बादो ते पुरा करना। 6 तो आसे सदा इम्मत बाने रे राखूँए और ये जाणूँए कि जेबे आसे शरीरो रे रऊँए, तदुओ तक प्रभुए ते लग ए। 7 जेबे आसे एबु बी एते दुनिया रे जिऊणे लगी रे तो आसे विश्वासो ते प्रभुए पीछे चलूँए न कि तेसखे देखी की। 8 इजी री खातर आसे इम्मत राखूँए और शरीरो ते लग ऊई की आसे मरने ते बाद प्रभुए साथे रणा और बी खरा समजूँए। 9 इजी बजअ ते आसा रे मनो री इच्छा ये कि चाए आसे तेस साथे स्वर्गो रे रईये, चाए आसे एसा तरतिया पॉद रईये पर आसे तेसखे खरे लगदे रईये। 10 कऊँकि जरूरी ए कि आसा सबी रा आल मसीह रे न्याय आसणो रे सामणे खुली जाओ, ताकि हर एक माणू आपणे-आपणे खरे-बुरे कामो रा बदला, जो तिने शरीरो रे जरिए करी राखेया, पाओ। 11 तो प्रभुए रा डर मानी की आसे लोका खे सच्यो पॉद विश्वास करने खे विनती करूँए और परमेशर आसा खे पूरिया तरअ ते जाणोआ और मेरी ये उम्मीद ए कि तुसा री समजे बी आसे अच्छी तरअ जाणी ले रे कि आसे केड़े लोक ए। 12 आसे तेबे बी आपणी बडयाईया तुसा सामणे नि करदे, बल्कि आसे आपणे बारे रे तुसा खे कमण्ड करने रा मौका देऊँए, ताकि तुसे तिना खे जवाब देई सको, जो मनो पॉद निए, बल्कि दखाऊटी गल्ला पॉद कमण्ड करोए। 13 जे आसे ओशा रे निए, तो परमेशरो री खातर, और जे ओशा रे, तो तुसा री पलाईया री खातर ए। 14 कऊँकि मसीह रा प्यार आसा खे मजबूर करी देओआ। आसा खे ये पक्का विश्वास ए कि मसीह सबी री खातर मरेया, तो आसे सब पुराणे जीवनो खे मरी गे। 15 और मसीह सबी री खातर इजी खे मरेया ताकि जो जिऊँदे ए, सेयो आगे खे आपणी खातर नि जियो, बल्कि तेसरी खातर, जो तिना री खातर मरेया और तेबे जिऊँदा ऊआ। 16 तो आजो ते आसे केसी रा बी दुनिया रे मुताबिक न्याय नि करदे। आसे मसीह खे पईले दुनिया री नजरा ते देखेया, पर एबे आसे एड़ा नि करदे। 17 जे कोई मसीह रे विश्वास करोआ, तो से नई सृष्टि ए, पुराणिया गल्ला बीती गी रिया, देखो, सेयो सब नईया ऊईगी रिया। 18 ये सब गल्ला परमेशरो री तरफा ते ए, जिने मसीह रे जरिए आपू साथे आसा रा मेल-जोल करी ता और मेल-जोलो री सेवा आसा खे सम्बाली ती री। 19 मतलब-परमेशरे मसीह रे ऊई की आपणा दुनिया साथे मेल-जोल करी ला और लोका रे पापो रा दोष, तिना पॉद नि लगाया और परमेशरे मेल-जोलो रा संदेश आसा गे सम्बाली ता रा। 20 आसे मसीह रे राजदूत ए, मानो परमेशर आसा रे जरिए लोका ते आपणा संदेश मानणे खे बिनती करने लगी रा। आसे मसीह री तरफा ते बिनती करूँए कि परमेशरो साथे मेल-जोल करी लो। 21 मसीह निष्पाप था, पर परमेशरे आसा खे तेसते पापिए जेड़ा बर्ताव कित्तेया ताकि आसे मसीह रे ऊई की परमेशरो री धार्मिकता बणी जाऊँ।

6 आसे परमेशरो साथे मिली की काम करने वाले ए और तुसा लोका ते ये बिनती कर्हए कि परमेशरो री कृपा जो तुसा पॉदि ऊई, तिजी खे बेकार नि जाणे देओ। 2 कऊँकि पवित्र शास्त्रो रे परमेशर बोलोआ, “सई बखतो पॉदि मैं तुसा री प्रार्थना सुणी ली और उद्धारो रे दिने मैं तुसा री मताद किती।” सुणो, एबु सई बखत ए, सुणो, एबु उद्धारो रा दिन ए। 3 आसे केसी बी गल्ला रे ठोकर खाणे रा कोई बी मोका नि देंदे, ताकि म्हारी सेवा पॉदि कोई दोष नि आओ। 4 पर आसे हर बखतो रे हर तरअ ते आपणे बर्ताव रे जरिए ये साबित कर्हए कि सच्ची आसे परमेशरो रे अच्छे सेवक ए। आसे सब्रो साथे क्लेश सईन करने रे, गरीबिया रे, मुसीबता रे, 5 कोड़े खाणे रे, कैद ऊणे रे, आल्ले-गोल्ले रे, मईपती रे, जागदे रणे रे, बअरत करने रे, 6 पवित्रता रे, ज्ञानो रे, सब्रो रे, कृपा रे, पवित्र आत्मा रे, सच्चे प्यारो रे, 7 सच्चो रे वचनो रे, परमेशरो री सामर्था रे; आसा गे धार्मिकता रे अथियार ए जेते की आसे अमला बी कर्हए और बचाव बी कर्हए। 8 आदर और निरादरो रे, बुरे नाओँ और सुनामो रे, आसा खे कपट्टी समजये जाओआ, तेबे बी आसे सच बोलूँए। 9 कुछ लोक आसा खे अणजाण समजोए ए, तेबे बी कुछ लोक आसा खे जाणे-माणे रे समजोए ए, मरने वालेया जेड़े ए, पर तेबे बी जिऊँदे ए, मार खाणे वालेया जेड़े ए, पर प्राणो ते मारे नि जाँदे। 10 शोग करने वालेया जेड़े ए, पर सदा खुशी मनाऊँए, आसे आपू कंगाल ए, पर बऊत जणोया खे आत्मिकता दे अमीर बणाई देऊँए, आसे एड़े ए, जेड़ा आसा गे कुछ निए तेबे बी सब कुछ राखोए। 11 ओ कुरिन्थियों रे विश्वासियो, आसे खुली कि तुसा साथे गल्ला करी राखिया, आसे तुसा ते खुले दिलो साथे प्यार कित्तेया। 12 तुसा री तँई म्हारे मनो रे कोई शक निए, पर तुसा रे मनो रेई आसा खे शक ए। 13 पर आपणे बाल-बच्चे जाणी की तुसा खे बोलूँआ कि तुसे बी तिजी रे बदले आसा साथे प्यार राखो। 14 अविश्वासिया साथे लग जुँगड़े रे नि जुड़ो, कऊँकि धार्मिकता और पापो रा क्या मेल-जोल? या जोति और न्हरे री कियॉ दोस्ती ऊई सकोई? 15 और मसीह रा शैतानो साथे क्या लगाव! या विश्वासियो साथे अविश्वासिया रा क्या नाता? 16 और मूर्तिया साथे परमेशरो रे मन्दरो रा क्या सलबंद? कऊँकि आसे तो जिऊँदे परमेशरो रा मन्दर ए, जेड़ा परमेशरे पवित्र शास्त्रो रे बोली राखेया, “मां तिना लोका साथे रणा और तिना रे चलेया फिरेया करना; और आऊँ तिना रा परमेशर ऊणा और सेयो मेरे माणू ऊणो।” 17 इजी री खातर प्रभु बोलोआ, “अविश्वासिया बीचा ते निकलो और लग रओ; और अशुद्ध चीजा खे नि छूँओ, तो मां तुसे अपनानो। 18 आऊँ तुसा रा पिता ऊणा और तुसे मेरे माठे-बेटिया ऊणे। ये सर्वशक्तिमान् प्रभु परमेशरो रा वचन ए।”

7 तो ओ प्यारोओ! जबकि आसा खे यो वादे मिली रे, तो आओ, आसे आपणे आपू खे शरीर और आत्मा रे सब मईलो ते साफ कर्हए और परमेशरो रा डर और आदर करदे ऊए, पवित्रता री भरपूरिया तक पऊँछणे री कोशिश करदे रऊँए। 2 आसा खे आपणे दिलो रे जगा देओ। आसे ना तो केसी साथे अन्याय कित्तेया, ना कोई बिगाड़ेया और ना ई कोई ठणोया। 3 आऊँ तुसा पॉदि दोष लगाणे खे नि लणी रा बोलणे, कऊँकि आऊँ पईले ई बोली चुकेया रा कि तुसे म्हारे दिलो रे एड़े बसी चुके रे कि आसे तुसा साथे मरने-जिऊणे खे त्यार ए। 4 माखे तुसा पॉदि बऊत परोसा ए और आऊँ तुसा पॉदि बड़ा कमण्ड कर्हआ। आऊँ शान्तिया साथे परी गा रा, सारे क्लेशा रे आऊँ बड़े मजे ते रऊँआ। 5 जेबे आसे त्रोआस नगरो खे छाडी की मकिदुनिया प्रदेशो रे आए, तेबे बी आसा रे शरीरो खे चैन नि मिलेया, बल्कि आसा खे चऊँ कनारे ते क्लेश मिलो था, बारे लड़ाईया थिया, पीतरे डरो रिया गल्ला थिया। 6 तेबे बी निराश लोका खे सुख-शान्ति देणे वाले परमेशरे तीतुसो रे आऊणे ते आसा खे शान्ति दिती। 7 और बस तेसरे ई आऊणे तेई नि, बल्कि तेसरी तेसा शान्तिया ते बी, जो तेसखे तुसा री तरफा ते मिली थी और तिने तुसा री इच्छा, तुसा रे दुः ख, और मेरिया तँई तुसा री धुना रा समाचार आसा गे सुणाया, जेते की माखे ओर बी खुशी ऊई। 8 हालाँकि मैं तुसे लोक आपणी तेसा चिट्टिया ते दुः खी कित्ते, तेबे बी माखे तिजी ते

पछतावा निया। जेड़ा कि पईले पछताऊँ था, कऊँकि आऊँ देखूँआ कि तिजी चिट्टिया साथे तुसा खे दुः ख तो ऊआ, पर से थोड़ी देरा खे था। 9 एबे आऊँ खुश ए। पर इजी री खातर नि कि तुसा खे दुः ख ऊआ, बल्कि इजी री खातर कि तुसे तेस दुः खो री बजअ ते मन फिराया। तुसा रा दुः ख परमेशरो री इच्छा रे मुताबिक था, ताकि म्हारी तरफा ते तुसा खे कोई नुकशाण नि पऊँछो। 10 से दुःख जो परमेशरो री भक्तिया री तरफा ते आओआ, तिजी रा नतीजान मन फिराणा और उद्धार ओआ और एस दुःखो ते पछताणा नि पड़दा। बल्कि दुनिया रे लोका रा दुः ख सदा री मौत पैदा करोआ। 11 त्यान देओ कि परमेशरो री भक्तिया री बजअ ते आये रे दुः खे तुसे पूरिया तरअ ते बदली ते। तिने तुसा रे उत्साह, आपू खे बेकसुर साबित करने री इच्छा, अन्याय रे खलाफ गुस्सा, मुसीबता रे बखते एड़ी चौकसी, मांते मिलणे री एड़ी इच्छा, सेवा रिया तँई एड़ी धुन और दुराचारिए खे दण्ड देणे रा बिचार पैदा कित्तेया। तुसे सबी प्रकारा ते ये सिद्ध करी की दखाई ता कि तुसे इना गल्ला ते निर्दोष ए। 12 तेबे मैं जो तुसा गे चिट्टी लिखी थी, से ना तो तिजी बजअ ते लिखी, जिने अन्याय कित्तेया और ना ई तेसरी बजअ ते जेस पॉदि अन्याय कित्तेया, बल्कि इजी री खातर कि तुसा रा उत्साह, जो आसा री खातर ए, से परमेशरो सामणे तुसा पॉदि प्रगट ओ। 13 इजी ते आसा खे आँसला मिलेया। म्हारे एस आँसले साथे तीतुसो री खुशिया री बजअ ते ओर बी खुशी ऊई, कऊँकि तेसरा जिऊ तुसा सबी री बजअ ते अरा-परा ऊईगा रा। 14 कऊँकि जे मैं तेस सामणे तुसा रे बारे रे कुछ कमण्ड दखाया, तो शर्मिदा नि ऊआ, पर जिंयाँ ई आसे तुसा गे सब गल्ला सच-सच बोलिया, तिंयाँ ई म्हारा कमण्ड दखाणा तीतुसो सामणे सच ऊआ। 15 और जेबे तेसखे तुसा सबी रे आज्ञाकारी ऊणे री याद आओई कि किंयाँ तुसे डरदे और थरथरंदे ऊए तेसरा स्वागत कित्तेया, तो तेसरा प्यार तुसा खे ओर बी बड़दा जाओआ। 16 आऊँ एबे बऊत खुश ए कऊँकि माखे तुसा पॉदि पूरा परोसा ए।

8 एबे ओ साथी विश्वासियो! आसे तुसा खे परमेशरो री तेसा कृपा रा समाचार देऊँए, जो मकिदुनिया प्रदेशो री विश्वासी मण्डलिया रे ऊई री। 2 जेबे बऊत मुसीबता रे जरिए तिना री परीक्षा ऊई, तेबे तिने तिदे बी बड़ी खुशी मनाई और बेशक सेयो बड़े पारी गरीब थे तेबे बी तिने दूजे विश्वासिया री खुले दिलो पैसेया साथे मताद किती। 3 और तिना रे बारे रे मेरी ये गवाई ए कि तिने आपणी सामर्था ते, बल्कि आपणी सामर्था ते बी जादा आपणी इच्छा ते मताद किती। 4 तिने आपू ई आसा ते बार-बार बिनती किती कि यरूशलेम नगरो रे विश्वासिया री मताद करने खे आसा खे मौका मिलो। 5 और जेड़ी आसे उम्मीद किती थी, तेड़ी ई नि, बल्कि तिने सबी ते पईले आपणे आपू खे प्रभुए री सेवा करने खे देईता। तिजी ते बाद तिने आपणे आपू खे परमेशरो री इच्छा रे मुताबिक आसा खे देईता। 6 इजी री खातर आसे तीतुस समजयाया कि जेड़ा तिने पईले शुरूओ रे कित्तेया था, तेड़ा ई तुसा बीचे बी एस दानो रे कामो खे पूरा बी करी लो। 7 तो जेड़ा तुसे हर गल्ला रे मतलब-विश्वास, वचन, ज्ञान और सब प्रकारा री कोशिश रे और तेस प्यारो रे, जो आसा साथे राखोए, बड़दे जाओए, तेड़ा ई गरीब विश्वासिया खे दान देणे रे बी बड़दे जाओ। 8 आऊँ आज्ञा री रीतिया पॉदि नि, पर ओरी री खुशिया ते तुसा रे प्यारो री सच्चाई परखणे खे बोलूँआ। 9 तुसे म्हारे प्रभु यीशुए मसीह री कृपा जाणोए कि से अमीर ऊई की बी तुसा री तँई कंगाल बणीगा ताकि तेसरे कंगाल ऊणे ते तुसे अमीर बणी जाओ। 10 सबी ते पईले सिर्फ तुसे लोके ई पिछले साल जो दान देणे रा काम शुरू कित्तेया और जेतेरी योजना तुसे आपू ई बणाई थी। ये तुसा खे अच्छा ए और एसा गल्ला रे आऊँ ये सलाह देऊँआ। 11 कि एबे एस कामो खे पूरा करो जो तुसे शुरू कित्तेया था। जेड़ी तुसा री इच्छा गरीब विश्वासिया री मताद करने खे पईले थी, तेड़ी ई एबे बी आपणी-आपणी सम्पतिया रे मुताबिक पूरी बी करो। 12 कऊँकि जे मनो री त्यारी ओ तो दान तेते मुताबिक लया जाओआ, जो तेसगे अया, ना कि तेते मुताबिक जो तेसगे अया नि। 13 आऊँ ये नि चांदा कि

ओरी री पलाई करने री बजअ ते तुसा खे कष्ट ओ। पर सबी खे एक जेड़ा मिलणा चाईयो 14 पर बराबरिया रे बिचारे ते एस बखते तुसा री बड़दी तिना री कटिया रे कामे आओ, ताकि तिना री बड़दी बी तुसा री कटिया रे कामे आओ कि बराबरी ऊई जाओ। 15 जेड़ा पवित्र शास्त्रो रे लिखी राखेया, “जिने बऊत कट्टा कितेया तेसरा कुछ जादा नि निकलेया और जिने थोड़ा कट्टा कितेया तेसरा तिजी तेई गुजारा ऊईगा।” 16 परमेशरो रा धन्यवाद ओ, जिने तुसा री खातर सेई उत्साह तीतुसो रे दिलो रे पाईता रा जो मांदि था। 17 जेबे आसे तीतुसो खे तुसा गे जाणे खे बिनती किती तेबे तिने म्हारी गल्ल मानी ली। बल्कि बऊत उत्साही ऊई कि से आपणी इच्छा ते तुसा गे आऊणे लगी रा। 18 और आसे तेस साथे एक ओर विश्वासी पाई पेजणे लगी रे जेसरा नाओ सुसमाचार फैलाणे रे बारे रे सबी मण्डलिया रे फेली गा रा। 19 और इतणा ई नि, पर से मण्डलिया ते ठईराया बी गया कि एस दानो रे कामो खे आसा साथे जाओ और आसे ये सेवा इजी री खातर करूँए ताकि प्रभुए री महिमा ओ और म्हारे मनो री त्यारी मताद करने खे सामणे आयी जाओ। 20 आसे एसा गल्ला रे चौकस रऊँए कि साथी विश्वासिये खे तीतुसो साथे पेजी की एस उदारता ते दिते रे दानो रे बारे रे, जेसरी सेवा आसे करूँए, कोई आसा पॉदि मोंणू नि लगाई सको। 21 कऊँकि जो गल्ला बस प्रभुए रेई नेडे नि, बल्कि मोंणूआ रे नेडे बी खरी ए, आसे तिना री चिन्ता करूँए। 22 इना दूँई साथे आसे आपणा एक ओर विश्वासी पाई पेजणे लगी रे। जो आसे बार-बार परखी कि बऊत गल्ला रे खुश पाया। पर एबे तुसा पॉदि तेसखे बऊत विश्वास ए, इजी बजअ ते से ओर बी जादा खुश ए। 23 जे कोई तीतुसो रे बारे रे पूछो, तो से मेरा साथी, तुसा खे मेरा सहकर्म और जे म्हारे विश्वासी पाईया रे बारे रे पूछो, तो सेयो मण्डलिया रे पेजे रे और मसीह री महिमा करोए। 24 तो आपणा प्यार और आसा रा से कमण्ड जो तुसा रे बारे रे ए मण्डलिया रे सामणे तिना खे सिद्ध करी की बताओ।

9 यरूशलेमो री मण्डलिया रे विश्वासिया खे पैसेया साथे मताद करने री सेवा रे बारे रे माखे तुसा लोका खे लिखणा जरूरी नि। 2 कऊँकि आऊँ तुसा रे मनो री त्यारिया खे जाणूँआ, जेतेरी बजअ ते आऊँ तुसा रे बारे रे मकिदुनिया प्रदेशो रे लोका रे सामणे कमण्ड दखाऊँआ कि तुसे कुरन्थी लोक अखाया प्रदेशो रे एकी सालो ते त्यार ऊई रे और तुसा रे उत्साहे ओर बी बऊत उभारी राखे। 3 पर आऊँ तीतुस और दो पाईया खे तुसा गे इजी खे पेजणे लगी रा कि आसे जो कमण्ड तुसा रे बारे रे दखाया, से एसा गल्ला रे बेकार नि ठईयो, पर जेड़ा मैं बोलेया, तेड़े ई तुसे यरूशलेमो रे विश्वासिया खे पैसे देणे खे त्यार रओ। 4 एड़ा नि ओ कि जे कोई मकिदुनीवासी मैं साथे आओ और तुसा खे त्यार नि पाओ, तो क्या पता एस परोसे री बजअ ते जो आसा खे तुसा पॉदि ए शर्मिदा ऊणा पड़ो। पर तुसा खे ओर बी जादा शर्मिदा ऊणा पड़ना। 5 इजी री खातर मैं विश्वासी पाईया ते ये बिनती करना जरूरी समजेया कि सेयो पईले तेई तुसा गे जाओ और तुसा री उदारता रा फल जेतेरे बारे रे पईले तेई वचन दितेया था, त्यार करी की राखो कि ये दबाओ ते नि पर उदारता रे फलो जेड़ा त्यार ओ। 6 पर गल्ल तो ये कि जो थोड़ा बीजोआ, तेस थोड़ा ई बाडणा बी और जो बऊत बीजोआ, तेस बऊत बाडणा। 7 हर एक जणा जेड़ा मनो रे ठाणो तेड़ा ई दान करो, ना कि कुड़कुड़ाई की और ना दबाओ ते, कऊँकि परमेशरो खुशिया ते देणे वालेया साथे प्यार राखोआ। 8 और परमेशर सब प्रकारो री कृपा तुसा खे बऊत जादा देई सकोआ। जेते साथे हर गल्ला रे और हर बखते, सब कुछ, जो तुसा खे जरूरी ए, तुसा गे रओ और हर एक खरे कामो खे तुसा गे बऊत कुछ ओ। 9 जेड़ा पवित्र शास्त्रो रे लिखी राखेया, “परमेशर खुले दिलो ते कंगाला खे दान देओआ, तेसरा तर्म सदा बणेया रा रणा।” (aiōn g165) 10 परमेशर ईए जो जिम्मीदारो खे बाणे खे बीजो रा और खाणे खे रोटिया रा इन्तजाम करोआ। तेस तुसा खे बी इन्तजाम करना और तुसे फलवंत करने, ताकि तुसे जरूरतमंद लोका खे खुले दिलो ते मताद करी सको। 11 तुसे लोक हर प्रकारा री आशीषा ते भरपूर ऊई जाणे। जेबे आसा तुसा रा दान बाँडणा तो

बऊत सारे लोका परमेशरो रा धन्यवाद करना। 12 ये सेवा पूरी करने ते, ना बस विश्वासी लोका रिया कमिया पूरिया ओईया, बल्कि तिना री तरफा ते परमेशरो रा बऊत धन्यवाद ओआ। 13 कऊँकि दान देई की ओरी खे मताद करने री सेवा खे सबूत मानी की परमेशरो री महिमा सामणे आओई कि तुसे मसीह रा सुसमाचार मानी की तेसरे अधीन रओए और तिना री और सबी री मताद करने रे उदारता दखाओए। 14 सेयो तुसा खे परमेशरो ते प्रार्थना करोए और तुसा खे देखणे री इच्छा करोए। कऊँकि परमेशर तिना खे आशीष देणे रे तुसा लोका रा इस्तेमाल करी राखेया। 15 परमेशरो रा तेसरे तेस दानो खे जो कईणे ते बारे ए, धन्यवाद ओ।

10 आऊँ पौलुस तुसा खे मसीह री नग्रता और नरमाईया साथे मेरी गल्ला सुणने खे बिनती करूँआ। माखे तुसा बीचे आजीर ऊणे पॉदि बोलणे रे डरपोक और पीठी पीछे नडरा समजेया जाओआ। 2 आऊँ ये बिनती करूँआ कि जेबे आऊँ तेती तुसा गे आऊँ तो माखे तिना लोका खे जो ये सोचोए कि आसे दुनिया रे लोका रे मुताबिक चलणे वाले ए, से सखतयाई माखे दखाणी ना पड़ो जेतेरी मांते उम्मीद किती जाओई। 3 हालाँकि आसे दुनिया रे चलूँ-फिरूँए, तेबे बी दुनिया रे लोका जेड़े आसे दुश्मणा ते नि लड़दे। 4 कऊँकि म्हारी लड़ाईया रे अधियार दुनिया जेड़े नि, पर दुश्मणा रे गढ़ो खे टालने खे परमेशरो रे सामर्थी अधियार ए। 5 तो आसे ख्यालो खे और हर एक ऊच्ची गल्ला खे, जो परमेशरो री पछयाणी रे बिरोदो रे ऊठोई, खण्डन करूँए; और हर एकी इच्छा खे कैद करी की मसीह रा आज्ञाकारी बणाई देऊँए। 6 और जेबे तुसे मसीह री आज्ञा पूरिया तरअ ते मानणे लगी जाओ, तो आसे हर एक तरअ री आज्ञा ना मानणे वालेया खे सजा देणे खे त्यार ए। 7 तुसे इना ई गल्ला खेई देखोए, जो आखी रे सामणे ए, जे केसी रा आपू पॉदि ये विश्वास ओ कि आऊँ मसीह राए, तो से ये बी जाणी लो कि जेड़ा से मसीह राए, तेड़े ई आसे बी मसीह रे ए। 8 कऊँकि जे आऊँ तेस अवको रे बारे रे ओर बी कमण्ड दखाऊँ, जो प्रभुए तुसा रे विश्वासो खे नाश करने खे नि, पर तुसा रे विश्वासो खे बडाणे खे आसा गे देई राखेया, तो आऊँ शर्मिदा नि ऊणा। 9 ये आऊँ इजी री खातर बोलूँआ कि चिट्टिया रे जरिए तुसा खे डराणे वाला नि ठईरूँ। 10 कऊँकि तुसा बीचा ते कुछ लोक बोलोए, “तेसरी चिट्टिया तो दमदार और असरदार ए; पर जेबे देखोए तो से शरीरो रा कमजोर और बोलणे रे अलका जाणोआ।” 11 तो जो लोक एड़ा बोलोआ, से ये समजी लो कि जेड़ा पीठी पीछे चिट्टिया रे म्हारे वचन ए, तेड़ा ई तुसा रे सामणे म्हारे काम बी ऊणे। 12 कऊँकि आसा रे ये इम्मत नि कि आसे आपणे आपू खे तिना बीचा ते एड़े कितणेया साथे गिणिये या तिना साथे आपू खे मलाईये, जो आपणी तारीफ आपू करोए और आपू खे आपू बीचे नापी-तोली की एकी दूजे साथे मिली की मूर्ख ठराओए। 13 आसे तो कामो री सीमा ते बारे कदी बी कमण्ड नि करदे, पर तेसा ई सीमा तक जो परमेशर आसा री तई ठराई राखी और तिदे तुसे बी आईगे रे और तिजी रे मुताबिक कमण्ड बी करूँगे। 14 कऊँकि आसे आपणे कामो री सीमा ते बारे आपू खे बड़ाणा नि चांदि, जेड़ा कि तुसा तक पऊँछणे री दशा रे ऊँदा। आसे तुसा खे मसीह रा सुसमाचार सुणणे खे सबी बाटा रिये ऊँदे ऊए कुरिन्थ नगरो रा सफर करने वाले पईले मांणू थे। 15 और आसे सीमा ते बारे ओरी री मईणता पॉदि कमण्ड नि करदे, पर आसा खे उम्मीद ए कि जियाँ-जियाँ तुसा रा विश्वास बड़दा जाणा, तियाँ-तियाँ आसे आपणी सीमा रे मुताबिक तुसा री बजअ ते ओर बी लोका तक पऊँछे जाणे, 16 ताकि आसे तुसा री सीमा ते आगे बड़ी की दूर-दूर जगा रे बी सुसमाचार सुणाईए। कऊँकि ये नि कि आसे ओरी री सीमा रे पीतेरे बणे-बणाए कामो पॉदि कमण्ड करिए। 17 जेड़ा कि पवित्र शास्त्र बोलोआ, “जो कमण्ड करो, से सिर्फ प्रभुए पॉदि कमण्ड करो।” 18 कऊँकि जो आपणी तारीफ करोआ, से नि, बल्कि जेसरी तारीफ प्रभु करोआ, सेई ग्रहण कितेया जाओआ।

11 तुसे ओरी लोका री जो आपणे बारे रे खरिया गल्ला बोलोए तिना खे सईन करी लओए। आऊँ बी ये उम्मीद करूँआ कि तुसे मेरी बी

थोड़ी जी मूर्खता सईन करी लओ। 2 जिंयाँ परमेशर त्यान राखोआ तियाँ ई आऊँ तुसा रे बारे रे चिन्ता करूँआ। तुसे एक पवित्र कुआँरिया जेडे ए जो मैं एकलौते लाड़े यीशु मसीह खे देणे खे चुणी राखे। 3 पर आऊँ डरूँआ कि जेडे शैताने सापो रे रूपो रे पईली जवाणस हव्वा बईकाई, तेडे ई तुसा रे मन तेसा सिधाईया और पवित्रता ते जो मसीह साथे ऊणी चाईयो, केथी प्रष्ट नि करे जाओ। 4 जे कोई तुसा गे आयी की केसी दूजे यीशुए रा प्रचार करो, जेतेरा प्रचार आसे नि कितेया; या कोई और ई आत्मा तुसा खे मिली जाओ, जो पईले नि मिलेया था; या और ई कोई सुसमाचार सुणाओ जो तुसे पईले नि मानी राखेया ओ, तो तुसा रा इना शिक्षा खे मानणा गलत ए। 5 आऊँ तो समजूँआ कि आऊँ किजी बी गल्ला रे तिना ते जो आपणे आपू खे बड़ा प्रेरित समजोए कम निया। 6 जे आऊँ बोलणे दे अनाड़ी ए, फेर बी माखे मसीह और सुसमाचारो रे बारे रे ज्ञान ए। आसे इजी रा सबूत हर प्रकारा री गल्ला दे सिखाणे रे जरिए देईता रा। 7 क्या इदे मैं कुछ पाप करेया कि मैं तुसा खे परमेशरो रा सुसमाचार मुफ्त सुणाया और आपणे आपू खे नीच करेया, ताकि तुसे ऊच्चे ऊई जाओ? 8 तुसा लोका री मुफ्तो रे सेवा करने खे मैं ओरी मण्डलिया ते आपणा जीवन चलाणे खे दान लया तुसे एड़ा नि बोली तो मैं सेयो लूँटि। 9 जेबे आऊँ तुसा साथे था और माखे पैसेया री जरूरत ऊई, तो मैं केसी पाँडे पाअर नि दितेया। कऊँकि विश्वासी पाईए मकिदुनिया प्रदेशो ते आयी कि मेरी पैसेया री जरूरत पूरी किती। मैं हर गल्ला रे आपू खे तुसा पाँडे पाअर ऊणे ते रोकेया और रोकेया रा राखूँगा। 10 जे मसीह री सच्चाई माँदे आप, तो अखाया प्रदेशो रे कोई माखे इजी पाँडे कमण्ड करने ते नि रोकी सकदा। 11 मैं तुसा रे पैसे कऊँ नि लये? क्या इजी खे कि आऊँ तुसा खे प्यार नि करदा? परमेशर ये जाणोआ कि आऊँ प्यार राखूँआ। 12 पर जो आऊँ करूँआ, सेई करदा रणा ताकि जो लोक मोका टोलोए, तिना खे मां मोका नि देणा, ताकि सेयो तिना कामा रे कमण्ड नि करो, कि तिना रा काम आसा जेड़ा ईए। 13 कऊँकि एडे लोक चूठे प्रेरित, तोखे साथे काम करने वाले और मसीह रे प्रेरित ऊणे रा ढोंग करोए। 14 और ये कुछ अचम्बे री गल्ल निए कऊँकि शैतान आपू बी ज्योतिर्मय स्वर्गदूत ऊणे रा ढोंग करोआ। 15 तो जे शैतानो रे सेवक बी तर्मा सेवको जेडे ऊणे रा ढोंग करोए, तो कोई बड़ी गल्ल निए, पर तिना रा अंत तिना रे कामो रे मुताबिक ऊणा। 16 आऊँ फेर बोलूँआ कि कोई माखे मूर्ख नि समजो। पर जे तुसे आऊँ एड़ा मानी ला रा तो माखे मूर्ख ई समजी की सईन करी लो, ताकि आऊँ बी थोड़ा जा कमण्ड करूँ। 17 इजी रे बारे रे आऊँ जो कुछ बोलूँआ से प्रभुए री आज्ञा रे मुताबिक निए, पर न समजो रे मुताबिक नशंग कमण्डो ते बोलूँआ। 18 जबकि बऊत लोक दुनिया रे लोका रे मुताबिक कमण्ड करोए, तो मां बी कमण्ड करना। 19 तुसे तो समजदार ऊई की खुशिया साथे मुर्खा री सईन करी लओए। 20 कऊँकि जेबे तुसा खे कोई दास बणाई लओआ या तुसा गे जो कुछ बी ओ से बी लई लओआ, या तोखा देई की फाईदा लई लओआ, या आपणे आपू खे तुसा ते बड़ा बणाई देओआ, या तुसा रे मुंओ पाँडे थप्पड़ बाओआ, तो तुसे सयी लओए। 21 शायद माखे शर्मिदा ऊणा चाईयो कि माखे तुसा लोका साथे एड़ा बर्ताव करने री इम्मत नि ऊई। पर जेसा केसी गल्ला रे कोई कमण्ड करोआ आऊँ मूर्खताईया रे बोलणे लगी रा कि आऊँ बी कमण्ड करी सकूँआ। 22 क्या सेयो ई इब्रानी ए? आऊँ बी ए। क्या सेयो ई इस्राएली ए? आऊँ बी ए। क्या सेयो ई अब्राहमो रे वंशो रे ए? आऊँ बी ए। 23 क्या सेयो ई मसीह रे सेवक ए? आऊँ पागलो जेड़ा बोलूँआ, पर आऊँ तिना ते केथी बढी की सेवक ए। मैं तिना ते केथी जादा मईणत करी राखी, तिना ते जादा आऊँ बार-बार जेला रे गया, कई बार कोडे खाई राखे, जादातर मेरे ई प्राण मुसीबता रे पड़ी रे। 24 पाँज बार मैं यहूदी अगुवे रे आथो साथे ऊँताली-ऊँताली कोडे खाए। 25 तीन बार मैं डण्डे खाए, एक बार मां पाँडे पात्थर बाए, तीन बार जाहजो रे जिना पाँडे आऊँ चढेया था, दूटी गे, एक दिन और एक रात मैं समुद्रो रे बिताया। 26 आऊँ बार-बार सफरो रे, नदिया रे खतरेया रे, डाकूआ रे खतरेया रे, आपणी जाति वालेया रे खतरेया रे, दूजी जातिया रे खतरेया ते, नगरो रे खतरेया रे, सुणसाण जगा रे खतरेया

रे, समुद्रो रे खतरेया रे, चूठे विश्वासी पाईया बीचे खतरेया रे रया। 27 मैं सख्त मईणत किती और बऊत राती जागदे ऊए बिताई। माखे बार-बार खाणे खे रोटी नि मिली। पूख-त्याय, सेला और टालेया री कमी इना सबी तकलीफा खे सईन करदा रया। 28 और ओरी गल्ला खे छाडी की जिना रे बारे रे आऊँ नि बतांदा, सबी मण्डलिया री चिन्ता माखे हर रोज दबाओ थी। 29 जेबे कोई कमजोर ओआ तो आऊँ बी कमजोरी महसूस करूँआ। जेबे कोई पापो रे पड़ोआ तो मेरा जिऊ बऊत दुःखी ओआ। 30 जे कमण्ड करना जरूरी ए, तो मां आपणी कमजोरिया री गल्ला पाँडे करना। 31 प्रभु यीशु मसीह रा पिता परमेशर जो सदा धन्य ए, जाणोआ कि आऊँ चूठ नि बोलदा। (aiōn g165) 32 जेबे आऊँ दमिशक नगरो रे था तो अरितास राजे रे राज्यपाले माखे पकड़ने खे दमिशक नगरो रे पईरा बठयाली ता 33 और आऊँ टोकरिया रे दवारिया ते ऊई की पीतो पाँदा ते त्वारेया और तेसरे आथो ते बची की निकली गा।

12 त्वालिया देणे ते कुछ बी फाईदा निए, तेबे बी माखे एड़ा करना पड़ोआ। आऊँ प्रभुए रे दिते रे दर्शन और परकाशनो री चर्चा करूँगा। 2 आऊँ चौदा साल पईले स्वर्गो रे चकी ता। चाए आऊँ आपणे शरीरो रे या आपणे शरीरो रे बारे था आऊँ नि जाणदा परमेशर ई जाणोआ। 3 आ, सिर्फ परमेशर ई जाणोआ कि आऊँ शरीरो रे था या शरीरो ते बारे था। पर आऊँ जाणूँआ 4 कि आऊँ स्वर्ग रे चकी ला था। मैं तेती एडिया नौखिया गल्ला सुणिगा जिना खे शब्दा रे जरिए नि बोली सकदे और जिना रा मुंओ रे ल्याऊणा मांणूआ खे ठीक निए। 5 इना गल्ला पाँडे कमण्ड करना ठीक ए, पर आऊँ एड़ा करने वाला निए। मां सिर्फ आपणी कमजोरिया पाँडे कमण्ड करना। 6 जे आऊँ कमण्ड करना चाऊँ बी तो मूर्ख नि ऊणा, कऊँकि सच बोलूँगा। पर आऊँ आपणे आपू खे कमण्ड करने ते रोऊँआ। कऊँकि लोक जेडी मेरी जिन्दगिया खे देखोए और मांते उपदेश सुणोए तिजी ते जादा बढी की माखे कुछ बी नि समजो। 7 माखे परमेशरे बऊत ई नौखिया गल्ला दखाईया। आऊँ इना गल्ला पाँडे कमण्ड नि करूँ इजी खे मेरे शरीरो रे एक कांडा चुबाई राखेया। से कांडा शैतानो रा दूत ए से माखे तकलीफ देंदा रओआ कि आऊँ कमण्ड नि करूँ। 8 इजी रे बारे रे मैं प्रभुए ते तीन बार बिनती किती कि ये मांते दूर ऊई जाओ। 9 प्रभुए माखे बोलेया, “मेरी कृपा ताखे बऊत ए; कऊँकि मेरी सामर्थ कमजोरिया रे बऊत अच्छा काम करोई।” इजी री खातर आऊँ बढी खुशिया साथे आपणी कमजोरिया पाँडे कमण्ड करूँगा ताकि मसीह री सामर्थ मां पाँडे छांए करदी रओ। 10 इजी बजअ ते आऊँ मसीह री खातर कमजोरिया रे, निन्दा रे, गरीबिया रे, उपद्रवो रे और मुसीबता रे खुश ए; कऊँकि जेबे आऊँ कमजोर ओऊँआ, तेबे मसीह री सामर्थ ते तागतबर ओऊँआ। 11 आऊँ मूर्खता री गल्ला करूँआ, पर तुसे लोके ई मांते ये जबरदस्ती कराया। तुसा तो मेरी सपारिश करनी चाईए थी, हालाँकि आऊँ कुछ पनिए, तेबे बी तिना बडेया ते बडे प्रेरित बोलणे वालेया ते किजी गल्ला रे बी कम निए। 12 जेबे आऊँ तुसा साथे था तो मैं तुसा खे प्रेरित ऊणे रा प्रमाण दितेया। मैं सन्नो साथे तुसा बीचे चिह, अचम्बे रे काम और सामर्थ रे काम दखाए। 13 ओरी मण्डलिया रे मुकाबले रे तुसा लोका रे किजी गल्ला री कमी रईगी? आ, आऊँ तुसा लोका पाँडे बोज नि बणेया। तुसे मेरा ये अन्याय माफ करेयो। 14 देखो, आऊँ तीजी बार तुसा गे आऊणे खे त्यार ए और मां तुसा पाँडे कोई बोज नि राखणा। कऊँकि आऊँ तुसा री सम्पति नि, बलिक तुसा खेई चाऊँआ। कऊँकि बच्चेया, माया-बावा खे पैसा कट्टा नि करना चाईयो, पर माया-बावा, बच्चेया खे पैसा कट्टा करना चाईयो। 15 मां तुसा लोका रिया तई बढी खुशिया साथे खर्च करना, और आपणे प्राण बी तुसा खे देई देणे। क्या जितणा जादा आऊँ तुसा साथे प्यार राखूँआ, तिथणा ई कअटी की तुसे बी मांते प्यार राखोगे? 16 फेर बी तुसा खे ये मानणा पडना कि आऊँ तुसा लोका पाँडे बोज नि बणेया, पर एड़ा ऊई सकोआ कि कोई बोली कि मैं चलाकिया ते तुसे तोखा देई कि फसाई ले। 17 तुसेई बताओ जो लोक मैं तुसा गे पेजे, क्या तिना लोका बीचा ते किने बी

तोखा करी की तुसा ते कुछ गलत फाईदा लया? 18 मैं तीतुसो खे समजयाई की तेस साथे से पाई पेजेया, तो क्या तीतुसे तोखा करी की तुसा ते कुछ गलत फाईदा लया? क्या आसे एक ई पवित्र आत्मा रे चलाए नि चले? क्या एक ई बाटा रे नि चलिए? 19 पर तुसे एबुए तक समजणे लगी रे ऊगे कि आसे तुसा सामणे जवाब देणे लगी रे। आसे तो परमेशरो खे आजीर जाणी की मसीह रे बोलूँए। ओ प्यारेओ, सब गल्ला तुसा रे विश्वासो री बड़ोतरिया खे बोलूँए। 20 कऊँकि माखे डर ए कि केथी एड़ा नि ओ कि आऊँ आईकि जेड़ा चाऊँआ, तियाँ तुसा खे नि पाऊँ और माखे बी जेड़ा तुसे नि चांदे, तेड़ा ई पाओ। केथी एड़ा नि ओ कि आऊँ तुसा रे एती आईकि चगड़ा, जलन, रोष, बिरोद, ईर्ष्या, चुगली, कमण्ड और बखेड़े पाऊँ 21 और केथी एड़ा नि ओ कि जेबे आऊँ वापस आऊँ तो मेरा परमेशर माखे तिना सामणे शर्मिदा नि करी देओ और माखे बऊत जणेया खे फेर शोग करना पड़ो, जिने पईले पाप कित्तेया था और गन्दे काम, व्याभिचार, लीचड़पण ते, जो तिने कित्तेया, मन नि फेरैया।

13 एबे तीजी बार आऊँ तुसा लोका गे आऊणे वाला ए। पवित्र शास्त्र बोलीआ, “दो या तीन गवाओ री गवाईया रे जरिए हर एक गल्ल साबित किन्ती जाओ।” 2 जेड़ा जेबे आऊँ दूजी बार तुसा साथे था, तो तेड़ा ई एबे दूर रंदे ऊए तिना लोका खे जिने पईले पाप कित्तेया और बाकि सबी लोका खे एबे पईले तेई बोली देऊँआ कि जे आऊँ फेर आऊँगा, तो सजा दित्ते बिना छाडूँगा नि। 3 आऊँ तुसा ते बोलूँआ कि तुसे तो इजी रा सबूत चाओए कि मसीह मेरे जरिए बोलीआ। तुसा खे सुदारने खे मसीह कमजोर निए, पर तुसा रे सामर्था ए। 4 से कमजोरिया री बजअ ते कूसो पाँदे चढ़ाया तो गया, तेबे बी परमेशरो री सामर्था ते जिऊँदा ए। आसे बी तो तेसदे कमजोर ए, पर परमेशरो री सामर्था ते जो तुसा खे ए, तेस साथे जिऊणे। 5 आपणे आपू खे परखो कि तुसे विश्वासो रे आए कि नि। आपणे आपू खे परखो, क्या तुसे आपणे बारे रे ये नि जाणदे कि यीशु मसीह तुसा रे ए? नई तो तुसे परखणे रे नक्कमे निकली रे। 6 पर मेरी उम्मीद ए कि तुसे जाणी लो कि आसे नक्कमे नि निकले। 7 और आसे आपणे परमेशरो ते प्रार्थना करूँए कि तुसे कोई बुराई नि करो; इजी खे नि कि आसे खरे दिखूँ पर आसे एड़ा ई चाऊँए कि तुसे पलाई करो, चाए आसे नक्कमे ई ठईरूँ। 8 कऊँकि आसे सच्चो रे बिरोदो रे कुछ नि करी सकदे, पर सच्चो साथे सदा खड़े रई सकूँए। 9 जेबे आसे कमजोर ए और तुसे तागतबर ए, तो आसे खुश आऊँए और ये प्रार्थना बी करूँए कि तुसे विश्वासो रे मजबूत ऊई जाओ। 10 येई बजअ ए कि आऊँ तुसा गे आऊणे ते पईले इना सारी गल्ला खे लिखूँआ ताकि माखे आपणे अक्को रा इस्तेमाल करी की तुसा खे सजा देणे रे जरूरत नि पड़ो, से अक्क माखे परमेशरे देई राखेया। कऊँकि आऊँ आपणा अक्क तुसा रे विश्वासो खे मजबूत करने खे चाऊँआ न कि तिजी खे नाश करने खे। 11 ओ साथी विश्वासियो, आऊँ इना शब्दा साथे आपणी चिट्ठी बन्द करूँआ। खुश रओ, सिद्ध बणदे जाओ, एकी दूजे खे आँसला देदे रओ, एक ई मन राखो, मेल-मिलापो साथे रओ। तेबे प्यार और शान्तिया रा परमेशर तुसा साथे रणा। 12 एकी-दूजे खे प्यारो साथे गले मिली की नमस्कार करो। 13 सब परमेशरो रे पवित्र लोक तुसा खे नमस्कार करोए। 14 प्रभु यीशु मसीह री कृपा, परमेशरो रा प्यार और पवित्र आत्मा री सहभागिता तुसा सबी साथे ऊँदी रओ।

गलातियों

1 ये चिट्ठी मां प्रेरित पौलुसो री तरफा ते ए। आऊं प्रेरितों रे तौरो पाँदे ना तो केसी मांणूआ री टोलिया री तरफा ते ए और ना ई केसी मांणूए रे जरिए चुणी राखेया। पर परमेश्वर पिते रे जरिए और यीशु मसीह रे जरिए जो मेरे रेया बीचा ते जिऊँदा ऊईगा, आऊं प्रेरित चुणी राखेया। 2 और ये चिट्ठी मां साथे रणे वाले सारे विश्वासी पाईया री तरफा ते गलातिया प्रदेशो री मण्डलिया खे पेजणे लग्गी रे। 3 आऊं विनती कर्हूआ कि परमेश्वर पिता और म्हारे प्रभु यीशु मसीह री तरफा ते तुसा खे कृपा और शान्ति मिलदी रओ। 4 आसा रे पिता परमेश्वरो री इच्छा रे मुताबिक यीशु मसीह आपणे आपू खे आसा रे पापो री खातर बलिदान करी ता ताकि आसे एसा आज की दुनिया रे लोका रे बुरे कामा ते बची रईए। (aiōn g165) 5 परमेश्वरो री स्तुति और महिमा जुगो-जुगो तक ऊँदी रओ। आमीन। (aiōn g165) 6 माखे ये गल्ल जाणी कि बऊत ई दुःख ऊआ कि तुसे परमेश्वरो ते जिने तुसे मसीह री कृपा ते बुलाए, तेसते तुसे इतणी चट पटकी गे। और तुसे ओर ई प्रकारा री शिक्षा री तरफा खे चुकणे लगे, जेतेखे कुछ लोक सुसमाचार बोलीए। 7 पर सच तो ये ए कि दूजा सुसमाचार अया ई नि। पर गल्ल ये ए कि कुछ लोक एडे ए, जो तुसा खे बड़ी उलजणा दे पाई देओए और मसीह रे सुसमाचारो खे बिगाडना चाओए। 8 पर जे आसे या स्वर्गो ते कोई स्वर्गदूत बी तेस सुसमाचारो खे छाडी की जो आसे तुसा खे सुणाया, कोई ओर सुसमाचार तुसा खे सुणाओ, तो से परमेश्वरो री तरफा ते स्नापित ए। 9 जेड़ा आसे पईले बोली चुकी रे, तेड़ा ई आऊं एबे फेर बोलूँआ कि तेस सुसमाचारो खे छाडी की जो तुसे मानी राखेया, जे कोई ओर सुसमाचार सुणाओआ, तो से परमेश्वरो री तरफा ते स्नापित ए। 10 ये गल्ल बिल्कुल साफ ए कि आऊं मांणूआ खे खुश करने री कोशिश नि करदा, पर आऊं परमेश्वरो खे खुश करना चाऊँआ। जे आऊं एबुए तक मांणूआ खे खुश करदा रंदा, तो मसीह रा दास नि ऊँदा। 11 ओ साथी विश्वासियो! आऊँ तुसा खे बताई देऊँआ कि जो सुसमाचार मैं सुणाई राखेया, से केसी मांणूआ रे दमाको री ऊपज निए। 12 कऊँकि से मांगे केसी मांणूआ री तरफा ते नि पऊँछेया और ना ई किने मांणूए माखे सिखाया। पर माखे ये संदेश सीदा ई यीशु मसीह री तरफा ते मिली रा। 13 तुसे सुणी चुकी रे कि यहूदी मतो रे पईले मेरा केड़ा चाल-चलण था कि आऊँ परमेश्वरो री मण्डलिया खे बऊत जादा सताऊँ था और नाश करने री कोशिश करदा रऊँ था। 14 आऊँ आपणे साथी यहूदी पाईया ते जादा यहूदी मतो रे आगे बड़दा जाऊँ था और आपणे बाप-दादया रे रीति-रवाजा खे बऊत ई तनो-मनो ते मानो था। 15 पर परमेश्वरो री जिने आऊँ मेरी आम्मा रे गर्भो तेई ठराया और आपणी कृपा ते बुलाई ला। 16 जेबे इच्छा ऊई कि मांदे आपणे पुत्रो खे प्रगत करो, ताकि आऊँ दुजिया जातिया रे तेसरा सुसमाचार सुणाऊँ, तो आऊँ तेबुई केसी बी मांणूआ गे नि गया कि तिना रा सन्देश पाऊँ। 17 और ना यरूशलेमो रे तिना गे गया, जो मांते पईले प्रेरित चुणे जाई चुके थे, पर फटाफट अरब देशो खे चली गा और तेबे तथा ते दमिशक नगरो खे वापस आईगा। 18 तेबे तीन साल बाद आऊँ प्रेरित पतरसो खे मिलणे खे यरूशलेम नगरो रे गया और तेस साथे पंद्रा दिना तक रया। 19 पर आऊँ प्रभुए रे पाई प्रेरित याकूबो खे छाडी की केसी ओरी प्रेरिता खे नि मिलेया। 20 जो गल्ला आऊँ तुसा खे लिखूँआ, देखो, परमेश्वरो खे आजीर जाणी की बोलूँआ कि सेयो चूठिया निए। 21 यरूशलेम नगरो खे छाडणे ते बाद आऊँ सीरिया और किलिकिया रे देशो रे आया। 22 पर मां साथे यहूदिया प्रदेशो रे रणे वाले मसीह विश्वासिया री मण्डली एबुए तक नि मिली थी। 23 पर येई सुणया करो थी कि एक बखत था जेबे से आसा खे पईले सताया करो था, से एबे तेस ई विश्वासो रा सुसमाचार सुणाओआ, जेतेखे पईले नाश करने री कोशिश करो था 24 और सेयो लोक मेरे बारे रे परमेश्वरो रा धन्यवाद करदे रओए कऊँकि परमेश्वरे आऊँ मण्डलिया खे सताणे वाले ते बदली कि मसीह रा विश्वासी बनाईता।

2 चौदा साल बाद आऊँ बरनबासो साथे यरूशलेम नगरो खे फेर गया और तीतुसो खे बी आपू साथे लयी गा। 2 आऊँ तेती गया कऊँकि परमेश्वरे माखे ये प्रकट कित्तेया कि आऊँ तेती जाऊँ। मैं तेती जो मण्डलिया रे जाणे-माणे रे अगुवे थे लग जे मिली की तिना खे बताई ता कि आऊँ दुजिया जातिया बीच सुसमाचार प्रचार कर्हूआ। ताकि एड़ा नि ओ कि मेरे एस बखतो री या आगली दौड़-तूप बेकार ओ। 3 तीतुस जो मां साथे आया था से यूनानी था और बिना खतने रा था। पर यरूशलेम नगरो री मण्डलिया रे तिने अगुओ से अपनाया और खतना कराणे खे मजबूर नि कित्तेया। 4 तीतुसो रा बिना खतने ते ऊणा एक मसला बणीगा। ये तिना चूठे पाईया री बजअ ते ऊआ, जो चोरिए कूसी की आए थे, ताकि तेसा आजादिया रा जो मसीह यीशुए रे आसा खे मिली री, पेट लयी की आसा खे दास बणाओ। 5 पर आसे तिना लोका री गल्ला ते एक कअडिया खे बी सईमत नि ऊए, ताकि सुसमाचारो री सच्चाई तुसा रे बणी री रओ। 6 जो लोक जाणे-माणे रे अगुवे थे सेयो चाए केडे बी थे, इजी ते मेरे बचारा रे कोई फर्क नि पड़दा। कऊँकि परमेश्वर मैं देखेया न्याय नि करदा। तिना लोका ते माखे कुछ बी नवां उपदेश नि मिलेया। 7 इजी ते लग तिने लोके समजेया कि जेड़ा यहूदी लोका खे सुसमाचार सुनाणे रा काम पतरसो गे देई राखेया, तेड़ा ई दूजिया जातिया रे लोका खे सुसमाचार सुनाणे रा काम परमेश्वरे माखे देई राखेया। 8 कऊँकि जिने परमेश्वरे पतरसो खे यहूदिया रा प्रेरित बणाई की तिना रे जरिए सेवा रा काम कित्तेया, तिने ई परमेश्वरे माखे बी दुजिया जातिया रा प्रेरित बणाई की मेरे जरिए सेवा रा काम कित्तेया। 9 जो लोक मण्डलिया रे खन्बे समजे जाओ थे मतलब याकूब, कैफा और यहून्ना तिने कृपा रा से वरदान पछयाणेया जो माखे मिलेया। तिने माखे और बरनबासो खे आपणे साथी समजी की आसा खे सहभागिता रा दौणा आथ दित्तेया। सेयो एते गल्ला खे सईमत ऊए कि आसे दुजिया जातिया गे सुसमाचार सुनाणे खे जाऊँ और सेयो यहूदिया गे जाओ। 10 तिने बस आसा ते येई विनती किती कि आसे यरूशलेम नगरो रे गरीब विश्वासिया री मताद करिए और एस ई कामो खे करने री आऊँ आपू बी कोशिश करने लग्गी रा था। 11 पतरसो रा अन्ताकिया नगरो रे आऊणे ते बाद एक दिन मैं तेसरा लोका रे सामणे बरोद कित्तेया, कऊँकि जो से करने लग्गी रा था से गलत था। 12 से पईले दुजिया जातिया साथे रोटी खाया करो था, पर जेबे याकूबो री तरफा ते कुछ यहूदी लोक आये, तो खतना कित्ते रे यहूदी लोका रे डरो रे मते से तिना ते पीछ आटीगा और कनारा करने लगेया। 13 और तेस साथे बाकि यहूदी विश्वासिये बी कपट कित्तेया, एथो तक कि बरनबास बी तिना रे कपटो रे पड़ी गा। 14 पर जेबे मैं देखेया कि सेयो सुसमाचारो री सच्चाईया पाँदे सीदी चाल नि चलदे, तो मैं सबी सामणे पतरसो खे बोलेया, “जेबे तूँ यहूदी ऊई की दुजिया जातिया जेड़े चलेया और यहूदिया जेड़ा निए, तो तूँ दुजिया जातिया खे यहूदिया जेड़े चलणे खे कऊँ बोलेया? 15 “आसे जो जन्मो रे यहूदी ए और ‘पापी दूजी जाति’ निए, जेड़ा कि आसे यहूदी तिना खे दुजिया जातिया रे बोलीए। 16 तेबे बी आसे ये जाणूए कि मांणू मूसे रा बिधानो रे कामो ते तर्मी नि ठईरदा। पर बस यीशु मसीह पाँदे विश्वास करने ते तर्मी ठईरोआ। आसे आपू बी यीशु मसीह पाँदे विश्वास कित्तेया, कि आसे बिधानो रे कामो ते नि पर मसीह पाँदे विश्वास करने ते तर्मी ठईरूँ। कऊँकि बिधानो रे कामो ते कोई मांणू तर्मी नि ठईरना। 17 “कुछ यहूदी सोचोए कि बस यीशु मसीह पाँदे विश्वास करी की आसे पाप कित्तेया। कऊँकि आसे तर्मी बणने खे बिधानो खे मानणे री बजाये बस मसीह पाँदे विश्वास कर्हूए। तो क्या मसीह पापो रा पालण-पोषण करने वाले ए? कदी पनि! 18 पर जे आऊँ फेर सेई बिधानो खे मानणे रा काम कर्हूँ जो मैं छाडीता था, तो आपणे आपू खे अपराधी ठराऊँआ। 19 “कऊँकि आऊँ तो बिधानो रे जरिए बिधानो खे मरी गा, ताकि आऊँ परमेश्वरो री खातर जिऊँ। 20 आऊँ मसीह साथे क्रूसो पाँदे चढ़ाया। आऊँ एबे जिऊँदा नि रया, पर मसीह मांदे जिऊँदा ए। आऊँ शरीरो रे जो एबु जिऊँदा ए, तो बस तेस विश्वासो ते जिऊँदा ए, जो परमेश्वरो रे पुत्रो पाँदे ए, जिने माखे प्यार कित्तेया और मेरी खातर आपू खे देईता। 21 आऊँ परमेश्वरो

री कृपा बेकार नि ठराई सकदा। जे बिधानो रे जरिए धार्मिकता ऊँदी, तो मसीह रा मरना बेकार ऊँदा।”

3 ओ नासमज गलातिया रे रणे वालेयो! तुसे किने मोही ले? मैं तुसा लोका खे यीशु मसीह खे क्रूसो पाँदे चढ़ाए जाणे रा मतलब साफ-साफ समजाईता था जियाँ मानो तुसा री आखी सामणे से क्रूसो पाँदे चढ़ाई राखेया ओ। 2 आऊँ तुसा ते बस ये पूछणा चाऊँआ कि क्या तुसे पवित्र आत्मा मूसा रे बिधानो खे मानणे ते पाया? बलिकुल नि! बलिक तुसे यीशु मसीह रे सुसमाचरो पाँदे विश्वास करने ते पवित्र आत्मा पाया। 3 क्या तुसे एंडे नासमजारे पवित्र विश्वास आत्मा री रीतिया ते शुरू करी की एबे शरीरो री रीतिया पाँदे अंत करना? 4 क्या तुसे विश्वासो रे आऊणे ते बाद इतणा दुःख ईयाँ ई उठायो? पर कदी बी बेकार नि। 5 आऊँ तुसा ते फेर पूछणा चाऊँआ कि परमेशर जो तुसा खे पवित्र आत्मा देओआ और तुसा बीचे सामर्थ्य रे काम करोआ, क्या से एड़ा इजी खे करोआ कि तुसे बिधानो खे मानोए या तुसे सुसमाचरो पाँदे विश्वास कित्तेया इजी खे एड़ा करोआ? 6 पवित्र शास्त्रो रे बोली राखेया, “अब्राहमे परमेशरो पाँदे विश्वास कित्तेया और ये तेसखे धार्मिकता गिणी गयी।” 7 तुसे एसा गल्ला खे जाणी लो कि जो लोक अब्राहमो जेडे परमेशरो रे विश्वास करोए सेयो लोक ई अब्राहमो री असली ल्वाद ए। 8 और पवित्र शास्त्रे पईले ई ये जाणी की कि परमेशरो दूजी जाति विश्वासो रे जरिए तर्मी ठराणी, पईले तेई अब्राहमो खे ये सुसमाचार दित्तेया, “तेरे जरिए तरतिया री सबी जातिया आशीष पाणी।” 9 तो जो लोक अब्राहमो जेडे परमेशरो रे विश्वास करोए सेयो विश्वास करने वाले लोक अब्राहमो जेडे आशीष पाओए। 10 तो जितणे लोक बिधानो रे कामो पाँदे विश्वास राखोए, सेयो सब सापो रे अधीन ए, कऊँकि लिखी राखेया, “जो कोई बिधानो री कताबा रे लिखी रिया सब गल्ला रे करने रे स्थिर नि रंदा, से श्रापित ए।” 11 पर ये गल्ल प्रकट ए कि कोई बी मांणु बिधानो रे जरिए परमेशरो गे तर्मी नि ठईरंदा। कऊँकि पवित्र शास्त्रो रे लिखी राखेया, “तर्मी मांणु विश्वासो रे जरिए जिऊँदा रणा।” 12 पर मूसा रे बिधानो रा विश्वासो साथे कोई रिश्ता नि, कऊँकि पवित्र शास्त्रो रे लिखी राखेया, “जो इना सबी गल्ला खे मानोगा, से तिना री बजअ ते जिऊँदा रणा।” 13 पर मसीहे आसे तेस श्रापो ते छुड़ाईते जो बिधान ना मानणे ते आसा खे मिलोआ। आपू ई मसीह म्हारे पापो रा श्राप आपू पाँदे लयी की क्रूसो पाँदे मरेया। कऊँकि पवित्र शास्त्रो रे लिखी राखेया, “जो कोई काठो पाँदे लटकाया जाओ आ से श्रापित ए” 14 ये इजी री खातर ऊआ, ताकि अब्राहमो री आशीष मसीह यीशुए रे दुजिया जातिया तक पऊँछो और आसे विश्वासो रे जरिए तेसा पवित्र आत्मा खे पाऊँ, जेतेरा वादा ऊई रा। 15 ओ साथी विश्वासियो, आऊँ मांणुए री रीतिया पाँदे बोलूँआ कि केसी मांणुआ रा वसीयतनामा पक्का ऊई जाणे ते बाद ना तो तिजी खे कोई रद्द करी सकोआ और ना ई तिदे कुछ जोड़ी सकोआ। 16 एबे जो वादे अब्राहमो खे और तेसरे वंशो खे दिते, तिजी रे बारे रे पवित्र शास्त्र ये नि बोलदा कि, “तिना रे वंशो खे” जेडा कि बऊत जणेया रे बारे रे, बलिक “तिना रे वंशजो खे”, मानो एकी ई मांणुए खे, और से वंश मसीह ए। 17 मेरा बोलणे रा मतलब ये ए कि परमेशरे अब्राहमो साथे एक वाचा पक्की किती और तिजी खे पूरा करने रा वादा बी कित्तेया। चार सौ तीई साल बाद परमेशरे मूसे रे जरिए बिधान दित्ता। मूसा रा से बिधान परमेशरो री वाचा खे टाली नि सकी कि परमेशरो रा वादा बेकार ठईरो। 18 जे बिधानो रे जरिए जायदात मिलदी, तो वादे ते तिजी रा कोई मतलब नि ऊँदा। पर वादे रे जरिए ई परमेशरे तेसा जायदाता खे अब्राहमो खे देणे री कृपा किती। 19 तो तेबे बिधानो रा क्या इयादा ए? परमेशरे वादे साथे बिधान इजी खे दित्ता कि लोक आपणे पापो री पछयाण करी सको। अब्राहमो रे वादे रा वंश आऊणे तक ई जेतेखे परमेशरे देणे रा वादा कित्तेया था मूसे रा बिधान बणी री रई। परमेशरे आपणा बिधान स्वर्गदूता रे जरिए मूसे खे दित्ती, जो परमेशर और लोका बीचे बचोला था। 20 बचोलापण तो कम ते कम रूँई जणेया बीचे कित्तेया जाओआ। पर परमेशर जो एक ईए, तिने अब्राहमो

ते वादा करदे बखते बचोले रा इस्तेमाल नि कित्तेया। 21 तो क्या बिधान परमेशरो रे वादे रे बिरोदो रे ए? कदी पनि, कऊँकि जे एड़ी बिधान देंदे जो जीवन देई सको, तो सच्यी तेसा बिधानो खे मानणे ते धार्मिकता मिली जांदी। 22 पर पवित्र शास्त्रे सब पापो रे अधीन करी ते, ताकि से वादा जेतेरा आधार प्रभु यीशु मसीह पाँदे विश्वास करना ए, विश्वास करने वालेया खे पूरा ओ। 23 पर विश्वासो रे आऊणे ते पईले बिधानो री अधीनता रे आसे कैद थे और तेस विश्वासो रे आऊणे तक, जो प्रकट ऊणे वाला था, आसे तिजी रेई बन्दनो रे बंदी रे थे। 24 तेबेई मसीह रे आऊणे तक आसा री अगुवाई करने खे और आसा री देखपाल करने खे बिधान दित्ता, ताकि आसे विश्वासो ते तर्मी ठईरूँ। 25 पर एबे जेबे आसे मसीह पाँदे विश्वास करी ता रा तो आसे एबे बिधानो रे अधीन नि रये। 26 कऊँकि तुसे सब तेस यीशु मसीह पाँदे विश्वास करने रे जरिए परमेशरो री ल्वाद ए। 27 और तुसा बीचा ते जितणेया यीशु मसीह रा बपतिस्मा लया, तिने मसीह पईनी ला रा। 28 यीशु मसीह रे विश्वास करने ते तुसे सब एक जेडे बणी गे रे, चाए कोई यहूदी ए या दूजी जाति, चाए कोई दास ए या आजाद, चाए कोई मर्द ए या जवाणस सब यीशु मसीह रे एक ए 29 और जे तुसे मसीह रे ए, तो अब्राहमो रे वंश और वादे रे मुताबिक बारस बीए।

4 मेरे बोलणे रा मतलब ये ए कि पाऊ आपणे पिते री जायदाता रा अक्कदार ओआ पर जदुओ तक से नाबालिक ए तदुओ तक से दासो जेडा ईए। बलिक से आपणे पिते री सबी चीजा रा मालक बी ए, तेबे बी तेसरे और दासो रे कोई फर्क नि। 2 पर पिते रे ठराए रे बखतो तक से देख-रेख करने वाले और पण्डारियो रे वशो रे रओआ। 3 तियाँ ई आसे बी जेबे तेस बालको जेडे थे, तो तिना रीति-रिवाज और तेसा बिधानो रे दास थे जो एसा दुनिया रे ए। 4 पर जेबे ठीक बखत आया, तो परमेशरे आपणा पुत्र एते दुनिया रे पेजेया, जो जवाणसा ते जम्मेया। से यहूदिया रे परिवारो रे पैदा आओ और मूसे रा बिधानो रे मुताबिक आपणी जिन्दगी जी। 5 ताकि मूसे रा बिधानो रे अधीन रणे वालेया खे मोले लयी की छुड़ाई लो और आसा खे आपणे बच्चेया रे रूपो रे अपनाओ। 6 कऊँकि आसे तेसरे पाऊ ए, परमेशरे आपणे पुत्रो रा आत्मा आसा रे दिलो रे पेजेया, से आत्मा परमेशरो खे, ओ अब्बा! ओ पिता! बोली की आक्का पाओआ। 7 तेबेई एबे आसे दास नि, बलिक पाऊ बणी गे, कऊँकि एबे आसे परमेशरो री ल्वाद ए, तो जो कुछ बी तेसगे अया तेस सब कुछ आसा खे देई देणा। 8 जेबे तुसे परमेशरो खे नि जाणो थे, तेस बखते तुसे तिना रे दास थे, जो सच्यो खेई परमेशर अया ई नि। 9 पर एबे तुसे परमेशर पछयाणी ला रा, बलिक एड़ा बोली कि परमेशरे तुसे अपनाई ले रे, तो फेर तुसे कमजोर और नकम्मी दुनिया रे रीति-रवाज और शुरूओ री शिक्षा रे दास बणने खे कऊँ वापस ऊणे लगी रे? क्या तुसा खे फेर तिना रे दास बणने री इच्छा ए? 10 तुसे दुजिया जातिया रे लोक मूसे रा बिधानो रे मुताबिक दिन और मीन्ने, ठीक बखत और सालो खे मानोए। 11 आऊँ तुसा रे बारे रे डऊँआ, केथी एड़ा नि ओ कि जो मईणत मैं तुसा री तई किती बेकार जाओ। 12 ओ साथी विश्वासियो, आऊँ तुसा ते बिनती कऊँआ कि तुसे बी मां जेडे मूसे रा बिधानो ते आजाद ऊई जाओ, कऊँकि आऊँ बी तुसा जेडा बणीगा रा, तुसे मेरी ठीक देखपाल किती। 13 तुसा खे याद ओगा कि पईली बार मैं आपणी बमारी और कमजोरिया री दशा रे तुसा खे सुसमाचार सुणाया 14 और तुसे मेरी शरीरो री दशा खे, जो तुसा खे मूसीबता री बजअ थी, तुच्छ नि जाणी, ना तिजी ते चीढ किती पर परमेशरो रे स्वर्गदूत बलिक मसीह जेडा आऊँ मानेया। 15 तो तुसा री से खुशी मनाणी केथी गयी? आऊँ तुसा रा गवा ए कि जे ऊई सकदा, तो तुसे आपणी आखी बी निकयाली की माखे देई देंदे। 16 तो क्या तुसा ते सच बोलणे री बजअ ते आऊँ तुसा रा दुश्मण ऊईगा? 17 सेयो चूटे शिक्षक तुसा खे आपणी तरफा खे करने खे उतावले ए, पर खरी नियता ते नि, बलिक तुसा खे मांते लग करना चाओए, ताकि तुसे तिना खेई दोस्त बणाई लो। 18 सदा ई खरे इरादे रे इच्छुक ऊणा बढ़िया ओआ और सिर्फ तेस बखते ई नि जेबे आऊँ तुसा

साथे रऊँआ। 19 ओ मेरे बालको! जदुओ तक तुसा रे मसीह री शकल नि बणी जाओ, तदुओ तक आऊँ तुसा री तँई फेर बच्चा ऊणे री जिया पीड़ा सईन कऊँआ। 20 आऊँ चाऊँआ कि एस बखते आऊँ तुसा गे ऊँदा और तुसा ते प्यारो साथे गल्ला करदा, कऊँकि मेरिया समजा रे नि आऊँदा कि आऊँ तुसा ते क्या बोलूँ। 21 तुसे जो मूसे रा बिधानो रे अधीन ऊणा चाओए, मेरी गल्ल सुणो, मां तुसा खे बताणा कि मूसा रे बिधानो री कताबा रे क्या लिखी राखेया? 22 पवित्र शास्त्रो रे लिखी राखेया कि अब्राहमो रे दो पाऊ थे। एक पाऊ अब्राहमो री दासी हाजिरा ते पैदा ऊआ और दूजा पाऊ तेसरी लाड़ी जो दासी नि थी तेसा ते पैदा ऊआ। 23 पर अब्राहमो रा जो पाऊ तेसा दासी जवाणसा ते पैदा ऊआ, से शरीरो री रीतिया ते जम्मिया और से पाऊ जो आजाद जवाणसा ते मतलब तेसरी लाड़िया ते पैदा ऊआ से परमेशरो रे वादे रे मुताबिक जम्मिया। 24 इना गल्ला रे उदारण ए, यो जवाणसा मानो दो वाचा ए। पईली जवाणस हाजिरा जो सीने पाहडो खे दखाओई, जेती परमेशरे इसाएली लोका खे बिधान दित्ता जेसा ते दास ई जम्मोए। 25 यहूशलेमो रे लोक आज गुलामिया रे ए कऊँकि से यहूदी बिधानो खे मानोए। ये लोक हाजिरा जेडे ई गुलामिया रे ए जो अरब देशे रे सीने पाहडो पाँदे दित्ती रे बिधानो खे दखाओआ। 26 और दूजी जवाणस सारा ए जो स्वर्गिय यहूशलेमो खे दखाओई। से आजाद जवाणस ए और से म्हाए आमाए। 27 जेड़ा कि यशायाह भविष्यवक्ते पवित्र शास्त्रो रे लिखी राखेया, “ओ बांझ जवाणस, तूँ जो जमांदी नि, खुशी मना, तूँ जेसखे पीड़ा नि लगदिया, गला खोली की जय-जयकार कर, कऊँकि त्यागिया री ल्वादा, स्वागणी री ल्वादा ते बी जादा ए।” 28 ओ साथी विश्वासियो! आसे इसहाको जेडे वादे री ल्वादा ए। 29 पर एबे तुसे तिना लोका रे जरिए सताए जाओए जो तुसा खे बिधानो रे अधीन राखणा चाओए। ठीक इश्माएलो जेडे ई जो शरीरो री इच्छा रे मुताबिक जम्मिया और परमेशरो रे वादे रे मुताबिक जम्मो रे पाऊ इसहाको खे सताओ था। 30 पर पवित्र शास्त्र क्या बोलोआ? “दासी और तेसा रे पाऊए खे निकयाली दे, कऊँकि दासिया रा पाऊ आजाद जवाणसा रे पाऊए साथे वारिस नि ऊणा।” 31 तेबेई ओ साथी विश्वासियो! आसे दासी जवाणस मतलब बिधानो रे नि, बल्कि आजाद जवाणस मतलब विश्वासो री ल्वादा ए।

5 मसीहे मूसे रा बिधानो ते आजाद रणे खे आसे आजाद करी राखे। तो आपणी आजादिया रे बणे रे रओ और बिधानो री गुलामिया रे फेर बंदी कि नि रओ। 2 देखो, आऊँ पौलुस तुसा खे बोलूँआ कि जे खतना कराओगे, तो मसीह रे तुसा खे कुछ फाईदा नि ऊणा। 3 आऊँ हर खतना कराने वालेया खे फेर और बी जोर देई की बताई देऊँआ कि तेसखे मूसा री सारा बिधान मानणी पड़नी। 4 तुसे जो मूसे रा बिधान मानणे रे जरिए तर्मी ठईरना चाओए, मसीह ते लग ऊँगे रे और परमेशरो री कृपा तुसे आपू ई दुकराईती, जेतेरे जरिए आसे परमेशरो रे सामणे तर्मी ठईरूँए। 5 आऊँ ये बोली सकूँआ कि आसा खे पवित्र आत्मा री तरफा ते पूरा परोसा ए कि परमेशरो आसे मसीह रे विश्वासो री बजअ ते तर्मिया रे रूपो रे मानणे। 6 यीशु मसीह रे ना तो खतना, ना बिना खतना कुछ कामो राए, पर बस विश्वासो रा, जो प्यारो रे जरिए असर करोआ। 7 मसीह रे तुसे ठीक-ठाक तरक्की करने लगी रे थे। एबे तुसे किने रोकी ते, कि सच्यो खे नि मानो? 8 एडी शिक्षा तुसा गे परमेशरो री तरफा ते नि आई री जिने तुसे आपणे बच्चेया जेडे बुलाई राखे। 9 एक कहावत ए जो ईयां बोलोई कि थोड़ा पा सजेड़ा सारे गुँदे रे आटे खे सजेड़ा बनाई देओआ। 10 आऊँ प्रभुए पाँदे तुसा रे बारे रे परोसा कऊँआ कि तुसे केसी दूजे री शिक्षा खे नि मानोगे। पर जो कोई तुसा खे आपणी चूठी शिक्षा ते कबराई देओआ, से चाए कोई बी ओ, परमेशरो री तरफा ते तेसखे सजा मिलणी। 11 ओ साथी विश्वासियो, जे आऊँ एबुए तक खतने रा प्रचार कऊँआ, तो यहूदिया रे जरिए कऊँ एबुए तक सताया जाऊँआ? जे मसीह री मौता री बजाए खतने रा प्रचार करदा तो यहूदी मेरे खलाफ बरोद नि करदे। 12 पला ऊँदा कि जो तुसा खे चूठी शिक्षा ते कबराई देओए, सेयो आपणे आपू खे नपूसक बनाई देँ। 13 ओ साथी विश्वासियो,

तुसे परमेशरो रे जरिए आजाद ऊणे खे बुलाई राखे, पर एड़ा नि ओ कि ये आजादी शरीरो रे पापी सबाओ री इच्छा खे पूरा करने रा मौका बणो, बल्कि प्यारो साथे एकी-दूजे रे दास बणो। 14 कऊँकि सारा बिधान इजी एकी गल्ला रे पूरी ऊई जाओई, “तूँ आपणे पड़ोसिये साथे आपू जेड़ा प्यार राखा।” 15 पर जे तुसे जानवरा जेडे एकी-दूजे खे दाँदे देओए और फाड़ने री कोशिश करोए, तो चौकस रओ। केथी एड़ा नि ओ कि तुसे एकी-दूजे रा सत्यानाश नि करी देओ। 16 पर आऊँ बोलूँआ कि पवित्र आत्मा रे मुताबिक चलो, तो तुसा शरीरो री इच्छा किंवां बी पूरी नि करनी। 17 कऊँकि शरीरो रा पापी सबाओ आत्मा रे बिरोदो रे इच्छा करोआ और यो एकी-दूजे रे बिरोदी ए, ताकि जो कुछ तुसे करना चाओए, से करी नि सको। 18 और जे तुसे आत्मा रे मुताबिक चलोए, तो बिधानो रे अधीन नि रये। 19 शरीरो रे काम तो प्रकट ए, मतलब-व्याभिचार, गन्दे काम, लीचड़पण, 20 मूर्तिपूजा, जादू-टोणा, बैर, चगड़ा, ईर्ष्या, रोष, बिरोद, फूट, पाप, 21 डाह, मतवालापण, लीला-क्रीड़ा और इना जेडे ओर बी और काम ए। इना रे बारे रे आऊँ तुसा खे पईले ई बताई देऊँआ, जेड़ा पईले बी बोली चुकेया रा कि एडे-एडे काम करने वाले परमेशरो रे राज्य रे बारिस नि ऊणे। 22 पर पवित्र आत्मा रा फल प्यार, खुशी, शान्ति, सब्र, कृपा, पलाई, विश्वासो जोगा, 23 नम्रता और संयम ए। एडे-एडे कामो रे बिरोदो रे कोई बिधान नि। 24 और जो यीशु मसीह रे ए, तिने शरीरो रे पापी सबाओ खे तेसरी वासना और इच्छा समेत क्रूसो पाँदे चड़ाई ता रा। 25 जे आसे पवित्र आत्मा रे जरिए जिऊँदे ए, तो पवित्र आत्मा रे मुताबिक चलिए बी। 26 आसे ना तो कमण्डी बणिए और ना एकी-दूजे खे पड़काईए और ना ई एकी-दूजे ते जलन करिए।

6 ओ साथी विश्वासियो! जे कोई माणू केसी पापो रे पकड़ेया जाओ, तो तुसे जो पवित्र आत्मा री अगुवाईया रे चलोए, नरमाईया साथे एड़ेया खे तर्मी री बाटा रे फेर आऊणे रे मताद करो और आपणी बी चौकसी राखो, ताकि तुसे बी परीक्षा रे नि पड़ो। 2 तुसे एकी-दूजे रा पर चको और ईयां मसीह रा बिधान पूरी करो। 3 कऊँकि जे कोई आपणे आपू खे ए समजोआ कि आऊँ ओरी ते बढी की ए तो से आपणे आपू खे तोखा देओआ। जबकि से कुछ बी नि। 4 पर हर एक जन आपणे ई कामो खे परखी लओ। जे से अच्छा ओगा तो तुसे आपणे कामो पाँदे दूजे रे कामो ते तुलना किन्ते बिना कमण्ड करी सकोए। 5 कऊँकि हर एकी माणूए खे आपणा ई बोजा चकणा पड़ना। 6 जो लोक परमेशरो रे वचनो री शिक्षा पाओआ, सेयो लोक सब खरिया चीजा रे आपणे सिखाणे वालेया खे शामिल करो। 7 तोखा नि खाओ, परमेशर मजाको रे नि उड़ाया जांदा, कऊँकि माणूए जो कुछ बीजणा, सेई बाडणा। 8 कऊँकि जो आपणे शरीरो रे पापी सबाओ री तँई बीजोआ, तेस शरीरो रेई जरिए विनाशो री फसल बाडणी। और जो पवित्र आत्मा खे बीजोआ, तेस पवित्र आत्मा रेई जरिए अनन्त जीवनो री फसल बाडणी। (aiōnios g166) 9 आसे खरे काम करने रे इम्मत नि छाडिए, कऊँकि जे आसे टील्ले नि ऊए, तो ठीक बखतो पाँदे फसल बाडणी। 10 इजी री खातर जेथो तक मौका मिलो आसे सबी साथे पलाई करिए, खास करी की विश्वासो पाईया साथे पलाई करिए। 11 देखो, मैं कितणे बड़े-बड़े अक्षरा रे तुसा खे आपणे आथो साथे लिखी राखेया। 12 जो लोक शरीरो रा दखावा चाओए सेयो ई तुसा रा खतना करवाणे खे जोर पाओए, इजी खे की सेयो मसीह रे क्रूसो रे जरिए सताए नि जाओ। 13 कऊँकि खतना कराणे वाले आपू तो मूसे रा बिधानो पाँदे नि चलदे, पर तुसा रा खतना इजी खे करवाणा चाओए ताकि तुसा रे शरीरो री दशा पाँदे कमण्ड करी सको। 14 पर एड़ा नि ओ कि आऊँ किजी ओरी गल्ला पाँदे कमण्ड कऊँ, बस म्हारे प्रभु यीशु मसीह रे क्रूसो रा, जेतेरी बजअ ते दुनिया मेरी नजरा रे और आऊँ दुनिया री नजरा रे क्रूसो पाँदे चड़ाई ता रा। 15 केसी रा खतना ऊई रा ओ या बिना खतने रा ओ इजी री कोई अहमियत नि। पर अहमियत इजी गल्ला रिये कि आसे पूरे तौरो पाँदे नई सृष्टि बणी जाईए। 16 और जितणे एस नियमो पाँदे चलणे, तिना पाँदे और परमेशरो रे इसाएलो पाँदे, शान्ति

और कृपा ऊँदी रओ। 17 आगे कोई माखे दुः ख नि देओ, कऊँकि आऊँ
प्रभु यीशुए रे दाग, आपणे शरीरो रे लयी की फिरदा रऊँआ। 18 ओ साथी
विश्वासियो! आँऊ बिनती करूँआ कि म्हारे प्रभु यीशु मसीह री कृपा तुसा री
आत्मा साथे रओ। आमीन्।

इफिसियों

1 ये चिट्ठी मां पौलुसो री तरफा ते ए। आँऊ परमेशरो री इच्छा ते यीशु मसीह रा प्रेरित ए। आँऊ ये चिट्ठी परमेशरो रे तिना पवित्र और यीशु मसीह रे विश्वासी लोका खे लिखणे लगी रा जो इफिसुस नगरो रे ए। **2** आँऊ बिनती कर्हूआ कि म्हारे पिता परमेशर और प्रभु यीशु मसीह री तरफा ते तुसा खे कृपा और शान्ति मिलदी रओ। **3** म्हारे प्रभु यीशु मसीह रे पिता परमेशरो रा धन्यवाद ओ कि तिने आसा खे मसीह रे स्वर्गो री जगा रे सब प्रकारा री आत्मिक आशीषा ते आशीषित करी राखेया। **4** परमेशरे दुनिया री उत्पत्तिया ते पईले ई मसीह रे आसे चूणी ले, ताकि आसे तेसरी नजरा रे पवित्र और निर्दोष ओऊँ। **5** कऊँकि परमेशरे आसा ते प्यार कित्तेया, तिने फैसला कित्तेया कि से आसा खे यीशु मसीह रे जरिए गोदी पुत्रो रे रूपो रे अपणाओ। परमेशरे ये आपणी इच्छा और खुशिया साथे कित्तेया। **6** परमेशरो री तेसा महिमामय कृपा खे तेसरी स्तुति ओ। से महिमामय कृपा तिने आसा खे आपणे प्यारे पुत्रो रे जरिए मुफ्तो रे दिती। **7** यीशु मसीह खे कूसो पाँदे आपणा खून बाह्ने रे जरिए परमेशरे आसा खे छुटकारा मतलब पापो खे माफ करिता। परमेशरो री कृपा कितणी महान ए, जो तिने आसा खे बऊत जादा देई राखी। **8** परमेशरे ये कृपा आसा पाँदे आपणी सारी बुद्धि और समजा साथे बऊत जादा किती। **9** परमेशरे एबे मसीह रे बारे रे आपणा पेट आसा पाँदे आपणे खरे मकसदो रे मुताबिक प्रकट कित्तेया जो तिने आपणे आपू रे ठाणी राखेया था। **10** और योजना ये ए कि सई बखतो पाँदे से जो कुछ बी स्वर्गो रे ए और जो कुछ तरतिया पाँदे ए, सब कुछ तेस मसीह रे अधीन कट्टा करना। **11** मसीह साथे एक ऊणे री बजअ ते आसा खे परमेशरो री तरफा ते जायदात मिली। कऊँकि परमेशरे आसे पईले तेई आपणे लोक करी की चुणी राखे और आपणी योजना रे मुताबिक सारे काम करी राखे। **12** तिने एड़ा इजी खे कित्तेया कि आसे यहूदी परमेशरो री स्तुति और महिमा करिए, जो कि आसे मसीह रे विश्वास करने वाले पईले लोक थे। **13** तुसे लोके बी सच्चो रा वचन मतलब आपणे उद्धारो रा सुसमाचार सुणी की प्रभु यीशु मसीह पाँदे विश्वास कित्तेया और तुसा लोका पाँदे बी तेसा पवित्र आत्मा री छाप लगी जेतेरा वादा करी राखेया था। **14** पवित्र आत्मा परमेशरो री तरफा ते से बयाना ए कि तेस आसा खे जायदात देणी जो तिने देणे रा वादा करी राखेया था और ये कि तिने आसे आपणे लोक करी की खरीदी ला रा। तिने एड़ा इजी खे कित्तेया ताकि आसे तेसरी तारीफ और महिमा करी सकिए। **15** मैं प्रभु यीशुए पाँदे तुसा लोका रा विश्वास और सब परमेशरो रे लोका रे प्रति तुसा रे प्यारो रे बारे रे सुणी राखेया। **16** तेबेई आँऊ तुसा खे परमेशरो रा धन्यवाद करना नि छ़ाडदा और आपणी प्रार्थना रे तुसा खे लगातार याद करदा रऊँआ। **17** आँऊ बिनती कर्हूआ कि म्हारे प्रभु यीशु मसीह रा परमेशर जो महिमा रा पित्त ए, तुसा खे बुद्धिया री आत्मा और आपणे ज्ञानो रा प्रयासा देओ कि तुसे परमेशरो खे ठीक तरअ ते जाणी सको। **18** आँऊ ये बी बिनती कर्हूआ कि परमेशर तुसा रे मनो खे खोली देओ जेते कि तुसे ये जाणी लओ कि आसा रे बुलाणे री उम्मीद क्या ए, और परमेशरो रे लोका रे तेसरी जायदाता री महिमा रा धन केड़ा ए। **19** आँऊ चाऊँआ कि तुसे एसा गल्ला खे जाणो कि जो मसीह रे विश्वास करोए परमेशरो गे तिना खे कितणी महान और सामर्थी तागत ए। ये सेई महान तागत ए, **20** जिने मसीह मरे रेया बीचा ते जिऊँदा कित्तेया और स्वर्गो री जगा रे आपणे दाँणे कनारे बठयालेया। **21** तेती मसीह सारी प्रदानता, अक्क, राज और सामर्थ्य पाँदे राज करोआ। से दुनिया रे सबी प्राणिया पाँदे राज करोआ और आऊणे वाली दुनिया रे बी राज करना। (aiōn g165) **22** और सब कुछ तेसरे पैरो निठे करी ता और से सबी चीजा पाँदे शिरोमणी ठराई की मण्डलिया खे देईता। **23** मण्डली मसीह रा शरीर ए, मसीह री परिपूर्णता ए, जो सबी रे सब कुछ पूरा करोआ।

इफिसियों

2 मसीह रे विश्वास करने ते पईले तुसे पाप और परमेशरो री आज्ञा ना मानणे री बजअ ते मरे रेया जेड़े थे। तुसा रे जीवन नि था जो परमेशरो री तरफा ते मिलोआ। **2** तेस बखते तुसे दुनिया री रवाजा रे मुताबिक चलो थे और शैतानो री आज्ञा मानेया करो थे। से हाकिम मतलब शैतान जो सर्गो रे दुष्टात्मा खे चलाओए, एबे बी आज्ञा ना मानणे वाले लोका रे मनो रे काम करोआ। (aiōn g165) **3** इदे आसे बी सब के सब तिना लोका जेड़े पईले आपणे पापी शरीरो री इच्छा रे दिन बिताऊँ थे और शरीर और मनो री इच्छा पूरी कर्हूँ थे। ओरी लोका जेड़े आपणे सबओ री बजअ ते परमेशरो ते सजा पाणे जोगे थे। **4** पर परमेशरे जो दया रा धनी ए, आपणे तेस बड़े प्यारो री बजअ ते, जेतेते तिने आसा साथे प्यार कित्तेया। **5** जेबे आसे पापो री बजअ ते मरे रे थे, तो आसे मसीह साथे जिऊँदे कित्ते। परमेशरो री कृपा तेई तुसा रा उद्धार ऊई रा। **6** तिने यीशु मसीह साथे आसे लोक मरे रेया बीचा ते जिऊँदा कित्ते और स्वर्गिय जगा रे मसीह साथे बठयाले। **7** परमेशरे आसा पाँदे यीशु मसीह रे जो बड़ी दया दखाई तिजी रे जरिए तिने आऊणे वाले जुगो खे आपणी कृपा रा असीम धन दखाया। (aiōn g165) **8** कऊँकि विश्वासी रेई जरिए कृपा तेई तुसा रा उद्धार ऊई रा और ये तुसा री तरफा ते निए, बल्कि परमेशरो रा दान ए। **9** और ना कामो री बजअ ते, एड़ा नि ओ की कोई कमण्ड करो। **10** परमेशरे आसे बणाई राखे। तिने आसे यीशु मसीह रे तिना खरे कामो री खातर बणाए जेतेखे परमेशरे पईले तेई म्हारे करने खे तयार करी राखेया। **11** इजी बजअ ते याद करो कि तुसे जो जन्मो ते दूजी जाति ए और जो लोक शरीरो रे आथो ते कित्ते रे खतने ते खतने वाले ओए, सेयो लोक तुसा खे बिना खतने रे बोली की तुसा रा मजाक ऊड़ाओए। **12** तिना दिना रे तुसे लोक मसीह खे नि जाणो थे। इस्राएलो री प्रजा रे पदो ते लग कित्ते रे थे और वादे री वाचा रे शामिल नि थे। तुसे लोक एते दुनिया रे बिना उम्मीदा ते और बिना ईश्वरो ते जिन्दगी बिताणे लगी रे थे। **13** एक बखत था जेबे तुसे परमेशरो ते दूर थे पर एबे यीशु मसीह रे खूनो रे जरिए तेसरे नेड़े आईगे रे। **14** यीशु मसीह आपू आसा बीचे शान्ति ल्याई। पईले एड़ा था मानो एक दवाले यहूदी और दूजी जाति लग किती री थी। सेयो एकी-दूजे ते कृणा करो थे। पर एबे मसीह से लग करने वाली दवाल टाली ती और दोनो दल एक करी ते। **15** आपणी मौता रे जरिए तिने मूसा रे बिधानो खे तेसरी बिदिया साथे मटयाईता। ताकि से आपू यहूदिया और दुजिया जातिया बीचे शान्ति ल्याई सको और ईयाँ एक नया मानवता रा दल बणाई सको। **16** कूसो पाँदे आपणी मौता रे जरिए मसीह दोनो दल एक करी ते और तिना रा परमेशरो साथे मेल कराईता। ईयाँ यहूदिया और दूजिया जातिया बीचे बैर नाश करी ता। **17** तिने आयी की तुसा खे जो परमेशरो ते दूर थे और तिना खे जो परमेशरो रे नेड़े थे, दूई खे मेल-जोलो रा सुसमाचार सुणाया। **18** कऊँकि तेसरे ई जरिए आसे दोनो एक ई आत्मा ते प्रेरित ऊई कि पिते गे पऊँछी सकोए। **19** तो तुसे दुजिया जातिया रे परदेशी और मुसाफर नि रये, बल्कि पवित्र लोका साथे स्वदेशी और परमेशरो रे कराने रे ऊईगे। **20** आसे लोक कट्टे मिली की तेसरे कअर ए जो प्रेरितों और भविष्यबक्तेया री निऊँआ पाँदे बणाई राखेया और जेतेरे कूणे रा पात्थर आपू यीशु मसीह ईए। **21** आसे मसीह रे कट्टे जुड़ी कि प्रभुए खे पवित्र मन्दर बणादे जाऊँए। **22** जिदे तुसे बी पवित्र आत्मा रे जरिए, परमेशरो री रणे री जगा ऊणे खे, साथे-साथे बणाए जाओए।

3 इजी बजअ ते आऊँ पौलुस तुसा खे प्रार्थना कर्हूँआ। तुसा दूजिया जातिया रे लोका खे सुसमाचार सुणाणे खे आँऊ यीशु मसीह रा कैदी ए। **2** तुसे लोके पक्का ई परमेशरो री कृपा ते दिती री तेसा जिम्मेवारिया रे बारे रे सुणेया, जो माखे तुसा लोका रे पले री खातर दिती। **3** जेड़ा आऊँ पईले ई संक्षेपो रे लिखी चुकी रा कि परमेशरे आपू से पेट मां पाँदे प्रयासे रे जरिए प्रकट करी राखेया। **4** एसा चिट्ठिया खे पढ़ी की तुसे जाणी सकोए कि आऊँ मसीह रा से पेट केथो तक समजूँआ। **5** परमेशरे ये गुप्त पेट पिछली पीढ़िया रे लोका पाँदे प्रकट नि कित्तेया, पर एबे आपणे पवित्र प्रेरितों और

भविष्यवक्त्रेया पाँद पवित्र आत्मा रे जरिए प्रकट करी राखेया। 6 मतलब ये कि यीशु मसीह रे सुसमाचारो रे जरिए दुजिया जातिया रे लोक जायदातर रे साजे और एकी ई शरीरो रे और वांदे रे शामिल ए। 7 परमेशरो री कृपा और सामर्थ्य रे जरिए माखे ये खास अक्क मिलेया कि सुसमाचार सुनाणे रे जरिए आँऊ तेसरी सेवा कर्हूँ। 8 मां पाँद जो सब परमेशरो रे लोका बीच छोटै ते छोटा ए, ये कृपा ऊई, ताकि आँऊ दुजिया जातिया खे मसीह रे कदी नि खत्म ऊणे वाले धनो रा सुसमाचार सुणाऊँ। 9 और सबी मांणुआ खे तेस गुप्त पेतो रे बारे रे बताऊँ जो सब कुछ बनाणे वाले परमेशरे जुगो ते लकोई राखेया था। (aiōn g165) 10 ताकि एबे मण्डलिया रे जरिए परमेशरो रा कईया प्रकारा रा ज्ञान स्वर्गिय जगा रे प्रदाना और अधिकारिया पाँद प्रकट कितेया जाओ। 11 परमेशरे ये आपणे सदा रणे वाले मकसदो रे मुताबिक कितेया जो तिने म्हारे प्रभु यीशु मसीह रे जरिए पुरा कितेया। (aiōn g165) 12 मसीह और तेस पाँद विश्वासो री बजअ ते एबे आसे इम्मत और परोसे साथे परमेशरो रे नेडे आई सकूँए। 13 इजी री खातर आऊँ तुसा लोका ते बिनती कर्हूँआ कि जो क्लेश तुसा री खातर आऊँ सईणे लगी रा, तिना री बजअ ते इम्मत नि छाडो, कर्हूँकि ये सब तुसा री ई पलाईया खे ए। 14 आऊँ इजी बजअ ते तेस परमेशर पिते रे सामणे कुटणे टेकुँआ। 15 जेतैते स्वर्ग और तरतिया रे, हर एक कराने रा नाओं राखेया जाओआ। 16 आँऊ परमेशरो ते बिनती कर्हूँआ कि से आपणी महिमा रे धनो रे मुताबिक तुसा खे ये दान देओ कि तुसे तेसरी आत्मा ते, आपणे पितरले मांणुए रे सामर्थ पाई की तागतबर ऊँद जाओ। 17 और विश्वासो रे जरिए मसीह तुसा रे दिलो रे बसो कि परमेशरो खे और एकी-दूजे खे तुसा रा प्यार मजबूत बणो और तुसा खे रूडने ते बचाओ। 18 ईयां तुसे लोक ओरी सबी परमेशरो रे लोका साथे मसीह रे प्यारो री चौडाई, लम्बाई, ऊर्चाई और गरईसई समजी सकणे। 19 आँऊ बिनती कर्हूँआ कि तुसे मसीह रे तेस प्यारो खे जाणी सको, जो ज्ञानो ते पोरे ए, ताकि तुसे परमेशरो री सारी भरपूरिया तक परिपूर्ण ऊई जाओ। 20 परमेशरो री महिमा ऊँदी रओ। तेसरी ई सामर्थ्य ते जो आसा रे पीतरे काम करोई, से आसा री बिनती और उम्मीदा ते केथी जादा काम करी सकोआ। 21 तेसरी ई महिमा मण्डलिया रे और यीशु मसीह रे पीढिया ते पीढिया तक जुगो-जुगो तक ऊँदी रओ। आमीन। (aiōn g165)

4 तो आऊँ जो प्रभुए रे कैदी ए, तुसा ते बिनती कर्हूँआ कि तेस बुलाणे रे मुताबिक जेतैखे परमेशरे तुसे आपणे लोक करी की बुलाई राखे, तेतरे मुताबिक जिन्दगी जिओ। 2 सदा दीनता और नरमाईया साथे रओ। सब्रो साथे एकी-दूजे खे सईन करी लो और एकी-दूजे साथे प्यार करो। 3 शान्तिया रे बंदनो रे बंदी की तेसा एकता खे जेतैखे पवित्र आत्मा देओआ बणाए राखणे री कोशिश करदे रओ। 4 एक ई शरीर ए, एक ई परमेशरो रा आत्मा और एक ई उम्मीद ए, जेतैखे तुसे लोक बुलाई राखे। 5 एक ई प्रभु ए, एक ई विश्वास और एक ई बपतिस्मा ए; 6 एक ई परमेशर ए, जो सबी लोका रा पिता ए। से सबी पाँद ए, सबी साथे और सबी रे मौजूद ए। 7 पर मसीह रे आसा बीचा ते हर एकी खे तिना रा काम करने खे लग-लग खास काबलियत देई राखी। 8 तेबेई तो पवित्र शास्त्र बोलोआ, “से चूँडिया पाँद चढेया और बन्दिया खे बानी की लयी गा और मांणुआ खे दान दिते।” 9 त्यान देओ जेबे पवित्र शास्त्र बोलोआ, “से चूँडिया पाँद चढेया” इजी रा मतलब साफ ए कि मसीह तरतिया री सबी ते थालली जगा रे बी उतरेया था। 10 से जो थाले उतरेया, ये सेईए जो सर्गो ते बी ऊच्यी जगा रे बडे आदरो साथे चढी गा, ताकि सारिया सृष्टिया खे परिपूर्ण करो। 11 मसीहे आपू कुछ प्रेरित नियुक्त करी की और भविष्यवक्त्रा नियुक्त करी की और कुछ तो सुसमाचार सुनाणे वाले नियुक्त करी की और कुछ तो रखवाले और उपदेशक नियुक्त करी की देई ते। 12 तिने लोका खे ये काबलियत इजी खे देई राखी कि सेयो परमेशरो रे लोका खे सेवा खे त्यार करी सको और सिद्ध करी सको और मसीह रस शरीर मतलब मण्डलिया री तरक्की करी सको। 13 ये तदुओ तक ऊँदा रणा जदुओ तक आसे सारे जणे आपणे विश्वास और

परमेशरो रे पुत्रो री पछयाणी रे एकजुट नि ऊई जाईए। तेबे आसे मसीह जेडे एक सिद्ध मांणु बणी जाणे और आसे मसीह रे पूरे डील-डोलो तक बडी जाणे। 14 तेबे आसे आगो खे बालक नि रणे, जो मांणुए री रूपा-बिद्या और चलाकिया ते, तिना रे बईमो री तरकीब और उपदेशो रे हर एक इकोके ते उछाले और ओरे-पोरे कुमाए जाओए। 15 आसे प्यारो साथे सच बोलिये और मसीह रे जो मण्डलिया रा सिर ए, तिदे हर तरअ ते तरक्की करदे जाईए। 16 जेतै कि सारा शरीर हर एक जोडो री मतादा ते, एकी साथे मिली की और एकी साथे गाठी की, तेस असरो रे मुताबिक जो हर एक अंगो रे ठीक-ठीक काम करने रे जरिए तिदे ओआ, आपू खे बडाओई, ताकि से प्यारो रे तरक्की करदा जाओ। 17 इजी री खातर आऊँ तेस अक्को साथे बोलूँआ जो प्रभुए माखे देई राखेया कि जियाँ अविश्वासी लोक आपणे मनो री अनर्थो री रीतिया पाँद चलोए, तुसे आजो ते फेर तेडे नि चलो। 18 कर्हूँकि तिना रे दमाको रे न्हारा ऊईगा रा और तेस अज्ञानो री बजअ ते, जो तिना रे ए और तिना रे काठे मनो री बजअ ते, सेयो परमेशरो रे जीवन्तो ते लग करी राखे। 19 और सेयो सून्न ऊई की लीचइपणो रे लगी गे दे, ताकि सारे गन्दे काम लालसा ते करो। 20 पर तुसे मसीह ते एडी शिक्षा नि पाई राखी। 21 बल्कि तुसे सच्ची तेसरी सुणी और जेडा प्रभु यीशुए रे सच ए, तिदे ई सिखाए बी राखे। 22 कि तुसे आपणे पुराणे चाल-चलणो रा पुराणा जीवन, जो भरमाणे वाली इच्छा रे मुताबिक प्रष्ट ऊँदा जाओआ, उतारी देओ 23 और आपणे मनो रे आत्मिक सबाओ रे नये बणदे जाओ। 24 और नया सबाओ पईनी लो, जो परमेशरो रे मुताबिक सच्चो री धार्मिकता और पवित्रता रे बणाई राखेया। 25 इजी बजअ ते चूठ बोलणा छाडी की हर एक, आपणे साथी विश्वासिया ते सच बोलो, कर्हूँकि आसे एक ई शरीरो रे अंग ए। 26 जे तुसा खे रोष आई जाओ तो एसा गल्ला रा त्यान राखो कि तुसे रोषो रे पाप नि करो। सूरज डूबणे तक तुसा रा रोष नि रओ 27 और ना ई शेतानो खे मौका देओ। 28 चोरी करने वाला दुबारा चोरी नि करो, बल्कि खरे काम करने रे आपणे आथो साथे मईगणत करो, ताकि जेसखे जरूरत ओ, तेसखे देणे खे तेसगे कुछ ओ। 29 कोई गन्दी गल्ल तुसा रे मुँओ ते नि निकलो, पर जरूरत रे मुताबिक सेई निकलो, जो ओरी रिया तरक्किया खे पला ए, ताकि तिजी ते सुणने वालेया पाँद कृपा ओ। 30 परमेशरो रे पवित्र आत्मा खे आपणे बुरे चाल-चलणो ते दुः ख नि देओ, जेतरे जरिए तुसा खे छुटकारे रे दिनो खे छाप देई राखी। 31 सब प्रकारा री कड़वाहट, प्रकोप, रोष, क्लेश, निन्दा और सब बैरभाव तुसा ते दूर ऊई जाओ। 32 एसा की दूजे-पाँद कृपा करने वाले और दयालु बणो। जियाँ परमेशरे मसीह रे तुसा रे अपराध माफ कित्ते, तियाँ ई तुसे बी एकी-दूजे रे अपराध माफ करो।

5 तुसे लोक परमेशरो री प्यारी ल्वादा ए इजी री खातर तुसा रा चाल-चलण तिना रे सबओ जेडा ओ। 2 और प्यारो रे चलो, जेडा मसीहे बी तुसा साथे प्यार कितेया और आसा री खातर आपणे आपू खे सुखो री खुशबूआ खे परमेशरो रे आगे पेंट करी की बलिदान करी ता। 3 जेडा परमेशरो रे लोका खे सई ए, तुसा लोका बीचे व्याभिचार और कोई बी अशुद्ध काम या लोबो री चर्चा तक नि ओ। 4 और ना बेशर्मी, मूर्खता री गल्ल ओ, ना ठठे री, कर्हूँकि यो गल्ला शोभा नि देंदिया, बल्कि तुसे लोक परमेशरो खे धन्यवाद ई देया करो। 5 कर्हूँकि तुसे ये अच्छी तरअ ते जाणोए कि केसी व्याभिचारी या अशुद्ध जणा या लोबी मांणुए री, जो मूर्तिया खे पूजणे वालेया रे बराबर ए, मसीह और परमेशरो रे राज्य रे कोई जायदात नि ए। 6 कोई बी तुसा खे बेकार गल्ला रे सलाह देई कि तोखा नि देओ कर्हूँकि इना ई कामो री बजअ ते परमेशरो रा रोष, आज्ञा ना मानणे वालेया पाँद पड़कोआ। 7 इजी री खातर तुसे तिना लोका रे गलत कामा रे शामिल नि ओ। 8 कर्हूँकि तुसे तो पईले न्हरे रे थे, पर एबे प्रभुए रे जोति ए, तो जोतिया री ल्वादा जेडे चलो। 9 जेती ज्योति ए तेती सब प्रकारा री पलाई, धार्मिकता और सच ओआ। 10 और ये परखो कि प्रभुए खे क्या अच्छा लगेआ? 11 और न्हरे रे निष्फल कामो रे शामिल नि ओ, बल्कि तिना खे लवामे देओ। 12 कर्हूँकि

तिना अविश्वासी लोका रे गुप्त कामो री चर्चा बी शरमा री गल्ल ए। 13 पर जितणेया कामा पंदि लवामे दिन्ते जाओए, सेयो सब जोतिया ते प्रकट ओए, कऊँकि जो सब कुछ प्रकट करोआ, से जोति ए। 14 तेबेई तो से बोलीआ, “ओ सऊणे वाले जाग और मुडदेया बीचा ते जिऊँदा ऊई जा, मसीह री जोति तां पॉँदे चमकणी।” 15 इजी री खातर त्यानो ते देखो कि तुसे केडी चाल चलोए; बिना बुद्धि वालेया जेडे नि पर अक्लमंद लोका जेडे चलो। 16 मौके खे किमती समजो, कऊँकि दिन बुरे ए। 17 इजी बजअ ते निर्बुद्धि नि ओ, पर त्यानो साथे समजो कि प्रभुए री क्या इच्छा ए। 18 शराब पी की मतवाले नि बणो, कऊँकि इजी ते लुचपण ओआ, बल्कि पवित्र आत्मा ते परदे जाओ। 19 आपू बीचे पजन, स्तुतिगान और आत्मिक गीत गाया करो और आपणे-आपणे मनो रे प्रभुए सामणे गांदे और कीर्तण करदे रओ। 20 सदा सब गल्ला खे म्हारे प्रभु यीशु मसीह रे नाओं ते परमेशर पिते रा धन्यवाद करदे रओ। 21 मसीह रे डरो ते एकी-दूजे रे अधीन रओ। 22 ओ लाड़ियो! आपणे-आपणे लाड़े रे एडे अधीन रओ, जेडे प्रभुए रे। 23 कऊँकि लाड़ा, लाड़िया रा सिर ए, जेड़ा कि मसीह मण्डलिया रा सिर ए और आपू ई मण्डलिया रा उद्धारकर्ता ए जो तिना रा शरीर ए। 24 जेडी मण्डलिया मसीह रे अधीन ए। तियाँ ई लाड़िया बी हर गल्ला रे आपणे-आपणे लाड़े रे अधीन रओ। 25 ओ लाड़ेयो! आपणी-आपणी लाड़िया साथे प्यार राखो, जेड़ा मसीहे बी मण्डलिया साथे प्यार करी की आपणे आपू खे मण्डलिया खे देईता। 26 तिने एड़ा इजी खे कितेया कि से मण्डलिया खे वचनो रे जरिए पापो ते शुद्ध करी की पवित्र बणाओ, ठीक तियाँ ई जियाँ लोक केसी चीजा खे पाणिए साथे तोई की साफ करोए। 27 और तेसा खे एक एडी तेजस्वी मण्डली बणाई की आपू साथे खडी करो, जिदे ना कलंक, ना झुरी, ना ई कोई ओर एडी चीज ओ, बल्कि पवित्र और निर्दोष ओ। 28 ईयाँ ई लाड़ा आपणी-आपणी लाड़िया साथे आपणे शरीरो जेड़ा प्यार राखो, जो आपणी लाड़िया खे प्यार करोआ, से आपू साथे प्यार करोआ। 29 कऊँकि कोई बी आपणे शरीरो ते बैर नि राखदा, बल्कि तिजी रा पालण-पोषण करोआ, जेड़ा मसीह बी मण्डलिया साथे करोआ। 30 कऊँकि आसे मसीह रे शरीरो रे अंग ए। 31 जेड़ा कि पवित्र शास्त्र बोलीआ, “इजी बजअ ते मर्द आपणे माए-बाओ छाडी की आपणी लाड़िया साथे मिले रा रणा और सेयो दोनो एक तन ऊणे।” 32 ये पेट तो बड़ा ए, पर आऊँ मसीह और मण्डलिया रे बारे रे बोलणे लगी रा। 33 पर ये तुसा खे बी लागू ओआ कि तुसा बीचा ते हर एक आपणी लाड़िया साथे, आपू जेड़ा प्यार राखो और लाडी बी आपणे लाड़े रा आदर करो।

6 ओ बालको, आपणे माया-बाओ रे आज्ञाकारी बणो, एड़ा करना तुसा खे पला ए कऊँकि तुसे प्रभुए रे ए। 2 “आपणे माया-बाओ रा आदर करो।” ये एडी पईली आज्ञा ए जेते साथे वादा बीए। 3 से वादा ये ए कि, “कि तेरा पला ओ और तू तरतिया पाँदे बऊत दिनो तक जिऊँदा रओ।” 4 ओ बाल-बच्चे वालेयो! आपणे बच्चेया खे रिस नि देओ, पर प्रभुए री शिक्षा और चेतावणी देंदे ऊए, तिना खे पालो-पोषो। 5 ओ दासो, जो लोक दुनिया रे मुताबिक तुसा रे मालक ए तिना री आपणे मनो री सच्चाईया ते आदर करदे और डरदे ऊए आज्ञा मानो, जेडी मसीह री मानोए। 6 मांगूआ खे खुश करने वालेया जेडे दखाणे खे सेवा नि करो, पर मसीह रे दासो जेडे, मनो ते परमेशरो री इच्छा पाँदे चलो 7 खुशिया साथे एक सेवको रे रूपो रे एडे काम करो जेड़ा मानो तुसे लोका री नि प्रभुए री सेवा करने लगी रे। 8 कऊँकि तुसे जाणोए कि जेस केसी जेड़ा खरा काम करना, चाए दास ओ, चाए आज्ञाद ओ, प्रभुए ते तेड़ा ई इनाम पाणा। 9 ओ मालको! तुसे बी तमकिया देणा छाडी की तिना साथे तेड़ा ई बर्ताव करो, कऊँकि तुसे जाणोए कि तिना रा और तुसा दूँई रा मालक स्वर्गो रे ए और से केसी रा पक्षपात नि करदा। 10 मेरा आखरी वचन तुसा लोका खे ये ए कि प्रभुए रे और तेसरी शक्तिया रे असरो रे तागतबर बणो। 11 परमेशरो रे सारे अधियार बानी लो, ताकि तुसे शैतानो री योजना रे सामणे खडे रई सको। 12 कऊँकि म्हारा ये मलयुद्ध खून

और मासो ते बणे रे मांगूआ ते नि ए, बल्कि प्रदाना ते और अधिकारिया ते और एसा दुनिया रे न्हरे रे हाकिमा ते और तेस दुष्टो री आत्मिक सेना साथे ए, जो सर्गो रे ए। (aiōn g165) 13 इजी री खातर परमेशरो रे सारे अधियार बानी लो, ताकि तुसे बुरे दिनो रे सामणा करी सको और सब कुछ पूरा करी की खडे रई सको। 14 तो सच्चाईया साथे आपणा लक बानी की और तमों री झिलम पईनी की 15 और पैरो रे मेल-जोलो रे सुसमाचारो रे जोडे पईनी की 16 और तिना सबी साथे विश्वासो री ढाल लयी की खडे रओ, जेते साथे तुसे, तेस दुष्टो रे सारे बले रे तीर बजयाई सको। 17 और उद्धारो रा टोप और आत्मा री तलवार, जो परमेशरो रा वचन ए, लयी लो। 18 हर बखत और हर प्रकारा ते पवित्र आत्मा री अगुवाईया रे प्रार्थना और बिनती करदे रओ और इजी खेई जागदे रओ कि सारे परमेशरो रे लोका खे लगातार बिनती करेया करो। 19 और माखे बी प्रार्थना करो कि माखे बोलणे रे बखते एड़ा प्रबल वचन दितेया जाओ, ताकि आऊँ इम्मता साथे सुसमाचारो रा पेट बताई सकूँ, 20 इजी री खातर आऊँ जंजीरा साथे जकड़े रे राजदूतो जेडी सेवा करने लगी रा। प्रार्थना करो कि माखे जियाँ बोलणा चाईयो, तियाँ ई आऊँ बिना डरे सुसमाचार सुणाई सकूँ। 21 तुखिकुस जो मेरा प्यारा साथी विश्वासी और प्रभुए रे विश्वासो जोगा सेवक ए, तेस तुसा खे सब गल्ला बताणिया, ताकि तुसे बी मेरी दशा जाणी लो कि आऊँ केड़ा रऊँआ। 22 से मैं तुसा गे इजी खेई पेजी राखेया, ताकि तुसे म्हारी दशा जाणो और से तुसा रे मनो खे आँसला देओ। 23 आऊँ परमेशर पिता और प्रभु यीशु मसीह ते प्रार्थना करूँआ कि से तुसा खे शान्ति देओ। तुसा लोका खे एकी-दूजे साथे प्यारो साथे रणे रे और मसीह रे विश्वासो रे बणे रणे रे मताद करो। 24 परमेशरो री कृपा तिना सबी लोका पाँदे बणी री रओ जो म्हारे प्रभु यीशु मसीह ते कदी नि खत्म ऊणे वाला प्यार करोए।

फिलिप्पियों

1 ये चिट्ठी यीशु मसीह रे दास पौलुस और तीमुथियुसो री तरफा ते ए। आऊँ ये चिट्ठी फिलिप्पी नगरो रे रणे वाले परमेशरो रे सारे पवित्र लोक, अध्यक्ष और सेवका खे लिखणे लगी रा जो यीशु मसीह रे ए। 2 म्हारे पिता परमेशर और प्रभु यीशु मसीह री तरफा ते तुसा खे कृपा और शान्ति मिलदी रओ। 3 आऊँ जेबे-जेबे तुसा खे याद कर्हूँआ, तेबे-तेबे आपणे परमेशरो रा धन्यवाद कर्हूँआ। 4 और जेबे कदी तुसा सबी खे प्रार्थना कर्हूँआ, तो सदा खुशिया साथे बिनती कर्हूँआ। 5 कऊँकि तुसे पईले दिनो ते लयी कि आजो तक प्रभु यीशुए रे सुसमाचारो खे फैलाणे खे मेरे सहभागी रई रे। 6 और माखे एते गल्ला रा विश्वास ए कि परमेशरे जिने तुसा रे खरा काम शुरू करी राखेया, तेस ई से काम जेबे यीशु मसीह फेर वापस आऊणा तेस दिनो तक पूरा करना। 7 ये खरा ए कि आऊँ तुसा सबी खे एड़ा ई बिचार कर्हूँ, कऊँकि आऊँ तुसा ते बऊत प्यार कर्हूँआ और जेबे आऊँ जेला रे ए और सुसमाचारो री रक्षा खे और इजी खे सच साबित करने रे तुसे सब मां साथे कृपा रे शामिल ए। 8 इदे परमेशर मेरा गवा ए कि जियाँ यीशु मसीह तुसा ते प्यार करोआ सच्ची आऊँ बी तियाँ ई तिना जेड़ा तुसा सबी ते प्यार कर्हूँआ। 9 और आऊँ ये प्रार्थना कर्हूँआ कि तुसा रा एकी दूजे ते प्यार, ज्ञान और पूरिया समजा साथे ओर बी बड़दा जाओ। 10 तेबेई तुसे इना गल्ला खे परखणे रे जोगे ऊई जाओ कि कुण जी गल्ल करने खे खरी ए और मसीह रे फेर वापस आऊणे रे दिनो तक पवित्र और निष्कलंक बणे रे रओ। 11 और यीशु मसीह रे जरिए पैदा ऊणे वाले धार्मिकता रे कामा ते आपू खे परी लओ, जेते कि परमेशरो री महिमा और स्तुति ऊँदी रओ। 12 ओ प्यारे साथी विश्वासियो! आऊँ चाऊँआ कि तुसे ये जाणी लो कि मां पाँदे जो बीती रा, तिजी री बजअ ते बऊत सारे लोके सुसमाचारो पाँदे विश्वास कितेया। 13 एथो तक कि कैसर राजे रे राज्य री सारी पलटण और बाकि बचे रे सारे लोका सामणे ये आईगा रा कि आऊँ मसीह री खातर जेला रे कैद ए। 14 और प्रभुए रे जो पाई ए, तिना बीचा ते बऊत जणे मेरे जेला रे कैद ऊणे री बजअ ते, मजबूत विश्वासो साथे, परमेशरो रा वचन नशंग सुनाणे री ओर बी इम्मत करोए। 15 ये सच ये कि कुछ लोक जलन और चगड़े री बजअ ते मसीह रे सुसमाचारो रा प्रचार करोए और कुछ खरे इरादे ते। 16 ये एड़े लोक जो मसीह रे सुसमाचारो रा प्रचार अच्छे इरादे और प्यारो ते करोए। सेयो जाणोए कि आऊँ यीशु मसीह रे सुसमाचारो रा जबाब देणे खे जेला रे कैद ए 17 पर ये चगड़ा करने वाले लोक जो सच्चाईया ते नि पर आपणे मतलबो खे मसीह रा सुसमाचार सुणाओए, ये सोचोए की कि जेबे आऊँ जेला रे कैद ए, माखे ओर जादा क्लेश पैदा करो। 18 तो क्या ऊआ? बस ये कि हर कियाँ चाए बुरिया बजअ ते, चाए सच्चाईया ते मसीह रा सुसमाचार सुणाया जाओआ। आऊँ इजी ते खुश ए और खुश ऊँदा रणा बी। 19 कऊँकि आऊँ जाणूँआ कि तुसा री प्रार्थना रे जरिए और यीशु मसीह री तरफा ते पेजी री पवित्र आत्मा री मतादा रे जरिए, इजी रा ईनाम, माखे अच्छा ई ऊणा। 20 आऊँ तो दिलो ते येई इच्छा और उम्मीद राखूँआ कि आऊँ किजी बी गल्ला रे शर्मिदा नि ओऊँ, पर जेडी मेरी बड़ी इम्मत री बजअ ते, मसीह री तारीफ मेरे शरीरो रे जरिए सदा ऊँदी रओई, तेड़ा ई एबे बी ओ, चाए आऊँ जिऊँदा रऊँ या मरी जाऊँ। 21 कऊँकि जे आऊँ जिऊँ तो सिर्फ मसीह री खातर, और जेबे आऊँ मरूँ तो से माखे बऊत ई अच्छा ऊणा कऊँकि आऊँ मरने ते बाद बी मसीह साथे रणा। 22 पर जे शरीरो रे जिऊँदा रणा ई मेरे कामो खे फायदेमंद ए, तो आऊँ नि जाणदा कि केसखे चुणुँ? 23 कऊँकि इना दुँई बीचा ते केसी एकी खे चुणना माखे बऊत ई कठण ए। जिऊँ तो चाओआ कि मरी की मसीह गे जाई की रऊँ, कऊँकि ये माखे बऊत ई अच्छा ए। 24 पर शरीरो रे रणा ओर बी जरूरी ए कऊँकि तुसा खे मेरी मतादा री जरूरत ए। 25 इजी खे कि माखे इजी रा विश्वास (भरोसा) ए कि आऊँ जिऊँदा रणा, बल्कि तुसा सबी साथे रणा, जेते की आऊँ तुसा खे विश्वासो रे मजबूत करने और तिदे खुश रणे रे

तुसा री मताद कर्हूँआ। 26 जो कमण्ड तुसे मेरे बारे रे करोए, से मेरा तुसा गे जेला ते फेर वापस आऊणे ते, यीशु मसीह रे ओर जादा बड़ी जाओ। 27 बस इतणा करो कि तुसा रा चाल-चलण मसीह रे सुसमाचारो जोगा ओ, तेबे चाए आऊँ आईकि तुसा खे देखूँ, चाए ना बी आऊँ, बस तुसा रे बारे रे ये सुणूँ कि तुसे एक ई इरादे रे मजबूत रओ और एक मन ऊई कि सुसमाचारो रे विश्वासो खे मईणत करदे रओए। 28 केसी बी गल्ला रे बिरोदिया ते डरदे नि, तुसा री इम्मत तिना खे नाशो रा साफ चिहूँ ए, पर तुसा खे उद्धारो रा और ये परमेशरो री तरफा ते ए। 29 कऊँकि मसीह री बजअ ते तुसा पाँदे ये कृपा ऊई कि ना बस तेस पाँदे ई विश्वास करो, पर तेसरिया तई दुःख बी सईन करो, 30 और तुसा खे तेड़ा ई दुःख सईन करना ए, जेड़ा तुसे आऊँ सईन करदे देखी राखेया, जेबे आऊँ तुसा साथे फिलिप्पी नगरो रे था और एबे बी सुणोए कि दुःख सईन कर्हूँआ।

2 तेबेई जे तुसा लोका बीचे मसीह रे कुछ बी औंसला, प्यारो रे जरिए पैदा इम्मत, आत्मा री सहभागिता और कुछ करूणा और दया ए, 2 तो मेरी ये खुशी पूरी करो कि एकी दूजे ते सहमत रओ और एक जेड़ा प्यार राखो, एकी दूजे ते मेलजोल राखो और एक ई इच्छा राखो। 3 आपणे फाईदे या कमण्डो ते कुछ नि करो, पर दीनता ते एकी-दूजे रा आपू ते जादा त्यान राखो। 4 हर एक आपणे ई पलाईया री नि, बल्कि दूजे री पलाईया री बी चिन्ता करेया करो। 5 जेड़ा यीशु मसीह रा सबाओ था, तियाँ ई तुसा रा सबाओ बी एकी-दूजे साथे ऊणा चाइयो। 6 हालाँकि मसीह सच्ची परमेशर था तेबे बी तिने लोक एसा गल्ला खे मजबूर नि किते कि सेयो तेस साथे परमेशरो जेड़ा बर्तीव करो, 7 बल्कि आपणे आपू खे एड़ा शून्य करी ता और दासो जेड़ा बणीगा और मांणूए जेड़ा ऊईगा। 8 और मांणूए रे रूपो रे आयी की आपू खे दीन कितेया और से आपणी मौता तक आज्ञाकारी रया, एथो तक कि तिने क्रूसो पाँदे दर्दनाक मौत बी सईन करी ली। 9 इजी बजअ ते परमेशरे तेसखे सबी ते ऊचवी पदवी दिती और तेसखे से नाओँ दितेया, जो सबी नाओँ ते बड़ा ए। 10 ताकि जो स्वर्गो रे ए और तरतिया रे ए और तरतिया ते थाले ए, सेयो सारे यीशुए रे नाओँ खे तेसखे आदर देणे खे जानूँआ रे पाअरे बैठो। 11 और पिता परमेशरो री महिमा खे हर माणूँ आपणे मुंए ये मानी लओ कि यीशु मसीह ई प्रभु ए। 12 तो ओ प्यारे साथी विश्वासियो! जियाँ तुसे सदा ते आज्ञा मानदे आयी रे, तियाँ ई एबे बी, ना बस मां साथे रंदे ऊए, पर खास करी की एबे मेरे दूर रंदे ऊए बी डरदे और शरथरांदे ऊए लगातार अच्छे काम करो जो तुसा रे उद्धारो ते आओए। 13 कऊँकि ये परमेशर ईए, जो आपणी पवित्र आत्मा रे जरिए तुसा रे मनो रे तेसरी खरी इच्छा और खरे काम करने री इम्मत देओआ। 14 सारे काम बिना कुड़कुड़ाए और बिना बईसा ते करेया करो। 15 ताकि तुसे निर्दोष और पोले ऊई की टेडे और टीठ लोका बीचे परमेशरो री निष्कलंक लवाद बणे रे रओ, जिना बीचे तुसे जीवनी रा वचन लयी की दुनिया रे सर्गो रे चमकीले तारेया जेड़े दिशोए। 16 ताकि मसीह रे वापस आऊणे रे दिने माखे कमण्ड करने री बजअ ओ कि ना मेरी दौड़-तूप और ना ई मेरी कड़ी मईणत करना बेकार ऊआ। 17 तुसा रा मसीह रे विश्वास और तुसा री सेवा परमेशरो खे चढ़ाई री बलिया जेड़े ए। जे सेयो माखे मारी बी देओ तेबे बी आऊँ खुश ए और तुसा सबी साथे खुशी मनाऊँआ। 18 तियाँ ई तुसे बी खुश ओ और मां साथे खुशी मनाओ। 19 माखे प्रभु यीशुए रे उम्मीद ए कि मां तीमुथियुस तुसा गे चट ई पेजणा ताकि तुसा रा आल सुणी की मेरा औंसला बड़ो। 20 कऊँकि मांगे एड़े सबाओ रा कोई निए जो साफ मनो ते तुसा री चिन्ता करो। 21 कऊँकि सब आपणे स्वार्थ निकालने री खोजा रे रओए, ना कि यीशु मसीह री। 22 पर तुसे तो तीमुथियुसो री योग्यता खे जाणोए कि जेड़ा पाऊ पिते साथे करोआ, तेड़ा ई तिने एस सुसमाचारो खे फैलाणे दे, मां साथे कड़ी मईणत कित्ती। 23 तो माखे उम्मीद ए कि जियाँ ई माखे पता लगणा कि मेरी क्या दशा ऊणी, तियाँ ई मां से फटाफट पेजी देणा। 24 और माखे प्रभुए पाँदे विश्वास ए कि मां आपू बी चट आऊणा। 25 पर मैं इफ्रुदीतुसो खे तुसा

गे वापस पेजणा जरूरी समजेल्या। ये मेरा पाई और मेरा सहकर्मी और मां साथे संगी सिपाई और तुसा रा संदेश पऊँछाणे वाला और जरूरी गल्ला रे मेरी सेवा करने वाला ए। 26 कऊँकि तेसरा मन तुसा सबी रे लगी रा था, और से बेचैन रओ था, कऊँकि तुसे तेसरी बमारिया रा आल सुणेया था। 27 पक्का से तो बमार ऊईगा था, एथो तक कि मरने वाला था। पर परमेशरे तेस पाँदे दया किती और बस तेस ई पाँदे नि, पर मां पाँदे बी किती ताकि माखे दुः खो पाँदे दुः ख नि ओ। 28 इजी री खातर मैं तेसखे पेजणे री ओर बी कोशिश किती ताकि तुसे तेस साथे फेर प्रभुए रे मिली कि खुश ऊई जाओ और मेरी चिन्ता बी कम ऊई जाओ। 29 इजी री खातर तुसे प्रभुए रे, तेस साथे बऊत खुशिया ते मिलेओ और एड़ेया री आओ-बैठ करेया करनी। 30 कऊँकि सेई मसीह रे कामो खे आपणे प्राणो खे मुसीबता रे पाई की मरने जोगा ऊईगा था, ताकि जो कमी तुसा री तरफा ते मेरी सेवा रे ऊई, तिजी खे पूरी करो।

3 इजी री खातर ओ प्यारे साथी विश्वासियो, प्रभुए रे खुश रओ! सेयो ई गल्ला बार-बार लिखणे रे माखे कोई कष्ट नि ऊँदा पर ये गल्ला तुसा खे चूठिया शिक्षा ते बचाओईया। 2 तिना लोका ते चौकस रओ जो तुसा खे जंगली कुत्तेया जेडे खतरनाक ए, बुरा काम करने वाले ए और ये बोलोए कि उद्धार पाणे खे खतना जरूरी ए। 3 कऊँकि परमेशरो रे सच्चे लोक आसे ईए। जो परमेशरो री पवित्र आत्मा री अगुवाईया ते भक्ति करीए और मसीह यीशुए रे कमण्ड करीए और शरीरो रे कामा पाँदे परोसा नि राखदे। 4 जे केसी ओरी खे शरीरो रे कामा पाँदे परोसा राखी की त्वालिया देणे रा बिचार ओ, तो जे आँऊ चाऊँ तो शरीरो रे कामा पाँदे बी परोसा राखी की आँऊ बी तिना ते जादा त्वालिया देई सकूँआ। 5 जिंयाँ परमेशरे आज्ञा दिती तियाँ ई आठुए दिने मेरा खतना ऊआ, आऊँ इस्राएलो रे वंशो रा और बिन्त्यामीनो रे गोत्रो राए; आँऊ पक्का इब्रानी ए और मेरे बुजुर्ग बी पक्के इब्रानी थे। मूसे रे बिधानो खे मानणे रे बारे रे जे बोलो तो आँऊ फरीसी ए। 6 इम्मता रे बारे रे जे बोलो तो, मण्डलिया खे सताणे वाला और यहूदी बिधानो खे मानणे रे बारे रे जे कोई बोलो तो, आँऊ तर्मी माणूँ था। कऊँकि मैं तेसा बिधानो खे मानणे रा पालन कितेया। 7 पर जो-जो गल्ला मैं सोचिया कि सेयो मेरे लाबो री थिया, एबे सेई मैं मसीह खे ओर बी जादा जाणने खे बेकार समजी लईया। 8 इजी ते बी जादा बढ़ी की आँऊ आपणे प्रभु यीशु मसीह खे जाणने री जरूरता रे सामणे सारी गल्ला खे बेकार समजूँआ, जेतेरी बजअ ते मैं सारी चीजा रा नुकशाण उठाया और तिना खे कूडा समजूँआ; जेते कि आँऊ मसीह खे जाणी सकूँ। 9 ताकि आँऊ तेस साथे एकता रे जी सकूँ, ना कि आपणी तेसा धार्मिकता साथे, जो मूसे रा बिधानो ते ए, बल्कि तेसा धार्मिकता साथे, जो मसीह पाँदे विश्वास करने री बजअ ते ए और परमेशरो री तरफा ते विश्वास करने ते माखे मिलोई। 10 आऊँ ये चाऊँआ कि मसीह खे जाणी लऊँ। तेसरे फेर जिऊँदे ऊणे री सामर्था खे महसूस कऊँ, और तिना साथे दुः खो रे सहभागी ऊई की मौता रे तिना जेडा बणी जाऊँ। 11 ताकि आऊँ किंयाँ बी मेरे ऊए रे बीचा ते फेर जिऊँदे ऊणे रे पदो तक पऊँछी सकूँ। 12 ये मतलब नि कि आऊँ तेसा बी चीजा खे पईले तेई पायी चुकी रा या सिद्ध ऊई चुकी रा। पर आँऊ तेसा चीजा खे पाणे री खातर दौडी की आगे बढ़दा चली जाणे लगी रा कि आँऊ सिद्ध ऊई जाऊँ। जेतेखे यीशु मसीह आँऊ चुणेया था। 13 ओ साथी विश्वासियो! मेरा मानणा ये निए कि आँऊ तिजी खे पायी चुकी रा। पर बस ये एक काम कऊँआ कि जो गल्ला बीती चुकी रिया, तिना खे पूरी की आगे री तरफा खे बड़दा जाऊँआ। 14 आँऊ नशाणे री तरफा खे दौड़दा जाऊँआ, ताकि आँऊ स्वर्गो रे बुलाए जाणे रा ईनाम पाई सकूँ। जेतेरी खातर परमेशरे आऊँ यीशु मसीह रे जरिए स्वर्गो दे बुलाई राखेया। 15 तो आसा बीचा ते जितणे विश्वासो रे मजबूत ए, येई सोच राखो और जे केसी गल्ला रे तुसा री ओर ई सोच ओ, तो, परमेशरे तुसा खे से बी बताई देणा। 16 तेबेई आसा खे तेसा सच्चाईया रे मुताबिक चलणा चाईयो जो परमेशरे आसा खे पईले तेई देई राखी। 17 ओ साथी विश्वासियो!

तुसे सब मिली की मेरी जी चाल चलो और तिना लोका खे बी जो मेरी जेडी चाल चलोए पछयाणो और तिना जेडी चाल चलो। 18 कऊँकि बऊत बुरी चाल चलोए, जेतेरे बारे आऊँ तुसा खे बार-बार बताई चुकी रा और एबे बी रोयी-रोयी की बोलूँआ कि सेयो आपणे चाल-चलणो ते मसीह रे क्रूसो रे बैरी ए। 19 तिना रा अंत नाश ए। तिना रा ईश्वर तिना री शारीरिक जरूरत ए, सेयो आपणी शर्मा री गल्ला पाँदे कमण्ड करीए। तिना रा मन तरतिया री चीजा पाँदे लगे रा रओआ। 20 पर म्हारा आपणा देश स्वर्गो रे ए और आसे एक उद्धारकर्ता प्रभु यीशु मसीह रे तेथा ते वापस आऊणे री बात देखणे लगी रे। 21 से आपणी शक्तिया रे तेस असरो रे मुताबिक जेतेरे जरिए से सारिया चीजा खे आपणे वशो रे करी सकीआ। से म्हारे दीन-हीन शरीरो रा रूप बदली की, आपणी महिमा रे शरीरो रे मुताबिक बणाई देणा।

4 ओ प्यारे साथी विश्वासियो! आँऊ तुसा सबी ते प्यार कऊँआ और तुसा लोका ते मिलणे री बड़ी इच्छा राखूँआ। प्रभुए रे विश्वासो जोगे और स्थिर बणे रे रओ जेडा मैं तुसा खे बताई राखेया। तुसे सब मेरी खुशी और ईनाम ए। 2 आऊँ यूओदिया ते बिनती कऊँआ और सुन्तुखे ते बी बिनती कऊँआ कि सेयो प्रभुए रे एक मन ऊई कि रओ। 3 ओ सच्चे सहकर्मी! आऊँ तांते बिनती कऊँआ कि तूँ इना जवाणसा री मेल-मिलाप करने रे मताद कर, कऊँकि इने मां साथे सुसमाचार फैलाणे दे, क्लेमंस और मेरे ओर साथे काम करने वालेया समेत मईणत किती, जिना सबी रे नाओ जीवन्तो री कताबा रे लिखी राखे। 4 प्रभुए रे सदा खुश रओ, आऊँ फेर बोलूँआ कि खुश रओ। 5 तुसा री नरमाई सबी लोका सामणे प्रकट ओ। प्रभुए रा वापस आऊणा नेडे ए। 6 केसी बी गल्ला री चिन्ता नि करो। पर हर एकी परिस्थितिया रे तुसा री अर्ज, प्रार्थना और बिनतिया रे जरिए, धन्यवादो साथे परमेशरो सामणे ल्याए जाओ। 7 तेबे परमेशरो तुसा खे शान्ति देणा। ये शान्ति माणूँआ री समजा ते बिल्कुल बारे ए। एसा तुसा रे दिल और तुसा रे सोच-बिचार मसीह यीशुए रे सयी-सलामत राखणे। 8 आखरी रे ओ साथी विश्वासियो! तुसे आपणा त्यान तिना गल्ला पाँदे लगाओ जो-जो गल्ला सच ए, आदरणीय ए, खरिया ए, पवित्र ए, सुन्दर ए और मनो खे खरिया लगणे वालिया ए। तिना ई गल्ला रे बारे रे सोचो जो उत्तम और तारीफा जोगिया ए। 9 जो गल्ला मैं तुसा खे सिखाई राखिया और तुसे मांते सुणिया और सिखिया और सेयो मानिया, और जो माखे करदे ऊए देखोए, तिना ई गल्ला खे मानेया करो। तेबे परमेशर, जो शान्तिया री सुबल ए तुसा लोका साथे रणा। 10 आऊँ प्रभुए रे बऊत खुश ए कऊँकि एबे इतणे दिनो ते बाद फेर तुसे मेरी चिन्ता मेरी मताद करने खे किती। पक्का तुसा खे शुरूओ रे बी इजी गल्ला री चिन्ता थी, पर तुसा खे मेरी मताद करने रा मौका नि मिलेया। 11 ये नि कि आऊँ आपणी कमिया री बजअ ते ये बोलणे लगी रा, कऊँकि मैं ये सिखी राखेया कि जेते दशा रे आप, तिदे ई तसल्ली राखूँ। 12 मैं गरीबी और भरपूरी दूई दशा रे रणा सीखी ला रा। हर एकी गल्ला रे और सबी दशा रे मैं रजे रे ऊणा या पूखा रणा और बढ़ना-कटणा सीखी ला रा। 13 मसीह रे जरिए जो माखे सामर्थ देओआ तिदे आऊँ सब कुछ करी सकूँआ। 14 फेर बी तुसे मेरे बुरे बखतो रे मेरी मताद करी की बऊत खरा काम कितेया। 15 ओ फिलिपिया रे लोको! तुसे आपनी एक सुसमाचार प्रचारो री शुरूआता दे, जेबे आऊँ मकिदुनिया प्रदेशो ते चली पड़ेया, तेबे तुसा खे छाडी की ओरी किने बी मण्डलिए लणे-देणे रे बारे रे मेरी मताद नि किती। 16 ईयाँ ई जेबे आऊँ थिस्सलुनीके रे था, तेबे बी तुसे मेरी जरूरत पूरी करने खे, एकी बारिया ते बी जादा मताद पेजी। 17 आँऊ ये इजी खे नि बोलदा कि माखे पैसेया री कुछ मताद चाईयो, पर ये कि तुसे से आशीष पाओ जो परमेशरो री तरफा ते दान देणे ते आओई। 18 मांगे सब कुछ ए, बल्कि बऊत जादा बी ए, जो चीजा तुसे इपफ्रुदीतुसो रे आथो रे पेजिया थिया, तिना खे पाई की आऊँ रज्जी गा रा। से तो सुख देणे वाली खुशबू जेडी और मानणे जोगा बलिदान ए, जो परमेशरो खे अच्छा लगेओ। 19 आँऊ प्रार्थना कऊँआ कि परमेशर बी आपणे तेस धनो रे मुताबिक, जो महिमा समेत यीशु मसीह रे ए,

तुसा री सारी जरूरता खे पूरी करो। 20 म्हारे परमेशर और पिते री महिमा जुगो-जुगो तक ऊँदी रओ। आमीन् (aiōn g165) 21 यीशु मसीह रे परमेशरो रे सब पवित्र लोका खे मेरी तरफा ते नमस्कार बोलो। जो विश्वासी पाई मां साथे ए, सेयो तुसा खे नमस्कार बोलोए। 22 सब परमेशरो रे पवित्र लोक जो एती ए, खास करी की जो महाराजा कैसरो रे कराने रे विश्वासी ए, तुसा खे नमस्कार बोलोए। 23 म्हारे प्रभु यीशु मसीह री कृपा तुसा सबी साथे सदा ऊँदी रओ। आमीन्।

कुलुस्सियों

1 ये चिट्ठी पौलुस और आसा रा पाई तीमथियुसो री तरफा ते ए। आऊँ पौलुस परमेशरो री इच्छा ते यीशु मसीह रा प्रेरित ए। 2 आऊँ ये चिट्ठी मसीह रे परमेशरो रे तिना पवित्र लोका खे और विश्वास जोगे पाईया खे लिखणे लगी रा जो कुलुस्से नगरो रे रओए। म्हारे पिता परमेशरो री तरफा ते तुसा खे कृपा और शान्ति मिलदी रओ। 3 जेबे आसे तुसा खे प्रार्थना कएँ ते तो आसे आपणे प्रभु यीशु मसीह रे पिता, परमेशरो रा सदा धन्यवाद कएँ। 4 कऊँकि आसे सुणी राखेया कि यीशु मसीह पाँदे तुसा रा विश्वास ए और सब परमेशरो रे लोका साथे प्यार राखोए। 5 तुसा रा विश्वास और प्यार तेसा उम्मीदा रे मुताबिक ए, जो स्वर्गो रे परमेशरे तुसा खे राखी री ए। तुसे तिजी रे बारे रे तेस सुसमाचारो रे सच्चे वचनो रे पईले ई सुणी चुकी रे, जो तुसा गे पऊँछी रा। 6 ये सुसमाचार सारी दुनिया रे लगातार फैलणे लगी रा और बऊत सारे लोक विश्वासी बणने लगी रे। तुसा रे बी तेसी दिनो ते ये फलने-फूलने लगी रा जेस दिनो ते तुसे सुणेया और सच्चाईया ते परमेशरो री कृपा पछयाणी। 7 तिजी री ई शिक्षा तुसे म्हारे प्यारे और साथे काम करने वाले इपफ्रासो ते सीखी, जो आसा खे मसीह रे विश्वासो जोगा सेवक ए। 8 तिने ई आसा खे बताया कि पवित्र आत्मे तुसा लोका रे मनो रे ओरी री खातर बऊत प्यार परी ता। 9 जेस दिनो ते आसे ये सुणेया, आसे तुसा लोका खे लगातार प्रार्थना करदे रऊँए। आसे ये बिनती कएँ कि पवित्र आत्मा तुसा खे आत्मिक बुद्धि और समज देओ ताकि तुसे परमेशरो री इच्छा पूरिया तरअ ते समजी सकी। 10 ताकि तुसा रा चाल-चलण प्रभुए खे महिमा देणे जोगा ओ और सदा सेई काम करो जेते की प्रभु खुश ओ। तुसा री जिन्दगिया रे हर प्रकारो रे खरे कामो रा फल लगी ओ और तुसे परमेशरो री पछयाणा रे बड़दे जाओ। 11 आऊँ प्रार्थना कएँआ कि परमेशर आपणी महिमा री शक्तिया रा इस्तेमाल करी कि तुसा खे सब प्रकारो री सामर्था ते तागतबर करो। जेते कि तुसे खुशिया साथे हर प्रकारो ते सब्र और सईन शीलता दखाई सकी। 12 तुसे लोक पिता परमेशरो रा धन्यवाद करदे रओ, जिने आसे एते जोगे बणाए कि स्वर्गो रे राज्य रे परमेशरो रे लोका साथे जायदाता रे बराबर इस्सेदार ओऊँ। 13 कऊँकि परमेशरे ई आसे शैतानो रे वशो ते छुड़ाई कि आपणे प्यारे पुत्रो रे राज्य रे प्रवेश करवाया। 14 आसा खे तिदे ई छुटकारा मतलब पापो री माफी मिलोई। 15 मसीह ना दिशणे वाले परमेशरो रा दिशणे वाला प्रतिरूप ए। से सब चीजा बणने ते पईले ई मौजूद ए और से परमेशरो री बणाई री सारी सृष्टिया पाँदे प्रदान अधिकारी ए। 16 कऊँकि तेसदे ई सारिया चीजा री सृष्टि ऊई। सब कुछ चाए से स्वर्गो री ओ या तरतिया री, देखी री या बिना देखी री, क्या सिंहासन, क्या राज करने वाले, क्या प्रदानगिरी, क्या अक्क, सारी चीजा तेसरे ई जरिए और तेसरिया ई खातर बणाई राखिया। 17 मसीह सब चीजा बणने ते पईले ई मौजूद था और सब चीजा तेसरी ई इच्छा रे मुताबिक मिली की काम करदी रओईया। 18 मण्डली मसीह रा शरीर ए और मसीह मण्डलिया रा सिर ए। सेई आदि ए और मरे रेया बीचा ते जिऊँदा ऊणे वालेया रे जेठा ए ताकि सबी गल्ला रे सेई प्रदान ओ। 19 कऊँकि पिता परमेशरो री खुशी इदे ईए कि तेसरा पूरा सबाओ मसीह रे वास करो। 20 मसीह कूसो पाँदे जो आपणा खून बाह्या तिजी रे जरिए परमेशरे मेल-जोलो री शुरूआत किती। परमेशरो खे ये खरा लगेया कि से मसीह रे जरिए सब चीजा रा चाए सेयो तरतिया पाँदलियाए या स्वर्गो रिया ए आपू साथे मेल-जोल करी लो। 21 तुसे जो पईले परमेशरो ते दूर थे और बुरे कामो री बजअ ते मनो ते बैरी थे। 22 पर एबे परमेशरे आपणे पुत्र मसीह रे कूसो पाँदे मरने रे जरिए तुसा साथे बी मेल-जोल करी ला, ताकि तुसा खे आपणे सामणे पवित्र और निष्कलंक और निर्दोष बणाई कि आजीर करो। 23 तुसे मसीह रे विश्वासो री निऊँआ पाँदे पक्के बणे रे रओ। तेसा उम्मीदा खे नि छाडो जो सुसमाचार सुणने ते बाद तुसा खे मिली। एस सुसमाचारो रा प्रचार सर्गो निठे सारी सृष्टिया रे कित्तेया और जेतेरा प्रचार करने खे आऊँ पौलुस

सेवक बणेया। 24 एबे आऊँ तिना दुः खो रिया बजअ ते खुशी मनाऊँआ, जो तुसा री तई उठाऊँआ। आऊँ मसीह रे क्लेशो री कअटी, आपणे शरीरो रे, तिना री मण्डलिया खे, जो मसीह रे शरीरो रे पूरी करी देऊँआ। 25 जेसरा आऊँ परमेशरो रे तेस परबंदो रे मुताबिक तेसरी मण्डलिया रा सेवक बणेया, जो तुसा खे मांगे सम्बालेया, ताकि आऊँ परमेशरो रे वचनो रा पूरा-पूरा प्रचार करूँ। 26 मतलब तेस पेतो खे जो सदिया और पीढिया ते गुप्त रया, पर एबे परमेशरो रे तिना पवित्र लोका पाँदे प्रकट ऊआ। (aiōn g165) 27 परमेशरे ये इजी खे प्रकट कित्तेया कऊँकि से चाओ था कि तुसे दूजी जाति तिना रे नौखी और महिमा रे पेतो खे समजो। से पेते ये कि मसीह तुसा लोका बीच रे रओआ और तिना रे तुसा लोका री महिमा री उम्मीद ए। 28 आसे मसीह रा प्रचार कएँए और परमेशरो री तेसा बुद्धिया ते हर एक माणुए खे चतौणी और पूरे ज्ञानो रा उपदेश देऊँए। जेते कि हर एक माणुए खे मसीह रे सिद्ध करी की तिना सामणे आजीर करो। 29 इजी खे आऊँ तेसरी तेसा शक्तिया रे मुताबिक तन मन लगाई की मईणत कएँआ जो माखे मसीह रे जरिए मिलोई और जो मांदे काम करोई।

2 आऊँ चाऊँआ कि तुसे जाणी लो कि तुसा खे और लौदीकिया नगरो री मण्डलिया खे और तिना सबी लोका खे बी जिने आऊँ देखी बी नि राखेया तिना सबी खे आऊँ केडी कडी मईणत कएँआ। 2 आऊँ एडा इजी खे कएँआ ताकि तिना रे मनो रे शान्ति मिलो और सेयो प्यारो रे आपू बीच बणे रे रओ। आऊँ चाऊँआ कि तिना खे पूरा आत्म विश्वास ओ कऊँकि तिना खे परमेशरो री गुप्त योजना री पूरी समज ए। जो कि यीशु मसीह आपू ए। 3 जेसरे बुद्धि और ज्ञानो रे सारे पण्डार छिपे रे ए। 4 ये आऊँ इजी खे बोळूँआ कि कोई माणु तुसा खे चूठी लुबाणे वाली शिक्षा ते तोखा नि देओ। 5 कऊँकि आऊँ जे शरीरो ते तुसा ते दूर ए, तेबे बी आत्मा रे तुसा साथे ए। माखे ये जाणी की खुशी ओई कि तुसा रा जीवन सई टंगो ते ए और मसीह रे तुसा रा विश्वास बऊत मजबूत ए। 6 जियँ तुसे यीशु मसीह खे प्रभु करी की मानी ला रा। तियँ ई एबे मसीह रे चलदे रओ। 7 और तेसदे ई जड़ पकड़दे और बड़दे जाओ और जेडे तुसे सिखाई राखे, तेडे ई विश्वासो रे पक्के ऊँदे जाओ और जादा ते जादा धन्यवाद करदे रओ। 8 चौकस रओ कि कोई तुसा खे आपणे चूठे दर्शनशास्त्रो री बेकारो रिया गल्ला ते बईकाई ना देओ। ये सारिया गल्ला माणुआ री रीति-रवाजा रे और दुनिया री शुरूओ री शिक्षा रे मुताबिक ए, पर मसीह री शिक्षा रे मुताबिक निए। 9 इजी खे तोखा नि खाओ कऊँकि मसीह रे शरीरो रे परमेशरो रे सारे गुण और सामर्थ्य भरपूरिया ते वास करोए। 10 मसीह हर एक प्रदानगिरी और अक्को पाँदे शिरोमणी ए। तुसे तिना रे आत्मिक रूपो ते भरपूर ए कऊँकि तुसे मसीह रे ए। 11 तिदे ई तुसा रा बी खतना ऊई रा। से खतना लोका रे आथो रे जरिए नि ऊआ, पर से मसीह रा खतना मतलब बपतिस्मा ए, जेते कि पापमय शरीर त्वारी देओए। 12 और तुसे लोक बपतिस्मे रे मसीह साथे दबाए गये और तिदे ई परमेशरो री शक्तिया पाँदे विश्वास करी की, जिने से मरे रेया बीचा ते जिऊँदा कित्तेया, तेस साथे जिऊँदे बी ऊए। 13 परमेशरे तुसे बी, जो आपणे अपराधो और शरीरो रे बिना खतने री दशा रे मुडदे थे, मसीह साथे जिऊँदे कित्ते और म्हारे सारे पाप माफ कित्ते। 14 और बिदिया रा से लेख जो म्हारे नाओ पाँदे और म्हारे बिरोदो रे था, मट्याईता और से कूसो पाँदे कीला ते जड़ी की सामणे ते टाई ता रा। 15 और मसीहे प्रदानगिरी और अक्को खे अरायी की तिना रा खुल्लमखुल्ला तमाशा बणाया और कूसो री बजअ ते तिना पाँदे जय-जयकारो री आवाज सुणाई। 16 तेबेई कोई तुसा खे तोखा नि देणे पाओ और खाणे-पीणे या त्योआर, नए चाँद या आरामो रे दिनो रे बारे रे तुसा रा कोई न्याय नि करो। 17 कऊँकि यो सब नियम आऊणे वाली गल्ला रिया छायाँ ए, पर मूल चीजा मसीह रिया ए। 18 तुसे तिना लोका ते तोखा नि खाओ जो बिनप्रता रा चूठा दखावा और स्वर्गदूता री पूजा करोए। सेयो तुसा खे दौड़ा रे फलो ते रोकी की नि राखी। एडा माणु देखी रिया गल्ला रे लगे रा रओआ ओर आपणी शारीरिक समजा पाँदे बेकार फूलदा रओआ। 19 और

सेयो लोक यीशु मसीह खे पकड़ी की नि राखदे जो पूरे शरीरो रा सिर ए। जियाँ सिर पूरे शरीरो खे दिशा देओआ तियाँ ई यीशु मसीह आपणे सारे लोका खे दिशा देओआ ताकि सेयो एकजुट और कट्टे रओ जियाँ शरीरो रे सारे जोड़ और मांसपेसी शरीरो खे पकड़ी की राखोए और परमेशरो री तरफा ते बड़दे जाओए। 20 जबकि तुसा रा पापी सबाओ मसीह साथे मरी गा, इजी खे तुसा खे एसा दुनिया री शुरूओ री शिक्षा मानणे री जरूरत नि। तो फेर तिना जेड़े जो दुनिया रे जीवन बिताओए, माणुआ री आज्ञा और शिक्षा रे मुताबिक और एड़ी बिदिया रे वशो रे कऊँ रओए? 21 कि ये नि छूणा, ये नि चाखणा और इजी खे आथ नि लगाणा। 22 यो सब बिधान कामो रे ल्याई-ल्याई की नाश ऊई जाणे। कऊँकि ये माणुआ री आज्ञा और शिक्षा रे मुताबिक ए। 23 आपणी ई सुबिदा रे मुताबिक बणाया रा आराधना करने रा तरीका, चूठी बिनम्रता रा दखावा और आपणे शरीरो खे कष्ट देणे रे जरूर अक्लमंदी दखाई देओई। पर सच्ची ई ये बिधान लोका खे तिना रे शरीरो री बुरी इच्छा खे रोकणे रे मताद नि करदे।

3 जबकि तुसे मसीह साथे जिऊँदे किक्ते, तो स्वर्गो रिया चीजा री टोला रे रओ, जेती मसीह परमेशरो री बगला रे दाँणे कनारे बऊत ई सम्मानित जगा रे बैठी रा और परमेशरो रे दाँणे कनारे बैठी रा। 2 तरतिया पाँदलिया नि, पर स्वर्गो री चीजा री टोला रे रओ। 3 कऊँकि तुसे तो पापी सबाओ रे मरी गे और तुसा रा जीवन मसीह साथे परमेशरो रे छिपे राए। 4 मसीह जो म्हारा जीवन ए जेबे एसा दुनिया रे वापस आऊणा, तेबे तुसे बी तेस साथे महिमा समेत सामणे ल्याए जाणे। 5 इजी री खातर आपणी तिना शरीरो री इच्छा खे काई देओ, जो तरतिया पाँद ए, मतलब-व्याभिचार, अशुद्धता, बुरी इच्छा, बुरी लालसा और लोब, जो मूर्तिपूजा रे बराबर ए। 6 इना ई कामा खे करने री ई बजअ ते परमेशरो रा प्रकोप आज्ञा ना मानणे वालेया पाँद पडोआ। 7 और तुसे बी, जेबे इना बुराईया रे जीवन बिताओ थे, तो इना रेई मुताबिक चलो थे। 8 पर एबे तुसे बी इना सबी खे, मतलब-गुस्सा रोष, बैर, निन्दा और गालिया बकणा, इना सबी गल्ला खे छडी देओ। 9 एकी-दूजे ते चूठ नि बोलो कऊँकि तुसे पुराणा पापी सबाओ तेसरे कामो समेत त्वारी ता रा। 10 और एबे तुसे नया सबाओ तारण करी ला रा, जो आपणे बनाणे वाले रे रूपे रे मुताबिक ज्ञान पाणे खे नया बणदा जाओआ। 11 तिदे ना तो यूनानी रया, ना यहूदी, ना खतना, ना बिना खतने ते, ना जंगली, ना स्कूती, ना दास और ना आजाद; बस मसीह ईए जो सब कुछ ए और सबी रे ए। 12 तुसे लोक परमेशरो री पवित्र और प्यारी चुणी री प्रजा ए। तेबेई तुसे लोक बड़ी करूणा और पलाई, दीनता, नरमाई और सईन शीलता खे तारण करो। 13 और जे केसी गे केसी पाँद दोष लगाणे री कोई बजअ ओ, तो एकी-दूजे खे सईन करी लो और एकी-दूजे रे अपराध माफ करो, जेड़े प्रभुए तुसा रे अपराध माफ किक्ते, तियाँ ई तुसे बी करो। 14 और इना सबी पाँद, प्यारो खे जो सिद्धता रा कटिबन्द ए बानी लो। 15 शान्ति जो मसीह देओआ तुसा रे दिलो रे राज्य करो। एड़ी शान्तिया खे तुसे एक शरीर ऊई की बुलाई बी राखे। तुसे सदा धन्यवादी बणे रे रओ। 16 मसीह रे वचनो खे आपणे दिलो रे बऊत जादा बसणे देओ। सिद्ध ज्ञानो समेत एकी-दूजे खे सिखाओ और चिताओ। आपणे-आपणे मनो रे धन्यावादो साथे परमेशरो खे पजन, स्तुतिगान और आत्मिक गीत गाओ। 17 और वचनो ते और कामो ते जो कुछ बी करो, सब प्रभु यीशुए रे नाओं ते करो और तेस साथे परमेशर पिते रा धन्यवाद करो। 18 ओ लाड़ियो! जेड़ा प्रभुए रे खरा ए, तेड़े ई आपणे-आपणे लाड़े रे अधीन रओ। 19 ओ लाड़ियो! आपणी-आपणी लाड़िया साथे प्यार राखो और तिना साथे सखती नि करो। 20 ओ बालको! सबी गल्ला रे आपणे-आपणे मया-बाओ री आज्ञा रा पालण करो, कऊँकि प्रभु इजी ते खुश ओआ। 21 ओ बाल-बच्चेया वालेयो! आपणे बालका खे तंग नि करो, एड़ा नि ओ कि तिना रा सन्न टूटी जाओ। 22 ओ दासो! जो शरीरो रे मुताबिक तुसा रे मालक ए, सबी गल्ला रे तिना री आज्ञा खे मानो, माणुआ खे खुश करने जेड़ा दखाणे खे नि, पर सीदे मनो ते और प्रभुए रे डरो ते। 23

और जो कुछ तुसे करोए, तनो-मनो ते करो, ये सोची की कि माणुआ खे नि पर प्रभुए खे करने लगी रे। 24 कऊँकि तुसे जाणोए कि तुसा खे इजी रे बदले प्रभुए ते जायदात मिलणी, तुसे प्रभु यीशु मसीह री सेवा करोए। 25 कऊँकि जो बुरा करोआ, परमेशरो तिना खे तेसा बुराईया री खातर सजा देणी, तेती केसी साथे भेद-भाव नि ऊँदा।

4 ओ मालको! आपणे-आपणे दासा साथे न्याय और ठीक टंगो रा बर्ताव करो, ये समजी की कि स्वर्गो रे तुसा रा बी एक मालक ए। 2 चौकस रंदे ऊए धन्यावादो साथे लगातार परमेशरो ते प्रार्थना करदे रओ। 3 और इजी साथे-साथे आसा खे बी प्रार्थना करदे रओ, ताकि परमेशर आसा खे वचन सुनाणे रा एड़ा मौका देई देओ कि आसे मसीह रे तेस पेतो रे बारे रे बखान करी सकिए, जेतेरी बजअ ते आऊँ कैदा रे आ। 4 इजी खे प्रार्थना करो कि आऊँ मसीह रे बारे रे ठीक टंगो रे प्रचार करी सकूँ ताकि सुणने वाले लोक तेस प्रचारो खे ठीक टंगो ते समजी सको। 5 अविश्वासिया साथे समजा साथे बर्ताव करो। हर एक मौके खे किमती जाणी की तिजी रा सई इस्तेमाल करो। 6 तुसा री बोली सदा कृपा साथे और साअन ओ ताकि तुसा खे हर माणुए खे तुसा रे विश्वासो रे बारे रे ठीक टंगो रे जवाब देणा आयी जाओ। 7 विश्वासो जोगा सेवक और प्रभुए री सेवा रे मां साथे काम करने वाला आसा रा प्यारा पाई तुखिकुस तुसा लोका खे मेरिया सब गल्ला बताई देओगा। 8 से मैं तुसा गे इजी खे पेजी राखेया कि तुसा खे म्हारी दशा रा पता लगी जाओ और से तुसा रे दिलो खे आँसला देओ। 9 तेस साथे उनेसिमस बी पेजी राखेया जो विश्वासो जोगा और आसा रा प्यारा पाई ए, से तुसा रे नगरो रा ईए, एस तुसा गे एथो रिया सारिया गल्ला बताई देणियां। 10 अरिस्तर्खुस, जो मां साथे कैदी ए और बरनबासो रा रिस्तेदार मरकुसो री तरफा ते तुसा खे नमस्ते। मरकुसो रे बारे रे तुसे आज्ञा पाई थी कि जे से तुसा गे आओ तो तेसरी ठीक टंगो रे आदर-खातर करनी। 11 यीशु, जेसखे लोक यूस्तुस बोलेए, तुसा खे नमस्कार बोलेओ। यहूदी विश्वासिया बीचा ते सिर्फ बस ये तीन लोक ई परमेशरो रे राज्य खे मां साथे काम करने वाले और मेरी शान्तिया री बजअ रई रे। 12 इपफ्रास जो तुसा रेई नगरो राए और यीशु मसीह रा दास ए, तुसा खे नमस्कार बोलेओ। से सदा तुसा खे प्रार्थना करदा रओआ ताकि तुसे सिद्ध ऊई कि पूरे विश्वासो साथे, परमेशरो री इच्छा पाँद खड़े रओ। 13 आऊँ तेसरा गवा ए कि से तुसा खे और लौदीकिया रे लोका खे और हियरापुलिस वालेया खे लगातार प्रार्थना करदा रओआ। 14 प्यारा बैद लूका और देमास तुसा खे नमस्ते बोलेओ। 15 लौदीकिया नगरो रे विश्वासी पाई, नुमफास और तिना रे कअरो री मण्डलिया खे नमस्कार बोलणा। 16 जेबे ये चिट्ठी तुसे पढी लो तो एड़ा करना कि लौदीकिया नगरो री मण्डलिया रे बी पढाई दे ओ, और से चिट्ठी जो लौदीकिया मण्डलिया ते आओ से तुसे पढी लयो। 17 और अरखिप्पुसो खे बोलणा कि जो सेवा प्रभुए रे तांगे सम्बाली राखी, से सावधानिया साथे पूरी करेया। 18 आऊँ पौलुस चिट्ठिया रा ए इस्सा आपणे आथो साथे लिखणे लगी रा तुसा खे नमस्कार बोलेओ। याद राखो कि आऊँ जेला रे ए और माखे प्रार्थना करदे रओ। तुसा पाँद परमेशरो री कृपा ऊँदी रओ। आमीन।

1 थिस्सलुनीकियों

1 ये चिट्ठी पौलुस, सिलवानुस और तीमुथियुसो री तरफा ते ए। आसे एसा चिट्ठिया खे थिस्सलुनीकियों नगरो री मण्डलिया खे लिखणे लगी रे, जो परमेशर पिता और प्रभु यीशु मसीह रे ए। परमेशरो री तरफा ते कृपा और शान्ति तुसा खे मिलदी रओ। 2 आसे तुसा सबी खे लगातार प्रार्थना करदे रऊँए और सदा तुसा सबी रे बारे रे परमेशरो रा धन्यवाद कर्ऊँए। 3 आसे आपणे पिता परमेशरो रे सामणे प्रार्थना करदे बखते तुसा रे विश्वासो रे काम और प्यारो री मईणत और म्हारे प्रभु यीशु मसीह रे तुसा री उम्मीदा री सन्नता खे लगातार याद कर्ऊँए। 4 ओ साथी विश्वासियो! परमेशरो रे प्यारे लोको! आसे जाणूँए कि परमेशरे तुसे आपणे लोक करी की चूणे ले रे। 5 कऊँकि आसा रे प्रभु यीशु मसीह रा सुसमाचार तुसा गे, ना कि बस वचन मात्र ईए, बल्कि पवित्र आत्मा री सामर्थ और बडे निश्चे साथे पऊँछी रा। तुसे जाणोए कि जेबे आसे तुसा साथे थे आसे तुसा रे पले री खातर, तुसा बीचे केड़ा जीवन जिया। 6 तुसे बडे क्लेशो रे पवित्र आत्मा री प्रेरणा ते खुशिया साथे प्रभुए रे संदेशो खे मानी ला। ईयां तुसे म्हारी और प्रभुए री जी चाल चलणे लगी। 7 एथो तक कि मकिदुनिया और अखाया प्रदेशो रे सबी विश्वासिया खे तुसे आदर्श बणे। 8 तुसा रे एथा ते ना केवल मकिदुनिया और अखाया प्रदेशो रे बी प्रभुए रा वचन सुणाया, पर तुसा रे विश्वासो री जो परमेशरो रे ए, हर जगा रे एड़ी चर्चा फैली गी कि आसा खे इजी रे बारे रे कुछ बी बोलणे री जरूरत निए। 9 दूर-दराजो रे लोक हर जगा तुसा रे जरिए कित्ती री खातरदारिया रे बारे रे बताओए। और ये बी कि कियों तुसे मूर्तिया ते दूर ऊई की परमेशरो री तरफा खे फिरे, ताकि जिऊँदे और सच्चे परमेशरो री सेवा करो। 10 और एबे तुसे परमेशरो रे प्रभु यीशु मसीह री स्वर्गो ते फेर आऊणे री बात न्यालदे रओ। जो परमेशरे मरे रेया बीचा ते जिऊँदा कित्तेया, जो आसा खे आऊणे वाले प्रकोपो ते बचाओआ।

2 ओ प्यारे साथी विश्वासियो! तुसे आपू ई जाणोए कि म्हारा तुसा गे आऊणा फाईदमंद ऊआ। 2 जेड़ा तुसे आपू बी जाणोए कि आसे पईले-पईले फिलिपियो नगरो रे दुः ख सईन कित्तेया और बुरा बर्ताव सईन करने ते बाद बी म्हारे परमेशरे आसा खे एड़ी इम्मत् दित्ती कि आसे परमेशरो रा सुसमाचार तुसा रे नगरो रे लोका री तरफा ते पारी (भारी) बिरोद ऊँदे ऊए बी तुसा खे सुणाऊँ। 3 कऊँकि म्हारा उपदेश ना तोखे राए, ना गलत इरादे ते ए और ना ई ठग-बाजिया साथे ए। 4 पर परमेशरे आसे एते जोगे समजी की आसा गे सुसमाचार सम्बालेया, आसे तेड़ा ई बताऊँए। इजी खे आसे माणूआ खे नि, पर परमेशरो खे, जो म्हारे मनो खे परखोआ, खुश करने खे उपदेश देऊँए। 5 तुसे जाणोए कि आसे ना तो कदी चापलूसिया रिया गल्ला कर्हूँ थे और ना ई आसे तुसा ते कुछ पाणे रिया तई कुछ लालच कित्तेया। इना गल्ला रा परमेशर गवा ए कि आसे एड़े लोक नि थे। 6 हालाँकि आसा खे मसीह रे प्रेरित ऊणे री बजअ ते, तुसा ते मताद पाणे रा अक्क था, तेबे बी आसे माणूआ ते आदर नि चाऊँ थे, ना तुसा ते और ना ई केसी ओरी ते। 7 पर जियाँ माए आपणे बाल-बच्चे खे पालो-पोषोई, तियाँ ई आसे बी तुसा बीचे रई कि नरमाई दखाई 8 और तियाँ ई आसे तुसा री लालसा करदे ऊए, बस परमेशरो रा ई सुसमाचार नि, पर आपणा-आपणा प्राण तुसा खे देणे खे बी त्यार खे, कऊँकि तुसे म्हारे बडे पारी प्यारे ऊईगे थे। 9 कऊँकि ओ प्यारे साथी विश्वासियो! तुसे म्हारी मईणत और कष्टो खे याद राखोए कि आसे इजी री खातर रात-दिन काम-तंदा करदे ऊए तुसा बीचे परमेशरो रा सुसमाचार प्रचार कित्तेया, ताकि तुसा केसी पाँडे बी बोज ना ओ। 10 तुसे आपू ई गवा ए और परमेशर बी कि तुसा सारे विश्वासिया साथे आसा रा बर्ताव, केड़ा पवित्र, धार्मिक और निर्दोष रया। 11 जेड़ा तुसे जाणोए कि जेड़ा पिता आपणे बालका साथे बर्ताओ करोआ, तियाँ ई आसे बी तुसा बीचा ते हर एकी खे उपदेश करदे, शान्ति देऊँ थे और समजयाऊँ थे 12 कि तुसा रा चाल-चलण एड़ा ओ कि परमेशरो खे आदरो जोगा ओ, जो तुसा खे आपणे

राज्य रे और महिमा रे बुलाओआ। 13 इजी री खातर आसे बी परमेशरो रा धन्यवाद लगातार करदे रऊँए कि जेबे आसा रे जरिए परमेशरो रे सुसमाचारो रा वचन तुसे सुणोया, तो से माणूए रा नि, पर परमेशरो रा वचन समजी की तुसे मानेया जो सच्ची ये सुसमाचार परमेशरो री तरफा तेआ। एस उपदेशो रे जरिए परमेशर तुसा रे काम करोआ जो मसीह यीशुए पाँडे विश्वास राखोए। 14 तेबेई तुसे, ओ प्यारे साथी विश्वासियो! परमेशरो री तिना मण्डलिया री जी चाल चलणे लगे, जो यहूदिया प्रदेशो रे मसीह यीशुए रे ए, कऊँकि तुसा खे बी आपणे लोका ते तेड़ा ई दुः ख मिलेया, जेड़ा तिना खे यहूदिया ते मिलेया था। 15 इने यहूदिये प्रभु यीशु और भविष्यबक्ता बी काई ते और आसे बी सताए, परमेशर तिना ते खुश निए और सेयो सबी माणूआ रा बिरोद करोए। 16 और सेयो दुजिया जातिया खे प्रभुए रे उद्धारो रिया गल्ला करने ते, आसा खे रोको ए। ईयां सेयो आपणे पापो रा कअड़ा (घड़ा) परदे रओ। एबे आखरकार तिना पाँडे परमेशरो रा डराऊणा प्रकोप आईगा रा। 17 ओ प्यारे साथी विश्वासियो! जेबे आसे थोड़ी देरा खे मनो ते नि, बल्कि तुसा रे सामणे ते लग ऊईगे थे, तो आसे बडी इच्छा साथे तुसा खे देखणे रिया तई ओर बी जादा कोशिश कित्ती। 18 इजी री खातर आसे, खास कर मैं पौलुसे ओक बार नि, बल्कि काई बार तुसा गे आऊणा चाया, पर शैताने आसे तुसा गे फेर आऊणे नि दित्ते। 19 म्हारी उम्मीदा, खुशी और तारीफो रा मुकुट कुण ए? क्या म्हारे प्रभु यीशु मसीह रे सामणे, तेसरे वापस आऊणे रे बखते, तुसेई नि ऊणे? 20 म्हारी तारीफ और खुशी सच्ची तुसे ईए।

3 आखरकार, जेबे आसा ते ओर नि रऊआ, तेबे आसे ये सोचेया कि एथेंस नगरो रे कल्ले रई जाऊँए 2 और आसे तीमुथियुस तुसा गे पेजेया कि से तुसा खे विश्वासो रे मजबूत करो और समजयाओ, ताकि तुसा रा विश्वास यीशु मसीह रे लगातार बणेया रा रओ। से मसीह रे सुसमाचारो रे आसा साथे काम करने वाला पाई और परमेशरो रा सेवक ए। 3 तुसा रा विश्वास इना क्लेशो री बजअ ते मसीह ते आटी नि जाओ, कऊँकि तुसे आपू जाणोए कि आसा पाँडे ये क्लेश आऊणे ईए। 4 कऊँकि पईले बी जेबे आसे तुसा गे थे, तो तुसा खे बोलेया कर्हूँ थे कि आसा सबी खे क्लेश ऊठाणे पडने और एड़ा ई ऊआ और तुसे जाणो बीए। 5 इजी बजअ ते जेबे मांते ओर नि रऊआ, तो तुसा रे विश्वासो रा आल जाणने खे मैं तीमुथियुस तुसा गे पेजेया। माखे डर था कि केथी एड़ा नि ओ कि परखणे वाले शैताने तुसे परखे ओ और म्हारी कड़ी मईणत बेकार ऊईगी ओ। 6 पर एबु तीमुथियुसे जो तुसा गे ते आसा गे आयी की तुसा रे विश्वासो और प्यारो रा सुसमाचार सुणाया। ये गल्ल बी सुणाई की तुसे सदा प्यारो साथे आसा खे याद करोए और आसा खे देखणे री लालसा राखोए, जेड़ा आसे बी तुसा खे देखणे री लालसा राखूँए। 7 इजी री खातर ओ प्यारे साथी विश्वासियो! आसे आपणी मुसीबत और क्लेशो रे तुसा रे विश्वासो रे बारे रे सुणी की तुसा रा विश्वास यीशु मसीह रे बऊत मजबूत ए आसे शान्ति पाई। 8 प्रभुए रे तुसा रा मजबूत विश्वास आसा खे नए जीवन देणे जेड़ा ए। 9 और जेड़ी खुशी आसा खे तुसा री बजअ ते परमेशरो सामणे ए, तिजी रे बदले तुसा रे बारे रे आसे कियों परमेशरो रा धन्यवाद करिए? 10 आसे रात-दिन बऊत ई प्रार्थना करदे रऊँए कि तुसा गे फेर आईए और प्रभु यीशु मसीह रे ओर बी मजबूतिया साथे विश्वास करने रे तुसा री मताद करिए। 11 आसे प्रार्थना कर्ऊँए कि म्हारा पिता परमेशर और प्रभु यीशु तुसा गे आऊणे री म्हारी अगुवाई करो। 12 और आसे प्रार्थना कर्ऊँए कि प्रभु एड़ा करो जेड़ा आसे तुसा साथे प्यार राखूँए, तेड़ा ई तुसा रा प्यार आपू बीचे और सब माणूआ साथे बडी और तरक्की करदा जाओ। 13 ताकि से तुसा रे मनो खे एड़ा मजबूत करो कि जेबे म्हारा प्रभु यीशु आपणे सबी पवित्र लोका साथे फेर वापस आओ, तो तुसे म्हारे पिता परमेशरो सामणे पवित्रता रे निर्दोष ठईरो।

4 आखरी रे ओ प्यारे साथी विश्वासियो! आसे तुसा ते बिनती कर्ऊँए और तुसा खे प्रभु यीशुए रे समजयाऊँए कि जेड़ी तुसे प्रभुए रे नाओ ते एड़े

तरीके ते जिन्दगी जिओ जो परमेशरो खे खुश करोई और जेड़ा तुसे चलो बीए, तियाँ ई ओर बी बड़दे जाओ। 2 कऊँकि तुसे जाणोए कि आसे प्रभु यीशुए री तरफा ते कुण-कुण जिया आज्ञा तुसा गे पऊँछाईया। 3 कऊँकि परमेशरो री ये इच्छा ए कि तुसे पवित्र बणो, मतलब-व्याभिचारो ते बचे रे रओ। 4 तुसा बीचा ते हर एक माणू सईन शीलता साथे आपणे शरीरो खे वशो रे करना सीखो और आपणी लाइया साथे पवित्रता और आदरो साथे जिओ। 5 ये काम आपणी इच्छा ते नि और ना ई तिना दूजिया जातिया जेड़े करो जो परमेशरो खे नि जाणदी। 6 शरीरो री इच्छा रे पड़ी की कोई बी आपणे विश्वासी पाईए रे खलाफ पाप नि करो और ना तेस पॉँदे कोई दाव चलाओ, कऊँकि प्रभु यीशु इना सबी कामा करने वालेया ते बदला लणे वाला ए, जेड़ा कि आसे तुसा खे पईले बी बताया था और चिताया बी था। 7 कऊँकि परमेशरे आसा खे अशुद्ध जिन्दगी जीणे खे नि, पर पवित्र जिन्दगी जीणे खे बुलाई राखेया। 8 इजी बजअ ते जो इना नियमा रे मुताबिक जिन्दगी जिऊणे ते ना करोआ, से माणूआ खे नि, पर परमेशरो खे ना करोआ, जो आपणा पवित्र आत्मा तुसा खे देओआ। 9 पर विश्वासी पाईचारे रे प्यारो रे बारे रे ये जरूरी निए कि आऊँ तुसा गे कुछ लिखूँ, कऊँकि आपू बीचे प्यार राखणा, तुसे आपू ई परमेशरो ते सीखी राखेया। 10 सारे मकिदुनिया प्रदेशो रे सब विश्वासी पाईया साथे सच्ची एड़ा ई प्यार करोए, पर ओ प्यारे साथी विश्वासियो! आसे तुसा खे बिनती करूँए कि तुसे मसीह रे प्यारो रे ओर बी बड़दे जाओ। 11 जेड़ा आसे तुसा खे समजयाया, तियाँ ई चुपचाप आपणी जिन्दगी जिओ। दूजे रे कामो रे दखलअन्दाजी नि करो और आपणे-आपणे आथो साथे कमाणे री कोशिश करो। 12 अविश्वासिया साथे आदरो साथे बर्ताव करो ताकि तुसा खे किजी चीजा री कमी ना ओ। 13 ओ प्यारे साथी विश्वासियो! आसे नि चाँदे कि तुसे तिना रे बारे दे अणजाण रओ, जो मसीह दे मरी गे रे, एड़ा नि ओ कि तुसे ओरी जेड़ा शोग मनाओ, जिना खे उम्मीद निए। 14 कऊँकि जे आसे विश्वास करूँए कि प्रभु यीशु मरेया और जिऊँदा बी ऊआ, तो तियाँ ई परमेशरो, तिना खे बी जो प्रभु यीशुए रे मरी गे रे, तेस साथे ई वापस लयी आऊणे। 15 कऊँकि आसे प्रभु यीशुए रे वचनो रे मुताबिक तुसा खे ये बोलीँए कि आसे जो जिऊँदे ए और प्रभुए रे फेर वापस आऊणे तक बचे रे रणे, तो सेयो पईले मरे रे विश्वासी आसा ते पईले मसीह साथे मिलणे। 16 कऊँकि प्रभु यीशु स्वर्गो ते आपू ई उतरना, तेस बखते ललकार और प्रदान दूतो रा शब्द सुणना और परमेशरो री तुरही बजाई जाणी और जो विश्वासी मसीह रे एसा दुनिया खे छाडी की चली गे रे सेयो पईले जिऊँदे ऊणे। 17 तेवे आसे जो जिऊँदे और बचे रे रणे, तिना साथे बादलो पॉँदे चकी देणे ताकि सर्गो रे प्रभुए साथे मिलूँ और तेसी बखतो ते आसे सदा प्रभुए साथे रणे। 18 तो इना गल्ला ते एकी-दूजे खे औंसला देया करो।

5 पर ओ प्यारे साथी विश्वासियो! इजी री कोई जरूरत नि कि प्रभु यीशुए रे वापस आऊणे रे बखत और तरीका रे बारे रे तुसा खे कुछ लिखेया जाओ। 2 कऊँकि तुसे आपू ई ठीक जाणोए कि जेड़ा राथियो खे चोर आओआ, तेड़े ई प्रभु यीशु दूजी बार अचाणक आऊणे वाला ए। 3 जेवे लोक बोलणे लगी रे ऊणे, “ठीक ए और कुछ डर निए,” तेस बखते तिना पॉँदे एकदम संकट आयी जाणा, जियाँ गर्भवतिया री पीड़ा, और सेयो तेस विनाशो ते कियाँ पनि बचणे। 4 पर ओ प्यारे साथी विश्वासियो! तुसे आत्मिक न्हरे रे निए तेबेई प्रभुए रे वापस आऊणे रा दिन तुसा पॉँदे चोरो जेड़ा नि पड़ना। 5 कऊँकि तुसे सब जोतिया री ल्वाद ए और दिनो री ल्वाद ए, आसे ना तो राती रे ए और ना ई न्हरे ए। 6 इजी री खातर आसा खे ओरी जेड़ा सये रे नि रणा चाईयो, पर जागदे और सावधान रणा चाईयो। 7 कऊँकि जो सओए, सेयो राथियो खेई सओए और जो नशे रे मतवाले ओए सेयो राथियो खेई मतवाले ओए। 8 पर आसे तो दिनो रे ए, विश्वास और प्यारो री झिलम पईनी की और उद्धारो री उम्मीदा रा टोप पईनी की सावधान रओ। 9 कऊँकि परमेशरे आसे आपणे गुस्से ते सजा देणे खे नि चुणी राखे, पर इजी खे चुणी राखे ताकि आसे आपणे प्रभु यीशु मसीह रे जरिए उद्धार पाऊँ। 10

यीशु मसीह आसा री खातर इजी खे मरेया, ताकि चाए आसे जिऊँदे रईए या मरी जाईए, जेबे से वापस आओ तेबे आसे सब मिली की तिना साथे सदा जिऊँदे रईए। 11 इजी बजअ ते एकी-दूजे खे औंसला देओ और एकी-दूजे री विश्वासो रे मजबूत ऊणे खे मताद करो, बल्कि तुसे एड़ा करो बीए। 12 ओ प्यारे साथी विश्वासियो! आसे तुसा ते बिनती करूँए कि तुसे जो मईणत करोए और प्रभुए रे तुसा रे अगुवे ए और तुसा खे शिक्षा देओए, तिना री मानो और आदर करो। 13 तिना रे कामो री बजअ ते प्यारो साथे तिना खे बऊत ई आदरो जोगा समजो। आपू बीचे मिली-जुली की शान्तिया साथे रओ। 14 और ओ प्यारे साथी विश्वासियो! आसे तुसा ते बिनती करूँए कि जो लोक आलसी ए, तिना खे चेतावणी देओ, जो डरपोक ए तिना खे इम्मत देओ, कमजोरा खे सम्बालो, सबी खे सईन शीलता दखाओ। 15 खबरदार! कोई केसी साथे बुराईया रे बदले बुराई नि करो, पर सदा पलाई (भलाई) करने रे आगे रओ, आपू बीचे और सबी साथे बी सदा पलाईया रे काम करने री कोशिश करो। 16 सदा खुश रओ। 17 लगातार प्रार्थना रे लगे रे रओ। 18 हर गल्ला रे परमेशरो रा धन्यवाद करो, कऊँकि तुसा खे मसीह यीशुए रे परमेशरो री येई इच्छा ए। 19 पवित्र आत्मा रे कामा खे लोका रिया जिन्दगिया दे ऊणे ते नि रोको। 20 भविष्यबाणिया खे सुणी की अणसुणा नि करो। 21 सबी गल्ला खे परखो, जो अच्छी ये तेसा खे मानेया करो। 22 हर प्रकारा री बुराईया ते बचे रे रओ। 23 शान्तिया रा परमेशर आपू ई तुसा खे पूरी रीतिया ते पवित्र करो। तुसा री आत्मा, प्राण और शरीर म्हारे प्रभु यीशु मसीह रे वापस आऊणे तक, पूरे-पूरे और निर्दोष सयी-सलामत राखणे। 24 जिने तुसे चुणी राखे तेस एड़ा करना कऊँकि से विश्वासो जोगा ए। 25 ओ प्यारे साथी विश्वासियो! आसा खे प्रार्थना करो। 26 सबी विश्वासिया खे साफ मनो ते गले मिली की नमस्कार करो। 27 आऊँ तुसा खे प्रभुए रे आज्ञा देऊँआ कि ये पत्री सबी विश्वासी पाईया रे सामणे पड़ी की सुणाई जाओ। 28 म्हारे प्रभु मसीह यीशुए री कृपा तुसा पॉँदे ऊँदी रओ।

2 थिस्सलुनीकियों

1 ये चिट्ठी पौलुस, सिलवानुस और तीमुथियुसो री तरफा ते ए। आसे एसा चिट्ठिया खे थिस्सलुनीकियों नगरो री मण्डलिया खे लिखणे लगी रे, जो म्हारे पिता परमेशर और प्रभु यीशु मसीह रे ए। 2 आसे प्रार्थना करूँए कि म्हारे पिता परमेशर और प्रभु यीशु मसीह रे तुसा खे कृपा और शान्ति मिलदी 3 ओ साथी विश्वासियो, तुसा रे बारे रे आसा खे हर बखत परमेशरो रा धन्यवाद करना चाईयो और ये ठीक बी ए, कऊँकि तुसा रा विश्वास यीशु मसीह पाँदे बरुत बड़दा जाओआ और तुसा खे आपू बीचे प्यार बरुत ऊँदा जाओआ। 4 इजी बजअ ते आसे आपू बी परमेशरो री मण्डलिया रे तुसा रे बारे रे कमण्ड करूँए। कऊँकि तुसे सन्न और विश्वासो साथे सबी किस्मा रे उपद्रव और क्लेश सईन करोए। 5 तुसे लोक दुःख सईन करोए और ये तुसा लोका खे परमेशरो रे राज्य रे जाणे जोगे बणाओए। इजी रा ये सबूत ए कि परमेशरो धार्मिकता ते न्याय करना। 6 और परमेशरो रा ये न्याय ए कि जो तुसा खे दुःख देओए, परमेशरो तिना खे बदले रे दुःख देणा 7 तेस तुसा लोका खे दुःख क्लेशा ते चैन देणी और परमेशरो आसा लोका खे बी चैन देणी। ये तेस बखते ऊणा जेबे प्रभु यीशु मसीह आपणे सामर्थ्य स्वर्गदूता साथे बरुत जादा सुलगदी ऊई आगी रे स्वर्गो ते प्रकट ऊणा। 8 परमेशरो तिना लोका खे सजा देणी जो तिना खे नि मानदे और म्हारे प्रभु यीशु मसीह रे सुसमाचारो पाँदे विश्वास नि करदे। 9 सेयो लोक प्रभुए रे सामणे ते और तिना री महिमामय सामर्थ्य रे तेजो ते सदा खे लग किते जाणे। तेस तिना लोका खे अनन्त विनाशो री सजा देणी। (aiōnios पग166) 10 ये तेस दिने ऊणा, जेबे प्रभु यीशु आपणे लोका बीचे महिमा पाणे वापस आऊणा और सब विश्वास करने वालेया लोका अचम्बा करना। इदे तुसे बी शामिल ए कऊँकि तुसे आसा रे संदेशो पाँदे विश्वास कितेया। 11 इजी खे आसे तुसा री खातर लगातार प्रार्थना बी करूँए कि म्हारा परमेशर तुसा खे तेसा जिन्दगिया जोगा बणाओ जेतखे जिऊणे खे तिने तुसे बुलाई राखे। से तुसा री हर एक खरी इच्छा खे पूरा करो और हर एक तेस कामो खे से सफल बणाओ जो तुसा रे विश्वासो रा नतीजा ए। 12 ईयां म्हारे प्रभु यीशु मसीह रे नाओं तुसा रे जरिए महिमा पाणी और तुसा तेसरे जरिए आदर पाणा। ये सब कुछ आसा रे परमेशरो रे और प्रभु यीशु मसीह री कृपा रे जरिए ऊणा।

2 ओ साथी विश्वासियो, एबे आसे आपणे प्रभु यीशु मसीह रे दुबारा आऊणे और तिना साथे आसा लोका रा कट्टे ऊणे रे बारे रे, तुसा ते बिनती करूँए 2 कि तुसे अचाणक आपणे विवेको खे केसी भविष्यबाणिया, केसी उपदेशो या केसी एडी चिट्ठिया ते नि खोई देओ जेतखे आसा रे जरिए लिखेया रा समजेया जाओआ और जेडा कि तिदे बताई राखेया ओ कि प्रभुए रा दिन आयी पऊँछी रा, तुसा रा मन पटकी नि जाओ। 3 इजी रे बारे रे कोई तुसा खे कियों बी तोखानि नि देओ। कऊँकि प्रभु यीशुए रे वापस आऊणे ते पईले एक एडा बखत ऊणा जेबे बरुत सारे लोक परमेशरो रे खलाफ खडे ऊणे। और से दुष्ट मर्द जो परमेशरो पक्का ई नरको रे नाश करी देणा, प्रकट ऊणा। (questioned) 4 तेस परमेशरो रा विरोद करना और हर एकी ते जेसखे परमेशर या पूजणे जोगा बोलोए, आपणे आपू खे बड़ा ठईराणा। एथो तक कि तेस परमेशरो रे मन्दरो रे बैठी जाणा और आपणे आपू खे परमेशर ऊणे रा दावा करना। 5 क्या तुसा खे याद निए कि जेबे आऊँ तुसा गे था, तो तुसा खे इना गल्ला बोलेया करूँ था? 6 तुसा खे ये बी पता ए कि तेस दुष्टो खे एस बखते किने आपणे वशो रे करी राखेया कि से आपणे ठराए रे बखतो पाँदे प्रकट कितेया जाओ। 7 तेस दुष्टो री तागत पईले तेई दुनिया रे गुप्त रूपो रे काम करने लगी री पर से एक ए जो तेसा शक्तिया खे रोकणे लगी रा। से तेस बखतो तक रोकदा रणा जदओ तक कि तिजी खे एसा बाटा ते टाई नि देओ। 8 तेबे से दुष्ट मर्द प्रकट ऊणा, पर प्रभु यीशुए आपणी मुँओ री फूकरा तेई काई देणा। से प्रभुए रे वापस आऊणे रे महिमामय तेजो रे जरिए पूरे

तौरो पाँदे नाश कितेया जाणा। 9 से दुष्ट मर्द शैतानो री तागता साथे आऊणा और तेस सबी प्रकारा री चूठी सामर्थ, बड़े-बड़े चिह्न और अचम्बे रे काम करने। 10 तेस सबी किस्मा रे बुरे काम करने और तिना लोका खे तोखा देणा जो अनन्त विनाशो री बाटा रिये। सेयो लोक नाश ऊणे कऊँकि तिने सच्चो रे प्यारो खे नि मानेया, जेत कि तिना रा उद्धार ऊँदा। 11 इजी बजअ ते परमेशरो तिना खे एक पटकाणे वाली सामर्थ पेजणी ताकि सेयो चूठो रा विश्वास करो। 12 परमेशरो तिना सबी लोका खे सजा देणी जिने सच्चे संदेशो पाँदे विश्वास नि कितेया पर दुष्टता रे कामो ते प्यार कितेया। 13 ओ साथी विश्वासियो, एती तुसा खे परमेशरो रे सामणे आसा रा हमेशा धन्यवाद देणा सई ए। तुसे प्रभुए रे प्यार ए कऊँकि परमेशरे तुसे शुक्रुओ तेई पवित्र आत्मा रे जरिए पापो ते लग करी की और सच्चाईया रे तुसा रे विश्वासो री बजअ ते उद्धारो खे तुसे चुणी लयी रे। 14 परमेशरे तुसे लोक आसा रे ईश्वरीय सुसमाचार सुनाणे रे जरिए उद्धारो खे बुलाई राखे कि तुसे म्हारे प्रभु यीशु मसीह री महिमा रे शामिल ऊई सको। 15 इजी री खातर ओ साथी विश्वासियो, स्थिर रओ और जो-जो गल्ला तुसे क्या वचन, क्या चिट्ठिया रे जरिए आसा ते सीखिया, तिना खे पकड़ी री राखो। 16 आसे प्रार्थना करूँए कि म्हारे प्रभु यीशु मसीह और पिता परमेशरे आपू ई, जिने आसा खे प्यार कितेया और कृपा साथे अनन्त शान्ति और खरी उम्मीद दिती, (aiōnios पग166) 17 तुसा रे मनो खे शान्ति देओ और तुसा खे हर एक खरे कामो रे और वचनो रे मजबूत करो।

3 आखरी रे ओ साथी विश्वासियो, आसा खे प्रार्थना करेया करो कि प्रभुए रा वचन इतणा चट फईलो और महिमा पाओ, जेडा तुसा रे ऊआ 2 ये बी प्रार्थना करो कि परमेशर आसा खे टीठ और दुष्ट लोका ते बचाई की राखो, कऊँकि हर एकी पाँदे विश्वास निए। 3 पर प्रभु विश्वासो जोगा ए, तिना तुसे मजबूतिया साथे खडे करने और तेस दुष्टो ते बचाई की राखणे। 4 आसा खे प्रभुए रे तुसा पाँदे विश्वास ए कि जो-जो आज्ञा आसे तुसा खे देऊँए, तिना खे तुसे मानोए और मानदे बी रणे। 5 आसे प्रार्थना करूँए कि परमेशर तुसा रे दिलो खे ईश्वरीय प्यार और मसीह रे सन्नो री तरफा खे तुसा री अगुवाई करो। 6 ओ साथी विश्वासियो, आसे तुसा खे आपणे प्रभु यीशु मसीह रे नाओं ते आज्ञा देऊँए कि तुसे हर एक एडे विश्वासिये ते लग रओ, जो आलसी बणी की रओआ और जो शिक्षा तिने आसा ते पाई राखी, तिजी रे मुताबिक नि करदा। 7 कऊँकि तुसे आपू ई जाणोए कि तुसा लोका खे कियों आसा री जी चाल चलणी चाईयो। जेबे आसे तुसा बीचे रऊँ थे तो आसे आलस नि कितेया पर मईणत किती। 8 इतणा ई नि, आसे केसी रे एती रोटी मुफ्तो रे नि खाई, पर आसे मईणत और कष्टो साथे रात-दिन काम-तंदा करूँ थे, ताकि तुसा बीचा ते केसी पाँदे बी बोज नि बणूँ। 9 ये इजी खे नि कि तुसा लोका ते मताद पाणी आसा रा अक्क निए, पर इजी खे कि आसे आपू तुसा रे सामणे आदर्श बणीए ताकि तुसे आसा री जी चाल चलो। 10 एथो तक कि जेबे आसे तुसा बीचे थे, आसे तुसा खे ये आज्ञा देऊँ थे, “जे कोई काम नि करना चाओ तो तेसखे रोटी पनि देओ।” 11 आसे सुणूँए कि बरुत लोक तुसा बीचे आलसी बणी की रओए और कुछ काम नि करदे, पर ओरी रे कामो रे रुकावट पाओए। 12 एडेया माणूआ खे आसे प्रभु यीशु मसीह रे आज्ञा देऊँए और बिनती करूँए कि सेयो लगना साथे आपणे कामा पाँदे लगी जाओ और सेयो आपणी ई मईणती ते कमाई की रोटी खाया करो। 13 और तुसे, ओ साथी विश्वासियो, पलाई करने रे इम्मत नि छाडो। 14 जे कोई म्हारी एसा चिट्ठिया री गल्ल नि मानो, तो तेस पाँदे नजर राखो। तेसरी संगति नि करो, ताकि से शर्मिदा ओ। 15 तेबे बी तेसखे बैरी नि समजो, पर साथी विश्वासो समजी की खबरदार करो। 16 आऊँ प्रार्थना करूँआ कि प्रभु जो शान्तिया री सबूल ए, आपू ई तुसा खे सदा और हर प्रकारा री शान्ति देओ। आऊँ प्रार्थना करूँआ कि प्रभु तुसा सबी साथे रओ। 17 आऊँ पौलुस आपणे आथे की नमस्कार लिखूँआ। हर चिट्ठिया रे मेरा ये

चिह्न ए। मां ईयां ई लिखदे रणा। 18 आँऊ प्रार्थना करूँआ कि म्हारे प्रभु यीशु
मसीह री कृपा तुसा सबी पाँदे ऊँदी रओ।

1 तीमथियुस

1 ये चिट्ठी मां पौलुसो री तरफा ते ए। आऊ आपणे उद्धारकर्ता परमेशर और यीशु मसीह री आज्ञा ते यीशु मसीह रा प्रेरित ए, जिदे आसा सबी खे उम्मीद ए। 2 आऊ ये चिट्ठी तीमथियुसो खे लिखणे लगी रा जो विश्वासो रे मेरे सच्चे पाऊए जेड़ा ए। आऊ प्रार्थना करूँआ कि पिता परमेशर और म्हारे प्रभु यीशु मसीह री तरफा ते ताखे कृपा, दया और शान्ति मिलदी रओ। 3 आऊ तांते फेर बिनती करूँआ कि जेड़ा मैं तूँ मक्तिदुनिया प्रदेशो खे जांदि बखते समजयाया था कि तूँ इफिसुस नगरो रे रई की तिना चूठे उपदेश देणे वाले लोका खे आज्ञा दे कि सेयो गलत शिक्षा नि देओ। 4 और तिना मनकडन्त काणियां पाँदे और अनन्त वंशबलिया पाँदे मन लगाई की बखत बर्बाद नि करो। जिने कि बईस ओई और तेस परमेशरो री योजना रा ज्ञान नि मिलदा जो विश्वासो साथे रिश्ता राखोआ। 5 एसा आज्ञा रा मकसद से प्यार ए जो साफ दिल, खरे विवेक और बिना कपटो ते पैदा ओआ। 6 चूठे उपदेश देणे वालेया इना सबी खरे कामा खे करने ते रोकी ता रा और सिर्फ बेकार गल्ला करेया करोए। 7 सेयो चूठे शिक्षक मूसे रा बिधानो रे शिक्षक बणना तो चाओए पर जो गल्ला सेयो बोलीए और जेतेरे बारे रे सेयो मजबूतिया ते बोलीए, सेयो आपू ई तिजी खे समजदे ई नि। 8 आसे सब जाणूए कि मूसे रा बिधान पली ए बशर्ते इजी रा इस्तेमाल सई टंगो रे कित्तेया जाओ। 9 आसे जाणूए कि मूसे रा बिधान तर्मा माणूए खे नि, पर अधर्मा, निरकुंशो, भक्ति ना करने वाले, पापी अपवित्र, और अशुद्ध, माया-बाओ खे काणे वाले, अत्यारे, 10 व्याभिचारी, समलैंगिक, माणूआ खे बेचणे वाले, चूठे और चूठी कसम खाणे वाले और इना खे छाडी कि खरे उपदेशो रे सबी बिरोदिया खे ठराई राखी। 11 येई परमभन्ध परमेशरो री महिमा रे तेस सुसमाचारो रे मुताबिक ए, जो मांगे सम्बाली राखेया। 12 आऊ आपणे प्रभु यीशु मसीह रा जिने माखे सामर्थ दिती, धन्यवाद करूँआ कि तिने माखे विश्वासो जोगा समजी की आपणी सेवा खे ठराई राखेया। 13 आऊ तो पईले निन्दा करने वाला, सताणे वाला और अन्दरे करने वाला था, तेबे बी मां पाँदे कृपा ऊई, कऊँकि मैं अविश्वासो री दशा रे बिना समजी-बुजी की, यो काम कित्ते थे। 14 और म्हारे प्रभुए री कृपा, तेस विश्वास और प्यारो साथे, जो यीशु मसीह रे ए, बऊत जांदा ऊई। 15 ये गल्ल सच और हर प्रकारो ते मानणे जोगी ए कि यीशु मसीह पापिया खे बचाणे दुनिया रे आयी रा और जिना बीचे सबी ते बड़ा पापी आऊँ ए। 16 पर मां पाँदे इजी खे कृपा ऊई ताकि मां सबी ते बड़े पापिए रे मसीह आपणी पूरी सईन शीलता दखाओ ताकि जो लोक तिना पाँदे अनन्त जीवनो खे विश्वास करोगे, तिना खे आऊँ एक आदर्श बणूँ। (aiōnios g166) 17 एबे सनातन राजा अविनाशी, बिना देखे, एक मात्र परमेशरो रा आदर और महिमा जुगो-जुगो तक ऊँदी रओ। आमीन। (aiōn g165) 18 ओ पुत्र तीमथियुस, तिना भविष्यबाणिया रे मुताबिक, जो पईले तेरे बारे रे किन्ती थी, आऊँ ये आज्ञा सम्बालूँआ कि तूँ तिना रे मुताबिक अच्छी लड़ाईया खे लड़दा रओ। 19 और विश्वास और तेस खरे विवेको खे पकड़ी कि राख, जेतेखे दूर करने री बजअ ते बऊत जणेया रा विश्वासो रूपी जाहज डूबी गा 20 तिना बीचा तेई हुमिनयुस और सिकन्दर ए, जो मैं शैतानो गे सम्बाली ते कि सेयो परमेशरो री निन्दा करना नि सीखो।

2 सबी ते पईले आऊ तुसा ते ये आग्रह करूँआ कि सबी लोका खे प्रार्थना करो। परमेशरो ते मांगो कि से तिना री मताद करो और तिना खे आशीष देओ। तिना री तरफा ते बचोलेपणो री प्रार्थना करो। तिना लोका खे परमेशरो रा धन्यवाद करो। 2 राजा और सब ऊच्चे पद वालेया खे इजी री खातर प्रार्थना करो कि आसे आराम और चैना साथे सारी भक्तिया और सई तरके ते जीवन बिताईये। 3 ये म्हारे उद्धारकर्ता परमेशरो खे अच्छा लगेओआ और टब्बो बीया। 4 परमेशर ये चाओआ कि सबी माणूआ रा उद्धार ओ और सेयो सच्चो खे ठीक-टंगो रे पछयाणी लो। 5 कऊँकि परमेशर एक ईए और परमेशर और माणूआ बीचे बी एक ई बचोला ए, मतलब यीशु मसीह, जो

एक माणूए रे रूपो रे पैदा ऊआ। 6 तिने आपणे आपू खे सबी खे छुड़ाणे रे दामो रे देईता। ये सेई संदेश ए जो परमेशरे दुनिया रे लोका खे ठीक बखतो पाँदे देईता। 7 आऊँ सच बोलीँआ, चूठ नि बोलदा कि आऊँ इजी मकसदो ते सुसमाचार प्रचारक, प्रेरित और दूजी जातिया खे विश्वास और सच्चो रा उपदेशक ठराया। 8 आऊँ चाऊँआ कि हर जगा रे मर्द बिना रोषो रे और बिना बईसी ते पवित्र आथो खे चकी कि प्रार्थना करेया करो। 9 तियाँ ई आऊँ ये बी चाऊँआ कि जवाणसा शर्म और संयमो साथे, सुहावने टालेया ते आपणे आपू खे सजाओ, ना कि बालूँ दूँणे, सूईने, मोतियो ते और किमती टालेया ते, 10 पर खरे कामो ते। कऊँकि परमेशरो री भक्ति करने वाली जवाणसा खे येई ठीक बीए। 11 जेबे कोई मर्द विश्वासिया खे सिखाणे लगी रा ओ तो जवाणसा खे चुपचाप पूरी अधीनता साथे सिखाणा चाईयो। 12 मेरी आज्ञा नि ए कि जवाणस मर्दो खे उपदेश देओ और ना मर्दो पाँदे अक्क जताओ। जेबे आराधना रे कट्टे ओए तो सारिया जवाणसा चुपचाप रओ। 13 कऊँकि आदम पईले, तिजी ते बाद हव्वा बणाई। 14 इजी ते अलावा, से हव्वा ई थी जो शैतानो रे तोखे रे आई, ना कि आदम। ईयाँ हव्वा परमेशरो री आज्ञा खे तोड़ी की अपरादान ऊई। 15 तेबे बी जवाणसा बच्चा पैदा करने ते उद्धार पाणा, जे सेयो सब्रो साथे विश्वास, प्यार और पवित्रता रे बणी री रओ।

3 ये गल्ल सच्चो ए कि जो मण्डलिया रा अगुवा ऊणा चाओआ, तो से खरे कामो री इच्छा करोओ। 2 तो ये जरूरी ए कि मण्डलिया रे अगुवेया खे निर्दोष, एक ई लाडिया रा लाड़ा, सब्रखोर, सुशील, आदरो जोगा, पराऊणचारी करने वाला और सिखाणे रे निपुण ऊणा चाईयो। 3 से पियक्कड़ या मारपीट करने वाला नि ओ, बल्कि नम्र और शान्त ओ और चगड़ा करने वाला या लालची नि ओ। 4 आपणे कअरो रा अच्छा इन्तजाम करने वाला ओ और बाल-बच्चेया खे सारी गम्भीरता ते अनुशासनो रे राखणे वाला ओ। 5 जेबे कोई माणू आपणे ई कअरो रा इन्तजाम करना नि जाणो, तो परमेशरो री मण्डलिया री रखवाली कियौं करनी? 6 फेर ये कि मण्डलिया रा अगुवा नया विश्वासी नि ओ, एड़ा नि ओ कि कमण्ड करी की शैतानो रा जा दण्ड पाओ। 7 और ये बी जरूरी ए कि मण्डलिया ते बारे से आदरो जोगा ओ, एड़ा नि ओ कि निन्दित ऊई कि शैतानो रे फंदे रे फसी जाओ। 8 तेड़ा ई सेवको खे बी गम्भीर ऊणा चाईयो, दोगला, पियक्कड़ और नीच कमाईया रा लोबी नि ओ। 9 पर विश्वासो रे पेलो खे शुद्ध विवेको साथे सुरक्षित राखो। 10 और ये बी पईले ई परखेया जाओ, तेबे जे निर्दोष निकलो, तो सेवको रा काम करो। 11 ईयाँ ई तिना री जवाणसा बी आदरो जोगिया ओ, ओरी री बुराई करने वाली नि ओ, पर सब्रो वाली और सबी गल्ला रे विश्वासो जोगी ओ। 12 सेवक एक ई लाडिया रा लाड़ा ओ और बाल-बच्चे और आपणे कअरो रा अच्छा परबंद करना जाणदे ओ। 13 कऊँकि जो सेवको रा काम ठीक टंगो रे करी सकोए, सेयो आपू खे अच्छा पद और यीशु मसीह रे आपणे विश्वासो रे बारे रे बडिया इम्मता साथे बोलणे जोगे ऊई जाओए। 14 आऊँ तांगे चट आऊणे री उम्मीद राखणे पाँदे बी, इना गल्ला इजी खे लिखूँआ 15 कि जे मेरे आऊणे रे देर ऊई जाओ, तो तूँ जाणी लो कि परमेशरो रे कराने रे लोका रा बर्ताओ केड़ा ऊणा चाईयो। परमेशरो रा कराना जिऊँदे परमेशरो री मण्डली ए और सच्चो रा खम्बा और निऊँ ए। 16 इदे शक नि ए कि भक्तिया रा पेट गम्भीर ए, मसीह माणूआ रे रूपो रे प्रगट ऊआ, पवित्र आत्मा रे जरिए सच साबित ऊआ, और स्वर्गदूता खे दिशेया। दूजी जातिया रे तेसरा प्रचार ऊआ, दुनिया रे तेस पाँदे विश्वास कित्तेया और महिमा रे ऊबे चकेया।

4 एबे पवित्र आत्मा साफ-साफ बोलीओ कि आखरी बखतो रे कुछ लोका विश्वास करना छाडी देणा। तिना लोका भरमाणे वाली आत्मा और दुष्टात्मा री शिक्षा पाँदे मन लगाणा। 2 ये तिना चूठे शिक्षका री चूठी शिक्षा री बजअ ते ऊणा। तिना लोका रा विवेक जो सई गलत कामा बीचे फँसला करोओ ईयाँ मरी चुकेया रा जिंयां मानो बलदे ऊए लोए की डामी राखेया

ओ। 3 एड़े लोका एड़ी शिक्षा देणी कि ब्या करना गलत ए और रोटिया री कुछ चीजा ते पोरे रणे री आज्ञा देणी। पर परमेशरो ए रोटी इजी खे बणाई कि विश्वासी और सच्चो खे पछयाणने वाले तिजी खे धन्यवादो साथे खाओ। 4 कऊँकि परमेशरो री बणाई री हर एक चीज खरी ए और आसे कुछ बी खाई सकूँए, पर ये कि परमेशरो खे धन्यवाद करी की खाई जाओ। 5 कऊँकि सेयो चीजा परमेशरो रे वचने की और प्रार्थना साथे परमेशरो खे मानणे जोगी ऊई जाओईया। 6 ओ तीमथियुस जे तूँ लगातार विश्वासिया खे इना गल्ला रे बारे रे बतादा रएगा, तो यीशु मसीह रा अच्छा सेवक ठईरना और विश्वास और तेस खरे उपदेशो री गल्ला ते, जिना खे तूँ मानदा आयी रा, तेरा पालण-पोषण ऊँदा रणा। 7 पर बणावटी और मूर्खता री काणियां ते दूर रओ, इजी रे बदले तुसे आपणे आपू खे परमेशरो री भक्तिया खे त्यार करो। 8 कऊँकि शरीरो रे री कसरता ते कम लाब ओआ, पर भक्ति सबी गल्ला खे लाबदायक ए, कऊँकि एस बखतो री और आऊणे वाले जीवनो रा बी येई वादा ए। 9 ये गल्ल सच और हर प्रकारो ते मानणे जोगी ए। 10 येई बजअ ए कि आसे कड़ी मईणत और कोशिश करदे रऊँए, कऊँकि आसे लोके जिऊँदे परमेशरो पाँदे परोसा राखी राखेया, जो सबी मांणूआ रा और खास करी की विश्वासिया रा उदारकर्ता ए। 11 इना गल्ला री मानणे री आज्ञा दे और सखयांदा बी रओ। 12 तुसा रा चाल-चलण पड़ा ओ कि जवान ऊणे पाँदे बी कोई तुसा खे तुच्छ नि समजो। पर आपणी गल्ला रे और चाल-चलणो रे, प्यार और विश्वासो रे और पवित्रता रे मसीह विश्वासिया खे उदारण बणी जा। 13 जदुओ तक आऊँ नि आऊँ, तदुओ तक मण्डलिया रे पवित्र शास्त्रो खे पढ़ने, उपदेश देणे और सखयाणे रे लगेया रा रओ। 14 तेस आत्मिक बरदानो खे जो तांदि मौजूद ए नजर अंदाज नि कर, जो ताखे भविष्यबाणिया रे जरिए, तेस बखते दित्तया था जेबे मण्डलिया रे बुजुर्गो तां पाँदे आथ राखे थे। 15 तिना गल्ला खे करदा रओ, और इना रेई आपणा न्यायन लगाई राख ताकि सब लोक देखी सको कि विश्वासो रे तेरी तरक्की ऊणे लगी री। 16 इना गल्ला रे चौकस रओ कि तेरा चाल चलण केड़ा ए और क्या उपदेश देणे लगी रे। इना गल्ला रे स्थिर रओ, कऊँकि जे एड़ा करदा रएगा, तो तूँ आपणे और आपणे सुणने वाले खे बी बचाणे री बजअ ऊणा।

5 केसी बी सयाणे मांणूए खे बेज्जतिया रे नजरिए ते नि बक, पर तेसखे पिता जी समजी की समजया। जवाना खे पाई मानी की समजा। 2 स्याणी जवाणसा खे माए समजी की और जवान जवाणसा खे पूरी पवित्रता ते बईण समजी की समजया। 3 तिना बिदुआ रा, जो सच्चो खेई बिदुआ ए, आदर और मताद करो। 4 और जे केसी बिदुआ रे बच्चे या दोईते-पोते ओ, तो सेयो पईले आपणे ई कराने साथे आपणी जिम्मेवारी नबाई की परमेशरो रा भगत ऊणा सीखो और आपणे माए-बाओ री देखपाल करी की कर्ज चुकाओ। कऊँकि परमेशरो खे येई अच्छा लगोआ। 5 से जो सच्चो खेई बिदुआ ए और तेसा रा कोई निए, से परमेशरो पाँदे ई उम्मीद राखोई। से दिन-रात बिनती और प्रार्थना करदी रओई और परमेशरो ते मताद मांगदी रओई। 6 पर से बिदुआ जो भोग-विलासो रे पड़ी गी, से जिऊँदे जिऊए ई मरी गी री। 7 इना गल्ला री बी आज्ञा देया कर, ताकि सेयो निर्दोष रओ। 8 पर जे कोई आपणेया री और खास करी की आपणे परिवारो री देखपाल नि करो, तो से विश्वासो ते मुकरी गा रा और अविश्वासिया ते बी बुरा बणीगा रा। 9 बिदुआ री सूचिया रे सिर्फ तेसा रा ई नाओं लिखेया जाओ, जो साठा साला ते कम नि ओ और जो आपणे लाड़े रे विश्वासो जोगी रई ओ। 10 और से खरे कामा रे सुनाम रई ओ, जेसे बच्चे ठीक टंगो रे पाली राखे ओ, पराऊणेया री आओ-बैठ करी राखी ओ, परमेशरो रे लोका रे पैर तोए ओ, दुः खिया री मताद किन्ती ओ और हर एक खरे कामो रे मन लगाया ओ। 11 तेसा सूचिया रे जवान बिदुआ रे नाओं नि लिखणा, जो मसीह रा बिरोद करी की सुख-बिलासो रे पड़ी जाओईया और ब्या करना चाओईया। 12 सेयो दुबारा ब्या करी की आपू खे दोषी ठराओईया, कऊँकि तिने ब्या ना करने रा वादा तोड़ी ता। 13 और इजी साथे-साथे सेयो कअरे-कअरे फिरी की आलसी ऊणा

सिखोईया। सेयो बस आलसी ई नि, पर ओरी रे बारे रे बक-बक करदिया रओईया और ओरी रे कामो रे आथ बी पाओईया और बेटंगी गल्ला करोईया। 14 इजी री खार आऊँ ये चाऊँआ कि जवान बिदुआ ब्या करी लो और बच्चे पैदा करो और कअर बार सम्बालो और केसी बी बिरोदिया खे बदनाम करने रा मोका नि देओ। 15 कऊँकि कई जणियां तो बईकि की शैतानो पीछे ऊई चुकी रिया। 16 जे केसी विश्वासणिया रे कअरे कोई बिदुआ ओ, तो सेयो ई तिना री मताद करो ताकि मण्डलिया पाँदे बोज नि ओ। तेबे मण्डलिया तिना बिदुआ री मताद करनी, जो सच्चो खेई कल्ले ए। 17 मण्डलिया रे बुजुर्ग जो आपणा काम ठीक टंगो रे करोआ तिना खे सई आदर और सई मजदूरी दिती जाओ, खास करी की सेयो जो परमेशरो रा वचन सिखाणे और प्रचार करने रे कड़ी मईणत करोए। 18 कऊँकि पवित्र शास्त्रो रे लिखी राखेया, “जोड़े रे बलदा रा मूँ नि बानो,” पवित्र शास्त्र एक ओरी जगा बोलोआ, “मजदूदार आपणी मजदूरिया रा अक्कदार ए।” 19 मण्डलिया रे केसी बी बुजुर्गो रे खलाफ आरोप नि सुणो। जदुओ तक दो या तीन गवा तेसखे ये नि बोले कि तिने कुछ गलत करदे देखी राखेया। 20 पर पाप करने वालेया मण्डलिया रे तिना बुजुर्गो खे सबी सामणे समजयाई दे, ताकि ओर लोक बी पाप करने ते दरो। 21 ओ तीमथियुस, आऊँ ताखे परमेशर, यीशु मसीह और चूणे रे स्वर्गदूता खे आजीर जाणी कि खबरदार कऱँआ कि तूँ दिल खोली कि इना गल्ला खे मानेया कर और केसी साथे पक्षपात नि कर। 22 मण्डलिया रे अगुवा बानणे खे केसी पाँदे फटाफट आथ नि राखणा। जे तुसे बिना सोचे बिचारे तेस पाँदे फटाफट आथ राखी कि तेसखे अगुवा बणाओए और से पाप करो तो एड़ा करने पाँदे तुसे बी तेसरे पापो रे शामिल ओए। आपणे आपू खे पवित्र बणाई कि राख। 23 एबुए ते बस पाणिए खेई पीणे वाला नि रओ, पर आपणे पेटो रे और आपणे बार-बार बमार ऊणे री बजअ ते, थोड़ा-थोड़ा दाखरस बी कामो रे ल्याया कर। 24 आऊँ तुसा खे बोलूँआ कि अगुवा बानणे रे जल्दी नि करो कऊँकि कुछ लोक सामणे-सामणे पाप करोए। एथो तक कि न्याय ऊणे ते पईले ई सेयो लोक विश्वासिया रे सामणे साफ तौरो पाँदे दोषी ए। हालाँकि कुछ लोका रे पाप पईले सामणे नि आऊँदे पर बादो ते सामणे आई जाओए। 25 तियाँ ई जेबे कुछ लोक खरे काम करोए तो ओरी विश्वासिया रे जरिए साफ-साफ दिशोए। एथो तक कि जे सेयो साफ-साफ नि दिशो तेबे बी तिना रे जरिए महसूस किन्ते जाओए।

6 सेयो सब विश्वासी जो केसी रे गुलाम ए सेयो आपणे-आपणे मालको खे बडे आदरो जोगा जाणो ताकि परमेशरो रे नाओं री और आसे रे उपदेशो री निन्दा नि ओ। 2 जेस गुलाम विश्वासिये रा मालक बी विश्वासी ए तो से गुलाम आपणे मालको खे इजी बजअ ते तुच्छ नि समजो कि तेसर मालक बी मेरे जेड़ा विश्वासी ए। बल्कि से एबे तिना री सेवा ओर बी मन लगाई कि करो। कऊँकि जो तिना रे कामो ते फायदा पाओए सेयो साथी विश्वासी ए जिना ते सेयो प्यार करोए। इना गल्ला रे उपदेश करेया कर और इजी खे मानणे खे समजयांदा रओ। 3 जे कोई ओरी प्रकारा रा उपदेश देओआ और म्हारे प्रभु यीशु मसीह रे जरिए दिती री शिक्षा और परमेशरो री भक्तिया री शिक्षा ते सईमट नि ऊँदा, 4 तो से बऊत कमण्डी ऊईगा-और कुछ नि समजदा। एड़े लोका खे बईस और बेकारो रे शब्दा पाँदे तर्क-वितर्क करने रा रोग ए, इना गल्ला ते डाह, चगड़े, निन्दा री गल्ला और बुरे-बुरे शक पैदा ओए 5 इना लोका बीचे बेकार लड़ाई-चगड़े पैदा ओए। जिना रा दमाक खराब ऊईगा रा और सेयो सच्चाईया ते दूर ऊईगे रे। सेयो लोक समजोए कि परमेशरो री सेवा करना पैसा कमाणे रा जरिया ए। 6 पर आसा खे येई अच्छा ए कि आसे सेई करिए जो परमेशरो खे अच्छा लगोआ और तिदे ई सन्तुष्ट रईए जो परमेशर आसा खे देओआ। 7 कऊँकि ना आसे दुनिया रे कुछ ल्याए और ना ई कुछ लयी जाई सकूँए। 8 और जे आसा गे खाणे खे और पईनणे खे आए, तो इना रेई सन्तुष्टी करनी चाईयो। 9 पर जो अमीर ऊणा चाओए, सेयो एड़ी परीक्षा और फंदे रे, बऊत मूर्खता और आनिकारक लालसा रे फसोए, जो मांणूआ खे बिगाड़ी देओईया और

नाशो रे समुद्रो रे डूबाई देओईया। 10 कऊँकि पैसे रा लालच सब प्रकारा री बुराईया री जड़ ए। इजी रे लालचो रे पड़ी की कुछ लोक तो विश्वासो ते पटकी गे और आपणे आपू खे कई प्रकारो रे दुः खो री छानणी बणाईता रा। 11 पर ओ तीमुथियुस परमेशरो रे सेवक, तूँ इना सबी बुरे कामा खे करने ते दूर नठ। जो सई काम ए तिजी खे हर तरअ ते करने री कोशिश कर। एड़ी जिन्दगी जी जेते की परमेशरो खे आदर मिलो। मसीह पाँदे परोसा राख। ओरी लोका साथे प्यार कर। मुसीबत आऊणे पाँदे इम्मत राख। ओरी लोका साथे नरमाईया साथे बर्ताव कर। 12 जियाँ एक अच्छा सिपाई जो आपणी लड़ाई नि छाडदा तियाँ ई तूँ बी आपणे परमेशरो पाँदे परोसा करना ओर तिना री आज्ञा मानणा नि छाड। तेस अनन्त जीवनो खे पकड़ी की राख, जेतेरी खातर तूँ बुलाई राखेया और बऊत सारे लोका सामणे अंगीकार कितेया था कि तुसे मसीह पाँदे विश्वास कितेया था। (aiōnios g166) 13 परमेशरो खे आजीर जाणी की जो सबी खे जिन्दगी देओआ और यीशु मसीह खे आजीर जाणी की जिने राज्यपाल पुन्तियुस पिलातुसो रे सामणे अच्छी गवायी दिती थी आऊँ तुसा खे ये आज्ञा देऊँआ 14 कि तूँ म्हारे प्रभु यीशु मसीह रे दुबारा वापस आऊणे तक निष्कलंक और निर्दोष रूपो ते आपणी जिम्मेवारी नबा। 15 परमेशर एक मात्र अधिपति जो तारीफा जोगा ए, से राजेया रा राजा और प्रभुए रा प्रभु ए तेस ई यीशु मसीह ठीक बखतो पाँदे प्रकट करने। 16 अमर सिर्फ सेईए जो अगम्य जोतिया रे रओआ और ना तो से किने माणूए देखेया और ना ई कदी देखी सकेओ। तेसरी प्रतिष्ठा और राज्य जुगो-जुगो तक ऊँदा रणा। आमीन्। (aiōnios g166) 17 एसा दुनिया रे अमीरा खे आज्ञा दे कि सेयो कमण्ड नि करो और नाशवान पैसे पाँदे उम्मीद नि राखो, पर सिर्फ परमेशरो पाँदे उम्मीद राखो जो म्हारे सुखो खे सब कुछ बऊत जादा देओआ। (aiōn g165) 18 तिना लोका खे ये आज्ञा देओ कि सेयो पले काम करो और खरे कामो रे अमीर बणो और उद्धार और मताद करने रे आगे रओ। 19 ईयाँ तिना आपू खे एड़ा पैसा कट्टा करना जेते की आऊणे वाली जिन्दगिया खे एक खरी निऊँ पाई सको जेतेरे जरिए तिना असली जिन्दगी पाणी। 20 ओ तीमुथियुस, एसा अमानता री रखवाली कर जो परमेशरे तांगे सम्बाली राखी। जेस ज्ञानो खे ज्ञान बोलणा ई पूल ए, तिजी री अशुद्ध बकवास और बिरोदो रिया गल्ला ते दूर रओ। 21 कुछ लोक एस चूटे ज्ञानो खे मानी की और तिजी रे मुताबिक काम करी की मसीह रे विश्वासो ते पटकी गे रे। आऊँ प्रार्थना कर्हूँआ कि परमेशरो री कृपा तुसा पाँदे ऊँदी रओ।

2 तीमुथियुस

1 ये चिट्ठी मां पौलुसो री तरफा ते ए। परमेशरे आऊं यीशु मसीह रा प्रेरित करी कि चुणी राखेया ताकि आऊं तेस संदेशो रा प्रचार करी सकूँ जेते कि अनन्त जीवन देणे रा वादा परमेशरे करी राखेया जो यीशु मसीह पाँदे विश्वास करने ते मिलोआ। 2 आऊं ये चिट्ठी तीमुथियुसो खे लिखणे लगी रा जो विश्वासो रे मेरे सच्चे पाऊए जेड़ा ए। आऊं प्रार्थना कर्हूआ कि परमेशर पिता और म्हारे प्रभु यीशु मसीह री तरफा ते ताखे कृपा, दया और शान्ति मिलदी रओ। 3 ओ तीमुथियुस, आऊं दिन-रात आपणी प्रार्थना रे ताखे याद करदे ऊए परमेशरो रा धन्यवाद कर्हूआ, जिना री सेवा आऊं आपणे बाप-दादेया री रवाजा पाँदे शुद्ध विवेको ते कर्हूआ। 4 और तेरे आसूआ खे याद करी-करी की, दिन-रात तां साथे मिलणे री लालसा कर्हूआ ताकि आऊं खुश ऊई जाऊँ। 5 और माखे तेरे तेस निष्कपट विश्वासो री याद आओई, जो पईले तेरी नानी लोईस और तेरी आम्मा यूनीके रा था और माखे निश्चय ए कि ताँदे बीए। 6 इजी बजअ ते आऊँ ताखे याद दलाऊँआ कि परमेशरो रे तेस बरदानो रा इस्तेमाल कर, जो मेरे आथ राखणे ते ताखे मिली रा। 7 परमेशर आसा खे डरपोक नि बणांदा। बल्कि तेसरा आत्मा आसा खे मजबूत बणाओआ, से आसा खे ओरी साथे प्यार करने और सब्र राखणे रे मताद करोआ। 8 इजी री खातर ओ तीमुथियुस, तूँ ना तो आसा रे प्रभु यीशु मसीह री गवाई देणे ते शर्मिंदा ओ और ना ई मांते जो तेसरा कैदी ए शर्मिंदा ओ। पर परमेशरो री सामर्थ्य पाँदे परोसा राखी की तूँ मां साथे सुसमाचारो री खातर दुःख उठांदा रओ। 9 परमेशरे आसा रा उद्धार करी राखेया और पवित्र जिन्दगी जिऊणे खे बुलाई राखेया। तिने ये म्हारे केसी कामो रे मुताबिक नि, पर आपणे मकसदो और आपणी कृपा ते एड़ा करी राखेया। से कृपा सनातनो तेई यीशुए मसीह रे जरिए आसा खे राखी री थी। (aiōnios g166) 10 पर एबे म्हारे उद्धारकर्ता यीशु मसीह रे प्रगत ऊणे रे जरिए प्रयासा ऊआ। यीशुए मौता रा नाश कित्तेया और जीवन और अमरता खे तेस सुसमाचारो रे जरिए प्रकाशमान करी ता। 11 जेतेरी खातर आऊँ सुसमाचार प्रचारक, प्रेरित और उपदेशक बी ठईरिया। 12 इजी बजअ ते आऊँ एती कैदा रे दुःख उठाणे लगी रा पर आऊं इजी ते शर्मिंदा नि ऊँदा कऊँकि आऊँ मसीह खे जाणूआ जेस पाँदे मैं परोसा करी राखेया। माखे ये पूरा निश्चय ए कि से तेस दिनो तक मेरी अमानता री रखवाली करने रे पूरी तरअ सामर्थ्य ए। 13 जो सच्ची शिक्षा तै मांते पाई राखी तिना खे तेस विश्वासो और प्यारो साथे जो यीशु मसीह रे ए, आपणा आदर्श बनाई कि राख। 14 और पवित्र आत्मा री सामर्थ्य रे जरिए जो आसा रे बसी रा, तेसा अच्छी अमानता री रखवाली कर जो तांगे परमेशरे सम्बाली राखेया। 15 तूँ जाणेया कि आसिया प्रदेशो रे रणे वाले बऊत सारे विश्वासिये आऊं छाडीता रा, जिना बीचे फूलियुस और हिस्मुगिनेस बी ए। 16 आऊं प्रार्थना कर्हूआ कि प्रभु उनेसिफूरुस रे कराने पाँदे दया करो। कऊँकि तिने बऊत बार मेरा कालजा ठण्डा कित्तेया और मांते शर्मिंदा नि ऊआ जेबे आऊं जेला रे था। 17 पर जेबे से रोम नगरो रे आया, तो बडी कोशिसा साथे टोली की मां साथे मिलेया। 18 आऊं प्रार्थना कर्हूआ कि प्रभु न्याय रे दिना रे उनेसिफूरुसो पाँदे आपणी बडी दया दखाओ। ओ तीमुथियुस, जो-जो सेवा उनेसिफूरुसे इफिसुस नगरो रे किन्ती, तिजी खे बी तूँ ठीक टंगो रे जाणोआ।

2 ओ मेरे पाऊ तीमुथियुस, तूँ तेसा कृपा ते, जो यीशु मसीह रे ए, तागतबर ऊई जा। 2 तै मसीह रे बारे से शिक्षा मांते बऊत गवाओ रे सामणे सुणी राखेया। तेबेई आऊं चाऊँआ कि सेई शिक्षा तिना विश्वासो जोगे लोका खे सखेया जो ओरी खे बी सखेयाणे जोगे ओ। 3 यीशु मसीह रे खरे योद्धा जेड़े, मां साथे दुःख उठा। 4 जेबे कोई सिपाई लड़ाईया खे जाओआ, तो इजी री खातर जाओआ कि जिने से परती करी राखेया, तेसखे खुश करो और आपू खे दुनिया रे कामो रे नि फसांदा। 5 तेबे अखाड़े रे लड़ने वाला जे नियमो रे मुताबिक नि लड़ो, तो मुकुट नि पाँदा। 6 जो जिम्मीदार मईणत करोआ,

फलो रा पाअग पईले तेसखे मिलणा चाईयो। 7 तूँ मेरी शिक्षा पाँदे बिचार कर। प्रभुए ताखे हर गल्ला री समज देणी। 8 यीशु मसीह खे याद राख, से दाऊदो रे वंशो ते ऊआ। परमेशरे से मरे रेया बीचा ते जिऊँदा कित्तेया और ये सेई सुसमाचार ए जो आऊं लोका बीचे प्रचार कर्हूआ। 9 तेसी सुसमाचारो खे प्रचार करने री खातर आऊँ कुकर्मियो जेड़ा दुःख उठाऊँआ, एथो तक कि आऊं कैद बीए। पर कोई बी केसी खे परमेशरो रा वचन प्रचार करने ते रोकी नि सकदा। 10 इजी बजअ ते आऊँ चूणे रे लोका रे फाईदे खे इतणा दुःख सईन कर्हूआ, ताकि सेयो बी तेस उद्धारो खे जो यीशु मसीह रे ए, अनन्त महिमा साथे पाओ। (aiōnios g166) 11 ये गल्ल सच्ची ए कि जे आसे तेस साथे मरी गे रे, तो तेस साथे जिऊणे बी। 12 जे आसे सब्रो साथे दुःख सईन करदे रऊँगे, तो तेस साथे राज्य बी कर्हूगे, जे आसे तेसरा इन्कार कर्हूगे, तो तेस बी म्हारा इन्कार करना। 13 जे आसे मसीह साथे विश्वासघात कर्हूए, तेबे बी मसीह आसा खे विश्वासो जोगा बणे रा रओआ, कऊँकि से आपू ई आपू खे ना नि करी सकदा। 14 सबी लोका खे इना ई गल्ला री याद दलांदा रओ। परमेशरो रे सामणे सबी लोका खे सावधान करी दे कि सेयो शब्दो पाँदे तर्क-वितर्क नि करेया करो। इना गल्ला साथे कुछ लाभ नि ऊँदा, बल्कि इजी ते सुणने वालेया रा नाश ऊई जाओए। 15 आपणे आपू खे परमेशरो खे ग्रहण करने जोगा और एच्चा काम करने वाला ठराणे री कोशिश कर, जो शर्मिंदा नि ओ और जो सच्यो रे वचनो खे ठीक टंगो रे कामो रे ल्याओआ। 16 बेकारो री और मूर्खता री गल्ला ते बचे रा रओ, कऊँकि एड़े लोक ओर बी अभक्तिया रे बड्दे जाणे। 17 एडिया गल्ला सड़े रे जख्मो जेडिया फैलदिया जाणिया। हुमिनयुस और फिलेतुस तिना बीचा तेई एक ए। 18 इने लोके सच्चाईया पाँदे विश्वास करना छाडीता रा। सेयो बोलोए कि परमेशरे मरे रेया विश्वासिया खे अनन्त जिन्दगी देणे खे पईले ई जिऊँदा करी ता रा। नतीजन सेयो कुछ विश्वासिया खे मसीह पाँदे विश्वास करने ते रोकणे लगी रे। 19 पर परमेशरे जो पक्की निऊँ पाई राखी से मजबूत ए। तिजी पाँदे ये छाप लगी री, “प्रभु तिना लोका खे पछयाणोआ जो तिना रे आपणे ए,” और “जो कोई प्रभुए रा नाओँ लओआ, से पापो ते दूर रओ।” 20 केसी बी बडे कअरो रे ना सिर्फ सुईने-चाँदिए रेई, पर लकडी और माटिया रे बी पांडे ओए। कोई-कोई पांडे खास मकसदो खे और कोई-कोई आम इस्तेमालो खे ओए। 21 ईयां ई विश्वासी बी जो आपणे आपू खे तिना सारी बुरिया गल्ला ते लग राखेया तो से बी तेस किन्ती पांडे जेड़ा ठईरना जो खास मकसदो खे इस्तेमाल लोओ। तेसरी जिन्दगी पवित्र और आपणे मानलको खे हर पले कामो रे इस्तेमाल ऊणी। 22 ओ तीमुथियुस, जवानिया री बुरी इच्छा ते नठ। बल्कि तिना सबी लोका साथे धार्मिकता, विश्वास, प्यार और मेल-जोलो रा पीछा कर जो साफ दिलो ते प्रभुए रा नाओँ लओए। 23 आऊं फेर बोलूँआ मूर्खता और अनपढ़ता री बईसी ते दूर रओ, कऊँकि तूँ जाणेया कि तिना ते चगड़े ओए। 24 और प्रभुए रे दासो खे चगड़ालु नि ऊणा चाईयो, बल्कि सबी साथे मिलणसार, सईनशील और शिक्षा देणे रे निपुण ऊणा चाईयो। 25 और बिरोदिया खे नरमाईया रे समजयाओ, बया पता परमेशर तिना खे मन फिराणे रा मन देओ कि सेयो बी सच्यो खे पछयाणो। 26 सेयो सचेत ऊई जाओ और शैतानो रे तेस फंदे ते छूटी जाओ जिदे शैताने तिना खे आपणी इच्छा पूरी करने खे जकड़ी राखेया।

3 ओ तीमुथियुस, ये समजी लओ कि अंतो रे दिनो रे मसीह रे वापस आऊणे ते पईले कठण बखत आऊणा। 2 लोक मतलबी, पैसेया रे लोबी, त्वालिंया मारने वाले, कमण्डी और निन्दा करने वाले ऊणे। तिना आपणे माया-बाओ रा कईण नि मानणा। सेयो लोक मतलबी और अपवित्र ऊणे। 3 सेयो लोक दया ना करने वाले, माफ ना करने वाले, ओरी पाँदे दोष लगाणे वाले और सब्र ना राखणे वाले ऊणे। सेयो लोक कठोर और अच्छाईया ते बैर राखणे वाले ऊणे। 4 सेयो लोक विश्वासघाती, उतावले और कमण्डी ऊणे। सेयो लोक परमेशरो खे नि बल्कि सुख बिलासो खेई चाणे वाले ऊणे। 5 तिना भक्तिया रा पेश तो तरना, पर तिजी री सामर्थ नि मानणी

जो तिना री जिन्दगिया खे बदली सकोई। एड़ेया माणूआ ते दूर रणा। 6 इना ई बीचा ते सेयो लोक ए, जो कअरे दवे पैरे कूसी कि आयी जाओए और तिना कमजोर जवाणसा खे वशो रे करी लओए, जो पापो ते दबी रिया और हर प्रकारा रिया बुरी इच्छा रे वशो रेईया। 7 एड़िया जवाणसा सदा नईया-नईया गल्ला सीखदिया तो रओईया, पर परमेशरो रे सच्चे संदेशो खे कदी नि समजी सकदिया। 8 जियां यन्नेसे और यम्ब्रसे मूसे रा बिरोद कित्तेया था, तियां ई यो लोक बी सच्चो रा बिरोद करोए। यो तो एड़े माणू ए जिना री बुद्धि प्रष्ट ऊईगी री और तिना रा विश्वास दखावटी ए। 9 पर इना खे कामयाबी नि मिलणी कऊँकि जेडी यन्नेस और यम्ब्रसी री मूर्खता सबी माणूआ सामणे आईगी थी, तेडी ई इना री मूर्खता बी सामणे आई जाणी। 10 पर ओ तीमुथियुस, तू पक्का ई जाणोआ कि आँऊ क्या उपदेश देऊँआ और आँऊ कियां रऊँआ, मेरी जिन्दगिया रा मकसद क्या ए और आँऊ क्या विश्वास करूँआ। तू मेरे सन्न, प्यार और सईन शीलता खे तो जाणेया। 11 तू ये बी जाणेया कि अन्ताकिया, इकुनियुम और लुस्त्रा जेडे नगरा रे मां पाँदे कितणा अत्याचार ऊआ और माखे दुःख दित्ते। मैं कितणे अत्याचार सईन कित्ते पर प्रभु तिना सबी ते मेरी रक्षा करदा रया। 12 ये बात सच ए कि जितणे यीशु मसीह रे भक्तिया साथे जीवन बिताणा चाओए, सेयो सब सताए जाणे। 13 पर दुष्ट लोक और बईकाणे वाले तोखा देँदे ऊए और आपू तोखा खाँदे ऊए लगातार नाशो रे गड्डे रे पड़दे जाणे। 14 पर जेथो तक तेरा सवाल ए तू इना गल्ला खे जो तै सीखी राखिया लगातार विश्वासो जोगा बणेया रा रओ और तिदे विश्वास करदा रओ। याद राख कि तै किना लोका ते यो गल्ला सीखिया थिया। 15 और बचपनो तेई तू पवित्र शास्त्रो खे जाणेया। ये ताखे मसीह पाँदे विश्वास करने ते, उद्धार पाणे खे अक्लमंद बणाई सकोआ। 16 पूरा पवित्र शास्त्र परमेशरो री प्रेरणा ते रचेया राए। ये पवित्र शास्त्र उपदेश देणे, गलती करने पाँदे डाँटणे खे, सुदारने और धार्मिकता री शिक्षा खे फायदेमंद ए। 17 ताकि परमेशरो रा जन हर एक खरे कामो खे करने जोगा बणो और त्यार रओ।

4 आँऊ तुसा खे परमेशर और यीशु मसीह खे गवा करी की जेस जिऊँदे और मरे रेया रा न्याय करना और तेसरे राजे रे रुपो रे राज्य करने आऊणे री याद दलाई कि चेतावणी देऊँआ 2 कि परमेशरो रे वचनो रा प्रचार कर। बखत और बेबखत सदा त्यार रओ, सबी प्रकारा री सईन शीलता और शिक्षा साथे लवामे दे और बक और समजया। 3 कऊँकि एड़ा बखत आऊणा कि लोका खरा उपदेश नि सईणा, और आपणी मन पसंद गल्ला खे सुणने और तिना ते खुश ऊणे खे आपू खे बऊत उपदेशक कट्टे करी लणे। 4 तिना लोका सच्चाई नि सुणनी पर मनकइन्त काणियां पाँदे मन लगाणा। 5 पर तू सबी गल्ला ते सावधान रओ, प्रभुए खे दुःख सईन करी लओ, सुसमाचार प्रचारो रा काम कर और आपणी सेवा पूरी कर। 6 आँऊ ये आज्ञा तुसा खे इजी खे देऊँआ कि मेरी जिन्दगी और परमेशरो रा काम पईले ई खत्म ऊणे लगी रा कऊँकि आऊँ जाणूँआ कि मेरी मौत नेडे ए। 7 आऊँ अच्छी लड़ाई लडी चुकी रा, मैं आपणी दौड़ पूरी करी ली री, आऊँ आखरी तक विश्वासो जोगा बणेया रा रया। 8 एबे प्रभुए स्वर्गो रे माखे एक मुकट राखी राखेया, कऊँकि मैं धार्मिकता ते जिन्दगी जि राखी। आसा रा प्रभु यीशु मसीह जो तर्मी न्याय करने वाला ए, जेबे से न्याय करने वापस आऊणा तेस दिने माखे से मुकुट देणा। पर सिर्फ आँऊ ई से निए जेसखे से इनाम मिलणा बल्कि हर एकी खे जो तेसरे वापस आऊणे रा बेसब्रिया साथे इन्तजार करने लगी रे। 9 तुसे फटाफट मांगे आऊणे री कोशिश करो। 10 कऊँकि देमासे एसा दुनिया री गल्ला खे प्यारी जाणी की आऊँ छाडीता रा और थिस्सलुनीके नगरो खे चली गा रा और क्रेसकेंस गलातिया प्रदेशो खे और तीतुस दलमतिया प्रदेशो खे चली गा रा। (aiōn g165) 11 बस लूका ई मां साथे ए। जेबे तू आएगा तो मरकुसो खे बी आपू साथे लयी आया, कऊँकि सेवा खे से मेरे बऊत कामो राए। 12 तुखिकुस मैं इफिसुस नगरो खे पेजी ता रा। 13 आऊँदे बखते मेरा कोट बी लंदे आया जो आऊँ त्रोआस नगरो रे करपुसो रे गे छाडी आयी रा,

और मेरी कताबा खास करी की चर्मपत्र लयी की आया। 14 सिक्न्दर ठठेरे मां साथे बऊत बुराईया करी राखिया। प्रभुए तेसखे तेसरे बुरे कामो रे मुताबिक फल देणा। 15 तू आपू बी तेसते सावधान रओ, कऊँकि तिने म्हारी शिक्षा रा बऊत बिरोद कित्तेया। 16 जेबे आँऊ पईली बार आपणे बचाव खे कचैरिया रे गया था तेस बखते मां साथे कोई नि था बल्कि आऊँ सबी छाडीता था। आँऊ प्रार्थना करूँआ कि परमेशरो खे तिना इजी रा लेखा नि देणा पड़ो। 17 पर प्रभु मेरा मददगार रया और माखे सामर्थ दिती, ताकि मेरे जरिए सुसमाचारो रा पूरा-पूरा प्रचार ओ और सब दूजी जाति सुणी लो और तिने आऊँ मौता ते बचाया। 18 और प्रभुए आऊँ हर बुरे कामो ते छुड़ाणा और आपणे स्वर्गो रे राज्य रे बचाई की पऊँछाणा, तेसरी ई महिमा जुगो-जुगो तक ऊँदी रओ। आमीन्। (aiōn g165) 19 बईण प्रिस्किल्ला और तेसा रा लाडा अक्विला और उनेसिफुरुसो रे कराने खे मेरा नमस्कार। 20 इरास्तुस कुरिन्थुस नगरो रे रई गा और मैं त्रुफिमस मिलेतुस नगरो रे छाडीता कऊँकि से बमार था। 21 ठण्डी ते पईले आऊणे री कोशिश कर। यूबलुस, पुदेस, लीनुस और कलौदिया और सब विश्वासी पाईया रा ताखे नमस्कार। 22 आँऊ प्रार्थना करूँआ कि प्रभु तेरी आत्मा साथे रओ, तुसा पाँदे कृपा ऊँदी रओ।

तीतुस

1 ये चिट्ठी मां पौलुसो री तरफा ते ए। आऊ परमेशरो रा दास और यीशु मसीह रा प्रेरित ए। आऊ परमेशरो रे तिना चूणे रे लोका रा विश्वास मजबूत करने खे पेजी राखेया और तिना खे सिखाणे खे कि सेयो सच्यो जाणो ताकि सेयो ईश्वरीय जिन्दगी जी सको। 2 नतीजन तिना परमेशरो साथे सदा री जिन्दगी जिऊणे री उम्मीद करनी। कऊँकि परमेशर कदी बी चूठ नि बोलदा, तिने दुनिया बनाणे ते पईले ये वादा कित्तेया था कि तेसरे लोका सदा कालो री जिन्दगी जिऊणी। (aiōnios g166) 3 और एबे एकदम ठीक बखतो पाँदे परमेशरे ए सुसमाचार आसा पाँदे प्रकट करी राखेया और आसे इजी खे सबी लोका खे प्रचार करूँए। परमेशर जो म्हारा उद्धारकर्ता ए तिने माखे ये जिम्मेवारी दिती कि आऊ तिना खे ये काम करूँ। 4 आऊ ये चिट्ठी तीतुसो खे लिखणे लगी रा जो विश्वासो रे मेरे सच्ये पाऊए जेड़ा ए। आऊ प्रार्थना करूँआ कि परमेशर पिता और म्हारे उद्धारकर्ता यीशु मसीह री तरफा ते ताखे कृपा और शान्ति मिलदी रओ। 5 आऊँ ताखे क्रेते टापाए रे इजी खे छाडी आया था कि तूँ बाकि बची रिया गल्ला खे सुदारे और जेड़ा मैं बोली राखेया तिजी रे मुताबिक नगर-नगरो रे बुजुर्गा खे ठराई दे। 6 ये जरूरी ए कि बुजुर्ग निर्दोष और एक ई लाडिया रा लाडा ओ। तिना रे बच्चे विश्वासी ओ और तिना पाँदे लुचपण और आज्ञा ना मानणे रा दोष नि ओ। 7 कऊँकि एक अध्यक्ष परमेशरो रे कराने रा पण्डारी ओआ, इजी खे तेसखे पक्का ई निर्दोष जिन्दगी जिऊणी चाईयो। बुजुर्गो खे ना टीठ, ना रोष करने वाला, ना पियक्कड़, ना मार-पीट करने वाला और ना ई नीच कमाईया रा लोबी ऊणा चाईयो। 8 बलिक से पराऊणचारी करने वाला, ओरी री पलाई चाणे वाला, सब राखणे वाला, न्यायी, पवित्र और आपू पाँदे काबू राखणे वाला ऊणा चाड्यो। 9 से जरूर मसीह रे तेस संदेशो रा विश्वासो साथे पालण करो। जो तमो रे उपदेशो रे मुताबिक ए और जो आसे सिखाई राखेया। ताकि से ओरी खे खरी शिक्षा ते उपदेश देई सको और बरोद करने वालेया रा मूँ बी बंद करी सको। 10 आऊ ये इजी खे बोलणे लगी रा कऊँकि बऊत सारे लोक खास करी की जो यहूदिया बीचा ते विश्वासो रे आयी रे सेयो सई शिक्षा रा बरोद करोए और से मूर्खता री गल्ला सिखाओए और ओरी खे तोखा देओए। 11 इना लोका खे विश्वासिया बीचे चूठी शिक्षा नि देणे देओ। कऊँकि यो लोक एड़ी शिक्षा देओए जो नि देणी चाईयो और सेयो लोक कअरो-कअरो रे विश्वासो खे बिगाडी देओए। सेयो लोक नीच कमाईया खे एडा करोए। 12 तिना ई बीचा ते एक माणू क्रेते टापाए राए, जेसखे सेयो लोक आपणा भविष्यबक्ता समजोए, तिने बोली राखेया, “क्रेते रे लोक सदा चूठ बोलोए। सेयो दुष्ट डांगरा जेड़ा बर्ताव करोए। सेयो लोक आलसी और पेटू ए।” 13 क्रेते रे लोका खे ये गवाई सच्यी ए। इजी री खातर तिना खे कड़क ऊई की चेतावणी देया कर, ताकि सेयो विश्वासो रे पक्के ऊई जाओ। 14 तिना लोका खे सख्या कि सेयो यहूदिया री मनकडन्त काणियां पाँदे मन नि लगाओ और तिना लोका री आज्ञा खे नि मानो जो सच्यो ते पटकी गे रे। 15 जेसरा मन शुद्ध ए तिना खे सब कुछ शुद्ध ए। पर प्रष्ट और अविश्वासिया खे कोई बी चीज शुद्ध निए, कऊँकि तिना रा दमाक और विवेक दोनो ई प्रष्ट ए। 16 सेयो चूठे शिक्षक बोलोए कि आसे परमेशरो खे जाणूए पर आपणे चाल-चलणो ते दखाओ कि सेयो परमेशरो खे नि जाणदे। कऊँकि सेयो लोक घृणित और आज्ञा नि मानणे वाले ए और केसी बी खरे कामो जोगे निए।

2 पर ओ तीतुस, ताखे येई सई ए कि तूँ एड़ी शिक्षा दे जो खरे उपदेशो रे मुताबिक ओ। 2 स्याणे मर्दा खे सिखाओ कि सेयो शांत, आदरणीय और आपू पाँदे काबू राखणे वाले ओ। तिना रा विश्वास, प्यार और सब पक्का ओ। 3 ईयां ई सयाणियां जवाणसा रा चाल-चलण एडा ओ कि परमेशरो खे आदरो जोगा ओ। सेयो ना तो ओरी पाँदे दोष लगाणे वाली ओ और ना ई पियक्कड़ ओ पर सेयो अच्छिया गल्ला सिखाणे वालिया ओ। 4 ये स्याणी जवाणसा जवान जवाणसा खे जरूर सिखाओ कि सेयो आपणे

लाडिया और बच्चेया साथे प्यार करो। 5 और ये बी सिखाओ कि सेयो आपू पाँदे काबू राखणे वालिया, पतिव्रता, कअरो रा काम-काज करने वाली, पत्नी और आपणे-आपणे लाडरे रे अधीन रणे वालिया ओ, ताकि परमेशरो रे वचनो री निन्दा नि ओ। 6 ईयां ई जवान मर्दा खे बी सिखाया कर कि सेयो आपू पाँदे काबू राखणे वाले ओ। 7 सबी गल्ला रे आपणे आपू खे खरे कामो रे आदर्श बणा कि ओर लोक बी तां पीछे चलो। जेबे तूँ शिक्षा देआ तो ईमानदारी और गम्भीरता साथे दे 8 सच्चाईया री शिक्षा दे ताकि कोई तेरी शिक्षा री निन्दा नि करी सको। तेबे जो लोक आसा रा बरोद करोए सेयो शर्मिंदा ऊई जाणे और तिना खे आसा पाँदे दोष लगाणे रा कोई बी मौका नि मिलणा। 9 आपणी मण्डलिया रे गुलाम विश्वासिया खे सख्या कि सेयो आपणे-आपणे मालको री आज्ञा खे मानेया करो। तिना खे से काम करने खे बोलो जेतते तिना रे मालक खुश ओ और पलटी कि जवाब नि देओ। 10 और गुलाम विश्वासिया खे ये बी सख्या कि आपणे मालको री चोरी नि करो। पर सबी तरह ते ईमानदार और विश्वासो जोगे निकलो ताकि सेयो सबी गल्ला रे म्हारे उद्धारकर्ता परमेशरो रे उपदेशो री शोभा बढ़ाओ। 11 कऊँकि परमेशरो री कृपा प्रकट ऊई री, जो सबी माणूआ रा उद्धार करी सकोई। 12 एसा कृपा रे जरिए परमेशर आसा खे चेतावणी देओआ कि आसे अर्भक्ति और दुनिया री बुरी इच्छा ते मन फेरी की एस जुगो रे आपू पाँदे काबू राखी की, तर्म और भक्तिया साथे जिन्दगी बिताऊँ। (aiōn g165) 13 यीशु मसीह वापस आऊणे वाला ए और आसे तेस नौखे दिनो रा इन्तजार करने लगी रे और एई आसा री उम्मीद बी ए इजी खे आसे तिजी रे मुताबिक बर्ताव करिए। सेई आसा रा महान परमेशर और उद्धारकर्ता ए जो आपणी महिमा साथे एसा तरतिया पाँदे आऊणे वाला ए। 14 इने यीशु मसीहे आपणे आपू खे आसा खे देईता कि आसा खे हर प्रकारा रे पापो ते छुड़ाई लो और शुद्ध करी की आपू खे एड़ी जाति बणाई लो, जो खरे काम करने खे आगे रओ। 15 ओ तीतुस, तूँ इना गल्ला खे पूरे अक्को साथे समजेया और सिखांदा रओ। कोई ताखे तुच्छ नि समजो।

3 ओ तीतुस, आपणे विश्वासी लोका खे याद दला कि सेयो हाकिम और अधिकारिया रे अधीन रओ और तिना री आज्ञा खे मानो और हर एक खरे काम करने खे त्यार रओ। 2 तिना लोका खे बताओ कि सेयो केसी खे बदनाम नि करो और चगडालु नि बणो। पर तिना रा नरम सबाओ ओ और सबी माणूआ साथे नरमाईया साथे रओ। 3 कऊँकि एक एडा बखत था जेबे आसे बी पईले नासमज और आज्ञा ना मानणे वाले थे। आसे बी बर्दोमे रे पड़े थे और कईया प्रकारा री इच्छा और सुख-विलासो री गुलामिया रे थे। आसा री जिन्दगी दुष्टता और डाह ते परी री थी और एकी दूजे ते बैर राखूँ थे। 4 पर फेर बी म्हारे उद्धारकर्ता परमेशरे आपणी दया और प्यार आसा पाँदे और सबी माणूआ पाँदे प्रकट कित्तेया। 5 तिने आसे म्हारे पापो री सजा ते बचाए। ये आसा रे धार्मिक कामो री बजअ ते नि ऊआ जो आसे आपू कित्ते पर तेसरी दया रे मुताबिक ऊआ। तिने आसा रा नये जन्मो रे जरिए और पवित्र आत्मा रे नया बानणे रे जरिए उद्धार कित्तेया। 6 परमेशरे खुले दिलो ते आसा खे पवित्र आत्मा दित्तेया कऊँकि यीशु मसीह आसा रे पापो री खातर मरी की म्हारा उद्धार करने वाला बणया। 7 ताकि आसे अनन्त जीवन पाणे री उम्मीद करी सकिए जेतखे परमेशरे आपणे बच्चेया खे देणे रा वादा करी राखेया। कऊँकि परमेशरे आसे आपणी कृपा रे जरिए तमी ठराई राखे। (aiōnios g166) 8 ये गल्ल सच ए और आऊँ चाऊँआ कि तूँ इना गल्ला रे बारे रे मजबूतिया साथे शिक्षा देओ, ताकि जिने परमेशरो पाँदे विश्वास करी राखेया, सेयो खरे कामो रे लगे रणे रे त्यानो रे रओ। यो शिक्षा पलिया और माणूआ रे लाबो रिया ए। 9 पर मूर्खता रे बईस, वंशाबली, बैर-बिरोद और तिना चगडैया ते, जो मूसे रा बिधानो रे बारे रे ओ, बचे रा रओ, कऊँकि सेयो निष्फल और बेकार ए। 10 जो माणू आपणे गलत विश्वासो रे जरिए फूट पाओआ तेसखे एक-दो बार चेतावणी देई कि तेसते लग रओ। 11 ये जाणी की कि एडा माणू सच्चाईया ते पटकी गा रा और आपणे आपू खे दोषी

ठईराई की पाप करदा रओआ। 12 जेबे आऊँ क्रेते टापूए रे तांगे अरतिमास या तुखिकुसो खे पेजँ, तो मांगे नीकुपुलिस नगरो रे आऊणे री कोशिश करनी, कऊँकि में तेथी ठण्ड बिताणे री ठाणी राखी। 13 जेनास वकील और अपुल्लोसो खे कोशिश करी की आगे पऊँछाई दे और देख कि तिना खे किजी बी चीजा री कमी नि ओ। 14 सिर्फ येई नि आपणे विश्वासिया खे सखयांदा रओ कि सेयो बी लोका री जरूरता खे पूरी करने खे खरे कामो रे लगे रे रओ, ताकि सेयो बी खूब फलो-फूलो। 15 जितणे बी विश्वासी एती मां साथे ए तिना सबी री तरफा ते ताखे नमस्कार। क्रेते टापूए रे रणे वाले आसा रे साथी विश्वासी जो आसा साथे प्यार राखोए, तिना खे नमस्ते। आऊँ प्रार्थना करूँआ कि परमेशरो री कृपा तुसा सबी पदिँ ऊँदी रओ।

फिलेमोन

1 ये चिट्ठी मां पौलुसो री तरफा ते ए। आँऊ कैदा रे ए कऊँकि आँऊ यीशु मसीह रे सुसमाचारो रा प्रचार करूँआ। मेरा और आसा रे साथी विश्वासी तीमुथियुसो री तरफा ते ताखे नमस्कार। ओ फिलेमोन मां साथे काम करने वाले मेरे प्यारे दोस्त आँऊ ये चिट्ठी ताखे लिखणे लगी रा। 2 आँऊ ये चिट्ठी आसा री विश्वासी बईण अफकिया और पाई अरखिप्पुस जो प्रभुए री सेवा एक योद्धा जेड़ी करोआ और तेसा मण्डलिया के बी जो तुसा रे कअरे कट्टी ओई लिखणे लगी रा। 3 आँऊ प्रार्थना करूँआ कि म्हारे पिता परमेशर और प्रभु यीशु मसीह री तरफा ते ताखे कृपा और शान्ति मिलदी रओ। 4 जेबे कदी बी आँऊ ताखे प्रार्थना करूँआ तो सदा ताखे परमेशरो रा धन्यवाद करूँआ। 5 कऊँकि आँऊ प्रभु यीशुए पाँदे तेरे विश्वास और परमेशरो रे लोका खे तेरे प्यारो रे बारे रे सुणने लगी रा। 6 आँऊ प्रार्थना करूँआ कि तेरी से साजेदारी जो विश्वासिया साथे ए और बी बड़दी जाओ। ताकि आसे सब ये जाणी सकिए कि आसे लोक मसीह पीछे चली की कितणे आशीषित ए। 7 ओ दोस्त, माखे तेरे प्यारो ते बऊत खुशी और शान्ति मिली, कऊँकि तेरे जरिए परमेशरो रे लोका रे मन खुश ऊईगे। 8 ओ फिलेमोन, आँऊ तुसा ते एक निवेदन करूँआ हालाँकि आँऊ मसीह रा प्रेरित ऊणे रे नाते तुसा खे जो करना चाईयो तिजी खे अक्को साथे एसा गल्ला खे करने री आज्ञा देई सकूँआ 9 तेबे बी मां स्याणे पौलुसो खे, जो एबे यीशु मसीह रा सुसमाचार सुनाणे री बजअ ते जेला रे कैद ए, ये ओर बी खरा लगेया कि प्यारो साथे तुसा ते बिनती करूँ। 10 आँऊ उनेसिमसो खे विनती करूँआ जो मेरे पाऊए जेड़ा ए। से मसीह रे मेरा पाऊ बणीगा जेबे आँऊ जेला रे था। 11 से पईले तो तेरे किजी कामो रा नि था, पर एबे तेरे और मेरे दूँई रे बड़े कामो राए। 12 तेसखे ई, मतलब जो मेरे कालजे रा टुकड़ा ए, मैं से तांगे वापस पेजी ता रा। 13 तेसखे आँऊ आपू गे ई राखणा चाऊँ था कि तेरी तरफा ते एसा कैदा रे जो सुसमाचारो री बजअ ते ए, मेरी सेवा करो। 14 पर मैं तेरी इच्छा ते बिना कुछ बी करना नि चाया, ताकि तेरी ये कृपा दबाओ रे नि पर खुशिया साथे ओ। 15 क्या पता उनेसिमस इजी बजअ ते कुछ दिनों खे नठी गा ताकि से मसीह पाँदे विश्वास करी सको और से ताखे सदा खे मिली जाओ। (aiōnios g166) 16 पर आजो ते दासा जेड़ा नि, बल्कि दासो ते बी खरा, मतलब-पाईए जेड़ा रओ, जो मेरा तो खास प्यारा आए ई, पर एबे मांणूआ रे रूपो रे और प्रभुए रे बी, से तेरा खास प्यारा ओ। 17 जे तूँ माखे आपणा साथी समजेया, तो तेसखे ईयां ग्रहण करी लओ, जेड़ा माखे। 18 जे तिने तेरा कुछ नुकशाण करी राखेया या से तेरा कर्जदार ए, तो मेरे नाओं दे लिखी लो। 19 आँऊ पौलुस आपणे आथो साथे लिखूँआ कि मां आपू ई तेसरा कर्जा परी देणा। इजी री बोलणे री जरूरत निए कि तेरी सारी जिन्दगी मेरी कर्जदार ए। 20 ओ मेरे प्यारे दोस्त, ये खुशी माखे प्रभुए रे तेरी तरफा ते मिलो। मसीह रे मेरे जिऊओ खे अरा-फरा करी दे। 21 आँऊ तेरे आज्ञाकारी ऊणे रा विश्वास करी की ताखे लिखूँआ और ये जाणूँआ कि जो कुछ आँऊ बोलूँआ, तां तिजी ते बी केथी ओर बड़ी की करना। 22 और ये बी कि माखे रणे खे जगा त्यार राख, माखे उम्मीद ए कि तुसा री प्रार्थना रे जरिए परमेशरो तुसा री प्रार्थना रा जवाब देणा और आँऊ तुसा गे फेर आयी जाणा। 23 इपफ्रास जो मां साथे यीशु मसीह रा सुसमाचार सुनाणे री बजअ ते कैदी ए से ताखे नमस्कार बोलोआ। 24 और मरकुस, अरिस्तर्खुस, देमास और लूका जो मां साथे प्रभुए रा काम करने वाले ए, इना री ताखे नमस्कार। 25 आँऊ प्रार्थना करूँआ कि म्हारे प्रभु यीशु मसीह री कृपा तुसा री आत्मा पाँदे ऊँदी रओ। आमीन्।

इब्रानियों

1 पुराणे जमाने रे परमेशरे बाप-दादेया साथे कई बार लग-लग तरीके ते भविष्यबक्तेया रे जरिए गल्ला कित्तिया। **2** पर इना आखरी दिना रे परमेशरे आसा साथे पुत्रो रे जरिए गल्ला कित्तिया। परमेशरे आपणे पुत्रो रे जरिए ई सारी सृष्टि रची और सेई सारी चीजा रा बारस ठाराया। (aiōn g165) **3** पाऊ ई परमेशरो री महिमा रा प्रयासा ए। से तेसरे तत्वो री छाया ए। सेई सब चीजा खे आपणी सामर्थ्य रे वचनो साथे सम्बाली राखोआ; से पापो खे तोई की स्वर्गो रे परमेशरो रे दाँणे कनारे जाई की बैठेया **4** और स्वर्गदूता ते तिथणा ई खरा ठईरिया, जितणा तिने तिना ते बडे पदो रा बारस ऊई की खरा नाओं पाया। **5** परमेशरे कदी आपणे केसी बी स्वर्गदूतो खे ये नि बोलेया, “तू मेरा पुत्र ए, आज आऊँ ए एलान कहुँआ कि तू मेरा पाऊ ए।” और फेर तिने केसी बी स्वर्गदूतो खे ये नि बोलेया, “आऊँ तेसरा पिता ऊणा और से मेरा पाऊ ऊणा।” **6** जेबे परमेशरे आपणा आदरणीय पाऊ दुनिया रे पेजेया तो से बोलोआ, “परमेशरो रे सारे स्वर्गदूता तेसरो माथा टेकणा।” **7** और स्वर्गदूता रे बारे रे एडा बोलोआ, “परमेशर आपणे स्वर्गदूता खे अवा जेडा और आपणे सेवको खे बऊत जादा सुलगी री आगी जेडा बणाओआ।” **8** पर पुत्रो रे बारे रे बोलोआ, “ओ परमेशर, तेरा सिंहासन जुगो-जुगो तक रणा। तेरे राज्य रा राजदण्ड न्याय रा राजदण्ड ए। (aiōn g165) **9** तैं तमों खे प्यार और बुरे कामा साथे बैर राखेया; इजी खे बजअ ते परमेशर, तेरे परमेशरे तेरे साथिया ते बड़ी की खुशिया रे तेलो साथे तेरा अभिषेक कित्तेया।” **10** से आपणे पाऊए ते ये बी बोलोआ, “ओ प्रभु! शुरुओ रे तैं तरतिया री निऊँ राखी और स्वर्ग तेरे आथो री कारीगिरी ए। **11** सेयो तो नाश ऊई जाणे, पर तू बणे रा रणा और सेयो सब टालेया जेडे पुराणे ऊई जाणे। **12** तां सेयो पट्टए जेडे लपेटणे और सेयो टालेया जेडे बदली जाणे, पर तू नि बदलणा और तेरे सालो रा अंत नि ऊणा।” **13** और परमेशरे कदी बी केसी बी स्वर्गदूता खे ये नि बोलेया, “तू मेरे दाँणे कनारे आदरणीय जगा रे बैठ, जदुओ तक आऊँ तेरे बैरिया खे तेरे पैरा रे थालली पीढ़ी नि बणाई देऊँ?” **14** फेर स्वर्गदूता रा क्या मकसद ए? क्या सेयो सब परमेशरो री सेवा-टईल करने वालिया आत्मा निए, जो उद्धार पाणे वालेया री खातर सेवा करने खे पेजिया जाओईया?

2 तेबेई आसा खे जो कुछ सिखाई राखेया था तिजी खे मानणे खे आसा खे ओर त्यान देणा चाईया। केथी एडा नि ओ कि आसे सच्चाईया ते पटकी जाईए। **2** जे स्वर्गदूता रे जरिए दित्तेया रा संदेश इतणा सच साबित ऊआ और हर एक लोक जिने आज्ञा नि मानी तिना खे ठीक-ठीक सजा मिली, **3** तो आसे लोक एडे महान् उद्धारो खे नजरअंदाज करी की कियॉ बची सकूँए? एस महान् उद्धारो रा एलान सबी ते पईले प्रभु यीशुए आपू कित्तेया। जिने लोके प्रभुए खे सुणेया तिने लोके तिना रे संदेशो खे सच साबित कित्तेया। **4** साथे ई परमेशर बी आपणी इच्छा रे मुताबिक चिह्न, अचम्बे रे काम, कई प्रकारा रे सामर्थ्य रे काम और पवित्र आत्मा रे बरदानो खे बांडणे रे जरिए इजी री गवाई देओआ। **5** परमेशरे तेसा आऊणे वालिया दुनिया खे, जेतेरी चर्चा आसे करने लगी रे, स्वर्गदूता रे वशो रे नि कित्तेया, पर आपणे पाऊए रे वशो रे कित्तेया। **6** पवित्र शास्त्रो रे केसी जगा रे कोई ये गवाई देओआ, “मांणु क्या ए कि तू तेसखे याद करो? माणुंआ रे बच्चे क्या ए कि तू तिना री फिकर करेया? **7** तैं से स्वर्गदूतो ते कुछ ई कम कित्तेया; तैं तिना पाँदे महिमा और आदरो रा मुकुट राखेया। **8** तैं सब कुछ तिना लोका रे वशो रे करी ता।” तेबे जबकि तिने सब कुछ तिना रे वशो रे करी ता, तो तिने कुछ पनि राखेया, जो तिना रे वशो रे नि ओ। सच्ची आसे एबे ये नि देखदे कि सब कुछ तिना रे वशो रे ए। **9** पर आसा खे प्रभु यीशु, जेसखे स्वर्गदूता ते थोडे बखतो खे कुछ ई कम कित्तेया था, मौता रा दुःख उठाणे री बजअ ते, महिमा और आदरो रा मुकुट पईने रा देखूँए, ताकि परमेशरो री कृपा ते से हर

एक मांणुए री खातर मरो। **10** सब कुछ परमेशरो राए और सब कुछ तिना री ई सामर्थ्य रे जरिए बणाई राखेया, तेसखे येई खरा लगेया कि जेबे से बऊत पाऊआ खे महिमा रे पऊँछाओ, तो तिना रे उद्धारकर्ता खे दुःख उठाणे रे जरिए सिद्ध करो। **11** कऊँकि पवित्र करने वाला यीशु और जो पवित्र कित्ते जाओए, सबी रा एक ई पिता ए, मतलब परमेशर, इजी बजअ ते यीशु तिना खे पाई और बईण बोलणे ते नि शर्मादा। **12** मसीह परमेशरो ते बोलोआ, “मां तेरा नाओं आपणे पाईया गे सुनाणा, सभा बीचे मां तेरी तारीफ करनी।” **13** फेर से ये बोलोआ, “मां तेस पाँदे परोसा राखणा” और फेर से ये बी बोलोआ, “आऊँ एती तिना लोका साथे ए जिना खे परमेशरे माखे देई राखेया; सेयो बच्चेया जेडे ए।” **14** तेबेई जेबे परमेशरो रे बच्चे मांस और खूनो रे इस्सेदार ए, तो यीशु आपू बी तिना जेडा बणीगा, ताकि मौता रे जरिए तेसखे, जेसखे मौता पाँदे शक्ति मिली थी, मतलब शैतानो खे नकम्मा करी ता **15** और ईयां यीशुए जितणे मौता रे डरो रे मारे पूरी जिन्दगी गुलामिया रे फसी रे थे, तिना खे छुड़ाई लो। **16** कऊँकि यीशु तो स्वर्गदूता खे नि, बलिक अब्राहमो रे वंशो खे सम्बालोआ। **17** तेबेई तो तेसखे चाईयो था कि सारिया गल्ला रे आपणे पाईया जेडा बणो, ताकि से तिना गल्ला रे जो परमेशरो साथे रिश्ता राखोईया, एक दया करने वाला और विश्वासो जोगा प्रदान पुरोईत बनो, ताकि लोका रे पापो खे प्राश्चित करो। **18** कऊँकि जेबे यीशुए परीक्षा री दशा रे दुःख उठाया, तो से तिना री बी मताद करी सकोआ, जिना री परीक्षा ओई।

3 तो ओ साथी विश्वासियो! तुसे जो स्वर्गिय बुलाहटा रे इस्सेदार ए, तेस प्रेरित और प्रदान पुरोईत यीशुए पाँदे, जेसखे आसे अंगीकार कहुँए, त्यान करो। **2** यीशु आपणे नियुक्त करने वाले परमेशरो खे विश्वासो जोगा था, जेडा मूसा बी परमेशरो रे सारे कअरो रे था। **3** पर यीशु मूसे ते इतणे बढी की महिमा जोगे समजे, जितणा कि कअर बनाणे वाला कअरो ते बढी की आदर राखोआ। **4** कऊँकि हर एक कअरो खे कोई ना कोई बनाणे वाला ओआ, पर जिने सब कुछ बणाई राखेया से परमेशर ए। **5** मूसा तो परमेशरो रे सारे कअरे सेवको जेडा विश्वासो जोगा रया, ताकि जो गल्ला ऊणे वालिया थिया, तिना री गवाई देओ। **6** पर मसीह पुत्रो जेडा परमेशरो रे कअरो रा अक्कदार ए और तेसरा कअर आसे ए, जे आसे आपणी इम्मता साथे और आपणी उम्मीदा रे विश्वास बणाई की राखूँए तो आसे ई तेसरा कराना ए। **7** तो जेडा पवित्र आत्मा बोलोआ, “जे आज तुसे परमेशरो रा शब्द सुणो, **8** तो तिजी खे मानणे ते ना नि करो, जेडा कि रोष दलाणे रे बखते और परीक्षा रे दिने सुणसाण जगा रे कित्तेया था। **9** जेती तुसा रे बाप-दादे आऊँ परखेया और चाली साल तक मेरे काम देखे। **10** इजी बजअ ते आऊँ तेस बखतो रे लोका ते नराज रया और बोलेया, ‘इना रे मन सदा पटकदे रओए, और इने मेरिया बाटा नि पछयाणिगा।’ **11** तेबे मैं रोषो रे आयी की कसम खाई, ‘सेयो मेरे आरामो रे आई नि सकदे।’” **12** ओ साथी विश्वासियो, चौकसर रओ कि तुसा रे एडा बुरा मन और अविश्वासिया रा मन नि ओ, जो जिऊँदे परमेशरो ते दूर टाई की लयी जाओ। **13** हर दिन एकी-दूजे खे समजयादि रओ; जदुओ तक तुसा गे मौका ए, एडा नि ओ कि तुसा बीचा ते कोई जणा पापो रे छलो रे आयी की जठर ऊई जाओ। **14** जे आसे आपणे पईले परोसे रे आखरी तक मजबूतिया दे बणे रे रये तो आसे मसीह रे इस्सेदार बणे रे रणे। **15** जेडा पवित्र शास्त्रो रे बोलेया जाओआ, “जे आज तुसे तेसरा शब्द सुणो, तो आपणे मनो खे जठर नि करो, जेडा कि रोष दलाणे रे बखते कित्तेया था।” **16** पला किने लोके परमेशरो रा शब्द सुणी की तिना रा बरोद कित्तेया? क्या सेयो इस्राएली लोक नि जो मूसे रे जरिए मिश्रो ते निकले थे? **17** और से चाली साल तक केस ते नराज रया? क्या तिना तेई नि, जिने पाप कित्तेया और तिना रिया लोथा सुणसाण जगा रेई पडी रिया रईया? **18** तिने किना लोका रे बारे रे कसम खाई की बोलेया था कि तुसे मेरे आरामो रे आई नि सकदे? क्या ये सिर्फ सेयो ई लोक नि थे जिने आज्ञा नि मानी थी? **19**

ईयां आसे देखूँ कि सेयो अविश्वासो री बजअ ते आरामो री जगरे आई नि सके।

4 परमेशरो रे आरामो री जगरे आऊणे रा वादा एबुए तक ए। तो आसे चौकस रईए कि तुसा बीचा ते कोई बी लोक नकम्मे नि ठईरो कि तिजी रे जाणे ते वंचित रई जाओ। **2** कऊँकि आसा खे बी इस्राएली लोका जेड़ा सुसमाचार सुणाया। पर तिना लोका खे सुणे रे वचनो ते कुछ फाईदा नि ऊआ, कऊँकि तिने लोके वचन विश्वासो साथे नि मानेया। **3** इजी खे आसे जिने परमेशरो रे वचना पॉँदि विश्वास कित्तेया, तेस आरामो रे प्रवेश करना, जेड़ा कि ओरी खे परमेशरे बोलेया, “मैं आपणे रोषो रे कसम खाई कि ‘सेयो मेरे आरामो री जगरे आई नि सकदे।’” हालाँकि दुनिया री शुरूआता रे बखते तेसरे काम ऊई चुके थे। **4** कऊँकि सातुए दिनो रे बारे रे तिने केथी एड़ा बोली राखेया, “परमेशरे सातुए दिने आपणे सारे काम नपटयाई की आराम कित्तेया।” **5** आसे ये बी पढ़ेया कि तिने बादो ते ये बी बोलोआ, “सेयो मेरे आरामो री जगरे आई नि सकदे।” **6** ये पक्का ए कि कुछ लोका खे आरामो री जगरे आऊणे री एवे बी खुली आजादी ए और जिना खे तेसरा सुसमाचार पईले सुणाया था, सेयो आज्ञा ना मानणे री बजअ ते तिदे नि जाई सके। **7** तेबई तो से कोई खास दिन ठराई की इतणे दिन बाद दाऊदो री कताबा रे तिजी खे आजका दिन बोलोआ, जेड़ा पईले बोलेया, “जे आज तुसे तेसरा शब्द सुणो, तो आपणे मनो खे जठर नि करो।” **8** जे यहोशू इस्राएलिया खे परमेशरो रे वादे रे मुताबिक आरामो री जगरे प्रवेश कराई लंदा तो तिजी ते बाद दूजे दिनो री चर्चा नि ऊँदी। **9** इजी री खातर जाणी लो कि परमेशरो रे लोका खे एवे बी सातुए दिनो आराम बाकि ए। **10** कऊँकि जिने तेसरे आरामो रे प्रवेश करी राखेया तिने बी परमेशरो जेड़े आपणे काम पूरे करी की आराम करी राखेया। **11** इजी री खातर आसे तेस आरामो री जगरे आऊणे री कोशिश करिए, एड़ा नि ओ कि कोई जणा तिना जेड़ी आज्ञा ना मानी की रुड़ी जाओ। **12** कऊँकि परमेशरो रा वचन जिऊँदा और प्रबल ए, से केसी दोधारी तलवारी ते बी बऊत पईना ए। से आत्मा और प्राण, गाठ-गाठ और गूदे-गूदे खे लग करी की वार-पार छेदोआ। से मनो री इच्छा और सोचा खे परखोआ। **13** और दुनिया री कोई बी चीज परमेशरो ते छिपी री निए। तेसरी आखी सामणे सब चीजा खुलिया और प्रकट ए। तेसखे ई आसा लेखा देणा पड़ना। **14** तेबे जेबे आसा रा इतणा बड़ा प्रदान पुरोईत ए, जो स्वर्गो रिये ऊई की गया, मतलब परमेशरो रा पुत्र प्रभु यीशु; तो आओ आसे आपणे विश्वासो रे अंगीकारो खे मजबूतिया साथे पकड़ी की राखूँ। **15** कऊँकि आसा रा प्रदान पुरोईत एड़ा निए, जो म्हारी कमजोरिया रे आसा साथे दुः खी नि ऊई सको, बल्कि से सबी गल्ला रे आसा जेड़ा परखेया, तेबे बी पापी नि निकलेया। **16** इजी री खातर आओ, आसे इम्मत बानी की परमेशरो रे नेड़े चलूँ, जो कृपा ते परी रा। तेबे परमेशरो आसा पॉँदि दया और कृपा दखाणी और जो जरूरत रे बखते म्हारी मताद करो।

5 हर एक प्रदान पुरोईत माणूआ बीचा ते लया जाओआ और माणूआ खई तिना गल्ला रे बारे रे जो परमेशरो ते रिश्ता राखोईया, ठराया जाओआ कि पेंट और पाप बलि चढ़ाया करो। **2** कऊँकि से आपू बी कमजोरिया ते किये राए, तेबई से अज्ञानिया साथे और पूले-पटकेया साथे नरमाईया ते व्यवहार करी सकोआ। **3** प्रदान पुरोईत ऊणे रे नाते तेसखे ये जरूरी ए कि जेड़ा लोका खे, तेड़ा ई आपू खे बी पाप बलि चढ़ाया करो। **4** ये आदरो रा पद कोई आपणे आपू ते नि लंदा, जदुओ तक हारूणो जेड़ा परमेशरो री तरफा ते नि ठराया जाओ। **5** तियाँ ई मसीहे बी प्रदान पुरोईत बणने री बड़ाई आपणे आपू ते नि लयी, पर तेसखे तिने ई दिती, जिने तेसखे बोलेया था, “तूँ मेरा पुत्र ए, आज आँऊ ए एलान कऊँआ कि आँऊ तेरा पिता ए” **6** ईयाँ ई से दूजी जगरे रे बी बोलोआ, “तूँ मलिकिसिदको रिया रीतिया पॉँदि सदा खे पुरोईत ए।” (aiōn g165) **7** यीशुए एते दुनिया रे रणे रे दिनो रे ऊच्चे शब्दो रे आक्का पाई-पाई की और आसू बाहई-बाहई की परमेशरो ते जो तेसखे मौता ते बचाई सको था, प्रार्थना और बिनती कित्ती और भक्तिया री बजअ ते

तेसरी सुणी। **8** हालाँकि यीशु परमेशरो रा पुत्र था तेबे बी तिने दुः ख उठाई-उठाई की आज्ञा मानणी सीखी। **9** और सिद्ध बणी की, आपणे सबी आज्ञा मानणे वालेया खे सदा कालो रे उद्धारो री बजअ ऊईगा। (aiōnios g166) **10** तेसखे परमेशरो री तरफा ते मलिकिसिदको रिया रीतिया पॉँदि प्रदान पुरोईतो रा पद मिलेया। **11** इजी रे बारे रे आसा खे बऊत सारिया गल्ला बोलणिया, पर जिना रा समजयाणा बी कठण ए, कऊँकि तुसे ऊच्चा सुणने लगी गे रे। **12** सच्ची एस बखतो तक तो तुसा खे शिक्षा देणे वाला बणी जाणा चाईयो था। पर तुसा खे तो एबु बी केसी एड़े माणूए री जी जरूरत ए जो तुसा खे परमेशरो री शिक्षा री शुरूओ री गल्ला फेर सिखाओ। तुसा खे तो बस एबु दूद ई चाईयो, अन्न नि। **13** दूद पॉँदि बच्चे खे तो तमों री शिक्षा री पछयाण नि ऊँदी, कऊँकि से बालक ए। **14** पर अन्न स्याणेया खे ए, जिना री समज खरे-बुरे रे पेट करने रे पक्की ऊईगी री।

6 इजी री खातर आओ आसे मसीह री शिक्षा री शुरूओ री गल्ला ते आगे बढ़ी की सिद्धता री शिक्षा पॉँदि चर्चा करने खे आगे बड़दे जाऊँ। आसे बुरे कामो ते मन फिराणे जो मौता री तरफा खे लयी जाओए और परमेशरो पॉँदि विश्वास करने री शुरूओ री शिक्षा री निऊँ फेर नि पाईए। **2** और तुसा खे बपतिसमा रे बारे रे और सिरो पॉँदि आथ राखणे और भरे रेया बीचा ते जिऊँदे ऊणे और आखरी न्याय री शिक्षा री फेर गल्ल करने री जरूरत निए। (aiōnios g166) **3** जे परमेशर चाओगा तो आसे सिद्धता री शिक्षा री तरफा खे आगे बड़ने। **4** जो लोक आपणा विश्वास छाई देओए तिना खे फेर मन फिराणे खे वापस नि ल्याई सकदे। तिने एक बार सच्चाई पछयाणी जो परमेशरो ते आओई और तिना खे स्वर्गिय बरदान मिलेया और तिने दूजेया लोका साथे पवित्र आत्मा बी पाया। **5** सेयो परमेशरो रे खरे वचनो रा और आऊणे वाले जुगो री सामर्थ महसूस कित्ती। (aiōn g165) **6** जे सेयो परमेशरो ते दूर ऊईगे, तो तिना खे मन फिराणे खे वापस ल्याऊणा नामुकिन ए। कऊँकि सेयो परमेशरो रे पुत्रो खे फेर कूसो पॉँदि चढ़ाओए और सरेआम तेस पॉँदि कलंक लगाओए। **7** जो लोक खरी शिक्षा पाओए सेयो एड़ी जमीना जेड़े ओए जो जमीन बर्खा रे पाणिए खे, जो तेसा पॉँदि बार-बार पड़ोआ, पी-पी की, जिना लोका खे से बाई जाओई, तिना रे कामो रा साग-पात जमाओई, से परमेशरो ते आशीष पाओई। **8** और लोक एड़ी जमीना जेड़े ओए जो जाड़ और काँडे-चीट जमाओई, तो से नकम्मी और स्थापित ए और तेसा रा अंत फूकणा इए। **9** पर ओ प्यारेओ! तुसे लोक खरे काम करने लगी रे कऊँकि परमेशरे तुसे लोक पईले तेई बचाईते रे। ये चितौणी तुसा लोका रे बारे रे निए। **10** कऊँकि परमेशर अन्यायी निए कि तुसा रे काम और तेस प्यारो खे पूली जाओ, जो तुसे तिना रे नाओं री महिमा खे एड़ा दखाया कि परमेशरो रे लोका री सेवा कित्ती और एबे बी करने लगी रे। **11** पर आसे चाऊँए कि तुसा बीचा ते हर एक माणू, आखरी तक पूरी उम्मीदा खे, एड़ी ई कोशिश करदा रओ। **12** ताकि तुसे आलसी नि ऊई जाओ, बल्कि तिना रा पालन करो, जो विश्वास और सन्नो रे जरिए वादे रे बरस ओए। **13** परमेशरे जेबे अब्राहमो ते वादा कित्तेया तो तिने आपणे ई नाओं री कसम खाई। कऊँकि तिना ते बड़ा कोई नि था जेसरा नाओं लयी की से कसम खाओ। **14** तिने बोलेया, “मां सच्ची ताखे बऊत आशीष देणी और तेरी ल्वादा खे अणगिणत बड़ांदा जाऊँगा।” **15** अब्राहमे बऊत बखतो तक सन्न राखणे ते बाद वादे रा फल पाया। **16** माणू तो आपू ते केसी बड़े री कसम खाया करोए और तिना रे हर एक बईसी रा न्याय कसमे की पक्का ओआ। **17** येई बजअ ए कि परमेशरे बी कसम खाई थी। इजी रे जरिए परमेशर तिना लोका खे जिना ते तिने वादा करी राखेया था दखाणा चाओआ था कि से जो बी वादा करोआ तिजी खे से पूरा बी करोआ। **18** परमेशर इना दो ना बदलने वाली गल्ला रे जरिए मतलब वादा और कसमा रे चूटा साबित नि ऊई सकदा। इजी ते आसा खे जिने परमेशरो री शरण लयी राखी ये बड़ी प्रेरणा मिलोई की आसा खे जो उम्मीद देई राखी तिजी खे पकड़ी राखो **19** से उम्मीद म्हारे प्राणो खे एड़ा लंगर ए, जो पक्का और मजबूत ए और पड़दे

ते ऊई कि परमेशरो रे महा पवित्र जगा तक पऊँछोआ। 20 जेती यीशुए मलिकिसिदको रिया रीतिया पँदि सदा कालो रा प्रदान पुरोईत बणी की आसा री तरफा ते अगुवा रे रूपो रे आसा ते पईले ई स्वर्गो रे प्रवेश करी राखेया। (aiōn g165)

7 मलिकिसिदक शालेम नगरो रा राजा और परमप्रदान परमेशरो रा पुरोईत था। जेबे अब्राहम राजेया खे युद्धो ते अराई की वापस आऊणे लगी रा था, तो मलिकिसिदके तेस साथे मुलाकात किती और तेसखे आशीष दिती। 2 अब्राहमे मलिकिसिदको खे युद्धो ते जीती की ल्याई री सबी चीजा रा दसुआ इस्सा दितेया। मलिकिसिदको रे नाओं रा मतलब “धार्मिकता रा राजा” ए। पर जबकि शालेमो रा मतलब “शान्ति” तो से “शान्तिया रा राजा” बी ए। 3 जेसरा ना पिता, ना माए, ना ई वंश ए, जेसरे ना दिने री शुरूआत ए और ना जीवोना रा अंत ए। पर परमेशरो रे पुत्रो जेड़ा ठईरी की से सदा खे पुरोईत बणेया रा रओआ। 4 एबे इजी पँदि त्यान करो कि मलिकिसिदक केड़ा महानु था जेसखे कुलपति अब्राहमे अच्छे ते अच्छे लूटे रे मालो रा दसुआ इस्सा दितेया। 5 मूसे रा बिधान बताओई कि लेविया रे वंशो बीचा ते जिना खे पुरोईतो रे पदो खे चुणेया जाओआ, तिना खे आज्ञा मिली री कि लोका ते, मतलब आपणे पाईया ते चाए सेयो अब्राहमो रेई शरीरो ते कऊँ निए जम्म रे, बिधानो रे मुताबिक दसुआ इस्सा लओ। 6 पर मलिकिसिदके जो लेवी वंशो रा पनि था तिने अब्राहमो ते दसुआ इस्सा लया। हालाँकि अब्राहमो गे परमेशरो रा वादा था फेर बी मलिकिसिदके अब्राहमो खे आशीष दिती। 7 इदे शक निए कि छोटा बडे ते आशीष पाओआ। 8 और एती तो मरने वाले माणू दसुआ इस्सा लओए, पर मलिकिसिदक जेसखे अब्राहमे दसुआ इस्सा दितेया था पवित्र शास्त्र तेसरे बारे रे बोलोआ कि से जिऊँदा ए। 9 तो आसे ये बी बोली सकूँए कि लेविए बी, जो दसुआ इस्सा लओआ, अब्राहमो रे जरिए दसुआ इस्सा दितेया। 10 जेबे मलिकिसिदके अब्राहमो ते मुलाकात किती तेस बखते तो लेविए रा जन्म बी नि ऊआ था। कऊँकि लेवी तेस बखते आपणे अब्राहमो रे शरीरो रेई था। 11 हालाँकि मूसे रा बिधानो रे बोली राखेया कि पुरोईत सिर्फ लेविए रे गोत्रो तेई ऊणे चाईयो, पर सेयो पुरोईत केसी खे बी सिद्ध नि बणाई सकदे। इजी खे लेविया रे वंश हारुण पुरोईतो रे परिवारो रे बदले मलिकिसिदको रे जेडे एक पुरोईतो री जरूरत ए। 12 कऊँकि जेबे पुरोईतो रा पद बदलेया जाओआ, तो बिधानो रा बी बदलणा जरूरी ए। 13 आसे ये सब गल्ला यीशु मसीह रे बारे बोलणे लगी रे जो दूजे गोत्रो रा था। तेस गोत्रो रे किने बी माणूए बेदिया पँदि पुरोईतो रे रूपो रे सेवा नि किती। 14 हर कोई ये जाणोआ कि म्हारा प्रभु यीशु यहूदा रे गोत्रो ते ए और एस गोत्रो रे बारे रे मूसे पुरोईतो रे पदो री कुछ बी चर्चा नि किती। 15 म्हारा दावा ओर बी स्पष्ट ऊई जाओआ कि मलिकिसिदको जेड़ा एक ओर पुरोईत आऊणे वाला था। 16 यीशु केसी माणूआ रे नियम या लेवी गोत्रो ते तालुक राखणे वाली बिधानो रे आधारो पँदि पुरोईत नि बणेया। पर एक अविनाशी जीवोना री सामर्थ्य रे मुताबिक जेते रा कोई अंत निए से पुरोईत बणेया। 17 कऊँकि तेसरे बारे रे पवित्र शास्त्र ये गवाई देओआ, “तूँ मलिकिसिदको रिया रीतिया पँदि जुगो-जुगो तक पुरोईत ए।” (aiōn g165) 18 कमजोर और निष्फल ऊणे री बजअ ते पुराणी आज्ञा लोप ऊईगी। 19 कऊँकि मूसे रा बिधान केसी बी गल्ला खे सिद्ध नि करदा और तिजी री जगा पँदि यीशु मसीह रे एक एडी खरी उम्मीद राखी रिये, जेतेरे जरिए आसे परमेशरो रे नेडे जाई सकूँए। 20 मसीह री नियुक्ति कसमा साथे ऊई। लेविया रे वंश तो बिना कसमा ते पुरोईत बणे। 21 लेविया रे वंश तो बिना कसमा ते पुरोईत ठराई गए, पर यीशु कसमा साथे, परमेशरो री तरफा ते नियुक्त कित्ते, जिने तेसरे बारे रे बोलेया, “प्रभुए ये कसम खाई और मां कदी बी आपणा मन नि बदलणा, ‘तूँ जुगो-जुगो तक पुरोईत ए।’” (aiōn g165) 22 एसा कसमा री बजअ ते प्रभु यीशु परमेशरो साथे एक बडे महानु वाचा री जिम्मेवारी लओआ। 23 इजी ते अलावा पुराणी रीतिया रे मुताबिक पुरोईता री नियुक्ति बडी सँख्या रे ओ थी। कऊँकि हर एक पुरोईतो री मौता साथे

तेसरी सेवा बी खत्म ऊई जाओ थी 24 पर यीशु जुगो-जुगो तक रओआ, इजी बजअ ते तेसरा पुरोईतो रा पद अटल ए। (aiōn g165) 25 तेवेई तो जो यीशुए रे जरिए परमेशरो रे नेडे आओए, से तिना खे हमेशा बचाओआ, कऊँकि से तिना खे बिनती करने खे सदा जिऊँदा ए। 26 एड़ा ई प्रदान पुरोईत आसा री जरूरता खे पुरा करी सकोआ, जो पवित्र ओ, निष्कपट ओ, साफ ओ, पापिया रे असरो ते लग रणे वाला ओ और स्वर्गो ते बी ऊच्या चकेया रा ओ। 27 और तिना प्रदान पुरोईतो जेड़ा जो लेविया रे गोत्रो रे थे यीशुए खे जरूरी निए कि हर रोज पईले आपणे पापो खे और तेबे लोका रे पापो खे बलि चढ़ाओ, कऊँकि यीशुए आपणे आपू खे बलिदान चढ़ाई की ये काम सदा खे एक ई बार नपटई ता। 28 कऊँकि मूसे रा बिधान तो कमजोर माणूआ खे प्रदान पुरोईत नियुक्त करोई, पर परमेशरो रा वादे जो बिधानो ते बाद असरदार ऊआ, आपणा पुत्र नियुक्त कित्तेया जो अनन्त कालो खे सिद्ध बणाईता। (aiōn g165)

8 इना गल्ला रा निचोड़ ये ए कि आसा गे एक एड़ा प्रदान पुरोईत ए, जो स्वर्गो पँदि परमेशरो रे महानु सिंहासनो रे दाँणे कनारे बैठेया राए। 2 आसा रा प्रदान पुरोईत महा पवित्र जगा और तेस सच्चे तम्बूओ रे सेवक ए, जो किने माणूए नि, बल्कि परमेशरे बणाई राखेया। 3 हर एक प्रदान पुरोईतो खे पापो री माफिया खे पँट और बलिदान चढ़ाणे खे नियुक्त करेया जाओआ, इजी खे जरूरी ए कि आसा रे प्रदान पुरोईत यीशुए गे बी कुछ चढ़ाणे खे ओ। 4 जे यीशु मसीह तरतिया पँदि ऊँदा तो से कदी पुरोईत नि ऊँदा, कऊँकि एती मूसे रा बिधानो रे मुताबिक पँट चढ़ाणे वाले पुरोईत तो आए। 5 ये सेयो पुरोईत ए जो सिर्फ स्वर्गो रिया चीजा रे प्रतिरूप और टवावे री आराधना करोए। कऊँकि जेबे मूसा तम्बू बनाणे वाला था, तो तेसखे ये चेतावणी मिली, “देख जो नमूना ताखे सौने पाह्डो पँदि दखाया था, तिजी रे मुताबिक सब कुछ बनाणा।” 6 पर एबे जो पुरोईतो रा काम यीशु मसीह खे दितेया राए, से ओरी पुरोईता खे दित्ते रे पुरोईता रे कामो ते बऊत बढ़ी की ए। कऊँकि से ओर बी खरी वाचा रा बचोला ठईरिया, जो ओर खरे वादे रे सहारे बानी राखी। 7 जे से पईली वाचा निर्दोष ऊँदी, तो दूजी वाचा री जरूरत ई नि ऊँदी। 8 पर परमेशर लोका पँदि दोष लगाई की बोलोआ, “प्रभु बोलोआ, देखो, सेयो दिन आओए कि मां इसाएलो रे लोका साथे और यहूदा रे लोका साथे, नई वाचा बानणी। 9 ये तेसा वाचा जेड़ी नि ऊणी, जेड़ी मैं तिना रे वाप-दादेया साथे, तेस बखते बानी थी, जेबे आऊँ तिना रा आथ पकड़ी की तिना खे मिस देशो ते निकयाली की ल्याया, कऊँकि सेयो मेरी वाचा पँदि स्थिर नि रये और मैं तिना री खबर-सम्बाल नि लयी। प्रभु येई बोलोआ। 10 फेर प्रभु बोलोआ कि जो नई वाचा मां तिना दिना ते बाद इसाएलो रे कराने साथे बानणी, से ये कि मां आपणा बिधान तिना रे मनो रे पाणी और से तिना रे दिलो रे लिखणी और आऊँ तिना रा परमेशर ठईरना और सेयो मेरे लोक ठईरने 11 हर एकी आपणे देशवासियो खे और आपणे पाईया खे ये शिक्षा नि देणी कि ‘तूँ प्रभुए खे पछयाणा।’ कऊँकि छोटे ते बडे तक सबी आऊँ पछयाणी लणा। 12 कऊँकि मां तिना रे बुरे काम माफ करने और तिना रे पाप फेर याद नि करने।” 13 नई वाचा री स्थापना रे तिने, पईली वाचा पुराणी ठराई और जो चीजा पुराणिया और खराब ऊई जाओईया, तिना रा खत्म ऊणा जरूरी ए।

9 तेसा पईली वाचा रे परमेशरो री आराधना करने रे नियम थे और एसा तरतिया पँदि परमेशरो री आराधना करने खे एक जगा बी बणाई राखी थी। 2 एक तम्बू बणाया जेतेरे दो इस्से थे। पईला, तम्बूओ रे बारले इस्से रे दिऊए, एक मेज और तेसा मेजा पँदि पँटा रिया पवित्र रोतिया राखी जाओ थिया। तम्बूओ रे एते इस्से खे पवित्र जगा बोली थे। 3 दूजा, तम्बूओ रा पितरला इस्सा पड़दे रे पीछे था। तेस पितरले इस्से खे परम पवित्र जगा बोली थे। 4 तेस पितरले इस्से रे सुईने री पृथ्वानी और चऊँ कनारे ते सुईने की मडे रा वाचा रा सन्दुक था। सन्दुको रे पितरे मन्ने की परे रा सुईने रा

ब्याम और हारूणो री सोठी, जिदे कूँले पत्ते आईंगे थे और वाचा रिया पट्टिया राखी री थिया। 5 सन्दुको पॉदि तेजोमय पंखो वाले कर्बू बणाई राखे थे। जो प्राश्रितो रे टकणे पॉदि छाँपे कित्ते रे थे। पर एबू आसे इना गल्ला खे एक-एक करी की समजयाई नि सकदे। 6 जेबे सब कुछ ईयां त्यार उई चुकेया, तेबे तम्बूए रे पईले इस्से रे पुरोईत हर बखते जाई की सेवा रे काम पूरे करोए। 7 पर तम्बूए री महा पवित्र जगा दे प्रदान पुरोईत सालो रे एक ई बार जाओआ और साथे जानवरा रा खून लयी की बी जाणा पड़ो था। जो से आपणी खातर और लोका रिया पूल-चूका रिया खातर चढ़ावा चढ़ाओआ। 8 इना गल्ला ते पवित्र आत्मा येई दखाओआ कि जदुओ तक तम्बूए रा बारला इस्सा खड़ा ए, तदुओ तक कोई बी सादारण लोक बड़ी पवित्र जगा रे जाई की परमेशरो री आराधना नि करी सकदे 9 तम्बूए रा से बारला इस्सा आज-काल के बखतो खे एक उदारण ए। तम्बूए रे तेस बारले इस्से रे पुरोईत पेंट और बलि चढ़ाओ थे। से पेंट और बलि आराधना करने वाले लोका रे विवेको खे साफ नि करी सकदे। 10 ये नियम सिर्फ खाणे-पीणे रिया चीजा और लग-लग नाह्ने री रवाजा रे बारे रे ए। ये सारे शरीरो ते सम्बन्ध राखणे वाले बाह्नी नियम ए जो सुदारो रे बखतो तक नियुक्त करी ते रे। 11 पर जेबे मसीह आऊणे वालिया खरिया-खरिया चीजा रा प्रदान पुरोईत ऊई की आया। से स्वर्गो रे और बी बड़े और सिद्ध तम्बूए रे गया, से तम्बू आथो साथे बणाया रा निए और ना ई से एते दुनिया राए। 12 मसीह जानवरा रे खूनो रे जरिए नि, पर आपणे ई खूनो रे जरिए एक ई बार आसा सबी खे पवित्र जगा रे गया और आसा सबी खे सदा खे पापो ते छुटकारा दितेया। (aiōnios g166) 13 मूसे रा बिधानो रे मुताबिक पुरोईत जानवरा रा खून और बलिया री स्वा अशुद्ध लोका पॉदि तिना खे शुद्ध करने खे छिड़को थे, ताकि सेयो बाह्नी रूपो ते शुद्ध उई जाओ। जे इना जानवरा रे खूनो रे लोका खे पापो ते पवित्र करने री सामर्थ ए 14 तो मसीह रा खून जिने आपणे आपू खे सनातन आत्मा रे जरिए परमेशरो सामणे निर्दोष चढ़ाया, तुसा रा विवेक मरे रे कामो ते कऊँ नि शुद्ध करना, ताकि तुसे जिऊँदे परमेशरो री सेवा करो। (aiōnios g166) 15 इजी बजअ ते मसीह परमेशर और लोका बीचे नई वाचा रा बचोला ए, ताकि बुलाए रे लोका खे परमेशरो रे वादे रे मुताबिक, अनन्त जायदात मिलो। कऊँकि मसीह तिना रे पापो री सजा ते छुटकारा देणे खे मरेया जो तिने पईली वाचा रे अधीन कित्तेया था। (aiōnios g166) 16 वाचा एक वसीयता जेड़ी ए। वसीयता रे मामले रे ये साबित करना जरूरी ए कि जिने वाचा बानी राखी, तेसरी मौत ऊई चुकी री। 17 कऊँकि एड़ी वाचा मरने पॉदि पक्की ओई और जदुओ तक वाचा बानणे वाला जिऊँदा रओआ, तदुओ तक वाचा कामो री नि ऊँदी। 18 येई बजअ ए कि पईली वाचा बी बिना खूनो ते असरदार नि ऊँदी। 19 जेबे मूसा सबी लोका खे बिधानो री हर एक आज्ञा पढ़ी की सुणाई चुकेया, तेबे तिने जानवरा रा खून पाणिए साथे मलाई की और लाल ऊना खे जुफा री डालिया रे लपटी की तिजी साथे, तेसा बिधानो री कताबा पॉदि और सबी लोका पॉदि छिड़की ता 20 और मूसे बोलेया, “ये तेसा वाचा रा खून ए, जेतेरी आज्ञा परमेशरे तुसा खे मानणे खे देई राखी।” 21 और ईयां ई मूसे तम्बू और सेवा खे इस्तेमाल ऊणे वाले सारे समानो पॉदि खून छिड़केया। 22 मूसे रा बिधानो रे मुताबिक जादातर सारी चीजा खूनो रे जरिए शुद्ध कित्तिया जाओ थिया और बिना खून बाहए पापो री माफी नि ओ थी। 23 पुरोईतो खे ए जरूरी ए कि तम्बू और तिजी रा सारा समान जो स्वर्गो रिया चीजा रा प्रतिरूप था तिजी खे जानवरा रे बलिदानो रे जरिए शुद्ध करेया जाओ। पर स्वर्गो री असली चीजा खे शुद्ध करने खे जानवरा रे खूनो ते बऊत बढी की बलिदानो री जरूरत ए। 24 कऊँकि मसीह आथो साथ बणाई रिया तेसा पवित्र जगा दे, जो स्वर्गिय पवित्र जगा रा नमूना ए, गया नि। से स्वर्गो रेई गया, ताकि से एबे आसा री तरफा ते परमेशरो सामणे दिखो। 25 यहूदी प्रदान पुरोईत हर साल जानवरा रा खून लयी की महा पवित्र जगा रे जाओआ। मसीह खे तियाँ ई बार-बार आपणे आपू खे चढ़ाणे री जरूरत निए। 26 जे एड़ा ऊँदा तो मसीह खे दुनिया री उत्पत्तिया ते लयी की तेसखे बार-बार दुः ख सईन करना पड़दा। पर एबे जुगो रे अंतो रे से एक बार आयी

रा, ताकि आपणी ई बलि देई की पापो खे दूर करी देओ। (aiōn g165) 27 जेड़ा माँणए खे एक बार मरना और तिजी ते बाद न्याय रा ऊणा नियुक्त ए, 28 तियाँ ई मसीह बी बऊत जणेया रे पाप ऊठाणे खे एक ई बार बलिदान ऊआ। से दूजी बार आऊणा पापो री बजअ ते नि बल्कि तिना लोका खे उद्धार देणे खे जो तेसखे न्यालने लगी रे।

10 मूसे रा बिधान आऊणे वालिया खरी चीजा रा सिर्फ एक ट्वांवा ए, ये ट्वांवा तिना रा असली रूप निया। तेसरे नियमा रे मुताबिक हर साल लगातार बलि ई बलि चढ़ाई जाओई। बिधान तिना बलिदानो रे जरिए आराधना करने वालेया खे कदी बी सिद्ध नि करी सकदी। 2 जे से सिद्ध करी सकदा तो बलिदाना रा चढ़ाणा बंद ऊई जाँदा। जे परमेशरो री आराधना करने वाले एक ई बार शुद्ध ऊई जाँदे, तो तिना रा विवेक तिना खे पापी नि ठरदा। 3 पर एबे तो तिना बलिया रे जरिए हर साल पापो खे याद करवाया जाओआ। 4 कऊँकि ये ऊई नि सकदा कि जानवरा रा खून पापो खे दूर करो। 5 इजी बजअ ते मसीह दुनिया रे आऊँदे बखते बोलोआ, “बलिदान और पेंट तँ नि चायी, पर मेरी खातर एक शरीर त्यार कित्तेया। 6 ऊम-बलिया और पाप-बलिया ते तूँ खुश नि ऊँदा। 7 तेबे मैं बोलेया, ‘देख, आऊँ एती ए, पवित्र शास्त्रो रे मेरे बारे रे लिखेया राए ओ परमेशर आऊँ आईगा रा कि तेरी इच्छा पूरी करूँ।’” 8 मसीह पईले बोलोआ, “ना तँ बलिदान, पेंट, ऊम-बलिया और पाप-बलिया चाईया और ना ई तिना ते खुश ऊआ,” हालाँकि यो बलिदान बिधानो रे मुताबिक चढ़ाए जाओ थे। 9 तेबे ये बी बोलोआ, “देख, आऊँ आईगा रा, ताकि तेरी इच्छा पूरी करूँ।” तिने पईलका बलिदान टाई ता और मसीह रे बलिदानो खे तिजी री जगा पॉदि राखी ता। 10 परमेशरो री तेसा ई इच्छा रे मुताबिक प्रभु यीशु मसीह रे शरीरो रे एक ई बार बलिदान चढ़ाणे रे जरिए सदा खे आसे पवित्र कित्ते। 11 पुराणी वाचा रे मुताबिक हर एक पुरोईत तो खडे ऊई की हर-रोज सेवा करोआ और एक ई जेडे बलिदानो खे बार-बार चढ़ाओआ। पर ये बलिदान पापो खे कदी बी दूर नि करी सकदे। 12 पर आसा रा प्रदान पुरोईत यीशु मसीह पापो रे बदले एक ई बार सदा खे आपणे आपू खे बलिदान करी चुकी रा। एबे से परमेशरो रे दाँणे कनारे बैठोगे। 13 तेस बखतो तेई एकी खेई न्यालने लगी रा, ताकि तेसरे सारे बैरी तेसरे पैरो निठली चौकी बणो। 14 कऊँकि मसीहे एक ई बलिदानो रे जरिए सेयो सदा खे सिद्ध बणाईते जो तिना खे लग कित्ते रे ए। 15 पवित्र आत्मा बी आसा खे येई गवाई देओआ। पईले प्रभुए बोलेया था, 16 “प्रभु बोलोआ कि जो वाचा मां तिना दिना ते बाद तिना साथे बानणी, से ये कि मां आपणा बिधान तिना रे दिलो रे लिखणी और मां तिना रे विवेको रे पाणी।” 17 फेर से ये बोलोआ, “मां तिना रे पाप और तिना रे बुरे काम फेर कदी बी याद नि करने।” 18 और जेबे पापो री माफी ऊईगी री, तो तेबे पापो खे केसी बी बलिदानो री जरूरत निए। 19 ओ साथी विश्वासियो, एबे आसा खे पुरा परोसा ए कि आसे प्रभु यीशुए रे खूनो रे जरिए बड़ी पवित्र जगा रे इम्मत साथे जाई सकोए। 20 यीशुए आसा खे आपणे शारीरिक पड़दे रे जरिए एक नई और जिऊँदी बात खोली ती। 21 और इजी खे कि म्हारा एड़ा महान पुरोईत ए, जो परमेशरो रे मन्दरो रा अक्कदार ए, 22 तो आओ आसे सच्चे मनो ते, पूरे विश्वासो साथे परमेशरो रे नेडे जाऊँए कऊँकि आसे विवेको रा दोष दूर करने खे दिलो पॉदि मसीह रे खूनो रा छड़काओ लयी की और शरीरो खे सर्फ पाणिए की तुलाईता रा ताकि आसे शुद्ध ऊई जाईए। 23 और आपणी उम्मीदा रे अंगीकारो खे मजबूतिया रे पकड़ी की राखो। कऊँकि परमेशर जिने वादे कित्ते, से विश्वासो जोगा ए 24 आसे ये बी खास त्यान राखिए कि आसे आपू बीचे प्यार और खरे कामो खे करने खे एकी-दूजे खे औंसला देया करो। 25 और आराधना रे एकी-दूजे साथे कट्टा ऊणा नि छाडो, जेड़ी की बऊत जणेया री स्वाज ए, पर एकी-दूजे खे समजयाई रओ और जियाँ-जियाँ प्रभुए रे वापस आऊणे रे दिनो खे नेडे आऊँदे देखो, तियाँ-तियाँ ओर बी जादा एड़ा करेया करो। 26 सच्चाईया खे पछयाणने रे बाद जे आसे जाणी-बूजी की पाप करदे रऊँए, तो पापो खे फेर कोई ओर बलिदान निए।

27 आ, परमेशरो रे न्याय रे दण्डो री एक डराऊणी उम्मीद और आगी रा चराकड़ा बाकि ए, जेसा तेसरे सारे बिरोदी स्वा करी देणे। 28 तिना दिना रे मूसा रे बिधानो खे ना मानणे वाला दो या तीन जणोया री गवाईया पाँदे, बिना दया ते काया जाओ था। 29 एबे सोची लो कि से और बी कितणे बड़े-पारी दण्डो जोगा ऊणा, जिने परमेशरो रा पुत्र पैरो साथे केसेया और वाचा रे खुने की जेतेरे जरिए से पवित्र ठराया था, अपवित्र जाणेया और कृपा री आत्मा री बेज्जती किती। 30 कऊँकि आसे तेसखे जाणूए, परमेशरे बोलेया, “बदला लणा मेरा काम ए, मां ई बदला लणा।” तेबे तिने ये बी बोलेया, “प्रभुए आपणे लोका रा न्याय करना।” 31 जिऊँदे परमेशरो रे आधो रे पड़ना डराऊणी गल्ल ए। 32 पर तुसे तिना शुरूआता रे दिना खे याद करो, जिना रे तुसे मसीह री ज्योति पाई और बड़े पारी दुः खो रे बी टीके रे रये। 33 कदी-कदी तो एड़ा ऊआ कि खुले तौरो पाँदे तुसा री निन्दा ऊई और क्लेश सईन करदे ऊए तुसा रा तमाशा बणेया। कदी-कदी एड़ा ऊआ कि तुसे तिना साथे साजे ऊए जिना रा बऊत बुरा आल करो थे। 34 कऊँकि तुसे कैदिया रे दुः खो रे बी दुः खी ऊए और आपणी जायदात खुशिया साथे लुटणे दिती; ये जाणी की कि तुसा गे स्वर्गो रे एक ओर बी खरी और सदा रणे वाली जायदात ए। 35 इजी री खातर प्रभुए पाँदे आपणा विश्वास बणाए रे राखो। याद राखो कि इजी रा फल बऊत बड़ा ए। 36 कऊँकि तुसा खे सब राखणा जरूरी ए, ताकि परमेशरो री इच्छा पूरी करी की तुसा खे वादे रा फल मिलो। 37 जिंयाँ कि पवित्र शास्त्र बोलोआ, “एबे बऊत ई थोड़ा जा बखत रई गा रा, जेबे आऊणे वाला आऊणा और तेस देर नि करनी। 38 पर मेरा तर्मी माणू विश्वासो साथे जिऊँदा रणा और जे से माणू डरी की विश्वासो ते पीछे आटी जाओगा, तो मेरा मन तेसते खुश नि ऊणा।” 39 आसे तिना लोका बीचा ते निए जो परमेशरो ते पीछे आटी की नाश ऊई जाओ। बल्कि आसे तिना लोका बीचा ते जो आपणे विश्वासो रे जरिए जिन्दगी पाओए।

11 एबे विश्वास उम्मीद किती रिया चीजा रा निश्चा और बिना देखी रिया चीजा रा सबूत ए। 2 आसा रे बुजुर्गा खे ये विश्वास था, सिर्फ इजी री बजअ ते परमेशर तिना ते खुश था। 3 विश्वासो तेई आसा खे पता लगी जाओआ कि सारी सृष्टि परमेशरो रे वचनो रे जरिए बणी। इजी खे आसे जो कुछ देखूँए, से तिना चीजा ते नि बणी, जो नि दिखदी। (aiōn g165) 4 विश्वासो तेई आदमो रे पाऊ हाबिले आपणे बड़े पाई कैनो ते खरा बलिदान परमेशरो खे चढ़ाया और तिजी रेई जरिए परमेशरे से तर्मी जणे री तरअ अपनाया, और जो बलि हाबिले चढ़ाई थी परमेशर तेसरे तेस बलिदानो ते खुश था। हाबिल आपणे मरने ते बाद बी आसा खे सिखाओआ कि विश्वास कियॉ ऊणा चाईयो। 5 विश्वासो तेई हनोक नाओं रा माणू जिऊँदा ई स्वर्गो खे चकी ता और से मरेया नि, और तेसरा पता केसी खे नि लगेया कि से केई चली गा। कऊँकि परमेशरे से स्वर्गो खे चकी ला था। तेसरे चकणे ते पईले तेसरे बारे रे ये गवाई दिती कि तिने परमेशर खुश कित्तेया। 6 सिर्फ विश्वासो रे जरिए ई आसे परमेशरो खे खुश करी सकूँए, कऊँकि परमेशरो गे आऊणे वालेया खे विश्वास करना चाईयो कि से आए और सेयो जो तेसखे सच्चाईया ते टोलोए से टोलने वालेया खे फल देओआ। 7 विश्वासो तेई जेबे नूह नाओं रे माणूए खे परमेशरे तेसा बाढ़ा रे बारे रे चेतावणी दिती थी, जो तिने कदी नि देखी थी, चेतावणी पाई की आज्ञा मानी की आपणे कराने खे बचाणे री खातर जाहज बणाया। नूह रे विश्वासो रे सामणे बचे रे लोके जिने विश्वास नि कित्तेया सेयो नाश ऊईगे। परमेशरे नूह खे तर्मी बणाया कऊँकि तिने तेस पाँदे परोसा कित्तेया। 8 विश्वासो तेई अब्राहमो खे जेबे परमेशरे एकी जगा खे जाणे खे बुलाया तो से आज्ञा मानी की तेसा जगा खे निकली गा, जेती परमेशरो तेसखे तेसरी जायदात देणी थी और से नि जाणो था कि आँऊ केई चली रा, पर फेर बी चली गा 9 जेते जगा रा परमेशरे वादा कित्तेया अब्राहम तेती परदेशिया जेड़ा तम्बूए रे रया। तेस साथे तेसरा पाऊ इस्हाक और तेसरा पोता याकूबो जेसखे परमेशरो ते सेई वायदा मिलेया था सेयो बी तेती तम्बूआ रे रये। 10 कऊँकि अब्राहम तेती स्वर्गो रे नगरो रे

रणे रा इन्तजार करने लगी रा था जो सदा खे बणेया रा रओआ, जेतेरा रचणे वाला और बनाणे वाला परमेशर ए। 11 विश्वासो तेई अब्राहमो री लाड़िए सारे आपणे आपू स्याणी ऊई की बी गर्भ धारण करने री सामर्थ पाई, कऊँकि तेसे विश्वास कित्तेया कि परमेशरो आपणा वादा पूरा करना। 12 जेबे अब्राहम बऊत ई स्याणा था और मरेया रा जा था, तेबे तेसरे सर्गो रे तारे और समुद्र रे कनारे रे बालूए बराबर, अणगिणत वंश पैदा ऊए। 13 ये सारे लोक जिने परमेशरो पाँदे विश्वास कित्तेया तिना वादे किती रिया चीजा बिना आसिल कित्ते ई मरी गे। पर सेयो समजी गे थे कि परमेशरो आऊणे वाले बखतो रे क्या करना। सेयो ये बी समजी गे थे, “आसे तरतिया पाँदे परदेशी और बाअरा ते आए रे लोक ए।” 14 जो एड़िया गल्ला करोए, कि सेयो तरतिया पाँदे परदेशी और बाअरा ते आए रे लोक ए, सेयो कब्जा करी कि ये दखाओए कि, “ये देश आसा राए।” 15 जेस देशो ते सेयो निकली की आए थे, जे तेसरी खबर-सम्बाल लंदे तो तिना खे वापस जाणे रा मौका था। 16 पर सेयो एक खरे मतलब स्वर्गिय देशो रे इच्छुक ए, तेबेई तो परमेशर, तिना रा परमेशर बोलणे ते खुश ओ था, कऊँकि तिने तिना खे एक नगर बणाई राखेया। 17 जेबे परमेशरे अब्राहमे परखेया ते विश्वासो रे जरिए से इसहाको री बलि चढ़ाणे खे त्यार ऊआ। इसहाक अब्राहमो रा खास पाऊ था। परमेशरे तेस पाऊए रे बारे रे अब्राहमो ते वादा कित्तेया था, “ये इसहाको रे जरिए ऊणा कि तेरे वंशो री गिणती ऊणी।” अब्राहमो खे पूरा विश्वास था कि परमेशर मरे रेया खे जिऊँदा करी सकोआ। ईयाँ ई अब्राहमो खे इसहाक मरे रेया बीचा ते जिऊँदा मिलेया। 20 विश्वासो तेई इसहाके आपणे दो पाऊ याकूबो खे और एसावो खे वादे री गल्ला रे बारे रे आशीष दिती। 21 विश्वासो तेई याकूबे मरदे बखते यूसुफो रे डूँडूँ पाऊआ बीचा ते एकी-एकी खे आशीष दिती और आपणे डण्डे रा सारा लयी की परमेशरो री आराधना किती। 22 विश्वासो तेई यूसुफे, जेबे से मरने वाला था, तो इस्राएलो रे लोका साथे मिस्र देशो ते निकलने री चर्चा किती और तिने तिना खे ये आज्ञा बी दिती कि, “जेबे तुसे मिस्र देशो ते जाओगे तो तुसे मरे मरने ते बाद मेरी आड्डिया खे आपू साथे लयी जाएओ।” 23 जेबे मिस्र देशो रे राजे इस्राएलो रे छोटे बच्चेया खे काणे री आज्ञा दिती तो विश्वासो तेई मूसे रे माए-बाओ तेसरे जमणे ते बाद तीन मीन्ने तक लकोई की राखेया; कऊँकि तिने देखेया कि बालक बऊत खास ए और सेयो राजे री आज्ञा ते नि डरे। 24 मिस्र देशो रे फ़िरौन राजे री बेटिये मूसे खे पाली पोषी की बड़ा कित्तेया। जेबे मूसा बड़ा ऊईगा तो से विश्वासो ते नि चाओ था कि लोक तेसखे राजकुमारिया रा पाऊ बोलो। 25 कऊँकि तेसखे पापो रे थोड़े दिना रा सुख लणे ते, परमेशरो रे लोका साथे दुः ख सईन करना जादा खरा लगेया। 26 तिने सोचेया मसीह री खातर दुःख सईन करना मिस्र देशो रे खजाने ते बऊत बड़ा ए। कऊँकि से जाणो था कि एड़ा करने ते तेसखे स्वर्गो रे परमेशरो ते इनाम मिलणा। 27 विश्वासो तेई राजे रे रोषो ते नि डरी की मूसे मिस्र देश छोडीता, कऊँकि तिने जाणी ला कि से बिना देखे परमेशरो खे देखणे लगी रा। 28 विश्वासो रे जरिए ई मूसे इस्राएली लोका खे आज्ञा दिती कि सेयो जानवरा रा खून दरवाजे पाँदे छिड़की कि फसह रे त्योआरो री खजाना पूरी करो। ताकि इस्राएलो री पईली ल्वादा रा नाश करने वाला दूत, तिना खे छुँई नि सको। 29 विश्वासो तेई इस्राएली लोक लाल समुद्रो ते पार एड़े उतरी गे, जेड़े सूकी जमीना पाँदो ते। पर जेबे मिस्रि बी एड़ा ई करना चाया, तो सब डूबी की मरी गे। 30 इस्राएली लोका रे विश्वासो तेई यरीहो नगरो री शहरपनाह, जेबे सेयो साता दिना तक चऊँ कनारे तिजी रा चक्कर लगाई चुके, तो से टली गी। 31 विश्वासो तेई राहाब वेश्या परमेशरो री आज्ञा ना मानणे वालेया साथे नाश नि ऊई, कऊँकि तेसे इस्राएली पेतिया खे शरण दिती। 32 एबे माखे और कुछ बोलणे री जरूरत निए। कऊँकि बखत नि रया कि मिदोनो रे, बाराको रे, समसूनो रे, यिफतहो रे, दाऊदो रे, शमुएलो रे और भविष्यबक्तेया रे बारे रे बताऊँ। 33 इने विश्वासो रेई जरिए राज्य जीते। सच्चे फँसले साथे राज कित्तेया। वादे किती रिया चीजा मिलिया और शेर तिना खे खाई नि सके। 34 आगी रिया लुपिया तिना खे फूकी नि सकिया, तलवारी री तेज तारा

ते मरी नि सके, कमजोर ऊँदे ऊए बी तागतबर बणी गे, लड़ाईया रे सुरमे निकले, और दुश्मना री फौज कूटी-कूटी की नठाईती। 35 कुछ जवाणसे आपणे मरे रे लोक फेर जिऊँदे पाए और कितणे तो मार खाँदे-खाँदे मरी गे। तिने लोके छुटकारा पाणे खे परमेशरो पाँदे विश्वास करना नि छाडेया कऊँकि सेयो मरने ते बाद परमेशरो साथे सदा खे जिऊँदे रणा चाओ थे। 36 कुछ लोका खे तो मजाक और कोडेया रा सामणा करना पडेया और कुछ लोक जंजीरे की जकड़ी की जेला रे पाईते। 37 कुछ लोका खे पात्थर बाए। तिना रे आरे साथे चीरी कि दो टुकड़े करी ते, सेयो तलवारे की काए। सेयो गरीब थे तिना खे दुःख दिते और तिना साथे बुरा बर्ताव कित्तेया। और सेयो पेडा-बाकरिया री खाल टखी की ओरे-पोरे मारे-मारे फिरे। 38 और सुणसाण, पाहड़, डवार, और तरतिया री खीड़ा रिये पटकदे रये। 39 ये बुरी दुनिया विश्वासी लोका जोगी नि थी। विश्वासो रेई जरिए इना सबी रे बारे रे परमेशर खुश ओआ, फेर बी तिना खे से चीज नि मिली, जेते रा वादा परमेशरे कित्तेया था। 40 कऊँकि परमेशरो गे सिर्फ तिना खेई खरी गल्ला नि थी पर आसा खे बी थी। परमेशर तिना खे बी आसा साथे सिद्ध बनाणा चाओ था।

12 आसा रे चऊँ कनारे बऊत सारे लोका री जिन्दगिया रे एडे उदारण ए जो आसा खे बताओ कि विश्वास क्या ए। इजी खे आओ, हर एक रोकणे वाली चीज और उलजाणे वाले पापो खे दूर करी की से दौड़ जो आसा खे दौड़नी, सब्रो साथे दौड़ो। 2 आसे विश्वासो रे कर्ता और सिद्ध करने वाले प्रभु यीशुए री तरफा खे ताकदे रईए। यीशुए तेसा खुशिया खे जो तेसते आगे थी राखी री, शर्मा री कुछ चिन्ता ना करी की, क्रूसो रा दुः ख सईन कित्तेया और स्वर्गो रे परमेशरो रे दाँणे कनारे बैठेया। 3 यीशुए रे उदारणो पाँदे सोचो, जिने पापिया रे जरिए दिते रे डराऊणे कष्ट इजी खे सईन कित्ते कि तुसे दुःखी ऊँई की इम्मत नि छाडी देओ। 4 तुसे पापो रे खलाफ लड़दे ऊए एबुए तक तेस साथे एडी लड़ाई नि कित्ती कि तुसा रा खून बया ओ। 5 पर तुसे तिना इम्मती उपदेशा खे पूली चुकी रे जो परमेशरे तुसा खे पाऊ मानी कि देई राखे थे, “ओ मेरे पाऊ, प्रभुए री ताड़ना खे अलकी गल्ल नि जाण और जेबे से ताखे थिड़को, तो इम्मत नि छाड। 6 कऊँकि प्रभु जेसखे प्यार करोआ, तेसखे डांटो बी आ और जेसखे आपणा पाऊ बणाई लओआ, तेसखे सजा बी देओआ।” 7 तुसे दुः खो खे पिते री डांट समजी की सयी लो। परमेशर तुसा खे पाऊ समजी की तुसा साथे बर्ताओ करोआ। से कुण जा पाऊ ए जेसरी ताड़ना पिता नि करदा? 8 से ताड़ना जो सबी खे मिलोई, जे तेसखे नि मिली री ओ, तो तुसे परमेशरो रे असली पाऊ नि ए। 9 तेबे जबकि म्हारे शारीरिक पिता बी म्हारी ताड़ना करो था और आसे तिना री इज्जत कित्ती। ये आसा खे ओर बी जरूरी ए कि जेबे आसा रा आत्मिक पिता आसा खे ताड़ना देओ तो आसे ओर बी बढ़ी की तिना रे वशो रे रईए ताकि आसा खे अनन्तकालो री जिन्दगी मिलो। 10 आसा रा संसारिक पिता तो आपणी-आपणी समजा रे मुताबिक थोड़े दिना तक आसा री ताड़ना करो थे। पर परमेशर आसा री पलाईया खे ताड़ना करोआ ताकि आसे बी तेसरी पवित्रता रे इस्सेदार ऊई जाईए। 11 जेस बखते ताड़ना देई जाओई तेस बखते ताड़ना खरी नि लगदी बल्कि से दुःख देणे वाली लगोई। पर जो ताड़ना रे जरिए शिक्षा पाओए बादो ते तिना खे चैनी साथे धार्मिकता रा फल मिलोआ। 12 इजी री खातर उठो और चुस्त ऊई जाओ। 13 सीदिया बाटा रिये चलदे रओ। ताकि जो लोक तुसा पीछे चलोए कमजोर और लंगड़े ऊणे रे बावजूद बी सेयो नाश नि ओ पर बची जाओ। 14 सबी साथे मेल-जोल राखो और पवित्र जिन्दगी जिऊणे खे हर तरफ ते कोशिश करदे रओ। जेतेरे बिना कोई बी प्रभुए खे कदी नि देखी सकदा। 15 तुसे चौकस रओ कि कोई बी लोक परमेशरो री कृपा ते बिना रई नि जाओ। त्यान देओ कि तुसा बीचे अविश्वासो री कोई बी कऊड़ी जड़ निकली की कष्ट नि देओ तिजी साथे बऊत लोक अशुद्ध ऊई जाओ। 16 तुसा बीचे कोई जणा व्याभिचारी नि ओ या अब्राहमो रे पोते एसावो जेड़ा अधर्मी नि ओ, जिने एक बारा री रोटिया रे

बदले आपणे जेठे ऊणे रा पद बेची ता। 17 तुसे जाणोए कि बादो ते जेबे तिने आपणे पिते इसहाको ते आशीष पाणी चायी, तो तेसखे नि दिती और आसू बाहई-बाहई की आशीष मांगणे पाँदे बी मन फेरने रा मौका तेसखे नि मिलेया। 18 तुसे सीने पाहड़ो रे नेडे नि पऊँछे, जेतेखे देखी सको थे और छुँई सको थे। एती ना तो लूपिया जेड़ी बली री आग ए और ना काले बादल, ना बऊत न्हारा और ना तूफान ए। 19 एती ना तो तुरहिया री आवाज और ना बोलणे वाले रे एडे शब्दो ए, जेतेखे सुणी की इस्राएली लोक बिनती करो थे कि, “एबे आसा साथे ओर गल्ला नि करो।” 20 तिने लोके एड़ा इजी खे बोलेया कऊँकि सेयो तेसा आज्ञा खे नि सयी सके जो परमेशरे तिना खे बोली थी, “जे कोई डंगर बी पाहड़ो खे छुँओ, तो पात्थर बाए जाओ।” 21 और से दर्शन एड़ा डराऊणा था कि मूसे बोलेया, “आऊँ बऊत डहँआ और थरथराऊँआ।” 22 तुसे लोक सिष्योनी रे पाहड़ो रे नेडे जो जिऊँदे परमेशरो रा नगर ए पऊँछी रे। ये सेई स्वर्गिय यरूशलेम ए जेती लाखो स्वर्गदूत खुशिया रा त्योआर मनाओए। 23 तुसे परमेशरो रे जेठे री सभा रे आई रे, जिना रे नाओं स्वर्गो रे लिखे रे ए। तुसे आपू परमेशरो रे नेडे आयी रे जो सबी रा न्याय करने वाला ए। तुसे स्वर्गो रे तर्मा लोका री आत्मा गे आयी रे जिना खे सिद्ध बणाई राखेया। 24 तुसे यीशुए गे आयी रे जो आसा साथे नई वाचा रा बचोलापण करोआ और छड़काओ रे तेस खूनो रे नेडे आयी रे, जो हाबिलो रे खूनो ते बी जादा खरिया गल्ला बोलोआ। 25 सावधान रओ, और परमेशरो री आज्ञा खे नि टालो जो तुसा के बोलणे लगी रा। कऊँकि जेबे मूसे इस्राएलो रे लोका खे चेतावणी दिती थी और तिने आज्ञा नि मानी तो सेयो लोक बी परमेशरो री सजा ते बची नि सके। तेबे आसे बी सजा ते नि बची सकदे, जे आसे बी तेसरी आज्ञा नि मानिए जो आसा खे स्वर्गो ते चेतावणी देओआ। 26 जेबे परमेशरे सीने पाहड़ो ते गल्ल कित्ती थी तेस बखते तेसरे शब्दे तरती इलाई ती, पर एबे तिने ये वादा करी राखेया कि, “एक बार फेर मां बस तरती ई नि, बल्कि स्वर्ग भी इलाई देणा।” 27 और ये वाक्य, “एक बार फेर” इना गल्ला खे दखाओआ कि बणाई रिया सारी चीजा इल्ली जाणिया और टाई देणियां, ताकि जो चीजा इलाईया नि जाँदिया, सेयो अटल बणिया री रओ। 28 आसा खे जो राज्य मिली रा तिजी खे इलाया नि जाई सकदा। तेबेई आसे परमेशरो खे धन्यवाद देँदे रईए और तेसरी इच्छा रे मुताबिक भंगित और आदरो साथे तेसरी आराधना करदे रईए जेते कि से खुश ओआ। 29 कऊँकि म्हारा परमेशर स्वा करने वाली आग ए।

13 आपू बीचे पाई बईणा जेड़ा प्यार राखो। 2 तिना री बी पराऊणचारी करो जो जरूरतमंद मुसाफर ए, कऊँकि इजी रे जरिए कई लोके अणजाणे रे स्वर्गदूता री आओ-बैठ कित्ती। 3 कैदिया री बी ईयां खबर-सम्बाल लओ कि मानो तिना साथे तुसे बी कैदी ए। जिना लोका साथे बुरा बर्ताओ कित्तेया जाओआ, तिना री बी ये समजी की खबर-सम्बाल लया करो जेडे कि तुसे बी तिना रे दुःखो रे साजी ए। 4 क्या सबी लोका रे आदरो री गल्ल समजी जाओ और एस रिशते रे दोनो आपू बीचे वफादार रओ, कऊँकि परमेशरो व्याभिचारिया रा और गन्दे काम करने वालेया रा न्याय करना। 5 तुसे आपणी जिन्दगी धन-दौलत रे लालचो ते दूर राखो, जो तुसा गे ए, तिदे ई सन्तुष्टी राखेया करो, कऊँकि परमेशरे आपू ई बोली राखेया, “मां तू कदी नि छाडणा और ना ई तू पूलणा।” 6 तेबेई तो आसे परोसा करी की बोलूँए, “प्रभु मेरी मताद करने वाला ए, मां नि डरना। मांणू मेरा कुछ नि करी सकदा।” 7 जो तुसा रे अरुवे थे और जिने तुसा गे परमेशरो रा वचन सुणाई राखेया, तिना खे याद राखो। त्यानो साथे तिना रे चाल-चलणो खे देखो कि तिने कियौ आपणी जिन्दगी जी, और सेयो मरने तक परमेशरो रे विश्वासो रे वफादार बणे रे रए। इजी खे आसा बी एड़ा ई विश्वास करना चाईयो जेड़ा तिने कित्तेया था। 8 प्रभु यीशु मसीह काल, आज और जुगो-जुगो तक कदी नि बदलणा। (aiōn g165) 9 इना सारे कई प्रकारा रे और नऊखे उपदेशा खे नि मानो जो तुसा खे बुरी बाटा रिये लयी जाओए। कऊँकि तुसा रे मनो खे

अच्छा ए कि परमेशरो री कृपा रे जरिए मजबूत बणो, ना कि तिना नियमा रे मानणे रे जरिए जो खाणे रे बारे रे ए, जिना साथे काम राखणे वालेया खे कुछ फाईदा नि ऊँदा। 10 म्हारी एक एडी बेदी ए जेते पाँदा ते खाणे रा अक्क तिना लोका खे निए, जो तम्बूओ री सेवा करोए। 11 पुराणे वादे रे मुताबिक हर साल प्रदान पुरोईत जानवरा रा खून पाप-बलिया खे बड़ी पवित्र जगा रे तिना रे पापो री माफिया खे लयी जाओआ, पर जानवरा रे बली कित्ते रे शरीर लोका रे तम्बूए ते दूर फूके जाओए। 12 इजी बजअ ते यीशुए बी लोका खे आपणे खूनो रे जरिए पवित्र करने खे यरूशलेमो नगरो ते बारे दुःख सईन कित्तेया और मरी गे। 13 तो आओ, एबे आसे यहूदी लोका रे बिधानो खे छाडी की, यीशु मसीह पँदि विश्वास करी की ठीक तिर्यो ई तेस साथे शर्मनाक दुःख सईन करिए। 14 कऊँकि एते दुनिया रे म्हारा कोई बी सदा रणे वाला कअर निए। बल्कि आसे तेस स्वर्गिय कअरो री टोला रे ए जो सदा खे ए। 15 इजी री खातर आसे यीशु मसीह रे जरिए आपणे मुँओ ते परमेशरो री स्तुति और आराधना करदे रईए। जो परमेशरो खे बलिदान ए। 16 और पलाई करने खे और एकी दूजे री मताद करने खे सदा त्यार रओ, कऊँकि परमेशर एडे बलिदानो ते खुश ओआ। 17 आपणे अगुवेया री मानो और तिना रे अधीन रओ, कऊँकि सेयो तुसा खे देखोए कि तुसे आपणी बाटा ते पटकी नि जाओ। तिना खे आपणी सेवा रा लेखा देणा पड़ना। तुसे तिना री आज्ञा मानो ताकि सेयो आपणे कामो खे खुश ऊई जाओ, ना कि उदास ऊई जाओ। ये तुसा खे बी फाईदि वाला ऊणा। 18 आसा खे प्रार्थना करदे रओ। आसा खे परोसा ए कि म्हारा विवेक शुद्ध ए और आसे सबी गल्ला रे जो आसे कऱँए परमेशरो री महिमा करना चाऊँए। 19 प्रार्थना करने खे आऊँ तुसा खे ओर बी औँसला देऊँआ ताकि आऊँ चट-चारे तुसा गे फेर आयी सकूँ। 20 एबे शान्ति देणे वाला परमेशरे म्हारे प्रभु यीशुए खे मरे रेया बीचा ते जिऊँदा कित्तेया। यीशु पेडा रा महान् रखवाले जेड़ा ए, जेसरा खून परमेशरे आपणे लोका साथे अनन्त वाचा बनाणे खे इस्तेमाल कित्तेया। (aiōnios g166) 21 परमेशर तुसा खे हर एक पली गल्ला रे सिद्ध करो, जेते की तुसे तेसरी इच्छा पूरी करो और जो कुछ तेसखे अच्छा लगोआ, तिजी खे प्रभु यीशु मसीह रे जरिए आसा रे पुरा करो। जेसरी तारीफ जुगो-जुगो तक ऊँदी रओ। आमीन्। (aiōn g165) 22 ओ साथी विश्वासियो, आऊँ तुसा ते बिनती कऱँआ कि एसा चिट्टिया रिया गल्ला खे सब्रो साथे सुणी लो, जो मैं तुसा खे इम्मत देणे खे लिखी राखी। मैं तुसा खे एसा चिट्टिया रे बऊत गल्ला नि लिखी राखी। 23 तुसा खे ये याद ए कि तीमुथियुस म्हारा पाई जेला ते छूटी गा रा और जे से चट आईगा, तो मां तेस साथे तुसा खे मिलणे आऊणा। 24 आपणे सबी अगुवेया खे और सबी पवित्र लोका खे नमस्कार बोलो। इटली देशो रे परमेशरो रे लोक तुसा खे नमस्कार बोलोए। 25 तुसा सबी पँदि परमेशरो री कृपा ऊँदी रओ। आमीन्।

याकूब

1 आऊ याकूब जो परमेश्वर और प्रभु यीशु मसीह रा दास ए ये चिट्ठी तिना बारा गोत्रा खे लिखूआ जो दुनिया रे ओरे-पोरे ऊई की रओए, मेरी तरफा ते नमस्कार। 2 ओ प्यारे साथी विश्वासियो! जेबे तुसे कई प्रकारा री परीक्षा रे पड़ो, तो इजी खे पूरी खुशिया री गल्ल समजो, 3 कऊँकि तुसे जाणो ईए कि जेबे तुसा रे विश्वासो री परख ओई तो तुसे परमेश्वरो पॉदि परोसा राखी की सब्रो साथे ओर बी परेशानिया रा सामणा करोए। 4 पर सब्रो खे आपणा पूरा काम करने देओ ताकि तुसे पूरे और सिद्ध ऊई जाओ और तुसा रे केसी बी अच्छे चाल-चलणो री कमी नि ओ। 5 पर जे तुसा बीचा ते केसी खे बी दमाको री कमी ओ, तो परमेश्वरो ते माँगो, जो बिना ल्वामे ते सबी खे उदारता ते खुशीया साथे देओआ; और परमेश्वर सबी खे देओआ। 6 पूरे विश्वासो साथे माँगो कि परमेश्वरो तेसखे देणा और कुछ शक नि करो, कऊँकि शक करने वाला समुद्रो री छालिया जेड़ा ए, जो अवा साथे हड़ोईया और उखलोईया। 7 एड़ा माणू ये नि समजो कि माखे प्रभुए ते कुछ मिलणा, 8 से माणू आपणा फँसला नि लई सकदा और आपणी सारी गल्ला रे पोला-पाला ए। 9 विश्वासी पाई जो गरीब ए तेसखे खुश ऊणा चाईयो कि परमेश्वरो ते तेसखे इज्जत मिलणी। 10 और अमीर आपणी नीच दशा पॉदि खुश ओ, कऊँकि तेसरा पैसा काओ रे फूलो जेड़ा जांदा रणा। 11 सूरज निकलदे ई कड़ाके री तूप पड़ोई और काओ खे सकोई देओई और तिजी रा फूल चढ़ी जाओआ और तिजी री शोभा जांदा रओई, ईयाँ ई अमीर आदमी बी आपणी जिन्दगिया रे कामा रे पाआग-दौड़ करदे ऊए तूड़ा रे मिली जाणे। 12 धन्य ए से माणू, जो परीक्षा रे टिके रा रओआ, कऊँकि तेस परीक्षा रे पास ऊई की अनन्त जिन्दगिया रा मुकट पाणा, जेतेरा वादा परमेश्वर आपणे प्यार करने वालेया साथे करी राखेया। 13 जेबे केसी री परीक्षा ओ, तो से ये नि बोलो, “मेरी परीक्षा परमेश्वरो री तरफा ते ओई!” कऊँकि ना तो बुरी गल्ला रे परमेश्वरो री परीक्षा ऊई सकोई और ना ई से केसी री परीक्षा आपू करोआ। 14 पर हर माणू आपणी ई इच्छा रे खिंजी की और फसी की परीक्षा रे पड़ोआ। 15 तेबे इच्छा गर्भवती ऊई की पापो खे जमाओई और जेबे पाप बड़ी जाओआ तो मौता खे पैदा करोआ। 16 ओ प्यारे साथी विश्वासियो! तोखा नि खाओ। 17 कऊँकि हर एक अच्छा बददान और हर एक खरा दान स्वर्गो तैएँ और जोतिया रे पिते री तरफा ते मिलोआ। परमेश्वर सदा एक जेड़ा रओआ और ना ई टवाँवे जेड़ा बदलोआ। 18 तिने आपणी ई इच्छा ते आसा खे सच्यो रे वचनो रे जरिए नया जीवन दितेया ताकि आसे तेसरे बणाए रे प्राणिया बीचा ते पईले फलो जेड़े ओऊँ। 19 ओ प्यारे साथी विश्वासियो! ये गल्ल तुसे जाणी लो; हर एक माणू सुणने खे आगे, बोलणे रे धीरज वाला और रोषो रे सब्रखोर ओ। 20 कऊँकि जेबे कोई माणू गुस्सा करोआ तो से तर्मा री जिन्दगी नि बिताई सकदा जेड़ा परमेश्वर चाओआ। 21 इजी री खातर मनो रा सारा मईल और सारी दुश्मणदारिया खे दूर करी की परमेश्वरो रे वचनो खे नरमाईया रे अपणाओ, जो दिलो रे राखी राखेया और जो तुसा रे प्राणो खे बचाई सकोआ। 22 परमेश्वरो रे वचनो पॉदि चलणे वाले बणो, बस सुणने वाले ई नि, जो आपणे आपू खे तोखा देओए। 23 कऊँकि जो कोई वचनो खे सुणने वाला ओ और तिजी पॉदि चलणे वाला नि ओ, तो से तेस माणूए जेड़ा ए जो आपणी असली शकल शीशे रे देखोआ। 24 कऊँकि से आपणे आपू खे देखी कि चली जाओआ और फटाफट पूली जाओआ कि आऊँ केड़ा था? 25 पर से आदमी जो त्यानो साथे परमेश्वरो रा सिद्ध उपदेश जो लोका खे पापो ते छुड़ाई देओआ, तिजी रा त्यानो साथे मनन करोआ और तिजी खे मानोआ और पुलदा नि जो तिने सुणी राखेया, एड़े लोका परमेश्वरो री तरफा ते आपणे कामा रे आशीष पाणी। 26 जे कोई आपणे आपू खे भगत समजो और आपणी जीबा पॉदि लगाम नि लगाओ, पर आपणे दिलो खे तोखा देओ, तो तेसरी भगित बेकार ए। 27 म्हारे परमेश्वर पिते रे नेड़े शुद्ध

और साफ निष्कलंक भगित ये कि अनाथ और बिदुआ रे क्लेशो रे तिना री खबर-सम्बाल लओ और आपू खे दुनिया रे बुरे कामा ते बचाई की राखो।

2 ओ प्यारे साथी विश्वासियो! तुसे म्हारे महिमामय प्रभु यीशु मसीह रे चले ए इजी खे तुसा बीचे पक्षपात नि ओ। 2 मानी लो जे एक माणू सुईने रे छल्ले और सुन्दर टाले पईनी की तुसा री सभा रे आओ और कंगालू बी मईले-चिथड़े टाले पईनी की आओ 3 और तुसे तेस सुन्दर टाले पईने रे खे बऊत इज्जती साथे बोलो, “तुसे तेती अच्छी जगा रे बैठी,” और तेस कंगालो खे बोलो, “तूँ एती खड़ा रओया मेरे पैरो मे थाले बैठ,” 4 तो क्या तुसे आपू-बीचे भेद-भाव नि कितेया और बुरे बिचारो ते न्याय करने वाले नि ठईरे? 5 ओ प्यारे साथी विश्वासियो सुणो! क्या परमेश्वर एसा दुनिया रे कंगालू नि चूणे कि विश्वासो रे तर्मा और तेस राज्य रे अक्कदार ओ, जेतेरा वादा परमेश्वर तिना ते कितेया, जो तेसते प्यार करोए? 6 पर तुसे तेस कंगालो रा मजाक उड़ाया। क्या अमीर लोक तुसा पॉदि अत्याचार नि करदे, क्या सेयो ई तुसा खे कचेरिया रे कसिटी-कसिटी कि नि लयी जाँदे? 7 क्या सेयो यीशु मसीह रे खरे नाओं री निन्दा नि करदे, जेसरे तुसा खे बोलोए। 8 तेबे बी तुसे एस पवित्र शास्त्रो रे वचनो रे मुताबिक, “तूँ आपणे पड़ोसिये साथे आपू जेड़ा प्यार राख,” सच्ची तेस राज्य रे बिधानो खे पूरी करोए, तो अच्छा ई करोए। 9 पर जे तुसे पक्षपात करोए, तो पाप करोए और बिधान तुसा खे अपराधी ठराओए। 10 कऊँकि जो कोई सारे बिधानो खे मानोआ, पर एक ई गल्ला रे चूकी जाओआ, तो से सबी गल्ला रे दोषी ठईरिया। 11 कऊँकि जिने ये बोलेया, “तूँ व्याभिचार नि करना” तिने ई ये बोलेया, “तँ अत्या नि करनी।” इजी री खातर जे तँ व्याभिचार नि कितेया, पर अत्या कित्ती, तेबे बी तूँ बिधानो रा उलंघन करने वाला ठईरिया। 12 तुसे तिना लोका जेड़े वचन बोलो और काम बी कओ, जिना रा न्याय आजादिया रा बिधानो रे मुताबिक ऊणा। 13 कऊँकि जिने दया नि कित्ती, तेसरा न्याय बिना दया ते ऊणा, दया न्याय पॉदि जयवंत ओई। 14 ओ प्यारे साथी विश्वासियो! जे कोई बोलो कि माखे प्रभु यीशु मसीह पॉदि विश्वास ए, पर दूजे खे कोई अच्छा काम नि करदा, तो तिजी ते क्या फाईदा? क्या एड़ा विश्वास कदी तेसखे बचाई सकोआ? 15 जे कोई विश्वासी पाई या बईण नागे-क्वाड़े ओ और तिना खे हर-रोज रोटिया री कमी ओ 16 और तुसा बीचा ते कोई तिना खे बोलो, “बेफिकर ऊई की जाओ, तुसे गरम रओ और रज्जे रे रओ,” पर जो चीजा शरीरो खे जरूरी ए से तिना खे नि देओ, तो क्या फाईदा? 17 तियाँ ई विश्वास बी, जे अच्छे कामो साथे नि ओ, तो से आपणे सबओ रे मरे राए। 18 बल्कि कोई बोली सकोआ, “ताखे विश्वास ए और आऊँ अच्छे काम कऊँआ।” पर आऊँ बोलीँआ, “तूँ आपणा विश्वास माखे अच्छे कामो ते बिना साबित कर और मां आपणा विश्वास आपणे अच्छे कामो साथे साबित करना।” 19 ताखे विश्वास ए कि एक ई परमेश्वर ए और तूँ अच्छा करेआ। पर दुष्टात्मा बी विश्वास करोईया और थरथराओईया। 20 ओ नकम्मे माणू! क्या तूँ ये पनि जाणदा कि अच्छे कामो ते बिना विश्वास बेकार ए? 21 जेबे म्हारे पिते अब्राहमे आपणा पुत्र इसहाक बेदिया पॉदि चढ़ाया, तो क्या से कामो ते तर्मा नि ठईरिया? 22 तो तँ देखी ला कि विश्वासो तेसरे अच्छे कामो साथे मिली कि असर पाया और तेसरा विश्वास अच्छे कामो रे जरिए सिद्ध ऊआ। 23 और पवित्र शास्त्रो रा ये वचन पूरा ऊआ, “अब्राहमे परमेश्वरो पॉदि विश्वास कितेया और तेसरे विश्वासो रे जरिए परमेश्वर से एक तर्मा माणूए रे रूपो रे मानेया” और से परमेश्वरो रा दोस्त ऊआ। 24 तो तुसे देखी ला कि माणू बस विश्वासो तैँ नि, बल्कि अच्छे कामो ते बी तर्मा ठईरोआ। 25 तियाँ ई राहाब वेश्या बी, जेबे तेसे संदेश देणे वाले दूता खे आपणे कअरे शरण दित्ती और दूजी बाटा रिये तिना के दुश्मणा ते बची की निकलने रे मताद कित्ती, तो क्या कामे की तर्मा नि ठईरी? 26 इजी री खातर जियाँ शरीर आत्मा ते बिना मरे राए, तियाँ ई विश्वास बी अच्छे कामो ते बिना मरे राए।

3 ओ प्यारे साथी विश्वासियो! तुसा बीचा ते बऊत मण्डलिया रे उपदेशक नि बणो, कऊँकि तुसे जाणोए कि आसे उपदेशक ओर बी दोषी ठईरने।

2 आसे सब कई बार चूकी जाऊँए, पर जो कोई बोलणे रे नि चूकदा, सेई तो सिद्ध मांणु ए और से आपणे सारे शरीरो खे वशो रे करी सकोआ। 3 जेबे आसे कोड्या खे आपणे वशो रे करने खे तिना रे मुंओ रे लगाम लगाऊँए, तो आसे तिना रे सारे शरीरो खे बी फेरी सकूँए। 4 देखो जाहज बी हालाँकि इतणे बडे ओए, और तेज अवा रे चलाए जाओए, तेबे बी एक छोटी जी पतवारा रे जरिए मांझियो री इच्छा रे मूताबिक कुमाए जाओए। 5 तियाँ ई जीब बी शरीरो रा एक छोटा जा अंग ए और बड़ी-बड़ी त्वालिया मारोई। देखो थोड़ी जी आगी साथे कितणे बडे बणो रे आग लगी जाओई। 6 जीब बी एक आगी जेड़ी ए, जीब म्हारे शरीरो रे अंगा रे पापो रा एक लोक ए और सारे शरीरो रे कलंक लगाओई और पूरी जिन्दगिया री गतिया रे आग लगाई देओई और जीब बी नरको री आगी जेड़ी फूकदी रओई। (Geenna g1067) 7 हर प्रकारा रे बणो रे डंगर, पंछी, रंगणे वाले जन्तु और पाणिए रे रणे वाले तो मांणुआ रे वशो रे ऊई सकोए और ऊई बी गये रे। 8 पर जीबा खे मांणुआ बीचा ते कोई बी वशो रे नि करी सकदा, से एक एड़ी बयाद ए, जो कदी बी रूकदी नि, से जान लणे वाले सापो जेडे विषे की फरी रिये। 9 इजी जीबा साथे आसे प्रभु और पिते री स्तुति करूँए और इजी साथे मांणुआ खे जो परमेशरो रे रूपो रे बणाई राखे, साप देऊँए। 10 एक ई मुंओ ते धन्यवाद और सारम दोनो निकलोए। ओ प्यारे साथी विश्वासियो! एड़ा नि उणा चाईयो। 11 क्या सूबला रे एकी ई मुंओ ते मीठा और खारा दोनो पाणी निकलोए? 12 ओ प्यारे साथी विश्वासियो! क्या दाऊगले रे डालो रे जैतनु या अँगुरा री बेला रे दाऊगले लगी सकोए? तियाँ ई खारी सूबला ते मीठा पाणी नि निकली सकदा। 13 तुसा बीचा ते ज्ञानी और समजदार कृणे? जो मांणु एड़ा ए, से आपणे कामो खे खरे चाल-चलणो ते तेसा नरमाईया साथे सामणे ल्याओ, जो ज्ञानो ते पैदा ओई। 14 पर तुसे आपणे-आपणे मनो रे कऊड़ी जलन और स्वार्थ राखोए, तो सच्चो रे बिरोदो रे कमण्ड नि करना और ना ई चूठ बोलणा। 15 ये ज्ञान से निए, जो स्वर्गो ते उतरोआ, बलिक संसारिक, शारीरिक और शैतानी ए। 16 इजी री खातर जेती जलन और स्वार्थ ओआ, तेती बखेड़ा और हर प्रकारा रे खुरे काम ओए। 17 पर जो ज्ञान स्वर्गो ते आओआ, से पर्देले तो पवित्र ओआ, तेबे मिलणसार, नरम, खरे बिचार, दया और खरे फले की परे रा और पक्षपात और कपटो ते बिना ओआ 18 और जो लोक मेल-जोल करणे वाले ए तिना शान्तिया रा बीज बोणा और धार्मिकता री फसल बाडणी।

4 तुसा बीचे लड़ाईया और चगड़े केथा ते आईगे? पक्का तिना बुरिया इच्छा ते जो तुसा रे अंगा रे लड़दे-चगड़दे रओए। 2 जेबे तुसे इच्छा राखोए पर तुसा खे मिलदा नि तो तुसे अत्या करने खे त्यार ऊई जाओए। तुसे दूजे री चीजा हड़पणे री इच्छा राखोए और जेबे तुसा खे कुछ नि मिलदा, तेबे तुसे जली की लड़दे-चगड़दे रओए। तुसा खे इजी खे नि मिलदा, कऊँकि तुसे परमेशरो ते मांगदे नि। 3 तुसे माँगोए और फेर बी तुसा खे मिलदा नि, कऊँकि बुरी इच्छा ते माँगोए, ताकि आपणे भोग-बिलासो रे उड़ाई देओ। 4 ओ अविश्वासी लोको! क्या तुसे नि जाणदे कि दुनिया री चीजा साथे दोस्ती राखणी, परमेशरो साथे बैर राखणा रे बराबर ए? तो जो कोई दुनिया रा दोस्त बणना चाओआ, से आपणे आपू खे परमेशरो रा बैरी बणाओआ। 5 क्या तुसे ये समजोए कि पवित्र शास्त्र बेकारो रेई बोलोआ कि जिने परमेशरे आत्मा आसा रे पीतरे बसाई राखी, से बड़ी इच्छा राखोआ कि आसे सिर्फ तेसरी ई आराधना करिए। 6 से तो ओर बी कृपा देओआ, तेबेई तो पवित्र शास्त्रो रे ये लिखी राखेया, “परमेशर कमण्डिया रा बरोद करोआ, पर जो दीन ए तिना पदि कृपा करोआ।” 7 इजी री खातर परमेशरो रे अधीन ऊई जाओ और शैतानो रा मुकाबला करो, तो से तुसा गे ते नठी जाणा। 8 परमेशरो नेडे आओ, तो से बी तुसा रे नेडे आऊणा। ओ पापियो! आपणी जिन्दगिया ते पापो खे दूर करो और ओ दोगले लोको! आपणे दिलो खे पवित्र करो। 9 आपणे पापो री बजअ ते दुः खी ओ, शोग करो, रोओ। तुसा री आस्सी शोगो रे और तुसा री खुशी उदासिया रे बदली जाओ। 10 प्रभुए सामणे दीन बणो,

तो तेस तुसे आदरो जोगे बनाणे। 11 ओ प्यारे साथी विश्वासियो! एकी-दूजे री निन्दा नि करो, जो आपणे पाईया री निन्दा करोआ या पाईया पदि दोष लगाओआ, से बिधानो री निन्दा करोआ और बिधानो पदि दोष लगाओआ, तो तू बिधानो पदि चलणे वाला निए, पर तेस पदि हाकिम ठईरिया। 12 बिधान देणे वाला और हाकिम एक ईए, जेसखे बचाणे और नाश करने री सामर्थ ए। तू कृणे जो आपणे पड़ोसिया पदि दोष लगाएया? 13 तुसे जो ये बोलोए, “आज या काल आसे केसी ओरी नगरो रे जाई की तेती एक साल बिताऊँगे और व्यापार करी की फाईदा उठाऊँगे।” 14 पर ये नि जाणदे कि काल क्या उणा। सुणी तो लओ कि तुसा री जिन्दगी आयी ई क्या? तुसे तो मानो प्याफो जेडे ए, जो थोड़ी देरा खे दिशोआ और तेबे राची जाओआ। 15 इजी रे बदले तुसा खे ये बोलणा चाईयो, “जे प्रभु चाओगा, तो आसे जिऊँदे रऊँगे और ये कि से काम बी करूँगे।” 16 पर एबे तुसे आपणी त्वालिया पदि कमण्ड करोए; एड़ा सारा कमण्ड बुरा ओआ। 17 इजी री खातर जो कोई पलाई करना जाणोआ और करदा नि, तेसखे ये पाप ए।

5 ओ अविश्वासी अमीर लोको! सुणी तो लओ! तुसे आपणे आऊणे वाले क्लेशो पदि चींगी-चींगी की रोओ। 2 तुसा रा धन नाश ऊईगा और तुसा रे टालेया खे कीडे खाई गे। 3 तुसा रे सुईने चाँदियो खे खई लगी गी और परमेशरो जेस दिने तुसा रा न्याय करना तेस दिने तेसा खईया तुसा रे खलाफ गवाई देणी और आगी जेड़ा तुसा रा मांस खाई देणा। तुसे आखरी जुगो रे धनो पदि धन कट्टा करी राखेया। 4 देखो जिने मजदूरे तुसा रे डोरू बाडे, तिना री मजदूरी, जो तुसे तोखा देई की राखी ली री, से परमेशरो रे नेडे तुसा रे खलाफ चींगणे लगी री और तिना मजदूरा री दुहाई जिने तुसा री फसल कट्टी किन्ती, सेनाओ रे प्रभुए रे कानो तक पऊँछी गी री। 5 तुसे तरतिया पदि भोग-विलासो रे लगे रे रये और बड़ा पारी सुख पाया। तुसे आपणे पापो रा कअड़ा परी ता रा और आपू खे परमेशरो री सजा खे त्यार करी राखेया। 6 तुसे बेकसुर लोक दोषी ठराई कि काई ते, से तुसा रे बिरोद नि करदे। 7 तो ओ प्यारे साथी विश्वासियो! प्रभुए रे आऊणे तक सब्र राखो। देखो, जिम्मीदार तरतिया री किमती फसला री उम्मीद राखदा ऊआ, पर्देली और आखरी बरखा ऊणे तक सब्र राखोआ। 8 इयाँ ई तुसे बी सब्र राखो और आपणे दिलो खे मजबूत करो, कऊँकि प्रभुए रा आऊणा नेडे ए। 9 ओ प्यारे साथी विश्वासियो! एकी-दूजे पदि दोष नि लगाओ, ताकि तुसे दोषी नि ठईरो, देखो, न्याय करने वाला द्वारो पदि खड़ी रा। 10 ओ प्यारे साथी विश्वासियो! जिने भविष्यबक्ते प्रभुए रे नाओं ते गल्ला कितिया, तिना खे दुः ख उठाणे और सब्र राखणे रा आपू खे आदर्श समजो। 11 देखो, आसे सब्र राखणे वालेया खे धन्य बोलूँए, तुसे तो अय्युबो रे सब्रो रे बारे रे तो सुणी राखेया और प्रभुए री तरफा ते जो तेसरा फल ऊआ, से बी जाणी ला रा, जेते साथे प्रभुए री बऊत बड़ी करूणा और कृपा प्रगट ओई। 12 पर ओ प्यारे साथी विश्वासियो! सबी ते बड़ी ये गल्ल ए कि कसम नि खाणी, ना स्वर्गो री, ना तरतिया री, ना किजी ओरी चीजा री, पर तुसा री गल्ल आ री आ और ना री ना ऊणी चाईयो, ताकि तुसे परमेशरो रे दण्डो जोगे नि ठईरो। 13 जे तुसा बीचा ते कोई दुः खी ओ तो से प्रार्थना करो। जे खुशिया रे ओ तो, से स्तुतिया रे भजन गाया करो। 14 जे तुसा बीचे कोई रोगी ए, तो मण्डलिया रे बुजुर्गा खे बुलाओ और सेयो प्रभुए रे नाओं ते तेस पदि तेल मली कि तेसखे प्रार्थना करो। 15 और प्रभुए रे विश्वासो री प्रार्थना रे जरिए रोगी बची जाणा और प्रभुए से ठवाली की ठीक करना और जे तिने पाप बी करी राखे ऊगे, तो सेयो बी माफ ऊई जाणे। 16 इजी री खातर तुसे आपू-बीचे एकी-दूजे रे सामणे आपणे-आपणे पापो खे मानी लो और एकी-दूजे खे प्रार्थना करो, जेते की ठीक ऊई जाओ, तर्मा जणे री प्रार्थना रे असरो ते बऊत कुछ ऊई सकोआ। 17 भविष्यबक्ता एलिव्याह बी तो आसा जेड़ा दुः ख-सुख सईन करने वाला मांणु था और तिने पूरे तनो-मनो ते प्रार्थना किन्ती कि बादल नि बरसो और साडे तीन साल तक जमीना पदि बादल नि बरसे। 18 तेबे तिने प्रार्थना किन्ती तो सर्गो ते बर्खा ऊई और जमीना रे फसल लगी। 19 ओ प्यारे

साथी विश्वासियो! याद राखो, जे तुसा बीचा ते कोई सच्चो री बाटा ते पटकी जाओ और कोई तेसखे मन फिराणे रे मताद करी की फेरी की ली आओ, 20 तो से ये जाणी लो कि जो कोई केसी पटके रे पापिए खे सच्चाईया री तरफा खे फेरी की ली आओगा, तेस एक प्राण मौता ते बचाणा और कई पापो पाँदे पड़दा पाणा।

1 पतरस

1 आऊ पतरस एसा चिट्ठिया खे लिखणे लगी रा, जो यीशु मसीह रा प्रेरित ए। आऊ ये चिट्ठी परमेशरो रे तिना चुणे रे लोका खे लिखूआ, जो पुनुतस, गलातिया, कम्पदुकिया, आसिया और बितूनिया रे प्रदेशो रे ओरे-पोरे ऊई की परदेशिया रे रूपो रओए। 2 पिता परमेशरे बऊत पईले ई तुसे आपणे लोक करि कि चुणी ले और पवित्र आत्मा रे कामो रे जरिए तुसे पवित्र कित्ते। परमेशरे ये इजी खे कित्तेया ताकि तुसे यीशु मसीह री आज्ञा खे मानो और तेसरे खूनो रे जरिए शुद्ध ऊई जाओ। आऊ प्रार्थना कर्ऊआ कि परमेशर तुसा खे बऊत-बऊत कृपा और शान्ति देओ। 3 म्हारे प्रभु यीशु मसीह रे पिता परमेशरो रा धन्यवाद ओ। तिने प्रभु यीशु मसीह खे मरे रेया बीचा ते जिऊं दे ऊणे रे जरिए, आपणी बड़ी दया ते आसा खे जिऊं दी उम्मीदा खे नया जन्म दितेया। 4 आसे तेसा जायदाता खे पाणे रा इन्तजार करने लगी रे जो परमेशरे आसा खे त्यार करी राखेया। से कदी नि खत्म ऊणे वाली, कदी नि खराब ऊणे वाली और अजर जायदाता ए, जो परमेशरे तुसा खे स्वर्गो रे राखी री ए, 5 परमेशर आपणी सामर्था ते तुसा री रक्षा करोआ कऊँकि तुसे यीशुए पाँदे विश्वास करोए। तेस तुसा री मसीह रे वापस आऊणे तक रक्षा करदे रणा। तेबे तुसा जाणी लणा कि परमेशरे तुसा खे पापो ते और मौता ते उद्धार देई राखेया। 6 इजी बजअ ते तुसे मग्न ओए, हालाँकि जरूरी ए कि एबे कुछ दिनो तक कई प्रकारा रिया परीक्षा री बजअ ते उदास रओ। 7 ये इजी खे ओआ कि तुसा रा विश्वास परीक्षा रे खरा निकलो। नाशवान सूईने खे बी परखणे और शुद्ध करने खे आगी रे तपाया जाओआ पर तुसा रा विश्वास नाशवान सूईने ते केथी जादु किमती ए। ईयाँ तुसा रा परखेया रा विश्वास यीशु मसीह रे वापस आऊणे पाँदे तारीफ, महिमा और आदरो री बजअ बणो। 8 तेस साथे तुसे बिना देखे ई प्यार राखोए और एबे तो तेस पाँदे बिना देखे विश्वास करी की एड़े खुश और मग्न ऊई जाओए, जेतेरे बारे रे कुछ बोली नि सकदे और जो महिमा साथे फरे राए। 9 और एस विश्वासो रा इनाम तुसा री आत्मा रा उद्धार ए। 10 इजी उद्धारो रे बारे रे सेयो भविष्यबक्ता और बी जादा जाणना चाओ थे। तिने लोके भविष्यवाणी कित्ती कि परमेशरे तुसा लोका रा उद्धार करने खे केड़ी कृपा करनी जेते जोगे तुसे नि थे। तिने लोके त्यानो साथे इजी रा उतर टोलने खे जांच-पड़ताल कित्ती। 11 मसीह रा आत्मा तिना भविष्यबक्तेया रे था और तिना लोका ते बोलणे लगी रा था कि मसीह कियाँ दुःख सईन करना और तिजी ते बाद कियाँ महिमा दित्ती जाणी। ईयाँ तिने लोक ठीक-ठीक ये पता लगाणे खे कि मसीह कुण ऊणा और ये गल्ल कदी ऊणी जांच पड़ताल कित्ती। 12 पर परमेशरे तिना भविष्यबक्ता खे बोलेया कि तिना रा ये संदेश आपू खे नि ए पर आऊणे वाले दिना रे तुसा सबी खे ए। से संदेश यीशुए रे बारे सुसमाचार ए जेतेखे तुसे एबे सुणी चुकी रे। परमेशरे आपणा पवित्र आत्मा लोका री मताद करने खे स्वर्गो ते पेजेया कि सेयो तुसा खे सुसमाचार सुणाओ। ये सब कुछ इतना नौखा ए कि स्वर्गदूत बी इना गल्ला खे त्यानो साथे देखणे लगी रे। 13 इजी बजअ ते आपणे-आपणे मनो खे एड़ा त्यार करो, जेड़ा लोक काम करने खे आपणा लक बानोए और ओशा रे रई की तेसा कृपा री पूरी उम्मीद राखो, जो प्रभु यीशु मसीह रे आऊणे रे बखते तुसा खे मिलणे वाली ए। 14 परमेशरो री आज्ञा मानो जियाँ अच्छे बच्चे आपणे बाओ री आज्ञा मानोए। बुरे काम मत करो जियाँ तुसे पईले करेया करो थे जेबे परमेशरो खे नि जाणो थे। 15 पर जेड़ा तुसा रा बुलाणे वाला पवित्र ए, तियाँ ई तुसे बी आपणे सारे चाल-चलणो रे पवित्र बणो। 16 कऊँकि पवित्र शास्त्रो रे लिखी राखेया, “पवित्र बणो, कऊँकि आऊँ पवित्र ए।” 17 और जबकि तुसे ओ पिता बोली की तेसते प्रार्थना करोए, जो बिना पक्षपातो ते हर एकी रे कामो रे मुताबिक न्याय करोआ, तो जेबे तुसे तरतिया पाँदे परदेशिया रे रूपो रे रणे लगी रे तो परमेशरो खे जरूर आदर देई कि जिन्दगी बिताओ। 18 कऊँकि तुसे जाणोए कि तुसा रा नकम्मा चाल-चलण, जो बाप-दादेया ते चलदा आओआ, तिजी

ते तुसा रा छुटकारा सुईने-चौँदी, मतलब-नाश ऊणे वालिया चीजा रे जरिए नि ऊआ। 19 पर निर्दोष और निष्कलंक मिन्दू, मतलब-मसीह रे किमती खूनो रे जरिए ऊआ। 20 एसा दुनिया खे बणाणे ते बऊत पईले ई परमेशरे यीशु मसीह खे उद्धारकर्ता रे रूपो रे ठराया। पर से आखरी जुगो रे तुसा री पलाईया खे प्रगत ऊआ। 21 कऊँकि यीशु मसीह जो कित्तेया तेसरे जरिए एबे तुसे परमेशरो पाँदे विश्वास करोए, जिने से मरे रेया बीचा ते जिऊंदा कित्तेया और महिमा दित्ती, ताकि तुसा रा विश्वास और उम्मीद परमेशरो पाँदे ओ। 22 कऊँकि तुसे सच्चाईया खे मानणे रे जरिए पापो ते पवित्र करी राखे तेबेई एबे तुसे साफ दिल और तन-मन लगाई की एकी-दूजे साथे प्यार करो। 23 तुसे नयी जिन्दगी परमेशरो री तरफा ते पायी राखी। तुसा लोका री ये जिन्दगी नाशवान बीजो ते नि पर अविनाशी बीजो ते मतलब परमेशरो रे जिऊं दे और सदा ठईरने वाले वचनो ते ए। (aiōn g165) 24 कऊँकि पवित्र शास्त्र बोलोआ, “हर एक प्राणी काओ जेड़ा ए और हर एकी री शोभा काओ रे फूलो जेड़ी ए, काआ सूकी जाओआ और फूल चढ़ी जाओआ, 25 पर प्रभुए रा वचन जुगो-जुगो तक टीके रा रणा” और ये वचन यीशु मसीह रा सुसमाचार ए, जो तुसा खे सुणाया था। (aiōn g165)

2 इजी री खातर तुसे लोक सब प्रकारा रा बुरा बर्ताव छाड़ी देओ। ओरी खे तोखा नि देओ, कपट्टी नि बणो। ओरी लोका ते जलन नि करो और ओरी री बुराई नि करो। 2 बल्कि नये जम्मरे रे बच्चे जेड़े साफ आत्मिक दूदो री उम्मीद करो, ताकि तेसरे जरिए उद्धार पाणे खे बड़दे जाओ। 3 जियाँ कि पवित्र शास्त्र बोलोआ, “तुसे स्वाद चाखी की जाणी ला रा कि प्रभु अच्छा ए।” 4 एबे तुसे यीशु मसीह गे आयी रे। से परमेशरो रे मन्दरो रा जिऊंदा पात्थर ए, जो माँगूए नकम्मा ठराई की निकयाली ता, पर से परमेशरो रा चूणे राए और से तेसखे बऊत किमती ए। 5 तुसे आपू बी जिऊं दे पात्थरो जेड़े आत्मिक कअर बणदे जाओए, जेते साथे पुरोईता रा पवित्र समाज बणी की एड़े आत्मिक बलिदान चढ़ाओ, जो प्रभु यीशु मसीह रे जरिए परमेशरो खे पसंद ओ। 6 इजी बजअ ते पवित्र शास्त्रो रे बी लिखी राखेया, “देखो, आऊँ सिय्योने दे कूणे रे सिरे रा चूणे रा और किमती पात्थर लगाऊँआ और जेस केसी तेस पाँदे विश्वास करना, से कियाँ बी शर्मिदा नि ऊणा।” 7 तो तुसा खे जो विश्वास करोए, से पात्थर तो किमती ए, पर जो विश्वास नि करदे तिना खे “जो पात्थर राजमिस्त्रिए नकम्मा ठराया था, सेई कूणे रा सिरा ऊईगा।” 8 और फेर पवित्र शास्त्र ये बी बोलोआ, “ठेस लगणे रा पात्थर, लोका खे ठोकर खाणे री चट्टान ऊईगी।” कऊँकि सेयो तो वचन ना मानी की ठोकर खाओए और इजी खेई सेयो ठराए बी थे। 9 पर तुसे एक चूणे रा वंश और राजपदधारी, पुरोईता रा समाज, पवित्र लोक और परमेशरो री निज प्रजा ए, इजी री खातर जिने तुसे न्हरे ते आपणी नऊळी जोतिया रे बुलाए, तेसरे गुण सामणे ल्याओ। 10 पईले तो तुसे परमेशरो री प्रजा नि थे, पर एबे तेसरी प्रजा ए। पईले तो तुसा पाँदे दया नि ऊई थी, पर एबे तुसा पाँदे दया ऊई री। 11 ओ प्यारेओ, आऊँ तुसा ते बिनती कर्ऊआ कि तुसे आपणे आपू खे परदेशी और यात्री जाणी की तेसा दुनिया री बुरी इच्छा ते जो आत्मा साथे युद्ध करोई, बचे रे रओ। 12 दुजिया जातिया बीचे तुसा रा चाल-चलण खरा ओ, कऊँकि जिना-जिना गल्ला रे सेयो तुसा खे कुकर्म जाणी की बदनाम करोए, सेयो तुसा रे पले कामा खे देखी की तिना पले कामा री बजअ ते तिना रे आऊणे रे दिने परमेशरो री महिमा करो। 13 प्रभु यीशुए री ये इच्छा ए कि माँगूआ रे जरिए ठराए रे हर शासको रे अधीन रओ; राजे रे इजी खे कऊँकि से सबी रा प्रदान ए। 14 और राज्यपालो रे बी अधीन रओ, कऊँकि से बुरे काम करने वालेया खे सजा देणे और खरे काम करने वालेया री तारीफ करने खे तेसरी तरफा ते पेजी राखे। 15 कऊँकि परमेशर तुसा ते ए चाओआ कि तुसे खरे काम करने रे जरिए तिना मूर्ख लोका रे मुँओ खे बन्द करी देओ जो अज्ञानता री गल्ला बोलोए। 16 तुसे लोक एबे पापो रे गुलाम नि ए कऊँकि प्रभु यीशुए तुसे पईले ई पापो ते आजाद करी ते रे। पर एसा आजादिया खे आपणे आपू खे बुराईया री आइ नि बणाओ। पर अच्छे काम

करी की ये दखाओ कि तुसे सच्ची ई परमेशरे रे दास ए। 17 सबी रा आदर करो, विश्वासी पाईया साथे प्यार राखो, परमेशरो ते डरो, राजे रा सम्मान करो। 18 ओ गुलाम विश्वासियो, हर प्रकारो ते पूरे आदरो साथे आपणे मालका रे अधीन रओ और ना बस अच्छे और पले मालका रे अधीन रओ, पर बुरे मालका रे बी अधीन रओ। 19 कऊँकि जे कोई परमेशरो रे बारे रे ये सोची की कि परमेशरो री येई इच्छा ए अन्याय ते दुः ख उठांदा ऊआ क्लेश सईन करोआ, तो ये तिना खे अच्छा लगेओ। 20 कऊँकि जे तुसे अपराध करी की मुक्के खाए और सब्र राखेया, तो तिदे बडयाईया री क्या गल्ल ए? पर जे खरे काम करी की दुः ख उठाओए और सब्र राखोए, तो ये परमेशरो खे अच्छा लगेओ। 21 तुसे इजी खेई बुलाई बी राखे, कऊँकि मसीह बी तुसा री खातर दुः ख उठाई की तुसा खे एक आदर्श देई गा रा ताकि तुसे बी तेसरे चिह्ने पाँदे चलो। 22 ना तो तिने पाप कितेया और ना ई तेसरे मुंओ ते कोई छलो री गल्ल निकली। 23 से गाली सुणी की गाली नि देओ था और दुः ख उठाई की केसी खे बी तमकी नि देओ था, पर आपू खे सच्चा न्याय करने वाले रे आथो रे सम्बालो था। 24 जेबे मसीह मरेया तिने क्रूसो पाँदे आसे रे पापो री खातर सजा सईन कितो। तिने एड़ा इजी खे कितेया ताकि आसे पाप करना छाडी देईए और धार्मिकता खे जिऊणा शुरू करिए। तेसरे ई जखना साथे तुसे ठीक ऊए। 25 पईले तुसे लोक पटकी रिया पेडा जेडे थे, पर एबे तुसे आपणे प्राणो रे रखवाले और चरवाहे यीशु मसीह गे वापस आईगे रे।

3 ओ लाड़ियो! ईयां तुसे बी आपणेया लाड़ेया रे अधीन रओ। ताकि जे इना बीचा ते किने बी सुसमाचारो पाँदे विश्वास नि करी राखेया ओ तो सेयो तुसा रे कुछ बोले बिना ई तुसा रे सबाओ रे जरिए विश्वासो रे आयी सकणे, 2 कऊँकि सेयो तुसा रे पवित्र चाल-चलण ओ अच्छे सबाओ खे देखेदे रओए। 3 तुसा रा श्रृंगार दखाऊटी नि ओ, जियां लग-लग किस्मा ते बाल गूँदणा, सुईने रे गडूँणे या कईया प्रकारा रे टाले पईनणा। 4 बलिक तुसा री छिपी री गुप्त इनसानियत, नरमाई, मनो री दीनता री अविनाशी सजाऊटा ते सज्जी री रओ, कऊँकि परमेशरो री नजरा रे इजी री कीमत बड़ी ए। 5 पईलके जमाने रे पवित्र जवाणसा बी, जो परमेशरो पाँदे उम्मीद राखो थिया, आपू खे ईयां ई सजाओ थिया और आपणे-आपणे लाड़ेया रे अधीन रओ थिया। 6 जेड़ी सारा अब्राहमो री आज्ञा रे रओ थी और तेसखे स्वामी बोलो थी। तो जे तुसे बी खरा करो और केसी बी डरो ते नि डरो, तो तेसरी बेटिया ठईरनियां। 7 तियाँ ई ओ लाड़ियो, तुसे बी आपणी-आपणी लाड़िया साथे समजदारिया ते जिन्दगी जिओ। तुसे ये याद राखो कि सेयो तुसा ते कमजोर ऊई सकोईया, इजी खे तुसे तिना रा आदर करो। कऊँकि तुसे दोनो तेस बरदानो रे इस्सेदार ए जो परमेशरे कृपा ते देई राखेया, और से बरदान अनन्त जिन्दगी ए। एड़ा ई करो ताकि परमेशर तुसा री प्रार्थना खे सुणो। 8 आखरी रे ये कि तुसे सब के सब एक मन, दयालु, पाईचारे रा प्यार राखणे वाले, करुणामय और नम्र बणो। 9 बुराईया रे बदले बुराई नि करो और ना गालिया रे बदले गाली देओ, पर इजी रे बदले आशीष ई देओ। परमेशरे तुसे इजी खे बुलाई राखे कि तुसे ओरी खे आशीष देओ। जे तुसे एड़ा करोगे तो परमेशरो तुसा खे बी आशीष देणी। 10 कऊँकि पवित्र शास्त्र बोलोआ, “जो कोई जिन्दगिया री इच्छा राखोआ और खरे दिन देखणा चाओआ, से आपणी जीबा खे बुराईया ते और आपणेया ओठा खे छल-कपटो रिया गल्ला करने ते रोकी की राखो। 11 से बुराईया रा साथ छाडो और पलाई ई करो, से मेल-जोलो खे टोलो और तिजी री कोशिश रे रओ। 12 कऊँकि प्रभुए री आखी तर्मिया पंदि लगी री रओईया और तेसरे कान तेसरी प्रार्थना री तरफा खे लगे रे रओए, पर प्रभु बुराई करने वालेया ते दूर रओआ।” 13 जे तुसे सदा पलाई करने रे आगे रओगे, तो तुसा री बुराई करने वाला कोई नि रणा? 14 जे तुसे सच्ची ई धार्मिकता रे कामो री बजअ ते दुः ख उठाओए, तो तुसे धन्य ए। जेडा कि यशायाह भविष्यबक्ता लिखोआ, “तिना लोका ते नि डरो जो तुसा खे तमकाओए और तिना गल्ला ते नि डरना कि तिना लोका क्या करना।”

15 पर मसीह खे आपणे दिलो रे आदरो साथे प्रभुए रे रूपो रे बसाई लओ। जे कोई तुसा ते तुसा री उम्मीदा रे बारे रे कुछ पूछो जेतरे आसे सब विश्वासी इस्सेदार ए, तो तेसखे जवाब देणे खे सदा त्यार रओ। 16 पर ये नरमाईया रे और डरो साथे करो और आपणा विवेक बी साफ राखो। ताकि जिना गल्ला रे बारे रे, तुसा री बेज्जती ओई, तिना रे बारे रे सेयो जो मसीह दे तुसा रे खरे चाल-चलणो री बेज्जती करोए, शर्मिंदा ओ। 17 कऊँकि जे परमेशरो री येई इच्छा ए कि तुसे पलाई करने री बजअ ते दुः ख उठाओ, तो ये बुराई करने री बजअ ते दुः ख उठाणे ते खरा ए। 18 आँऊ ये इजी खे बोलूँआ कऊँकि मसीहे बी दुःख सईन कितेया और आसा रे पापो री खातर मरेया। से एक ई बार मरेया और इजी खे दुराणे री जरूरत निए। से एक तर्मी मांण था जो पापिया री खातर मरेया ताकि आसा खे परमेशरो गे पऊँछाओ। से शरीरो ते तो काई ता, पर आत्मा ते जिऊँदा कितेया। 19 तेबे तेसरी आत्मे जाई की तिना कैदी आत्मा खे प्रचार कितेया जेतखे परमेशरे तेते जगा रे कैद करी राखेया जेती मरे रे लोका री आत्मा ए। 20 ये सेई आत्मा ए जेसे तेस बीते रे बखतो रे परमेशरो री आज्ञा नि मानी। जेबे नूह आपणा जाह्न बनाणे लगी रा था तेस बखते परमेशर सब्रो साथे ये देखणे खे इन्तजार करने समी रा था कि यो लोक आपणा मन फिराओए कि नि। पर तेस जाह्नो रे लिफा आठ लोक ई खतरनाक जलप्रलय रे डूबणे ते बची सके। 21 से पाणी बपतिस्मे रा चिह्न ए जो एबे तुसा खे बी बचाओआ। बपतिस्मे रा मतलब शरीरो रा मईल तोणा नि बलिक साफ दिलो ते आपू खे परमेशरो गे सम्बालना ए। पर ये बपतिस्मा यीशु मसीह रे मरे रेया बीचा ते जिऊँदे ऊणे रे जरिए आसा रा उद्धार करोआ। 22 और यीशु मसीह स्वर्गो रे जाई की परमेशरो रे दाँणे कनारे बैठी गा और स्वर्गदूत, अधिकारी और सामर्थी तेसरे अधीन करी ते।

4 इजी री खातर जेबे मसीहे आपणे शरीरो रे ऊई की दुः ख उठाया, तो तुसे बी सेई इच्छा राखी की दुःख सईन करने खे त्यार रओ। कऊँकि जे तुसे मसीह खे दुःख सईन करने खे त्यार ओ, तो तुसे पाप करना छाडीता। 2 ताकि आऊणे वाले बखतो रे आपणा बाकि शारीरिक जीवन, मांणआ री बुरी इच्छा रे मुताबिक नि, बलिक परमेशरो री इच्छा रे मुताबिक बिताओ। 3 तुसे पईले ई आपणा बऊत बखत दुजिया जातिया जेडा बुरी इच्छा रे मुताबिक काम करने रे बर्बाद करी ता। सेयो बुरे काम ये ए लुचपणो री बुरी इच्छा, मतवालापण, लीलाक्रीडा, शराबी और घृणित मूर्तिपूजा, सेई बऊत ऊआ। 4 इजी री खातर सेयो हैरान ओए कि तुसे एड़े पारी लुचपणो रे तिना रा साथ नि देंदे। तेबेई एबे सेयो लोक तुसा खे बुरा-पला बोलोए। 5 पर तिना लोका खे जिऊँदे और मरे रेया रा न्याय करने वाले परमेशरो खे आपणे चाल-चलणो रा लेखा देणा पड़ना। 6 येई बजअ ए कि मरे रेया खे बी मसीह रा सुसमाचार सुणाया। ताकि शरीरो रे तो मांणआ रे मुताबिक तिना रा न्याय ओ, पर आत्मा रे सेयो परमेशरो रे मुताबिक जिऊँदे रओ। 7 सबी गल्ला रा अंत चट ऊणे वाला ए। इजी री खातर ओशा रे रओ और सब्र राखो और प्रार्थना करदे रओ। 8 सबी ते बड़ी गल्ल तो ये ए कि एकी-दूजे ते जादा प्यार राखो, कऊँकि प्यार कई पापो खे टखी देओआ। 9 बिना कुडकुडाए एकी-दूजे री आओ-बैठ करो। 10 हर एकी खे परमेशरे ते बरदान मिली रा, से तेस बरदानो रा इस्तेमाल ओरी री मताद करने खे करो। सेयो इना बरदानो रा इस्तेमाल परमेशरो रे एक अच्छे दासो रे रूपो रे रओ। 11 जे केसी खे प्रचार करने रा बरदान ए तो सेयो परमेशरो रा वचन प्रचार करो। जे केसी खे ओरी लोका री मताद करने रा बरदान ए तो सेयो तिजी खे तेसा शक्तिया साथे करो, जो परमेशर तिना खे देओआ। तेबे जो कुछ बी तुसे लोक करोगे तिजी ते यीशु मसीह रे जरिए परमेशरो खे महिमा मिली जाणी। सारी महिमा और सामर्थ जुगो-जुगो तक तेसरी ईए। आमीन। (aiōn g165) 12 ओ प्यारेओ, जो खतरनाक दुः ख तुसे सईन करने लगी रे इजी ते हैरान नि ओ कऊँकि तुसे यीशु मसीह रे ओ। पर यो गल्ला ये दखाणे खे तुसा पंदि इजी खे ऊणे लगी रिया कि तुसे परमेशरो पाँदे विश्वास करोए कि नि। इजी खे एड़ा नि सोचो कि तुसा साथे कुछ नौखा ई ऊणे लगी रा। 13 पर जियाँ-जियाँ मसीह रे दुः खो

रे शामिल ओए, खुशी मनाओ। इजी बजअ ते जेबे जेस दिने यीशु मसीह सबी लोका पँदि आपणी महिमा प्रकट करने वापस आऊणा तो सच्चो खेई तुसे बऊत खुश और मन ऊई जाणे। 14 जे मसीह रे नाओं खे तुसा री निन्दा करोए, तो धन्य ए। कऊँकि महिमा रा आत्मा, जो परमेशरो रा आत्मा ए, तुसा पँदि छाँयाँ करोआ। 15 तुसा बीचा ते कोई माणू अत्यारा, चोर, बुरा काम करने वाला या ओरी रे कामो रे आथ पाणे री बजअ ते दुः ख नि पाओ। 16 पर जे मसीह ऊणे री बजअ ते दुः ख पाओ, तो शर्मिदा नि ओ, पर इजी गल्ला खे परमेशरो री तारीफ करो। 17 कऊँकि से बखत आईगा रा कि पईले परमेशरो रे लोका रा न्याय कित्तेया जाओ और जबकि न्याय री शुरूआत आसा तेई ऊणी, तो तिना रा क्या अंत ऊणा, जो परमेशरो रे सुसमाचारो खे नि मानदे? 18 जेडा कि पवित्र शास्त्र बोलोआ, “जे तर्मी माणू ई मुश्कला ते उद्धार पाओगा, तो बिना भग्ति वाले और पापिया रा क्या ठकाणा?” 19 इजी री खातर जो परमेशरो री इच्छा रे मुताबिक दुः ख उठाओए, सेयो पला करदे ऊए आपणे-आपणे प्राणो खे विश्वासो जोगे आपणे बनाणे वाले परमेशरो रे आथो रे सम्बाली देओ।

5 ओ साथी बुजुर्गो, कुछ ओर गल्ल बी ए जो आँऊ तुसा खे बोलणा चाऊँआ कऊँकि आँऊ बी तुसा जेडा एक बुजुर्ग ए। मसीहे जो दुःख सईन कित्तेया आँऊ आपू तिजी रा गवा ए। जेबे से वापस आऊणा तो आँऊ बी तेसरी महिमा रा इस्सेदार ऊणा। साथी बुजुर्ग ऊणे रे नाते आँऊ तुसा ते बिनती कहुँआ: 2 जियाँ पेडा चराणे वाला आपणी पेडा री रखवाली करोआ तियाँ ई तुसे बी परमेशरो रे तेस चूण्डो री रखवाली करो जो परमेशरे तुसा गे सम्बाली राखेया। ये काम आपणी इच्छा ते करो ना की केसी रे दबाओ ते। कऊँकि परमेशर बी येई चाओआ। ये काम नीच कमाईया खे नि करो, पर ये काम परमेशर और लोका री सेवा करने री इच्छा ते करो। 3 जो लोक तुसा गे सम्बाली राखे, तिना पँदि अक्क नि जमाओ, बल्लिक चूण्डो खे आदर्श बणो। 4 जेबे यीशु मसीह आसा रा प्रदान रखवाला वापस आऊणा तो तुसा खे महिमा रा मुकट देणा, जो मुरजाणा नि। 5 ईयाँ ई ओ नौजवानो, तुसे बी बुजुर्ग लोका रे अधीन रओ। तुसे सब के सब एकी-दूजे री सेवा खे दीनता साथे आपणा लक बानो, कऊँकि “परमेशर कमण्डिया रा बरोद करोआ, पर जो दीन ए तिना पँदि कृपा करोआ।” 6 इजी री खातर परमेशरो रे तागतबर आथो निठे आपू खे दीन बणाई की राखो ताकि से तुसा खे ठीक बखत आऊणे पँदि बडाओ। 7 आपणी सारी चिन्ता तेस पँदि ई सेटी देओ, कऊँकि से तुसा रा त्यान राखोआ। 8 ओशा रे रओ और जागदे रओ, कऊँकि तुसा रा बिरोदी शैतान, गर्जणे वाले शेरों जेडा, इजी ताका रे रओआ कि केसखे फाड़ी की खाऊँ। 9 विश्वासो रे मजबूत ऊई की तुसे जरूर तेसरा बरोद करो। याद राखो कि तुसा रे विश्वासी पाई जो एते दुनिया रे जेती-केथी बी रओए, ईयाँ ई सेयो बी दुः ख पुगतणे लगी रे। 10 एबे परमेशर जो सारी कृपा रा दाता ए, जिने तुसे मसीह रे आपणी अनन्त महिमा खे बुलाए, तुसा रे थोड़ी देर दुः ख उठाणे ते बाद आपू ई तुसे सिद्ध और स्थिर और तागतबर करने। (aiōnios g166) 11 तेसरा ई राज्य जुगो-जुगो तक रओ। आमीन। (aiōn g165) 12 मैं छोटी जी ये चिट्ठी लिखी और सिलवानुसो री मतादा ते ये तुसा गे पेजी। आँऊ तेसखे जाणूआ से मसीह रे विश्वासो जोगा पाई ए। ये चिट्ठी लिखणे रा मेरा मकसद ये ए कि आँऊ तुसा खे औसला और परोसा दलाऊँआ कि तुसे लोक जो महसूस करोए से परमेशरो री सच्ची कृपा ए। एसा कृपा रे मजबूतिया ते बणे रे रओ। 13 बेबीलोन नगरो रे विश्वासी लोक जो तुसा ई जेडे परमेशरो रे चूणे रे लोक ए, तिना री तरफा ते तुसा खे नमस्कार। मरकुस जो मेरे पाऊए जेडा ए तेसरी तरफा ते बी तुसा खे नमस्कार। 14 प्यारो साथे गले लगी की एकी-दूजे खे नमस्कार बोलो। आँऊ प्रार्थना कहुँआ कि तुसा सबी खे जो मसीह रे ए, शान्ति मिलदी रओ।

2 पतरस

1 आऊँ शमोन पतरस एसा चिट्टिया खे लिखणे लगी रा, जो यीशु मसीह रा दास और प्रेरित ए। ये चिट्ठी आऊँ तिना सबी लोका खे लिखणे लगी रा जिने म्हारे परमेशर और उद्धारकर्ता यीशु मसीह री धार्मिकता रे जरिए आसा जेड़ा बऊत किमती विश्वास पाई राखेया। 2 आऊँ प्रार्थना करूँआ कि जियां तुसे परमेशर और म्हारे प्रभु यीशु मसीह रे ज्ञानो रे बड़दे जाओए, परमेशर तुसा लोका खे और बी जादा कृपा और शान्ति देँदा राखे। 3 परमेशर आपणी ई सामर्था रे जरिए आसा खे से सब कुछ देई राखेया जो ईश्वरीय जिन्दगी जिऊणे खे जरूरी ए। आसे परमेशरो खे जाणूँए और तिने ई आसे सब आपणे लोक करी की आपणी महिमा और अच्छे इरादे रे मुताबिक बुलाए। 4 परमेशरे आसा सबी खे तेसा ई सामर्था रे जरिए बऊत किमती और बड़े वादे देई राखे। ताकि इना वादे रे जरिए तुसे तिना गन्दे कामो ते छूटी की नठी सको जो दुनिया रे बुरी इच्छा ते ओए और ईश्वरीय सबाओ रे शामिल ऊई जाओ। 5 कऊँकि तुसे ईश्वरीय सबाओ रे शामिल ओ इजी खे सिर्फ तुसे मसीह रे विश्वास करने वाले ई नि बणो पर अच्छे चाल-चलणो ते बी जिओ। तुसे सिर्फ अच्छे चाल-चलणो तेई नि जिओ पर ये बी जाणो कि आसे कियां समजा साथे बर्ताव करिए। 6 तुसे सिर्फ समजा ते बर्ताव करने वाले ई नि बणो पर आपू पाँदे काबू राखणे वाले बी बणो। तुसे सिर्फ आपू पाँदे काबू राखणे वाले ई नि बणो पर दुःखो रे सन्न राखणे वाले बी बणो। तुसे सिर्फ दुःखो रे सन्न राखणे वाले ई नि बणो पर ईश्वरीय जिन्दगी जिऊणे वाले बी बणो। 7 सिर्फ ईश्वरीय जिन्दगी जिऊणे वाले ई नि बणो पर एकी दूजे री चिन्ता करने वाले बी बणो जियां पाई-बईणूँए एकी दूजे री चिन्ता करे। सिर्फ एकी दूजे री चिन्ता करने वाले ई नि बणो पर सबी लोका ते प्यार बी राखो। 8 जे तुसा रे यो सब गुण मौजूद ए और जे तुसा रे इना गुणा री बड़ोतरी ऊणे लगी री तो इजी री बजअ ते तुसे आसा रे प्रभु यीशु मसीह रे पूरे ज्ञानो रे ना तो नकम्मे ऊणे और ना ई निष्फल ऊणे। 9 पर जेस केसी माणूए रे ये गुण मौजूद निए तो से अन्दा ए या तेसखे तूँदला दिखोआ। से पूली चुकी रा कि परमेशरे तेसरा से सारा पाप माफ करी ता रा जो तिने मसीह रे आऊणे ते पईले करी राखेया था। 10 इजी बजअ ते ओ साथी विश्वासियो, आपणे बुलाए जाणे और चूणे जाणे खे साबित करने खे ठीक-टंगो रे कोशिश करदे रओ। जे तुसे एड़ा करदे राओगे, तो कदी बी बाटा ते नि पटकणे। 11 ईयां ई तुसा रा म्हारे प्रभु और उद्धारकर्ता यीशु मसीह रे अनन्त कालो रे राज्य रे बड़े आदरो साथे स्वागत कित्तेया जाणा। (aiōnios g166) 12 हाणूँकि तुसे इना गल्ला खे जाणो ईए और मसीह री एसा सच्ची शिक्षा रे, जो तुसा खे सखाई राखी, तुसे बणे रे रओए। तेबे बी आऊँ तुसा खे इना गल्ला री याद दलाणे खे सदा त्यार रऊँगा। 13 जदुओ तक आऊँ एस शरीर रूपी डेरे रे जिऊँदा ए तदुओ तक तुसा लोका खे याद दलाई की सावधान करना आपणी जिम्मेवारी समजूँआ। 14 कऊँकि आऊँ ये जाणूँआ कि आसा रे प्रभु यीशु मसीह रे बोले रे वचनो रे मुताबिक मेरे मरने रा बखत नेड़े आईगा रा। 15 इजी री खातर मां एड़ी कोशिश करनी कि मेरे मरने ते बाद तुसे इना सबी गल्ला खे याद करी सको। 16 जेबे आसे प्रेरिते तुसा लोका खे आपणे प्रभु यीशु मसीह री सामर्था रा और तिना रे वापस आऊणे रा संदेशा दित्तेया था, तो आसे चलाकिया ते गद्दी री मनकइन्त काणियां रा सआरा नि लया था। बल्कि आसे आपू ई आपणी आखी ते तेसरा प्रताप देखेया था। 17 पवित्र पाहड़ो पाँदे तेस बखते आसे तेस साथे जे थेबे पिता परमेशरे तिना खे आदर और महिमा दित्ती। तेस बखते प्रतापमय महिमा बीचा ते ये आवाज आई, “ये मेरा प्यारा पुत्र ए जेसते आऊँ बऊत खुश ए।” आसे आपू ई स्वर्गो ते ये आवाज आऊँदे ऊए सुणी। 18 आसे ये बी जाणूँए कि भविष्यबक्तेया जो वचन मसीह रे बारे लिखी राखेया से एकदम सच ए और आसे तुसा लोका खे मसीह रे बारे रे जो सखाई राखेया था से इजी गल्ला खे साबित करे। तुसे इना वचना खे आसा रे प्रभु यीशुए रे वापस आऊणे तक त्यानो साथे

सुणो, 19 कऊँकि जियां दिऊआ लोका खे न्हरे रे सई बाट दखाणे खे प्रयासा देओआ तियां ई एस वचनो तुसा खे समजणे रे मताद करनी कि सच क्या ए। तिना रा वापस आऊणा नये दिनो रे प्यागा रे प्रयासे जेड़ा ऊणा और से प्याणु तारे जेड़ा चमकणा। तेस बखते तिना री ज्योति तुसा रे दिलो रे चमकणी और तेस परमेशर तुसा पाँदे साफ-साफ प्रकट करना। 20 पर सबी ते पईले ये समजी लो कि पवित्र शास्त्रो री कोई बी भविष्यबाणी केसी रे आपणे ई सोचणे ते पूरी नि ऊँदी 21 कऊँकि कोई बी भविष्यबाणी माणूए री इच्छा ते कदी पनि ऊई, पर भविष्यबक्ता पवित्र आत्मा ते परी की परमेशरो री तरफा ते बोलो थे।

2 बऊत दिन पईले जियां इस्राएली लोका बीचे चूठे भविष्यबक्ता थे, तियां ई तुसा लोका बीचे बी चूठे उपदेशका चूठी शिक्षा देणी। सेयो लोक तुसा बीचे आऊले-आऊले कूसी जाणे और तुसा ते परमेशरो रे बारे रे सर्वनाश करने वाला चूठ बोलणा। एथो तक तिना मसीह खे बी आपणे प्रभुए रे रूपो रे मानणे ते ना करनी जिने तिना खे पापो ते छुटकारा देई राखेया। तिना एड़ा काम करी की आपू पाँदे चट ई सर्वनाश ल्याऊणा। 2 बऊत सारे परमेशरो रे लोका तिना चूठे उपदेशका री बुरी शिक्षा मानणी और तिजी रे मुताबिक बुरे काम करने। नतीजन, तिना रे बुरे कामो री बजअ ते ओरी लोका सच्यो री बाटा री निन्दा करनी। 3 ये चूठे उपदेशक बऊत लालची ऊणे और तिना तुसा खे मनकइन्त काणियां बणाई की तोखा देणा कि तुसा ते पैसे कमाई सको। परमेशर पईले तेई तिना लोका खे सजा देणे रा फैसला करी चुकी रा और से ये करने खे त्यार बी ए। परमेशरो पक्का ई तिना लोका रा सत्यानाश करी देणा। 4 परमेशरे तिना स्वर्गदूता खे बी नि छाडेया जिने पाप करी राखेया था। पर नरको रे पेजी की न्हरे कुण्डो रे पाई की जंजीरा साथे बानी ते। ताकि सेयो न्याय रे दिनो तक कैद रओ। (Tartarōō g5020) 5 और नूह रे दिना रे परमेशरे दुनिया रे दुष्ट लोका पाँदे दया नि कित्ती। पर परमेशरे महा जलप्रलय ते धार्मिकता रे प्रचारक नूह समेत कुल आठ लोका खे बचाई की दुनिया रे सारे लोक नाश करी ते। 6 और परमेशरे सदोम और गमोरा रे नगरो खे नाशो रा एड़ा दण्ड दित्तेया कि सेयो स्वा करी की स्वाई रे मलाई ते। ताकि सेयो आऊणे वाले बिना भरितया रे लोका खे उदारण बणो 7 पर तिने सदोम नगरो खे नाश करने ते पईले लूत तथा ते जाणे दित्तेया जो एक तर्मी माणू था और ईयां से बचाईता। लूत पापिया रे बुरे चाल-चलणो ते बऊत दुःखी था। 8 लूत जो तर्मी माणू था तिना लोका बीचे रंदे ऊए और तिना रे पापो रे काम देखी-देखी की और सुणी-सुणी की हर दिन आपणे सच्चे मनो खे दुःखी करे था। 9 जबकि परमेशरे यो सब गल्ला करी राखेया, तो इजी ते साफ पता चलोआ कि परमेशर ये जाणोआ कि तर्मिया खे कियां परीक्षा ते निकालेया जाओ और अधर्मिया खे कियां न्याय रे दिनो तक सजा देणे खे राखेया जाओ। 10 खास करी की परमेशरो तिना चूठे शिक्षका खे सजा देणी जो गन्दी इच्छा रे पीछे शरीरो रे मुताबिक चलोए और परमेशरो रे अक्को खे तुच्छ जाणोए। सेयो टीठ और हठी ए और तेजोमय स्वर्गिय प्राणिया खे बुरा-पला बोलणे ते नि डरदे। 11 पर एथो तक कि स्वर्गदूत बी जो तिना चूठे शिक्षका ते शक्ति और सामर्था रे बऊत बड़ी की ए, प्रभुए रे सामणे तिना तेजोमय स्वर्गिय प्राणिया खे पला-बुरा बोली की तिना पाँदे दोष नि लगादे। 12 पर यो चूठे शिक्षक बिना दमाक वाले डांगरा जेड़े ए। सेयो लोक पकड़े जाणे और नाश ऊणे खेई पैदा ऊई रे। जिना गल्ला खे सेयो जाणदे ई नि, तिना रे बारे रे ओरी लोका खे पला-बुरा बोलोए। पर सेयो आपणे बुरे कामो तेई नाश ऊई जाणे। 13 तिने लोके बुरा करी राखेया और तिना खे तिजी रा फल बुरा ई मिलणा। तिना लोका खे दिने-त्याड़े सुख-विलास करना खरा लगेआ। सेयो लोक तुसा बीचे कलंक और दोष ए। तिना लोका खे तुसा री सभा री पाटिया रे तुसा साथे खाणे रे बावजूद बी तुसा ते कपटो साथे गल्ला करने रे खुशी मिलोई। 14 सेयो जेसा केसी बी जवाणसा खे देखेओ तेसा साथे व्याभिचार करना चाओए। सेयो पाप करने ते बिना रूकी नि सकदे। सेयो तिना लोका खे तोखा देई की पापो रे पाई देओए जिना रा कमजोर

विश्वास ए। कऊँकि तिना री बड़दी ऊई इच्छा री बजअ ते परमेशरो तिना खे सजा देणी। 15 सेयो सीदी बाटा खे छाडी की पटकी गे रे और बओरो रे पाऊ बिलामो री बाटा रिये ऊईगे, जिने पापो री मजदूरी प्यारी जाणी। 16 पर परमेशर बिलामो खे तेसरे अपराधो री बजअ ते बकेया। एथो तक कि तेसरी अबोल गहदीए बी मांणूए री आवाजा रे से भविष्यबक्ता गलत काम करने ते रोकेया। 17 यो चूठे शिक्षक सुके कुँए और तूफानो रे उड़ाए रे बादल ए, तिना खे अनन्त न्हारा ठराई राखेया। (questioned) 18 जेबे सेयो लोका खे उपदेश देओए तो सेयो कमण्डो साथे परिया रिया बेकार गल्ला ते लोका खे वासना री शारीरिक इच्छा रे फसाई देओए, जो बाटा ते पटकेया रे लोका बीचा ते एबु ई विश्वासो रे आई रे। 19 सेयो चूठे शिक्षक लोका खे आजाद करने रा वादा तो करोए, पर सेयो आपू ई पापी सबाओ री बजअ ते पापो रे दास ए। कऊँकि जो कुछ बी तुसा खे आपणे वशो रे करी लओआ तो तुसे तेसरे दास बणी जाओए। 20 जे सेयो आसा रे प्रभु और उद्धारकर्ता यीशु मसीह रे सारे ज्ञानो रे जरिए दुनिया री कई प्रकारा रिया गन्दगिया ते छूटी की निकलने ते बाद फेर तिजी रेई फसी की तिजी रे वशो रे ऊईगे रे तो ये गल्ल साफ ए कि तिना री आज की दशा पिछली दशा ते ओर बी बुरी ऊईगी री। 21 पला तो येई ऊँदा कि तिना खे धार्मिकता री बाटा रा एहसास ऊआ ई नि ऊँदा बजा एतेरे कि से तिजी खे जाणने ते बाद जो पवित्र आज्ञा तिना गे सम्बाली थी तिजी ते मूँ फेरी लंदे। 22 तिना लोका पाँदे ये कहावत ठीक बैठोई, “कुत्ता आपणी ई किन्ती री ऊल्लिया खे फेर खाओआ और नलवाई री सुंरनी चीकड़ो रे लेटणे खे फेर चली जाओई।”

3 ओ प्यारेओ, तुसा लोका खे ये मेरी दूजी चिट्ठी ए। इना दूई चिट्ठिया रे जरिए आऊ तुसा खे याद दलाई की तुसा रे साफ मनो खे जगाऊँआ 2 मेरा मकसद ये ए कि तुसे तिना वचना खे याद राखो जो परमेशरो रे भविष्यबक्तेया रे जरिए बऊत पईले तुसा लोका ते बोली राखे। आसा रे प्रभु और उद्धारकर्ता यीशु मसीह री तिना शिक्षा खे बी याद राखो जो प्रेरिता रे जरिए तुसा खे दिन्ती थी। 3 सबी ते जरूरी गल्ल ये ए कि तुसे ये समजी लो कि अंतो रे दिना रे आस्सी और मजाक करने वाले आऊणे, जो आपणी ई बुरी इच्छा रे मुताबिक चलणे। 4 तिना लोका बोलणा, “प्रभुए रे दुबारा आऊणे रा वादा केई गया? कऊँकि आसा रे बुजुर्गा री मौता ते लयी की एबुए तक सब कुछ तेड़ा ईए, जेड़ा सृष्टिया री शुरूआता ते था।” 5 सेयो तो जाणी बूजी की ये पूरी गे कि परमेशरो रे वचनो रे जरिए सर्ग पुराणे जमाने ते मौजूद ए और तरती बी पाणिए बीचा ते बणी और तिजी रे चऊँ कनारे पाणी ई पाणी ए। 6 एसी पाणिए रे जरिए तेस जुगो री दुनिया पाणिए रे डूबी की नाश ऊईगी। 7 पर परमेशरे एसी वचनो रे जरिए आजका सर्ग और तरती इजी खेई सम्बाली की राखी राखे, कि तिजी खे आगी साथे फूको। और यो बिना भगित वाले मांणूआ रे न्याय और नाश ऊणे रे दिनो तक ईयां ई रणे। 8 ओ प्यारेओ, ये एक गल्ल तुसा ते छिपी री नि रओ कि प्रभुए रे कअरे एक दिन हजार सालो रे बराबर ए और हजार साल एक दिनो रे बराबर ए। 9 कुछ लोक सोचोए कि प्रभु वापस आऊणे रे आपणे वादे रे बारे रे देर करने लगी रा। पर प्रभु आपणे वादे रे बारे रे देर नि करदा। बल्कि से तुसा रे बारे रे सब राखोआ और ये नि चांदा कि कोई नाश ओ, पर ये कि सबी खे पापो ते मन फेरने रा मोका मिलो। 10 पर प्रभुए रा दिन चोरो जेड़ा आऊणा। तेस दिने सर्ग बड़ी-पारी गिडने रिया री आवाजा ते नाश ऊई जाणा और तत्व बऊत गर्म ऊई की गली जाणे। तरती और तिजी पाँदले किन्ते रे काम प्रकट ऊई जाणे। 11 कऊँकि परमेशरो यो सब चीजा पक्का ई नाश करी देणियां जेड़ा कि मैं बोली राखेया, तो तुसे पवित्र चाल-चलण और भगितया रे ईयां जिन्दगी बिताओ जेते की परमेशर खुश ओआ। 12 जेड़ा कि तुसे तेस दिनो रा बड़ी बेसबरिया ते इन्तजार करने लगी रे जेस दिने परमेशर दुनिया रा न्याय करने आऊणा और आपणी तरफा ते कोशिश करो कि से दिन चट आई जाओ। तिना दिना रे सर्ग आगी की गली जाणा और नाश ऊई जाणा और सर्गो रे गण बऊत जादा गर्म ऊई की गली जाणे। 13 पर आसे विश्वासी परमेशरो रे वादे रे

मुताबिक एक नये सर्ग और नई तरतिया रा इन्तजार करूँए। जिदे सिर्फ तर्मी लोका ई वास करना। 14 इजी री खातर ओ प्यारेओ, जबकि तुसे इना गल्ला रा इन्तजार करोए, तो ईयां कोशिश करो कि तुसे लोक प्रभुए री नजरा रे निष्कलंक और निर्दोष ठईरो और तुसा रे शान्तिया रा वास ओ। 15 जे आसा रा प्रभु आपणी सईन शीलता री बजअ ते देर करो बी आ तो इजी खे आपणे उद्धारो रे मददगार समजो। ये सेई गल्ल ए जेतेखे म्हारे प्यारे साथी विश्वासी पौलुसे बी तुसा खे परमेशरो रे जरिए दिने रे ज्ञानो रे मुताबिक चिट्ठिया रे लिखी राखेया। 16 तियाँ ई पौलुसे आपणी सबी चिट्ठिया रे बी इना गल्ला री चर्चा करी राखी। तिना चिट्ठिया रे कितणिया गल्ला तो एडिया ए, जिना रा समजणा कठण ए। अनपढ़ और चंचल लोक तिना री चिट्ठिया री गल्ला खे पवित्र शास्त्रो री गल्ला जेडिया ई खिंजी-खांजी की आपणे ई नाशो री बजअ बणाओए। 17 ओ प्यारेओ, तुसे पइले ई जाणोए कि यो सारिया गल्ला ऊणिया। इजी खे चौकस रओ ताकि दुष्ट लोक तुसा खे आपणी चूठी शिक्षा ते बईकाई की तोखा नि देओ। जे तिना री चूठी शिक्षा खे मानोगे तो तुसा सच्चाईया पाँदे विश्वास करना बन्द करी देणा। 18 बल्कि तुसे लोक म्हारे प्रभु और उद्धारकर्ता यीशु मसीह री कृपा और पछयाणी रे बड़दे जाओ। तेसरी ई महिमा एबे बी ओ और जुगो-जुगो तक ऊँदी रओ। आमीन। (a10n g165)

1 यूहन्ना

1 आसे एक एड़े माणू रे बारे रे लिखणे लगी रे जो जीवनों रा वचन ए। जो सृष्टिया रे शुरूओ ते था। से आसे सुणेया और आसे आपणी आखी ते देखेया, बल्कि से आसे त्यानो साथे देखेया और आपणे ई आथो साथे हूँयां। 2 से जो जीवन देओआ, तरतिया रे आया और आसे से देखेया और तिजी री गवाई देऊँए और तुसा खे तेस अनन्त जीवनों रा समाचार सुणाऊँए, जो पिते साथे था और आसा पॉदि प्रगत ऊआ। (aiōnios g166) 3 जो कुछ आसे देखी राखेया और सुणी राखेया, तिजी रा समाचार तुसा खे बी सुणाऊँए, ताकि तुसे बी आसा साथे शामिल ओ। आसा री ये शामिलता पिते साथे और तेसरे पाऊ प्रभु यीशु मसीह साथे ए। 4 इना गल्ला आसे इजी री खातर लिखूँए, ताकि म्हारी खुशी पूरी ऊई जाओ। 5 जो समाचार आसे यीशुए ते सुणेया और तुसा खे सुणाऊँए से ये कि परमेश्वर जोति ए और तिजी रे कोई बी न्हारा नि। 6 जे आसे बोलिये कि परमेश्वरो साथे आसा री संगति ए और फेर न्हरे रे चलूँ, तो आसे चूठे ए और सच्यो पॉदि नि चलदे। 7 पर जेडा परमेश्वर जोतिया रे ए, तियाँ ई आसे बी जोतिया रे चलिए, तो आसे एकी-दूजे री संगतिया रे शामिल ए और तेसरे पुत्र प्रभु यीशु मसीह रा खून आसा खे सारे पापो ते शुद्ध करोआ। 8 जे आसे बोलिये कि आसा रे कुछ बी पाप नि, तो आपणे आपू खे तोखा देऊँए और आसा रे सच नि। 9 जे आसे आपणे पापो खे मानी लऊँ, तो से म्हारे पाप माफ करने और आसा खे सारेया पापो ते शुद्ध करने रे विश्वासो जोगा और तर्मी ए। 10 जे आसे बोलिये कि आसे पाप नि कित्ते रा, तो परमेश्वरो खे चूठा ठराऊँए और तेसरा वचन आसा रे नि।

2 ओ मेरे बालको! आऊँ इना गल्ला तुसा खे इजी खे लिखूँआ, ताकि तुसे पाप नि करो। जे कोई पाप करो, तो पिता परमेश्वरो मे एक म्हारा मददगार ए, मतलब यीशु मसीह जो तर्मी ए। 2 और सेई म्हारे पापो खे बलिदान ए और बस म्हारे ई नि, बल्कि सारी दुनिया रे लोका रे पापो रा बी। 3 जे आसे परमेश्वरो री आज्ञा खे मानूँ, तो तिजी ते आसा खे पता लगी जाणा कि आसे तेसखे जाणूँ। 4 जो कोई ये बोलोआ, “आऊँ तेसखे जाणी गा रा” और तेसरी आज्ञा खे नि मानदा, से चूठा ए और तेसरे सच नि। 5 पर जो कोई परमेश्वरो रे वचनो पॉदि चलो, तेसरे सच्ची परमेश्वरो रा प्यार सिद्ध ऊई रा। आसा खे इजी तेई पता चलोआ कि आसे तेसरे ए। 6 जो कोई ये बोलोआ कि आऊँ तेसरे बणेया रा रऊँआ, तेसखे चाईयो कि आपू बी तेडा ई चलो, जेडा यीशु मसीह चलोआ। 7 ओ प्यारे साथी विश्वासियो! आऊँ तुसा खे कोई नई आज्ञा नि लिखदा, पर सेई पुराणी आज्ञा, जो शुरूओ ते तुसा खे मिली री; ये पुराणी आज्ञा से वचन ए, जो तुसे सुणी राखेया। 8 फेर आऊँ तुसा खे नई आज्ञा लिखूँआ और ये तो मसीह रे और तुसा रे सच्ची ठईरोई, कऊँकि न्हारा मिटदा जाओआ और सच्यो री जोति एबु चमकणे लगी री। 9 जो कोई ये बोलोआ, “आऊँ जोतिया रे चलूँआ,” पर आपणे विश्वासी पाईए साथे बैर राखोआ, से एबुए तक न्हरे रेई चलोआ। 10 जो कोई आपणे पाईए साथे प्यार राखोआ, से जोतिया रे चलोआ और ठोकर नि खाई सकदा। 11 पर जो कोई आपणे पाईए साथे बैर राखोआ, से न्हरे रे ए और न्हरे रे चलोआ और ये नि जाणदा कि केयी चली रा, कऊँकि न्हरे तेसरिया आखी अंदिया करी ती रिया। 12 ओ बालको! आऊँ तुसा खे इजी खे लिखूँआ कि यीशु मसीह रे नाओं ते तुसा रे पाप माफ ओ। 13 ओ पिताओ! आऊँ तुसा खे इजी खे लिखूँआ कि जो सृष्टिया ते ए, तुसे तेसखे जाणोए। ओ जवानो! आऊँ तुसा खे इजी खे लिखूँआ, कऊँकि तुसे तेस दुशे पॉदि जय पाई राखी। ओ बालको! मैं तुसा खे इजी खे लिखी राखेया कऊँकि तुसे पिते खे जाणी मे रे। 14 ओ पिताओ! मैं तुसा खे इजी खे लिखी राखेया कि जो सृष्टिया ते ए, तुसे तिजी खे जाणी मे रे। ओ जवानो! मैं तुसा खे इजी खे लिखी राखेया कि तागतबर ओ और परमेश्वरो रा वचन तुसा रे बणेया रा रओआ और तुसे तेस

दुशे पॉदि जय पाई। 15 तुसे ना तो दुनिया ते और ना ई दुनिया रिया चीजा ते प्यार राखो, जे कोई दुनिया ते प्यार राखोआ, तो तेसदे पिता परमेश्वरो रा प्यार नि। 16 कऊँकि जो कुछ दुनिया रे ए, मतलब-शरीरो री इच्छा, आखी री इच्छा, कमाईया रा कमण्ड, से पिता परमेश्वरो री तरफा ते नि, बल्कि दुनिया री तरफा तेईए। 17 दुनिया और तेसरी री इच्छा दोनो मिटदी जाओई, पर जो परमेश्वरो री इच्छा पॉदि चलोआ, से सदा बणेया रा रणा। (aiōn g165) 18 ओ बालको! ये आखरी बखत ए और जेडा तुसे सुणी राखेया कि मसीह रा बिरोदी आऊणे वाला ए, तिजी रे मुताबिक एबु बी बऊत सारे मसीह रे बिरोदो रे उठी रे, इजी ते आसे जाणूँ कि ये आखरी बखत ए। 19 सेयो मसीह बिरोदी तो आसा बीचा तेई निकले, पर सेयो आसा रे नि थे। कऊँकि जे आसा बीचले ऊँदे, तो आसा साथे रंदे, पर निकली इजी खे गये कि ये प्रगत ओ कि सेयो सब आसा बीचले नि। 20 पर तुसा रा अभिषेक तो तेस पवित्र यीशु मसीह रे जरिए ऊई रा और तुसे सब सच जाणोए। 21 मैं तुसा खे इजी खे नि लिखेया कि तुसे सच्यो खे नि जाणदे, पर इजी खे कि तिजी खे जाणोए और इजी खे कि कोई चूठ सच्यो री तरफा ते नि। 22 चूठा कुण ए? बस से, जो प्रभु यीशुए रे मसीह ऊणे रा ना करोआ और मसीह रा बिरोदी सेईए, जो पिता परमेश्वर और पुत्रो खे ना करोआ। 23 जो कोई पुत्रो खे ना करोआ, तेसगे पिता परमेश्वर पणोए, जो पुत्रो खे मानी लओआ, तेसगे पिता परमेश्वर बी ए। 24 त्यानो साथे सुणो, जो कुछ तुसे शुरूओ ते सुणी राखेया, सेई तुसा रे बणेया रा रओ। जो कुछ तुसे शुरूओ ते सुणी राखेया, जे से तुसा रे बणेया रा रओगा, तो तुसे बी पुत्रो रे और पिता परमेश्वरो रे बणे रे रओगे। 25 जेतेरा तिने आसा साथे वादा कित्तेया, से अनन्त जीवन ए। (aiōnios g166) 26 मैं तुसा खे यो गल्ला तिना रे बारे रे लिखी राखेया, जो तुसा खे भरमाओए। 27 और तुसा रा से अभिषेक, जो प्रभु यीशु मसीह री तरफा ते कित्तेया, तुसा रे बणेया रा रओआ और तुसा खे इजी ते मतलब नि कि कोई तुसा खे सिखाओ। पर जिंयाँ से अभिषेक, जो तेसरी तरफा ते कित्तेया, तुसा खे से सब गल्ला सिखाओआ जो तुसा खे सीखणे री जरूरत ए और जो कुछ से सिखाओआ से सब सच ए, चूठा नि ए और जेडा तिने तुसा खे सिखाया, तेडे ई तुसे यीशु मसीह रे बणे रे रओ। 28 इजी री खातर ओ बालको! तेसरे बणे रे रओ, ताकि जेबे से आओ, तो आसा खे इम्मत ओ और आसे मसीह रे आऊणे पॉदि शर्मिदा नि ओऊँ। 29 जे तुसे जाणोए कि मसीह तर्मी ए, तो ये बी जाणोए कि जो कोई तर्मी रा काम करोआ, से परमेश्वरो रे बच्चे ए।

3 जरा सोचो तो सई कि पिता परमेश्वरे आसा ते केडा प्यार कित्तेया कि आसा खे परमेश्वरो री ल्वाद बोलो और सच्ची आसे तेसरी ल्वाद आए बी। पर जो लोक दुनिया रे ए से नि जाणदे कि आसे परमेश्वरो री ल्वाद ए, कऊँकि सेयो पिता परमेश्वरो खे बी नि जाणदे। 2 ओ साथी विश्वासियो! एबु आसे परमेश्वरो री ल्वाद ए और एबुए तक ये नि ए पता कि आसे क्या कुछ ऊणे, इतणा जाणूँ कि जेबे यीशु मसीह प्रगत ऊणा, तो आसे बी तेस जेडे ऊणे, कऊँकि आसा से तेडा ई देखणा, जेडा से आए। 3 जो कोई यीशु मसीह पॉदि ये उम्मीद राखोआ, से आपणे आपू खे तेडा ई पवित्र करोआ, जेडा से पवित्र ए। 4 जो कोई लगातार पाप करोआ, से परमेश्वरो रे बिधानो रा बिरोद करोआ और बिधानो रा बिरोद करना ई पाप ए 5 और तुसे जाणोए कि मसीह इजी खे आया कि पापो रा नाश करी देओ और तेसरे सबओ रे पाप नि। 6 जो कोई तेसदे बणेया रा रओआ, से पाप करदा नि रंदा, जो कोई पाप करोआ, तिने ना से देखी राखेया और ना से जाणी राखेया। 7 ओ बालको! केसी रे भरमाणे पॉदि नि आओ। जो तर्मी रे काम करोआ, सेई मसीह जेडा तर्मी ए। 8 जो कोई लगातार पाप करदा रओआ, से शैतानो री तरफा ते ए, कऊँकि शैतान शुरूओ तेई पाप लगातार करदा आयी रा, परमेश्वरो रा पुत्र इजी खे आया, ताकि शैतानो रे कामा खे नाश करो। 9 जो कोई परमेश्वरो ते पैदा ऊई रा, सेयो लगातार पाप नि करदे, कऊँकि परमेश्वरो रा बीज तिना रे बणेया रा रओआ और सेयो लगातार पाप करी नि सकदे, कऊँकि सेयो परमेश्वरो ते जम्मी रे। 10 इजी तेई परमेश्वरो री ल्वाद और

शैतानो री ल्वाद् जाणे जाओए। जो कोई तर्मों रे काम नि करदा, से परमेशरो ते नि ए और ना से जो आपणे पाईए साथे प्यार नि राखदा। 11 जो समाचार तुसे शुरूओ ते सुणोया, से ये कि आसे एकी-दूजे साथे प्यार राखूँ। 12 और आदमो रे पाऊ कैनो जेडे नि बणो, जो तेस दुष्टो ते था, तिने शैतानो री आज्ञा मानी और आपणा पाई हाबिल काया। से किजी बजअ ते काया? इजी बजअ ते कि तेसरे काम बुरे थे और तेसरे पाईया रे काम तर्मों रे थे। 13 ओ साथी विश्वासियो! जे एसा दुनिया रे लोक तुसा ते बैर करोए, तो हैरान नि ओ। 14 आसे जाणूँए कि आसे मौता रे बन्दना ते छुटी की जिन्दगिया रे पकँछी रे। कऊँकि आसे पाईया साथे प्यार राखूँए, जो प्यार नि राखदा, से मौता रे बन्दनो रे रओआ। 15 जो कोई आपणे पाईए साथे बैर राखोआ, से अत्यारा ए और तुसे जाणोए कि केसी अत्यारे रे अनन्त जीवन नि रंदा। (aiōnios g166) 16 आसे प्यार इजी तेई जाणेया कि यीशु मसीहे आसा री खातर आपणे प्राण देई ते। तेबेई आसा खे बी आपणे पाईया री तंई प्राण देणे चाईयो। 17 पर जेस केसी गे बी दुनिया री सम्पति ओ और से आपणे पाईए खे कंगाल देखी की तेस पाँदे तरस नि खाना चाओ, तो तेसरे परमेशरो रा प्यार किल्लो बणी की रई सकोआ? 18 ओ मेरे प्यारे बालको! आसे वचन और गल्ला तेई नि, पर काम और सच्चो रे जरिए बी प्यार करिए। 19 जेबे आसे दूजे ते प्यार करूँए तो इजी तेई आसे जाणूँए कि आसे सच्चो रे ए और आसा रे मनो रे परमेशरो रे सामणे आसा रे मनो रे शान्ति ओई। 20 तेबेई जेते गल्ला रे म्हारा मन आसा खे दोष देओगा, कऊँकि आसे जाणूँए कि परमेशर आसा रे मनो ते बड़ा ए और सब कुछ जाणोआ। 21 ओ प्यारेओ! जे म्हारा मन आसा खे दोष नि देओ, तो आसा खे परमेशरो सामणे इम्मत ओई 22 और जो कुछ आसे मांगूए, से आसा खे तेसते मिलोआ, कऊँकि आसे तेसरी आज्ञा खे मानूँए और जो तेसखे अच्छा लगेओ, सेई करूँए 23 और तेसरी आज्ञा ये कि आसे तेसरे पुत्र प्रभु यीशु मसीह पाँदे विश्वास करूँ और जेडी तिने आसा खे आज्ञा देई राखी, तिजी रेई मुताबिक आप-बीचे प्यार राखिए। 24 जो परमेशरो री आज्ञा खे मानोआ, से तेसरे और परमेशर तिना रे बणेया रा रओआ और इजी तेई, मतलब-तेसा पवित्र आत्मा ते जो तिने आसा खे देई राखेया, आसे जाणूँए कि परमेशर आसा रे बणेया रा रओआ।

4 ओ मेरे प्यारेओ! हर केसी पाँदे विश्वास नि करो जो आत्मा रे जरिए बोलणे रा दावा करोए। बल्कि आत्मा खे परखो कि सेयो परमेशरो री तरफा ते कि नई, कऊँकि बऊत सारे चूठे भविष्यबक्ता दुनिया रे निकली की खडे ऊई रे। 2 परमेशरो रा पवित्र आत्मा तुसे ईयां पछयाणी सकोए कि जो कोई आत्मा मानी लओई कि प्रभु यीशु मसीह शरीरो ते ऊई की आयी रा, से परमेशरो री तरफा ते ए 3 और जो कोई आत्मा प्रभु यीशुए खे नि मानदी, से परमेशरो री तरफा ते नि ए और सेई तो मसीह रे बिरोदिया री आत्मा ए, जेतेरी चर्चा तुसे सुणी चुके रे कि से आऊणे वाला ए और एबे बी दुनिया रे ए। 4 ओ बालको! तुसे परमेशरो रे लोक ए और तुसे तिना चूठे भविष्यबक्तेया पाँदे जय पाई राखी, कऊँकि जो पवित्र आत्मा तुसा दे ए, तेस शैतानो ते बी बड़ा ए जो दुनिया पाँदे राज करोआ। 5 सेयो चूठे भविष्यबक्तेया दुनिया रे ए, इजी बजअ ते सेयो दुनिया रिया गल्ला बोलोए और दुनिया रे लोक तिना री सुणोए। 6 आसे परमेशरो रे ए, जो परमेशरो खे जाणोआ, से म्हारी सुणोआ, जो परमेशरो खे नि जाणदा, से म्हारी नि सुणदा, ईयां ई आसे बी सच्चो री आत्मा और बईमो री आत्मा खे पछयाणी लऊँए। 7 ओ मेरे प्यारेओ! आसे आपू बीचे प्यार राखिए, कऊँकि प्यार परमेशरो ते ए। जो कोई ओरी ते प्यार करोआ, से परमेशरो ते पैदा ऊई रा और परमेशरो खे जाणोआ। 8 जो कोई ओरी साथे प्यार नि राखदा, से परमेशरो खे नि जाणदा, कऊँकि परमेशर प्यार ए। 9 जो प्यार परमेशर आसा साथे राखोआ, से इजी ते प्रगत ऊआ कि परमेशरे आपणा एकलौता पुत्र दुनिया रे पेजी ता, ताकि आसे तेसरे जरिए अनन्त जिन्दगी पाऊँ। 10 प्यार इजी ते नि कि आसे परमेशरो ते प्यार कित्तेया, पर इजी रे ए कि तिने आसा ते प्यार कित्तेया और आसा खे पापो ते छुड़ाणे खे आपणा पुत्र बलिदान ऊणे खे पेजेया। 11 ओ मेरे प्यारेओ! जेबे

परमेशरे आसा ते इतणा प्यार कित्तेया, तो आसा खे बी आपू बीचे प्यार राखणा चाईयो। 12 परमेशर कदी बी किने नि देखेया, जे आसे आपू बीचे प्यार राखूँ, तो परमेशर आसा रे बणेया रा रओआ और तेसरा प्यार आसा ते सिद्ध ऊईगा रा। 13 इजी तेई आसे जाणूँए कि आसे तेसदे बणे रे रऊँए और से आसा रे, कऊँकि तिने आपणी पवित्र आत्मा आसा खे देई राखेया। 14 और आसे पुत्र देखी बी लया और गवाई बी देऊँए कि पिता परमेशरे आपणा पुत्र दुनिया रे लोका रा उद्धारकर्ता करी की पेजी राखेया। 15 जो कोई ये मानी लओआ कि प्रभु यीशु परमेशरो रा पुत्र ए, परमेशर तेसदे बणेया रा रओआ और से परमेशरो रे 16 और जो प्यार परमेशर आसा साथे राखोआ, तिजी खे आसे जाणी गे और आसा खे तिजी पाँदे विश्वास ए कि परमेशर प्यार ए, जो प्यारो रे बणेया रा रओआ, से परमेशरो रे बणेया रा रओआ और परमेशर तेसरे बणेया रा रओआ। 17 इजी तेई प्यार आसा रे सिद्ध ओआ कि तेस आसा खे सजा नि देणी। जेडा यीशु मसीह ए, तेडे ई दुनिया रे आसे बी ए। 18 प्यारो रे डर नि ऊँदा, बल्कि सिद्ध प्यार डरो खे दूर करी देओआ, कऊँकि डरो ते तकलीफ़ ओई और जो डर करोआ, से प्यारो रे सिद्ध नि ऊआ। 19 आसे इजी री खातर परमेशरो खे और ओरी खे प्यार करूँए, कऊँकि पईले परमेशरे आसा ते प्यार कित्तेया। 20 जे कोई बोली कि आऊँ परमेशरो ते प्यार राखूँआ और आपणे पाईए ते बैर राखो, से तो चूठा ए, कऊँकि जो आपणे पाईए ते, जो तिने देखी राखेया, प्यार नि राखदा, तो से परमेशरो ते बी, जो तिने देखी नि राखेया, प्यार नि राखी सकदा। 21 तेसते आसा खे ये आज्ञा मिली री कि जो कोई आपणे परमेशरो ते प्यार राखोआ, से आपणे पाईए ते बी प्यार राखो।

5 जेसरा ये विश्वास ए कि प्रभु यीशु ई मसीह ए, से परमेशरो ते पैदा ऊई रा और जो कोई पैदा करने वाले ते प्यार राखोआ, से तेसते बी प्यार राखोआ, जो तेसते पैदा ऊई रा। 2 जेबे आसे परमेशरो ते प्यार राखूँए और तेसरी आज्ञा खे मानूँए, तो इजी तेई आसे जाणूँए कि परमेशरो री ल्वादा साथे प्यार राखूँए 3 परमेशरो रा प्यार ये कि आसे तेसरी आज्ञा खे मानिए और तेसरी आज्ञा कठण नि ए। 4 कऊँकि जो कुछ परमेशरो ते पैदा ऊई रा, तेसखे दुनिया रे जय मिलोई और से जीत जेते कि दुनिया रे जय मिलोई, से म्हारा विश्वास ए। 5 दुनिया पाँदे जय पाणे वाला कूणे? बस से, जेस पाँदे विश्वास ए कि प्रभु यीशु ई परमेशरो रा पुत्र ए। 6 ये सेईए, जो पाणी और खूनो रे जरिए आया, मतलब-प्रभु यीशु मसीह। से ना बस पाणिए रे जरिए, बल्कि पाणी और खून डूँई रे जरिए आया और जो गवाई देओआ, से पवित्र आत्मा ए, कऊँकि पवित्र आत्मा सच्ची ए 7 सच तो ये ए कि गवाई देणे वाले तीन ए; 8 आत्मा, पाणी, और खून ये तिनी एक ई गल्ला पाँदे सहमत ए। 9 जेबे आसे मांगूआ री गवाई मानी लऊँए, तो परमेशरो री गवाई तिजी ते बड़ी की ए और परमेशरो री गवाई ये कि तिने आपणे पुत्रो रे बारे रे गवाई देई राखी। 10 जो परमेशरो रे पुत्रो पाँदे विश्वास करोआ, से परमेशरो री गवाई आपणे मनो रे राखोआ, जिने परमेशरो पाँदे विश्वास नि कित्तेया, तिने से चूठा ठराया, कऊँकि तिने तेसा गवाईया पाँदे विश्वास नि कित्तेया, जो परमेशरे आपणे पुत्रो रे बारे रे दिति 11 और से गवाई ये कि परमेशरे आसा खे अनन्त जीवन देई राखेया और ये जीवन तेसरे पुत्रो रे ए। (aiōnios g166) 12 जेसगे परमेशरो रा पुत्र ए, तेसगे अनन्त जीवन ए और जेसगे परमेशरो रा पुत्र नि ए, तेसगे अनन्त जीवन पनिए। 13 मैं तुसा खे, जो परमेशरो रे पुत्रो रे नाओं पाँदे विश्वास राखोए, इजी खे लिखी राखेया कि तुसे जाणो कि अनन्त जीवन तुसा राए (aiōnios g166) 14 और आसा खे परमेशरो रे सामणे जो हियाव ओआ, से ये कि जे आसे तेसरी इच्छा रे मुताबिक कुछ मांगूए, तो से म्हारी सुणोआ। 15 जेबे आसे जाणूँए कि जो कुछ आसे परमेशरो ते मांगूए, से म्हारी सुणोआ, तो ये बी जाणूँए कि जो कुछ आसे तेसते मांगेया, से पाया। 16 जे कोई आपणे विश्वासी पाईए खे एडा पाप करदे ऊए देखो, जेतेरा फल मौत नि ओ, तो प्रार्थना करो कि परमेशर तेसखे, तिना खे, जिने एडा पाप करी राखेया, जेतेरा फल मौत नि ए, जीवन देओगा, पाप

एडा बी ओआ, जेतेरा फल मौत ए, इजी रे बारे रे आऊँ बिनती करने खे नि बोलदा। 17 सब प्रकारा रे बुरे काम तो पाप ए, पर कुछ एडे पाप बी ए, जेतेरा फल मौत नि ए। 18 आसे जाणूँ कि जो कोई परमेशरो ते पैदा ऊई रा, से लगातार पाप नि करदा, जो परमेशरो ते पैदा ऊई रा, तेसखे से बचाए रे राखोआ और से दुष्ट तेसखे छुँई नि सकदा। 19 आसे जाणूँ कि आसे परमेशरो ते ए और दुनिया तेस दुष्टो रे वशो रे पड़ी री। 20 और आसे ये बी जाणूँ कि परमेशरो रा पुत्र यीशु मसीह एते दुनिया रे आया और तिने आसा खे समज दित्ती कि आसे तेस सच्चे परमेशरो खे पछ्याणूँ और आसे तिदे जो सच ए, मतलब-तेसरे पुत्र प्रभु यीशु मसीह रे रऊँए, सच्चा परमेशर और अनन्त जीवन येईए। (aiōnios g166) 21 ओ बालको! आपणे आपू खे मूर्तिया ते बचाई की राखो।

2 यूहन्ना

1 ये चिट्ठी मां बुजुर्गों की तरफा ते ए। आऊँ ये चिट्ठी तेसा खास जवाणसा खे और तेसा रे बाल-बच्चेया खे लिखणे लगी रा जिना खे परमेशरे आपणे लोक करी की चूणी राखेया। आऊँ तुसा सबी ते सच्चा प्यार करूँआ, बस आऊँ ई नि, बल्कि सेयो सब बी प्यार राखोए, जो सच्चाईया खे जाणोए। 2 आसे सब लोक तांते प्यार करूँए कऊँकि से सच्चाई जो आसा रे टीकी री रओई, और सदा आसा साथे अटल रणी। (aiōn g165) 3 पिता परमेशर और पिते रे पाऊ प्रभु यीशु मसीह री तरफा ते कृपा, दया और शान्ति आसा साथे सच और प्यारो रे बणी रणी। 4 आऊँ बऊत खुश ऊआ कि मैं तेरे कुछ बाल-बच्चे, तेसा आज्ञा रे मुताबिक, जो आसा खे पिते री तरफा ते मिली थी, सच्चाईया पाँदे चलदे ऊए पाए। 5 एबे ओ जवाणसे! आऊँ ताखे कोई नयी आज्ञा नि, पर सेई जो शुरूओ तेई आसा गे ए, लिखूँआ। और तांते बिनती करूँआ कि आसे एकी-दूजे साथे प्यार राखिए 6 और प्यार ये कि आसे तेसरी आज्ञा रे मुताबिक चलिए। ये सेई आज्ञा ए, जो तुसे शुरूओ ते सुणी राखी और तुसा खे इजी पाँदे चलणा बी चाईयो। 7 कऊँकि बऊत सारे एड़े भरमाणे वाले दुनिया रे निकली की आयी रे, जो ये नि मानदे कि प्रभु यीशु मसीह शरीरो रे ऊई की आए। भरमाणे वाला और मसीह रा बिरोदी येई ए। 8 आपणे बारे रे चौकस रओ। जो मईणत आसे सब करी राखी, तिजी खे तुसे खोई नि देओ, बल्कि अनन्त जीवनो रा पूरा फल पाओ। 9 जो कोई मसीह री शिक्षा ते पटकी जाओआ और मसीह री शिक्षा रे बणेया रा नि रंदा, तेसगे परमेशर निए। पर कोई तेसरी शिक्षा रे टीके रा रओआ, तेसगे पिता बीए और पुत्र बी। 10 जे कोई तुसा गे आओ और मसीह री सच्ची शिक्षा नि देओ, तेसखे ना तो कअरे आऊणे देओ और ना ई तेसरी आदर-खातर करो। 11 कऊँकि जो कोई एड़े जणे री आदर-खातर करोआ, से तेसरे बुरे कामो रे साजा ओआ। 12 माखे तुसा खे बऊत सारिया गल्ला लिखणिया ए, पर कागज और स्याईया ते लिखणा नि चांदा, पर उम्मीद ए कि आऊँ तुसा गे आऊणा और आमणे-सामणे गल्ला कळंगा, जेते की आसा री खुशी पूरी ओ। 13 परमेशरो रे जरिए चूणी री तेरी बईणा रे बाल-बच्चे जो एती आसा साथे ताखे नमस्कार बोलोए।

3 यूहन्ना

1 ये चिट्ठी मां बुजुर्ग मांणूए री तरफा ते ए। आऊं ये चिट्ठी मेरे प्यारे दोस्त गयूसो खे लिखणे लगी रा, जेस साथे आऊं सच्चा प्यार करूँआ। 2 ओ मेरे प्यारे, मेरी ये प्रार्थना ए कि जियाँ तूँ आत्मिक तरक्की करने लगी रा, तियाँ ई तूँ सबी गल्ला रे तरक्की कर और ठीक-ठाक रओ। 3 कऊँकि जेबे पाईया आयी की तेरे तेस सच्चो री गवाई दिती, जेते पाँदे तूँ सच्ची चलेया, तो आऊँ बऊत ई खुश ऊआ। 4 माखे इजी ते बढी की ओर कोई खुशी निए कि आऊँ सुणूँ कि मेरे बाल-बच्चे सच्चो पाँदे चलोए। 5 ओ मेरे प्यारे, जो कुछ बी पले काम तूँ तिना पाईया साथे करेया, जो परदेशी बी ए, से विश्वासी ऊई की करेया कर। 6 तिने परदेशी लोके मण्डलिया सामणे तेरे प्यारो री गवाई दिती थी। जे तूँ तिना खे तियाँ बिदा करेगा, जियाँ परमेशरो रे लोका खे पला ए, तो अच्छा करोगा। 7 कऊँकि सेयो मसीह रे नाओं ते अच्छे काम करने खे निकली रे और दुजिया जातिया ते कुछ बी मताद नि लंदे। 8 इजी री खातर एड़ेया रा स्वागत करना चाईयो, ताकि आसे बी सच्चो रे पक्षो रे तिना साथे ओऊँ। 9 मैं मण्डलिया खे एतेरे बारे रे चिट्ठी लिखी थी, पर दियुत्रिफेस जो तिना बीचे बड़ा बणना चाओआ, आसा खे नि मानदा। 10 तो जेबे आऊँ आऊँगा, तो तेसरे कामो री, जो से करने लगी रा, याद करवाणी कि से म्हारे बारे रे बुरी-बुरी गल्ला बकोआ। इजी पाँदे बी तसल्ली ना करी की आपू ई विश्वासी पाईया खे नि मानदा। जेबे मण्डली जो विश्वासी पाई बाअरा ते आओए, तिना खे मानणा चाओई, तिना खे बी मानणे ते ना करोआ और मण्डलिया ते निकयाली देओआ। 11 ओ मेरे प्यारे! बुराईया रे नि, पर पलाईया पीछे चलणे वाले बणो, जो पला करोआ, से परमेशरो री तरफा ते ए, पर जो बुराई करोआ, तिने परमेशर नि देखेया। 12 देमेत्रियुसो रे बारे रे सबी, बल्कि सच्चे बी आपू गवाई दिती और आसे बी गवाई देऊँए और तूँ जाणेया कि म्हारी गवाई सच्ची ए। 13 मां ताखे बऊत कुछ लिखणा तो था, पर स्याईया और कलमा ते लिखणा नि चांदा। 14 पर माखे उम्मीद ए कि तां साथे चट ई मिलूँगा। तेबे आसा आमणे-सामणे गल्ल-बात करनी। ताखे शान्ति मिलदी रओ। एथो रे दोस्त ताखे नमस्कार बोलोए। तेथो रे दोस्ता खे नाओं लयी-लयी की नमस्कार बोली देणा।

यहूदा

1 ये चिट्ठी मां यहूदा री तरफा ते ए। आँऊ यीशु मसीह रा दास और याकूबो रा छोटा पाई ए। आँऊ ये चिट्ठी तुसा लोका खे लिखणे लगी रा जो परमेशरे बुलाई राखे। पिता परमेशर तुसा लोका ते प्यार करोआ और तुसा खे यीशु मसीह रे सयी-सलामत राखेआ। 2 आँऊ प्रार्थना कर्हूआ कि दया, शान्ति और प्यार तुसा खे बऊत जादा मिलदा रओ। 3 ओ प्यारेओ, आँऊ तुसा लोका खे तेस उद्धारो रे बारे रे लिखणे री हर तरअ ते कोशिश करने लगी रा था जिदे आसे सब शामिल ए जो परमेशरो री तरफा ते यीशु मसीह रे जरिए आसा खे मिलेओ। पर एबे आँऊ एसा चिट्ठिया रे जरिए तुसा लोका खे ये समजयाणा जरूरी समजूआ ताकि तुसे लोक मसीह रे विश्वासो रे बणे रणे रे ओर बी कठण कोशिश करो। परमेशरे ये विश्वास एक ई बार और आपणे सबी लोका खे देई राखेया और ये बदली नि सकदा। 4 आँऊ ये चिट्ठी तुसा खे इजी खे लिखणे लगी रा कर्हूकि कुछ लोक चोरिए जे आसा बीचे आयी की मिली मे रे, जो यीशु मसीह रे विश्वास करने रा दखावा करोए। सेयो लोक बिना भगित करने वाले ए और गलत तरीके ते ये शिक्षा देओए कि जेबे परमेशरे आसे रे पाप कृपा करी की माफ करी ते रे तो आसे बुरी जिन्दगी जि सकूए। सेयो लोक यीशु मसीह खे ना करोए जो आसा रा एक मात्र स्वामी और प्रभु ए। पुराणे बखतो तेई पवित्र शास्त्रो रे लिखी राखेया कि परमेशरो तिना लोका खे सजा देणी। 5 आँऊ तुसा खे इजी गल्ला री याद दलाणा चाऊँआ, हालाँकि तुसे लोक एसा गल्ला खे पईले तेई जाणोए कि परमेशरे इस्पाएली लोका खे गुलामिया ते छुड़ाया और मिस्र देशो ते बाअरे लयी की आया, पर परमेशरे बादो ते तिना सबी लोका खे सुणसाण जगा रे मारी ता कर्हूकि तिने लोके तेस पाँदे विश्वास नि कित्तेया था। 6 ये बी याद करो कि परमेशरे कियं तिना स्वर्गदूता खे सजा दिती जिने आपणे अक्को रे पदो खे बणाया रा नि राखेया पर इजी री बजाए आपणे दित्ते रे पद और आपणी जगा छाडी ती। परमेशरे इना दूता खे न्हरे कुण्डो रे पाई की जंजीरा साथे बानी ता ताकि कोई बी तिना खे तेस भीषण दिने रे न्याय ते बचाई नि सको। (aiōdios g126) 7 तियाँ ई सदोम, गमोरा और तिजी साथले ओरले-पोरले नगर बी, जो इना जेडे व्याभिचारी ऊईगे थे और पराये शरीरो पीछे लगी मे थे। परमेशरे तिना नगरा रा आगी रे जरिए सत्यानाश करी ता और ये आसा खे परमेशरो रे न्याय री अनन्त आगी रे बारे रे चेतावणी देओआ। (aiōnios g166) 8 ईयाँ ई विश्वासो रा दखावा करने वाले लोक ये दावा करोए कि परमेशरे तिना खे दर्शणो रे प्रकट करी राखेया कि सेयो लोक आपणे शरीरो खे गन्दे काम करी कि अशुद्ध करोए। सेयो लोक परमेशरो रे अक्को खे तुच्छ जाणोए और तेजोमय स्वर्गिय प्राणिया खे पला-बुरा बोलोए। 9 पर एथो तक कि मीकाईल जो परमेशरो रे प्रदान स्वर्गदूता बीचा ते एक ए तिने इना विश्वासो रा दखावा करने वाले लोका जेड़ा नि कित्तेया। जेबे मीकाईले शैतानो साथे भविष्यबक्ता मूसे री लोथा रे बारे रे बईस किती, तो तेसखे पला-बुरा बोली की दोष लगाणे री इम्मत नि किती। पर सिर्फ इतणा ई बोलेया, “प्रभु ताखे बको।” 10 पर यो लोक जिना गल्ला खे नि जाणदे, तिना खे पला-बुरा बोलोए, पर जिना गल्ला खे नासमज डांगरा जेडे सबाओ तेई जाणोए, तिना रे आपणे-आपू खे पाप करने रे जरिए नाश करोए। 11 धिक्कार ए तिना पाँदे, सेयो आदमो रे पाऊ कैनो जेडे बुरी चाल चले, जिने आपणा छोटा पाई काया था। तिने लोके बिलामो जेड़ी सेई गलती किती जिने पैसेया रे लालचो खे परमेशरो रे लोका खे पाप करने खे प्रेरित कित्तेया था। सेयो लोक कोरहो जेडे नाश ऊई जाणे जिने मूसा रा बरोद कित्तेया था। 12 जियाँ समुद्रो रे लुकी री चट्टान किस्तिया खे खतरनाक ओई तियाँ ई सेयो विश्वासो रा दखावा करने वाले लोक तुसा खे खतरनाक ए, जो प्यारो री पाट्टिया रे तुसा साथे विश्वासिया रे रूपो रे साजा करोए। सेयो लोक तेस बेशर्म रखेवाले जेडे ए, जो सिर्फ आपणी ई देखपाल करोआ। सेयो लोक बिना पाणिए रे बादलो जेडे ए, जिना खे अवा उड़ाई की लयी जाओई। सेयो लोक पतझड़ो रे बिना फलो

रे डाला जेडे ए, जो दो बार मरी चुकी रे और जड़ी ते पट्टी मे रे। 13 सेयो विश्वासो रा दखावा करने वाले लोक समुद्रो री प्रचण्ड लईरा जेडे ए, जो आपणी गन्दगी चागो जेड़ी उछालोईया, तियाँ ई सेयो लोक आपणी शर्मा रा काम करोए। सेयो लोक बाटा ते पटके रे तारे जेडे ए, जिना खे सदा कालो खे अन्दकूप न्हारा राखी राखेया। (aiōn g165) 14 हनोके बी जो आदमो ते साती पीढिया रे था, इना लोका रे बारे रे ये बोल्दे ऊए भविष्यबाणी किती, “देख, प्रभु आपणे लाखो पवित्र स्वर्गदूता साथे आया, 15 कि सबी रा न्याय करो और दुष्ट लोका खे जो बुरे काम तिने बुराईया ते करी राखे और दुष्ट पापिया खे जिने परमेशरो रे बिरोदो रे बुरे शब्दा रा इस्तेमाल करी राखेया, दोषी ठराओ।” 16 सेयो विश्वासो रा दखावा करने वाले लोक सदा परमेशरो रे बिरोदो रे बुरिया गल्ला करोए और ओरी लोका दे गलती टोलदे रओए। सेयो आपणी ई इच्छा ते लगातर बुरे काम करना चाओए। सेयो लोक आपणे फाईदे खे मूँ देखी की तारीफ करोए। 17 पर ओ मेरे प्यारेओ, तुसे इना गल्ला खे याद राखे, जो म्हारे प्रभु यीशु मसीह रे प्रेरित पईले बोली चुके रे। 18 सेयो तुसा खे बोलेया करो थे, “आखरी दिने रे एड़ा मजाक करने वाले ऊणे, जो आपणी अभक्तिया री इच्छा रे मुताबिक चलणे।” 19 ये सेयो लोक ए, जो तुसा बीचे फूट पाओए। सेयो दुनिया री बुरी इच्छा रे वशो रे ए और परमेशरो रा आत्मा तिना रे निए। 20 पर ओ मेरे प्यारेओ, तुसे आपणे बऊत पवित्र विश्वासो रे तरक्किया खे एकी दूजे री मताद करदे रओ। तुसे लोक पवित्र आत्मा री सामर्था री अगुवाईया रे प्रार्थना करदे रओ। 21 तुसे लोक अनन्त कालो रे जीवने खे म्हारे प्रभु यीशु मसीह री दया री उम्मीदा ते इन्तजार करदे ऊए आपणे आपू खे परमेशरो रे प्यारो रे बणाए रे राखो। (aiōnios g166) 22 तिना लोका पाँदे दया करो जिना रा विश्वास मजबूत निए। 23 ओरी खे न्याय री आगी बीचे लमखी की निकयालो। बऊत सारे एडे लोक ए जिना पाँदे जरूर दया करो, पर बऊत ई सावधानिया साथे एड़ा करो। तुसे तिना लोका रे टालेया ते बी नफरत करो जो शरीरो रे जरिए कलंकित ऊईगे रे। 24 सिर्फ परमेशर ई एबे तुसा खे ठोकर खाणे ते बचाई सकोआ और आपणी महिमा री भरपूरिया रे सामणे, मग्न और निर्दोष करी की खड़ा करी सकोआ। 25 तिने म्हारा यीशु मसीह रे जरिए उद्धार करी राखेया। तेसी एक मात्र परमेशरो री महिमा, गौरव, पराक्रम और अक्क सनातन कालो ते, एबे बी ओ और जुगो-जुगो तक रओ। आमीन्। (aiōn g165)

प्रकाशित वाक्य

1 ये प्रकाशितवाक्य यीशु मसीह री तरफा ते ए, जो परमेश्वर तिना पाँद इजी खे प्रकट कित्तेया कि से आपणे दासा खे तिना गल्ला, जिना रा चट ऊणा जरूरी ए, दखाओ। मसीहे आपणा स्वर्गदूत पेजी की तेसरे जरिए ये प्रकाशन आपणे दास यूहन्ने खे बताया। 2 यूहन्ने सेयो सब गल्ला लिखिया जो तिने देखिया थिया मतलब परमेश्वरो री तरफा ते दित्तेया रा संदेश और से सब कुछ जो यीशु मसीहे बोलेया था। 3 धन्य ए से, जो एसा भविष्यबाणिया रे वचना खे पढ़ोआ और सेयो बी जो इना वचना खे सुणोए और इदे लिखी रिया गल्ला खे मानोए, कऊँकि बखत नेडे आयी रा। 4 ये चिट्ठी मां यूहन्ने री तरफा ते ए। आँऊ ये चिट्ठी आसिया प्रदेशो री सातो मण्डलिया खे लिखणे लगी रा। आँऊ प्रार्थना कऊँआ कि तुसा सबी लोका खे परमेश्वरो री तरफा ते जो आए और जो था और जो आऊणे वाला ए कृपा और शान्ति मिलदी रओ। तिना सातो आत्मा री तरफा ते, जो परमेश्वरो रे सिंहासनो रे सामणे ए, तुसा खे कृपा और शान्ति मिलदी रओ। 5 यीशु मसीह री तरफा ते बी तुसा सबी लोका खे जो विश्वासो जोगे गवा ए, कृपा और शान्ति मिलदी रओ। यीशु मसीह मरे रेया बीचा ते जिऊँडे ऊणे वालेया रे जेठा ए और से तरतिया रे राजेया रा हाकिम ए। से आसा साथे प्यार राखोआ और तिने आपणे खुनो रे जरिए आसे पापो ते छुड़ाए। 6 यीशुए ई आसे आपणे पिता परमेश्वरो खे पुरोईता रा राजवंश बनाईते। तेसरी महिमा और पराक्रम जुगो-जुगो तक रओ। आमीन्। (aiōn g165) 7 देखो, से बादलो साथे आऊणे वाला ए और हर एकी आखी से देखणा, बल्कि जिने से ऊजेया था, तिना बी से देखणा और तरतिया रे सारे कुला तेसरी बजअ ते जेरे-जेरे की रोणा। आ, ये ऊणा। आमीन्। 8 प्रभु परमेश्वर ये बोलोआ, “आऊँ ई पईला और आखरी ए, मतलब से जो आए और जो था और जो आऊणे वाला ए और जो सर्वशक्तिमान् ए।” 9 आऊँ यूहन्ना जो तुसा रा साथी विश्वासी पाई और यीशुए खे क्लेश सईणे और परमेश्वरो रे राज्य रे और सब्रो रे तुसा रा साथी ए। आँऊ परमेश्वरो रे वचन और यीशुए री गवाईया री बजअ ते रोमी अगुवो रे जरिए कैदिया रे रूपो रे पतमुस नाओं रे टापुओ रे पेजी ता था। 10 प्रभुए रे दिने मतलब जेस दिने विश्वासी लोक आराधना करने खे कट्टे ओए आँऊ तेस दिने पवित्र आत्मा ते परी गा और अचाणक मैं आपणे पीछे तुरहिया जेड़ी जोरो री आवाज सुणी। 11 तिने बोलेया, “जो कुछ तूँ देखेया तिजी खे कताबा रे लिखी की सातो नगरो री मण्डलिया गे पेजी दे; मतलब इफिसुस, स्मूरणा, पिरगमुन, थुआतीरा, सरदीस, फिलदिलफिया और लौदीकिया खे पेजी दे।” 12 तेबे मैं तेसखे जो मां साथे बोलणे लगी रा था देखणे खे आपणा मूँ फेरया और पीछे कूमी की मैं सात दिऊए देखे। 13 तिना दिऊएया बीचे माणूँ रे पुत्रो जेड़ा एक मर्द देखेया। से पैरा तक टाले पइने रे था और तिने छानिया पाँद सुईरा रा पटक बानेया रा था। 14 तेसरा सिर और बाल चिट्ठिया ऊना जेड़े थे, बल्कि पाले जेड़े चमकणे लगी रे थे और तेसरिया आखी आगी री लुपिया जेड़िया थिया। 15 तेसरे पैर खरे पीतलो जेड़े थे मानो आगी री पट्टिया रे तपाई राखे और तेसरी आवाज मुखते पाणिए री छेड़ा जेड़ी थी। 16 तिने आपणे दाँणे आथो रे सात तारे लयी राखे थे और तेसरे मुँओ ते पईनी दोरी तलवार निकलने लगी री थी। तेसरा मूँ एड़ा चमकणे लगी रा था जेड़ा सूरज कड़क तूपा पाँद चमकोआ। 17 जेबे मैं से देखेया तो आऊँ तेसरे पईरा पाँद मरेया रा जा पड़ी गा। तेबे तिने मां पाँद आपणा दाँणा आथ राखी की ये बोलेया, “डर नि, आऊँ पईला और आखरी ए। 18 आऊँ सेईए जो जिन्दगी देओआ। आँऊ मरी गा था और एबे देख, आऊँ जुगो-जुगो तक जिऊँदा ए। मांगे ई मौत और नरको रिया कुँजियाँ ए। (aiōn g165, Madēs g86) 19 “इजी खे जो गल्ला तँ देखिया और जो गल्ला उणे लगी रिया और जो इजी ते बाद उणे वालिया ए, तिना सबी लिखी लो। 20 तिना सातो तारेया रा पेत जो तँ मेरे दाँणे आथो रे देखे थे और तिना सात सुईने रे

दिऊएया रा पेत ये ए: सेयो सात तारे, सातो मण्डलिया रे स्वर्गदूत ए और सेयो सात दिऊए सात मण्डलिया ए।”

2 तिने माखे ये बी बोलेया, “इफिसुस नगरो री मण्डलिया रे स्वर्गदूतो खे ये संदेश लिख: आँऊ सेईए जिने सातो तारे आपणे दाँणे आथो रे लयी राखे और सुईने रे साता दिऊएया बीचे चलो फिरोआ। आँऊ ताखे जो बोलूँआ से सुण: 2 आऊँ तेरे काम, परिश्रम और तेरा सन्न जाणूँआ। आँऊ ए बी जाणूँआ कि तूँ बुरे लोका खे देखी नि सकदा। तँ सेयो लोक परखी की चूठे पाणे जो आपणे आपू खे प्रेरित ऊणे रा दखावा करोए। 3 तूँ सन्न करोआ और मेरे नाओं री तई दु: ख सईदे-सईदे थकदा नि। 4 पर मां तेरे खलाफ ये बोलणा कि तँ आपणा पईलका जेड़ा प्यार छाडीता रा। 5 याद करो कि तुसे केथा ते केथी आई की रुडी रे। इजी खे मन फेर और पईले जेड़े काम कर। जे तूँ आपणा मन नि बदलेगा तो मां तांगे आयी की तेरे दिऊए तेते जगा ते टाई देणे। 6 पर आहो, तांदे ये अच्छी गल्ल तो आयी की तूँ नीकुलइयो रे कामा ते कृणा करेया, जिना ते आऊँ बी कृणा कऊँआ। 7 जो समजी सकोआ से तिजी खे त्यानो साथे सुणो और मानी बी लओ कि परमेश्वरो रा आत्मा मण्डलिया खे क्या बोलणे लगी रा। जो जीती जाणे, मां तेसखे तेस जीवोने रे डालो बीचा ते जो परमेश्वरो रे स्वर्गलोको रे ए, फल खाणे खे देणे। 8 “स्मूरणा नगरो री मण्डलिया रे स्वर्गदूतो खे ये संदेश लिख: आँऊ सेईए जो पईला और आखरी ए और जो मरी गा था पर एबे जिऊँदा ए। आँऊ ताखे जो बोलूँआ से सुण: 9 आऊँ तेरे क्लेश और गरीबी जाणूँआ पर तूँ अमीर ए और जो लोक आपणे आपू खे यहूदी बोलोए और आए नि, पर शैतानो री सभा ए, तिना री निन्दा खे बी जाणूँआ। 10 जो दु: ख ताखे सईन करने पड़ने, तिना ते नि डर। कऊँकि देखो, शैतान तुसा बीचा ते कईया खे जेला रे पाणा चाओआ, ताकि तुसे परखे जाओ और तुसा खे दसा दिना तक क्लेश सईन करना पड़ी। प्राण देणे तक विश्वासी रओ, तो मां ताखे जीवोने रा मुकट देणा। 11 जो समजी सकोआ से तिजी खे त्यानो साथे सुणो और मानी बी लओ कि परमेश्वरो रा आत्मा मण्डलिया खे क्या बोलणे लगी रा। जो जीती जाणे, सेयो दूजी बार कदी नि मरने। 12 “पिरगमुन नगरो री मण्डलिया रे स्वर्गदूतो खे ये संदेश लिख: आँऊ सेईए जेसगे दोरी और पैनी तलवार ए। आँऊ ताखे जो बोलूँआ से सुण: 13 आऊँ ए तो जाणूँआ कि तूँ तेती रएया जेती शैतानो रा सिंहासन ए। फेर बी तूँ मेरे नाओं पाँद खड़ा रएया। तूँ मां पाँद विश्वास करने ते बी तिना दिना रे बी पीछे नि आटेया, जिना रे मेरा विश्वासो जोगा गवा अन्तिपास तुसा बीचे तेते जगा रे काया, जेती शैतान रओआ। 14 पर मां तेरे खलाफ कुछ गल्ला बोलणिया ए, कऊँकि तांगे कई जणे तो एड़े ए, जो बिलामो री शिक्षा खे मानोए, जिने बालाको खे इस्राएलिया रे आगे ठोकरा री बजअ ऊणा सिखाया, ताकि सेयो मूर्तिया पाँद बलिदान किन्ती री चीजा खाओ और व्याभिचार करो। 15 ईयाँ ई तेरे एती कई एड़े जो नीकुलइयो री शिक्षा खे मानोए। 16 तेबे मन फिरा! नई तो मां तांगे फटाफट आयी की आपणे मुँओ री तलवारे की जो मेरा वचन ए तिना लोका रे खलाफ लड़ना। 17 जो समजी सकोआ से तिजी खे त्यानो साथे सुणो और मानी बी लओ कि परमेश्वरो रा आत्मा मण्डलिया खे क्या बोलणे लगी रा। जो जीती जाणा, तेसखे आऊँ गुप्त मनने ते देऊँगा। तेसखे एक चीट्टा पात्थर बी देऊँगा और तेस पात्थरो पाँद एक नाओं लिखेया रा ऊणा, जो तेस पाणे वाले रे सिवाए कोई नि जाणी सकणा। 18 “थुआतीरा नगरो रिया मण्डलिया रे स्वर्गदूतो खे ये संदेश लिख: मां परमेश्वरो रे पुत्र जेसरिया आखी आगी री लुपिया जेड़िया ए और जेसरे पैर खरे पीतलो जेड़े ए। आँऊ ताखे जो बोलूँआ से सुण: 19 आऊँ तेरे काम, तेरा प्यार, विश्वास, धीरज और सेवा खे जाणूँआ और ये बी जाणूँआ कि तेरे एबुए रे काम पईलकेया कामा ते बडी की ए। 20 पर मां तेरे खलाफ कुछ बोलणा कि तूँ तेसा जवाणसा इजेबेला खे रणी देओआ, जो आपणे आपू खे भविष्यबक्तणी बोलोई। से मेरे दासा खे व्याभिचार करने खे और मूर्तिया रे सामणे बलि किन्ती रिया चीजा खाणा सिखाई की भरमाओ ई। 21 मैं तेसा खे मन फिराणे रा मौका दित्तेया पर से

आपणे व्याभिकारो ते मन फेरना नि चाँदी। 22 देख, आऊँ तेसा खे बमारिया री शैय्या रे पाऊँआ और जो तेसा साथे व्याभिकार करोए, जे सेयो बी तेसा जेडे कामो ते मन नि फेरोगे तो मां सेयो बडे क्लेशो रे पाई देणे। 23 मां तेसा रे सारे बालक काई देणे। तेबे सारी मण्डलिया जाणी लणा कि दिल और मनो रा परखणे वाला आऊँ ईए और मां तुसा सबी जणेया खे तुसा रे कामो रे मुताबिक बदला देणा। 24 पर तुसे थुआतीरा नगरो रे बाकि लोका ते जितणे एसा शिक्षा खे नि मानदे और जिना गल्ला खे शैतानो रिया गईरिया गल्ला बोलोए, जाणदे नि, आऊँ ये बोलीआ कि मां तुसा पाँदे ओर बोज नि पाणा। 25 पर आ, जो तुसा गे ए, तिजी खे मेरे आऊणे तक सम्बाली की राखो। 26 जो जीती जाणे और मेरे मुताबिक आखरी तक काम करदा रओगा, मां तेसखे जातिया-जातिया रे लोका पाँदे अक्क देणा। 27 और तेस लोए रा राजदण्ड लयी की तिना पाँदे राज करना और जियाँ कुम्हारो रे माट्टिया रे पाँडे टुटी जाओए, मैं बी एडा ई अक्क आपणे पिते ते पाई राखेया 28 और मां तेसखे प्याणु तारा देणा। 29 जो समजी सकोआ से तिजी खे त्यानो साथे सुणो और मानी बी लओ कि परमेशरो रा आत्मा मण्डलिया खे क्या बोलणे लगी रा।”

3 “सरदीस नगरो री मण्डलिया रे स्वर्गदूतो खे ये संदेश लिख: आऊँ से ए जेसगे परमेशरो रिया सात आत्मा ए और सात तारे ए। से ये बोलीआ कि आऊँ तेरे कामा खे जाणूँआ, तूँ जिऊँदा तो लगेओ, पर अया मरेया रा। 2 इजी खे सावधान ऊई जाओ और तुसा दे जो कुछ बाकि ए, से बी मेरे रेया जेडा ए। तिदे नई जिन्दगिया री शुरूआत करो। कऊँकि मैं तेरे कोई बी काम आपणे परमेशरो रे नेडे पूरे नि पाये। 3 तेबे याद कर कि तँ केडी शिक्षा पाई राखी और सुणी थी और तिदे बणेया रा रओ और मन फिराई दे। पर जे तूँ जागदा नि रएणा तो आऊँ चोरो जेडा आयी जाणा और तां कदी पति जाणी सकणा कि मां केस बखते तां पाँदे आयी की पाई जाणा। 4 पर आ, सरदीस नगरो री मण्डलिया रे कुछ एडे लोक ए जिने आपणे-आपणे टाले अशुद्ध नि कित्ते। सेयो सफेद टाले पईनी की मां साथे कूमणे, कऊँकि सेयो एते जोगे आये। 5 जो जीती जाणे, तिना खे सफेद टाले पणयाए जाणे और मां तिना रा नाओं जीवने रिया कताबा ते कदी पनि मटयांगा, पर तेसरा नाओं आपणे पिते रे और तेसरे स्वर्गदूता सामणे मानी लणा। 6 जो समजी सकोआ से तिजी खे त्यानो साथे सुणो और मानी बी लओ कि परमेशरो रा आत्मा मण्डलिया खे क्या बोलणे लगी रा। 7 “फिलदलिफिया नगरो री मण्डलिया रे स्वर्गदूतो खे एडा संदेश लिख: आऊँ से ए जो पवित्र और सच्चा ए और जेसगे दाऊदो रिया कुँजियाँ ए। से जो कुछ बी खोलोआ, तेस खोले रे खे कोई बंद नि करी सकदा और से जो कुछ बी बंद करोआ तेस बंद कित्ते रे खे कोई खोली नि सकदा। आऊँ ताखे जो बोलीआ से सुण: 8 आऊँ तेरे कामो खे जाणूँआ, देख, मैं तां सामणे एक द्वार खोली राखेया, जेतेखे कोई बंद नि करी सकदा। आऊँ ये बी जाणूँआ कि तेरी सामर्थ थोडी जी तो आए फेर बी तँ मेरे वचन मानी राखे और मेरे नाओं खे ना नि कित्ती। 9 देख, मां शैतानो रे सेयो सभा वाले तेरे वशो रे करी देणे, जो यहूदी बणी बैठी रे, पर आए नि, बल्कि चूट बोलोए। देख, मां एडा करना कि तिना आयी की तेरे पैरा पाँदे माथा टेकणा और तिना ये जाणी लणा कि मैं तांते प्यार राखी राखेया। 10 तँ मेरा वचन मानेया और सन्नो साथे दुःख सईन कित्तेया। तेबेई मां बी तूँ परीक्षा रे तेस बखते बचाई की राखणा, जो तरतिया पाँदे रणे वालेया खे, परखणे खे, सारे दुनिया रे आऊणे वाला ए। 11 आऊँ फटाफट ई आऊणे वाला ए। जो कुछ तुसा गे ए, तेस पकड़ी की राख कि कोई तेरा मुकट छुड़ाई नि लओ। 12 जो जीती जाणे, से मां आपणे परमेशरो रे मन्दरो रे खम्बा बनाणे। से फेर कदी बारे नि निकलने। मां आपणे परमेशरो रा नाओं और आपणे परमेशरो रे नगर, मतलब-नये यरूशलेमो रे नाओं, जो मेरे परमेशरो गे ते स्वर्गो ते उतरने वाला ए और आपणा नया नाओं तेस पाँदे लिखणा। 13 जो समजी सकोआ से तिजी खे त्यानो साथे सुणो और मानी बी लओ कि परमेशरो रा आत्मा मण्डलिया खे क्या बोलणे लगी रा। 14 “लौदीकिया नगरो री मण्डलिया रे

स्वर्गदूतो खे ये संदेश लिख: आऊँ से ए जो आमीनू और विश्वासो जोगा और सच्चा गवा ए और परमेशरो री सृष्टिया री मूल बजअ ए। आऊँ ताखे जो बोलीआ से सुण: 15 आऊँ तेरे कामो खे जाणूँआ कि तूँ ना तो ठण्डा ए और ना गर्म; पला ऊँदा कि तूँ ठण्डा या गर्म ऊँदा। 16 पर तूँ सिर्फ गुलमुला ए। तूँ ना ठण्डा ए और ना गर्म ए, तेबेई आऊँ ताखे आपणे मुँओ ते उगलने वाला ए। 17 तूँ जो बोलेया कि आऊँ अमीर ए और पैसे वाला ऊईगा रा और माखे किजी चीजा री कमी निए। पर ये नि जाणदा कि तूँ नबाग, तुच्छ, कंगाल, अन्दा और नांगा ए। 18 इजी री खातर आऊँ ताखे सला देऊँआ कि आगी रे तपाया रा सुईना मांते मोले लओ कि तूँ अमीर ऊई जाए और सफेद टाले लयी लो कि पईनी की ताखे आपणे नांगे ऊणे री शर्म नि ओ और आपणी आखी रे लगाणे खे काजल लओ कि तूँ देखणे लगे। 19 आऊँ जिना-जिना खे प्यार कऊँआ, तिना सबी खे लवामे और ताड़ना देऊँआ। इजी री खातर जोशीला लो, और मन फेर। 20 देख, आऊँ द्वारो पाँदे खडेया रा खटखटाऊँआ। जे कोई मेरा शब्द सुणी की द्वार खोलोला, तो मां तेस साथे पीतरे आयी की रोटी खाणी और तेस मां साथे खाणी। 21 जो जीती जाणे, मां सेयो आपू साथे आपणे सिंहासनो पाँदे बठयालने, जेडा आऊँ बी जय पायी की आपणे पिते साथे तेसरे सिंहासनो पाँदे बैठी गा। 22 जो समजी सकोआ से तिजी खे त्यानो साथे सुणो और मानी बी लओ कि परमेशरो रा आत्मा मण्डलिया खे क्या बोलणे लगी रा।”

4 इना सबी गल्ला खे देखणे ते बाद जेबे मैं नजर दिती, तो क्या देखूँआ कि स्वर्गो रे एक द्वार खुले राए। तेबे तुरहिया री आवाजा जेडा मैं से शब्द सुणेया जो मैं पईले बी सुणेया था। तिने माखे बोलेया, “एती ऊबे आईजा और मां सेयो गल्ला ताखे दखाणियां, जिना रा इना गल्ला ते बाद पूरा ऊणा जरूरी ए।” 2 आऊँ तेबुई पवित्र आत्मा ते परी गा। मैं स्वर्गो रे एक सिंहासन देखेया और तेस सिंहासनो पाँदे कोई बैठी रा था। 3 जो तेस सिंहासनो पाँदे बैठी रा था से यशबो और माणिक्य रा जा दखाई देओ था। तेस सिंहासनो रे चऊँ कनारिये मरकतो रा जा मेघधनुष दखाई देओ था। 4 मैं तेस सिंहासनो रे चऊँ कनारे चऊबी ओर सिंहासन देखे। इना सिंहासना पाँदे चऊबी बुजुर्ग सफेद टाले पईनी की बैठी रे थे और इना रे सिरु पाँदे सुईने रे मुकट थे। 5 तेस सिंहासनो ते बिजली और गिड़ना निकलने लगी रा था। सिंहासनो रे सामणे सात दिऊए बलने लगी रे थे। यो परमेशरो रिया सात आत्मा ए। 6 तेस सिंहासनो सामणे मानो बिल्लौरो जेडा काँचो जेडा समुद्र था। सिंहासनो बीचे और सिंहासनो रे चऊँ कनारे चार प्राणी थे, जिना रे आगे पीछे आखी ई आखी थिया। 7 पईला प्राणी शेरु जेडा था और दूजे प्राणिये रा मूँ बलदा जेडा था, तीजे प्राणिये रा मूँ माणूए जेडा था और चौथा प्राणी उड़दे ऊए उकाबो जेडा था। 8 और चारो प्राणियां रे छे-छे पंख थे। चऊँ कनारे और पीतरे आखी ई आखी थिया और सेयो दिन-रात बिना आराम कित्ते ये बोलदे रओ थे, “पवित्र, पवित्र, पवित्र प्रभु परमेशर, सर्वशक्तिमानू, जो था और जो आए और जो आऊणे वाला ए।” 9 जेबे सेयो प्राणी तेसरी जो सिंहासनो पाँदे बैठी रा था और जो जुगो-जुगो तक जिऊँदा ए, महिमा और आदर और धन्यवाद करेगे, (aión g165) 10 तेबे चऊबी बुजुर्ग सिंहासनो पाँदे बैठणे वाले रे सामणे रुड़ी जाणे और तेसगे, जो जुगो-जुगो तक जिऊँदा ए, माथा टेकणा और आपणा-आपणा मुकट सिंहासनो सामणे ये बोलदे ऊए राखणा, (aión g165) 11 “ओ म्हारे प्रभु और परमेशर, तूँ ई महिमा और आदर और सामर्थो जोगा ए, कऊँकि तँ ई सारिया चीजा बणाईया और सेयो तेरी ई इच्छा ते थिया और बणाईया गईया।”

5 तेबे मैं तेसरे दाँणे आथो रे एक कताब देखी, जो सिंहासनो पाँदे बैठी रा था। से कताब पीतरा-बारा ते लिखी री थी और तिजी खे सात मुहरा लगाई की बंद करी राखेया था। 2 तेबे मैं एक तागतबर स्वर्गदूत देखेया, जो जोरे की ये प्रचार करो था कि, “एसा कताबा खे खोलणे और इजी री मुहरा खे तोड़ने जोगा कुण ए?” 3 पर ना स्वर्गो रे, ना तरतिया पाँदे, ना तरतिया ते

थाले कोई तेसा कताबा खे खोलणे या तिजी पॉद नजर पाणे जोगा निकलेया कि तिदे क्या लिखी राखेया। 4 तेबे मेरिया आखी ते आसू निकलने लगे, कऊँकि तेसा कताबा के खोलणे या तिजी पॉद नजर पाणे जोगा कोई नि मिलेया। 5 तेबे तिना बुजुर्गा बीचा ते एकी जणे माखे बोलेया, “रोओ नि, देख, यहूदो रे गोत्रो रा से शेर, दाऊदो वंशो रा मूल जयवंत ऊई रा। सेई एसा कताबा खे खोलणे और इना सात मुहरा खे तोडने जोगा ए।” 6 तेबे मैं तेस सिंहासनो गे चारो प्राणिया और तिना बुजुर्गा बीचे एक मिन्टू खडेया रा देखेया। से मानो फाटेया रा मिन्टू था। तेसरे सात सींग और सात आखी थिया, यो परमेशरो रिया सात आत्मा ए, जो परमेशरे सारी तरतिया रे पेजी राखिया। 7 तिने मिन्टूए आगे आयी की जो सिंहासनो पॉद बैठेया रा था, तेसरे दाँणे आथो ते से कताब लयी ली, 8 और जेबे तिने कताब लयी ली, तेबे सेयो चारो प्राणी और चऊबी बुजुर्ग, तेस मिन्टूए रे सामणे माथा टेकणे खे चुकी गे। हर एकी रे आथो रे बीणा और तूप् की फरे रे सुईने रे कटोरे थे, ये तो परमेशरो रे लोका रिया प्रार्थना ए। 9 तेबे सेयो ये नया गाणा गाणे लगे, “तूँ एसा कताबा खे लणे और इजी रिया मुहरा खे खोलणे जोगा ए, कऊँकि तँ फाटी की आपणे खूने की हर एक कुल, पाषा, लोक और जातिया बीचा ते परमेशरो खे लोक मोले लयी राखे। 10 और तिना खे म्हारे परमेशरो खे एक राज्य और पुरोईत बणाया और सेयो तरतिया पॉद राज करोए।” 11 तेबे मैं फेर देखेया, और तेस सिंहासनो, तिना प्राणिया और तिना बुजुर्गा रे चऊँ कनारे ते बऊत सारे स्वर्गदूता रा शब्द सुणेया, जिना री गिणती लाखो और करोडो रे थी, 12 और सेयो जोरे-जोरे की बोलो थे, “फाटेया रा मिन्टू ई सामर्थ, पैसा, ज्ञान, शक्ति, आदर, महिमा और तारीफा जोगा ए।” 13 तेबे मैं स्वर्ग रे, तरतिया पॉद, तरतिया ते थाले, समुद्रो रिया सब बणाई रिया चीजा खे और सब कुछ जो तिना रे ए, ये बोलदे ऊए सुणेया, “जो सिंहासनो पॉद बैठी रा, तेसरा और मिन्टूए रा धन्यवाद और आदर, महिमा और राज्य जुगो-जुगो तक रओ।” (aiōn g165) 14 तेबे चारो प्राणिये “आमीन्” बोलेया और बुजुर्गो चुकी की माथा टेकेया।

6 तेबे मैं देखेया कि मिन्टूए तिना सात मुहरा बीचा ते एक खोली और तेबे तिना चारो प्राणिया बीचा ते एकी रा गिडने रा जा शब्द सुणेया, “आओ।” 2 तेबे मैं नजर दिक्ती और तेती माखे एक सफेद रंगो रा कोडा दिशेया और तेस पॉद जो सवार था, तिने धनुष लयी राखेया था। तेसखे एक मुकट दिसेया और से स्वर्गो ते तरतिया री तरफा खे एक जितणे वाले जेडा और बी जय पाणे खे निकलेया। 3 जेबे मिन्टूए दूजी मुहर खोली, तो तेबे मैं दूजा प्राणी ये बोलदे ऊए सुणेया, “आओ।” 4 तेबे मैं तेती एक ओर कोडा निकलदा ऊआ देखेया जो आगी जेडा लाली रंगो रा था। तेसरे सवारो खे ये अक्क दिसेया कि तरतिया पॉदा ते मेल-जोल चकी दे, ताकि लोक एकी-दूजे खे फाटो और तेसखे एक बडी तलवार दिक्ती। 5 जेबे मिन्टूए तीजी मुहर खोली, तो तेबे मैं तीजा प्राणी ये बोलदे ऊए सुणेया, “आओ।” तेबे मैं तेती एक ओर कोडा निकलदा ऊआ देखेया जो काले रंगो रा था। तेस सवारो रे आथो रे एक ताकडी थी। 6 तेबे मैं तिना चारो प्राणिया बीचा ते एक शब्द ये बोलदे ऊए सुणेया, “एकी दिनो री मजदूरिया री सेर परी कणक और एकी दिनो री मजदूरिया री तीन सेर जौ, पर तेल और अँगूरा रे रसो रा नुकशान नि करना।” 7 जेबे मिन्टूए चौथी मुहर खोली, तो तेबे मैं चौथे प्राणिये रा शब्द ये बोलदे ऊए सुणेया, “आओ।” 8 तेबे मैं तेती एक ओर कोडा निकलदा ऊआ देखेया, जो तोते रे रंगो जेडा था। तेसरे सवारो रा नाओं मौत ए और नरक तेस पीछे-पीछे आऊणे लगी रा था। तिना खे ये अक्क दिसेया कि तलवार, काल, मरी और तरतिया रे बणो रे डांगरा रे जरिए लोका खे काआ। (Hades g86) 9 जेबे मिन्टूए पांजी मुहर खोली, तो तेबे मैं बेदिया ते निठे तिना लोका रे प्राण देखे, जो परमेशरो रे वचनो रा प्रचार करने री बजअ ते और तेसा गवाईया री बजअ ते कि यीशु आसा रा प्रभु ए, जो तिने लोके दिक्ती थी, फाटी ते थे। 10 तिने लोके परमेशरो खे जोरे-जोरे की आक्का पायी की बोलेया, “ओ स्वामी तूँ पवित्र और विश्वासो जोगा ए! तां कदुओ तक न्याय

नि करना और तरतिया पॉद रणे वालेया ते म्हारे खूनो रा बदला कदुओ तक नि लणा?” 11 तेबे तिना बीचा ते हर एकी खे सफेद टाले दिक्ते और तिना खे बोलेया, “थोड़ी देर आराम करो, जदुओ तक कि तुसा साथले दास और विश्वासो पाई, जो तुसा जेडे फाटणे वाले ए, तिना री बी गिणती पूरी नि ऊई जाओ।” 12 मैं मिन्टू छठी मुहर खोलदे ऊए देखेया। तेबे एक बड़ा ईल्लण ऊआ और सूरज काला ऊईगा और प्रयासा देणा बन्द करी ता और पूरा चाँद खूनो जेडा लाल ऊईगा। 13 और सर्गो रे तारे तरतिया पॉद ईयां छुटणे लगे, जियां बडे तूफानो ते दाऊगले रे डालो ते काच्चे फल चढोए। 14 तेबे सर्ग एडा गाईब ऊईगा, जेडी चिट्ठी लपेटणे ते सिकुड़ी जाओई और हर एक पाहड और टापू आपणी-आपणी जगा ते टली गे। 15 नतीजन, तेबे तरतिया रे राजे, प्रदान, सरदार, पैसे वाले, सामर्थी लोक, हर एक दास और हर एक आजाद, पाहडो रे डवारा रे और चट्टानी रे जायी की लूकी गे। 16 तेबे पाहडो ते और चट्टानी ते बोलणे लगे, कि आसा पॉद पड़ी जाओ और आसा खे तेसरे मुंओ ते, जो सिंहासनो रे बैठी रा और मिन्टूए रे प्रकोपो ते लकोई देओ। 17 कऊँकि प्रकोपो रा से डराऊणा दिन जिदे परमेशरो और मिन्टूए सबी खे सजा देणे आयी पऊँछी रा और तेसा सजा खे कोई बी सईन नि करी सकदा।

7 इजी ते बाद मैं तरतिया रे चारो कूणयां पॉद चार स्वर्गदूत खडे देखे। तिने स्वर्गदूते तरतिया री चारो अवा पकडी राखी थी, ताकि तरती या समुद्र या केसी डालो पॉद अवा नि चलो। 2 तेबे मैं एक ओर स्वर्गदूतो खे जिऊँदे परमेशरो री मुहर लयी की पूर्वा ते ऊबो खे आऊँदा ऊआ देखेया। तिने तिना चारो स्वर्गदूता ते, जिना खे तरती और समुद्रो रा नुकशाण करने रा अक्क दिसेया था, जोरे की आक्का पायी की बोलेया, 3 “जदुओ तक आसे आपणे परमेशरो रे दासो रे माथेया पॉद मुहर नि लगाई देऊँगे, तदुओ तक तरती, समुद्र और डाला रा नुकशाण नि करना।” 4 और जिना पॉद मुहर लगाई, मैं तिना री गिणती सुणी कि इस्राएलो री ल्वादा रे सारे गोत्रा बीचा ते एक लाख चवाली हजारा पॉद मुहर लगाई। 5 स्वर्गदूते हर गोत्रो ते बारा हजारा लोका पॉद मुहर लगाई: यहूदा रे गोत्रो बीचा ते बारा हजारा पॉद मुहर लगाई, रूबेनो रे गोत्रो बीचा ते बारा हजारा पॉद, गादो रे गोत्रो बीचा ते बारा हजारा पॉद, 6 आशरो रे गोत्रो बीचा ते बारा हजारा पॉद, मनशिशह रे गोत्रो बीचा ते बारा हजारा पॉद, 7 शमौनो रे गोत्रो बीचा ते बारा हजारा पॉद, लेविए रे गोत्रो बीचा ते बारा हजारा पॉद, इससाकारो रे गोत्रो बीचा ते बारा हजारा पॉद, 8 जबूलूनो रे गोत्रो बीचा ते बारा हजारा पॉद, यूसुफो रे गोत्रो बीचा ते बारा हजारा पॉद और बिन्यामीनो रे गोत्रो बीचा ते बारा हजारा पॉद मुहर लगाई। 9 इजी ते बाद मैं नजर दिक्ती और हर एक जाति, कुल, लोक और पाषा बीचा ते एक एडी बडी पीड देखी, जेतेखे कोई गिणी नि सको था। सेयो सफेद टाले पईनी की और आपणे आथो रे खजूरो रिया डालिया लयी की सिंहासनो रे सामणे और मिन्टूए रे सामणे खडी रे थे। 10 और सेयो लोक जोरे की आक्का पायी की बोलणे लगी रे थे, “म्हारे परमेशरो रा, जो सिंहासनो पॉद बैठी रा और मिन्टूए री जय-जयकार ओ कऊँकि ये सेयो ईए जिने आसा रा उद्धार किक्तेया।” 11 और सारे स्वर्गदूत, तेस सिंहासन, बुजुर्ग और चारो प्राणिया रे चऊँ कनारे खडी रे थे। तेबे सेयो सिंहासनो रे सामणे मुंओ रे पारे रूडी गे और परमेशरो गे माथा टेकेया, 12 और बोलेया, “आमीन्, म्हारे परमेशरो री स्तुति, महिमा, ज्ञान, धन्यवाद, आदर, सामर्थ और शक्ति जुगो-जुगो तक बणी री रओ। आमीन्।” (aiōn g165) 13 इजी ते बाद बुजुर्गा बीचा ते एकी जणे मांते पूछेया, “क्या तुसे जाणोए कि ये सफेद टाले पईने रे लोक कूणे? और केथा ते आयी रे?” 14 मैं तेसखे जबाब दिसेया, “ओ श्रीमान जौ, आँऊ नि जाणदा पर तूँ ई जाणेया।” तिने बुजुर्गो माखे बोलेया, “ये सफेद टाले पईने रे सेयो लोक ए, जो तेस बडे क्लेशो ते निकली की आयी रे। इने लोके आपणे टाले मिन्टूए रे खूने की तोई की सफेद करी राखे। 15 इजी बजअ ते, “सेयो परमेशरो रे सिंहासनो रे सामणे ए और तेसरे मन्दरो रे रात-दिन सेवा करोए और जो सिंहासनो पॉद बैठी रा, तेस तिना पॉद आपणा तम्बू

ताणना। 16 सेयो फेर पूखे-त्याये नि ऊणे और ना ई तिना पॉदे तूप और ना ई कोई तपन पड़नी। 17 कऊँकि मिन्दू, जो सिंहासनो रे बीचे ए, तेस तिना री रखवाली करनी और सेयो जीवनरूपी सूबला रे नेड़े लयी जाणे और परमेशरे तिना री आखी ते सारे आसू टूसी देणे।”

8 जेबे मिन्दूए साती मुहर खोली, तेबे स्वर्गो रे आदे कंटे तक सन्गाटा छाईगा। 2 और मैं सेयो सात स्वर्गदूत, जो परमेशरो सामणे खडे रे रओए, देखे और तिना खे सात तुरहिया दित्तिया। 3 तेबे एक ओर स्वर्गदूत सुईने री तूपदानी लयी की आया और बेदिया रे नेड़े खड़ा ऊईगा। तेस स्वर्गदूतो खे बऊत सारा तूप दित्तिया कि सारे परमेशरो रे लोका री प्रार्थना साथे, सुईने रिया तेसा बेदिया पॉदे, जो सिंहासनो रे सामणे ए, चढाओ। 4 और तेस तूपो रा तुआँ परमेशरो रे लोका री प्रार्थना साथे, स्वर्गदूतो रे आथो ते, परमेशरो सामणे पऊँछी गा। 5 तेबे स्वर्गदूते तूपदानी लयी की तिदे बेदिया री आग परी और तरतिया रे पाई ती, तेबे गिडना, आवाज, बिजलिया और इल्लण ऊणे लगे। 6 तेबे सेयो सातो स्वर्गदूत, जिना गे सात तुरहिया थिया, फूकर देणे खे त्यार ऊईगे। 7 पईले स्वर्गदूते तुरहिया रे फूकर दित्ती और खूनो साथे मिले रे ओले और आग पैदा ऊई और तरतिया रे पाई ती। इजी बजअ ते तरतिया रा तीजा इस्सा फूखी गा और डाला रा तीजा इस्सा फूखी गा और सारा अरा काआ बी फूखी गा। 8 जेबे दूजे स्वर्गदूते तुरहिया रे फूकर दित्ती, तेबे मानो आगी जेड़ा बलदा ऊआ एक बड़ा पाह्ड समुद्रो रे पायी ता। इजी बजअ ते समुद्रो रा तीजा इस्सा खून ऊईगा। 9 और समुद्रो री एक तिहाई बणाई रिया चीजा, जिना रे जिऊ था, मरी गिया और जाह्ज रा तीजा इस्सा नाश ऊईगा। 10 जेबे तीजे स्वर्गदूते तुरहिया रे फूकर दित्ती, तेबे एक बड़ा तारा, जो मशाली जेड़ा बलो था, सर्गो ते टूटेया और नदिया रे तीजे इस्से पॉदे और पाणिण री सूबला पॉदे आयी की पड़ी गा। 11 तेस तारे रा नाओँ नागदौना था। इजी बजअ ते एक तिहाई पाणी जईरीला और कडुआ ऊईगा। बऊत सारे माणू तेस जईरीले और कडुए पाणी पीणे ते मरी गे। 12 जेबे चऊथे स्वर्गदूते तुरहिया रे फूकर दित्ती, तेबे सूरजो री तीजे इस्से पॉदे और चाँदो रे तीजे इस्से पॉदे और तारेया रे तीजे इस्से पॉदे मुसीबत आईगी। इजी बजअ ते तिना रा तीजा इस्सा काला ऊईगा और दिनो रे तीजे इस्से पॉदे न्हारा ऊईगा और तियाँ ई राती रे बी। 13 जेबे आँऊ ये सब देखणे ई लगी रा था, तो सर्गो रे बीचे एक उकाब उडदे ऊए देखेया और जोरे की ये बोलदे ऊए सुणेया: “तिना स्वर्गदूता री तुरहिया रे शब्दो री बजअ ते, जिना रे फूकर देणी बाकि ए, तरतिया रे रणे वालेया पॉदे हाय! हाय!”

9 जेबे पांजुए स्वर्गदूते तुरहिया रे फूकर दित्ती, तेबे मैं स्वर्गो ते तरतिया पॉदे एक तारा रुददा ऊआ देखेया। तेसखे एडे डूगे गड्डे खे खोलणे री कुँजी दित्ती जेतेरी गईरईया रा कोई अंत नि ए। (Abyssos g12) 2 जेबे तिने से डूगा गड्डा खोलेया, तेबे तेस गड्डे ते बड़ी पड्डिया जेड़ा तुआँ निकलेया और तेस गड्डे रे तुएँ ते सूरज और सर्गो रे न्हारा ऊईगा। (Abyssos g12) 3 तेबे तेस तुएँ बीचा ते तरतिया पॉदे टिड्डिया निकलिया और तिना टिड्डिया खे तरतिया रे लोका खे बिच्छुआ जेड़ी डंग बाणे री तागत दित्ती। 4 तेबे तिना टिड्डिया खे बोलेया कि ना तरतिया रे काओ खे, ना केसी अरयालिया खे, ना केसी डालो रा नुकशाण करो, बस तिना माणूआ रा, जिना रे माथे रे परमेशरो री मुहर नि ए। 5 तिना टिड्डिया खे काणे रा तो नि, पर पाँज मीन्ने तक लोका खे पीड़ देणे रा अक्क दित्तिया और तिना री पीड़ एड़ी थी, जेड़ी बिच्छुआ री डंग बाणे ते माणूआ खे ओई। 6 तिना पाँज मीन्नेया दे माणूआ मौत टोलनी, पर मिलणी नि और मरने री इच्छा करनी और मौत तिना गे ते नठी जाणी। 7 तिना टिड्डिया रा आकार लड़ाईया खे त्यार कित्ते रे कोडेया जेड़ा था और तिना रे सिरु पॉदे मानो सुईने रे जे मुकट थे और तिना रे मूँ माणूआ जेडे थे। 8 तिना रे बाल जवाणसा जेडे थालम्बे थे और दाँद शरो जेडे मजबूत थे। 9 तिना रा शरीर मानो लोए री झिलमा ते टकी रा था। तिना रे पंखो री आवाज एड़ी थी, जेड़ी रथ और बऊत सारे कोडेया री ओई, जो लड़ाईया रे

दौड़ाए। 10 तिना री पूँछ बिच्छुआ जेड़ी थी और तिना रे डंग थे और तिना खे पाँज मीन्ने तक माणूआ खे दुःख पऊँछाणे री जो शक्ति देई राखी थी, से तिना री पूँछा रे थी। 11 जेते डूगे गड्डे री गईरईया अंत नि ए तेतेरा रा दूत तिना पॉदे राजा था। तेस राजे रा नाओँ इब्रानिया रे अबद्दोन और यूनानिया रे अपुल्लियोन था। (Abyssos g12) 12 पईली मुसीबत बित्ती चुकी, देखो, एबे इना ते बाद दो मुसीबता ओर ऊणे वालिया ए। 13 जेबे छठे स्वर्गदूते तुरहिया रे फूकर दित्ती, तो जो सुईने री बेदी परमेशरो सामणे ए, तेसा बेदिया रे चऊँ कूणयां रे सींगो बीचा ते आऊँदा ऊआ मैं एक शब्द सुणेया। 14 मानो कोई तेस छठे स्वर्गदूतो ते, जेसगे तुरही थी, बोलेया, “तिना चारो दूता खे, जो बड़ी नदी फराता गे बाने रे ए, खोली देओ।” 15 तेबे सेयो चारो दूत, जो एसा कअडिया, दिन, मीन्ना और सालो खे त्यार कित्ते थे, माणूआ रे तीजे इस्से खे काणे खे आजाद करी ते। 16 और फौजा रे सवारिया री गिणती बी करोड़ थी, मैं तिना री गिणती सुणी। 17 माखे एस दर्शनो रे कोडे और तिना रे एडे सवार दिखे, जिना री झिलम आग, धूपकान्त और गन्धको जेड़ी थी। तिना कोडेया रे सिर शरो रे सिरु जेडे थे और तिना रे मुँओ ते आग, तुआँ और गन्धक निकलो थी। 18 इना तिन्ना महामारिया, मतलब-आग, तुआँ और गन्धका ते जो तेसरे मुँओ ते निकलो थी, माणूआ रा तीजा इस्सा काई ता। 19 तिना कोडेया री शक्ति तिना रे मुँओ रे और तिना री पूँछा रे थी। कऊँकि तिना री पूँछ सापो जेड़ी थी और तिना पूँछा रे सिर बी थे और इना तेई सेयो लोका खे दुःख देओ थे। 20 और बाकि माणू जो तिना महामारिया ते नि मरे थे, आपणे आथो रे कामो ते मन नि फेरेया कि दुष्टात्मा री, सुईना, चाँदी, पीतल, पात्थर और काठो री मूर्तिया री पूजा नि करो, जो ना देखी सकौई, ना सुणी सकौई और ना ई चली सकौई। 21 और जो खून, जादू-टोणा, व्याभिचार और चोरिया तिने कित्ती थी, तिना ते मन नि फेरेया।

10 तेबे मैं एक ओर तागतबर स्वर्गदूत बादलो ते किरे रे, स्वर्गो ते उतरदे ऊए देखेया। तेसरे सिरु पॉदे बादलो रा मेघधनुष था और तेसरा मूँ सूरजो जेड़ा और तेसरे पैर आगी रे खम्बे जेडे थे। 2 तिने आपणा दाँणा पैर समुद्रो रे और खूँजा तरतिया पॉदे राखेया। तेसरे आथो रे एक छोटो जी खुली री कताब थी। 3 तेबे से इतणी जोरे की चिगेया, जेड़ा शेर गर्जोआ और जेबे से चिगेया, तो गर्जणा री सात आवाजा सुणिआ। 4 जेबे सातो गर्जणा री आवाजा सुणी चुकिया, तो आऊँ लिखणे वाला ई था, पर मैं स्वर्गो ते ये आवाज सुणी, “जो गल्ला गर्जणा रे तिना सात आवाजा ते सुणी राखिया, तिना खे गुप्त राख और लिख नि।” 5 जेस स्वर्गदूतो खे मैं तरतिया पॉदे और समुद्रो रे खडेया रा देखेया था, तिने आपणा दाँणा आथ स्वर्गो री तरफा खे चकेया, 6 और तिने तेसरी जो जुगो-जुगो तक जिऊँदा ए और जिने स्वर्ग और जो कुछ तिदे ए, तरती और जो कुछ तिदे ए और समुद्रो खे और जो कुछ तिदे ए, बणाया, तेसरी ई कसम खाई कि बोलेया, “एबे तो ओर देर नि ऊणी। (aiōn g165) 7 तेस बखते जेबे सातुए स्वर्गदूतो तुरहिया रे फूकर देणी, परमेशरो आपणी गुप्त थोजना पूरी करनी जेतेरा संदेश तिने आपणे दास भविष्यबक्तेया खे दित्तिया था।” 8 जो आवाज मैं स्वर्गो ते बोलदे ऊए सुणी थी, से फेर मां साथे गल्ला करने लगेया, “जा, जो स्वर्गदूत समुद्र और तरतिया पॉदे खड़ी रा, तेसरे आथो री खुली री कताब लयी लो।” 9 तेबे मैं स्वर्गदूतो गे जाई की बोलेया, “ये छोटो जी कताब माखे दे।” और तिने माखे बोलेया, “लओ, इजी खे खाई दे और एसा तेरा पेट कडुआ तो करना, पर तेरे मुँओ रे सईतो जेड़ी मीठी लगणी।” 10 तेबे आऊँ से छोटो कताब स्वर्गदूतो रे आथो ते लयी की खाई गा। से मेरे मुँओ रे सईतो जेड़ी मीठी तो लगी, पर जेबे आऊँ तेसा खे खाई चुकेया, तो मेरा पेट कडुआ ऊईगा। 11 तेबे माखे ये बोलेया गया, “ताखे बऊत सारे लोका, जातिया, पाषा और राजेया रे बारे रे फेर भविष्यबाणी करनी ऊगी।”

11 तेबे मांगे नापणे खे एक नगल दित्तिया और तिने बोलेया, “उठ, परमेशरो रे मन्दर और बेदिया खे नापी लओ और तिदे भक्ति करने

वालेया री गिणती करी लओ। 2 पर मन्दरो रा बारला अँगण छाडी दे, तिजी खे नि नाप कऊँकि से दुजिया जातिया खे देई राखेया। तिना लोका पवित्र नगर यरूशलेम बयाली मीन्ने तक केसणा। 3 तेस बखते, मां आपणे दो गवाओ खे ये अक्क देणा कि सेयो टाट टखी की एक ह्जार दो सौ साठ दिन तक भविष्यबाणी करो।” 4 ये दोनो गवाह ई जैतूनो रे दो डाल और दो दिऊए ए, जो तरतिया पाँदे राज करने वाले प्रभुए रे सामणे खडे रओए। 5 जे कोई तिना खे नुकशाण पऊँछाणा चाओआ, तो तिना रे मुंओ ते आग निकली की तिना रे बैरिया खे स्वा करी देओई। जे कोई तिना खे नुकशाण पऊँछाणा चाओगा, तो जरूर ईयां ई काया जाणा। 6 परमेशरे तिना खे ये अक्क देई राखेया कि तिना री भविष्यबाणिया रे दिना रे सेयो सर्गो खे बंद करी देओ, ताकि बादल नि बरसो। तिना खे ये अक्क बी मिलेया राए कि पाणिए खे खूनो रे बदली देओ और जेबे-जेबे चाओ तेबे-तेबे तरतिया पाँदे हर प्रकारा री मुसीबत ल्याओ। 7 जेबे सेयो दो गवा आपणी गवाई देई चुकणे, तेबे से डांगर, जो तेते डूगे गड्डे ते जेते री गर्दार्इया रा अंत निए निकलना और तिना साथे लडी की तिना ते जीतणा और सेयो काई देणे। (Abyssos g12) 8 तेबे तिना दूँई गवा री लोथा जो काई राखे थे, तेस बडे यरूशलेम नगरो रे चौको पाँदे पडिया री रणियां, जेती तिना रा प्रभु बी क्रूसो पाँदे चढाया था। चिह्नो रे तौरो पाँदे ये नगर सदमो और मिस्र नगरो जेडा ए। 9 सब लोक, कुल, पाषा और जातिया बीचा ते लोक तिना दूँई गवा री लोथा साडे तीन दिन तक देखदे रणे, पर तिना री लोथा कन्नार रे केसी खे बी राखणे नि देणियां। 10 मरने ते पईले ये दोनो गवा तरतिया रे लोका खे बऊत सताओ थे। जेबे तरतिया रे लोका ये सुणना कि सेयो दोनो काईते रे, तेबे सेयो लोक तिना रे मरने ते खुश और मग्न ऊणे और एकी-दूजे गे पेंट पेजणी। 11 पर साडे तीन दिन बाद परमेशरो री तरफा ते जिन्दगिया री आत्मा तिना पाँदे बैठी गी और सेयो आपणे पैरो रे पारे खडे ऊईगे और तिना खे देखणे वाले बऊत डरी गे। 12 तिजी ते बाद तिना दूँई खे स्वर्गो ते एक बड़ा शब्द सुणेया, “एती ऊबे आओ।” और ये सुणी की सेयो बादलो पाँदे सवार ऊई की आपणे बैरिया रे देखदे-देखदे स्वर्गो पाँदे चढी गे। 13 तेबे तेस बखते ई एक बड़ा-पारी भूकंप ऊआ और यरूशलेम नगरो रा दसुआ इस्सा टली गा और तेस ई भूकंपो ते सात हजार मांणू मरी गे, बाकि डरी गे और स्वर्गो रे परमेशरो री महिमा किती। 14 दूजी मुसीबत बिती गी, देखो तीजी मुसीबत चट ई आऊणे वाली ए। 15 जेबे सातुए स्वर्गदूते तुरहिया रे फूकर दिती, तो स्वर्गो रे इजी रे बारे रे बडे-बडे शब्द ऊणे लगे, “दुनिया रा राज्य म्हारे प्रभुए रा और तेसरे मसीह रा ऊईगा और तेस जुगो-जुगो तक राज्य करना।” (aiōn g165) 16 तेबे चऊबी बुजुर्ग, जो परमेशरो सामणे आपणे-आपणे सिंहासनो पाँदे थे बैठे रे, मुंओ रे पारे रूडी की, परमेशरो गे माथा टेकी की 17 ये बोलणे लगे, “ओ सर्वशक्तिमान् प्रभु परमेशर, जो आए और जो था, आसे तुसा खे धन्यवाद करूँए तुसे बड़ी सामर्था खे कामो रे ल्याई की राज्य करी राखेया।” 18 तेबे दुजिया जातिया खे रोष आईगा और तुसा रा प्रकोप आयी की पडी गा और से बखत आयी पऊँछी रा कि मरेया रा न्याय कित्तेया जाओ और तुसा रे दास भविष्यबक्तेया खे, परमेशरो रे लोका खे और तिना छोटेया बडेया खे, जो तुसा रे नाओं ते डरोए, बदला दित्तेया जाओ और तरतिया खे बायाडने वाले नाश कित्ते जाओ 19 और परमेशरो रा मन्दर, जो स्वर्गो रे ए, से खोलेया और तेसरे मन्दरो रे तेसरी वाचा रा सन्दूक दिशेया। और तेती बिजलिया, आवाज, गर्जण और ईल्लण ऊणे लगे और बडे-बडे ओले पडे।

12 इना गल्ला ते बाद स्वर्गो रे एक नऊखा नजारा दिशेया। मैं देखेया कि एक जवाणस सूरज टखे रे थी और चाँद तेसा रे पैरा निठे था और तेसा रे सिरों पाँदे बारा तारेया रा मुकट था। 2 से जवाणस गभवती थी और चिंगणे लगी री थी, कऊँकि तेसा खे जमणे रिया पीडा लगी री थिया और से बच्चा जम्मणे रिया पीडा रे थी। 3 तेबे स्वर्गो रे एक ओर नऊखा नजारा दिशेया और देखो, एक बड़ा लाल अजगर था, जेसरे सात सिर और दस सींग थे और तेसरे सातो सिरों पाँदे सात राजमुकट थे। 4 तेसरी पूँछे सर्गो रे

तारेया रा तीजा इस्सा खिंजी की तरतिया रे पायी ता। और से अजगर तेसा जवाणसा सामणे, जो बच्चे खे पैदा करने वाली थी, खड़ा ऊईगा, ताकि जेबे से बच्चा पैदा करो, तो से तेसा रे बच्चे खे खाई जाओ। 5 तेसा रे पाऊ ऊआ, जो लोए रा राजदण्ड लये रे, सबी जातिया पाँदे राज्य करने वाला था। और तेसा रा बच्चा परमेशरो गे और तेसरे सिंहासनो गे चकी की पऊँछाई ता। 6 और से जवाणस तेसा सुनसाण जगा खे नठी गी, जेती परमेशरो री तरफा ते तेसा खे जगा त्यार करी राखी थी, ताकि से तेती एक ह्जार दो सौ साठ दिना तक पाली जाओ। 7 तेबे स्वर्गो रे लड़ाई शुरू ऊईगी। मीकाईल और तेसरे स्वर्गदूत अजगरो साथे लड़ने खे निकले, अजगर और तिना रे दूत बी तेस साथे लड़े। 8 पर से अजगर आरी गा और से और तेसरे दूत स्वर्गो ते निकयाली ते। 9 तेबे से बड़ा अजगर, मतलब सेई पुराणा साप, जेसखे शैतान बोलोए और सारे दुनिया खे भरमाणे वाला ए, तरतिया रे रूडाईता और तेसरे दूत बी तेस साथे रूडाईते। 10 तेबे मैं स्वर्गो ते ये बड़ा शब्द आऊँदे ऊए सुणेया, “एबे म्हारे परमेशरो रा उद्धार, सामर्थ, राज्य और तेसरे मसीह रा अक्क प्रगट ऊई रा। कऊँकि म्हारे पाईया पाँदे दोष लगाणे वाला, जो दिन-रात म्हारे परमेशरो सामणे, तिना पाँदे दोष लगाया करोआ, रूडाई ता री। 11 और सेयो मिन्टूए रे खूनो री बजअ ते और आपणी गवाईया रे बचनो री बजअ ते, तेस पाँदे जयवंत ऊए। कऊँकि तिने आपणे प्राण प्यारे नि जाणे, एथो तक की मौत बी सयी ली। 12 इजी बजअ ते, ओ स्वर्गो और तिना रे रणे वालेयो मग्न रओ, ओ तरती और समुद्र, तुसा खे धिक्कार ए, कऊँकि शैतान बडे ई रोषो रे तुसा गे उतरी की आईगा रा, कऊँकि से जाणोआ कि तेसरा थोड़ा ई बखत बाकि ए।” 13 जेबे अजगरे महसूस कित्तेया कि आऊँ तरतिया पाँदे रूडाई ता रा, तो से जवाणस, जेसा रे पाऊ जम्मेया था, तेसा खे सताणे लगेया। 14 तेबे तेसा जवाणसा खे बडे उकाबो जेडे दो पंख दित्ते, ताकि सापो गे ते उडी की सुनसाण जगा रे पऊँछी जाओ, जेती से एक बखत और बखतो और आदे बखतो तक पाली जाओ। 15 तेबे अजगरे तेसा जवाणसा पीछे आपणे मुंओ ते नदिया जेडा पाणी लटेया, कि तेसा खे एसा नदिया ते हड़ाई देओ। 16 पर तरतिये तेसा जवाणसा री मताद किती और आपणा मूँ खोली की, से नदी, जो अजगरे आपणे मुंओ ते बाहई थी, पी ती। 17 नतीजन, अजगरो खे जवाणसा पाँदे रोष आईगा तेबेई तेसा री बाकि ल्वादा ते, जो परमेशरो रे ऊकमो खे मानोए और प्रभु यीशुए री गवाई देणे रे टीके रे थे, लड़ने खे गया

13 और से अजगर समुद्रो रे कनारे पाँदे जायी की खड़ा ऊईगा। तेबे मैं एक डांगर समुद्रो ते निकलदा ऊआ देखेया, जेसरे दस सींग और सात सिर थे। तेसरे सातो सिरा पाँदे दस राजमुकट थे और तेसरे हर सिरों पाँदे परमेशरो री निन्दा रे नाओं लिखी राखे थे। 2 जो डांगर मैं देखेया, से चीत्ते जेडा था, तेसरे पैर पालूओ जेडे थे, मूँ शरो जेडा था। तिने अजगरे आपणी सामर्थ, आपणा सिंहासन और बड़ा अक्क तेसखे देईता। 3 मैं तेस डांगरो रे सिरों बीचा ते एकी पाँदे एक बड़ा-पारी जखम देखेया, मानो से मरने वाला ए, तेबे तेसरे प्राण लणे वाला जखम ठीक ऊईगा और सारी तरतिया रे लोक तेस पीछे-पीछे अचम्भा करदे ऊए चले। 4 तिने अजगरो री पूजा किती, कऊँकि तिने डांगरो खे आपणा अक्क देईता था और ये बोली की डांगरो री पूजा किती कि, “एस डांगरो जेडा कूणे? कुण एस साथे लडी सकोआ?” 5 तेस डांगरो खे त्वालिया मारने खे और परमेशरो री निन्दा करने खे अक्क दित्तेया। तेसखे बयाली मीन्ने तक काम करने रा अक्क दित्तेया। 6 तिने डांगरे परमेशरो री निन्दा करने खे मूँ खोलेया कि तेसरा नाओं और तेसरा तम्बू, मतलब स्वर्गो रे रणे वालेया री निन्दा करो। 7 तेस डांगरो खे ये अक्क दित्तेया कि परमेशरो रे लोका साथे लड़ो, तिना पाँदे जय पाओ। तेसखे हर एक कुल, लोक, पाषा और जातिया पाँदे अक्क दित्तेया। 8 तरतिया रे सब रणे वालेया तेस डांगरो री पूजा करनी मतलब सेयो लोक जिना रे नाओं दुनिया री शुरूआता तेई तेस मिन्टूए री जीवनों री कताबा रे नि लिखी राखे थे। से मिन्टू ईए जो काई राखेया था। 9 जो समजी सकोआ से

तिजी खे त्यानो साथे सुणो और मानी बी लओ। 10 जेसखे कैदा रे पड़ना ए, से कैदा रे पड़ना, जो तलवारी ते बाओगा, जरूरी ए कि से तलवारी की काया जाणा, परमेशरो रे लोका रा सन्न और विश्वास इदे ई आए। 11 तेबे मैं एक ओर डांगर तरतिया ते निकलदे ऊए देखेया, तेसरे मिनूए जेड़े दो साँग थे और से अजगरो जेड़ा बोलो था। 12 ये तेस पईले डांगरो रा सारा अक्क तेस सामणे कामो रे ल्याओ था और तरती और तिदे रणे वालेया ते तेस पईले डांगरो री पूजा कराओ था, जेसरे प्राण लणे वाला जखन ठीक ऊईगा था। 13 ये दूजा डांगर बड़े-बड़े चिह्न दखाओ था, एथो तक ई मांगूआ सामणे सर्गो ते तरतिया पॉदे आगी री बरखा करी देओ था। 14 तिना बड़े-बड़े चिह्न री बजअ ते, जो तेस डांगरो सामणे दखाणे रा अक्क तेसखे दिक्तेया था, से तरतिया पॉदे रणे वालेया खे ईयां भ्रमाओ था कि तरतिया रे रणे वालेया खे बोलो था कि जेस डांगरो रे तलवार लगी थी, से जिऊंदा ऊईगा रा, तेसरी मूरत बणाओ। 15 तेस दूजे डांगरो खे तेस पईले डांगरो री मूरता रे प्राण पाणे रा अक्क दिक्तेया, ताकि डांगरो री मूरत बोलणे लगे और जितणे लोक तेस डांगरो री मूरता री पूजा नि करो, तिना खे काई देओ। 16 तेबे तिने दूजे डांगरे सबी लोका खे छोट्टा या बड़ा, अमीर या गरीब और आजाद या दास सबी रे दौणे आथो रे या तिना रे माथे पॉदे पईले डांगरो री छाप लगाणे के मजबूर किक्तेया। 17 ताकि तेसखे छोट्टी की, जेस पॉदे छाप, मलबल-तेस डांगरो रा नाओं या तेसरे नाओं रा अंक ओ और दूजा कोई लेण-देण नि करी सको। 18 इजी खे समजणे खे दमाको री जरूरत ए। पर जेसगे दमाक ए से ये पता लगाई सकोआ कि एस डांगरो रे अंको रा क्या मतलब ए। कऊँकि ये एक मांगूए रा नाओं ए। और तेसरा अंक छे सौ छयाठ ए।

14 तिना गल्ला ते बाद मैं नजर दिक्ती और देखो, से मिनू सिय्योने रे पाहडो पॉदे खड़ी रा। और तेस साथे एक लाख चवालीं हजार जणे ए, जिना रे माथे पॉदे तेसरा नाओं और पिटे रा नाओं लिखी राखेया। 2 और स्वर्गो ते माखे एक एड़ी आवाज सुणी, जो बऊत सारे पाणिए री और बड़ी गिड़ने री जी आवाज थी और जो आवाज मैं सुणी, से एड़ी थी, मानो बीणा बजाणे वाले बीणा बजाओए। 3 सेयो एक लाख चवालीं हजार लोक सिंहासनो सामणे और चारो प्राणिया सामणे और बुजुर्गा सामणे, मानो ये नया गाणा गाणे लगी रे थे और तिना एक लाख चवालीं हजार जणेया खे छोट्टी की, जो तरतिया पॉदा ते मोले लयी राखे थे, कोई से गाणा नि सिखी सको था। 4 ये एक लाख चवालीं हजार सेयो लोक ए, जो जवाणसा साथे अशुद्ध नि ऊए, पर कुआँरे ए, यो सेयो ईए कि जेती केथी मिनू जाओ था, सेयो तेस पीछे चली पड़ो थे। यो तो परमेशर और मिनूए खे पईले फलो जेड़े मांगूआ बीचा ते मोले लयी राखे। 5 तिना रे मुंओ ते कदी चूठ नि निकलेया, सेयो निर्दोष ए। 6 तेबे मैं एक ओर स्वर्गदूत सर्गो रे उड़दा ऊआ देखेया, जेसगे तरतिया रे रणे वालेया री हर जाति, कुल, पाषा और लोका खे सुनाणे खे सदा कालो रा ईश्वरीय सुसमाचार था। (aiōnios g166) 7 और तिने जोरे की बोलेया, “परमेशरो ते डरो और तेसरी महिमा करो, कऊँकि तेसरे न्याय करने रा बखत आयी पऊँछी रा। और तेसरी भक्ति करो, जिने स्वर्ग, तरती, समुद्र और पाणिए रिया सूबला बणाईया।” 8 तेबे इजी ते बाद एक ओर दूजा स्वर्गदूत ये बोलदा ऊआ आया, “रूडी गा, से बड़ा बेबीलोन रूडी गा, जिने आपणे व्याभिचारो री कोपमय शराब सबी जातिया खे पलयाई।” 9 तेबे इना ते बाद एक ओर तीजा स्वर्गदूत जोरे की ये बोलदा ऊआ आया, “जो कोई तेस डांगर और तेसरी मूरता री पूजा करो और आपणे माथे रे या आपणे आथो रे तेसरी छाप लओ, 10 तो तेस परमेशरो रे प्रकोपो री छुट्टी शराब, जो तेसरे रोषो रे कटोरे रे पाई राखी, पीणी और पवित्र स्वर्गदूता सामणे और मिनूए सामणे आग और गन्धको री पीड़ा रे पड़ना। 11 तिना री पीड़ा रा तुआँ जुगो-जुगो तक उठदा रणा और जो तेस डांगर और तेसरी मूरता री पूजा करोए और जो तिना रे नाओं री छाप लओए, तिना खे रात-दिन चैन नि मिलणा।” (aiōn g165) 12 कऊँकि ये सारिया गल्ला ऊणे वालिया ए इजी खे परमेशरो रे लोका रा सन्न इदे ईए, जो परमेशरो री आजा

खे मानोए और यीशुए पॉदे विश्वास करोए। 13 मैं स्वर्गो ते ये आवाज सुणी, “लिख: जो मुडुटे प्रभुए रे मरोए, सेयो एबुए ते धन्य ए।” आत्मा बोलीआ, “आ, कऊँकि तिना खे आपणी मईणता ते आराम मिलणा और तिना रे काम तिना साथे ओए ए।” 14 तेबे मैं नजर दिक्ती और देखो, एक उजला बादल था और तेस बादलो पॉदे माणू रे पुत्रो जेड़ा कोई बैठी रा था, जेसरे सिरा पॉदे सुईने रा मुकट और आथो रे पैनी दराटी थी। 15 तेबे एकी और स्वर्गदूते मन्दरो ते निकली की तेसते, जो बादलो पॉदे बैठी रा था, जोरे की आक्का पाई की बोलेया, “आपणी दराटी लयी की बाड, कऊँकि बाडणे रा बखत आईगा रा, कऊँकि तरतिया री फसल पाक्की चुकी री।” 16 तेबे से जो बादलो पॉदे बैठी रा था, तिने तरतिया पॉदे आपणी दराटी लगाई और तरतिया री फसल बाडी ती। 17 तेबे एक ओर स्वर्गदूत तेस मन्दरो ते निकलेया, जो स्वर्गो रे ए और तेसगे बी पैनी दराटी थी। 18 तेबे एक ओर स्वर्गदूत, जेसखे आगी पॉदे अक्क था, बेदिया ते निकलेया और जेसगे पैनी दराटी थी, तिने जोरे की बोलेया, “आपणी पैनी दराटी लगाई की, तरतिया री अँगुरो री बेला रे गुच्छे बाडी दे, कऊँकि तिजी रे अँगुर पाक्की चुकी रे।” 19 तेबे तिने स्वर्गदूते आपणी दराटी लगाई और तरतिया पॉदलिया अँगुरा रिया बेली रा फल बांडी की आपणे परमेशरो रे प्रकोपो रे बड़े रसकूण्डो रे पाईटा 20 और नगरो ते बारे तेस रसकूण्डो रे अँगुर माण्डे और रसकूण्डो ते इतणा खून निकलेया कि कोड़ेया री लगामा तक पऊँछेया और से सौ कोह तक बईगा।

15 इजी ते बाद मैं स्वर्गो रे एक ओर बड़ा और नऊखा नजारा देखेया, मतलब-सात स्वर्गदूत, जिना गे सातो आखरी मुसीबता थिया, कऊँकि तिना रे ऊणे ते परमेशरो रे प्रकोपो रे अंत ए। 2 पॉदे मैं आगी साथे मिले रा काँचो जेड़ा एक समुद्र देखेया और जो तेस डांगरो पॉदे, तेसरी मूरता पॉदे और तेसरे नाओं रे कौं पॉदे जयवंत ऊए थे, सेयो तेस काँचो रे समुद्रो रे नेड़े परमेशरो री बीणा लयी की खड़े देखे। 3 सेयो परमेशरो रे दास मूसे रा गाणा और मिनूए रा गाणा गायी-गायी की बोलो थे, “ओ सर्वशक्तिमान प्रभु परमेशर, तेरे काम बड़े और नऊखे ए, ओ जुगो-जुगो रे राजा, तेरी चाल ठीक और सच्ची ए। 4 ओ प्रभु, तांते कुण नि डरना और केस तेरे नाओं री महिमा नि करनी? कऊँकि बस तूँ ई पवित्र ए। सारिया जातिया तांगे आयी की माथा टेकणा, कऊँकि तेरे न्याय रे काम प्रगट ऊईने रे।” 5 इजी ते बाद मैं देखेया कि स्वर्गो रे मन्दर खोलेया और तिदे साक्षिया रा तन्नू था। 6 और सेयो सातो स्वर्गदूत, जिना गे सातो मुसीबता थिया, मलमलो रे शुद्ध और चमकंदे ऊए टाल्ले पईनी की और छतिया पॉदे सुईने री पट्टिया बानी की मन्दरो ते निकले। 7 तेबे तिना चारो प्राणिया बीचा ते एकी जणे तिना सातो स्वर्गदूता खे परमेशरो रे, जो जुगो-जुगो तक जिऊंदा ए, प्रकोपो ते फरे रे सात सुईने रे कटोरे दिक्ते (aiōn g165) 8 और परमेशरो री महिमा और तेसरी सामर्था री बजअ ते मन्दर तुँए की फरी गा। और जदुओ तक तिना सातो स्वर्गदूता रिया सातो मुसीबता खत्म नि ऊईया, तदुओ तक कोई मन्दरो रे नि जाई सकेया।

16 तिजी ते बाद मैं मन्दरो रे कोई जोरे की तिना सातो स्वर्गदूता खे ये बोलदे ऊए सुणेया, “जाओ, परमेशरो रे प्रकोपो रे सातो कटोरे तरतिया पॉदे लटी देओ।” 2 पईले स्वर्गदूते जाई की आपणा कटोरा लटी ता। और तिना मांगूआ रे, जिना पॉदे डांगरो री छाप थी और जो तेसरी मूरता री पूजा करो थे, एक किस्मा रा बुरा और पीड़ देणे वाला फोड़ा निकलेया। 3 फेर दूजे स्वर्गदूते आपणा कटोरा समुद्रो बीचे लटी ता और से मरे रे जे मांगूए रे खूनो जेड़ा बणीगा। और समुद्रो रे सारे जीव मरी गे। 4 तीजे स्वर्गदूते आपणा कटोरा नदिया और पाणिए री सूबला पॉदे लटी ता और सेयो खून बणी गे। 5 और मैं पाणिए रे स्वर्गदूतो खे ये बोलदे ऊए सुणेया, “ओ पवित्र परमेशर, जो आए और जो था, तूँ न्यायी ए और तँ ये न्याय किक्तेया। 6 कऊँकि तिने परमेशरो रे लोका रा और भविष्यबक्तेया रा खून बाहई राखेया था और तँ तिना खे खून पलयाया, कऊँकि सेयो इजी जोगे ईए।” 7 और मैं

फेर बेदिया ते ये आवाज सुणी, “आ, ओ सर्वशक्तिमान् प्रभु परमेश्वर, तेरे फैंसले ठीक और सच्चे ए।” 8 चौथे स्वर्गदूते आपणा कटोरा सूरजो पॉद लटी ता और तेसखे मांणूआ खे आगी साथे फूकणे रा अक्क दित्तेया। 9 मांणू बड़ी-पारी गर्मिया ते फूखी गे और तिने लोके परमेश्वरो रे नाओं री, जेसखे इना मुसीबता पॉद अक्क ए, निन्दा किक्ती और आपणे पापो ते मन नि फेरेया और ना ई तेसरी महिमा किक्ती। 10 पांजुए स्वर्गदूते आपणा कटोरा तेस डांगरो रे सिंहासनो पॉद लटी ता और नतीजन, तेसरे पुरे राज्य रे न्हारा ऊईगा। और लोक पीड़ा रे मारे आपणी-आपणी जीब चबाणे लगे। 11 आपणी पीड़ और फोड़ेया री बजअ ते तिने स्वर्गों रे परमेश्वरो री निन्दा किक्ती। पर तिने लोके आपणे-आपणे बुरे कामो ते मन नि फेरेया। 12 छठे स्वर्गदूते आपणा कटोरा बड़ी फरात नदिया पॉद लटी ता और नतीजन, तिजी रा पाणी सूकी गा, कि पूर्व दिशा रे राजेया खे बाट त्यार ऊई जाओ। 13 और मैं तेस अजगरो रे मुंओ ते और तेस डांगरो रे मुंओ ते और तेस चूठे भविष्यबक्ते रे मुंओ ते, तीन अशुद्ध आत्मा मिनके रे रूपो रे निकलदे ऊए देखी। 14 यो बड़े-बड़े चिह्न दखाणे वाली दुष्टात्मा ए, जो सारे दुनिया रे राजेया रे निकली की इजी खे जाओई, ताकि तिना खे सर्वशक्तिमान् परमेश्वरो रे तेस बड़े दिनेो री लड़ाईया खे कट्टा करो। 15 मसीहे बोलेया, “देख, आऊँ चोरो जेड़ा आऊँआ, धन्य ए से, जो जागदा रओआ और आपणे टालेया री चौकसी करोआ कि नांगा नि फिरो और लोक तेसखे नांगा नि देखो।” 16 और तिने दुष्टात्मे राजेया खे तेसा जगा रे कट्टे कित्तेया, जेतखे इन्नानी पाषा रे हर-मगिदोन बोलेए। 17 और सातुए स्वर्गदूते आपणा कटोरा अवा रे लटी ता, और मन्दरो रे सिंहासनो ते ये बड़ी आवाज ऊई, “पूरा ऊईगा।” 18 फेर बिजलिया, आवाज, गर्जन और एक एड़ा ईल्लण ऊआ कि जदुओ ते मांणूआ री उत्पत्ति तरतिया रे ऊई, तदुओ ते एड़ा ईल्लण कदी नि ऊआ था। 19 इजी ते तेस बड़े नगरो रे तीन टुकड़े ऊईगे और जातिया-जातिया रे नगर टली गे और बड़े बेबीलोनो री याद परमेश्वरो रे एती ऊई, कि से आपणे रोषो री जलना री शराब तेसखे पलयाओ। 20 और हर एक टापू आपणी जगा ते टली गा और पाहड़ो रा कोई पता नि लगेया। 21 और सर्गों ते मांणूआ पॉद मण-मण परी की ओले पड़े, कऊँकि ये मुसीबत बरुत ई पारी थी, लोके ओलेया री मुसीबता री बजअ ते परमेश्वरो री निन्दा किक्ती।

17 जिना सात स्वर्गदूता गे सात कटोरे थे, तिना बीचा ते एकी जणे मांणे आयी की बोलेया, “ओरे आओ, आऊँ ताखे तेसा बड़ी वेश्या रा दण्ड दखाऊँ, जो बरुत सारे पाणिए पॉद बैठी री। 2 तेसा साथे तरतिया रे राजे व्याभिचार कित्तेया और तरतिया रे रणे वाले तेसा रे व्याभिचारो री शराबो ते नशेडी ऊईगे थे।” 3 आत्मा री मतादा ते स्वर्गदूत माखे सुनसाण जगा रे लयी गा और मैं लाल रंगो रे डांगरो पॉद जो निन्दा रे नाओं ते परेया रा था और जेसरे सात सिर और दस सींग थे, एक जवाणस बैठी री देखी। 4 एसे जवाणसे बेंगणी और लाल रंगो रे टाले पईने रे थे और सुईने, किमती मणि और मोतिए की सजी री थी। और तेसा रे आथो रे एक सुईने रा कटोरा था, जो घृणित चीजा ते और तिजी रे व्याभिचारो री अशुद्ध चीजा ते फरे रा था। 5 तेसा रे माथे पॉद एक एड़ा नाओं लिखी राखेया था जो एक राज ए। तिने बोलेया, “बड़ा बेबीलोन तरतिया री वेश्या और घृणित चीजा री माता।” 6 मैं से जवाणस परमेश्वरो रे लोका रा खून और प्रभु यीशुए रे गवाओ रा खून पीणे ते नशेडी देखी और तेसा खे देखी की आऊँ हैरान ऊईगा। 7 तिने स्वर्गदूते माखे बोलेया, “तूँ हैरान नि ओ। आऊँ ताखे एसा जवाणसा रा और तेस डांगरो रा, जेत पॉद से सवार ए और जेसरे सात सिर और दस सींग ए, पेट बताऊँआ। 8 जो डांगर तें देखेया, ये पईले तो था, पर एबे निए और जेत डूगे गड्डे री गईराईया रा अंत निए तथा ते निकली की नाशो रे पडना। और तरतिया रे सब रणे वालेया, जिना रे नाओं दुनिया री शुरूआता रे बखतो ते जिन्दगिया री कताबा रे नि लिखी राखे, एस डांगरो री ये दशा देखी की कि पईले था और एबे निए और फेर आयी जाणा, अचम्बा करना। (Abyssos 9:2) 9 “इजी खे समजणे खे दमाको री जरूरत ए। सेयो सात सिर सात

पाहड़ ए, जिना पॉद से जवाणस बैठी री। 10 और सेयो सात राजा बी ए। तिना बीचा ते पॉज तो पईले ई मरी चुके रे। और तिना बीचा ते एक एबुए। और एक एबुए तक नि आयी रा। पर जेबे से आऊणा, तो तेस कुछ बखतो तक ई राज करना। 11 जो डांगर पईले था और एबे निए, से आपू आठुआ ए और तिना सातो बीचा ते पैदा ऊआ और नाशो रे पडना। 12 “जो दस सींग तें देखे, सेयो दस राजा ए, जिने एबुए तक राज्य नि करी राखेया। पर तेस डांगरो साथे कअड़िया परो खे राजेया जेड़ा अक्क पाणा। 13 यो सब दस राजा एक मन ऊणे और तिना आपणी-आपणी सामर्थ और अक्क तेस डांगरो खे देणा। 14 से डांगर और दस राजा मिन्दूए साथे लड़ने और मिन्दूए तिना पॉद जय पाणी। कऊँकि से प्रभुए रा प्रभु और राजेया रा राजा ए। और जो तेसरे बुलाए रे ए, चूणे रे ए और विश्वासो जोगे तिना साथे ए, तिना री बी जय ऊणी।” 15 तेबे तिने माखे बोलेया, “जो पाणी तें देखे, जिना पॉद वेश्या बैठी री, सेयो लोक, पीड़, जाति और पाषा ए। 16 जो दस सींग तें देखे तिना और डांगरा वेश्या ते बैर राखणा और से मजबूर और नांगी करी देणी और तेसा रा मांस खाई देणा और से आगी रे फूकी देणी। 17 कऊँकि परमेश्वरो तिना रे मनो रे ये पाणा कि सेयो तेसा री इच्छा पूरी करो और जदुओ तक परमेश्वरो रे वचन पूरे नि ऊई लो, तदुओ तक एक मन ऊई की आपणा-आपणा राज्य तेस डांगरो खे देई देओ। 18 से जवाणस, जो तें देखी, से बड़ा नगर ए, जो तरतिया रे राजेया पॉद राज्य करोआ।”

18 इजी ते बाद मैं एक स्वर्गदूत स्वर्गों ते उतरदे ऊए देखेया। से बरुत ई सामर्थ था और तरती तेसरे तेजो ते चमकी गी। 2 तिने जोंरे की आक्का पाई की बोलेया, “टली गा, बड़ा बेबीलोन टली गा रा। और से दुष्टात्मा री रणे री जगा, हर एक अशुद्ध आत्मा रा अड्डा और हर एक अशुद्ध और घृणित पंछिया रा अड्डा ऊईगा। 3 कऊँकि तेसा रे व्याभिचारो रे शराबो री बजअ ते सब जातिया टली गी रिया। तरतिया रे सामर्थी राजेया तेसा साथे व्याभिचार करी राखेया और तरतिया रे बपारी तेसा रे बरुत जादा सुख-बिलासो री बजअ ते अमीर ऊई रे।” 4 तेबे मैं स्वर्गों ते केसी ओरी री आवाज सुणी, “ओ मेरे लोको, तिजी बीचा ते निकली की आओ! कि तुसे तिजी रे पापो रे शामिल ना ओ और तेसरी मुसीबता बीचा ते कोई बी तुसा पॉद नि पडो, 5 कऊँकि तेसा रे पाप स्वर्गों तक पऊँछी गे रे और तेसा रे बुरे काम परमेश्वरो खे याद आयी रे। 6 जेड़ा तिने तुसा खे देई राखेया, तेड़ा ई तेसखे बी देओ और तेसरे कामो रे मुताबिक तेसखे दुगणा बदला देओ, जेती कटोरे रे तिने परी ता था, तिदे ई तेसखे दुगणा परी देओ। 7 जितणी तिने आपणी तारीफ किक्ती और सुख-बिलास कित्तेया, तिथणी तेसखे पीड़ और शोग देओ, कऊँकि से आपणे मनो रे बोलोई, ‘आऊँ राणी ऊईगी री, बिदुआ नि और शोगो रे कदी नि पडुँगी।’ 8 इजी बजअ ते एक ई दिने रे तेसा पॉद मुसीबता आऊणियां, मतलब मौत, शोग, अकाल और से आगी रे स्वा करी देणी, कऊँकि तेसा रा न्यायी प्रभु परमेश्वर तागतबर ए। 9 “तरतिया रे राजा, जिने तेसा साथे व्याभिचार और सुख-बिलास कित्तेया, जेबे तेसा रे फूकणे रा तुआँ देखणा, तो तेसा खे रोणे और छाती पीटणी। 10 तेसा री पीड़ा रे डरो रे मारे दूर खड़े ऊई की बोलणा, ‘ओ बड़े नगर बेबीलोन, ओ मजबूत नगर तुसा खे धिक्कार ए, एकी कंटे बीचे ई ताखे सजा मिलीणी। 11 “तरतिया रे बपारी तेसा खे रोणे और शोग करना, कऊँकि एबे केसी बी तिना रा माल नि लाणा, 12 मतलब सुईना, चाँदी, रत्न, मोती, बेंगणी, रेशमी और लाल टाले और हर प्रकारा री खुशबूदार लकड़ी, आथी दाँदो रिया हर प्रकारा रिया चीजा, किमती लकड़ी, पीतल, लोआ और संगमरमरो रे सब प्रकारा रिया चीजा, 13 और दालचीनी, मसाले, तूप, इत्र, लोबान, शराब, तेल, मैदा, कणक, गाय, बलद, पेडा, बाकरिया, कोड़े, रथ, दास और मांणूए खे खरीदणे वाला कोई नि रया। 14 “बपारिए तेसा खे बोलेया, ‘एबे तेरे मनचाए फल तांग गे ते चली गे और सुख-विलास और पड़कीली चीजा तांते दूर ऊईगिया और सेयो फेर कदी नि मिलणिया।’ 15 इना चीजा रे बपारी, जो तेसा रे जरिए अमीर ऊईगे थे, तेसा री पीड़ा रे डरो रे मारे दूर खड़े ऊणे और रोँदे और शोग करदे ऊए बोलणा,

16 “ताखे धिक्कार ए, धिक्कार ए, से बड़ा नगर, जो मलमल, बैंगणी और लाल टाले पड़नी की था और सुईना, रत्न और मोतियो साथे सजेया रा था, 17 थोड़े बखतो रेई तिजी रा एड़ा पारी धन नाश ऊईगा। “हर एक मांडी, जलयात्री, मल्लाह और जितणे समुद्रो ते कमाओ थे, सब दूर खड़े ऊईगे। 18 और तेसा रे फूखणे रा तुआँ देखदे ऊए आक्का पाई की बोलणा, “कुण जा नगर, एस बड़े नगरो जेड़ा ए?” 19 तिना आपणे-आपणे सिरो पाँदे तूड पाणी और रोदे और शोग करदे ऊए चींगी-चींगी की बोलणा, “धिक्कार ए, धिक्कार ए, ये बड़ा नगर जेतेरी जायदाता रे जरिए समुद्रो रे सब जाहज वाले अमीर ऊईगे थे, थोड़े बखतो रेई उजड़ी गे। 20 ओ स्वर्ग और ओ परमेशरो रे लोको और प्रेरितों और भविष्यबक्तेयो, तेसा पाँदे खुशी करो, कऊँकि परमेशरे न्याय करी की तेसा ते तुसा रा बदला लयी राखेया।” 21 तेबे एक तागतबर स्वर्गदूते एक बड़ी चाक्किया रे पूडो जेड़ा एक पात्थर चकेया और ये बोली की समुद्रो रे सेटी ता, “बड़ा नगर बेबीलोन एड़ी ई बड़ी तागता ते सेटेया जाणा और फेर कदी तेसरा पता नि मिलणा। 22 बीणा बजाणे वाले, गाणे वाले, बंसी बजाणे वाले और तुरहिया रे फूकर बाणे वालेया री आवाज कदी ताँदे नि सुणनी और केसी कामो रा कारीगर बी फेर कदी ताँदे नि मिलणा और चाक्किया रे चलणे री आवाज फेर कदी ताँदे सुणनी नि। 23 दिऊएया रा प्रयासा फेर कदी ताँदे नि चमकणा और लाड़े-लाड़िया री आवाज फेर कदी ताँदे सुणनी नि, कऊँकि तेरे बपारी तरतिया रे प्रदान थे और तेरे जादू-टोणे ते सारी जातिया भरमाईया थिया। 24 भविष्यबक्ता, परमेशरो रे लोक और तरतिया रे सब काये रे रा खून तिदे ई मिलेया।”

19 इजी ते बाद मैं स्वर्गो रे मानो बड़ी पीड़ जोरे की ये बोलदे ऊए सुणी, “हाल्लेलूय्या, उद्धार, महिमा और सामर्थ म्हारे परमेशरो री ए। 2 कऊँकि तेसरे फँसले सच्चे और ठीक ए। तिने तेसा बड़ी वेश्या रा, जो आपणे व्याभिचारो ते तरतिया खे प्रष्ट करो थी, न्याय कित्तेया। और तेसा ते आपणे दासो रे खूनो रा बदला लया।” 3 तेबे दूजी बार तिने फेर बोलेया, “हाल्लेलूय्या! तेसा रे फूखणे रा तुआँ जुगो-जुगो तक उठदा रणा।” (aiōn g165) 4 तेबे चऊबी बुजुगँ और चारो प्राणिये थाले पड़ी की परमेशरो गे माथा टेकेया, जो सिंहासनो रे बैठी रा था। और तिने बोलेया, “आमीन, हाल्लेलूय्या!” 5 तेबे सिंहासनो ते एक आवाज निकली, “ओ म्हारे परमेशरो ते सब डरने वाले दासो, क्या छोटे, क्या बड़े, तुसे सब परमेशरो री स्तुति करो।” 6 तेबे मैं बड़ी पीड़ा री जी, बऊत पाणि ए री जी और गर्जणे री जी आवाज सुणी, “हाल्लेलूय्या! कऊँकि प्रभु म्हारा परमेशर सर्वशक्तिमान् राज्य करीआ। 7 आओ, आसे खुश ऊई की मग्न ओईए और तेसरी स्तुति करिए, कऊँकि मिन्टूए रा ब्या आयी पऊँछी रा और तेसरी लाड़िए आपू खे त्यार करी ता रा। 8 और तेसा खे शुद्ध और चमकदार बरीक मलमल पईनणे रा अक्क दित्तेया।” कऊँकि तेस बरीक मलमलो रा मतलब, परमेशरो रे लोका रे तमों रे काम ए। 9 तेबे स्वर्गदूते माखे बोलेया, “ये लिख: धन्य ए सेयो, जो मिन्टूए रे ब्याओ री पाट्टिया रे बुलाई राखे।” तेबे तिने माखे बोलेया, “यो वचन परमेशरो रे सच्चे वचन ए।” 10 तेबे आऊँ तेसगे माथा टेकणे खे तेसरे पैरा पाँदे पड़ी गा। तिने माखे बोलेया, “देख, एड़ा नि कर। आऊँ तेरे जेड़ा ई परमेशरो रा दास ए, जो यीशुए री गवाई देणे रे टीके राए। परमेशरो गे ई माथा टेक।” कऊँकि यीशुए री गवाई, भविष्यबाणिया री आत्मा ए। 11 तेबे मैं स्वर्ग खुले रा देखेया। तेती मां सामणे एक सफेद कोड़ा था और तेस पाँदे एक सवार था, जेसखे विश्वासो जोगा और सच्चा बोलोए। और से धार्मिकता रे न्याय और लड़ाई करीआ। 12 तेसरी आखी आगी री लूपिया ए, तेसरे सिरो पाँदे बऊत सारे राजमुकट ए। और तेसरा एक नाओं तिजी पाँदे लिखी राखेया, जो तेसखे छाडी की ओर कोई नि जाणा। 13 तिने खूनो बीचे डबोए रे टाले पईने रे थे और तेसरा नाओं परमेशरो रा वचन ए। 14 स्वर्गो री बऊत सेना सफेद कोड़ेया पाँदे सवार और शुद्ध मलमल पईनी की तेस पीछे-पीछे थी। 15 जातिया-जातिया खे काणे खे तेसरे मुँओ ते एड़ी चोखी तलवार निकलोई और तेस लोए रा राजदण्ड लयी

की तिना पाँदे राज्य करना और तेस सर्वशक्तिमान् परमेशरो रे डराऊणे प्रकोपो री जलजलाहटा रे शराबो रे कुण्डो रे दाख माण्डणी। 16 तेसरे टाले और खुटिया रे ये नाओं लिखी राखेया: “राजेया रा राजा और प्रभुए रा प्रभु।” 17 तेबे मैं एक स्वर्गदूत सूरजो पाँदे खड़ेया रा देखेया, तिने जोरे की आक्का पायी की सर्गो रे बीचे उड़ने वाले सब मांस खाणे वाले पंछिया खे बोलेया, “आओ परमेशरो री पाट्टिया खे कट्टे ऊई जाओ। 18 ताकि तुसे राजेया रा मांस, सरदारा रा मांस, तागतबर मर्दा रा मांस, कोड़े और तिना रे सवारो रा मांस और क्या आजाद क्या दास, क्या छोटे, क्या बड़े, सबी लोका रा मांस खाओ।” 19 तेबे मैं तेस डांगरो खे और तरतिया रे राजा और तिना री सेना खे तेस साथे जो कोड़े पाँदे सवार था और तेसरी सेना साथे लड़ने खे कट्टे ऊँदे देखेया। 20 और से डांगर और तेस साथे से चूठा भविष्यबक्ता पखड़ी गा। तिने चूठे भविष्यबक्ते तेस डांगरो री तरफा ते बड़े-बड़े चिह्न दखाए थे और तिना सबी लोका खे तोखा दित्तेया था, जिने आपणे माथे पाँदे तेस डांगरो री छाप लयी थी और जो तेसरी मूरता री पूजा करो थे। यो दोनो जिऊँदे जिऊए तेसा आगी री झीला दे, जो गन्धको साथे बलो थी, पायी ते। (Limnē Pyr g3041 g4442) 21 बाकि लोक तेस कोड़े रे सवारो री तलवारी ते, जो तेसरे मुँओ ते निकलो थी, कायी ते और सब पंछी तिना रे मासो की रज्जी गे।


20 तेबे मैं एक स्वर्गदूत स्वर्गो ते उतरदे ऊए देखेया, जेसरे आथो रे तेस डूगे गट्टे री जेतेरी गईराईया रा अंत निए कुंजी और एक बड़ी जंजीर थी। (Abyssos g12) 2 तिने से अजगर, मतलब पुराणा साप, जो शैतान ए, पकड़ी की हजार साला खे बानी ता। 3 तेबे स्वर्गदूते से डांगर तेस डूगे गट्टे रे जेतेरी गईराईया रा अंत निए पायी की बंद करी ता। और तेस पाँदे मुहर लगाईती ताकि से हजार साल पूरे ऊणे तक जातिया-जातिया रे लोका खे नि भरमाओ। इजी ते बाद जरूरी ए कि से थोड़ी देरा खे फेर खोलेया जाओ। (Abyssos g12) 4 तेबे मैं सिंहासन देखे, तिना पाँदे लोक बेठीगे और तिना खे न्याय करने रा अक्क दित्तेया। मैं तिना री आत्मा बी देखी, जिना रे सिर यीशुए री गवाई देणे और परमेशरो रे वचनो री बजअ ते बाडे थे और जिने ना तेस डांगरो री, ना तेसरी मूर्तिया री पूजा कित्ती थी और ना तेसरी छाप आपणे माथे और आथो पाँदे लगाई थी। सेयो जिऊँदे ऊई की मसीह साथे हजार सालो तक राज्य करदे रये। 5 जदुओ तक ये हजार साल पूरे नि ऊए, तदुओ तक बाकि मरे रे जिऊँदे नि ऊए। ये तो पईला दुबारा जिऊँदा ऊणा ए। 6 धन्य और पवित्र सेयो ए, जो एस पईले दुबारा जिऊँदा ऊणे रे शामिल ए, एड़ेया पाँदे दूजी मौता रा कोई अक्क निए। पर सेयो परमेशर और मसीह रे पुरोईत ऊणे और तेस साथे हजार साला तक राज्य करना। 7 जेबे हजार साल पूरे ऊई जाणे, तेबे शैतान कैदा ते छाडी देणा। 8 सेयो जातिया जो तरतिया रे चऊँ कनारे ऊणिया, मतलब-गोग और मागोग जिना री गिणती समुद्रो रे बालुओ रे बराबर ऊणी, तिना खे भरमाई की लड़ाईया खे कट्टे करने खे निकलना। 9 तेबे तिना सारी तरतिया पाँदे फैली की और परमेशरो रे लोका री छावणी और प्यारा नगर केरी लणा और आगी स्वर्गो ते निकली की सेयो स्वा करी देणियां। 10 तेबे तिना खे भरमाणे वाला शैतान आग और गन्धको री तेसा झीला रे, जिदे से डांगर और चूठा भविष्यबक्ता बी ऊणा, पायी देणा। और सेयो दिन-रात जुगो-जुगो तक पीड़े की तडफदे रणे। (aiōn g165, Limnē Pyr g3041 g4442) 11 तेबे मैं एक बड़ा सफेद सिंहासन, और से जो तिदे बैठी रा था, देखेया। जेसरे सामणे ते तरती और स्वर्ग नठीगे और तिना खे जगा नि मिली। 12 तेबे मैं छोटे-बड़े सब मरे रे सिंहासनो सामणे खड़े रे देखे, और कताबा खोलिया। तेबे एक ओर कताब खोली गयी, मतलब-जीवनो री कताब। और जेड़ा तिना कताबा रे लिखी राखेया था, तेड़ा ई तिना रे कामो रे मुताबिक मरेया रा न्याय कित्तेया। 13 समुद्रे सेयो मरे रे, जो तिदे थे, देई ते, तेबे मौते और नरके सेयो मरे रे, जो तिदे थे देई ते और तिना बीचा ते हर एकी खे तिना रे कामो रे मुताबिक न्याय कित्तेया। (Hadēs g86) 14 तेबे मौत और नरक बी आगी री झीला रे पाई ते, ये आगी री झील दूजी मौत ए। (Hadēs g86, Limnē Pyr g3041 g4442) 15 और जेस केसी रा

नाओं जीवनों की कताबा रे लिखेया रा नि मिलेया, से आगी री झील रे पायी ता। (Limnē Pyr g3041 g4442)

21 तेबे में नया सर्ग और नयी तरती देखी, कऊँकि पईला सर्ग और पईली तरती खत्म ऊईगे थे और समदू प्रनि रया। 2 तेबे में पवित्र नगर यरूशलेम स्वर्गो पाँदो ते परमेशरो गे ते उतरदे देखेया और से तेसा लाडिया जेड़ा था, जो आपणे लाड़े री तई श्रृंगार करोई। 3 तेबे में सिंहासनो ते कोई जोरे की ये बोलदे ऊए सुणेया कि देख, परमेशरो रा डेरा माणूआ बीचे ए, तेस तिना साथे डेरा करना, सेयो तेसरे लोक ऊणे, परमेशर आपू तिना साथे रणा और तिना रा परमेशर ऊणा। 4 तेस तिना री आखी ते सारे आसू दूसणे, इजी ते बाद मौत नि रणी, ना शोग, ना बिलाप, ना पीड़ रणी, पईलकिया गल्ला चली गिया। 5 जो सिंहासनो पाँद बैठी रा था, तिने बोलेया, “देख, आऊँ सब कुछ नया करी देऊँआ।” तेबे तिने बोलेया, “लिखी लो, कऊँकि यो वचन विश्वासो जोगे और सच्चे ए।” 6 तेबे तिने माखे बोलेया, “यो गल्ला पुरिया ऊईगी रिया। आऊँ पईला और आखरी ए, शुरूआत और अंत ए। मां त्याये खे जिन्दगिया रे पाणिए री सूबला ते मुफ्त पलयाणा। 7 जो जीती जाणे, सेई इना चीजा रे बारस ऊणे और आऊँ तिना रा परमेशर ऊणा और से मेरे पाऊ ऊणे। 8 पर डरपोका रा, अविश्वासिया रा, बुरे काम करने वालेया रा, अत्यारे रा, व्याभिचारिया रा, जादू-टोणे करने वालेया रा, मूर्तिपूजा करने वालेया रा और सबी चूठेया रा इस्सा तेसा झील रे मिलणा, जो आग और गन्धका साथे बलदी रओई। ये दूजी मौत ए।” (Limnē Pyr g3041 g4442) 9 तेबे जिना सात स्वर्गदूता मे आखरी सात मुसीबता ते फरे रे सात कटोरे थे, तिना बीचा ते एक मांगे आया और मां साथे गल्ला करी की बोलेया, “ओरे ओओ, आऊँ ताखे लाडी, मतलब-मिन्दूर री लाडी दखाऊँआ।” 10 और तिने माखे आत्मा रे एक बड़े और उच्चे पाहडो पाँद लयी गा और पवित्र नगर यरूशलेमो खे स्वर्गो ते परमेशरो गे ते तरतिया पाँद उतरदे ऊए दखाया। 11 परमेशरो री महिमा तिदे थी और तिजी री जोति बऊत ई किमती पात्थर, मतलब-बिल्लौरो जेडी और यशबो जेडी साफ थी। 12 तिजी री शहरपनाह बऊत ऊच्यी थी, तिजी रे बारा फाटक और बारा फाटको पाँदे बारा स्वर्गदूत थे। और तिना फाटका पाँदे इस्राएलिया रे बारा गोत्रा रे नाओं लिखी राखे थे। 13 पूर्वो री तरफा खे तीन फाटक, उत्तरो री तरफा खे तीन फाटक, दक्खणो री तरफा खे तीन फाटक और पछलमा री तरफा खे तीन फाटक थे। 14 नगरो री शहरपनाह री बारा निऊँआ थिया और तिना निऊँआ पाँदे मिन्दूर रे बारा प्रेरिता रे नाओं लिखी राखे थे। 15 से स्वर्गदूत जो मां साथे गल्ला करने लगी रा था, तेसगे नगर, तिजी रे फाटक और तिजी री शहरपनाह खे नापणे खे एक सुईने रा गज था। 16 से नगर चकौर बसी रा था, और तिजी री लम्बाई, चौड़ाईया रे बराबर थी। और तिने तेस गजो ते नगर नापेया, तो से साढे सात सौ कोस निकलेया तिजी री लम्बाई, चौड़ाई और ऊच्यई बराबर थी। 17 तिने तेसरी शहरपनाह माणूए री, मतलब-स्वर्गदूतो रे नाओं ते नापी, तो एक सौ चवाली आथ निकली। 18 तेसरी शहरपनाह यशबो री बणी री थी और नगर एड़े चोखे सुईने रा था, जो साफ काँचो जेड़ा था। 19 तेस नगरो री निऊँआ हर प्रकारा रे किमती पात्थरे की सजाई राखी थिया, पईली निऊँ यशबो री थी, दूजी नीलमणिया री, तीजी लालडिया री, चौथी मरकदो री। 20 पांजी गोमेदको री, छठी माणिक्य री, साती पीतमणिया री, आठी पेरोजो री, नऊई पुखराजो री, दसी लहसनिए री, ग्यारी ध्रुक्रान्तो री और बारी याकूतो री थी। 21 बारा फाटका बारा मोतिया रे थे और एक-एक फाटक, एक-एक मोतियो रा बणी रा था। और नगरो री सड़का साफ काँचो जेडी चोखे सुईने री थिया। 22 में तिदे कोई मन्दर नि देखेया, कऊँकि सर्वशक्तिमानु प्रभु परमेशर और मिन्दू तिजी रा मन्दर ए। 23 तेस नगरो रे सूरज और चाँदो रे प्रयासे री कोई जरूरत निए, कऊँकि परमेशरो रे तेजो ते तिदे प्रयासा ओआ और मिन्दू तिजी रा दिऊआ ए। 24 जातिया-जातिया रे लोक तेसरे प्रयासे रे चलणे-फिरने और तरतिया रे राजेया आपणा-आपणा आदरो रा सामान तिदे ल्याऊणा। 25 तिजी रे फाटक दिने कदी बंद नि ऊणे

और रात तेती नि ऊणी। 26 जातिया-जातिया रे लोका एस नगरो रे हर प्रकारा रा महिमा और आदरो रा सामान ल्याऊणा। 27 तिदे कोई अपवित्र काम करने वाला या घृणित काम करने वाला, या चूठ बोलणे वाला कियॉ बी जाई नि सकदा। पर बस सेयो लोक ई जाई सकणे, जिना रे नाओं मिन्दूर री जीवनों री कताबा रे लिखी राखे।

22 तेबे स्वर्गदूते माखे बिल्लौरो जेडी छलकदी ऊई जिन्दगिया रे पाणिए री एक नदी दखाई, जो परमेशर और मिन्दूर रे सिंहासनो ते निकली की तेस नगरो रे बीचो-बीच बहओ थी। 2 नदिया रे वार-पार, जिन्दगिया रा डाल था, तिदे बारा प्रकारा रे फल लगे थे, से हर मीन्ने फलो था। और तेस डालो रे पत्तेया ते जातिया-जातिया रे लोक ठीक ओ थे। 3 फेर स्राप नि ऊणा, परमेशर और मिन्दूर रा सिंहासन तेस नगरो रे ऊणा और तेसरे दासा तेसरी सेवा करनी। 4 तिना परमेशर आमणे-सामणे देखणा और तेसरा नाओं तिना रे माथे पाँदे लिखे रा ऊणा। 5 और फेर रात नि ऊणी और तिना खे सूरज और दिऊए रे प्रयासे री जरूरत नि ऊणी। कऊँकि प्रभु परमेशरे तिना खे प्रयासा देणा और तिना जुगो-जुगो तक राज्य करना। (aiōn g165) 6 तेबे तिने माखे बोलेया, “यो गल्ला विश्वासो जोगिया और सच ए। और प्रभुए, जो भविष्यबक्तेया री आत्मा रा परमेशर ए, आपणा स्वर्गदूतो खे इजी खे पेजेया, ताकि आपणे दासा खे सेयो गल्ला जिना रा चट पूरा ऊणा जरूरी ए, दखाओ।” 7 “देख, आऊँ चट आऊणे वाला ए, धन्य ए से, जो एसा कताबा रिया भविष्यबाणिया री गल्ला खे मानोआ।” 8 आऊँ सेई यूहन्ना ए, जिने आपू ये सारिया गल्ला सुणिया और देखिया। ये सब सुणने और देखणे ते बाद आऊँ तेस स्वर्गदूतो रे पैरा पाँदे माथा टेकणे खे पडी गा, जिने माखे ये सब दखाया था। 9 पर तिने स्वर्गदूतो माखे बोलेया, “देख, एड़ा नि कर। कऊँकि आऊँ तेरा और तेरे पाई भविष्यबक्तेया री और तेसा कताबा री गल्ला खे मानणे वालेया जेड़ा ई परमेशरो रा दास ए। सिर्फ परमेशरो गे ई माथा टेक।” 10 तेबे तिने माखे बोलेया, “एसा कताबा रिया भविष्यबाणिया रिया गल्ला बंद नि कर, कऊँकि बखत नेडे ए। 11 जो अन्याय करोआ, से अन्याय ई करदा रओ, जो मईला ए, से मईला ई बणेया रा रओ और जो तर्मी ए, से तर्मी ई बणेया रा रओ और जो पवित्र ए, से पवित्र ई बणेया रा रओ।” 12 तेबे प्रभु यीशुए बोलेया: “देख, आऊँ चट आऊणे वाला ए; और हर एकी रे कामो रे मुताबिक बदला देणे खे फल मांगे आए। 13 आऊँ ई पईला और आखरी, आगला और पिछला, शुरूआत और अंत ए। 14 “धन्य ए सेयो, जो आपणे टाले तोई लओए, कऊँकि तिना खे जिन्दगिया रे डालो गे आऊणे रा अक्क मिलणा और सेयो फाटका रिये ऊई की नगरो खे जाणे। 15 पर कुत्ते, जादू-टोणा, व्याभिचारी, अत्यारे, मूर्तिपूजा करने वाले और हर एक चूठ बोलणे वाला और चाणे वाला बारे रणा। 16 “में यीशुए आपणा स्वर्गदूत इजी खे पेजेया, ताकि तुसा रे आगे मण्डलिया रे बारे रे इना गल्ला री गवाई देओ। आऊँ दाऊदो रा मूल, वंश और प्याणु तारा ए।” 17 परमेशरो रा आत्मा और मिन्दूर ए री लाडी दोनो यीशुए खे बोलेओ, “आ!” और सुणने वाला बी बोले कि “आ!” और जो त्याया ए, से आओ और जो कोई जाओ से जिन्दगिया रा पाणी मुफ्त लओ। 18 मां हर एकी खे, जो एसा कताबा री भविष्यबाणिया री गल्ला सुणोआ, गवाई देऊँआ कि जे कोई माणू इना गल्ला रे कुछ बड़ाओ, तो परमेशरे सेयो मुसीबता, जो इना कताबा रे लिखी राखिया, तेस पाँदे बड़ाणियां। 19 जे कोई एसा भविष्यबाणिया री कताबा री गल्ला बीचा ते कुछ निकयालो, तो परमेशरो तेस जिन्दगिया रे डालो और पवित्र नगरो बीचा ते, जेतेरी चर्चा एसा कताबा रे ए, तेसरा इस्सा निकयाली देणा। 20 जो इना गल्ला री गवाई देओआ, से ये बोलोआ, “आ, आऊँ चट आऊणे वाला ए।” आमीन्। ओ प्रभु यीशु आयी जाओ। 21 आऊँ प्रार्थना कर्ऊँआ कि प्रभु यीशुए री कृपा परमेशरो रे लोका साथे रओ। आमीन्।



तेबे में पवित्र नगर यरूशलेम स्वर्गो पाँदो ते परमेशरो गे ते उतरदे देखेया और से तेसा लाड़िया जेड़ा था, जो आपणे लाड़े री तंई श्रृंगार करोई। तेबे में सिंहासनो ते कोई जोरे की ये बोलदे ऊए सुणेया कि देख, परमेशरो रा डेरा मांणूआ बीचे ए, तेस तिना साथे डेरा करना, सेयो तेसरे लोक ऊणे, परमेशर आपू तिना साथे रणा और तिना रा परमेशर ऊणा।

प्रकाशित वाक्य 21:2-3

Reader's Guide

बघल्याणी at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

Glossary

बघल्याणी at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aidios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Mahasu-Pahari---Baghlayani-Bible/Noted

Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words and may wrongly imply *eternal* or *Hell*. * The note placement is skipped or adjusted for verses with non-standard numbering.

Abyssos

लूका 8:31
रोमियों 10:7
प्रकाशित वाक्य 9:1
प्रकाशित वाक्य 9:2
प्रकाशित वाक्य 9:11
प्रकाशित वाक्य 11:7
प्रकाशित वाक्य 17:8
प्रकाशित वाक्य 20:1
प्रकाशित वाक्य 20:3

aidios

रोमियों 1:20
यहूदा 1:6

aiōn

मत्ती 12:32
मत्ती 13:22
मत्ती 13:39
मत्ती 13:40
मत्ती 13:49
मत्ती 21:19
मत्ती 24:3
मत्ती 28:20
मरकुस 3:29
मरकुस 4:19
मरकुस 10:30
मरकुस 11:14
लूका 1:33
लूका 1:55
लूका 1:70
लूका 16:8
लूका 18:30
लूका 20:34
लूका 20:35
यूहन्ना 4:14
यूहन्ना 6:51
यूहन्ना 6:58
यूहन्ना 8:35
यूहन्ना 8:51
यूहन्ना 8:52
यूहन्ना 9:32
यूहन्ना 10:28
यूहन्ना 11:26
यूहन्ना 12:34
यूहन्ना 13:8
यूहन्ना 14:16

प्रेरितों के काम 3:21
प्रेरितों के काम 15:18
रोमियों 1:25
रोमियों 9:5
रोमियों 11:36
रोमियों 12:2
रोमियों 16:27
1 कुरिन्थियों 1:20
1 कुरिन्थियों 2:6
1 कुरिन्थियों 2:7
1 कुरिन्थियों 2:8
1 कुरिन्थियों 3:18
1 कुरिन्थियों 8:13
1 कुरिन्थियों 10:11
2 कुरिन्थियों 4:4
2 कुरिन्थियों 9:9
2 कुरिन्थियों 11:31
गलातियों 1:4
गलातियों 1:5
इफिसियों 1:21
इफिसियों 2:2
इफिसियों 2:7
इफिसियों 3:9
इफिसियों 3:11
इफिसियों 3:21
इफिसियों 6:12
फिलिपियों 4:20
कुलुस्सियों 1:26
1 तीमुथियुस 1:17
1 तीमुथियुस 6:17
2 तीमुथियुस 4:10
2 तीमुथियुस 4:18
तीतुस 2:12
इब्रानियों 1:2
इब्रानियों 1:8
इब्रानियों 5:6
इब्रानियों 6:5
इब्रानियों 6:20
इब्रानियों 7:17
इब्रानियों 7:21
इब्रानियों 7:24
इब्रानियों 7:28
इब्रानियों 9:26
इब्रानियों 11:3
इब्रानियों 13:8
इब्रानियों 13:21
1 पतरस 1:23

1 पतरस 1:25
1 पतरस 4:11
1 पतरस 5:11
2 पतरस 3:18
1 यूहन्ना 2:17
2 यूहन्ना 1:2
यहूदा 1:13
यहूदा 1:25
प्रकाशित वाक्य 1:6
प्रकाशित वाक्य 1:18
प्रकाशित वाक्य 4:9
प्रकाशित वाक्य 4:10
प्रकाशित वाक्य 5:13
प्रकाशित वाक्य 7:12
प्रकाशित वाक्य 10:6
प्रकाशित वाक्य 11:15
प्रकाशित वाक्य 14:11
प्रकाशित वाक्य 15:7
प्रकाशित वाक्य 19:3
प्रकाशित वाक्य 20:10
प्रकाशित वाक्य 22:5

aiōnios

मत्ती 18:8
मत्ती 19:16
मत्ती 19:29
मत्ती 25:41
मत्ती 25:46
मरकुस 3:29
मरकुस 10:17
मरकुस 10:30
लूका 10:25
लूका 16:9
लूका 18:18
लूका 18:30
यूहन्ना 3:15
यूहन्ना 3:16
यूहन्ना 3:36
यूहन्ना 4:14
यूहन्ना 4:36
यूहन्ना 5:24
यूहन्ना 5:39
यूहन्ना 6:27
यूहन्ना 6:40
यूहन्ना 6:47
यूहन्ना 6:54
यूहन्ना 6:68

यूहन्ना 10:28
यूहन्ना 12:25
यूहन्ना 12:50
यूहन्ना 17:2
यूहन्ना 17:3
प्रेरितों के काम 13:46
प्रेरितों के काम 13:48
रोमियों 2:7
रोमियों 5:21
रोमियों 6:22
रोमियों 6:23
रोमियों 16:25
रोमियों 16:26
2 कुरिन्थियों 4:17
2 कुरिन्थियों 4:18
2 कुरिन्थियों 5:1
गलातियों 6:8
2 थिस्सलुनीकियों 1:9
2 थिस्सलुनीकियों 2:16
1 तीमुथियुस 1:16
1 तीमुथियुस 6:12
1 तीमुथियुस 6:16
2 तीमुथियुस 1:9
2 तीमुथियुस 2:10
तीतुस 1:2
तीतुस 3:7
फिलेमोन 1:15
इब्रानियों 5:9
इब्रानियों 6:2
इब्रानियों 9:12
इब्रानियों 9:14
इब्रानियों 9:15
इब्रानियों 13:20
1 पतरस 5:10
2 पतरस 1:11
1 यूहन्ना 1:2
1 यूहन्ना 2:25
1 यूहन्ना 3:15
1 यूहन्ना 5:11
1 यूहन्ना 5:13
1 यूहन्ना 5:20
यहूदा 1:7
यहूदा 1:21
प्रकाशित वाक्य 14:6

eleēsē

रोमियों 11:32

Geenna

मत्ती 5:22
मत्ती 5:29
मत्ती 5:30
मत्ती 10:28
मत्ती 18:9
मत्ती 23:15
मत्ती 23:33
मरकुस 9:43

मरकुस 9:45
मरकुस 9:47
लूका 12:5
याकूब 3:6

Hadēs

मत्ती 11:23
मत्ती 16:18
लूका 10:15
लूका 16:23
प्रेरितों के काम 2:27
प्रेरितों के काम 2:31
1 कुरिन्थियों 15:55
प्रकाशित वाक्य 1:18
प्रकाशित वाक्य 6:8
प्रकाशित वाक्य 20:13
प्रकाशित वाक्य 20:14

Limnē Pyr

प्रकाशित वाक्य 19:20
प्रकाशित वाक्य 20:10
प्रकाशित वाक्य 20:14
प्रकाशित वाक्य 20:15
प्रकाशित वाक्य 21:8

Sheol

उत्पत्ति 37:35
उत्पत्ति 42:38
उत्पत्ति 44:29
उत्पत्ति 44:31
गिनती 16:30
गिनती 16:33
व्यवस्था विवरण 32:22
1 शमूएल 2:6
2 शमूएल 22:6
1 राजा 2:6
1 राजा 2:9
अय्यूब 7:9
अय्यूब 11:8
अय्यूब 14:13
अय्यूब 17:13
अय्यूब 17:16
अय्यूब 21:13
अय्यूब 24:19
अय्यूब 26:6

भजन संहिता 6:5
भजन संहिता 9:17
भजन संहिता 16:10
भजन संहिता 18:5
भजन संहिता 30:3
भजन संहिता 31:17
भजन संहिता 49:14
भजन संहिता 49:15
भजन संहिता 55:15
भजन संहिता 86:13
भजन संहिता 88:3
भजन संहिता 89:48


भजन संहिता 116:3
भजन संहिता 139:8
भजन संहिता 141:7
नीतिवचन 1:12
नीतिवचन 5:5
नीतिवचन 7:27
नीतिवचन 9:18
नीतिवचन 15:11
नीतिवचन 15:24
नीतिवचन 23:14
नीतिवचन 27:20
नीतिवचन 30:16
सभोपदेशक 9:10
श्रेष्ठगीत 8:6
यशायाह 5:14
यशायाह 7:11
यशायाह 14:9
यशायाह 14:11
यशायाह 14:15
यशायाह 28:15
यशायाह 28:18
यशायाह 38:10
यशायाह 38:18
यशायाह 57:9
यहेजकेल 31:15
यहेजकेल 31:16
यहेजकेल 31:17
यहेजकेल 32:21
यहेजकेल 32:27
होशे 13:14
आमोस 9:2
योना 2:2
हबक्कूक 2:5

Tartaroō

2 पतरस 2:4

Questioned

मत्ती 7:13
मत्ती 7:19
2 थिस्सलुनीकियों 2:3
2 पतरस 2:17




विश्वासो तेई अब्राहमो खे जेबे परमेशरे एकी जगा खे जाणे खे बुलाया तो से आज्ञा मानी की तेसा जगा खे निकली गा, जेती परमेशरो तेसखे तेसरी जायदात देणी थी और से नि जाणो था कि आँऊ केई चली रा, पर फेर बी चली गा -
इब्रानियों 11:8

Israel's Exodus



"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt!'" Exodus 13:17



कईकई आँऊ माणूं रा पुत्र इत्ती खे नि आया कि मेरी सेवा करो, बलिक इत्ती खे आया कि से आपू सेवा करो और बऊत जगोया छुड़ाने खे आपणा प्राण देई देओ। - मत्कुस 10:45



आँऊ पौलुस एसा चिट्टिया खे लिखणे लगी रा जो यीशु मसीह रा दास ए। परमेशरे आँऊ प्रेरित ऊणे खे चुणी राखेया। तिने आँऊ सुसमाचारो रा प्रचार करने खे लग करी राखेया। - रोमियों 1:1

Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophecies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Uusher)

Jesus Christ born 4 B.C.

New Heavens and Earth

1956	Christ returns for his people
1830	Jim Elliot martyrd in Ecuador
1731	John Williams reaches Polynesia
1614	Zinzendorf leads Moravian mission
1572	Japanese kill 40,000 Christians
1517	Jesuits reach Mexico
1455	Martin Luther leads Reformation
1323	Gutenberg prints first Bible
1276	Franciscans reach Sumatra
1100	Ramon Llull trains missionaries
1054	Crusades tarnish the church
997	The Great Schism
864	Adalbert martyrd in Prussia
716	Bulgarian Prince Boris converts
635	Boniface reaches Germany
569	Alopen reaches China
432	Longinus reaches Alodia / Sudan
397	Saint Patrick reaches Ireland
341	Carthage ratifies Bible Canon
325	Ulfilas reaches Goth / Romania
250	Niceae proclaims God is Trinity
197	Denis reaches Paris, France
70	Tertullian writes Christian literature
61	Titus destroys the Jewish Temple
52	Paul imprisoned in Rome, Italy
39	Thomas reaches Malabar, India
33	Peter reaches Gentile Cornelius
	Holy Spirit empowers the Church

(Wikipedia, Timeline of Christian missions)

Resurrected 33 A.D.

What are we? ▶			Genesis 1:26 - 2:3		Mankind is created in God's image, male and female He created us						
How are we sinful? ▶			Romans 5:12-19		Sin entered the world through Adam and then death through sin						
Where are we? ▶			When are we? ▼								
			Innocence		Fallen			Glory			
Who are we? ▶			Eternity Past	Creation 4004 B.C.	Fall to sin No Law	Moses' Law 1500 B.C.	Christ 33 A.D.	Church Age Kingdom Age	New Heavens and Earth		
			God	Father	John 10:30	Genesis 1:31 God's perfect fellowship with Adam in The Garden of Eden	1 Timothy 6:16 Living in unapproachable light			Acts 3:21 Philippians 2:11 Revelation 20:3 God's perfectly restored fellowship with all Mankind praising Christ as Lord in the Holy City	
				Son	God's perfect fellowship		John 8:58 Pre-incarnate		John 1:14 Incarnate		Luke 23:43 Paradise
				Holy Spirit			Psalm 139:7 Everywhere		John 14:17 Living in believers		
			Mankind	Living	Genesis 1:1 No Creation No people		Ephesians 2:1-5 Serving the Savior or Satan on Earth				
				Deceased believing			Luke 16:22 Blessed in Paradise				
				Deceased unbelieving			Luke 16:23, Revelation 20:5,13 Punished in Hades until the final judgment				
			Angels	Holy		Hebrews 1:14 Serving mankind at God's command					
				Imprisoned		2 Peter 2:4, Jude 6 Imprisoned in Tartarus					
				Fugitive		Genesis 1:31 No Fall No unholy Angels	Revelation 20:13 Thalaasa		Matthew 25:41 Revelation 20:10 Lake of Fire prepared for the Devil and his Angels		
First Beast	1 Peter 5:8, Revelation 12:10										
False Prophet	Rebelling against Christ Accusing mankind										
Satan		Revelation 19:20 Lake of Fire		Revelation 20:2 Abbyss							
Why are we? ▶			Romans 11:25-36, Ephesian 2:7		For God has bound all over to disobedience in order to show mercy to all						

Destiny

बघल्याणी at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, "*the gates of Hades will not prevail*," Matthew 16:18. Paul asks, "*Hades where is your victory?*" 1 Corinthians 15:55. John wrote, "*Hades gives up*," Revelation 20:13.

Jesus comforts us saying, "*Do not be afraid*," because he holds the keys to *unlock* death and Hades, Revelation 1:18. Yet too often our *Good News* sounds like a warning to "*be afraid*" because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, "*out of the frying pan, into the fire?*" Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, "*Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. Jesus said, "*You did not choose me, but I chose you*," John 15:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philipians 2:9-11.



तो, तुसे जाओ और सब जातिया रे लोका खे चेला बणाओ, और तिना खे पिता, पुत्र और पवित्र आत्मा रे नाओं ते बपतिस्मा देओ - मत्ती 28:19